

Li Santil hu



Bible in Q'eqchi' (GT:kek;Q'eqchi')

Li Santil hu Bible in Q'eqchi' (GT:kek:Q'eqchi')

copyright © 2000 Wycliffe Bible Translators, Inc.

Language: Q'eqchi'

Translation by: Wycliffe Bible Translators, Inc.

Q'eqchi' [kek], Guatemala

Copyright Information

© 2000, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Q'eqchi'

© 2000, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
f1b065df-5ef5-5c8a-a273-af2b9aefff55

Contents

SAN MATEO	1
SAN MARCOS	51
SAN LUCAS	82
SAN JUAN	136
HECHOS	175
ROMANOS	224
1 CORINTIOS	247
2 CORINTIOS	270
GÁLATAS	284
EFESIOS	292
FILIPENSES	300
COLOSENSSES	306
1 TESALONICENSES	312
2 TESALONICENSES	317
1 TIMOTEO	320
2 TIMOTEO	327
TITO	332
FILEMÓN	335
HEBREOS	337
SANTIAGO	354
1 PEDRO	360
2 PEDRO	367
1 JUAN	371
2 JUAN	377
3 JUAN	378
SAN JUDAS	379
APOCALIPSIS	381

Li Resil li Colba-ib li Quixtz'iba li San Mateo

Lix c'aba'eb lix xe'tonilyucua' li Jesucristo

¹ Sa' li hu a'in tz'ib'anbil retalil jo' q'uialeb lix xe' xtonal li Jesucristo. Li Jesucristo ralal xc'ajol li rey David ut ralal xc'ajol ajcui' laj Abraham. ² Laj Abraham, a'an xyucua' laj Isaac. Laj Isaac, a'an xyucua' laj Jacob. Ut laj Jacob, a'an xyucua' laj Judá jo' eb ajcui' li ras ut li ritz'in. ³ Ut laj Judá ut lix Tamar, a'neb xna' xyucua'eb laj Fares ut laj Zara. Laj Fares, a'an xyucua' laj Esrom. Ut laj Esrom, a'an xyucua' laj Aram. ⁴ Ut laj Aram, a'an xyucua' laj Aminadab. Ut laj Aminadab, a'an xyucua' laj Naasón. Ut laj Naasón, a'an xyucua' laj Salmón. ⁵ Ut laj Salmón ut lix Rahab, a'neb xna' xyucua' laj Booz. Laj Booz ut lix Rut, a'neb xna' xyucua' laj Obed. Ut laj Obed, a'an xyucua' laj Isaí. ⁶ Ut laj Isaí, a'an xyucua' li rey David. Ut li rey David, a'an lix yucua' laj Salomón riq'uin li ixx li quicuan chok' rixakil laj Uriás. ⁷ Ut laj Salomón, a'an xyucua' laj Roboam. Ut laj Roboam, a'an xyucua' laj Abías. Ut laj Abías, a'an xyucua' laj Asa. ⁸ Ut laj Asa, a'an xyucua' laj Josafat. Ut laj Josafat, a'an xyucua' laj Joram. Ut laj Joram, a'an xyucua' laj Uzías. ⁹ Ut laj Uzías, a'an xyucua' laj Jotam. Ut laj Jotam, a'an xyucua' laj Acaz. Ut laj Acaz, a'an xyucua' laj Ezequías. ¹⁰ Ut laj Ezequías, a'an xyucua' laj Manasés. Ut laj Manasés, a'an xyucua' laj Amón. Ut laj Amón, a'an xyucua' laj Josías. ¹¹ Ut laj Josías, a'an xyucua' laj Jeconías jo' eb ajcui' li ritz'in. Eb a'an que'cuan sa' eb li cutan nak eb laj Israel que'chape' ut que'c'ame' aran Babilonia. ¹² Ut nak ac chapbileb chak xbaneb laj Babilonia, laj Jeconías quicuan li ralal. Ut a'an laj Salatiel. Ut laj Salatiel, a'an xyucua' laj Zorobabel. ¹³ Ut laj Zorobabel, a'an xyucua' laj Abiud. Ut laj Abiud, a'an xyucua' laj Eliaquim. Ut laj Eliaquim, a'an xyucua' laj Azor. ¹⁴ Ut laj Azor, a'an xyucua' laj Sadoc. Ut laj Sadoc, a'an xyucua' laj Aquim. Ut laj Aquim, a'an xyucua' laj Eliud. ¹⁵ Ut laj Eliud, a'an xyucua' laj Eleazar. Ut laj Eleazar, a'an xyucua' laj Matán. Ut laj Matán, a'an xyucua' laj Jacob. ¹⁶ Ut laj Jacob, a'an xyucua' laj José, xb̄elom lix María. Ut lix María, a'an lix na' li Jesús. Ut li Jesús, A'an li Cristo. ¹⁷ Cälaju tep li ralal xc'ajol laj Abraham quicuan toj nak quiyo'la laj David. Ac cuan cälaju tep li ralal xc'ajol laj David nak que'c'ame' aran Babilonia. Ut chirix chic a'an, quicuan cui'chic cälaju tep li ralal xc'ajol chalen toj nak quiyo'la li Cristo.

Li c'a'ru quic'ulman nak quiyo'la li Cristo

¹⁸ Ut lix yo'lajic li Jesucristo, jo'ca'in nak quicuan: Lix María lix na' li Jesús ac tz'amanbil xban laj José. Toj maji' neque'xlak'ab rib nak lix María quicana chi yaj aj ixx xban xcuanquil li Santil Musik'ej. ¹⁹ Ut xban nak t̄ic xch'ol laj José, li ac xtz'aman re, inc'a' quiraj xc'utbal xxutən lix María. Xraj raj xcanabanquil chi mukmu. ²⁰ Ut yo chixc'oxlanquil a'in laj José nak jun lix ángel li Kacua' quic'utbesi rib chiru sa' xmatc' ut quixye re: —At José, ralalat li rey David, matc'oxlac chixc'ambal lix María chok' acuixakil. A'an xcana chi yaj aj ixx xban xcuanquil li Santil Musik'ej. ²¹ Tacuānq jun lix c'ula'al ch'ina telom. Ut Jesús taq'ue chok' xc'aba' xban nak a'an taq'colok re lix tenamit sa' lix maqueb, chan. ²² Chixjunil a'an quic'ulman re nak t̄atz'aklok ru li quixye li profeta Isaías jo' nak quiyehe' re xban li Kacua'. ²³ A'an a'in li quixye: Jun xka'al toj maji' cuanjenak riq'uin cuink tacuānq lix c'ula'al ch'ina telom. Ut Emanuel taq'uehek' chok' xc'aba'. (Is. 7:14)

Chi jabil ru Emanuel naraj naxye “Li Dios cuan kiq’uin”. ²⁴ Nak qui-aj ru laj José, quixbanu li c'a'ru quiyehe' re xban lix ángel li Kacua' sa' xmatc'. Quixc'am lix María sa' rochoch. ²⁵ Abanan inc'a' quicuan riq'uin toj quiyo'la li xbén c'ula'al. Ut Jesús quixq'ue chok' xc'aba'.

2

Eb laj k'e que'cuulac chixsic'bal li Jesús

¹ Nak cuank chok' rey laj Herodes, li Jesús quiyo'la aran Belén xcient Judea. Cuanqueb aj k'e que'chal chak sa' releb sak'e ut que'cuulac Jerusalén. ² Que'patz'oc ut que'xye: —¿Bar cuan lix reyeb laj judío xyo'la? Xochal xban nak xkil chak toj sa' releb sak'e li chahim retatal lix yo'lajic ut xochal chixlok'oninquil, chanqueb. ³ Ut nak quirabi a'an, li rey Herodes quisach xch'ol ut qui-oc xc'a'ux jo' ajcui' chixjunileb li cuanqueb Jerusalén. ⁴ Ut laj Herodes quixch'utubeb chixjunil li xbénil aj tij jo' eb ajcui' laj tz'ib sa' li tenamit ut quixpatz' reheb bar tayo'lak li Cristo. ⁵ Ut eb a'an que'chak'oc ut que'xye re: —Aran Belén xcient Judea xban nak jo'can tz'ibanol chak xban li profeta. ⁶ Jo'ca'in tz'ibanol sa' li Santil Hu:

Li tenamit Belén, xch'och'eb laj Judá, moco k'axal ca'ch'in ta lix cuanquil sa' xyankeb li xninkal ru tenamit re Judá xban nak aran taelk jun Acuabej ut a'an taberesink re lin tenamit Israel. (Mi. 5:2)

⁷ Tojo'nak laj Herodes quixbokeb laj k'e sa' mukmu ut quixpatz' reheb jok'e tz'akal quic'utun li chahim. ⁸ Ut nak quixtaklaheb Belén quixye reheb: —Ayukex aran Belén ut q'uehomak ech'ol chixsic'bal toj retatal li c'ula'al. Ut nak tetau chak, toleye cue re nak tinxic ajcui' lain ut toxinlok'oni chak, chan. ⁹ Ut nak que'rabi li quixye li rey, eb laj k'e que'coeb. Ut li chahim li que'r'il chak sa' releb sak'e yo chi xic c'amol be chiruhéb tojo'nak quixakli sa' xbén li na'ajej cuan cui' li c'ula'al. ¹⁰ Ut c'ajo' nak que'saho' sa' xch'oleb chiribal li chahim nak quixakli sa' xbén li na'ajej a'an. ¹¹ Ut nak que'oc sa' li cab, que'xtau li c'ula'al rochben lix María li na'bej. Ut que'xcuik'ib rib chiru li Jesús ut que'xlok'oni. Ut que'zte lix c'ulebaleb ut que'xq'ue lix matan. Ut li matan li que'xq'ue, a'an li oro, li incienso ut li sununquil ban mirra xc'aba'. ¹² Ut que'c'utbesic chiruhéb xban li Dios sa' xmatq'ueb nak inc'a' chic te'suk'ik riq'uin laj Herodes. Sa' jalan chic be que'xc'am nak que'suk'i sa' xtenamiteb.

Laj José ut lix María que'xc'am li Jesús Egipto re xcolbal chiru laj Herodes

¹³ Ut nak ac xcoeb laj k'e, jun x-ángel li Kacua' quixc'ut rib chiru laj José sa' xmatc' ut quixye re: —Cuaclin, c'am li c'ula'al jo' cui' lix na'. Tex-elk arin ut ayukex sa' li tenamit Egipto. Ut aran texcanak toj lain toxinnehok acue. Tex-elelik xban nak laj Herodes oc re chixsic'bal li c'ula'al re xcamsinquil. —¹⁴ Ut laj José qui-aj ru, quicuacli ut quixc'am li c'ula'al jo' cui' lix na' ut sa' ajcui' li k'ojojin a'an que'coeb Egipto. ¹⁵ Ut que'cuan aran Egipto toj quicam laj Herodes. A'an quic'ulman jo' quixtz'iba li profeta li quiyehe' re xban li Kacua' nak quixye: Sa' li tenamit Egipto quinbok chak lí cualal, chan. (Os. 11:1) ¹⁶ A'ut laj Herodes nak quiril nak quibalak'ic xbaneb laj k'e, k'axal nak quichal xjosk'il. Ut quixtakla xcamsinquil chixjunileb li coc' telom cuanqueb Belén, jo' cui' sa' eb li na'ajej cuanqueb chixc'atk. Que'camsic chixjunileb li coc' telom li toj c'ula'aleb jun xxiquip aj ca'cab chihab xban nak quixbir rix c'a'ru li cutan quiyo'la cui' li c'ula'al jo' quiyehe' re xbaneb laj k'e. ¹⁷ Jo'can nak quitz'akloc ru li yebil xban li profeta Jeremías nak quixye chi jo'ca'in:

18 Qui-abij li yabac sa' li tenamit Ramá xban li nimla rahil ch'olej, ut yot'ba ch'olej li que'xc'ul. A'an eb li ixk aj Israel nak yoqueb chi yabac chirixeb lix coc'al. Ut inc'a' chic neque'raj xc'ojobanquil xch'oleb xban nak ac camenakeb chic lix coc'aleb. (Jer. 31:15)

Que'suk'i cui'chic Nazaret

19 Ut nak quicam laj Herodes, jun x-ángel li Kacula' quixc'utbesi rib chiru laj José sa' xmatc' aran Egipto. **20** Ut quixye re: —Cuaclin. C'am li c'ula'al jo' cui' li na'bej ut texxic cui'chic sa' li tenamit Israel xban nak xe'cam li que'ajoc re xcamsinquel li c'ula'al, chan. **21** Ut laj José quicuacli, quixc'am li c'ula'al jo' cui' lix na' ut quichal sa' li tenamit Israel. **22** Ut nak quirabi resil nak a' laj Arquelao chic li rey aran Judea rekaj laj Herodes lix yucua', laj José quixucuac chi xic aran. Ut nak quic'utbesic chiru sa' xmatc', que'coeb sa' jun na'ajej xcuént Galilea. **23** Que'chal ut que'cuan sa' jun li tenamit Nazaret xc'aba' xcuént Galilea. A'in quic'ulman jo' que'xye li profeta nak que'xye nak aj Nazaret tixc'aba'in.

3

Laj Juan laj Cubsihom Ha' quixch'olob xyalal chirix li Jesús

1 Mokon chic quicuulac laj Juan laj Cubsihom Ha' sa' li chaki ch'och' cuan Juan. Yo chixch'olobanquil xyalal chirix lix nimajcual cuanquil li Dios. Quixye chi jo'ca'in: **2** —Chiyot'ek' ech'ol ut chejal ec'a'ux xban nak yo chak chi chalc li taq'uehek' sa' xcuانquil xban li Dios. Ut a'an chic tacuank xcuانquil sa' xbeneb li ralal xc'ajol. **3** Li profeta Isaías quiatinac chirix laj Juan nak quixye chi jo'ca'in:

À'an tach'olobank xyalal chi cau xyab xcuént sa' li chaki ch'och', ut tixye:
Yibomak le yu'am ut yo'on cuankex chixc'ulbal li Kacula' jo' nak
neque'xyib li be re xc'ulbal junak li nim xcuانquil, chan. (Is. 40:3)

4 Li rak' narosci laj Juan, a'an yibanbil riq'uin rix li xul camello ut lix c'amal xsa' a'an yal tz'um. Aj sac' naxtzaca riq'uin xya'al sak c'au. **5** Yalak bar que'chal chak li que'cuulac chirabinquil li c'a'ru yo chixyebal laj Juan. Nabal que'chal Jerusalén. Nabal que'chal chak Judea ut nabal cui'chic que'chal chak nach' riq'uin li nima' Jordán. **6** Que'xxoto xmaqueb ut laj Juan naxcubsiheb xha' sa' li nima' Jordán. **7** Nak quiril nabaleb xcomoneb laj fariseo ut xcomoneb laj saduceo yoqueb chi cuulac yal re nak te'cubsik xha'eb, quixye reheb: —Laex chanchanex li ral li c'ambolay. ¿Ani xyehoc ere laex nak taruk tecol erib chiru lix josk'il li Dios li tachalk sa' eben?

8 Chebanuhak ban li us re nak tac'utunk nak xyot'e' ech'ol ut xejal ec'a'ux. Chanchanakex li che' chabil li ru naxq'ue. **9** Mec'oxla nak inc'a' tec'ul xjosk'il li Dios yal xban nak laex ralal xc'ajol laj Abraham. Lain tinye ere nak li Dios taruk tixyo'obtesi li pec a'in chok' ralal xc'ajol laj Abraham. **10** Q'uehomak retal xban nak chalc re li rakba atin sa' eben jo' nak ac cauresinbil li mal re xyoc'bal lix xe' li che'. Ut chixjunil li che' inc'a' chabil li ru naxq'ue, nayoc'man ut naq'ueman sa' xam. **11** Yal nak lain nincubsi eha' riq'uin ha' retailil nak xyot'e' ech'ol ut xejal ec'a'ux. Abanan chalc re li k'axal nim xcuانquil. Xban nak k'axal nim xcuانquil chicuñ lain, moco inc'ulub ta nak tincuisi lix xab. A'an tixcubsi eha' riq'uin li Santil Musik'ej ut riq'uin xam. **12** Ac cuan chak sa' ruk' lix c'anjelebal. Ut tarapu ru chi us li riyajil li trigo ut tixch'utub lix trigo sa' lix c'ulebal ut li rix tixc'at sa' li xam li ma' jaruj nachup, chan laj Juan.

Quicube xha' li Jesús xban laj Juan

¹³ Ut quicuulac xk'ehil nak li Jesús quichal chak Galilea. Quicuulac riq'uin laj Juan re nak tacubsiik xha' xban sa' li nima' Jordán. ¹⁴ Abanan laj Juan inc'a' raj quiraj xcubsinq'il xha' ut quixye re: —Macua' raj lain tincubsink aha'. Laat raj ban tattacubsinh inha' lajin, chan. ¹⁵ Ut li Jesús quichak'oc ut quixye re: —Us takabánu anakcuan xban nak tento tauxmank chixjunil li c'a'ru naxye li Dios, chan. Tojo'nak quixc'uluban xch'ol laj Juan. ¹⁶ Ut nak ac xcubsjc xha' li Jesús, qui-el chak sa' li ha'. Ut sa' junpat quiteli li choxa chiru ut quiril li Santil Musik'ej chanchan jun li paloma nak yo chak chi cubec sa' xben li Jesús. ¹⁷ Ut qui-abic xyab xcux li Dios toj sa' choxa nak quixye: —A'an a'in li cualal raro inban. Nasáho' inch'ol riq'uin, chan.

4

Li Jesús quiyale' ralenquil xban laj tza

¹ Tojo'nak li Jesús quic'ame' xban li Santil Musik'ej sa' li chaki ch'och' re tayalek' ralenquil xban laj tza. ² Nak ac xbanu x-ayun ca'c'al cutan ca'c'al k'ojojin quitz'oca. ³ Ut laj tza quicuulac riq'uin ut quixye re: —Cui tz'akal yal nak laat ralal li Dios, suk'isiheb chok' caxlan cua li pec a'in.— ⁴ Quichak'oc li Jesús ut quixye: —Inc'a' tinbanu a'an xban nak tz'ibánbil retalil sa' li Santil Hu:

Macua' ca'aj cui' riq'uin li naxtzaca yo'yo cui' li cuink; riq'uin ban li atin li naxye li Dios. (Dt. 8:3)

⁵ Tojo'nak quic'ame' xban laj tza sa' li santil tenamit Jerusalén; ut cox-akabák toj takec' sa' xben li rochoch li Dios. ⁶ Ut laj tza quixye re: —Cui tz'akal yal nak laat ralal li Dios, cut ącuib tak'a. Mac'a' tąc'ul xban nak jo'ca'in tz'ibánbil sa' li Santil Hu:

Tixtaklaheb lix ángel chàcuibal ut riq'uin ruk'eb tate'xchap re nak inc'a' tątoch' la cuok chiru pec. (Sal. 91:11-12)

⁷ Ut li Jesús quichak'oc ut quixye re: —Tz'ibánbil ajcui' sa' li Santil Hu chi jo'ca'in:

Matz'ama xmilagro li Kacua' la Dios yal chi mac'a' rajbal. (Dt. 6:16)

⁸ Ut quic'ame' cui'chic xban laj tza sa' xben jun li tzul k'axal najt xteram. Ut laj tza quixc'ut chak chiru li Jesús chixjunil li tenamit li cuan sa' ruchich'och' jo' ajcui' lix nimal lix lok'al cuan chi sa'. ⁹ Ut quixye re li Jesús: —Chixjunil a'in tinq'ue acue cui laat tącuik'ib ącuib chicuu ut tinalok'oni.— ¹⁰ Tojo'nak li Jesús quichak'oc ut quixye re: —Elen chicuu laat aj tza, xban nak jo'ca'in tz'ibánbil sa' li Santil Hu:

Li Kacua' la Dios tąlok'oni ut ca'aj cui' chiru a'an tatc'anjelak. (Dt. 6:13)

¹¹ Tojo'nak quicanabac xban laj tza ut eb li ángel que'cuulac ut que'c'anjelac chiru.

Xticlajic xc'anjel li Jesús

¹² Nak li Jesús quirabi resil nak laj Juan cuan chi prexil, co Nazaret xcuent Galilea. ¹³ Qui-el Nazaret ut co Capernaum. Ut aran quicana. Li tenamit a'an cuan chire li palau sa' xch'och'eb laj Zabulón ut eb aj Neftalí. ¹⁴ A'in qui'ulman jo' quixye li profeta Isaías nak quixye chi jo'ca'in:

¹⁵ Aran sa' xch'och' laj Zabulón ut sa' xch'och' laj Neftalí, li cuan chire li be li naxic sa' li palau, aran jun pac'al li nima' Jordán, sa' li na'ajej Galilea bar neque'cuan cui' li macua'eb aj judío,

¹⁶ li tenamit chanchan li cuanqueb sa' k'ojojin xban nak inc'a' neque'xnau lix yáral. Chanchan quicutano' nak que'ril nak que'xtau li colba'-ib.

Chanchan nak cuanqueb sa' jun na'ajej re c̄amc xban lix māqueb nak quicuulac li cutan sa' xyānkeb. (Is. 9:1-2)

¹⁷ Chalen nak quicuulac aran, li Jesūs yo chixch'olobanquil li xyalal ut quixye: —Chiyot'ek' ech'ol ut jalomak ec'a'ux xban nak cuulac re xk'ehil nak tñq'uehek' sa' incuanquil xban li Dios. Ut lāin chic cuānk incuanquil sa' xbñeb li cuatal inc'ajol.—

Li Jesūs quixbok cahib aj car re nak te'xic chirix

¹⁸ Sa' jun cutan nak coxnumek' li Jesūs chire li palau cuan Galilea, quirileb cuib li cuink ritz'ineb rib. Li jun, a'an laj Simón. Aj Pedro nayeman re. Li jun chic aj Andrés xc'aba'. Yoqueb chixq'uebal lix yoy sa' li palau xban nak a'aneb aj chapol car. ¹⁹ Li Jesūs quixye reheb: —Chinetake. Mācu'a chic caribc tebānu. Eras eritz'in ban chic tēsic' re te'pabank, chan reheb. ²⁰ Ut sa' junpat que'xcanab lix yoy ut que'xtake li Jesūs. ²¹ Junpat na chic quibec li Jesūs nak quixtauheb cui'chic cuibeb li cuink ritz'ineb rib. A'aneb laj Jacobo ut laj Juan. Cuanqueb sa'lix jucub rochben laj Žebedeo lix yucua'eb. Yoqueb chixxítinquel lix yoy. Ut li Jesūs quixbokeb re nak te'xic chirix. ²² Ut sa' junpat que'xcanab lix yucua'eb ut que'xcanab li jucub ut que'xtake li Jesūs. ²³ Ut li Jesūs quixbeni chixjunil li na'ajej Galilea. Yo chixc'utbal lix yālal sa' eb li cab li neque'xch'utub cui'ribeb laj judío. Quixch'olob xyalal li chabil esilal chirix lix cuanquidal li Dios. Ut yo chixq'uirtesinquel chixjunil li q'uila pay ru chi yajel ut li raylal. ²⁴ Quicuulac resil sa' chixjunil li na'ajej Siria li c'a'ru yo chixbanunquel li Jesūs aran Galilea. Ut que'xc'am riq'uin chixjunileb li yaj. Q'uila pay ru lix yajeleb ut lix raylaleb. Cuan li toj nak'ehin xyajeleb. Ut cuan li cuanqueb maus aj musik'ej riq'uineb ut cuanqueb ajcui' li sic. Ut li Jesūs naxq'uirtesiheb. ²⁵ Ut quitakec xbaneb li q'uila tenamit. Cuan li que'chal chak Galilea. Cuan li que'chal chak Decápolis. Cuan li que'chal chak Jerusalén. Cuan li que'chal chak Judea jo' ajcui' jun pac'al li nima' Jordán.

5

Li Jesūs naxch'olob xyalal sa' xben li tzul

¹ Ut nak quirileb li q'uila tenamit, li Jesūs quitake' sa' xben jun li tzul. Ut nak quic'oja, eb li yoqueb chixtakenquel que'xch'utub rib riq'uin. ² Quioc chixch'olobanquil li xyalal chiruheb ut quixye: ³ —Us xak reheb li neque'rec'a nak cubenak xcuanquileb xban nak eb a'an cuankeb chic rubel lix nimajcual cuanquidal li Dios. ⁴ Us xak reheb li neque'yabac xban xrahileb xch'ol xban nak eb a'an tac'ojobák xch'oleb. ⁵ Us xak reheb li tulaneb xban nak eb a'an te'echanink re li na'ajej li yechi' inbil reheb xban li Dios. ⁶ Us xak reheb li te'raj ru xbanunquel li tiquilal. Chanchan li te'tz'ocák ut te'chakik re. Us xak reheb xban nak li Dios tatenk'ank reheb chixbanunquel li us. ⁷ Us xak reheb li neque'uxtanan u xban nak eb a'an te'uxtanax ruheb xban li Dios. ⁸ Us xak reheb li tiqueb xch'ol xban nak eb a'an te'r'il ru li Dios. ⁹ Us xak reheb li neque'xtenk'a ras ritz'in chi cuanc sa' tuktuquil usilal xban nak eb a'an ralal xc'ajol li Dios te'yehék' reheb. ¹⁰ Us xak reheb li neque'rahobtesic sa' xc'aba' li tiquilal, xban nak eb a'an cuankeb chic rubel lix cuanquidal li Dios. ¹¹ Us xak ere nak texhobek' ut texrahobtesik sa' inc'aba' ut tayehék' ere c'a'ak re ru chi māusilal chi yal tic'ti. ¹² Miraho' ech'ol. Chisahok' ban ech'ol riq'uin li c'a'ru tauzxk ere xban nak k'axal nim le' k'ajcamunquil taq'uehek' ere sa' choxa. Moco ca'aj cui' ta laex yoquex chi c'uluc re li raylal. Jo'can aj ban cui' que'xc'ul li profeta li que'cuan junxil.

Li ratz'amil li ruchich'och'

¹³ Laex aj pabanel chanchanex li atz'am li nac'anjelac arin sa' ruchich'och'. Cui ta'li atz'am t̄asachk xqui'al, ¿c'a' ta raj chic ru t̄aoc cui'? Mac'a' chic t̄aoc cui'. Yal re tz'ekc' aj chic ut re yek'ic.

Lix saken li ruchich'och'

¹⁴ Laex aj pabanel, laex lix cutan saken li ruchich'och'. Junak tenamit cuan sa' xben junak tzul ma jaruj naru xmukbal. ¹⁵ Chi moco nalochnam junak candil re xq'uebal rubel junak chacach. Naq'ueman ban sa' xben xna'aj candil re nak tixcutanobresi sa' li cab li cuanqueb cui' chixjunileb. ¹⁶ Jo'can ajcui' laex. Laex lix cutan saken li ruchich'och'. Chic'utunbik' le chabilal chiruhéb le ras eritz'in re nak eb a'an te'xq'ue retal li us nequebanu ut te'xq'ue xlok'al le Yucua' li cuan sa' choxa.

Li Jesús naxch'olob xyalal li chak'rab

¹⁷ Mec'oxla nak xinchal chixsachbal xcuanquil li chak'rab li quiq'uehe' re laj Moisés chi moco li ac xole'xye li profeta. Inc'a' xinchal chixsachbal xcuanquil a'an. Xinchal ban re nak t̄atz'aklok ru a'an. ¹⁸ Relic chi yal tinye ere nak taosok' li choxa, taosok' li ruchich'och', ut yal ta jun xletril chi moco junak retalil li chak'rab t̄asachk xcuanquil. Toj retal talaje'ulmank chixjunil. ¹⁹ Li ani naxk'et li chak'rab, usta nac'utun nak inc'a' nim xcuanquil chiru a'an, ut cui naxc'ut chiru li ras ritz'in xbanunquil chi jo'can, li jun a'an k'axal ca'ch'in lix lok'al t̄aq'uehek' re sa' lix nimajcual cuanquinal li Dios. Abanan li ani naxbanu chi tz'akal li naxye li chak'rab, ut tixc'ut chiru li ras ritz'in xbanunquil chi jo'can, li jun a'an k'axal nim lix lok'al t̄aq'uehek' re sa' lix nimajcual cuanquinal li Dios. ²⁰ Tinye ajcui' ere nak cui lix t̄iquilal le ch'ol inc'a' tixk'ax ru xt̄iquilal xch'oleb laj tz'ib ut eb laj fariseo, inc'a' tex-oc rubel lix nimajcual cuanquinal li Dios.

Li Jesús naxch'olob xyalal chirix li josk'il

²¹ Erabiom resil li chak'rab nak yebil rehēb li kaxe' katon: Macamsi acuas acuitz'in. Li ani tacamsink, toj tixtoj rix sa' rakba atin. ²² Aban lain tinye ere lix yalal a'an. Li ani tajosk'ok riq'uin li ras ritz'in tarakek' atin sa' xben. Ut li ani tixt'ektana li ras ritz'in cuan xmāc chiru laj rakol atin. Ut li ani tixye xyaj tiox re li ras ritz'in, mare anchal t̄axic sa' xxamlel li xbalba. ²³ Jo'can nak cui sa' xq'uebal la mayej chiru li artal tajulticok' acue nak t̄arec'a sa' xch'ol la cuas acuitz'in nak cuan amāc chiru, ²⁴ canab aran la mayej, ut ayu, c'am chak acuib sa' usilal riq'uin la cuas acuitz'in, tojo'nak toxak'axtesi la mayej. ²⁵ Cui cuan la ch'a'ajquinal riq'uin la cuas acuitz'in, yib ru chi junpat. Cui inc'a' nacac'am acuib sa' usilal chi junpat, mare anchal tatxc'am riq'uin laj rakol atin ut a'an tatxtakla sa' tz'alām. ²⁶ Ut inc'a' tat-ekl aran cui inc'a' t̄atoj chixjunil li jo' q'ual te'xpatz' acue. Relic chi yal ninye acue nak tento t̄ac'am acuib sa' usilal riq'uin la cuas acuitz'in.

Li Jesús naxch'olob xyalal chirix li muxuc caxar

²⁷ Erabiom resil nak quiyeman najter: Matmuxuc caxar. ²⁸ Ut lain tinye ere nak yalak ani tixca'ya junak ixs re xrahinquill ru, ac xmux ru lix sumlajic xban xrahinquill ru. ²⁹ Le najter na'leb tento tecanab chi junaj cua. Li c'a'ak re ru t̄aq'uehok ere chi macobc, tetz'ektana. Cui li xnak' la cuu li cuan sa' anim naq'uehoc acue chi macobc, us raj nak tacuisi ut t̄atz'ek. K'axal us nak t̄asachk li xnak' acuu chiru nak tatxic laat sa' xbalba. ³⁰ Cui la nim uk' naq'uehoc acue chi macobc, us raj cui tayoc' ut t̄atz'ek. K'axal us nak t̄asachk la cuuk' chiru nak tatxic laat sa' xbalba.

Li Jesús naxch'olob xyalal chirix li jachoc ib

³¹ Ut yebil ajcui' chi jo'ca'in: Li ani tixjach rib riq'uin li rixakil, tento nak tixyib li hu re xjachbal rib ut tixq'ue re. ³² Abanan lajin ninye ere li xyalal a'an. Li ani naxjach rib riq'uin li rixakil chi inc'a' xmux ru xsumlajic li ixakilbej, a' li belomej cuan xmac nak li ixb a'an tixmux ru xsumlajic. Ut li ani tac'amok re li ixb, li ac xcanabac xban xbəlom, li cujnk a'an naxmux ru li sumsu.

Li Jesús naxch'olob xyalal chirix li juramento

³³ Erabiom resil nak quiyehe' rebeb le xe'tonil yucua' chi jo'ca'in: Li c'a'ak re ru teyechi'i xbanunquil riq'uin juramento, tento tebanu. ³⁴ Abanan lajin tinye ere tento tebanu li c'a'ru teyechi'i ut mebanu li juramento chi mac'a' rajbal. Mepatz' xc'aba' li choxa xban nak a'an xna'aj li Dios. ³⁵ Ut mepatz' xc'aba' li ruchich'och' xban nak a'an xna'aj li rok. Ut mepatz' xc'aba' li tenamit Jerusalén xban nak a'an xtenamit li nimajcual Dios, li tz'akal Rey. ³⁶ Chi moco tebanu li juramento sa' xc'aba' le jolom xban nak laex inc'a' naru tesakobresi le rismal chi moco naru tek'ekobresi. ³⁷ Jo'ca'in ban tebanu. Cui teye nak yal, junes yal teye. Ut cui teye nak inc'a', junes inc'a' teye. Cui teg'ue xtz'akob li atin a'an, li na'leb a'an riq'uin laj tza nachal.

Li xyalal chirix xrqbaleb li xic' neque'iloc ke

³⁸ Erabiom resil nak quiyehe' chi jo'ca'in najter: Cui ani tarisi xnak' acuu, taisik ajcui' li xnak' ru a'an. Cui ani tarisi li ruch acue, taisik ajcui' li re a'an. ³⁹ Abanan lajin tinye ere: Mesume mausilal riq'uin mausilal. Cui junak tixq'ue junak ruk' sa' acuu, q'ue cui' chic chixsac' li jun pac'al. ⁴⁰ Li ani taraj tatxc'am riq'uin laj rakol atin ut taraj xmak'bal la camis, q'ue ajcui' la chaquet re. ⁴¹ Cui ani taminok acuu chix'ambal li rik jun kilómetro, c'am cuibak kilómetro laat. ⁴² Li ani tixtz'ama c'a'ru re acue, q'ue re. Ut li ani taajok to'oninc acuiq'uin, mak'etk'eti acuib chiru. ⁴³ Erabiom resil nak tera li ani narahoc ere ut xic' teril li xic' na-iloc ere. ⁴⁴ Abanan lajin tinye ere, cherahak li xic' na-iloc ere. Chetz'ama usilal sa' xbeneb li neque'hoboc ere. Chebanuhak li us rebeb li xic' neque'iloc ere ut chextijok chirix li neque'banun mausilal ere ut neque'rahobtesin ere. ⁴⁵ Cui tebanu chi jo'can, laexak ralal xc'ajol le Yucua' cuan sa' choxa. A'an naq'uehoc chak li sak'e sa' xbeneb li useb xna'leb jo' ajcui' li inc'a' useb xna'leb. Ut a'an ajcui' naq'uehoc chak li hab sa' xbeneb li tiqueb xch'ol jo' ajcui' li inc'a' tiqueb xch'ol. ⁴⁶ Cui ca'aj cui' li neque'rahoc ere nequera, ¿c'a'ru le k'ajcamunquil tec'ul? ¿Ma inc'a' ta bi' jo'can ajcui' neque'xbanu eb laj titz'ol toj, li neque'balak'in? ⁴⁷ Ut cui ca'aj cui' le rech tenamit nequeq'ue xsahil xch'oleb, ¿c'a'ru rusil a'an? ¿Ma inc'a' ta bi' jo'can ajcui' neque'xbanu li inc'a' neque'xpab li Dios? ⁴⁸ Ticak bi' ech'ol jo' le Yucua' li cuan sa' li choxa tíc xch'ol.

6

Li xyalal chirix xbanunquil usilal

¹ Cheq'uehak retal c'a'ru nequebanu. Cui laex tebanu li usilal yal re nak tex-ilek' jo' neque'xbanu eb laj fariseo, mac'a'ak le k'ajcamunquil riq'uin le Yucua' cuan sa' choxa. ² Ut nak tasi li c'a'ak re ru re li ani taraj tenk'ac, mabanu jo' neque'xbanu laj ca'pac'al u. Eb a'an neque'xic sa' li cab li neque'xch'utub cui' ribeb laj judío ut sa' eb li c'ayil chixyebal resil li usilal neque'xbanu re nak te'q'uehek' xlok'al xbaneb li cujnk. Relic chi yal tinye ere nak eb a'an ac xe'xc'ul lix k'ajcamunquil nak que'q'uehe' xlok'al xbaneb li cujnk. ³ Li c'a'ru tasi re li mac'a' cuan re, ma ani aj e taserak'i li c'a'ru xasi, chi

moco t̄aserak'i re li tz'akal ̄cuamig. ⁴ Chab̄anu ban chi mukmu ut la yucua' li naxnau chixjunil li c'a'ak re ru nacab̄anu, a'an li t̄ak'ajcamunk ̄cue.

Li Jesúis naxch'olob xyalal li tijoc

⁵ Ut nak textijok moco jo'cakex ta eb laj ca'pac'al u. Eb a'an neque'xxakab chak ribeb chi tijoc sa' eb li cab li neque'xch'utub cui' ribeb laj judío ut neque'xxakab rib chi tijoc sa' xala be yal re nak te'ilek'. Relic chi yal tinye ere nak eb a'an ac xe'xc'ul lix k'ajcamunquileb nak que'q'uehe' xlōk' al xbaneb li cujnk. ⁶ Ut nak textijok laex, ocankek sa' le rochoch, tz'apomak re li cab, ut tijonkex chiru le Yucua' li inc'a' na-ilman ru. Ut le Yucua' li naril chixjunil li c'a'ru nequebanu, a'an t̄ak'ajcamunk ere. ⁷ Ut nak textijok,meye q'uila atin chi mac'a' rjabal jo' neque'xbanu li inc'a' neque'xpab li Dios. Eb a'an neque'xc'oxla nak riq'uin li q'uila atin, te'abik xban li Dios. ⁸ Mejuntak'eta bi' erib riq'uin eb a'an xban nak le Yucua' naxnau c'a'ru nac'anjelac ere chi toj maji' nequetz'ama chiru. ⁹ Ut laex jo'ca'in nak textijok:

At Kacua', cuancat sa' li santil choxa, lok'oninbilak taxak la santil c'aba'.

¹⁰ Chichalk ta la nimajcual cuanquinal. Chi-uxk ta li nacacuaj, jo' sa' choxa jo' ajcui' sa' ruchich'och'.

¹¹ Chaq'ue taxak ke li kacua kuc'a chi cuulaj cuulaj.

¹² Ut chacuy chasach ta li kamac' jo' nak nakacuyeb xmac li neque'macob chiku.

¹³ Ut moaq'ue taxak chi alec. Choacol ban chiru li inc'a' us. Acue li nimajcual cuanquinal, li lok'onic ut li lok'al chi junelic k'e cutan. Jo'can taxak.

¹⁴ Cui nequecuy xmaqueb le ras eritz'in, tixcuy ajcui' emac laex le Yucua' cuan sa' choxa. ¹⁵ Cui inc'a' nequecuy xmaqueb le ras eritz'in, jo'can ajcui' laex inc'a' tacuyek' emac xban le Yucua' cuan sa' choxa.

Li Jesúis quixch'olob xyalal li ayunic

¹⁶ Ut nak tebanu le ayun, mebanu jo' neque'xbanu laj ca'pac'al u. Eb a'an neque'xbanu rib nak raheb sa' xch'ol yal re nak tana'ek' nak yoqueb xbanunquil lix ayun. Relic chi yal tinye ere nak eb a'an ac xe'xc'ul lix k'ajcamunquil. ¹⁷ A'ut laex nak tebanu le ayun, tech'aj le ru ut teyib erib chi us. ¹⁸ re nak inc'a' tac'utunk chiruheb le ras eritz'in nak yoquex chi ayunic. Chic'utunk ban chiru le Yucua' li inc'a' na-ilman ru. Ut le Yucua' li naxnau chixjunil li nequebanu, a'an t̄ak'ajcamunk ere.

Li kabiomal sa' choxa

¹⁹ Meq'ue ech'ol chixc'ulanquil ̄biomal sa' ruchich'och' bar cui' namaxen ut nak'olen ru ut bar cui' neque'oc laj elk' chi elk'ac. ²⁰ Q'uehomak ban ech'ol chirix le biomal cuan sa' choxa bar cui' inc'a' namaxen chi moco nak'olen ru ut bar cui' inc'a' taek'ak. ²¹ Jo'can nak chenauhak nak bar cuan cui' le biomal, aran ajcui' cuank le c'a'ux. ²² Li xnak' eru chanchan jun li lámpara. Xban nak na-iloc li xnak' eru, cuanquex sa' cutan. Chanchan le na'leb. Cui chabil le na'leb, cuanquex sa' cutan saken. ²³ Cui ut inc'a' saken na-iloc li xnak' eru, cuanquex sa' k'ojojin. Ut jo'can ajcui' le na'leb. Cui inc'a' chabil le na'leb xban nak junes le biomal nequec'oxla, cuanquex sa' xk'ojojinal ru li mac. ²⁴ Ma ani naru nac'anjelac chiru cubi chi patrón. Naru tixra li jun ut tixtz'ektna li jun chic malaj ut xic' taril li jun ut tix-oxlok'i li jun chic. Jo'can nak ma jok'e naru tec'oxla li Dios cui ca'aj cui' le biomal nequec'oxla.

Mexc'oxlac chirix chanru t̄enumsi li cutan junjunk arin sa' ruchich'och'

²⁵ Jo'can ut nak ninye ere: Mixic ech'ol chirix le cua eruc'a chi moco chirix chanru t̄etikib erib. ¿Ma inc'a' ta bi' k'axal lok' li kayu'am chiru li c'a'ru takatzaca? ¿Ma inc'a' ta bi' k'axal lok' li kayu'am chiru li kak? ²⁶ Cheq'uehak

retal li xul li neque'rupupic chiru choxa. Eb a'an inc'a' neque'au, chi moco neque'k'oloc chi moco neque'xxoc xtzacaemk sa' c'ulebal. Ut le Yucua' cuan sa' choxa, a'an naq'uehoc xcuaheb. ¿Ma inc'a' ta bi' k'axal raroquex laex chiruheb a'an? ²⁷ ¿Ani ere laex taruk tixtik ru lix yu'am usta naxic xch'ol xc'oxlanquil? ²⁸ ¿C'a'ut nak naxic ech'ol chi c'oxlac chirix le rak? Q'uehomak retaleb li utz'u'uj sa' pim chanru nak neque'q'ui chi inc'a' neque'c'anjelac chi moco neque'quemoc. ²⁹ Aut lajin tinye ere, usta c'ajo' xchak'al ru lix tikibankuil laj Salomón, abanan inc'a' quixtau xchak'al ru li utz'u'uj a'in. ³⁰ Laex inc'a' nequexpabán chi tz'akal. Ut cui li Dios naxq'ue lix ch'ina'usal li pim li cuan junpat ajcui' ut cuulaj q'uebilak sa' xam, ¿ma toja' ta chic laex inc'a' textikib? ³¹ Jo'can ut nak moco yokex ta chixyebal: ¿C'a'ru takatzaca anakcuan? chi moco, ¿c'a'ru takatikib cui' kib? ³² Li inc'a' neque'xpab li Dios neque'xq'ue xch'ol xc'oxlanquil a'an. Abanan le Yucua' li cuan sa' choxa naxnau li c'a'ru nequeraj ru. ³³ Li c'a'ru li tesic' xben cua, a'an lix nimajcual cuanquinal li Dios ut lix tiquinal, ut chixjunil li c'a'ak re ru a'in talajq'uehek' ere chok' xtz'akob. ³⁴ Jo'can ut nak mexc'oxlac chirix li cutan re cuulaj xban nak a'an tac'oxlamank ajcui' cuulaj. Tz'akalak riq'uin li ch'a'ajquinal li naxc'am chak li junjunk chi cutan.

7

Meq'ue ech'ol chixcuech'bal rix le ras eritz'in

¹ Ma ani tetz'il atin chirix re nak inc'a' tatz'ilek' atin cherix laex. ² Xban nak chanru nak nequextz'iloc atin, jo'can ajcui' tauzxk'ere laex. Ut riq'uin li bisleb li nequexbisoci cui', riq'uin ajcui' a'an texbisek' laex. ³ ¿C'a'ut nak nacaq'ue retail li c'aj che' cuan sa' xnak' ru la cuas acuitz'in ut inc'a' nacacuil li tz'amba cuan sa' xnak' acuu laat? ⁴ ¿Chanru nak taye re la cuas acuitz'in: "Cuisihak li c'aj che' sa' xnak' acuu", ut toj cuan li tz'amba sa' xnak' acuu laat? ⁵ At aj ca'pac'al u, xben cua isi li tz'amba cuan sa' li xnak' acuu, tojo'nak tat-ilok chi tz'akal re risinquil li c'aj che' cuan sa' xnak' ru la cuas acuitz'in. ⁶ Meq'ue reheb li tz'i' li c'a'ru k'axal lok' xban nak naru neque'chal sa' eben ut textiu. Chi moco teq'ue li pec li k'axal tertio xtz'ak chiruheb li ak re te'xyek'i.

Li Dios tixq'ue li chabil na'leb reheb li neque'xtz'ama chi anchaleb xch'ol

⁷ Nak tapaltok c'a'ru ere, chextz'amank chiru li Dios ut a'an tixq'ue ere; chesic'ak ut tetau, chebokak ut li puerta tatehek' cheru. ⁸ Chebanu a'an xban nak li ani natz'aman chiru li Dios naq'uehe're. Li ani naxsic', naxtau. Ut li ani nabokoc, li puerta natehe' chiru. ⁹ ¿Ma cuan ta bi' junak yucua'bej sa' eyank tixq'ue junak pec re li ralal nak tixpatz' xcua re? ¹⁰ Ut nak tixpatz' junak xcar re, ¿ma c'anti' ta bi' tixq'ue re? ¹¹ Cui laex li moco chabilex ta nequenau xq'uebal li c'a'ru chabil re le ralal ec'ajol, ¿ma toja' ta chic le Yucua' li cuan sa' choxa inc'a' tixq'ue li k'axal chabil re li ani tixtz'ama chiru? ¹² Jo'can nak li c'a'ru nequeraj laex nak te'xbanu raj le ras eritz'in, chebanuhak laex reheb a'an, xban nak a'an a'in xyalal li chak'rab li quiq'uehe're laj Moisés, ut a'an ajcui' li xyalal lix yehomeb li profeta. ¹³ Chex-oc sa' li oquebal li ca'ch'in ru xban nak nim ru li oquebal ut nim ru li be li naxic sa' li tojba mac' ut nabaleb li neque'xic aran. ¹⁴ Abanan li oquebal ut li be li naxic sa' li junelic yu'am, a'an ca'ch'in ru ut inc'a' q'uiheb li neque'oc aran.

Li che'nana'e'ru xban li ru naxq'ue

¹⁵ Chenauhak xcolbal erib chiruheb li profeta aj balak'. Chanchan nak chabileb jo'li carner nak neque'c'utun. Abanan moco yal ta. Chanchaneb li josk' aj xoj nak neque'chal chi balak'inc. ¹⁶ Yal riq'uin lix na'lebeb tenau

ruheb. Læx nequeq'ue retal nak li q'uix inc'a' narüchin li uva ut li tun q'uix inc'a' narüchin li higo. ¹⁷ Jo'can nak li chäbil che', chäbil ajcui' li ru naxq'ue. Ut li che' li inc'a' us, inc'a' ajcui' us li ru naxq'ue. ¹⁸ Li chäbil che' inc'a' naru narüchin li inc'a' us, chi moco li che' inc'a' us narüchin li chäbil. ¹⁹ Chixjunil li che' li inc'a' chäbil li ru naxq'ue nayoc'man ut naq'ueman sa' xam. ²⁰ Jo'can ut nak riq'unlix na'lebeb li profeta tñau ru aniheb.

Macua'riq'un kayehom kabanuhom to-oc rubel xcuanquil li Dios

²¹ Moco chixjunileb ta li neque'yehoc "Kacua', Kacua'" cue, te'oc sa' lix nimajcual cuanquial li Dios. Aban li neque'bñun re li naraj lin Yucua' cuan sa' choxa, a'aneb li te'oc sa' lix nimajcual cuanquial li Dios. ²² Nabaleb li te'yehok cue sa' xk'ehil li rakba qñin, "Kacua', Kacua', qñma macua' ta bi' sa' qñ'ab'a' coaqatinac jo' profeta? qñma macua' ta bi' sa' qñ'ab'a' co-isin maus aj musik'ej? Lao nabal li milagro quilajkabánu sa' qñ'ab'a'", cha'keb. ²³ Ut lain tinye reheb, "Læx macua'ex cualal inc'ajol. Lain inc'a' ninnau eru. Elenkex chicuu, ex aj bñuhom mausilal."

Li ani naxbanu li c'a'ru naxye li Kacua', li jun a'an cuan xna'leb

²⁴ Jo'can nak yalak ani taabink reheb li cuatin a'in ut cui tixbanu li c'a'ru xinye, li jun a'an tinjuntak'eta riq'un li cuink cuan xna'leb li quixyib li rochoch sa' xben pec. ²⁵ Ut quichal li hab ut quicuan li but'i ha', ut quichal li cak-sut-ik'. Coxsac' rib chiru li cab a'an, ut inc'a' quit'an' li cab xban nak yibanbil chi us sa' xben pec. ²⁶ Ut yalak ani taabink re li cuatin ut inc'a' tixbanu li c'a'ru xinye, li jun a'an tinjuntak'eta riq'un li cuink li mac'a' xna'leb. Inc'a' quixyib li rochoch chi chabil. Yal sa' xben samaib quixq'ue. ²⁷ Ut quichal li hab, quicuan li but'i ha' ut quichal li cak-sut-ik'. Coxsac' rib chiru ut li cab a'an quit'an' ut aran qui-oso'. ²⁸ Ut nak quirake' li Jesús chixyebal li qñin a'in, sachsoqueb xch'ol que'cana li q'uila tenamit chirabinquil li c'a'ru yo chixyebal. ²⁹ Que'sach xch'oleb xban nak quixc'ut chi tz'akal li xyalal chiruheb riq'un xcuanquil ut moco jo' ta eb laj tz'ib.

8

Li Jesús quixq'uirtesi jun li saklep rix

¹ Nak quicube chak li Jesús chiru li tzul, quitäkec xbaneb li q'uila tenamit. ² Ut quichal jun li saklep rix ut quixcuik'ib rib chiru li Jesús ut quixye re: —Kacua', lain ninnau nak laat naru tinaq'uirtesi. Cui tabanu li usilal, chinaq'uirtesi, chan. ³ Li Jesús quixye' li ruk', quixch'e' li cuink ut quixye re: —Nacuaj qñ'uirtesinqil. Anakcuan tating'uirtesi, chan. Ut sa' junpat quiq'uira li saklep rix. ⁴ Tojo'nak li Jesús quixye re: —Abi li tinye acue. Ma ani aj e taserak'i li xac'ul. Ayu ban ut c'ut acuib chiru laj tij. Ut taq'ue li mayej jo' naxye sa' lix chak'rab laj Moisés re xc'utbal chiruheb nak xatq'uira.—(Lv. 13:49)

Li Jesús quixq'uirtesi lix mos jun li capitán

⁵ Ut nak quicuulac li Jesús aran Capernaum, quichal jun li capitán aj Roma riq'un. Quixtz'ama usilal chiru ut quixye re: ⁶ —Kacua', lin mos t'ant'o sa' cab. Sic ut k'axal ra cuan, chan. ⁷ Li Jesús quichak'oc ut quixye re: —Tinxic lain ut toxing'uirtesi.—⁸ Li capitán quixye re li Jesús: —Kacua', moco inc'ulub ta nak tatxic sa' li cuochoch. Ca'aj cui' nacuaj nak taye nak taq'uirak lin mos ut ninnau nak tñau. ⁹ Lain ninnau nak naru tabanu a'an xban nak lain cuan ani nataklan cue ut cuanqueb lin soldado rubel lin cuanquial. Ut ninye re li jun, "ayu" ut naxic. Ut ninye re li jun chic, "quim", ut nachal. Ut

ninye re lin mos, “banu a'in”, ut naxbanu, chan li capitán. ¹⁰ Ut nak li Jesús quirabi li quixye, quisach xch'ol ut quixye reheb li yoqueb chi ochbeninc re: —Relic chi yal tinye ere nak ma jún intauhom chi moco sa' xyankeb laj Israel tz'akal re ru xpabal jo' li jun a'in, usta macua' aj judío. ¹¹ Ut lain tinye ere nak nabaleb li macua'eb aj judío yalak bar sa' ruchich'och' te'pabank. Ut eb a'an te'echanink re lix nimajcual cuanquinal li Dios rochbeneb laj Abraham, laj Isaac, ut laj Jacob. ¹² A'ut nabaleb laj judío li te'echanink raj re lix nimajcual cuanquinal li Dios, eb a'an chic li te'isik ut te'q'uehek' sa' li k'ojojin. Ut aran tacuank li yabac ut li c'uxuxinc ruch e, chan li Jesús reheb li tenamit. ¹³ Tojo'nak li Jesús quixye re li capitán: —Ayu sa' la cuochoch. Chanru nak xapab, jo'can ajcui' nak chi-uxk li c'a'ru xatz'ama, chan. Ut sa' ajcui' li hñonal a'an quiq'uira lix mos li capitán.

Li Jesús quixq'uirtesi xna' li rixakil laj Pedro

¹⁴ Ut quicuulac li Jesús sa' rochoch laj Pedro. Ut aran quixtau lix na' li rixakil laj Pedro yocyo sa' xch'at ut yo xtil. ¹⁵ Ut li Jesús quixchap li ruk' ut quinume' lix tik. Ut a'an quicuacli, ut qui'c'anjelac chiru. ¹⁶ Nak ac oc re li k'ojojin, nabaleb li cristian que'c'ame' chak riq'uin li Jesús. Cuanqueb maus aj musik'ej riq'uineb. Ut yal riq'uin rätin, li Jesús quirisi li maus aj musik'ej riq'uineb, ut quixq'uirtesi chixjunileb li yaj. ¹⁷ A'in quic'ulman jo' quixye li profeta Isaías, nak quixye chi jo'ca'in:

A'an quic'amoc re li kayajel, ut a'an quic'uluc re li karaylal. (Is. 53:4)

¹⁸ Ut nak quiril li Jesús nak sutsu xbaneb li q'uila tenamit, quixye: —Tento toxic jun pac'al li palau, chan reheb lix tzolom. ¹⁹ Ut sa' li hñonal a'an quicuulac riq'uin li Jesús jun aj tz'ib ut quixye re: —At tzolonel, tincuaj atakenquil yalak bar tatxic, chan re. ²⁰ Ut li Jesús quichak'oc ut quixye re: —C'oxla chi us ma tacuy intakenquil. Li yac cuanqueb xjul sa' pec, ut li xul li neque'rupupic chiru choxa cuanqueb xsoc, abanan lain li C'ajolbej mac'a' inna'aj bar taruk tinyocob cui' cuib, chan. ²¹ Ut jun reheb lix tzolom quixye re li Jesús: —Kacua', chinacuy. Inmukak cuan inyucua' tojo'nak tinxic chacuix, chan. ²² Ut li Jesús quixye re: —Takehin, canabeb li toj camenakeb sa' li mac xmukakeb cuan lix camenak, chan re.

Nak quixch'anab li ik' chiru li palau

²³ Ut li Jesús qui-oc sa' li jucub rochbeneb lix tzolom. ²⁴ Nak ac cuanqueb chiru ha', sa' junpat quichal jun li nimla cak-sut-ik'. Ut yo chi oc lix cau ok li ha' sa' li jucub. Ut li Jesús sa xcuara. ²⁵ Eb lix tzolom que'jiloc riq'uin, que'rajsi, ut que'xye re: —Kacua', choacol. Osoc' ke, chanqueb re. ²⁶ Ut li Jesús quichak'oc ut quixye: —Laex inc'a' nequexpaban chi tz'akal. Jo'can nak nequexxucuac, chan reheb. Tojo'nak quicuacli, quixk'us li ik', ut li palau, ut sa' junpat quich'ana li ik' ut quitukla ru li ha'. ²⁷ Ut c'ajo' nak que'sach xch'ol lix tzolom nak que'r'il li quixbanu ut que'xye chi ribileb rib: —¿Chanru nak cuan xcuankind li cuink a'in nak naxk'us li ik' ut li palau ut neque'abin chiru? chanqueb.

Li cuink li cuan maus aj musik'ej riq'uineb

²⁸ Ut nak ac xk'axon li Jesús jun pac'al li palau sa' xch'och'eb laj Gadara, cuib li cuink que'chal chixc'ulbal. Que'chal chak sa' li na'ajej bar neque'muke' cui' li camenak. Cuan maus aj musik'ej riq'uineb. K'axal xiu xiu rilbaleb ut ma ani naru nanume' sa' li be a'an. ²⁹ Ut eb a'an que'xjap re chixyebal: —¿C'a'ru tacuaj kiq'uin, at Jesús? Laat ralalat li nimajcual Dios. ¿Ma xatchal arin chikach'i ch'i inquili chi toj maji' xk'ehil li rakba atin?

chanqueb. ³⁰ Ut najt ca'ch'in riq'uineb cuan chak jun tub li ak, yoqueb chi ichajibc. ³¹ Ut eb li maus aj musik'ej que'xtz'ama chiru li Jesús ut que'xye re: —Cui toacuisi riq'uineb li cuink a'in, choacanab chi oc riq'uineb li jun tub chi ak li cuankeb aran. ³² Ut li Jesús quichak'oc ut quixye reheb: —Ayukex. Ut eb a'an que'el ut coeb riq'uineb li jun tub chi ak. Ut eb li ak que'oc chi alinac ut que'xrum chak rib sa' xb'en ul ut toj sa' li palau coxe'nak ut aran que'oso'. ³³ Ut eb laj ilol ak que'xucuac ut que'coeb sa' anil sa' li tenamit chixyebal resil chixjunil li c'a'ru quic'ulman. Ut que'xserak'i li c'a'ru quic'ulman riq'uineb li cuink li cuankeb maus aj musik'ej riq'uineb. ³⁴ Ut chixjunileb li tenamit que'el chak chixc'ulbal li Jesús. Ut nak que'r'il ru, que'xtz'ama chiru nak chielk sa' lix tenamiteb.

9

Li Jesús quixq'uirtesi jun li sic aran Capernaum

¹ Ut li Jesús qui-oc cui'chic sa' jun li jucub ut quik'axon jun pac'al li palau ut quicuulac sa' lix tenamit. ² Ut aran que'xc'am riq'uin li Jesús jun li cuink sic li rok ut sic li ruk' yocy o chiru xcuarib. Ut li Jesús quixq'ue retal nak eb li cuink a'an neque'xpab nak naru tixq'uirtesi li yaj. Jo'can nak quixye re li yaj: —At cuink cauhak taxak ach'ol. Ac xcuymán xsachman la māc. — ³ Ut cuankeb junjunk sa' xyankeb laj tz'ib yoqueb chixyebal sa' xch'oleb: —Li cuink a'in naxjuntak'eta rib riq'uin li Dios, chanqueb. ⁴ Li Jesús ac naxnau li c'a'ru yoqueb chixc'oxlanquil ut quixye reheb: —¿C'a'ut nak yoquex chixc'oxlanquil li inc'a' us? ⁵ ¿Bar cuan li us tinye re li yaj re nak tac'utunk cheru nak cuan incuanquil? Ma tinye re, “Cuybil sachbil la māc” malaj ut tinye re, “Cuaclin ut ben”? ⁶ Lajin tinc'ut cheru nak lajin li Cristo li C'ajolbej ut cuan incuanquil sa' ruchich'och' chixcuybal xsachbal li māc, chan. Jo'can nak quixye re li yaj: —Cuaclin, c'am la ch'at ut ayu sa' la cuochoch, chan. ⁷ Tojo'nak quicuacli li cuink ut co sa' rochoch. ⁸ Nak li q'ula tenamit que'r'il li quic'ulman, que'xucuac ut que'xq'ue xlok'al li Dios li quiq'uehoc chak xcuquil li Jesús chi q'uirtesinc ut chi cuyuc māc.

Nak quiboke' laj Mateo xban li Jesús

⁹ Ut li Jesús qui-el aran Capernaum ut quinume' sa' li na'ajej bar neque'c'uluc cui' toj. Quiril jun li cuink aj Mateo xc'aba'. Cojc'o aran xban nak a'an aj titz'ol toj. Ut li Jesús quixye re: —Chinatake. — Ut laj Mateo quicuacli ut quixtake. ¹⁰ Ut chirix a'an li Jesús co sa' li rochoch laj Mateo chi cua'ac. Cojc'o sa' mex rochbeneb lix tzolom nak que'cuulac nabaleb laj titz'ol toj rochbeneb nabaleb chic li rech aj maquil. Ut que'c'ojla sa' mex chi cua'ac rochben li Jesús. ¹¹ Ut nak que'r'il a'an, eb laj fariseo que'xye reheb lix tzolom li Jesús: —¿C'a'ut nak nacua'ac laj tzolol ere rochbeneb laj titz'ol toj ut rochbeneb laj māc? chanqueb. ¹² Nak quirabi li c'a'ru quipatz'e' reheb lix tzolom, li Jesús quixye: —Li cauheb māc'a na-oc cui' aj banonel reheb. Aban li yajeb, a'neb li te'raj banec'. ¹³ Cheq'uehak bi' e'ch'ol chixtaabal ru li xyalal li atin a'in: “Li k'axal lok' chicuu, a'an li uxtananc u ut macua' li mayejac xul”. Lajin inc'a' xinchal chixsic'bal li tiqueb xch'ol. Xinchal han chixsic'baleb laj māc re nak te'yot'ek' xch'ol te'xjal xc'a'ux, chan li Jesús.

Li Jesús quixch'olob xyqlal li ayunic

¹⁴ Ut que'cuulac lix tzolom laj Juan riq'uin li Jesús ut que'xye re: —Lao nakabánu ka-ayún rajlal ut eb laj fariseos neque'xbánu x-ayún. ¿C'a'ut nak laj tzolom inc'a' neque'xbánu x-ayún? chanqueb. ¹⁵ Ut li Jesús quichak'oc

ut quixye reheb li tijleb a'in: —¿Ma naru ta bi' nak rahak sa' xch'oleb li neque'boke' riq'uin sumlac nak toj cuan li belomej sa' xyankeb? Lain jo' jun li belomej. Taucuulak xk'ehil nak tin-isik sa' xyankeb tojo'nak te'xbanu x-ayun eb lin tzolom, chan.

Li najter na'leb inc'a' naxc'am rib riq'uin li ac' na'leb

¹⁶ Mä ani naxxiti junak k'el t'icr riq'uin ac' t'icr. Cui ut naxxiti riq'uin ac' t'icr nak ti xpuch', tac'osk li ac' t'icr ut naxnimobresi xpejelal li k'el t'icr. ¹⁷ Ut ma ani naq'uehoc ac' vino sa' li k'el bols tz'um. Cui tixq'ue li ac' vino sa' li k'el bols tz'um, tapuq'uek' li k'el tz'um, tähoyek' li vino, ut taosok' ajcui' li bols tz'um. Li ac' vino sa' ac' bols tz'um naq'ueman. Chi jo'can mäc'a' nasachman, chan li Jesús.

Li Jesús quixyo'obtesi cui'chic lix rabin laj Jairo

¹⁸ Nak yo chixyebal li c'a'ak re ru a'in reheb, quicuulac riq'uin jun li cuink xcomoneb li xbénil sa' li cab li neque'xch'utub cui' ribeb laj judío. Quixcuik'ib rib chiru li Jesús ut quixye re: —Lin rabin toje' tacamk. Tatxic taxak ut taq'ue raj la cuuk' sa' xben, ut tayo'lak raj cui'chic, chan. ¹⁹ Quicuacli li Jesús ut co chirix rochbeneb lix tzolom. ²⁰ Ut cuan jun li iixk cablaju chihab xticlaajic xyajel. Junelic yo lix yajel li iixk a'an ut inc'a' chic natz'ap lix quiq'uel. Quijiloc chixc'atk li Jesús nak yo chi xic, ut quixch'e' li rak'. ²¹ Usta ca'a'j cui' li rak' tinch'e', tinq'uirak, chan sa' xch'ol li iixk. ²² Ut li Jesús quixakli ut qui-iloc chirix. Quiril li iixk ut quixye re: —Kana', cauhak taxak ach'ol. Xban nak xapab nak cuan incuanquil chaq'uirtesinquil, jo'can nak xatq'uira, chan. Ut sa' ajcui' li honal a'an, li iixk quiq'uira. ²³ Chirix chic a'an li Jesús co sa' rochoch laj Jairo. Nak quicuulac sa' li rochoch, quirileb li yoqueb chixyabasinquil li xołb ut li japoqueb re chi yabac xban xcamic li xka'al. ²⁴ Ut quixye reheb: —Elenkex arin. Li xka'al a'in yal cuarc yo. Moco camenak ta, chan reheb. Ut li tenamit que'oc chixse'enquil. ²⁵ Ut nak ac xrisiheb li tenamit chirix cab, li Jesús qui-oc cuan cui' li xka'al ut quixchap chi ruk' ut li xka'al quicuacli cui'chic chi yo'yo. ²⁶ Ut li c'a'ru quixbanu li Jesús, qui-el resil sa' chixjunil li na'ajej a'an.

Li Jesús quixq'ue chi iloc li cuiib chi mutz'

²⁷ Ut nak qui-el aran li Jesús, cuiib li mutz' yoqueb chi takenc re ut japoqueb re chixyebal: —Chacuuxtana taxak ku, at ralal xc'ajol li rey David. —²⁸ Nak ac x-oc li Jesús sa' li cab, que'oc ajcui' li mutz' riq'uin ut li Jesús quixye: —¿Ma nequepab nak cuan incuanquil cheq'uirtesinquil? chan reheb. Ut eb a'an que'chak'oc ut que'xye: —Nakapab, Kacua'. —²⁹ Tojo'nak li Jesús quixch'e' li xnak' ruheb ut quixye: —Chanru nak xepab, jo'can ajcui' nak chi-uxk li c'a'ru teraj. —³⁰ Ut que'iloc li xnak' ruheb. Ut li Jesús quixye reheb: —Cherabi chi us li c'a'ru tinye ère. Mä ani aj iq'uin teserak'i li c'a'ru xec'ul, chan reheb. ³¹ Ca'a'j cui' tz'akal que'el aran nak que'oc chixserak'inquil resil sa' chixjunil li na'ajej a'an li c'a'ru quixbanu li Jesús reheb.

Li Jesús quixq'uirtesi li cuink mem

³² Toje' ajcui' te'elk eb a'an nak quic'ame' chak riq'uin li Jesús jun li cuink mem. Cuan maus aj musik'ej riq'uin. ³³ Li Jesús quirisi li maus aj musik'ej riq'uin ut li cuink qui-oc chi atinac. C'ajo' nak que'sach xch'ol li tenamit ut que'xye: —Mä jun cua kilom a'in sa' li katenamit Israel. —³⁴ Aban eb laj fariseo que'xye: —Riq'uin xcuánquil laj tza narisiheb li maus aj musik'ej li cuink a'an, chanqueb.

Li Jesús quiril xtok'obal ruheb li tenamit

³⁵ Ut li Jesús yo xbeninquil sa' eb li tenamit junjunk ut sa' eb ajcui' li c'alebal. Quixc'ut li xyalal chiruheb sa' li cab li neque'xch'utub cui' ribeb laj judío ut quixch'olob xyalal lix nimajcual cuanquinal li Dios chiruheb. Ut yo chixq'uirtesinquil chixjunil li q'uila pay chi yajel ut li raylal. ³⁶ Ut nak quirileb li q'uila tenamit, quixtok'obaheb ru xban nak tacuajenakeb ut raheb sa' xch'ol. Chanchaneb li carner li māc'a' aj ilol reheb. ³⁷ Tojo'nak quixye reheb lix tzolom, —Relic chi yal nabaleb li inc'a' neque'xnau li xyalal. Abanan moco q'uiheb ta li te'xye li xyalal reheb. Chanchaneb li ru li acuimk li māc'a' aj sic'ol re. ³⁸ Jo'can ut tinye ere nak tētz'ama chiru li Kacua' re nak a'an tixtaklaheb laj c'angel chixch'olobanquil li xyalal chiruheb, chan li Jesús.

10

Li Jesús quixq'ueheb xc'anjel lix cablaju chi tzolom

¹ Sa' jun li cutan li Jesús quixbokeb lix tzolom cablaju riq'unin ut quixq'ueheb xcuanguil chirisinquil li maus aj musik'ej ut quixq'ueheb xcuanguil chixq'uirtesinquileb li yaj, a'yalak c'a'ru chi xyajelil ut raylal. ² A'an a'in lix c'aba'eb lix tzolom cablaju, li quixxakab chok' x-apóstol: li xben, a'an laj Simón, Pedro nayeman re; ut laj Andrés li ritz'in; laj Jacobo ut laj Juan li ritz'in. Laj Zebedeo, a'an lix yucua'eb; ³ laj Felipe ut laj Bartolomé; laj Tomás ut laj Mateo laj titz'ol toj; laj Jacobo li ralal laj Alfeo ut laj Lebeo aj Tadeo xcab xc'aba', ⁴ laj Simón aj Canaán, ut laj Judas Iscariote, a'li quik'axtesin re li Jesús sa' ruk'eb li xic' neque'iloc re. ⁵ Nak quixtaklaheb li cablaju a'in chi c'angelac, li Jesús quixchak'rabiheb ut quixye reheb: —Mexxic sa' lix tenamiteb li mācua'eb aj judío chi moco tex-oc sa' xtenamiteb aj Samaria. ⁶ Texxic ban riq'uineb laj judío. A'aneb li ralal xc'ajol laj Israel. Chanchaneb li carner li sachenakeb. ⁷ Ut nak yokex chi xic, yokex chixch'olobanquil li xyalal ut chixyebal, “cuulac re xk'ehil nak taq'uehek' sa' xcuanguil xban li Dios li tācuānqk xcuanguil sa' xbeneb li ralal xc'ajol,” cha'kex. ⁸ Cheq'uirtesiheb li yaj, checuaclesiheb cui'chic chi yo'yo li camenak. Cheq'uirtesiheb li saklep rix ut cherisiheb li maus aj musik'ej. Chi matan xec'ul le cuanguil ut chi matan ajcui' tebanu li usilal. ⁹ Māc'a' c'a'ru tec'am cherix. Inc'a' tec'am li oro chi moco li plata, chi moco li coc'tumin k'an ru. ¹⁰ Chi moco tec'am xna'aj li c'a'ak re ru tac'angelak ere sa'be, chi moco tec'am xjalbal le rak', chi moco xjalbal exab, chi moco exuk'. Mec'am li c'a'ak re ru a'in xban nak laj c'angel, a'an tento nak taq'uehek' re lix tzacaemk. ¹¹ Ut yalak bar tenamitil ut c'alebal toxex-ocak cui', patz'omak ani tac'uluk ere chi sa' xch'ol, ut aran texhilank riq'unin toja' yal jōk'e texxic. ¹² Ut nak tex-oc sa' li cab, q'uehomak xsahil xch'oleb ut tētz'ama li tuktuquil usilal sa' xbeneb li cuanqueb sa' li cab. ¹³ Ut cui texc'ulek' sa' usilal, tacanak riq'uineb li tuktuquil usilal. Ut cui inc'a' texc'ulek' sa' usilal, inc'a' ajcui' tacanak riq'uineb li tuktuquil usilal. Tasuk'ik cui'chic eriq'unin. ¹⁴ Ut yalak ani inc'a' tac'uluk ere chi moco tarabi le ratin, nak tex-elk sa' li cab a'an, malaj ut sa'li tenamit, tēchik'chik'i li poks cuan chérok chok' retalil nak inc'a' chic texc'oxlak chirix li na'ajej a'an. ¹⁵ Relic chi yal tinye ere nak toj cubenak ca'ch'in lix tojbal xmaqueb li tenamit Sodoma ut li tenamit Gomorra chiru lix tojbal xmaqueb li tenamit a'an sa' xk'ehil li rakba atin.

Resil li ra xic' li tachalk sa' xbenek

¹⁶ Chenauhak nak lajñ tintaklank ere sa' xyankeb li xic' neque'iloc ere. Chanchanakex li carner sa' xyankeb laj xoj. Sébak ech'ol jo'cakex li c'anti'

ut tjcak ech'ol jo'cakex li paloma. ¹⁷ Cauhak le ch'ol xban nak cuanqueb li te'k'axtesink ere sa' ruk'eb laj rakol qatin. Ut chi mac'a' emac texsaq'uek' xbaneb sa' li cab li neque'xch'utub cui' ribeb laj judío. ¹⁸ Ut texc'amek' chiruheb li acuabej ut chiruheb li rey sa' inc'aba' lain. Ut tech'olob li xyalal chiruheb a'an, jo' ajcui' chiruheb li macua'eb aj judío. ¹⁹ Ut nak toxexxakabak chiruheb, mexc'oxlac chirix li c'a'ru teye, chi moco texc'oxlac chirix chanru tex-atinak xban nak sa' li honal a'an tayehek' ere c'a'ru teye. ²⁰ Macua' laex li tex-atinak. A' ban li Santul Musik'ej taatinak. Yal tixto'oni lix tz'umal ere. ²¹ Sa' eb li cutan a'an, cuan li asbej tixk'axtesi li itz'inbej re tacamsik ut cuan li itz'inbej tixk'axtesi li asbej. Ut cuan li yucua'bej tixk'axtesi li alalbej. Ut cuan li alalbej xic' te'rileb lix na' xyucua' ut te'xq'ueheb chi camsic. ²² Ut chixjunileb xic' te'iloc ere sa' inc'aba'. Abanan li ani te'cuyuk xc'ulbal li raylal toj sa' roso'jic lix yu'am, eb a'an te'colek'. ²³ Nak texrahobtesik sa' jun li tenamit, texxic sa' jalan chic. Relic chi yal ninye ere nak toj maji' ajcui' nequechoy xbeninquel chixjunileb li tenamit cuanqueb Israel te'xnau nak xolinelk lain li C'ajolbej. ²⁴ Junak li yo chi tzoloc inc'a' naru tixk'ax xcuanylil li yo chi tzoloc re, chi moco li mos naxk'ax xcuanylil lix patrón. ²⁵ Chic'ojlak xch'ol li yo chi tzoloc nak tacuulak jo' laj tzolol re, ut li mos jo'cak lix patrón. Cui aj tza nayehe' re laj echal cab, 'ma toja' ta chic inc'a' te'yehek' aj tza reheb li ralal xc'ajol? ²⁶ Jo'can utan mexxucuac chiruheb li xic' neque'iloc ere. Ma jun na'leb mukmu anakcuan chi inc'a' ta tataumank ru mokon, ut mac'a' mukmu anakcuan chi inc'a' tac'utbesik. ²⁷ Li c'a'ru xexintzol cui' ejunes, a'an teye chiruheb chixjunileb, ut li c'a'ru xinye ere ejunes, a'an teye chi cau xyab ecux chiruheb chixjunileb li tenamit. ²⁸ Mexxucuac chiruheb laj camsinel xban nak li amej inc'a' naru te'xcamsi. A'li texucua ru, a'an li Kacua' li cuan xcuanylil chixcamsinquel li tibeley ut chixtaklanquil li qamej sa' xbalba.

Li Dios na-iloc ere

²⁹ ¿Ma inc'a' ta bi' nac'ayic cuib chi tzentzeyul chi jun centavo? K'axal cubenak xtz'ak, abanan ma jun li ch'ina tzentzeyul nacam chi inc'a' ta tixnau li Dios le Yucua'. ³⁰ Jo'can ajcui' li rismal le jolom ajlanbileb chixjunil xban li Dios. ³¹ Jo'can nak mexxucuac chiruheb li xic' neque'iloc ere xban nak laex k'axal terto etz'ak chiruheb nabal chi tzentzeyul. ³² Li ani naxye chiruheb li tenamit nak niquinixpab, lain tinye chiru lin Yucua' cuan sa' choxa nak a'an li cualal. ³³ Ut li ani tatz'ektañank cue chiruheb li tenamit, lain tintz'ektaña ajcui' a'an chiru lin Yucua' cuan sa' choxa. ³⁴ Mec'oxla nak xinchal ta chixq'uebal li tuktuquil usilal sa' ruchich'och'. Xinchal ban chixch'olobanquil li xyalal; ut xban li xyalal li nach'olobac, nacuan li ch'a'ajquinal. ³⁵ Xinchal ut chixch'olobanquil li xyalal ut li ani tapabank cue, te'xc'ul li raylal. Li alalbej tacuank sa' ra xic' riq'uin lix yucua', ut li co'bej tacuank sa' ra xic' riq'uin lix na', ut li alibej tacuank sa' ra xic' riq'uin li na'bej sa' inc'aba' lain. ³⁶ Li cuanqueb sa' jun cabal, xic' te'ril rib sa' inc'aba' lain. ³⁷ Ut ani k'axal naxra xna' xyucua' chicuu lain, moco xc'ulub ta nak tinc'ul chok' cualal. Ut ani k'axal naxra li ralal xc'ajol chicuu lain, moco xc'ulub ta nak tinc'ul chok' cualal. ³⁸ Li ani tixcuy intakenquil usta tixc'ul li camsic sa' inc'aba', li jun a'an xc'ulub nak tinc'ul chok' cualal. Abanan li ani inc'a' tixcuy intakenquil, li jun a'an moco xc'ulub ta nak tinc'ul chok' cualal. ³⁹ Li ani naxra lix yu'am arin sa' ruchich'och', a'an tixsach li junelic yu'am. Ut li ani tixsach lix yu'am arin sa' ruchich'och' sa' inc'aba' lain, a'an tarechani li junelic yu'am.

*Lix k'ajcamunquil li nac'uluc reheb lix tzolom li Jesú*s

40 Li ani tac'uluk ere laqex, tinixc'ul ajcui' lajin. Ut li ani tac'uluk cue, tixc'ul ajcui' li xtaklan chak cue. **41** Li ani tac'uluk re junak profeta chi anchal xch'ol xban nak a'an naxye ratin li Dios, li jo' q'ual lix k'ajcamunquil li tixc'ul li profeta, a'an ajcui' li tixc'ul li tac'uluk re. Ut li ani tac'uluk re li tjc xch'ol xban nak a'an tjc xch'ol, li jo' q'ual lix k'ajcamunquil li tixc'ul li tjc xch'ol, a'an ajcui' li tixc'ul li tac'uluk re. **42** Li ani tixq'ue jun sec'ak ruc'a junak reheb lin tzolom usta cubenak xcuanguil, cui tixq'ue li ruc'a xban nak a'an intzolom, relic chi yal ninye ere nak li jun a'an tixc'ul lix k'ajcamunquil.

11

Laj Juan laj Cubsihom Ha' naxtakla xpatz'bal ani li Jesús

1 Nak quirake' li Jesús chixtaklanquileb chi xic chi c'anjelac lix tzolom cablaju, qui-el aran ut co chixch'olobanquil li xyalal sa' eb li tenamit. **2** Ac cuan chi prexil laj Juan laj Cubsihom Ha' nak quirabi resil li c'a'ru yo chixbanunquil li Cristo. Laj Juan quixtaklaheb lix tzolom chi atinac riq'uin ut chixpatz'bal re: **3** ¿Ma laqat li Cristo li yechi'nbil, li yoco chirobeninguil? ¿Malaj toj takoybeni chic junak? chanqueb. **4** Quichak'oc li Jesús ut quixye reheb: —Ayukex ut teserak'i re laj Juan li c'a'ru yoquin chixbanunquil cheru ut teye re li c'a'ru yoquex chirabinquil chicuix lain. **5** Yehomak re nak eb li mutz' neque'iloc chic; eb li yek' rok neque'béc chic; eb li saklep rix xe'q'uirtesic; eb li tz'ap xic neque'abin chic; eb li camenak neque'cuaclesic cui'chic chi yo'yo; ut eb li neba' yoqueb chirabinquil resil li usilal, cha'kex re. **6** Us xak reheb li ani inc'a' tach'inqank xch'ol inban, chan li Jesús. **7** Ut nak que'el eb a'an, qui-oc chi atinac li Jesús riq'uineb li tenamit chirix laj Juan ut quixye chi jo'ca'in: —¿C'a'ru coxeril chak sa' li chaki ch'och'? ¿Ma junak cuink nacuiban xch'ol chanchan li caxlan aj yo rec'asinqul xban ik' coxeril chak? **8** ¿C'a' put ru coxeril chak? ¿Ma junak cuink chabil xtkibandanquil coxeril chak? A'li chabileb rak' sa' rochocheb li rey cuanqueb. **9** ¿C'a'ru coxeril chak? ¿Ma junak profeta coxeril chak? Yal nak a'an jun profeta. Abanan lajin tinye ere nak li jun a'in naxk'ax ru xcuanguil junak profeta. **10** Chirix laj Juan tz'ibanol sa'li Santil Hu nak naxye chi jo'ca'in:

A'ut lajin tintakla lin takl aj c'amol be chacuu. A'an tach'olobank xyalal chiruheb li tenamit re nak eb a'an yo'on cuankeb chaq'ulbal'lqat. (Mal. 3:1)

11 Relic chi yal tinye ere nak ma jun reheb li neque'yo'la arin sa' ruchich'och' naxk'ax xcuanguil laj Juan laj Cubsihom Ha'. Aban li k'axal ca'ch'in sa' lix nimajcual cuanguil li Dios, k'axal us chok' re a'an chiru laj Juan (xban nak laj Juan inc'a' quiril lix nimajcual cuanguilal li Dios arin sa' ruchich'och'). **12** Chalen chak nak quixtiquib xch'olobanquil xyalal laj Juan laj Cubsihom Ha' ut toj anakcuan cuanqueb li neque'xyal xxakabanquil lix nimajcual cuanguilal li Dios, yal xjuneseb, ut que'raj xbanunquil sa' junpat usta riq'uin raytal tauxmank. **13** Chixjunileb li profeta jo' cui' lix chak'rab laj Moisés, toj riq'uin laj Juan xolrakeb' xyebal nak taxakabak lix nimajcual cuanguilal li Dios. **14** Ut cui teraj xtaubal lix ya'lal chirix laj Juan, a'an laj Elías li tol-ek. **15** Li ani na-abin re li yoquin xyebal chixq'uehak retal chi us li cuatin xban nak cuan xyalal. **16** ¿Ani ta cui' aj iq'uin taruk tebinjuntak'eta li cuanqueb sa' ruchich'och' anakcuan? Mac'a' nacuulac chiruheb. Chanchaneb li coc'al li neque'c'oja chi batz'unc sa' eb li c'ayil ut neque'xjap re chixyebal reheb lix comon: **17** "Xkayabasi li kaxolb ut inc'a' xexxajoc; xobichan chi ra sa' kach'ol, ut inc'a' xyot'e' ech'ol chi moco xexyabac xban", chanqueb. **18** Nak quic'ulun laj Juan laj Cubsihom Ha', cuan

li inc'a' quixtzaca, ut cuan li inc'a' quiruc', ut eb li tenamit inc'a' que'xc'ul ut que'xye, "Maus aj musik'ej cuan riq'uin", chanqueb. ¹⁹ Ut nak xinc'ulun lajn li C'ajolbej, nincua'ac ut nin-uc'ac, ut inc'a' ajcui' quine'xc'ul sa' xyalal. Eb li tenamit neque'xye chichuix, "Li jun cuan arin, junes cua'ac ut junes uc'ac vino naxbanu. A'an ramigueb laj mact ut eb laj titz'ol toj", chanqueb. A'ut li na'leb li q'uebil xban li Dios, xakxo xcuauquil riq'uin li xbənū laj Juan ut li c'a'ru xinbanu lajn.

Ra te'xc'ul li tenamit cui inc'a' te'xxoto xmac

²⁰ Tojo'nak li Jesús qui-oc chixk'usbaleb li tenamit sa' eb li na'ajej bar quixbanu cui' nabal li milagro xban nak inc'a' que'yot'e' xch'oleb ut inc'a' que'xjal xc'a'uxeb, ut quixye reheb: ²¹ —Raylal chalel sa' eben, ex aj Corazín. Raylal chalel sa' eben ex aj Betsaida. Cui ta qui-uxman aran Tiro li milagro a'in li xinbanu cheru ut cui ta qui-uxman aran Sidón, ac najter raj que'xq'ue li cha sa' xjolomeb ut ac que'xq'ue raj li k'es ru t'icr chirixeb chok' retalil nak raheb sa' xch'ol ut que'yot'e' raj xch'oleb ut que'xjal raj xc'a'uxeb. ²² Jo'can ut nak tinte ere nak sa' xk'ehil li rakba atin, k'axal cui'chic li raylal li tec'ul laex chiru li raylal li te'xc'ul eb laj Tiro ut eb laj Sidón. ²³ Ut laex aj Capernaum, c'ajo' nak nequenimobresi erib. ¿Ma neque'oxla nak tatakṣík le cuauquil toj sa' choxa? Tacubṣík ban le cuauquil toj sa' xna'ajeb li camenak. Cui ta riq'uineb laj Sodoma quilaj-uxman eb li milagro li x-uxman eriq'uin laex, toj cuauqueb raj sa' li cutan anakcuan. ²⁴ Jo'can ut nak tinte ere nak sa' xk'ehil li rakba atin, k'axal cui'chic nabal lix tojbal emac li tec'ul laex chiru li te'xc'ul eb laj Sodoma.—

Chalkex cuiq'uin ut texinq'ue chi hilanc, chan li Jesús

²⁵ Sa' eb li cutan a'an, li Jesús quitijoc ut quixye: —At inYucua', laat laj echal re li choxa jo' ajcui' li ruchich'och'. Ninbantioxi chacuu xban nak xamuk li xyalal chirix lix nimal la cuauquil chiruheb li cuauqueb xna'leb nak neque'xye rib, ut xamuk ajcui' chiruheb li tzolbileb. Ut xac'ut li xyalal chiruheb li cubenakeb xcuauquil, li chanchaneb coc'al. ²⁶ Xabənū chi jo'can xban nak jo'can xcuulac chacuu, chan li Jesús nak quitijoc. ²⁷ Ut quixye reheb li tenamit: —Chixjunil li c'a'ak re ru xk'axtesi sa' cuuk' lin Yucua'. Ma ani nana'oc cuu lajn li C'ajolbej, ca'aj cui' li Acuabej Dios. Ma ani nana'oc ru li Acuabej Dios, ca'aj cui' lajn li C'ajolbej. Ut tana'ek' ajcui' ru xbaneb li ani tinc'ut cui' li xyalal, lajn li C'ajolbej. ²⁸ Jo'can ut chalkex cuiq'uin chejunilex li lubluquex ut li tacuajenakex ut lain texinq'ue chi hilanc. ²⁹ C'ulumak li yugo li tinq'ue sa' eben ut tzolomak erib cuiq'uin xban nak tulanin ut k'un inch'ol ut tetau xc'ojobanquil ech'ol, ³⁰ xban nak lin yugo k'un ut seb li ik li tinq'ue sa' eben.

12

Lix tzolom li Jesús que'xch'ot ru li acuimk sa' li hilobal cutan

¹ Ut chirix chic a'an sa' jun hilobal cutan, li Jesús yo' chi bęc bar cui' aubil li acuimk trigo. Ut eb lix tzolom te'z'ocák ut que'oc chixch'otbal ru li acuimk ut yoqueb chixcua'bal. ² Ut nak que'r'il eb laj fariseo, que'xye re li Jesús: —Ileb la tzolom. Yoqueb chixsic'bal ru li acuimk. Yoqueb chixbanunquil li c'anjal moco uxc ta naraj sa' li hilobal cutan, chanqueb. ³ Li Jesús quichak'oc ut quixye reheb: —¿Ma inc'a' ta bi' xeril sa' li Santil Hu c'a'ru quixbanu laj David nak a'an ut eb li rochben te'z'ocák? ⁴ Qui-oc sa' li cab bar neque'xlok'oni cui' li Dios ut cuan aran li mayejanbil caxlan cua. Macua' raj re laj David xcua'bal li caxlan cua a'an, chi moco reheb li rochben. Juneseb laj tij naru neque'xcua' li mayejanbil caxlan cua. Abanan laj David quixcua'. ⁵ Ut, ma inc'a' erilom

sa' lix chak'rab laj Moisés nak eb laj tij mact'a' xmaqueb nak neque'xk'et li hilobal cutan nak neque'c'anjelac sa' rochoch li Dios? ⁶ Lain tinye ere nak cuanquin arin lain, ut k'axal nim incuanquil chiru li rochoch li Dios. ⁷ Læx inc'a' nequenau xyalal li atin a'in li tz'ibañbil sa' li Santil Hu:
Li nacuulac chicuu lain, a'an nak tex-uxtqanq' u ut mactua' nak texmayejak xul. (Os. 6:6)

Cui ta xetau ru li na'leb a'in, inc'a' raj xetz'ektañahab li mact'a'eb xmact.

⁸ Lain li C'ajolbej. Lain laj echal re li hilobal cutan. Cuan incuanquil chixyebal c'a'ru tñauxmank sa' li hilobal cutan, chan li Jesús.

Li Jesús quixq'uirtesi li cuink sic li ruk'

⁹ Ut nak qui-el chak aran, quichal sa' li cab li neque'xch'utub cui' ribeb laj judío. ¹⁰ Ut aran cuan jun li cuink sic jun li ruk'. Ut eb laj fariseo que'xpatz' re li Jesús yal re xjitbal: —¿Ma us q'uirtesinc sa' li hilobal cutan? ¹¹ Ut li Jesús quichak'oc ut quixye reheb: —Cui junak sa' eyank cuan junak lix carner ta't'anek' sa' junak jul sa' li hilobal cutan, ¿ma inc'a' raj toxchap ut toxrisi chak sa' li jul? ¹² ¿Ma inc'a' ta bi' numtajenak tertio xtz'ak junak cuink chiru junak carner? Cui us xcolbal li carner sa' li hilobal cutan, ¿ma inc'a' ta bi' k'axal cui'chic us xtenk'anquil li cuink sa' li hilobal cutan? —¹³ Tojo'nak quixye re li cuink li sic li ruk': —Ye' la' cuuk', chan re. Ut li cuink quixye' li ruk' ut sa' junpat quicana chi mac'a' rec' jo' li jun chic. ¹⁴ Ut eb laj fariseo que'el aran ut que'oc chixc'ubanquil chanru nak te'xcamsi li Jesús.

Najter quiyeman resil xc'anjal li Jesucristo

¹⁵ Li Jesús quixnau nak yoqueb xc'ubanquil chanru nak te'xcamsi ut qui-el sa' li na'ajej a'an. Ut nabaleb li tenamit que'taken re ut naxq'uirtesiheb chixjunileb li yaj. ¹⁶ Ut li Jesús quixye reheb nak ma ani aj e te'xye resil nak a'an li xq'uirtesin reheb. ¹⁷ A'in quic'ulman jo' yebil chak xban li profeta Isaías nak quixye chi jo'ca'in:

¹⁸ A'an a'in laj c'anjal chicuu, li sic'bil ru inban. A'an ninra ut riq'uin a'an nasaho' lin ch'ol. Ting'ue re lin musik', ut a'an tayehok resil li rakba atin li chalc re sa' xbeneb li tenamit.

¹⁹ Inc'a' tacuech'ink chi moco tixjap re ut ma ani taabjink re lix yab xcux sa' be.

²⁰ Inc'a' tixrahobtesiheb li tacuajenakeb. Inc'a' tixchoy xtokbal li caxlan aj li ac tokec' re, chi moco tixchoy xchupbal ru li xam li toj yo chi elc xsibel toj nak tixxakab lix cuanquil ut tarakok atin sa' tiqual.

²¹ Ut chixjunileb li tenamit ca'aj cui' riq'uin a'an te'yo'onink. (Is. 42:2-4)

Mac'a' chic xcuybal xmac li namajecuan re li Santil Musik'ej

²² Ut mokon chic quic'ame' chak riq'uin li Jesús jun li cuink cuan maus aj musik'ej riq'uin. Mutz' ut mem li cuink a'an. Ut li Jesús quixq'uirtesi, ut li cuink li mutz' ut mem nak quicuan, quiatinac ut qui-illoc chic. ²³ Ut chixjunileb li tenamit que'sach xch'ol ut yoqueb chixyebal: —Malaj a'in ta ut ralal li rey David, li yoco chiroybeninquil? ²⁴ Ut eb laj fariseo nak que'rabi a'an, que'xye: —Li cuink a'in na-isin maus aj musik'ej riq'uin xcuanquil laj Beelsebú, lix yucua'ileb li maus aj musik'ej, chanqueb. ²⁵ Li Jesús quixnau li c'a'ru yoqueb chixc'oxlanquil ut quixye reheb: —Cui cuan jun tepak chi tenamit xic' te'ril rib chi ribileb rib, li jun tep chi tenamit a'an tixsach xcuanquil xjunes rib. Ut cui cuan ta jun cabalak xic' te'ril rib chi ribileb rib, li jun cabal a'an te'xsach xcuanquil lix jun cabal. ²⁶ Jo'can ajcui' laj tza cui te'xpleti rib chi ribileb rib, a'an tixsach xcuanquil xjunes rib. ²⁷ Cui ut sa' xc'aba' laj tza nacuisiheb li maus aj musik'ej, ¿ani sa' aj c'aba' neque'isin maus

aj musik'ej li neque'taken ere? Jo'can nak a'aneb ajcui' te'yehok re nak inc'a' yal li yoquex chixyebal. ²⁸ Cui ut riq'unin xcuanquil li Dios nacuisiheb li maus aj musik'ej, riq'unin a'an nac'utun nak relic chi yal ac xc'ulun sa' eyank lix nimajcual cuanquinal li Dios. ²⁹ Ut chanru nak taqc junak sa' rochoch jun cuink cau rib chixmak'bal li c'a'ru cuan re cui inc'a' ta xben cua tixbac' li cuink cau rib, tojo'nak taqc chixc'ambal li c'a'ru cuan re. ³⁰ Li ani inc'a' na-oquen chicuix, a'an xic' niquinril. Ut ani inc'a' naxcococ cuochben, a'an pajinc naxbanu. ³¹ Relic chi yal ninye ere nak tacuyamank tasachmank lix maqueb li cristian ut tacuyamank ajcui' xmaqueb li neque'majecuan. Abanan li ani tamajecuank re li Santil Musik'ej, inc'a' tacuyek' tasacheck' lix mac. ³² Li ani tahobok cue lain, li C'ajolbej, tacuyek' xmac; abanan li ani tahobok re li Santil Musik'ej inc'a' tacuyek' xmac chi moco sa' eb li cutan a'in, chi moco sa' eb li cutan chalel. Cuank ban sa' xben chi junelic lix tojbal rix li nimla mac a'an. ³³ Jo'can ajcui' cui chabil junak che', chabil ajcui' li ru. Cui inc'a' us li che', li ru inc'a' ajcui' us. Ut riq'unin li naruchin, nana'li ru li che'. ³⁴ ¡Laex chanchanex ral li c'ambolay! ¿Chan ta cui' ru nak tex-atinak chabil atin nak moco usex ta? Jo' chanru lix ch'ol junak, jo'can ajcui' naatinac. ³⁵ Li chabil cuink naatinac chi chabil xban nak chabil li cuan sa' xch'ol. Ut li cuink li inc'a' us lix na'leb, yibru naatinac xban nak inc'a' us li cuan sa' xch'ol. ³⁶ Lain tiney ere nak sa' xk'ehil li rakba atin li junjunk tixk'axtesi xcient chirix chixjunil li jo' majo'il aj atin quixye. ³⁷ Riq'unin le ratin taq'uehek' ernal. Riq'unin le ratin taq'utunk nak mac'a' le mac malaj riq'unin le ratin tatenebak li tojbal mac sa' eben.—

Eb laj fariseo que'xtz'ama li milagro

³⁸ Cuan xcomoneb laj tz'ib ut xcomoneb laj fariseo que'atinan ut que'xye: —At tzolonel, banu junak milagro chiku. C'ut chiku nak riq'unin li Dios nachal la cuanquial, chanqueb. ³⁹ Ut li Jesús quichak'oc ut quixye reheb: —Li inc'a' useb xna'leb neque'raj nak taqc'utbesik junak milagro chiruheb, aban ma jun milagro taqc'utbesik chiruheb. Ca'aj cui' li milagro li qui-ux re laj Jonás, li quic'utbesic chiruheb junxil, a'an li taqc'utbesimank chiruheb. ⁴⁰ Jo' nak laj Jonás oxib cutan ut oxib k'ojojin quicuan chak sa' xsa' li nimla car, jo'can ajcui' nak lain li C'ajolbej tincuank oxib cutan ut oxib k'ojojin sa' li muklebal. ⁴¹ Laj Jonás quixch'olob xyalal chiruheb laj Nínive ut que'yot'e xch'ol que'xjal xc'a'ux. Ut lain k'axal nim incuanquial chiru laj Jonás ut cuanquin arin sa' eyank, abanan laex inc'a' niquinepab. Jo'can nak eb laj Nínive te'cuaclik chak sa' xk'ehil li rakba atin erochben ut texjiteb xban nak inc'a' nequexpaban. ⁴² Li ixk li quicuan chok' reina sa' li tenamit li cuan sa' li sur tacuaclik chak sa' xk'ehil nak tarakek' atin sa' eben ut tixye nak cuan emac xban nak inc'a' nequexpaban. Á'an quichal chák toj sa' xmaril li ruchich'och' chirabinquial lix na'leb laj Salomón. Ut lain k'axal cui'chic cuan inna'leb chiru laj Salomón ut cuanquin arin sa' eyank. Abanan inc'a' nequepab li cuatin. ⁴³ Li maus aj musik'ej nak ac x-el riq'unin junak cuink, nalajnume' sa' li chaki na'ajej ut yo chixsic'bal bar taqc chi hilanc. Ut ma bar naxtau xna'aj. ⁴⁴ Tojo'nak naxye sa' xch'ol: —Lain tinsuk'ik cui'chic riq'unin li cuink bar quin-el cui' chak, chan. Ut nak nocoxtau li cuink, chanchan jun li cab mac'a' chic cuan chi sa', mesunbil ut cauresinbil re oybeninc. ⁴⁵ Ut li maus aj musik'ej naxsic' cuukub chic chi maus aj musik'ej k'axal cui'chic numtajenak xmausilaleb chiru a'an. Neque'oc chí cuanc riq'unin li cuink. Ut lix na'leb li cuink a'an numtajenakak chic xyibal ru chiru nak xcuan chak junxil. Ut jo'can ajcui' tec'ul laex li numtajenak le mausilal.

Lix na' ut eb li ritz'in li Jesús

46 Ut toj yo' ajcui' chi ̄tinac li Jesús riq'uineb li tenamit nak quicuulac aran lix na' rochbeneb li ritz'in li Jesús. Cuanqueb chirix cab ut te'raj raj r̄atinanquileb. **47** Ut jun quiyehoc chak re li Jesús: —Kacua', la na' ut eb la cuitz'in cuanqueb chirix cab. Te'raj ̄cuatíninanquil. **48** Ut li Jesús quixye re: —¿Ani lin na' ut aniheb li cuitz'in nak nequec'oxla laex?— **49** Ut quixye' li ruk' cuanqueb cui' lix tzolom ut quixye: —A'ineb lin na' ut a'ineb li cuitz'in. **50** Chixjunileb li te'banunk re li naraj lin Yucua' li cuan sa' choxa, a'aneb li cuitz'in, a'aneb li cuanab ut a'aneb lin na', chan.

13

Li jaljoquil ru ̄tin chirix laj acuinel

1 Ut sa' li cutan a'an, li Jesús qui-el sa' li cab ut coxc'ojlak chire li palau. **2** Ut que'cuulac li q'ula tenamit riq'unin chirabinquil. Xban xq'ualeb li tenamit, li Jesús qui-oc sa' jun li jucub cuan sa' li palau ut quic'oja chi sa'. Ut chixjunileb li tenamit xakxoqueb chire li ha'. **3** Ut nabal c'a'ak re ru quixtzoleb cui' riq'unin jaljoquil ru ̄tin, ut quixye reheb: —Abihomak li tinye ere. Jun aj acuinel co chi aqc. **4** Ut nak yo' chixhirbal li iyaj, cuan quinak chire be. Que'chal li xul li neque'xic'an ut que'xcua' li iyaj. **5** Ut cuan ajcui' li iyaj quinak sa' li pec ru bar mac'a' cui' mas li ch'och'. Sa' junpat quimok, abanan inc'a' quixchap xxe' xban nak jay li ch'och' sa' xben li pec. **6** Nak quichal li sak'e quichakic li acuimk xban nak inc'a' cham naxic lix xe'. **7** Ut cuan cui'chic li iyaj quinak sa' xyank li q'ux. Ut nak quichamo' li q'ux sa' xben, quixnat' li acuimk. **8** Ut cuan cui'chic li iyaj quinak sa' li chabil ch'och'. Quimok ut quiyuchin. Cuan quixq'ue lajetk xca'c'al ru (30). Cuan quixq'ue oxtakc'al ru (60), ut cuan cui'chic quixq'ue o'takc'al ru (100) li junjunk. **9** Tojo'nak li Jesús quixye reheb: —Li ani na-abin, chixq'uehak retal li c'a'ru ninye, chan.

Li Jesús quixye c'a'ru aj e nak cuan li jaljoquil ru ̄tin

10 Mokon chic que'cuulac lix tzolom riq'unin li Jesús, ut que'xye re: —¿C'a'ut nak nacacuatinabej sa' jaljoquil ru ̄tin?— **11** Li Jesús quichak'oc ut quixye reheb: —Q'uebil ere laex re nak tenau xyalal li mukmuquil na'leb chirix lix nimajcual cuanquilal li Dios. Aban eb a'an inc'a' q'uebil reheb re te'xnau li na'leb a'an. **12** A' li ani naxtau ru li xyalal, k'axal cui'chic nabal taq'uehek' chixnau; a'ut li ani ca'ch'in ajcui' naxnau, taisik chiru li jo' q'ual naxnau. **13** Jo'can nak ninatinaq riq'uineb sa' jaljoquil ru ̄tin xban nak usta yoqueb chi iloc, abanan inc'a' te'xq'ue retal. Usta yoqueb chi abinc, abanan inc'a' te'xtau xyalal. **14** Chi jo'can natz'akloc ru li quiyeho' xban li profeta Isaías nak quixye chi jo'ca'in:

Cuulaj cuulajeb chirabinquil ut inc'a' neque'xtau xyalal. Ut cuulaj cuulajeb chirilbal ut inc'a' neque'xq'ue retal li c'a'ru neque'r'il.

15 Li tenamit a'in xe'alo' lix ch'oleb ut chanchan tz'aptz'o lix xiqueb ut chanchaneb li mutz'. Jo'can nak inc'a' neque'xnau li xyalal. Cui ta macua' jo'can, te'ilok raj ut te'xq'ue raj retal li te'r'il ut te'abink raj ut te'xtau raj ru li neque'rabi ut te'yot'ek' raj xch'ol ut te'xjal raj xc'a'uxeb ut lain tebing'uirtesi raj. (Is. 6:9-10)

16 Us xak ere laex xban nak nequex-iloc ut nequeq'ue retal li c'a'ru nequeril. Nequex-abin ut nequetau ru lix yalal. **17** Relic chi yal tinye ere nak nabaleb li profeta ut nabaleb li tiqueb xch'ol que'raj rilbal li c'a'ru yoquex chirilbal ut inc'a' que'r'il. Ut que'raj rabinquil li c'a'ru yoquex chirabinquil ut inc'a' que'rabi.

Li Jesús quixch'olob xyalal chirix laj acuinel

18 Abihomak lix yalal li jaljoquil ru ̄atin a'in chirix laj acuinel. **19** Li ani na-abin re li xyalal chirix lix nimajcual cuanquilar li Dios ut inc'a' naxtau ru, a'an chanchan li iyaj li quinak chire be. Ut laj tza nachal ut naxmak' chiru li xyalal ut sa' junpat nasach sa' xch'ol. **20** Ut li iyaj li quinak sa' li pec ru li inc'a' quixchap xxe', a'aneb li neque'abin re li r̄atín li Dios ut sa' junpat neque'xpab chi saheb sa' xch'oleb. **21** Abanan inc'a' nacana sa' xch'oleb. Nak nachal junak raylal, malaj ch'a'ajquilar sa' xbeneb xban lix pabaleb, inc'a' neque'xcuy xnumsinquil. Sa' junpat neque'ch'inan xch'ol. **22** Ut li iyaj li quinak sa' xyank li q'uij, a'aneb li neque'abin re li ratin li Dios. Abanan ca'aj cui' li c'a'ak re ru cuan sa' ruchich'och' neque'xc'oxla, jo' li biomal ut xr̄abal ru li c'a'ak chic re ru. Ut a'an li naramoc lix yalal chiruheb. Mac'a' na-oc cui' li r̄atín li Dios chiruheb. **23** Ut li iyaj li quinak sa' li ch̄abil ch'och', a'aneb li neque'rabi ut neque'xpab ut neque'xtau ru chi tz'akal li r̄atín li Dios. Neque'q'ui chi us sa' lix pabaleb, jo' li acuimk li naruchin lajetk xca'takc'äl (30) ut li naxq'ue oxtakc'äl (60), ut li naxq'ue o'takc'äl ru (100) li junyunk.

Lijaljoquil ru qtin chirix li pim li inc'a' us

24 Ut quixye jun chic li jaljoquil ru ̄atin reheb li tenamit: Lix nimajcual cuanquilar li Dios chanchan jun li cuink quirau li ch̄abil riyajil li trigo sa' lix ch'och'. **25** Ut nak ac xe'cuar chixjunileb, quicuulac li xic' na-iloc re laj echal re li ch'och' ut sa' xyank li trigo coxrau chak li riyajil li yibru pim chanchan ajcui' li trigo ut cq. **26** Ut nak quimok chak li acuimk ut quiuchin, tojo'nak quic'utun ajcui' li pim. **27** Que'cuulac ut eb laj c'anjel riq'uin laj echal re li ch'och' ut que'xye: —Kacua', ̄ma macua' ch̄abil iyaj li xacuau sa' li ch'och'? ̄Bar put xchal li pim cuan chi sa'?— **28** Ut a'an quixye reheb: —Jun li cuink xic' na-iloc cue xbanur re a'in, chan. Ut eb laj c'anjel que'xye: —̄Ma taquaj toxic ut toxkamich?— **29** Ut laj echal re li ch'och' quixye: —Inc'a'. Mare sa' xmich'bal li pim naru temich' ajcui' li acuimk. **30** Canabomak chi q'ujc chi xcabichaleb toj sa' xk'ehil xsic'bal ru li trigo. Ut sa' xk'ehil li xsic'bal, tinye reheb laj sic'ol re: —Xocomak junxil li pim ut bac'omak chi job re xc'atbal. A'ut li trigo c'ulahomak sa' li rochochil.—

Lijaljoquil ru atin chirix li mostaza

31 Li Jesús quixye jun chic li jaljoquil ru atin reheb: Lix nimajcual cuanquilar li Dios, a'an chanchan li riyajil li ninki mostaza, li quixc'am jun li cuink ut quirau sa' lix ch'och'. **32** Li riyajil li mostaza coc' chiruheb chixjunil li iyaj cuan. Ut nak naq'ui, nink chi us nacuulac. Naxk'ax xteram li acuimk. Chanchan jun ton li che' ut eb laj xic'anel xul neque'xyib lix soc sa' eb li ruk'.

Lijaljoquil ru qtin chirix xch'amal xk'emal li caxlan cua

33 Jun chic li jaljoquil ru ̄atin quixye: Jun li ixs quixq'ue ca'ch'in lix ch'amal caxlan cua sa' xyank li oxib bisoc li c'aj ut quisipo' li k'em xban, ut nabal chic li caxlan cua qui-el. Lix nimajcual cuanquilar li Dios chanchan ajcui' a'an. Nak neque'rabi resil, nabal neque'pában re.

C'a'ru rajbal nak quiatinac sa' jaljoquil ru atin li Jesús

34 Chixjunil a'in sa' jaljoquil ru atin quixye li Jesús reheb li q'uila tenamit. Ut mac'a' quixye reheb chi macua' ta sa' jaljoquil ru atin. **35** Nak quixbanu chi jo'can quitz'akloc ru li quixye li profeta nak quixye chi jo'ca'in: Tinatínak riq'uineb sa' jaljoquil ru ̄atin. Tinch'olob xyalal li c'a'ak re ru mukmu chak chalen sa' xticlajic li ruchich'och'. (Sal. 78:2)

Li Jesús quixch'olob xyalal chirix li yibru pim

36 Ut nak quixchak'rabiheb li tenamit, li Jesús qui-oc sa' cab. Ut nak que'cuulac eb lix tzolom riq'uin, que'xye re: —Kacua', ch'olob chiku li xyalal li jaljoquil ru atin chirix li yibru pim sa' li acuimk, chanqueb. **37** Quichak'oc li Jesús ut quixye reheb: —Li na-acuoc re li chabil iyaj, a'an lajn li C'ajolbej. **38** Ut li ch'och', a'an li ruchich'och'. Ut li chabil iyaj, a'aneb li cuanqueb rubel xcuauquil li nimajcual Dios. Ut li yibru pim, a'aneb li cuanqueb rubel xcuauquil laj tza. **39** Ut li xic' na-iloc, a'an li qui-acuoc re li yibru pim. A'an laj tza. Ut lix k'ehil xsic'bal ru li acuimk, a'an li roso'jic li ruchich'och'. Ut eb laj sic'ol re, a'aneb lix ángel li Dios. **40** Ut jo' ajcui' nak nach'utubac ut nac'ate'sa' xam li pim, jo'can ajcui' nak toxrakek' li ruchich'och' a'in. **41** Lajn li C'ajolbej tintaklaheb chak lin ángel ut eb a'an tole'isink reheb chixjunileb laj mac sa' xyankeb li cuanqueb rubel xnimajcual cuanquilal li Dios. Ut te'isik ajcui' chixjunileb li neque'q'uehoc re chi macobc li tenamit. **42** Ut te'q'uehek' sa' li hornero li lochlo cui' li xam. Ut aran tacuank li yabac ut li c'uxuxinc ruch e xban li raylal li te'xc'ul. **43** Ut li tiqueb xch'ol te'q'uehek' xlok'al. Chanchanakeb li sak'e sa' lix nimajcual cuanquilal li Dios lix Yucua'eb. Li ani na-abin re li yoquin chixyebal chixq'uehak retal chi us li ninye.

Lijaljoquil ru atin chirix li tumin mukmu sa' ch'och'

44 Lix nimajcual cuanquilal li choxa, a'an chanchan li tumin mukbil sa' ch'och'. Quitauman xban jun li cuink. Ut li cuink a'an quixmuk cui'chic xca' sut li tumin. K'axal quisaho' sa' xch'ol nak coxc'ayi chixjunil li c'a'ru cuan re ut quixlok' li ch'och' li mukmu cui' li tumin.

Lijaljoquil ru atin chirix li k'ol k'axal terzo xtz'ak

45 Ut lix nimajcual cuanquilal li Dios, a'an chanchan ajcui' jun li cuink aj yaconel li naxsic' li tertioquil pec perla xc'aba'. **46** Ut nak quixtau jun li perla k'axal chabil, quixc'ayi chixjunil li c'a'ru cuan re ut quixlok' li perla li k'axal terzo xtz'ak.

Lijaljoquil ru atin chirix li yoy re chapoc car

47 Jo'can ajcui' lix nimajcual cuanquilal li Dios, a'an chanchan li yoy li quiq'uemana sa' li palau ut q'uila pay chi car quirisi chak. **48** Ut nak quinujac, que'risi chire li ha' ut que'oc chixsic'bal ru li car. Li chabil que'xxoc ut que'xq'ue sa' li chacach ut li inc'a' us que'xtz'ek. **49** Jo'can ajcui' tauxmank sa' roso'jic li ruchich'och'. Te'chalk eb li ángel ut a'an tole'isink reheb li inc'a' useb xna'leb sa' xyanskeb li tiqueb xch'ol. **50** Ut te'q'uehek' li inc'a' useb xna'leb sa' li hornero li lochlo cui' li xam. Ut aran tacuank li yabac ut li c'uxuxinc ruch e xban li raylal li te'xc'ul. **51** Li Jesús quixpatz' reheb: —¿Ma xetau xyalal chixjunil li jaljoquil ru atin a'in? — Eb a'an que'chak'oc ut que'xye re: —Kacua', xkatau xyalal, chanqueb. **52** Li Jesús quixye reheb: —Jo'can nak chixjunileb li neque'xnau c'a'ru naxye sa' li chak'rab ut neque'xtzol rib cuiq'uin, eb a'an chanchaneb laj echal cab li narisi sa' lix c'ylebal li c'a'ru ac' jo' ajcui' li c'a'ru k'el, chan li Jesús. (Quixye chi jo'can xban nak cuan xlok'al li na'leb q'uebil najter xban li Dios ut cuan ajcui' xlok'al li ac' na'leb q'uebil xban li Jesús.)

Li Jesús quitz'ektaq xban lix tenamit aj Nazaret

53 Ut nak quirake' xyebal li jaljoquil ru atin a'in, li Jesús qui-el sa' li tenamit Capernaum. **54** Ut nak quicuulac sa' lix tenamit Nazaret, quixtzoleb sa' li cab li neque'xch'utub cui' ribeb laj judío. Ut eb a'an que'sach xch'oleb chirabinquil li quixye li Jesús, ut que'xye chi ribileb rib: —¿Bar naxtau lix na'leb li cuink a'in? — Chanru nak naru xbanunquil li milagro a'in li

nalajxbanu? ⁵⁵ ¿Ma mācua' ta bi' a'an li ralal laj pech? ¿Ma mācua' ta bi' lix María lix na'? Ut, ¿ma mācua' ta bi' a'an li raseb laj Jacobo ut laj José, laj Simón ut laj Judas? ⁵⁶ Ut, ¿ma mācua' ta bi' sa' kayank cuanqueb li ranab? ¿Bar ta cui' xtau chixjunil lix na'leb? chanqueb. ⁵⁷ Ut inc'a' que'raj rabinquil ut que'xtz'e ktana. A' ut li Jesús quixye reheb: —Junak profeta q'uebil xlok'al. Abanan sa' lix tenamit ut sa' li rochoch inc'a' q'uebil xlok'al, chan. ⁵⁸ Ut inc'a' q'ui li milagros li quixbanu aran xban nak inc'a' que'raj pābabanc li tenamit.

14

Lix camic laj Juan laj Cubsihom Ha'

¹ Sa' eb li cutan a'an laj Herodes li acuabej quirabi resil li c'a'ru yo chixbanunquil li Jesús. ² Ut a'an quixye reheb laj c'anjel chiru: —A'an tana laj Juan laj Cubsihom Ha'. A'an xcuacli cui'chic chi yo'yo sa' xyankeb li camenak. Jo'can nak cuan xcuanquil chixbanunquil li milagros, chan. ³ Ac junxil laj Herodes quixtakla xchabpal laj Juan. Que'xbac' riq'uin cadena ut que'xq'ue sa' tz'alam. Laj Herodes quixbanu chi jo'can yal xban nak jo'can quiraj lix Herodías. Lix Herodías a'an li rixakil laj Felipe li rjitz'in laj Herodes. Ut laj Herodes quixc'am chok' rixakil. ⁴ Toj maji' naq'uehe sa' tz'alam laj Juan laj Cubsihom Ha' nak quixye re laj Herodés chi jo'ca'in: —Nimla māc xabanu nak xac'am chok' acuixakil lix Herodías, chan laj Juan re. ⁵ Jo'can nak laj Herodes quiraj raj xcamsinquel, aban quixucuac chiruheb li q'uila tenamit xban nak laj Juan profeta nak cuan chiruheb a'an. ⁶ Ut sa' xnink'einquil lix chihab laj Herodes, lix co' lix Herodías quixajoc chiruheb chixjunileb li ula'. Ut c'ajo' nak quicuulac chiru laj Herodes. ⁷ Jo'can nak laj Herodes quixyechi'i re riq'uin juramento nak tixq'ue re chixjunil li c'a'ru tixpatz'. ⁸ Ut li xka'al chi ac tacchi' inbil xban lix na', quixye re laj Herodes: —Q'ue cue arin sa' plato lix jolom laj Juan laj Cubsihom Ha', chan. ⁹ Ma' ca'ch'in nak quiraho' xch'ol laj Herodes chirabinquil li quixye. Aban xban li juramento li ac quixye chiruheb li cuanqueb sa' mex rochben, quixtakla xq'uebal re li xka'al li c'a'ru quixpatz'. ¹⁰ Quixtakla xch'otbal xcux laj Juan aran sa' tz'alam. ¹¹ Ut que'xc'am chak lix jolom laj Juan sa' jun plato ut quik'axtesic re li xka'al. Ut li xka'al quixq'ue re lix na'. ¹² Nak que'rabi resil lix camic laj Juan, eb lix tzolom que'cuulac chixc'ambal li camenak ut coxe'xmuk. Ut coxe'xye chak resil re li Jesús.

Li Jesús quixq'ueheb chi cua'ac li ob mil chi cuink

¹³ Nak quirabi resil li quic'ulman, li Jesús qui-el aran. Qui-oc sa' jun li jucub ut co' sa' jun na'ajej cuan xjunes. Ut nak que'xq'ue retal li tenamit nak co', que'el chak sa' lix tenamiteb ut que'coeb chi rokeb sa' q'anił bar co' cui' li Jesús. ¹⁴ Ut li Jesús nak qui-el sa' li jucub, quiril li q'uila tenamit li ac que'cuulac xben cua chiru a'an. Ut quixtok'oba ruheb ut quixq'uirtesiheb li yaj cuanqueb sa' xyankeb. ¹⁵ Ut nak qui-ecuu, que'cuulac lix tzolom riq'uin li Jesús ut que'xye re: —Yo chi ecuuc ut māc'a' cuan arin cuanco cui'. Jo'can nak tataklaheb li q'uila tenamit chixlok'bal lix cua sa' eb li coc' tenamit. — ¹⁶ Li Jesús quixye reheb: —Moco tento ta nak te'xic eb a'an. Q'uehomak xcuaheb laex. — ¹⁷ Ut eb a'an que'xye: —Māc'a' cuan ke lāo arin, ca'aj cui' ob chi caxlan cua ut cuib chi car. — ¹⁸ Li Jesús quixye reheb: —C'amomak chak cuiq'uin. — ¹⁹ Ut nak ac xtalakaheb li q'uila tenamit chi c'ojlac sa' li pach'a'yá, quixchap li ob chi caxlan cua ut li cuib chi car, qui-iloc takec' ut quixabantioxi chiru li Dios. Ut quixjachi ut quixq'ue li caxlan cua reheb lix tzolom ut que'xeq'ui reheb li q'uila tenamit. ²⁰ Ut que'cua'ac chixjunileb toj retal que'c'ojla xch'oleb. Ut

que'xxoc li jo' q'uijal qui-ela'an. Cablaju chacach nujenak li rela' qui-ela'an.
21 Eb li que'cua'ac cuanqueb ob mil chi cuink chi inc'a' q'uebileb sa' ajl li ixs ut eb li coc'al.

Li Jesús quibec chiru li palau

22 Tojo'nak li Jesús quixtaklaheb lix tzolom chi oc sa' li jucub re nak a'aneb xben cua te'xic jun pac'al li palau roybeninquel nak tixchak'rabiheb li q'uila tenamit. **23** Ut nak ac xchak'rabiheb li tenamit, yo chi oc li k'ojoyn nak li Jesús co chiru tzul chi tijoc. Ut aran cuan xjunes. **24** Ut li jucub li yoqueb chi xic cui' lix tzolom tacuulak sa' xyi li palau, ut lix cau ok li palau cau nocoxquet rib chiru li jucub, xban nak chiru yo chak chi chalc li ik'. **25** Sakeuc re nak quicuulac li Jesús bar cuanqueb cui' ut yo chi béc chiru li ha'. **26** Nak que'ril lix tzolom nak cuan jun yo chi béc chiru ha', que'xucuac ut que'xjap re ut que'xye: —Anum a'an. —**27** A'ut li Jesús ticto quiratinaheb ut quixye rebeb: —Mexxucuac. Lain li yoquex chicuibal. Cacuubresihomak ech'ol, chan rebeb. **28** Quichak'oc laj Pedro ut quixye: —Kacua', cui laqat, ye nak tinxic ajcui' lain acuiq'uin chiru li ha'. —**29** Li Jesús quixye re: —Quim. — Ut laj Pedro qui-el chak sa' li jucub ut qui-oc chi béc chiru li ha' re taxic riq'uin li Jesús. **30** Abanan nak quixq'ue retal li cak-sut-ik', quixucuac, ut qui-oc chi subec' sa' li ha' ut quixjap re ut quixye: —¡Kacua', chinacolak! chan. **31** Ut li Jesús sa' junpat quixye' li ruk', quixchap ut quixye re: —At cuink, inc'a' nacatpabán chi tz'akal. ¿C'a'ut nak xacuiba ach'ol? —**32** Ut nak que'oc sa' li jucub, quich'ana li ik'. **33** Ut eb li cuanqueb sa' li jucub que'xcuik'ib rib chiru li Jesús ut que'xlok'oni ut que'xye re: —Relic chi yal nak laqat li Ralal li Dios, chanqueb re.

Li Jesús quixq'uirtesi li yaj aran Genesaret

34 Nak quicuulac li Jesús rochbeneb lix tzolom jun pac'al li palau, coxe'el sa' li na'ajej Genesaret. **35** Eb li cuink cuanqueb aran ticto que'xq'ue retal nak a'an li Jesús ut que'xye resil sa' chixjunil li na'ajej a'an. Ut quilaje'xc'am li yaj riq'uin re nak tixq'uirtesiheb. **36** Ut que'xtz'ama chiru nak tixcanabeb li yaj chixch'e'bal li rak'. Ut chixjunileb li que'ch'e'oc re li rak' quilaje'q'uira.

15

Li c'a'ru na-el chak sa' li kach'ol, a'an li noocomacob cui'

1 Jun ch'ol eb aj tz'ib rochbeneb laj fariseo que'chal chak Jerusalén. Que'cuulac riq'uin li Jesús ut que'xye re: **2** —¿C'a'ut nak eb la tzolom neque'xk'et li chak'rab li canabanbil xbaneb li kaxe' katon? ¿C'a'ut nak inc'a' neque'xch'aj li ruk'eb nak neque'cua'ac jo' tz'ibanol sa' li kachak'rab? chanqueb. **3** Li Jesús quichak'oc ut quixye rebeb: —Ut laqex, ¿c'a'ut nak nequek'et li chak'rab q'uebil ere xban li Dios riq'uin xbanunquel le najter na'leb li c'aynakex chixbanunquel? **4** Li Dios quixye: —Cha-oxlok'i la na' ayucua'. Ut quixye ajcui': —Ani tixhob xna' xyucua', li jun a'an camsinbil nak taosok'. (Ex. 20:12; 21:17) **5** A'ut laqex nequeye cui cuan junak inc'a' naraj xtenk'anquil lix na' xyucua', li jun a'an tixye re lix na' xyucua', "ac mayejanbil chiru li Dios li c'a'ru raj taruk' tatintenk'a cui'." Ut inc'a' chic tento tixtenk'a lix na' xyucua', chanqueb. **6** Jo'can nak laqex nequetz'ektana xcuanquil li chak'rab q'uebil xban li Dios ut a' chic le najter na'leb nequebanu. **7** Laqex aj ca'pac'al u. Yal ajcui' li quixye li profeta Isaías cherix laqex nak quixtz'iba li c'a'ru quiyehe' re xban li Dios nak quixye:

8 Li tenamit a'in niquine'xlok'oni ca'aj cui' riq'unin xtz'umal reheb. Moco neque'xbənu ta chi anchal xch'oleb.

9 Mac'a rajbal nak niquine'xlok'oni xban nak li tijleb li neque'xc'ut a'an yal xchak'rabeb li cuink. (Is. 29:13)

10 Ut li Jesús quixbokeb li tenamit riq'unin ut quixye reheb: —Abihomak chejunilex li c'a'ru tinye ut q'uehomak retal re nak tetau xyalal. 11 Macua' li c'a'ru naxtzaca li cuink namaco' cui'; aban li c'a'ru inc'a' us na xc'oxla sa' xch'ol, a'an li namaco' cui'. — 12 Que'jiloc lix tzolom riq'unin li Jesús ut que'xye re: —¿Ma xaq'ue retal nak eb laj fariseos ra xe'rec'a nak xe'rabi li ətin li xaye? — 13 Quichak'oc li Jesús ut quixye reheb: —Chixjunil li acujmk inc'a' aubil xban lin Yucua' cuan sa' choxa, a'an tamich'mank. 14 Canabomakeb. A'aneb mutz'eb ut neque'xberesiheb li mutz'. Ut cui li mutz' neque'xberesi li rech mutz'il, chi xcabichaleb te't'anek' sa' jul. — 15 A'ut laj Pedro quichak'oc ut quixye: —Banu usilal, ch'olob chiku li xyalal li jaljoquil ru ətin a'in. — 16 Ut li Jesús quixye re: —¿Ma toj mac'a' ajcui' ena'leb laex? 17 ¿Ma toj maj'i' nequetau xyalal nak chixjunil li c'a'ru naxtzaca junak, a'an moco sa' xch'ol ta naxic? Tic sa' xsa' naxic ut chirix a'an naxtze'ek cui' chic. 18 Li inc'a' us na-el sa' xtz'umal re li junjunk, a'an sa' lix ch'ol nachal. Ut a'an a'in li namaco' cui'. 19 Sa' lix ch'ol junak nachal chak li məus aj na'leb, li camsinc ras ritz'in, li muxuc caxar, li co'betac yumbetac, li elk'ac, li k'abanc ut li majecuanc. 20 Chixjunil li məus aj na'leb a'in sa' xch'ol junak nachal chak, ut a'an li namaco' cui' li junjunk. Ut li cuac' chi inc'a' ch'ajbil li uk'ej, macua' a'an li namaco' cui' li cuink, chan.

Li macua'eb aj judío naru neque'oc rubel xcuanquil li Dios

21 Ut qui-el aran li Jesús ut co' sa' eb li na'ajej xcuent Tiro ut xcuent Sidón. 22 Ut cuan jun li iixk aj Canaán quichal sa' li na'ajej a'an. Japjo re chixyebal: —Kacua', Ralalat laj David, chacuuxtana taxak cuu. Lin co' c'ajo' nak yo' chi tacuasajc xban li məus aj musik'ej, chan. 23 A'ut li Jesús mə jun li ətin quixye re. Ut eb lix tzolom que'nach'oc riq'unin li Jesús ut que'xye re: —Kacua', banu li usilal re, re nak tixcanab xjapbal re, chanqueb. 24 Li Jesús quichak'oc ut quixye: —Mə bar chic taklanbilin chak, ca'aj cui' riq'uninb laj Israel. Chanchaneb li carner sachenak, chan. 25 Ut li iixk quixcuik'ib rib chiru li Jesús ut quixye cui' chic: —Kacua', chacuuxtana taxak cuu. — 26 Li Jesús quichak'oc ut quixye re: —Inc'a' us xmak'bal xcuaheb li coc'al ut xq'uebal reheb li tz'i', chan li Jesús. 27 Ut li iixk quichak'oc ut quixye re: —Yal li nacaye, Kacua', abanan eb li tz'i' neque'xxoc xc'aj xcuaheb li coc'al li nat'ane' rubel li mex nak yoqueb chi cuac'ac, chan. 28 Ut li Jesús quixye re: —Kana', laat relic chi yal xatau ru li xyalal ut chi anchal ach'ol xatpaban. Chi-uxk li c'a'ru xatz'ama, chan. Ut sa' ajcui' li honal a'an quiq'uira lix co'.

Li macua'eb aj judío que'q'uirtesic xban li Jesús

29 Qui-el chak li Jesús aran, ut quinume' chire li palau Galilea sa' xna'ajeb li macua'eb aj judío. Tojo'nak quitake' chiru jun li tzyl ut aran quic'oila. 30 Ut que'cuulac li q'uila tenamit riq'unin. Cuanqueb nabal li yaj li que'c'ame' riq'unin. Cuanqueb li yek rok, cuanqueb li mutz', cuanqueb li mem ut li tokol ruk'eb, ut cuanqueb ajcui' nabaleb li yaj rochbeneb. Ut cole'q'uehek' chiru li Jesús ut a' yal c'a'ru lix yajel li junjunk, li Jesús quixq'uirtesiheb. 31 Jo'can nak que'sach xch'oleb li tenamit chirilbal nak li mem neque'ətinac chic ut li tokoleb ruk' que'q'uira ut li yek'eb rokeb neque'bec chic ut eb li mutz' ruheb neque'iloc chic. Ut que'xnima xlok'al lix Dioseb laj Israel.

Li Jesús quixq'ueheb chi cuac'ac li cahib mil chi cuink

³² Ut li Jesús quixbokeb lix tzolom riq'uin ut quixye reheb: —Neque'cuil xtok'obal ruheb li tenamit. Ac oxib cutan xchaliqeb chicuix ut mac'a' xcuaheb. Ut inc'a' nacuaj xtaklanquileb sa' rochoheb chi inc'a' te'cua'ak. Naru neque'lub sa' be, chan. ³³ Ut eb lix tzolom que'xye re: —¿Bar takatau cua sa' li na'ajej a'in re takaq'ueheb chi cuac li q'uila tenamit a'in? Arin mac'a' cuan, chanqueb. ³⁴ Ut li Jesús quixye reheb: —¿Jarub li caxlan cua cuan eriq'uin? chan. —Cuukub ajcui' li caxlan cua ut cuib oxib li coc' car, chanqueb re. ³⁵ Ut li Jesús quixtaklaheb li tenamit chi c'oqlac chiru ch'och'. ³⁶ Ut quixchap li cuukub chi caxlan cua ut eb li car, quixbantioxi chiru li Dios ut quixjachi. Ut quixq'ue reheb lix tzolom re nak te'xjeq'ui reheb li tenamit. ³⁷ Que'cua'ac chixjunileb toj retal que'c'oqla xch'oleb. Ut que'xc'ula li quiela'an. Cuukub chacach nujenak li rela' xc'aj li caxlan cua li qui-ela'an. ³⁸ Ut eb li que'cua'ac, a'aneb cahib mil chi cuink chi mac'a'eb sa' ajll ixk chi moco li coc'al. ³⁹ Nak ac quixchak'rabiheb li tenamit, li Jesús qui-oc cui'chic sa' li jucub ut co cui'chic jun pac'al li palau sa' li na'ajej xcuént Magdala.

16

Eb laj fariseo jo' eb ajcui' laj saduceo que'raj rilbal li milagro

¹ Que'cuulac laj fariseo ut eb laj saduceo riq'uin li Jesús. Que'raj xyalbal rix ut que'oc chixtz'amanquil chiru nak tixbanu junak milagro chiruheb re rilbal ma yal nak riq'uin li Dios nachal lix cuanquil. ² Ut li Jesús quichak'oc ut quixye reheb: —Nak na-ecuu nequeye “chabilak li cutan cuulaj xban nak cak ru li choxa.” ³ Ut ek'ela nequeye “hon naxq'ue hab xban nak cak ru ut k'ojyin ru li choxa.” Laex aj ca'pac'al u. Nequenau xq'uebal retal ru li choxa. Abanan, ca'cui' a'an nequenau rilbal. Inc'a' nequeq'ue retal c'a'ru xyalal li yo chi c'ulmanc sa' eb li cutan a'in. ⁴ Laex jun tep chi tenamit inc'a' us le na'leb. Nequetz'ektaña li Dios ut nequeraj nak tac'utbesik cheru junak milagro. Abanan inc'a' tac'utbesik cheru, ca'aj cui' li milagro li qui-ux re laj Jonás, chan li Jesús. Tojo'nak quixcanabeb ut co. ⁵ Nak ac xe'nume' lix tzolom jun pac'al li palau, que'xq'ue retal nak inc'a' que'xc'am xtzacaemk. ⁶ Ut li Jesús quixye reheb: —Cheq'uehak retal, mebon erib riq'uin xch'amal xcaxlan cua eb laj fariseo chi moco riq'uin xch'amal xcaxlan cua eb laj saduceo. ⁷ Eb lix tzolom que'oc chi atinac chi ribileb rib ut que'xye: —Xban nak inc'a' xkac'am chak li caxlan cua, jo'can nak yo chixyebal ke chi jo'can. ⁸ Li Jesús quixnau li c'a'ru yoqueb chixyebal ut quixye reheb: —Laex inc'a' nequexpaban chi tz'akal. ¿C'a'ut nak yoquex chi c'oxlac chirix li xinye ere? ¿C'a'ut nak yoquex chixyebal chiribl erib nak mac'a' le caxlan cua? ⁹ ¿Ma toj maji' nequetau xyalal? ¿Ma inc'a' najultico' ere nak xinjachi li ob chi caxlan cua reheb li ob mil chi cuink? Ut, ¿jarub chacach li rela' quexoc? ¹⁰ Ut, ¿ma inc'a' najultico' ere nak xinjachi li cuukub chi caxlan cua reheb li cahib mil chi cuink? ut, ¿jarub chacach li rela' quexoc? ¹¹ ¿C'a'ut nak inc'a' nequetau xyalal nak macua' chirix li caxlan cua yoquin chi atinac nak xinye ere: Mebon erib riq'uin li xch'amal xcaxlan cua eb laj fariseo ut eb laj saduceo? chan. ¹² Tojo'nak que'xtau ru nak macua' chirix xch'amal lix caxlan cua yo chi atinac. Chirix ban lix tijlebeb laj fariseo ut laj saduceo yo chi atinac.

Laj Pedro quixye nak li Jesús, a'an li Cristo

¹³ Chirix chic a'an li Jesús co rochbeneb lix tzolom sa' li na'ajej Cesarea re Filipo. Nak yoqueb chi xic, quixpatz' reheb lix tzolom: —¿Anihin lajn nak neque'xye li tenamit? — ¹⁴ Eb a'an que'chak'oc ut que'xye: —Cuan

neque'yehoc nak laat laj Juan laj Cubsihom Ha'. Ut cuan neque'yehoc nak laat li profeta Elías, ut cuan neque'yehoc nak laat li profeta Jeremías. Ut cuan cui'chic neque'yehoc nak laat junak chic reheb li profeta. ¹⁵ Ut li Jesús quixye reheb: —Ut laex, ¿Anihin laín nak nequeyeye? — ¹⁶ Quichak'oc laj Simón Pedro ut quixye: —Láat li Cristo, li Ralal li yo'yoquil Dios. — ¹⁷ Tojo'nak quichak'oc li Jesús ut quixye re: —Us xak acue, at Simón, ralalat laj Jonás, xban nak moco cuink ta xc'utbesin chacuu li xyalal a'in. Lin Yucua' cuan sa' choxa, a'an ban li xc'utbesin chacuu. ¹⁸ Ut laín ninye acue nak laat laj Pedro. Ut sa' xben li sakonac a'in laín tincabla lin iglesia ut laj tza māc'a'ak xcuauquil sa' xbén. ¹⁹ Ut laín tinq'ue acuanquil sa' xbenet li ani te'pabank cue. Ut chixjunil li c'a'ru tāc'ub ru sa' xyalal sa' ruchich'och', li Dios tixc'ub ajcui' ru sa' choxa. Li c'a'ru taye us arin sa' ruchich'och', li Dios tixye ajcui' nak us. Ut li c'a'ru taye inc'a' us, li Dios tixye ajcui' nak inc'a' us. ²⁰ Tojo'nak quixye reheb lix tzolom nak mā ani aj e te'xye nak li Jesús, a'an li Cristo, li yechi'inbil xban li Dios.

Li Jesús quixye resil lix camic

²¹ Chalen sa' li cutan a'an li Jesús quixtiquib xch'olobanquib chiruheb lix tzolom nak tento taxic Jerusalén chixc'ulbal nabal li raylal xbanet li cuink li xakabanbileb chi c'anjelac sa' li templo ut xbanet li xbenil aj tij jo'eb ajcui' laj tz'ib. Quixye reheb nak tācamsik ut nak tācuaclik cui'chic chi yo'yo sa' rox li cutan. ²² Ut laj Pedro quirisi xjunes li Jesús ut qui-oc chixk'usbal: —Kacua', chan re, li Dios taxak chicolok acue re nak inc'a' tāc'ul chi jo'can, chan. ²³ Ut li Jesús quixsuk'isi rib chiribal laj Pedro ut quixye re: —Elen arin sa' xnak' cuu. Laat chanchanat laj tza. Mich'inan inch'ol aban chixbanunquil li c'a'ru tento tinbanu. Laat inc'a' yocat chixc'oxlanquib jo' naxc'oxla li Dios. Yocat ban chixc'oxlanquib jo' naxc'oxla li cuink, chan. ²⁴ Ut li Jesús quixye reheb lix tzolom: —Li ani tāraj inpabankuil, tento nak tixtz'ektaña li c'a'ru naxrahi ru lix ch'ol. Tixcuy xnumsinguil li raylal, usta tācamsik sa' inc'aba'. Ut chinixtākehak. ²⁵ Li ani naxra lix yu'am arin sa' ruchich'och', a'an tixsach li junelic yu'am. A'ut li ani naxsach lix yu'am arin sa' ruchich'och' sa' inc'aba', a'an tarechani li junelic yu'am. ²⁶ ¿C'a'ru tixra li cuink cui tarechani chixjunil xbiomal li ruchich'och' ut tixsach li junelic yu'am xban li biomal? ¿Ma cuan ta bi' c'a'ru tixtoj cui' li yu'am chi junelic? ²⁷ Lain li C'ajolbej tinchalk riq'uin xnimbal xllok'al lin Yucua' cuochbeneb lix ángel. Tojo'nak tinq'ue lix k'ajcamunquib chi xjunjunkaleb jo' chanru lix yehom xbanuhom. ²⁸ Relic chi yal tinye ere nak cuanqueb arin sa' eyank' li inc'a' te'cāmk toj tine'r'il chi chālc lain li C'ajolbej riq'uin incuanquial, chan li Jesús.

17

Qui-ile' lix lok'al li Jesús nak quijalano' li rilobal

¹ Cuakib cutan chic chirix a'an, li Jesús quixc'ameb laj Pedro, laj Jacobo ut laj Juan li ritz'in sa' xbén jun li nimla tzul xjuneseb. ² Ut nak cuanqueb aran, quijalano' li rilobal li Jesús chiruheb. Ut nalementz'un li rilobal jo' li sak'e ut li rak' saksakpotz'in quic'utun ut nalementz'un. ³ Ut xakamileb laj Moisés ut laj Elías chiruheb nak que'r'il ut yoqueb chi atinac riq'uin li Jesús. ⁴ Ut quiatinaç laj Pedro ut quixye re li Jesús: —Kacua', c'ajo' xchak'al ru nak cuanco arin. Cui tacuaj, takayib oxibak muhebal arin. Jun acue, jun re laj Moisés ut jun re laj Elías, chan. ⁵ Toj yo ajcui' chi atinac a'an nak quichal sa' xbenet jun li chok nalementz'un. Li Dios quiatinaç chak sa' li chok, ut quixye: —A'in li cualal raro inban. Riç'uin a'an nasaho' inch'ol. Cherabihak li c'a'ru tixye. — ⁶ Nak

que'rabi a'an, k'axal nak que'xucuac lix tzolom ut que'xcut rib sa' ch'och' ut huphu que'cana. ⁷ Tojo'nak li Jesús quijiloc riq'uineb ut quixt'otz't'otz'iheb ut quixye reheb: —Cualinkex. Mexxucuac.— ⁸ Ut nak que'xtaksi li rilobq'leb, mā ani chic que'ril ru, ca'aj chic li Jesús quicana xjunes. ⁹ Nak yoq'eb chak chi cubec sa' li tzul, quixye li Jesús reheb: —Mā ani aj e teye li c'a'ru xeril. Toj mokon naru teye nak lajn li C'ajolbej ac xincuaci cui'chic chi yo'yo sa' xyankeb li camenak.— ¹⁰ Ut eb lix tzolom que'xpatz' re: —¿C'a'ut nak neque'xye laj tz'ib nak xben cua tac'ulunk laj Elías chiru laj colonel li yechi'inbil xban li Dios?— ¹¹ Ut nak quichak'oc li Jesús quixye reheb: —Yal ajcui' nak laj Elías xben cua tachalk chixc'ubanquil ru chixjunil li c'a'ak re ru. ¹² Abanan lajn tinx'e nak laj Elías ac xc'ulun ut inc'a' que'xnau ru. C'ajo'li raylal xe'xbānu re ut jo'can ajcui' lajn li C'ajolbej naball li raylal tinc'ul xbaneb.— ¹³ Ut eb lix tzolom que'xtau ru nak chirix laj Juan laj Cubsihom Ha'yo chi atinac li Jesús. ¹⁴ Ut que'cuulac bar cuanqueb cui' nabal li tenamit. Ut jun li cuink colxcuik'ib rib chiru li Jesús ut quixye re: ¹⁵ —Kacu'a, chan, chacuuxtana taxak ru li cualal. Rajlai nac'ul xyajel, ut k'axal ra naxc'ul. Nabal sut nat'an'e sa' xam ut nabal sut nat'an'e sa'ha'. ¹⁶ Ut xinc'am riq'uineb la tzolom re nak te'xq'uirtesi; abanan inc'a' xe'ru xq'uirtesinquil, chan. ¹⁷ Li Jesús quixye: —Ex tenamit, tíc inc'a' nequexpában ut inc'a' us le na'leb. ¿Jo' najtil chic tincuank ériq'un re nak texpában? ¿Jo' najtil chic texincuy nak nequec'oxla? C'am chak li al arin cuiq'unin, chan li Jesús nak quichak'oc. ¹⁸ Ut li Jesús quixch'ila li māus aj musik'ej ut qui-el riq'unin li al. Ut sa' ajcui' li honal a'an li al quiq'uirra. ¹⁹ Ut que'cuulac riq'unin li Jesús lix tzolom nak cuan xjunes ut que'xpatz' re: —¿C'a'ut nak inc'a' xoru lao chirisinquil li māus aj musik'ej? chanqueb. ²⁰ Ut li Jesús quixye reheb: —Inc'a' xexru xban nak inc'a' nequexpában chi tz'akal. Relic chi yal tinx'e nak cuan taxak ca'ch'inak le pabal chanchan xnimal ru jun ch'ina riyajil mostaza, teye raj re li tzul a'in, “Elen arin, k'axon le” ut ták'axonk raj. Ut māc'a' raj c'a'ru inc'a' tarük tēbanu. ²¹ Ca'aj cui' riq'unin ayun ut riq'unin tijoc naru risinquil li māus aj musik'ej xcomoneb a'an, chan.

Li Jesús quixye cui'chic resil lix camic

²² Ut nak cuanqueb Galilea, li Jesús quixye reheb: —Lain li C'ajolbej tink'axtesik sa' ruk'eb li cuink li te'camsink cue. ²³ Tine'xcamisi, abanan lajn tincuaclík cui'chic chi yo'yo sa' xyankeb li camenak sa' rox li cutan, chan. Ut c'ajo'nak que'raho' sa' xch'oleb lix tzolom chirabinquil li c'a'ru quixye li Jesús.

Li toj re li rochoch li Dios

²⁴ Ut nak que'cuulac Capernaum li Jesús rochbeneb lix tzolom, que'chal riq'unin laj Pedro li neque'titz'oc toj re li rochoch li Dios ut que'xye re: —¿Ma natojoc laj tzolol ere?— ²⁵ —¿C'a' nak inc'a'? Natojoc, chan laj Pedro. Ut nak cox-ocak a'an sa' cab, li Jesús xben cua quiatinac ut quixye: —¿C'a'ru nacaye at Simón, eb li acuabej sa' ruchich'och', aniheb aj e neque'xtitz' li toj? ¿Ma reheb li ralal malaj ut reheb li jalaneb xtenamit? chan. ²⁶ Laj Pedro quixye re: —Reheb li jalaneb xtenamit.— Ut li Jesús quixye re: —Eb li ralal li acuabej inc'a' neque'tojoc chi jo'canan. ²⁷ Usta inc'a' raj tentoj lajn, abanan re nak me'xpo' xch'oleb kaban, lajn tintoj. Ayu sa' qanil ut cut la chapleb car sa' li palau. Ut li xben li car li tachap chak, tate lix tz'umal re. Aran tatau jun li tumin. Tac'am ut riq'unin a'an tatoj li cue ut tatoj ajcui' la cue, chan.

18

Li nim xcuauquil, a'an aj c'anjel chiru li ras ritz'in

¹ Sa' li cutan a'an que'cuulac lix tzolom riq'unin li Jesús ut que'xye re: —¿Ani li k'axal nim xcuauquil sa' lix nimajcual cuauquílal li Dios? —² Ut li Jesús quixbok jun li ch'ina al riq'unin ut quixxakab chiruheb. ³ Ut quixye reheb: —Relic chi yal tanye ere cui inc'a' tejal ena'leb ut cui inc'a' k'unak ech'ol jo' li ch'ina al a'in, inc'a' tex-oc sa' lix nimajcual cuauquílal li Dios. ⁴ Jo'can nak li ani narec'a nak mac'a' xcuauquil jo' li ch'ina al a'in, a'an li k'axal nim xcuauquil sa' lix nimajcual cuauquílal li Dios. ⁵ Ut li ani tac'uluk re junak ch'ina al jo' a'in sa' inc'aba' chanchan ajcui' nak lajn xinixc'ul. ⁶ Ut li ani tapo'ok xch'oleb li toj k'unesb xch'ol li neque'pabán cue, k'axal raj us chok' re a'an nak tacutek' sa' xchamal li palau chi bac'bo junak nimla pec chixcux. ⁷ Tok'ob ruheb li cuauqueb sa' ruchich'och' xban nak cuan c'a' re ru napo'oc re lix ch'oleb. Ac ch'olch'o nak cuan li c'a'ru napo'oc ch'olej. Abanan raylal chalel sa' xben li ani tayo'obank re li c'a' re ru tapo'ok ch'olej.

Chetz'e ktana li yibru na'leb li naq'uehoc ere chi macobc

⁸ Cui la cuok malaj ut la cuuk' taq'uehok acue chixbanunquil li c'a'ru inc'a' us, us raj cui tayoc' ut tatz'ek. K'axal us chok' acue nak cuank la yu'am chi junelic riq'unin jun ajcui' la cuok ut la cuuk' chiru nak tattxic chi cuib la cuok chi cuib la cuuk' sa'li xbalba bar cui' inc'a' tachupk li xam. ⁹ Cui li xnak' acuu taq'uehok acue chixbanunquil li inc'a' us, us raj cui tacuisi ut tatz'ek. K'axal us nak tacuank la yu'am chi junelic riq'unin jun ajcui' li xnak' acuu chiru nak tattxic riq'unin cuib li xnak' acuu sa'li xam re li xbalba.

Li carner sachenak

¹⁰ Lain ninye ere cheq'uehak retal metz'e ktana junak reheb li k'unesb xch'ol sa' lix pabal xban nak eb a'an c'ac'alenbileb xbaneb li ángel, li cuanqueb riq'unin lin Yucua' cuan sa' choxa. ¹¹ Lain li C'ajolbej quinc'ulun arin sa' ruchich'och' chixcolbaleb li sachenakeb sa'li mac. ¹² ¿C'a'ru nequec'oxla laex chirix li na'leb a'in li oc cue xyebal ere? Cuan ta junak li cuink cuan o'c'älak (100) xcarner ut cui tasachk junak reheb, ¿ma inc'a' raj tixcanabeb li belelaju ro'c'al (99) chic ut taxic chiruheb li tzul chixsic'bal li jun li xsach? ¹³ Relic chi yal tanye ere nak tixtau chak li sachenak, k'axal tasahok' sa' xch'ol riq'unin li jun a'an chiruheb li belelaju ro'c'al li inc'a' que'sach. ¹⁴ Jo'can ajcui' le Yucua' cuan sa' choxa inc'a' naraj nak tasachk junak reheb li toj k'unesb xch'ol sa'li xbalba.

Tento takacuy xmaqueb li kas kitz'in

¹⁵ Cui junak la cuech aj pabanelil tamacobk chacuu, ayu riq'unin ut nak cuankex ejunes, tach'olob chiru lix mac. Ut cui tarabi li xna'leb li taq'ue, lajt xatenken a'la cuech aj pabanelil re nak tixc'am rib sa' usilal acuic'quin. ¹⁶ Cui ut inc'a' naraj nacatrabi, c'am jun malaj cuib li herman acuochben re nak riq'unin li ratin cuib oxib chi testigo, tach'olak ru chixjunil li atin. ¹⁷ Ut cui inc'a' naraj tarabiheb a'an, taye re li iglesia re nak li herman te'xch'olob xyalal chiru. Ut cui inc'a' ajcui' naraj abinc chiruheb a'an, a'an chic tacuank cheru jo' chanchan li macua'ak aj pabanel ut chanchanak laj titz'ol toj li inc'a' us neque'xbanu. ¹⁸ Relic chi yal tanye ere nak chixjunil li c'a'ru tec'ub ru sa' xyalal sa' ruchich'och', li Dios tixc'ub ajcui' ru sa' choxa. Li c'a'ru teye us arin sa' ruchich'och', li Dios tixye ajcui' nak us. Ut li c'a'ru teye inc'a' us, li Dios tixye ajcui' nak inc'a' us. ¹⁹ Tanye ere cui cuan cuibak sa' eyank te'xc'ub ru sa' cuibal chirix c'a'ru te'tijok cui', ut te'xtz'ama chiru lin Yucua' cuan sa' choxa, li c'a'ru te'xtz'ama taq'uehek' reheb. ²⁰ Yalak bar cuankeb cuib oxib

ch'utch'ukeb sa' inc'aba', aran ajcui' cuãkin lajin sa' xyãkeb a'an, chan li Jesús. ²¹ Ut laj Pedro quiatinaç ut quixye re li Jesús: —Kacua', ñjarub sut taruk tincuy xmac li tamaçobk chicuu? ¿Ma tento nak cuukub sut tincuy xmac?— ²² Ut li Jesús quixye re: —Inc'a' ninye ñcue nak ca'aj cui' cuukub sut tacuy xmac. Tinye ban ñcue nak tacuy xmac cuukub sut chi lajetk xcac'al sut (70), chan.

Li jaljoquil ru qtin chirix laj c'anjal li inc'a' quiraj xcuybal xmac li rech a' c'anjelil

²³ Lix nimajcual cuanquilar li Dios tinjuntak'eta riq'unin jun li rey quixbir rix lix c'aseb laj c'anjal chiru. ²⁴ Nak quixtiquib xbirbal rix lix c'aseb, quic'ame' chak chiru li rey jun li cuink lajeb mil chi tumin lix c'as. ²⁵ Ut xban nak mac'a' c'a'ru cuan re li cuink a'an re tixtoj cui' lix c'as, jo'can nak li rey quixtakla xc'ayinquel a'an rech xxiquic li rixakil, ut li ralal xc'ajol ut chixjunil li c'a'ru cuan re, re xtojbal lix c'as. ²⁶ Ut laj c'anjal a'an quixcuik'ib rib chiru li rey ut quixpatz' xcuybal chiru ut quixye re: —Kacua', chinacuy cuan chic ca'ch'inak, ut lajin tintoj chixjunil lin c'as chacuu. — ²⁷ Ut li rey quiril xtok'obal ru laj c'anjal chiru. Quirach'ab ut quixsach li retalil lix c'as. ²⁸ Ut nak qui-el chak laj c'anjal riq'unin li rey, quixc'ul jun li rech aj c'anjelil cuan junmay chi tumin lix c'as riq'unin li cuink a'an. Ut laj c'anjal, li quicuye' xmac, quixchap chi xcux li jun li cuan xc'as riq'unin ut qui-oc chixyatz'bal ut quixye re: —Toj laj c'as, chan. ²⁹ Ut li rech aj c'anjelil quixcuik'ib rib chiru, quixpatz' xcuybal ut quixye re: —Chinacuy cuan chic ca'ch'inak ut lajin tintoj ajcui' chixjunil lin c'as, chan re. ³⁰ Abanan li jun inc'a' quiraj xcuybal xmac. Co ban ut coxq'ue chak sa' tz'alam toj retal quixtoj rix lix c'as. ³¹ Nak eb li rech aj c'anjelil que'r'il li c'a'ru quixbanu, c'ajo' nak que'raho' sa' xch'ol. Ut que'chal cole'xch'olob chiru li rey chixjunil li c'a'ru quic'ulman. ³² Tojo'nak quiboke' cui'chic laj c'anjal li quicuye' xmac xban li rey. Ut li rey quixye re: —At tz'ekbetal aj c'anjal, chixjunil laj c'as xinsach retalil xban nak xapatz' acuybal chicuu. ³³ ¿Ma inc'a' raj xru xatok'oba ru laj cuech aj c'anjelil jo' nak xintok'oba acuu lajin? chan. ³⁴ C'ajo' nak quipo' li rey ut quixk'axtesi sa' ruk'eb laj ilol tz'alam toj retal quixtoj chixjunil lix c'as. ³⁵ Ut jo'ca'in ajcui' tixbanu ere laex lin Yucua' cuan sa' choxa cui inc'a' tecuy xmaqueb le ras eritz'in chi anchal ech'ol chejunjunkalex, chan li Jesús.

19

Li Jesús quixye nak inc'a' naru te'xjach rib li sumsûqueb

¹ Ut nak quirake' chixyeb li atin a'in, li Jesús qui-el Galilea ut co jun pac'al li nima' Jordán sa' eb li na'ajej xcuent Judea. ² Ut quitak'ec xbaneb li q'uila tenamit ut nabaleb li yaj quixq'urtesiheb aran. ³ Cuanqueb laj fariseo que'cuulac chi patz'oc riq'unin yal re xyalbal rix ut que'xye re: —¿C'a'ru nacaye lajat? ¿Ma taruk tixjach rib li cuink riq'unin li rixakil yal riq'unin c'a'ak re ru?— ⁴ Quichak'oc li Jesús ut quixye reheb: —¿Ma inc'a' erilom li tz'ibanbil sa' li Santil Hu nak li Dios quiyo' obtesin chak re li cristian sa' xticlajic, cuink ut ixtk nak quixyo' obtesiheb chak? ⁵ Jo'can nak li cuink tixcanab xna' xyucua' ut tixlak'ab rib riq'unin li rixakil. Ut chi xcabichaleb junajakeb aj chic. ⁶ Jo'can nak moco cuibakeb ta chic. Junajakeb aj ban chic. Jo'can ut nak li ani naxlak'ab li Dios, ma ani chic naru najachoc re, chan. ⁷ Ut que'xye cui'chic re li Jesús: —¿C'a'ut nak quixye laj Moisés nak taruk xyibankuil junak li hu re nak tixjach rib li cuink riq'unin li rixakil?— ⁸ Li Jesús quichak'oc ut quixye: —Xban nak k'axal cau ech'ol, jo'can nak laj Moisés quixsume cheru nak taruk

tejach erib riq'uin le rixakil. Aban moco jo'can ta chak sa' xticlajic nak li Dios quixyo'obtesiheb li cristian. ⁹ Ut lajn tinye ere nak yalak ani tixcanab rixakil chi macua' xmaca yumbetac, ut tixc'am jalan chic ixx, li jun a'an tixmux ru lix sumlajic. Ut li ani tixc'am chok' rixakil li ixx li canabanbil, li jun a'an tixmux ajcui' ru lix sumlajic, chan li Jesús. ¹⁰ Ut eb lix tzolom que'xye: —Cui yal nak jo'can tac'ulmank, k'axal us raj nak inc'a' tixsic' rixakil li cuink, chanqueb. ¹¹ Ut li Jesús quixye reheb: —Moco chixjunileb ta neque'xc'ul xch'ol li atin a'in, ca'aj cui' li ani q'uebil re xban li Dios re xtaubal ru li xyalal a'in. ¹² Cuanqueb cuink chalen sa' xyo'lajiqueb ac reheb nak inc'a' te'cuank rixakil, ut cuanqueb yal pok'bileb xbaneb li rech cuinkilal re inc'a' te'cuank rixakileb, ut cuanqueb cui'chic yal inc'a' neque'xc'ul xch'oleb nak te'xc'am rixakil xban nak neque'xk'axtesi rib chi c'anjelac chiru li Dios. Li ani taruk tixtau ru li xyalal a'in, chixtauhak ru, chan li Jesús.

Li Jesús quirosobtesi li coc'al

¹³ Ut chirix chic a'an cuanqueb coc'al que'c'ame' chak riq'uin li Jesús re nak tixq'ue li ruk' sa' xbeneb ut tatiyok. Ut eb lix tzolom que'xk'us li que'c'amoc chak reheb li coc'al. ¹⁴ Nak li Jesús quiril li yoqueb chixbanunquil, quixye reheb lix tzolom: —Canabomakeb chi chalc cuiq'uin li coc'al. Meram chiruheb xban nak lix nimajcual cuanquinal li Dios, a'an reheb li k'uneb xch'ol jo' li coc'al, chan. ¹⁵ Ut li Jesús quixq'ue li ruk' sa' xbeneb ut quitijoc. Ut chirix a'an qui-el sa' li na'ajej a'an.

Jun cuink biom quiatinac riq'uin li Jesús

¹⁶ Ut quicuulac jun li cuink riq'uin li Jesús ut quixye re: —At chabil tzolonel, ¿C'a' raj ru us tinbánu re nak tincuechanli junelic yu'am? chan. ¹⁷ Ut li Jesús quixye re: —¿C'a'ut nak nacaye chabil cue cui inc'a' nacanau anihin? Jun ajcui' li chabil cuan ut a'an li Dios. Cui tacuaj nak tacuank la yu'am chi junelic bánu li c'a'ru naxye li chak'rab. — ¹⁸ Ut li cuink quixye: —¿C'a'ru li chak'rab li nacaye? — Ut li Jesús quixye re: —Macamsi acuas acuitz'in. Matmuxuc caxar. Mat-elk'ac. Matk'aban. ¹⁹ Cha-oxlok'i la na' ayucua'ut chara la cuas acuitz'in jo'nak nacara acuib laat, chan. ²⁰ Ut li cuink quichak'oc ut quixye: —At tzolonel, chixjunil a'in xinbánu chalen chak sa' inca'ch'inal. ¿C'a' chic ru maji' ninbánu? — ²¹ Quixye li Jesús re: —Cui tacuaj nak tz'akalak re ru la yu'am, ayu ut c'ayi li c'a'ru cuan acue ut si lix tz'ak li tac'ul reheb li neba'. Ut tacuank abiomal sa' choxa. Ut nak ac xabanu a'an tatchalk ut tinatake, chan li Jesús re. ²² Ut nak quirabi a'an, li cuink co chi ra sa' xch'ol xban nak nabal lix biomal cuan. ²³ Tojo'nak quixye li Jesús reheb lix tzolom: —Relic chi yal tinye ere, k'axal ch'a'aj chok' re junak biom nak taoc rubel xcuانquil li Dios. ²⁴ Tinye ajcui' ere nak inc'a' raj ch'a'aj nak tanumek' junak nimla xul camello sa' ru junak cux chiru nak taoc junak biom rubel xcuانquil li Dios. ²⁵ Ut eb lix tzolom nak que'rabi a'an, c'ajo' nak que'sach xch'ol ut que'xye: —Ani put taruk tacolek? chanqueb. ²⁶ Ut li Jesús quixca'yaheb ut quixye reheb: —Chiru junak yal cuink a'an māmin taruk, abanan chiru li Dios chixjunil naru xbanunquil. ²⁷ Quichak'oc laj Pedro ut quixye re: —Lao xkacanab chixjunil li c'a'ru cuan ke xban atakenquil. ¿C'a'ru tacuank ke? — ²⁸ Ut li Jesús quixye reheb: —Relic chi yal tinye ere nak lain li C'ajolbej tinc'ojlak sa' lin lok'laj c'ojaribal sa' li ac' ruchich'och', laex li xextaqen cue, texc'ojlak ajcui' sa' li cablaju chi c'ojaribal re texrakok atin sa' xbeneb li cablaju xtepaleb laj Israel. ²⁹ Li ani naxcanab rochoch, ras ritz'in, xna' xyucua', rixakil, ralal xc'ajol, malaj xch'och' sa' inc'aba' lain, li jun a'an k'axal cui'chic nabal li tixc'u chiru li quixcanab ut tarechani li junelic

yu'am. ³⁰ Ut nabaleb li neque'xic' xcuauquileb anakcuan, mokon mac'a'ak chic xcuauquileb. Ut li ani inc'a' neque'xic' xcuauquileb anakcuan, a'aneb chic li te'cuank xcuauquileb mokon, chan li Jesús.

20

Chiru li Dios juntak'et xcuauquileb li junjunk

¹ Lix nimajcual cuanquilal li Dios chanchan jun li yucua'bej cuan sa' xjun cablal. Qui-el chak toj ek'ela chixsic'baleb aj c'anjal re te'c'anjalak sa' li racuimk. ² Ut que'xsume c'anjalac chiru chi jun denario li cutan xtojbaleb. Ut quixtaklaheb sa' li racuimk chi c'anjalac. ³ Ut nak qui-el cui'chic sa' beleb or, cuan cui'chic quixtauheb chak sa' c'ayil yal yoqueb chixbaybal rib. ⁴ Ut quixye rebeb: —¿Ma inc'a' xeraj c'anjalac sa' li cuacuimk ut texintoj chi tz'akal? chan rebeb. Ut eb a'an coeb chi c'anjalac. ⁵ Ca' sut chic co' xsic'baleb xtz'akobeb lix mos. Co' cualeb ut co' cui'chic sa' oxib or. ⁶ Ut nak tanach'ok ob or, co' cui'chic. Ut cuan cui'chic quixtauheb yoqueb chixbaybal rib. Ut quixye rebeb: —¿C'a'ut nak yoqueb chixnumsinquileb cutan arin chi mac'a' le trabaj? chan rebeb. ⁷ Que'chak'oc li cuink ut que'xye re: —Xban nak ma' ani naq'uehoc kac'anjal. — Ut li patrón quixye rebeb: —¿Ma inc'a' xeraj c'anjalac laex sa' li cuacuimk? chan rebeb. ⁸ Ut nak qui-ecuu, li patrón quixye re lix mertom: —Bokeb laj c'anjal ut tatojob. Li tatojob xben cua, a'aneb li toje' xe'oc, ut nak ac xatrake' xtojbaleb a'an, tojo'nak tatojob li xe'oc ek'ela. — ⁹ Ut nak que'chal, jun denario que'toje' cui' li junjunk li que'oc chi c'anjalac sa' ob or. ¹⁰ Ut que'toje' ajcui' li que'oc ek'ela. Sa' xch'oleb a'an nak tertio raj te'xc'ul chiru li que'oc ecuu. Abanan jun denario ajcui' que'xc'ul li junjunk. ¹¹ Ut nak ac xe'xc'ul li tumin, que'oc chixcuech'bal li patrón. ¹² Ut que'xye: —Eb a'in li xe'oc mokon jun or ajcui' xe'c'anjalac. Ut juntak'et lix tojbaleb xaq'ue riq'unin li xkac'ul lao. Ut lao xoc'anjalac chiru chixjunil li cutan ut xkacuy xtikcual li sak'e ut juntak'et xoqtoj riq'uineb li jun ch'ol chic li toj xe'oc ecuu. — ¹³ Ut quichak'oc li patrón ut quixye re jun rebeb li que'oc xben cua: —At cuamig, lain xatintoj chi tz'akal. ¿Ma inc'a' ta bi' xasume c'anjalac chi jun denario li cutan? ¹⁴ C'am la' tojbal ut ayu. Li jo' nimal xing'ue acue laqat, a'an ajcui' ting'ue rebeb li xe'oc mokon. ¹⁵ ¿Ma inc'a' ta bi' lain yal cue sa' xben li c'a'ru cue? ¿C'a'ut nak nacatcakalin? ¿Ma xban nak chabilin lain riq'uineb? chan li patrón. ¹⁶ Jo'can nak nabaleb li cuanqueb xcuauquileb anakcuan te'canak chi mac'a'ak xcuauquileb mokon. Ut li mac'a'eb xcuauquileb anakcuan, te'q'uehek' xcuauquileb mokon. Nabaleb li bokbileb, abanan inc'a' q'uiheb li te'xtau ru li xyalal.

Quixye cui'chic resil lix camic li Jesús

¹⁷ Ut nak yo chi xic Jerusalén, li Jesús quirisiheb xjunes lix tzolom cablaju ut quixye rebeb: ¹⁸ —Q'uehomak retal li c'a'ru tac'ulmank. Anakcuan yoco chi xic Jerusalén bar cui' tink'axtesik lain li C'ajolbej sa' ruk'eb li xbenil aj tij jo' ajcui' sa' ruk'eb laj tz'ib. Eb a'an te'xteneb cämc sa' inben. ¹⁹ Ut tine'xk'axtesi sa' ruk'eb li macua'eb aj judío. Ut eb a'an tine'xhob, tine'xsac', ut tine'xcamsi chiru cruz. Abanan sa' rox li cutan tincuaclik cui'chic chi yo'yo sa' xyankeb li camenak, chan li Jesús.

Li na'bej quixtz'ama xcuauquileb lix yum chiru li Jesús

²⁰ Laj Jacobo ut laj Juan, a'aneb li ralal laj Zebedeo. Que'cuulac riq'unin li Jesús rochben lix na'eb. Ut li na'bej quixcuik'ib rib chiru li Jesús chixtz'amanquileb jun usilal chiru. ²¹ Li Jesús quixye re: —¿C'a'ru tacuaj

tinbanu ącue?— Ut li iixk quichak'oc ut quixye re: —Ye nak eb lin yum a'in te'c'ojlak chac'atk sa' la nimajcual cuanquil, jun sa' la nim ut jun sa' la tz'e, chan. ²² Ut li Jesús quixye re: —Inc'a' nequenau xyalal li c'a'ru yoquex chixtz'amanquil. ¿Ma tecuy xc'ulbal li raylal li oc cue chixc'ulbal lain? ¿Ma tecuy xnumsinquil li rahobtesic li tinc'ul lain?— Eb a'an que'xye: —Takacuy, chanqueb. ²³ Ut li Jesús quixye reheb: —Yal ajcui' nak laex tec'ul li raylal jo' li tinc'ul lain. Ut tecuy xnumsinquil li rahobtesic jo' li tincuy xnumsinquil lain. Abanan li na'ajej sa' lin nim ut sa' lin tz'e macua' lain ting'uehok re li na'ajej a'an xban nak ac ch'olch'o chiru lin yucua' ani aj e tiqx'ue li na'ajej a'an, chan li Jesús reheb. ²⁴ Ut nak que'rabi li lajeb chic lix tzolom li Jesús li c'a'ru que'xtz'ama li ritz'ineb rib, que'po' riq'uineb. ²⁵ Ut li Jesús quixbokeb riq'uin ut quixye reheb: —Laex nequenau nak li neque'taklan sa' li ruchich'och' neque'numta sa' xbeneb li tenamit. Li ninkeb xcuanguard, a'aneb li neque'taklan. ²⁶ Abanan mactua' jo'can tebanu laex. Li ani taraj cuank xcuanguard sa' eyank, tento nak tixcubsi rib ut tac'anjelak cheru. ²⁷ Ut li ani naraj nimak xcuanguard sa' eyank, tento nak tixcubsi rib ut tac'anjelak cheru. ²⁸ Lain li C'ajolbej. Abanan inc'a' xinchal re nak te'xc'anjela cuu. Xinchal ban re tinc'anjelak chiruheb chixjunil ut re xq'uebal lin yu'am re xtojbal rix lix maqueb chixjunileb.—

Li Jesús quixq'urtesiheb li mutz'

²⁹ Nak yoqueb chi elc Jericó, nabaleb li tenamit que'taken re li Jesús. ³⁰ Ut cuanqueb cuibeb li mutz' chunchuqueb chire li be. Ñak que'rabi nak yo chi chalc li Jesús, que'xjap re chixyebal: —Kacua', Ralalat xc'ajol laj David. ¡Chacuuxtana taxak ku!— ³¹ Ut eb li tenamit que'xch'ilahed ut que'xye reheb nak inc'a' te'chokink. A'ut eb a'an k'axal cui'chic cau que'xjap re chixyebal: —¡Kacua', ralalat xc'ajol laj David, chacuuxtana taxak ku!— ³² Quixakli li Jesús, quixbokeb ut quixye reheb: —¿C'a'ru teraj tinbanu ere? chan reheb. ³³ Ut eb li mutz' que'xye: —Kacua', takaj tajlok li xnak' ku.— ³⁴ Ut li Jesús quiril xtok'obaleb ru, quixch'e' li xnak' ruheb. Ut sa' junpat que'iloc li ruheb ut que'xtake li Jesús.

21

Li Jesús que'xq'ue xcuanguard nak que'oc Jerusalén

¹ Nak ac cuulaqueb re Jerusalén, que'cuulac chire li tenamit Betfagé bar cuan cui' li tzul Olivos. Ut li Jesús quixtaklaheb cuibeb lix tzolom ut quixye reheb: ² —Ayukex sa' li ch'ina tenamit a'an. Ut nak texcuulak, tetau jun li bur bac'bo aran cuan ral. Tehit ut tec'ameb chak cue. ³ Ut cui c'a'ru tayehék' chak ere, teye re, "Li Kacua' t'aajok re li bur ut a' que ajcui' tixtakla chak hon", cha'akex re. ⁴ Ut chixjunil a'in quic'ulman jo' quiyehé xban li profeta nak quixye chi jo'ca'in:

⁵ Ye reheb li tenamit aj Sión: —Cue' chak le Rey xchal eriq'uin. Tulan ut c'ojc'o chak chirix jun li bur. Chirix jun ch'ina ral bur xcomon li neque'ikan yo chak chi chalc.— (Zac. 9:9; Is. 62:11)

⁶ Ut coeb lix tzolom ut que'xbanu jo' que'yehe' reheb xban li Jesús. ⁷ Que'xc'am chak li bur rochben li ral ut que'xq'ue li rak'eb sa' xbeneb. Ut li Jesús quitake' chirix li ch'ina bur. ⁸ Ut li q'ula tenamit k'axal nabaleb. Cuan li yoqueb chixhelbal lix t'icr sa' be bar tanumek' cui' li Jesús. Ut cuan li que'xyoc' chak ruk' che' ut que'xq'ue li xak sa' be. ⁹ Nak yo chi xic li Jesús cuan yoqueb chi xic chiru ut cuan yoqueb chi xic chirix. Japjoqueb re chixyebal: —Lok'oninbil taxak laj Colol ke, li ralal xc'ajol li rey David. Osobtesinbil

taxak li yo chak chi chalc sa' xc'aba' li Kacua' Dios. Aj Colol ke taxak li xchal chak riq'uin li Dios, chanqueb. ¹⁰ Ut nak cox-ocak li Jesús sa' li tenamit Jerusalén, que'xtububi rib chixjunil ut nabaleb li tenamit yoqueb chixyebal: —¿Ani a'in? chanqueb. ¹¹ Ut eb li tenamit li yoqueb chi xic chirix yoqueb chixyebal: —A'an a'in li Jesús li profeta, aj Nazaret re Galilea, chanqueb.

Li Jesús quirisiheb laj c'ay sa' rochoch li Dios

¹² Ut chirix chic a'an li Jesús qui-oc sa' li rochoch li Dios ut quixyolesiheb li yoqueb chi c'ayinc ut li yoqueb chi lok'oc. Quixbalk'usi fix mexeb laj jalol ru tumin ut quixbalk'usi ajcui' lix temeb li yoqueb chi c'ayinc paloma. ¹³ Quixye reheb: —Jo'ca'in tz'ib'anbil sa' li Santil Hu chirix li rochoch li Dios: Li cuochoch a'in re te'tijok cui' li tenamit nak cuan. Abanan laex xeque li rochoch li Dios chok' xna'ajeb laj elk', chan li Jesús reheb. ¹⁴ Ut que'c'am'e' riq'uin li Jesús sa' rochoch li Dios li mutz' ut eb li yek rok ut li Jesús quilaqx'uirtesiheb. ¹⁵ Ut eb lix benil aj tij ut eb laj tz'ib que'r'il li sachba ch'olej li yo chixbanunquil. Ut que'r'il nak eb li saj al japoqueb re chixyebal sa' li rochoch li Dios: —Lok'oninbil taxak laj Colol ke, lí ralal xc'ajol li rey David, chanqueb. Ut c'ajo' nak que'po' laj tij ut eb laj tz'ib. ¹⁶ Ut que'xye re li Jesús: —¿Ma yocat chirabinquil li yoqueb chixyebal li saj al? — Ut li Jesús quixye reheb: —Yquin chirabinquil. ¿Ma ma jun cua erilom li tz'ib'anbil sa' li Santil Hu li naxye chi jo'ca'in:

“Eb li coc'al ut li toj neque'tu'uc neque'xq'ue xlok'al li Dios chi tz'akal”? (Sal. 8:2)

¹⁷ Ut li Jesús quixcanabeb ut qui-el sa' li tenamit ut co toj Betania bar quihilan cui'.

Li Jesús quixtz'ektana li jun ton chi higo mac'a'ru

¹⁸ Ut ek'ela nak yo cui'chic chi xic Jerusalén, quichal xtz'ocajic li Jesús. ¹⁹ Ut quiril jun ton li che' higo chire li be. Nak quicuulac cuan cui' li che' quiril nak mac'a'ru. Junes xak cuan. Quixye re li jun ton chi higo: —Ma jun cua chic tatuchink, chan. Ut sa' junpat quichakic li che'. ²⁰ Ut nak que'r'il a'an, lix tzolom que'sach xch'ol ut que'xye: —¿Chanru nak xchakic sa' junpat lix tonal li higo? chanqueb. ²¹ Quichak'oc li Jesús ut quixye: —Relic chi yal tinye ere nak cui' tepab chi tz'akal nak li Dios tixbanu, ut inc'a' tacuibank ech'ol, taruk ajcui' tebanu jo' xinbanu lain re li che'. Ut moco ca'aj cui' ta raj a'an tebanu. Taruk ajcui' teye re li tzul a'in, “Elen ut cut acuib sa' li palau” ut tauvxk ajcui' cheru. ²² Ut chixjunil li c'a'ru tetz'ama nak textijok, cui'tepab nak tec'ul, taq'uehek' ere.

Eb laj tz'ib que'xcuech'i rix xcuanquil li Jesús

²³ Ut qui-oc cui'chic li Jesús sa' rochoch li Dios. Ut nak yo chixch'olobanquil li xyalal chiruhel li tenamit, que'cuulac riq'uineb li xbenil aj tij ut que'cuulac ajcui' eb li xakabanbileb chi c'anjelac sa' li rochoch li Dios. Ut que'xye re: —¿Ani xtaklan chak aq'ue chixbanunquil li c'a'ru yocat chixbanunquil? Ut, ¿ani xq'uehoc acuanquil? —²⁴ Quichak'oc li Jesús ut quixye reheb: —Lain tincuaj ajcui' patz'oc ere. Cui tesume li c'a'ru tinpatz' ere, lain tinye ere ani xq'uehoc lin cuanquil chixbanunquil li c'a'ru ninbanu. ²⁵ ¿Ani quitaklan chak re laj Juan chi cubsinc ha'? ¿Ma li Dios malaj ut cuink quitaklan re? chan reheb. Eb a'an que'xc'oxla ut que'xye chi ribileb rib: —¿C'a'ru takasume cui'? Cui takaye nak a' li Dios xtaklan chak re, a'an tixye ke c'a'ut nak inc'a' xkapab li c'a'ru quixye laj Juan. ²⁶ Ut cui takaye nak cuink xtaklan chak re, te'pok' li tenamit sa' kab'en ut xiu xiu chic cuanko xban nak chixjunileb neque'yehoc re nak laj Juan, a'an tz'akal profeta. —²⁷ Ut eb a'an que'chak'oc ut que'xye re

li Jesús: —Lao inc'a' nakanau, chanqueb. Ut li Jesús quixye cui'chic reheb:
—Chi moco laín tinye ere ani xq'uehoc lin cuanquil, chan reheb.

Lijaljoquil ru qtin chirix li cuib chi alalbej

28 Li Jesús quixye cui'chic reheb: ¿C'a'ru nequec'oxla chirix li oc cue chixyebal? Jun li cuink cuan cuib li ralal. Ut quicuulac riq'uin li xben ralal ut quixye: —At cualal, taxtic anakuan chi c'anjelac sa' li cuacuimk.
— 29 Quichak'oc li alalbej ut quixye: —Inc'a' nacuaj xic, chan. Abanan mokon chic quiyot'e xch'ol ut co. 30 Ut li yucua'bej co riq'uin li ralal jun chic ut quixtz'ama chiru a'an nak taxic chi c'anjelac sa' li racuimk. Ut li ralal quichak'oc ut quixye: —Cua', laín tinxic, chan. Ut inc'a' co. 31 ¿Ani reheb li cuib a'an xbanun re li quiraj lix yucua'? chan. Eb a'an que'chak'oc ut que'xye: —Li xben.— Ut li Jesús quixye reheb: —Relic chi yal tinye ere nak eb laj titz'ol toj ut eb laj yumbet te'oc xben cua cheru sa'lix nimajcuall cuanquinal li Dios. 32 Xban nak quic'ulun eriq'uin laj Juan laj Cubsihom Ha'. Quixc'ut cheru c'a'ru li tiquilal ut inc'a' quepab. Ut eb laj titz'ol toj ut eb laj yumbet que'xpab. Ut laex queril a'an ut inc'a' quiyot'e le ch'ol chi moco quejal le c'a'ux re xpábanquil, chan.

Lijaljoquil ru atin chirix laj ilol acuimk inc'a' useb xna'leb

33 Abihomak jun chic li jaljoquil ru atin li oc cue xyebal: Quicuan jun yucua'bej. Quirau jun sir li racuimk uvas ut quixsut sa' corral. Quixyib jun xna'aj bar te'xyatz' cui' li uvas ut quixyib ajcui' jun ch'ina cab najt xteram re li tac'ac'alenk re li acuimk. Quixsiq'ueb laj ilol re li racuimk. Ut laj echal re co chi najt sa' jalan tenamit. 34 Nak quicuulac xk'ehil xsic'bal ru li acuimk, laj echal re quixtaklaheb lix mos riq'uineb laj ilol re li acuimk chixc'ulbal li jo' q'uijal ru li racuimk li tatz'ak a'an. 35 Eb li mos que'chape' xbaneb laj ilol re li acuimk. Quisaq'ue' li jun, li jun chic quicamsic, ut li jun chic quicutic chi pec. 36 Laj echal re li acuimk quixtakla cui'chic jun ch'oleb lix mos, nabaleb chiru li quixtakla xben cua. Ut jo'can cui'chic que'xbanu reheb. 37 Ut inc'a' chic quixtakla lix mos. A' chic li ralal quixtakla. “Li cualal te'xoxtok'i” chan sa' xch'ol. Jo'can nak quixtakla li ralal riq'uineb. 38 Ut nak que'r'il li ralal, eb laj ilol re li acuimk que'xye chi ribileb rib, “A'an li ralal li tæchanink re li na'ajej. Kachapak ut kacamsihak, ut lao chic toæchanink re.” 39 Jo'can nak que'xchap. Ut que'risi sa' li na'ajej ut que'xcamsi. 40 Ut li Jesús quixpatz' reheb li xbenil aj tij: —Nak tac'ulunk laj echal re li acuimk, ¿c'a'ru tixbanu riq'uineb laj ilol re li racuimk nak nequeye laex?— 41 Que'xye re: —Inc'a' taril xtok'obal ruheb laj ilol re li racuimk li inc'a' useb xna'leb. Tixcamsiheb. Jalan chic tixsiq'ueb re te'iloc re li racuimk. Ut eb a'an, sa' xk'ehil li sic'oc, te'xk'axtesi chi tz'akal li jo' q'uijal li tatz'ak a'an, chanqueb. 42 Li Jesús quixpatz' reheb: —¿Ma inc'a' xeril sa' li Santil Hu li naxye chi jo'ca'in?

Li pec li que'xt'ektana laj cablanel, a'an li k'axal lok', li quiq'ueman chok' xxuc li cab. Li Kacua', a'an quixq'ue xlok'al li pec. Ut a'an xsachba ch'olej chok' ke lao. (Sal. 118:22-23)

43 Jo'can nak ninye ere nak lix nimajcuall cuanquinal li Dios tamak'ek' cheru ut taq'uehek' re jalani tenamit ut eb a'an chic li te'pabank ut te'cuank sa' tiquilal. 44 Li ani tat'anek' sa' xben li pec a'in tixtoch'i rib. Ut cui ani sa' aj ben tat'anek' li pec a'in, xujinbil taçanak, chan li Jesús. 45 Ut eb lix benil aj tij ut eb laj fariseos que'xtau ru nak chirixeb a'an yo chi atinac nak quixyeheb li jaljoquil ru atin a'in. 46 Ut que'xc'oxla raj xchabpal li Jesús, abanan que'xucuac xbaneb li q'ula tenamit xban nak profeta nak cuan chiruheb.

22

Li jaljoquil ru atin chirix li nink'e caxar

¹ Li Jesús quiatinac cui'chic riq'uineb sa' jaljoquil ru atin. ² Quixye reheb: Lix nimajcual cuanquillal li Dios chanchán jun li rey lí quixnink'eí líx sumlajic li ralal. ³ Quixtaklaheb líx mos chixc'ambaleb chak li ac bokbileb. A'ut eb a'an inc'a' que'raj chalc. ⁴ Quixtakla cui'chic jalaneb chic líx mos ut quixye reheb: —Yehomak reheb lí ac bokbileb, “Ac c'ubc'u li tzacaemk, ac xe'camsiman eb li cuacax ut chixjunil li xul li nink xtibebeb. Ac cauresinbil chixjunil. Chalkex sa' li sumlac,” cha'akex reheb. ⁵ Ut eb a'an inc'a' que'raj que'rabi ut coeb. Cuan coeb sa' xc'alebal ut cuan coeb sa' xc'ayibaleb. ⁶ Ut eb li jun ch'ol chic que'xshapeb líx mos li rey, que'xrahobtesiheb ut que'xcamsihed. ⁷ Ut li rey nak quirabi a'an, c'ajo' nak quijos'k'o'. Quixtaklaheb líx soldado chixcamsinquel li que'camsin reheb líx mos. Ut quixtaklaheb xc'atbal líx tenamiteb. ⁸ Tojo'nak quixye reheb líx mos: —Yal nak li sumlac ac cauresinbil. Abanan li bokbileb mäcu'a ajcui' xc'ulubeb chalc sa' li sumlac. ⁹ Anakcuan texxic sa' eb li be bar neque'nume' cui' li cristian. Ut tebokeb sa' li nink'e li ani tetauheb chak, chan. ¹⁰ Ut coeb líx mos sa' eb li be ut que'xc'ameb sa' li nink'e lí jo' q'uijal que'xtau, jun chaliqueb li chabil xna'leb jo' ajcui' li inc'a' useb xna'leb. Ut quinujac li cab xbaneb li ula'. ¹¹ Ut qui-oc li rey chirilbaleb li rula'. Nak qui-oc, quiril aran jun li cuink moco tikto ta jo' nak tiktoqueb li cuanqueb sa' li sumlac. ¹² Li rey quixye re: —At cuamig, ¿c'a'ut nak xat-oc chak arin chi inc'a' tiktocat jo' neque'xtikib rib li neque'xic sa' sumlac? chan. Ut li cuink inc'a' quichak'oc. ¹³ Ut li rey quixye reheb líx mos: —Bac'omak li rok ruk' ut cutumak sa' k'oyjin chirix cab. Aran ut tacuank li yabac ut li c'uxuinxinc ruch e. ¹⁴ Nabaleb lí bokbileb aban inc'a' q'uiheb li te'xtau ru li xyalal. ¹⁵ Ut chirix a'an, coeb laj fariseo ut que'xc'yib rib re rilbal chan ta na ru nak taruk nak te'xyal rix li Jesús riq'uin junak atin re te'xjít cui'. ¹⁶ Que'xtaklaheb líx tzolom rochbeneb li neque'oquen chirix laj Herodes re nak te'atinak riq'uin li Jesús yal re xsic'bal c'a'ru tapaltok cui' riq'uin li ratin. Ut que'xye re: —At tzolone, nakanau nak nacara li yal. Ut sa' xyalal nacac'ut chiruheb li tenamit c'a'ru naraj li Dios ut ma'ani nacaxucua ru ut inc'a' nacasiq'ueb ru li ani nacara. ¹⁷ Ye bi' ke c'a'ru nacac'oxla chirix li na'leb a'in. ¿Ma us xq'uebal li toj re laj César li Acuabej malaj inc'a'? chanqueb. ¹⁸ Ut li Jesús quixnau nak moco anchaleb ta xch'ol nak yoqueb chi patz'oc. Quixtau ru líx mausilaleb ut quixye reheb: —Ex aj ca'pac'al u, ¿c'a'ut nak nequeraj xyalbal cui? ¹⁹ C'utumak chicuu li tumin li nequextojoc cui', chan reheb. Ut que'xc'ut chiru jun li tumin. ²⁰ Ut li Jesús quixpatz' reheb: —¿Ani aj e li jalam uch cuan chiru li tumin a'in? Ut, ¿ani aj c'aba' li tz'ibánbil chiru? chan. ²¹ Ut que'chak'oc ut que'xye re: —Re li Acuabej, chanqueb. Ut li Jesús quixye cui'chic reheb: —Tojomak bi' re li Acuabej li c'a'ru re li Acuabej, ut tojomak re li Dios li c'a'ru re li Dios, chan. ²² Ut que'sach xch'ol nak que'rabi li c'a'ru quixye ut que'xcanab li Jesús ut coeb.

Li xyalal líx cuaclijkeb li camenak chiyo'yo

²³ Sa' li cutan a'an que'cuulac riq'uin li Jesús cuib oxib laj saduceo. Eb a'an inc'a' neque'xpab nak te'cuaclik cui'chic chi yo'yo li camenak. ²⁴ Que'xye re li Jesús: —At tzolone, laj Moisés quixtz'iba jun li chak'rab ut quixye chi jo'ca'in: Cui junak cuink tacamk ut tixcanab li rixakil chi mac'a' ralal xc'ajol, tac'amek' li rixakil xban li ritz'in li camenak re nak tacuank ralal xc'ajol sa' xc'aba' li camenak. ²⁵ Que'cuan cuukub li cuink ritz'ineb rib sa' kayank. Li asbej quisumla ut nak quicam ma jun li ralal xc'ajol quicuan. Ut lí rixakil

quic'ame' xban li rjtz'in li camenak re nak t̄acuānk ralal xc'ajol sa' xc'aba' li camenak. ²⁶ Ut li cuink a'an quicam ajcui' ut mā jun li ralal xc'ajol quicuan. Ut jo'can cui'chic quic'ulman toj retal nak que'cam chixjunileb li cuukub chi cuink rjtz'ineb rib. ²⁷ Ut nak ac xe'cam li cuukub chi cuink, quicam ajcui' li iixk. ²⁸ Ut sa' xcuaclijqueb li camenak chi yo'yo, nak te'cuaclik eb a'an, ¿ani aj ixakil t̄açanāk cui' li iixk a'an, xban nak li cuukub chi cuink que'cuan chok' xbelom? chanqueb re li Jesús. ²⁹ Nak quichak'oc, li Jesús quixye reheb: —Laex yoquex chixbalak'inquil erib xban nak inc'a' nequetau ru lí c'a'ru naxye sa' li Santil Hu chi moco nequetau ru lix cuanquil li Dios. ³⁰ Nak te'cuaclik cui'chic chi yo'yo li camenak, chanchanakeb chic li ángel sa' choxa xban nak inc'a' te'sumlaq chi moco te'sumubānk chic. ³¹ Ut chirix lix cuaclijqueb li camenak chi yo'yo, ¿ma inc'a' erilom sa' li Santil Hu li quixye li Dios ere chirix lix cuaclijqueb li camenak chi yo'yo? Quixye chi jo'ca'in: ³² Lain lix Dios laj Abraham, lix Dios aj Isaac, ut lix Dios laj Jacob. Li Dios, a'an mācua' xDiobeb li camenakeb; xDiobeb ban li yo'yoqueb, chan li Jesús. (Jo'can nak li Dios quixc'ut nak cuan xcuaclijqueb chi yo'yo li camenak.) ³³ Ut li q'uila tenamit que'sach xch'oleb chirabinquil li xyālal li yo' chixch'olobanquil li Jesús chiruheb.

Li chak'rab k'axal nim xcuauquil

³⁴ Ut nak laj fariseo que'xq'ue retal nak inc'a' chic que'ru xsumenquil li Jesús laj saduceo, eb a'an chic que'xch'utub ribeb chixc'ubanquil chanru te'xbanu. ³⁵ Ut jun reheb, aj tzolol chak'rab, quipatz'oc re li Jesús yal re xyalbal rix. ³⁶ —At tzolonel, chan re li Jesús, ¿Bar cuan li chak'rab li k'axal nim xcuauquil? — ³⁷ Li Jesús quichak'oc ut quixye re: —Li chak'rab li k'axal nim xcuauquil, a'an a'in: Tara li Kacua' la Dios chí anchal ach'ol ut chi anchal la cuām ut chi anchal la c'a'ux. ³⁸ A'an a'in li xben chak'rab, li k'axal nim xcuauquil sa' xyānkeb chixjunil. ³⁹ Ut li xcab, chanchan ajcui' a'in: Tara la cuas acuítz'in jo' nak nacara acuib laat. ⁴⁰ Cui nacabanu li cuih chi chak'rab a'in ac xabānu li naxye sa' chixjunil li chak'rab jo' ajcui' li yebil xbaneb li profeta, chan li Jesús.

Li Cristo, li yechi'inbil xban li Dios, a'an ralal xc'ajol li rey David

⁴¹ Ut nak toj ch'utch'uequeb laj fariseo, li Jesús quixpatz' reheb: ⁴² —¿C'a'ru nequec'oxla chirix li Cristo, li yechi'inbil xban li Dios? ¿Ani aj alal aj c'ajol nak nequeye? — Ut que'xye re: —Ralal xc'ajol li rey David. — ⁴³ Li Jesús quixye reheb: —¿C'a'ut nak laj David quixye li c'a'ru quirec'a sa' xch'ol xban li Santil Musik'ej nak quixye "Kacua" re li Cristo? Quixye chi jo'ca'in: ⁴⁴ Li Kacua' Dios quixye re li Kacua' laj Colol cue, c'ojalan sa' lin nim uk' toj ting'ueheb lí xic' neque'iloc acue rubel la cuauquil, chan. (Sal. 110:1) ⁴⁵ Li rey David quixye "Kacua" re, usta a'an xcomoneb li ralal xc'ajol. — ⁴⁶ Ut mā jun chic quiru chi sumēnc re li Jesús. Ut chalen sa' li cutan a'an, mā ani chic quixcacuu xch'ol chi patz'oc re li Jesús.

23

Li Jesús quixk'useb laj tz'ib ut eb laj fariseo

¹ Tojo'nak li Jesús quixch'olob li xyālal chiruheb li q'uila tenamit jo'queb ajcui' lix tzolom ut quixye reheb: ² —Eb laj tz'ib ut eb laj fariseo, q'uebileb xcuauquil chixch'olobanquil xyālal li chak'rab li quiq'uehe' re laj Moisés. ³ Jo'can nak chixjunil li te'xye ere, chec'ula sa' ech'ol ut chebanu. Abanan mebanu jo' neque'xbanu eb a'an xban nak yal riq'uin xtz'umal reheb

neque'xye ut inc'a' neque'xbanu li c'a'ru neque'xye. ⁴ K'axal al li jk neque'xq'ue sa' xbeneb li cristian ut k'axal ch'a'aj xc'ambal. A'ut eb a'an chi moco riq'un ru'uj ruk'eb neque'raj xch'e'bal. ⁵ Chixjunil li c'a'ak re ru neque'xbanu, a'an yal re nak te'ilek' xbaneb li cristian. Neque'xyib chi nink ru li coc' cax filacterias xc'aba' bar nacuan cui' li chak'rab ut neque'xbac' sa' xpequemeb ut sa' xteleb. Ut nacuulac chiruheb li rak'eb chi njnk lix sahob ru chire. ⁶ Ut nak neque'xic chi cu'a'ac sa' eb li nink'e neque'xsic' li chabil na'ajej bar te'q'uehek' xlok'al, ut neque'raj c'ojlac sa' li na'ajej k'axal lok' nak cuanqueb sa' li cab bar neque'xch'utub cui' ribeb laj judío. ⁷ Eb a'an neque'raj nak te'oxlok'ik ut te'q'uehek' xsahil xch'oleb sa' eb li be. Ut neque'raj nak li tenamit te'xye "tzolonel" reheb. ⁸ Abanan laex merahi ru nak li tenamit te'xq'ue elok'al ut te'xye "tzolonel" ere xban nak jun ajcui' laj tzolol ere cuan. Lain li Cristo laj tzolol ere ut chejunilex laex eritz'in erib. ⁹ Ut ma ani tq'ue chok' ekacua' sa' ruchich'och', xban nak jun ajcui' li Kacua' cuan. A'an cuan sa' choxa. ¹⁰ Chi moco chec'aba'in aj c'amol be, xban nak jun ajcui' laj c'amol ebe. A'an lain li Cristo. ¹¹ Li ani nac'anjelac cheru, a'an li k'axal nim xcuانquil sa' eyank. ¹² Li ani naxq'ue xcuانquil xjunes rib, li jun a'an tacubsk xcuانquil. Ut li ani naxcubsí rib, li jun a'an taq'uehek' xcuانquil. ¹³ Ra chalel sa' eben, laex aj tz'ib ut laex aj fariseo, ex aj ca'pac'al u. Nequemak' li rochocheb li xmälca'an ut nequeyal xmukbal le mausilal riq'un nak najt rok nequextijoc. Ut xban a'an k'axal cui'chic ra li tojbal mac li tachalk sa' eben. ¹⁴ Ra chalel sa' eben laex aj tz'ib ut laex aj fariseo, ex aj ca'pac'al u. Nequesuti li ruchich'och' jo' ajcui' li palau re xsic'bal ani tapabank re le tijleb. Ut nak ac xe'xk'axtesi rib sa' eyank, k'axal cui'chic yibru xna'lebcheru laex ut emaq laex nak te'xic sa' xbalba. ¹⁵ Ra chalel sa' eben, laex mutz' aj c'amol be. Laex nequeye: —Li ani tixbanu xjuramento sa' xc'aba' lix templo li Dios, inc'a' tento tixbanu li quixye. Abanan li ani tixbanu xjuramento sa' xc'aba' li oro li cuan sa' lix templo li Dios, li jun a'an tento nak tixbanu li c'a'ru xye sa' xjuramento, chanquex. ¹⁶ Ma'c'a' ena'leb ut mutz'ex xban nak inc'a' nequetau xyalal. ¿Bar cuan li k'axal nim xcuانquil? ¿Ma li oro, malaj a' lix templo li Dios li nasantobresin re li oro? ¹⁷ Ut nequeye ajcui': —Li ani naxbanu xjuramento sa' xc'aba' li artal, li jun a'an inc'a' tento tixbanu li c'a'ru quixye. Abanan li ani naxbanu xjuramento sa' xc'aba' li mayej cuan sa' xben li artal, tento nak tixbanu li c'a'ru quixye sa' lix juramento, chanquex. ¹⁸ Ma'c'a' ena'leb ut mutz'ex xban nak inc'a' nequetau xyalal. ¿Bar cuan li k'axal nim xcuانquil? ¿Ma li mayej malaj a' li artal li nasantobresin re li mayej? ¹⁹ Jo'can nak li ani tixbanu xjuramento sa' xc'aba' li artal, naxye xjuramento sa' xc'aba' a'an ut sa' xc'aba' ajcui' chixjunil li c'a'ru cuan sa' xben. ²⁰ Ut li ani naxbanu lix juramento sa' xc'aba' lix templo li Dios, naxbanu sa' xc'aba' lix templo li Dios ut sa' xc'aba' ajcui' li Dios li nacuan chi sa'. ²¹ Ut li ani naxbanu xjuramento sa' xc'aba' li choxa, naxbanu xjuramento sa' xc'aba' lix c'ojaribal li Dios ut sa' xc'aba' ajcui' li Dios li c'oj'o sa' xben. ²² Ra chalel sa' eben laex aj tz'ib ut ex aj fariseo, ex aj ca'pac'al u. Nequemayeja lix lajetkil li isqu'iij, li eneldo ut li comino. Ut nequetz'ektana li k'axal cuan xcuانquil sa' li chak'rab. Inc'a' nequebanu li tiquilal. Inc'a' nequex-uxtanu u ut inc'a' nequexpabán. Us nak nequemayeja lix lajetkil abanan inc'a' raj nequecanab xbanunquil li k'axal cuan xcuانquil. ²³ Ex mutz' aj c'amol be, nequeyal ek'e chixbanunquil li c'a'ak re ru li mac'a' xcuانquil, abanan li

nim xcuauquil inc'a' nequebānu. Chanchan nak nequetz'il ru lē ha' re nak inc'a' tenuk' li coc' suk ut a' chic li n̄ink'i xul camello nequenuk'. ²⁵ Ra chālel sa' ebeen laex aj tz'ib ut aj fariseo, ex aj ca'pac'al u, xban nak a' chic li rix lē sec' ut le plato nequech'a', aban lix sa' numtajenak chi tz'aj xban le māusilal ut li elk'ac nequebanu. ²⁶ Ex mutz' aj fariseo, ch'ajomak xben cua lix sa' lē sec' ut le plato re nak ch'ajbilak ajcui' li rix. ²⁷ Ra chalel sa' ebeen laex aj tz'ib ut laex aj fariseo, ex aj ca'pac'al u. Chanchanex li neque'muke' cui' li camenak. Bonbileb rix ut c'ajo' xchak'al eb ru, a'ut chi sa' nujenak chi tz'aj ut chi xbakel camenak. ²⁸ Jo'can ajcui' laex. Relic chi yal nak chabil nequexc'utun chiruheb li tenamit. Abanan lē ch'ol nujenak chi māusilal ut laex aj ca'pac'al u. ²⁹ Ra chalel sa' ebeen laex aj tz'ib ut laex aj fariseo, ex aj ca'pac'al u. Nequeyib li que'muke' cui' li profetas ut nequerutz'u'iji chak ru li que'muke' cui' li tiqueb xch'ol. ³⁰ Ut laex nequeye: —Cui ta lao ac cuanco chak sa' li cutan nak xe'cuan li kaxe' katōn, inc'a' raj xkabanu jo' que'xbānu eb a'an. Inc'a' raj xkacamsiheb li profetas, chanquex. ³¹ Abanan riq'uin li māusilal li nequebānu laex, na'utun nak juntak'etex riq'uineb le xe'tonil yucua', li que'camsin reheb li profetas. ³² Choyomak bi' xbānunquil li inc'a' us li que'xtiquib xbanunquil le xe'tonil yucua'. ³³ Chanchanex c'anti', chanchanex ralex c'ambolay, ¿chan ta cui' ru nak texcolek' chiru lix tojba mac sa' xbalba? ³⁴ Lajin tintaklaheb eriq'uin li profeta ut li cuanqueb xna'leb ut eb laj tzoloneb. Abanan laex inc'a' terabli. Ut sa' xyankeb a'an, cuan tecamsiheb, cuan teq'ueheb chiru cruz, ut cuan cui'chic li terahobtesiheb sa' li cab li nequech'utub cubi' erib chixtzolbal ratin li Dios. Ut cuan cui'chic tetakeheb sa' li junjunk chi tenamit re xchapbaleb. ³⁵ Xban lē māusilal a'an, tat'anek' sa' eben lix camiqueb li chabileb xna'leb riq'uin xcamic laj Abel li tic xch'ol ut toj riq'uin xcamic li ralal laj Berequías laj Zacarías xc'aba' li quecamsi chiru nebal chixc'atk li rochoch li Dios ut li artal. ³⁶ Relic chi yal tīnye ere nak chixjunil li camsinc que'xbānu chak junxil, jo' ajcui' li yoquex chixbānunquil anakcuan, tat'anek' ajcui' sa' ebeen laex li cuanquex anakcuan xban nak yoquex chixbānunquil jo' que'xbānu eb a'an.

Quiyot'e xch'ol li Jesús chiribaleb aj Jerusalén

³⁷ Ex aj Jerusalén, ex aj Jerusalén, neque-camsiheb li tz'akal profeta ut nequecuti chi pec eb li neque'taklac eriq'uin xban li Dios. Nabal sut raj xcuaj ecolbal jo' nak naxch'utubeb li ral li caxlan rubel lix xic'. Abanan laex inc'a' xeraj. ³⁸ Ut anakcuan lē tenamit jo' ajcui' li templo tācanak chi naq'uirnac aj chic ru. ³⁹ Tīnye ut ere chalen anakcuan inc'a' chic teril cuu toj nak teye, "Osobtesinbilak a'an lī xchal sa' xc'aba' li Kacula". Toj aran chic teril cuu, chan li Jesús.

24

Li Jesús quixye nak tixtau xk'ehil nak tajuq'uek' li rochoch li Dios

¹ Qui-el sa' li templo li Jesús, ut nak yo chi xic, que'cuulac lix tzolom riq'uin ut que'xc'ut chiru li n̄ink'i cab xcent li templo. ² Quichak'oc li Jesús ut quixye reheb: —Us ajcui' nak teril chi us chixjunil a'in xban nak tācuulak xk'ehil nak ma jun chic reheb lī pec a'an tācanak sa' xna'aj chi inc'a' ta tajuq'uek', chan. ³ Ut chirix a'an, co chiru li tzul Olivos ut nak li Jesús quic'oja aran xjunes, lix tzolom que'cuulac riq'uin ut que'xye re: —Ye ke jok'e tac'ulmank li yocat chixyebal. ¿c'a'ru talajc'ulmank nak tācuulak xk'ehil la' c'ulunic? Ut ¿c'a'ru retalil li roso'jiqueb li cutan a'in? — ⁴ Quichak'oc li Jesús ut quixye reheb: —Cheq'uehak retal re nak ma ani chibalak'ink ere. ⁵ Nabal te'chalk

chi balak'jnc, ut te'xye nak sa' inc'aba' xe'chal, abanan moco yal ta. Tole'xye, "Lain li Cristo", cha'keb. Ut nabal te'balak'jk xbaneb. ⁶ Nak terabi nak yo li plet ut nak terabi resil nak ticlac re li plet yalak bar, mexxucuac xban nak tento nak tac'ulmank chi jo'can. Abanan moco ac a'an ta ros'o jiqueb li cutan a'in. ⁷ Nabali li tenamit te'pletik chi ribileb rib. Ut eb li acuabej te'xpleti ribeb. Talajcuank li cue'ej ut tacuank li yajel ut tacuank li hic sa' nabal chi na'ajej. ⁸ Abanan chixjunil a'an yal xticlajic li raylal li tachalk. ⁹ Tojo'nak texk'axtesik ut texrahobtesik ut texcamsik. Ut xic' tex-ilek' xbaneb chixjunileb li tenamit sa' inc'aba' lain. ¹⁰ Ut sa' eb li cutan a'an nabaleb te'xcanab lix pabaleb. Ut a'anakeb chic li te'q'uehok reheb laj pabanel sa' raylal. Ut xic' chic te'r'il ribeb. ¹¹ Ut nabaleb li profeta aj balak' te'chalk ut nabaleb te'balak'jk xbaneb. ¹² Ut xban nak tanumtak li mausilal, nabaleb te'xcanab xrabaleb li ras ritz'in. ¹³ Ut li ani tixcuy xnumsinquil li raylal a'in toj sa' ros'o jic lix yu'am, a'an tacolek'. ¹⁴ Ut li resil lix nimajcual cuanquial li Dios tayemank yalak bar jun sut rubel choxa re nak chixjunileb li tenamit te'rabi resil li colba-ib. Tojo'nak tachalk li ros'o jiqueb li cutan. ¹⁵ Chetzolak rix chi us li c'a'ru quixye li profeta Daniel re nak tetau ru li c'a'ru tac'ulmank. A'an quixye nak eb laj balak' te'rocsi sa' li rochoch li Dios bar macua' xc'ulub cui' cuanc li k'axal yibru ut xucuajel rilbal xban lix mausilal, ut riq'uin a'an te'xmux ru lix templo li Dios. (Dan. 9:27; 12:11) ¹⁶ Nak teril a'an, laex li cuanquej Judea, chex-elelik sa' junpat ut texxic toj sa' li tzul. ¹⁷ Li ani cuank chak sa' xben li rochoch nak tac'ulmank a'an, chi cubec chak ut tic taelelik ut inc'a' chic taoc sa' rochoch chirisinguil li c'a'ru cuan re. ¹⁸ Ut li ani cuank chak sa' xc'alebal inc'a' chic chisuk'ik sa' rochoch chixxochal li rak'. ¹⁹ Tok'obak ruheb li yaj aj ixx ut li yoqueb chi tu'resink sa' eb li cutan a'an xban nak k'axal cui'chic ch'a'aj li elelic chok' reheb. ²⁰ Chextijok ut chetz'ama chiru li Dios re nak inc'a' tac'ulmank li raylal a'in sa' habalk'e chi moco sa' li hilobal cutan. ²¹ Sa' eb li cutan a'an ma ca'ch'in li raylal tac'ulmank. Ma jun cua quic'ulman chi jo'can chalen chak sa' xticlajic li ruchich'och', chi moco tac'ulmank junak chic jo'can mokon. ²² Cui ta mac'a' sa' xc'hol li Kacua' xrakbal ruheb li cutan a'an, ma ani raj tacanak chi yo'yo sa' ruchich'och'. Jo'can nak li Kacua' tixseba xrakbal ruheb li cutan a'an sa' xc'aba'eb li sic'bileb ru. ²³ Jo'can nak cui ani tayehok ere, "Cue' li Cristo," malaj, "le' cuan li Cristo," mepab li c'a'ru tixye. ²⁴ Nabaleb aj balak' te'c'ulunk ut te'xye nak a'aneb li Cristo. Ut cuan te'xye nak a'aneb profeta. Nabal li c'a'ak re ru te'xc'utbesi ut sachba ch'olej telaje'xbanu re xyalbal xbalak'inquileb li tenamit, jo'queb ajcui' li sic'bileb ru xban li Dios. ²⁵ Abanan cheq'uehak retal. Ac xinye ere li c'a'ru talaje'c'ulmank. ²⁶ Cui ut neque'xye ere, "Le' sa' li chaki ch'och' cuan li Cristo," mexxic chiribal. Cui ut neque'xye ere, "Arin cuan sa' cab," mepab li c'a'ru te'xye. ²⁷ Lain li C'ajolbej tinc'ulunk sa' junpat. Chanchan lix repom li cak na-el chak sa' releb sak'e ut naxc'ut rib toj sa' roqueb sak'e. ²⁸ Yal li neque'xye nak bar cuank junak camenak, aran te'xtub rib li so'sol.

Nak tol-ekl cui'chic li C'ajolbej Dios

²⁹ Ut sa' eb li cutan a'an nak acak xrake' li raylal a'an, tak'ojyinok' ru li sak'e ut li po inc'a' chic tacutanok' ru. Taec'ank chak ru li choxa ut li chahim talaje'tanek' chak. ³⁰ Tojo'nak tac'utunk sa' choxa li cuetalil lain li C'ajolbej. Ut te'yot'ek' ut te'yabak chixjunileb li cuanqueb sa' ruchich'och'. Ut te'r'il cuu lain li C'ajolbej nak yokin chak chi chalc sa' li chok riq'uin lix nimal incuanquial ut inlok'al. ³¹ Ut nak taec'ank chak chi cau li trompeta, tintaklaheb lin angel. Ut te'xch'utub li sic'bileb ru inban li cuankeb yalak

bar jun sut rubel choxa jun sut sa' ruchich'och'. ³² Cheq'uehak retal c'a'ru naxbanu li jun ton chi higo. Nak nak'unk'ut chak li xak chi elc, riq'un a'an tenau nak yo chak chi nach'oc li sak'ehil. ³³ Jo' nak li higo naxc'utbesi retalil li sak'ehil, jo'can ajcui' chixjunil li c'a'ak re ru a'an talaje'c'ulmank, naxc'utbesi retalil nak yo chi cuulac xk'ehil nak tolinelk cui'chic lain li C'ajolbej. ³⁴ Relic chi yal tinye ere nak toj talaje'c'ulmank chixjunil li c'a'ak re ru a'in chi toj maji' neque'oso' li tenamit a'in. ³⁵ Li choxa ut li ruchich'och' talaje'osok'. Abanan li cuatin inc'a' tacanak'yal chi jo'can chi inc'a' taç'ulmank chixjunil li c'a'ak re ru xinye. ³⁶ Abanan ma ani nana'oc re jok'e lix k'ehil ut lix honal inc'ulunic. Eb li ángel sa' choxa inc'a' neque'xnau chi moco lain li C'ajolbej ninna'oc re. Ca'aj cui' li Dios Acuabej nana'oc re jok'e taç'ulmank a'in. ³⁷ Jo' quic'ulman sa' xcutan laj Noé, jo'can ajcui' taç'ulmank nak tolinelk cui'chic lain li C'ajolbej. ³⁸ Sa' eb li cutan a'an nak toj maji' quicuan li but'i ha', eb li tenamit yoqueb chak chi cu'a'ac ut yoqueb chi uc'ac, ut yoqueb chi sumlac ut chi sumubanc toj sa' li cutan nak qui-oc laj Noé sa' li jucub cab. ³⁹ Ut inc'a' que'xtau xyalal toj quichal li but'i ha' ut quilaje'ame' chixjunileb xban li but'. Chanchan ajcui' a'an nak tolinelk cui'chic lain li C'ajolbej. ⁴⁰ Sa' li cutan a'an cuib li cuink cuankeb sa' c'alebal, jun aj pabanel ut jun li macua' aj pabanel. Ut laj pabanel, a'an li taç'amek' xban li Dios ut li jun chic li macua' aj pabanel, a'an tacanabak. ⁴¹ Ut cuib li ixk yoqueb chi que'ec sa' jun chi que'leb, jun aj pabanel ut jun li macua' aj pabanel. Ut laj pabanel, a'an li taç'amek' xban li Dios ut li jun chic li macua' aj pabanel, a'an tacanabak. ⁴² Jo'can nak yo'on cuankex xban nak inc'a' nequenau jok'e honal tolinelk lain li Kacua'. ⁴³ Chenauhak a'in: nak cui ta naxnau li yucua'bej sa' li cab jok'e honal re li k'ojojin tol-elk laj elk', tayo'lek raj ut inc'a' raj tixcanab chi elk'ac xsa' li rochoch. ⁴⁴ Jo'can ajcui' laex yo'on cuankex chi oybeninc xban nak inc'a' nequenau jok'e honal tincuulak lain li C'ajolbej. Tincuulak chi mac'a' sa' ech'ol.

Li chabil aj c'anjel ut li inc'a' chabil aj c'anjel

⁴⁵ ¿Ani ut laj c'anjel chabil ut cuan xna'leb? A'an li quiq'uehe' xcuquil xban lix patrón sa' xbeneb li rech mosil ut a'an taç'uehok re xtzacaemkeb sa' x-oril. ⁴⁶ Us xak re laj c'anjel a'an li yok chixbanunquil chi jo'can nak tol-elk lix patrón. ⁴⁷ Relic chi yal tinye ere nak lix patrón tixk'axtesi sa' ruk', chixjunil lix juncablal. ⁴⁸ Aban cui laj c'anjel a'an inc'a' us lix na'leb, tixye sa' xch'ol, "Lin patrón tabayk chak chi c'ulunc." ⁴⁹ Ut taçoc chixsac'baleb li rech aj c'anjelil, ut taçoc chi cu'a'ac ut chi uc'ac rochbeneb li calajenak. ⁵⁰ Ut mac'a'ak sa' xch'ol nak tol-elk lix patrón. ⁵¹ Ut taç'ajitesik ru ut taç'uehek' sa' xyank'eb laj ca'pac'al u. Ut aran taçuank li yabac ut li c'uxuxinc ruch e.

25

Lijaljoquil ru qtin chirix li lajeb chi tuk' ix

¹ Lix nimajcual cuanquilar li Dios, a'an chanchan li quiq'ulman sa' jun li sumlac. Li lajeb chi tuk' ix que'xc'am lix candil ut coeb sa' jun li sumlac chixc'ulbal li belomej. ² Qb cuanqueb xna'leb ut li ob chic mac'a' xna'lebeb. ³ Li obeb li mac'a'eb xna'leb inc'a' que'xcauresi rib chi us. Que'xc'am lix candil, abanan inc'a' que'xc'am xya'al lix candil. ⁴ Ut li cuanqueb xna'lebeb que'xcauresi rib chi us, que'xc'am lix candil ut que'xc'am ajcui' lix ya'al. ⁵ Ut nak quibay chak li belomej, neque'xikan chixjunileb toj retal quicube xcuaraheb. ⁶ Ut sa' tutku k'ojojin, que'rabi nak yoqueb chixjapbal reheb li tenamit chixyebal: —Cue' chak li belomej. Ayukex, c'ulumak chak,

chanqueb. ⁷ Ut li lajeb chi tuk' ix que'aj ru ut que'oc xyibanol lix candil. ⁸ Ut li ob li mac'a'eb xna'leb que'xye reheb li ob chic li cuanqueb xna'leb: —Jec'omak bayak xya'al li kaxam xban nak chupc re li kacandil, chanqueb. ⁹ Aban li cuanqueb xna'leb que'xye: —Inc'a' naru. Inc'a' tatz'aklok li xya'al li ke cui takaq'ue ere laex. Ayukex riq'uineb laj c'ay. Lok'omak chak' ere, chanqueb reheb. ¹⁰ Ut cuanqueb chak chixlok'bal lix ya'al lix candil nak col-elk li belomej. Ut li ob chic li cuanqueb xya'al lix candil que'oc rochben sa' li cab. Ut quitz'ape' li oquebal. ¹¹ Ut nak que'suk'i chak li ob chi tuk' ix chixlok'bal xya'al lix xameb, que'oc chibokoc sa' li oquebal ut que'xye: —Kacua', te li cab chiku, chanqueb. ¹² Ut li belomej quichak'oc ut quixye reheb: —Relic chi yal tinye ere inc'a' ninnau eru. — ¹³ Jo'can nak lain ninye ere: Yo'on cuankex xban nak inc'a' nequenau li cutan chi moco li honal jok'e tolinelk lain li C'ajolbej.

Li jaljoquil ru qatin chirix li tumin naxc'utbesi chanru nak toc'anjelak chiru li Dios

¹⁴ Ut lix nimajcual cuanquilar li Dios, a'an chanchan jun li cuink li ac xic re chi najt. Quixbokeb lix mos riq'uin ut quixk'axtesi lix tumin sa' ruk'eb lix mos. ¹⁵ Quixq'ue ob mil pes re li jun, cuib mil re li jun chic ut quixq'ue jun mil re li jun chic. Quixq'ue re li junjunk a' yal chanru lix sebal xch'ol chi rilbal. Tojo'nak co chi najt. ¹⁶ Ut li mos li quic'uluc re li ob mil pes, qui-oc chi yacoc chiru ut quirechani ob mil pes chic sa' xben li quixc'ul. ¹⁷ Ut jo'can cui' chic quixbanu li quic'uluc re li cuib mil pes. Ut quirechani cuib mil pes chic sa' xben li quixc'ul. ¹⁸ A'ut li mos li quic'uluc re li jun mil pes, co ut quixbec jun li jul sa' ch'och'. Ut aran quixmuk li jun mil pes li quic'uehe' re xban lix patrón. ¹⁹ Ut najterak chic, quic'ulun lix patroneb laj c'anjel a'an. Quixbokeb lix mos chixk'axtesinqul xcuenteb. ²⁰ Ut quicuulac li mos li quic'uluc re li ob mil pes. Ut quixc'am chak li ob mil li quixc'ul ut quixc'am chak ajcui' li ob mil chic li xben li quirechani, ut quixye: —Kacua', ob mil pes caq'ue cue. Cuaye' la tumin ut ob mil chic xcuechani chak sa' xben li caq'ue cue, chan. ²¹ Ut lix patrón quixye re: —K'axal us xabanu. Laat chabilat ut tz'akalat aj c'anjel. Sa' xben li ca'ch'in xink'axtesi acue, chabil xat-el. Anakcuan tink'axtesi chic nabal acue. Chisahok' sa' la ch'ol xban nak tattz'akonk ajcui' riq'uin li sahil ch'olejil li cuan cuiq'uin lain, chan. ²² Ut li mos li quic'uluc re li cuib mil pes quicuulac ut quixye: —Kacua', caq'ue cue cuib mil pes ut cuib mil pes chic xcuechani chak sa' xben, chan. ²³ Ut lix patrón quixye re: —Us xabanu. Chabilat aj c'anjel. Riq'uin li ca'ch'in xinq'ue acue, us xat-el. Anakcuan tink'axtesi acue nabal chic. Chisahok' sa' la ch'ol xban nak tattz'akonk ajcui' riq'uin li sahil ch'olejil li cuan cuiq'uin lain, chan. ²⁴ Ut quicuulac ajcui' li jun chic li quic'uluc re li jun mil pes ut quixye re lix patrón: —Kacua', ninnau nak josk'at laat. Nacatk'oloc bar inc'a' nacat-au cui', ut nacatxococ bar cui' inc'a' nacatpajin iyaj. ²⁵ Jo'can nak quinxucuac ut coin ut coxinmuk sa' ch'och' li caq'ue cue. Cue' li jun mil pes li caq'ue cue, chan. ²⁶ Ut li patrón quijosk'o' ut quixye re: —Inc'a' us la na'leb. Inc'a' nacacuaj trabajic. Xanau nak nink'oloc bar inc'a' nin-au cui'. Ut xanau nak ninxococ bar inc'a' ninpajin cui' iyaj. ²⁷ Jo'can ut tento nak xaq'ue raj lin tumin reheb laj to'tumin. Ut sa' inc'ulunic, xinc'ul raj ral lin tumin rochben raj li xaq'ue chi to', chan. ²⁸ Ut li patrón quixye reheb lix mos li cuanqueb aran: —Mak'omak chiru li jun mil pes ut q'uehomak re li ani aj iq'uin cuan li lajeb mil pes. ²⁹ Chixjunil li ani cuan nabal reheb, mas cui' chic taq'uemank re ut k'axal cui' chic nabal tacular re. Ut li ani ca'ch'in ajcui' cuan re, tamak'mank chiru li jo' q'ual cuan re. ³⁰ Ut laj

c'anjel a'in, māc'a' na-oc cui'. Isihomak arin ut q'uehomak sa' k'ojojin. Aran tācuānq li yābac ut li c'uxuxinc ruch e, chan.

Li rakba atin tachalk

³¹ Nak tinchalk lain li C'ajolbej riq'uin xnimal inlok'al cuochbenakeb chak chixjunileb li ángel, tojo'nak toxinc'ojlak sa' lin c'ojaribal retalil xnimal incuanquil chi rakoc atin. ³² Ut te'ch'utubak chicuu chixjunil xtepaleb li tenamit li cuanqueb sa' ruchich'och'. Tojo'nak tinsiq'ueb ru ut tinq'ueheb sa' cuib ch'utal jo' nak li pastor narisiheb lix carner sa' xyānkeb li chibat. ³³ Ut tinq'ueheb lin carner sa' lin nim uk' ut eb li chibat tinq'ue sa' intz'e. ³⁴ Ut lain li Rey tinye reheb li cuanqueb sa' lin nim: —Osobtesinbilex xban lin Yucua'. Echanihomak li nimajcual cuanquinal cauresinbil chok' ere chalen chak sa' xticladic li ruchich'och'. ³⁵ Terechani xban nak quintz'oca chak ut quineq'ue chi cu'a'ac. Quichakic cue ut quineq'ue chi uc'ac. Quinsic' cuochochnal ut quinec'ul eriq'uin. ³⁶ Nak māc'a' cuak', queq'ue cuak'. Nak quinyajer, quinetenk'a. Nak quincuan sa' tz'alam, coxineril chak. ³⁷ Ut eb li tiqueb xch'ol te'xye cue: —Kacua', ¿jok'e ta bi' catkil chi tattz'ocák ut jok'e ta bi' catkaq'ue chi cu'a'ac? ¿Jok'e ta bi' catkil chi tachakik acue ut jok'e ta bi' catkaq'ue chi uc'ac? cha'keb cue. ³⁸ ¿Jok'e ta bi' casic' acuochochnal ut catkac'ul ta kiq'uin? ¿Jok'e ta bi' catkil chi māc'a' acuak' ut quikaq'ue ta acuak'? ³⁹ ¿Jok'e ta bi' catkil chi yajat ut catkatenk'a ta? ¿Jok'e catcuan sa' tz'alam ut coxatkil ta chak? cha'keb. ⁴⁰ Ut lain tinchak'ok ut tinye reheb: —Relic chi yal tinye ere, cui quebanu a'in re junak li neque'paban cue, usta cubenak xcuauquil, cue ajcui' lain quebanu chak. ⁴¹ Tojo'nak lain li Rey tinye reheb li cuanqueb sa' lin tz'e: —Elénkex chicuu. Tz'ektanabilex sa' li xam li mā jok'e tachupk c'ubanbil chak chok' re laj tza ut reheb ajcui' lix ángel. ⁴² Xban nak lain quintz'oca chak ut inc'a' quineq'ue chi cu'a'ac. Quichakic chak cue ut inc'a' quineq'ue chi uc'ac. ⁴³ Quinsic' li cuochochnal ut inc'a' quinec'ul eriq'uin. Māc'a' cuak' ut inc'a' queq'ue cuak'. Quinyajer ut inc'a' quinetenk'a. Quincuan chi prexil ut inc'a' coxineril chak, cha'kin reheb. ⁴⁴ Ut te'chak'ok ut te'xye cue: —Kacua', ¿jok'e ta bi' catkil chi tattz'ocák? ¿Jok'e ta bi' catkil chi tachakik acue? ¿Jok'e casic' acuochochnal? ¿Jok'e catkil chi māc'a' la cuak' malaj yajat, malaj cuancat sa' tz'alam ut inc'a' catkatenk'a? cha'keb. ⁴⁵ Ut lain li Rey tinchak'ok ut tinye reheb: —Relic chi yal tinye ere, xban nak inc'a' quetenk'aheb li neque'paban cue li māc'a'eb xcuauquil, inc'a' ajcui' quinetenk'a lain, cha'kin reheb. ⁴⁶ Ut eb a'an te'xic sa' li tojba māc chi junelic. Abanan li tiqueb xch'ol cuānkeb xyu'am chi junelic.

26

Que'xc'ub rib re nak te'xchap li Jesúś

¹ Ut nak quirake' li Jesúś chixyebal chixjunil li atin a'in, quixye reheb lix tzolom: ² —Laex nequenau nak cuib cutan chic mā nacuulac xk'ehil li pascua re xnink'einquil chanru nak que'cole' ut que'el laj Israel sa' li tenamit Egípto. Ut lain li C'ajolbej tink'axtesik re nak tinq'uehek' chiru cruz. ³ Ut eb lix benil aj tij ut eb laj tz'ib ut eb li neque'c'amoc be sa' xyānkeb laj judío que'xch'utub ribeb chiru nebal re li rochoch lix yucua'ileb laj tij, Caifás xc'aba'. ⁴ Ut que'xc'ub ribeb re nak te'xchap li Jesúś ut re nak te'xyo'ob atin chirix re xcamsinquil. ⁵ Ut que'xye chiribileb rib: —Inc'a' takachap li Jesúś nak yok li nink'e xban nak te'pok' li tenamit sa' kabən ut te'oc chi pletic kiq'uin, chanqueb.

Li iixk quixq'ue li sununquil ban sa' xjolom li Jesús

⁶ Li Jesús cuan aran Betania sa' rochoch laj Simón li saklep rix. ⁷ Chunchu sa' mex nak quicuulac jun li ixx. Cuan jun ch'ina met yibanol riq'unin li tertoquil pec alabastro xc'aba'. Cuan li sununquil ban ch'í sa', k'axal terto xtz'ak. Li ixx quixq'ue li ban sa' xjolom li Jesús. ⁸ Nak que'r'il a'an, eb lix tzolom que'josk'o' ut que'xye chi ribileb rib: —¿C'a'ut nak xsach li sununquil ban a'in chi mac'a' rajbal? ⁹ Xru raj xc'ayiman chi k'axal terto xtz'ak ut xkajeq'ui raj li tumin reheb li neba', chanqueb. ¹⁰ Li Jesús quixnau li c'a'ru yoqueb chixyebal ut quixye reheb: —¿C'a'ut nak yoquex chixch'i ch'i'inquil li ixx a'in? Canabomak xcuech'inquil xban nak us li xban cue. ¹¹ Li neba' junelic cuankeb sa' eyank. Abanan lain moco cuankin ta chi junelic eriq'unin. ¹² Li ixx a'in us li xbanu cue nak xq'ue li sununquil ban sa' inben. Maji' nincam abanan ac xinixban re lin mukbal. ¹³ Relic chi yal tinye ere yalak bar tayemank resil li colba-ib sa' chixjulin li ruchich'och', tayemank ajcui' resil li c'a'ru xbanu cue li ixx a'in re xjulticanquil a'an, chan.

Laj Judas Iscariote quixyechi'i xk'axtesinkuil li Jesús sa' ruk'eb li xb'enil aijtij

¹⁴ Ut laj Judas Iscariote, jun reheb li cablaju chi xtzolom li Jesús, co riq'uineb lix benil aijtij. ¹⁵ Ut quixye reheb: —¿Jó' nimal teq'ue cue cui tink'axtesi li Jesús ere? chan reheb. Ut eb a'an que'xc'ub nak te'xq'ue lajeb xca'c'al chi tumin plata re. ¹⁶ Ut chalen sa' li cutan a'an, laj Judas yo chixsic'bal jok'e tixq'ue rib re nak tixk'axtesi li Jesús sa' ruk'eb.

Xticlajic chak li Lok'oninc re Xjulticanquil lix Camic li Jesucristo

¹⁷ Sa' li xb'en cutan re li nink'e nak neque'xcua' li caxlan cua chi mac'a' xch'amal, que'chal lix tzolom riq'unin li Jesús ut que'xye re: —¿Bar tacuaj takacauresi chak li na'ajej re tatzaca cui' li mayejanbil xul? chanqueb. ¹⁸ Ut li Jesús quixye reheb: —Ayukex sa' li tenamit riq'unin li cuink li xinye ere, ut teye re, "Chan laj tzolol nel nak cuulac re xk'ehil lix camic. Taraj xnumsinquil li nink'e Pascua sa' la cuochoch rochbeneb lix tzolom," cha'kex re li cuink. ¹⁹ Ut eb lix tzolom que'xbanu jo' que'yehe' reheb xban li Jesús ut aran que'xcasuresi li nink'e. ²⁰ Ut nak qui-ecuu sa' li cutan a'an, quic'ojla li Jesús sa' mex rochbeneb lix cablaju chi tzolom. ²¹ Ut nak yoqueb chi cua'ac, li Jesús quixye reheb: —Relic chi yal tinye ere nak jun ere laex tak'axtesink cue sa' ruk'eb li xic' neque'iloc cue, chan. ²² Ut mac'a' jo' nak que'raho' sa' xch'oleb. Ut chi xjunjunkaleb que'xpatz' re: —¿Ma lain ta bi' tink'axtesink acue, Kacua'? —²³ Quichak'oc li Jesús ut quixye reheb: —Li tak'axtesink cue, a'an li tixtz'a xcaxlan cua sa' li sec' li tintz'a cui' li cue lain. ²⁴ Relic chi yal lain li C'ajolbej tincamsik jo' tz'ibanol retalil chicuix sa' li Santil Hu. Abanan raylal cuan sa' xb'en li cuink a'an li tak'axtesink cue. K'axal us raj chok' re li cuink a'an nak inc'a' raj quiyo'la, chan li Jesús. ²⁵ Tojo'nak quichak'oc laj Judas li tak'axtesink re ut quixye: —¿Malaj'ut lain li yocat chinyebal, at tzolol? Ut li Jesús quixye re: —Laat xaye acuib. ²⁶ Ut nak yoqueb chi cua'ac, li Jesús quixchap li caxlan cua. Quixbantioxi chiru li Dios, quixjachi, tojo'nak quixjeq'ui reheb lix tzolom. Ut quixye reheb: —C'ulumak, cua'omak. A'an a'in lin tz'ejcual. —²⁷ Ut quixchap ajcui' li sec' re uc'ac ut quixbantiox chiru li Dios ut quixq'ue reheb ut quixye reheb: —Uc'umak li cuan sa' li sec' a'in chejunilex, ²⁸ xban nak a'an a'in lin quiq'uel li tahoyek' re nak tacuyek' xmaqueb nabal chi tenamit. Ut a'an taxakabank xcuandiquil li Ac' Contrato. ²⁹ Relic chi yal tinye ere nak chalen anakcuan inc'a' chic tincuuq' lix ya'al

ru li uva toj nak t̄acuulak xk'ehil nak tincuuc' cui'chic cuochbenex sa' lix nimajcual cuanquilal lin Yucua', chan li Jesús.

Li Jesús quixye nak tatz'ektanak xban laj Pedro

³⁰ Nak ac xe'rake' xbichanquil jun li bich re xlok'oninquel li Dios, que'coeb sa' li tzul Olivos. ³¹ Ut li Jesús quixye reheb: —Chejunilex laex tach'inak le ch'ol sa' inc'aba' lajin ut tinecanab injunes chiru li k'ojojin a'in jo' tz'ibánbil retalil sa' li Santil Hu: Tincanab chi camsic laj ilol reheb li carner ut eb li carner te'xcha'cha'i ribeb. (Zac. 13:7) ³² Ut nak acak xincuacli cui'chic chi yo'yo sa' xyankeb li camenak lajin xben cua tinxic cheru laex aran Galilea, chan li Jesús. ³³ Ut laj Pedro quichak'oc ut quixye: —Usta chixjunileb tate'xcanab, abanan lajin inc'a' tatincanab, chan. ³⁴ Ut li Jesús quixye re: —Relic chi yal yoquin chixyebal acue nak chiru li k'ojojin a'in toj maji' nayabac laj tzo' xul nak laat ac xaye oxib sut nak inc'a' nacanau cuu. — ³⁵ Ut laj Pedro quixye cui'chic: —Ma jok'e tinye nak inc'a' ninnau acuu, usta tine'xcamsi acuochben, chan. Ut jo'can ajcui' que'xye chixjunileb lix tzolom.

Nak quitijoc chak li Jesús aran Getsemani

³⁶ Li Jesús quicuulac rochbeneb lix tzolom sa' li na'ajej Getsemani. Ut quixye reheb lix tzolom: —C'ojlankex cuan arin roybeninguil nak tinxic chi tijoc toj le', chan. ³⁷ Ut quixc'am chirix laj Pedro jo'queb ajcui' li cuib chi ralal laj Zebedeo. Ut li Jesús qui-oc chi rahoc sa' xch'ol ut c'ajo' nak tayot'ek' xch'ol. ³⁸ Ut quixye reheb: —Cuan jun raylal sa' inch'ol ut yo chinyot'bal. Inc'a' chic nincuy nak nacuec'a. Canaqex arin ut yo'lenkex cuochben, chan. ³⁹ Ut quibec chic ca'ch'in li Jesús ut quixhupub rib sa' ch'och' ut quitijoc. Ut quixye: —At inYucua', cui ta naxq'ue rib, inc'a' raj tinc'ul li raylal a'in. Abanan chi-uxmank li c'a'ru nacacuaj laat ut maqua'li nacuaj lajin. — ⁴⁰ Ut nak quisuk'i riq'uineb lix tzolom, quixtauheb chi cuarc. Ut quixye re laj Pedro: —¿Ma toj yoquex chi cuarc? ¿Ma inc'a' xru xexyo'lec jun orak cuochben? ⁴¹ Chexyo'lek ut chextijok re nak inc'a' teq'ue erib chi alec. Laex nequeraj raj xbanunquil li us, abanan ejunes inc'a' texruk, chan. ⁴² Ut li Jesús co cui'chic xca' sut chi tijoc ut quixye: —At inYucua', cui ta naxq'ue rib nak inc'a' raj tinc'ul li raylal a'in, abanan chi-uxmank li c'a'ru nacacuaj laat. — ⁴³ Ut nak quisuk'i cui'chic li Jesús, quixtauheb cui'chic chi cuarc lix tzolom xban nak mā ca'ch'in lix cuaraheb. ⁴⁴ Quixcanabeb ut co cui'chic chi tijoc rox sut ut jo'can cui'chic quixtz'ama chiru li Dios. ⁴⁵ Tojo'nak quichal cui'chic riq'uineb lix tzolom ut quixye reheb: —¿Ma toj yoquex chi cuarc? Tz'akalak li hilanc xebanu. Ac xtau xk'ehil nak lajin li C'ajolbej tink'axtesik sa' ruk'eb laj mac. ⁴⁶ Cuaclinkex anakcuuan, yo'keb; cue' chak li tak'axtesink cue sa' ruk'eb li xic' neque'iloc cue, chan.

Nak que'xc'am chi prexil li Jesús

⁴⁷ Toj yo ajcui' chi atinac li Jesús nak cox-elk laj Judas. A'an jun reheb li cablaju. Nabal que'chal rochben taklanbileb chak xbaneb li xbenil aj tij ut xbaneb laj c'amol be sa' xyankeb laj judío. Cuanqueb xch'ich' ut cuanqueb xche'. ⁴⁸ Li tak'axtesink re ac xc'ub chak rib riq'uineb c'a'ru li retalil li tixc'ut. Quixye reheb: —Li ani tincuutz' ru, a'an li techap. — ⁴⁹ Ut laj Judas co chi junpat riq'uin li Jesús ut quixye re: —¿Chan xacuil, at tzolone? — ut quirutz' ru. ⁵⁰ Ut li Jesús quixye re: —Cuamig, ¿c'a'ru acuajom arin? — Tojo'nak que'nach'oc riq'uin li Jesús ut que'xchap. ⁵¹ Ut jun reheb li rochben li Jesús quirisi chak lix ch'ich' ut quixch'ot lix xic lix mos li xbenil aj tij. ⁵² Tojo'nak quiyeh'e re xban li Jesús: —Q'ue la ch'ich' sa' lix na'aj xban nak

chixjunileb li neque'pletec riq'uin ch'ich', riq'uin ch'ich' ajcui' te'osok'. ⁵³ ¿Ma inc'a' nacanau nak naru tintz'ama chiru lin Yucua' ut a'an tixtakla raj chak anakcuan anakcuan q'uila ok'ob chi ángel chincolbal? ⁵⁴ Abanan cui tixtakla raj chak eb li ángel, ¿chan raj ru nak tatz'aklok ru li tz'ibanol sa' li Santil Hu, li naxye nak jo'ca'in tento tac'ulmank? chan li Jesús. ⁵⁵ Ut sa' li hñonal a'an li Jesús quixye reheb li q'uila tenamit, —¿Ma lain ta bi' aj elk' nak xexchal chinchapbal riq'uin che' ut riq'uin ch'ich'? Rajlal cutan ninc'oja sa' eyank chetzelbal sa' li rochoch li Dios ut inc'a' quinechap aran. ⁵⁶ Abanan chixjunil a'in x-uxman re nak tatz'aklok ru li Santil Hu tz'ibanol xbaneb li profeta. Tojo'nak que'elelic chixjunileb lix tzolom ut que'xcanab xjunes li Jesús.

Que'xtz'il qatin chirix li Jesús nak cuan chiru lix yucua'il eb laj tij

⁵⁷ Ut li Jesús quic'ame' riq'uin laj Caifás, lix yucua'ileb laj tij. Aran ch'utch'uqueb laj tz'ib ut eb li neque'c'amoc be sa' xyankeb laj judío. ⁵⁸ Ut laj Pedro chi najt yo chak chixtakenquil li Jesús ut quicuulac toj chi ru'uj neböl sa' rochoch lix yucua'ileb laj tij. Qui-oc aran uf quic'oja sa' xyankeb laj c'ac'alenel re nak taril c'a'ru tacañaq cui'. ⁵⁹ Ut eb li xbenil aj tij ut eb li neque'c'amoc be sa' xyankeb laj judío ut chixjunileb li neque'tz'iloc qatin yoqueb chixsic'bal chanru nak te'xyo'ob junak qatin chirix li Jesús re nak taruk te'xk'axtesi chi camsic. ⁶⁰ Abanan inc'a' que'xtau usta nabal chi testigo aj tic'ti'eb cuanqueb aran. Toj que'cuulac cuib chic li testigo aj tic'ti'eb, tojo'nak que'xtau chanru te'xjxit cui'. ⁶¹ Li cuib a'an que'xye: —Jo'ca'in quixye li cuink a'in, —Lain taruk tinjuc' li rochoch li Dios ut chiru oxib cutan tinyib cui'chic', chan. ⁶² Ut quixakli lix yucua'ileb laj tij ut quixye re li Jesús: —¿C'a'ru nacaye laat? ¿Ma mac'a' nacaye chirix li yoqueb chixyebal chäcuix? ⁶³ Ut li Jesús ma jun li atin quixye. Ut li xyucua'ileb aj tij quixye cui'chic re: —Sa' xc'aba' li yo'yoquíl Dios taye ke cui laat li Cristo, li Ralal li Dios. —⁶⁴ Ut li Jesús quixye re: —Yal li xaye laat. Ut tinye ajcui' ere nak chalen anakcuan tineril lain li C'ajolbej nak c'ojc'okin sa' xnim uk' li nimajcual Dios ut tineril ajcui' nak yokin chak chi chalc cui'chic sa' li chok sa' choxa, chan. ⁶⁵ Nak quirabi a'an, li xyucua'ileb laj tij quixpej li rak' xban xjosk'il ut quixye: —A'an xjuntak'eta rib riq'uin li Dios. ¿C'a' chic ru aj e nak toj te'xye ke c'a'ru lix mac? Ac xerabi nak xjuntak'eta rib riq'uin li Dios. ⁶⁶ ¿C'a'ru nequeye? ¿Ma cuan xmac malaj inc'a' chan. Ut que'chak'oc ut que'xye: —Cuan xmac ut xc'ulub nak taczamsik. —⁶⁷ Tojo'nak cuan que'chuban re sa' ru. Ut cuan que'sac'oc re ut cuan que'pak'len re chi ruk'eb. ⁶⁸ Ut que'xye re: —At Cristo, ye ke ani xsac'oc acue, chanqueb.

Laj Pedro quixye nak inc'a' naxnau ru li Jesús

⁶⁹ Laj Pedro cuan chirix cab c'ojc'o chi ru'uj neböl. Quicuulac jun li ixl, xmos li xyucua'ileb laj tij. Quixye re laj Pedro: —Laaat jun reheb li xe'ochbenin re li Jesús aj Galilea. —⁷⁰ Laj Pedro quitic'ti'ic chiruheb chixjunileb ut quixye: —Lain inc'a' ninnau ru ani nacaye, chan. ⁷¹ Ut jun chic li ixl qui-iloc re nak yo'chi elc chire li cab. Ut quixye reheb li cuanqueb aran: —Li cuink a'in, a'an jun qui-ochbenin re li Jesús aj Nazaret. ⁷² Ut laj Pedro quitic'ti'ic cui'chic xca' cua. Quixpatz' xc'aba' li Dios ut quixye: —Inc'a' ninnau ru li cuink a'an, chan. ⁷³ Ut junpatak chican, li cuanqueb aran que'jiloc riq'uin laj Pedro ut que'xye re: —Relic chi yal nak laat xcomoneb xban nak la cuatinobal nac'utuc re nak laat aj Galilea. —⁷⁴ Ut laj Pedro qui-oc chi majecuancut ut quixye riq'uin juramento: —Inc'a' ninnau ru li cuink a'an, chan. Ut sa' ajcui' li hñonal a'an quiyabac laj tzo' xul. ⁷⁵ Ut sa' junpat quinak

sa' xch'ol laj Pedro li qatin li quiyeh'e re xban li Jesús, "Nak toj maji' nayabac laj tzo' xul, laat ac xaye oxib sut nak inc'a' nacanau cuu." Ut laj Pedro ma c'ajo' nak quiyot'e' xch'ol. Qui-el chirix cab ut c'ajo' nak quiyabac.

27

Li Jesús quic'ame' sa' rakleb qatin chiru laj Pilato

¹ Ut nak quisakeu, que'xch'utub ribeb chixjunileb lix benil aj tij ut eb laj c'amol be sa' xyankeb laj judío. Que'xc'ub rib chanru te'xbanu re nak tacamsik li Jesús. ² Que'xc'am li Jesús chi bac'bo ut que'xk'axtesi sa' ruk' laj Pilato lí acuabej.

Lix Camic laj Judas

³ Ut laj Judas li quik'axtesin re li Jesús, c'ajo' nak quiyot'e' xch'ol riq'uin li quixbanu nak quiril nak quitenebac camic sa' xben li Jesús. Quixk'ajsi li lajeb xca'c'al chi tumin plata reheb lix benil aj tij ut reheb li neque'c'amoc be sa' xyankeb laj judío. ⁴ Quixye reheb: —Xinmacob nak xink'axtesi ere li cuink a'in xban nak mac'a' xmac, chan. A'ut eb a'an que'xye re: —¿C'a' tákaj re lão? Il c'a'rú tabanu. —⁵ Ut laj Judas quixcut li tumin sa' rochoch li Dios. Ut co' ut quixyatz' rib. ⁶ Ut eb lix benil aj tij que'xxoc li tumin ut que'xye: —Inc'a' us xq'uebal li tumin a'in sa' xcaxil lix mayej li rochoch li Dios xban nak xtz'ak xyu'am li cuink. —⁷ Ut que'xc'ub ru nak te'xlok' jun li ch'och' re te'mukek' cui' li jalaneb xtenamit. Ut chiru li tumin a'an que'xlok' li na'ajej a'an riq'uin laj pac'onel. ⁸ Jo'can nak chalen anakcuan quicana chok' xc'aba' li na'ajej a'an "Lok'bil riq'uin Quic'." ⁹ Ut riq'uin a'in quitz'akloc ru li quixye li profeta Jeremías nak quixye:

¹⁰ Ut que'xchap li lajeb xca'c'al chi tumin plata, xtz'ak li quik'axtesic. Lix tz'ak a'an li tenebanbil sa' xben xbaneb laj Israel. Ut chiru lí tumin a'an que'xlok' jun li ch'och' riq'uin laj pac'onel, jo' quiyeh'e cue xban li Kacua'. (Zac. 11:12-13)

Li Jesús quic'ame' sa' rakleb qatin chiru laj Pilato

¹¹ Que'xc'am li Jesús ut que'xxakab chiru laj Pilato li acuabej. Ut laj Pilato quixpatz' re: —¿Ma laat lix Reyeb laj judío? — Li Jesús quichak'oc ut quixye re: —Yal li xaye nak laín. —¹² Ut nak yo' xjitbal xbaneb lix benil aj tij ut eb li neque'c'amoc be chiruheb laj judío, chi tíc inc'a' quichak'oc. ¹³ Ut laj Pilato quixye re: —¿Ma inc'a' nacacuabi jo' q'uial li yoqueb chixyebal chàcuix? —¹⁴ Aban li Jesús ma jun li qatin quixye re tixcol rib ut riq'uin a'an quisach xch'ol laj Pilato.

Quitenebac li camic sa' xben li Jesús

¹⁵ Rajlal chihab sa' li nink'e Pascua li acuabej narach'ab junak li prex a' yal ani te'raj li tenamit taach'abak jo' c'aynakeb xbanunquil. ¹⁶ Sa' eb li cutan a'an cuan sa' tz'alam jun li cuink na'no ru chi us, aj Barrabás xc'aba'. ¹⁷ Ut nak ch'utch'uequeb li q'uila tenamit, laj Pilato quixpatz' reheb: —¿Ani teraj tincuach'ab? — Ma laj Barrabás, malaj ut li Jesús li Cristo neque'xye re? chan laj Pilato. ¹⁸ Laj Pilato naxnau nak xban xcakaleb xch'ol li xbenil aj tij nak que'xk'axtesi li Jesús sa' rakleb atin. ¹⁹ Nak laj Pilato c'ojo'c' sa' lix na'aj li narakoc cui' atin, li rixakil quixtakla xyebal re: —Mac'a' tabanu re li cuink a'an xban nak mac'a' xmac. Sa' xc'aba' a'an nak k'axal ra xinmatq'ue chi k'ek, chan. ²⁰ Ut eb li xbenil aj tij ut eb li neque'c'amoc be sa' xyankeb laj judío que'xtacchi'i li q'uila tenamit re nak te'xye nak a' laj Barrabás li taach'abak, ut a' li Jesús tacamsik. ²¹ Ut li acuabej quixpatz' reheb: —¿Bar

cuan reheb li cuib a'in teraj tincuach'ab? — Ut eb a'an que'xye: —A' laj Barrabás, chanqueb. ²² Quixye laj Pilato reheb: —Ut, ¿c'a' put ru taruk tinbanu lajin riq'uin li Jesús, li Cristo neque'xye re? — Ut chixjunileb que'xye: —¡Chiq'uehek' chiru cruz! — ²³ Ut li acuabej quixye reheb: —¿C'a'ut? ¿C'a'ru tz'akal xmac ere? — Ut eb a'an k'axal cau cui'chic que'xjap re chixyebal: — ¡Chiq'uehek' chiru cruz! — ²⁴ Ut laj Pilato quiril nak inc'a' qui-el chi us li quiraj xbanunquil ut quixq'ue retal nak k'axal cui'chic nak que'po' xch'ol li tenamit. Tojo'nak quixtakla xc'ambal lix ha' re xch'ajbal li ruk' chiruheb li tenamit ut quixye: —Mac'a' inmāc lajin riq'uin xcamic li cuink a'in li māc'a' xmac. Laex chic yal ere sa' xben, chan. ²⁵ Ut chixjunileb li tenamit que'chak'oc ut que'xye: —Sa' kabén lao ut sa' xbenet li kalal kac'ajol chicanak xtojbal rix lix camic, chanqueb. ²⁶ Tojo'nak laj Pilato quirach'ab laj Barrabás chiruheb li tenamit. Ut quixtakla xsac'bal li Jesús riq'uin tz'um ut quixk'axtesi sa' ruk'eb li soldado re nak te'xq'ue chiru cruz. ²⁷ Ut eb lix soldado li acuabej que'xc'am li Jesús sa' li popol ut que'xch'utub ribeb chixjunileb li soldado ut que'xsut li Jesús. ²⁸ Que'risi li rak' ut que'xq'ue jun caki t'icr chirix jo' neque'rocsi li rey. ²⁹ Ut que'xtz'ul jun li corona riq'uin q'uij ut que'xq'ue sa' xjolom. Ut sa' xnim uk' que'xq'ue jun li che'. Ut que'xcuik'ib ribeb chiru ut que'retz'u ut que'xye: —Sahak taxak sa' ach'ol, at xReyeb laj judío, chanqueb re. ³⁰ Quilaje'xchuba, ut que'xchap li che' ut riq'uin a'an que'xsac' sa' xjolom. ³¹ Ut nak ac xe'xtacuasi, que'risi li t'icr li cuan chirix. Ut que'xq'ue cui'chic li rak' chirix. Tojo'nak que'xc'am re nak te'xq'ue chiru cruz.

Li Jesús quiq'uehe' chiru cruz

³² Ut nak yoqueb chi xic, que'xc'ul jun li cuink aj Simón xc'aba', Cirene xtenamit. Eb li soldado que'xmin ru a'an chixpakonquil lix cruz li Jesús. ³³ Ut que'cuulac sa' li na'aiej Gólgota xc'aba'. Chi jalbil ru naraj naxye: Xna'aj Xbakel Xjolom Camenak. ³⁴ Ut que'xq'ue vino re li Jesús yubil riq'uin c'ahil ban re xcotzbal li raylal, abanan nak quixyal, inc'a' quiruc'. ³⁵ Ut mokon nak ac que'xq'ue chiru cruz, eb li soldado que'búlic chirix li rak' re rilbal ani na tæchanink re li rak'. Jo'ca'in quitz'akloc ru li yebil xban li profeta nak quixye: Que'xejq'ui chi ribileb rib li cuak' ut que'búlic chirix lin t'icr. (Sal. 22:18) ³⁶ Que'c'oja aran ut que'oc chixc'ac'alenquil li Jesús. ³⁷ Sa' xben li cruz que'xq'ue jun rétalil c'a'ut nak que'xcamsi ut naxye:

A'an a'in li Jesús, lix Reyeb laj judío.

³⁸ Ut cuib aj əlk' que'q'uehe' chiru cruz rochben, jun sa' xnim ut jun sa' xtz'e. ³⁹ Ut eb li tenamit yoqueb chi numec' aran, que'xhob li Jesús ut neque'rec'asi xjolomeb. ⁴⁰ Ut que'xye: —¿Ma mācu'a ta bi' laat li cat-ajoc re xjuc'bal rochoch li Dios, ut yal chiru oxib cutan raj xayib cui'chic? Xacol raj əcuib. Cui yal nak laat Ralálat li Dios, cuben chak chiru li cruz, chanqueb. ⁴¹ Jo'can ajcui' eb li xbenil aj tij yoqueb chixhobbal li Jesús rochbeneb laj tz'ib ut eb li neque'c'amoc be sa' xyankeb laj judío. ⁴² Ut que'xye: —Jalan chic xcoleb ut a'an inc'a' naru naxcol rib xjunes. Cui yal nak a'an xReyeb laj judío, chicubek chak chiru li cruz anakcuan ut topabank chiru. ⁴³ Cau xch'ol riq'uin li Dios. Chicolek' anakcuan cui narahe' xban li Dios xban nak naxye nak a'an Ralal li Dios, chanqueb. ⁴⁴ Ut jo'can eb ajcui' laj əlk' li que'q'uehe' chiru cruz rochben, yoqueb chixhobbal. ⁴⁵ Tuktu cua'leb nak quík'ojyino' sa' chixjunil li ruchich'och' ut toj sa' oxib or re ecuu quicutano' cui'chic. ⁴⁶ Ut ca'ch'in chic ma oxib or nak quiatinac li Jesús chi cau xyab xcux ut quixye: —Elí, Elí, əlama sábactani? — Chi jalbil ru naraj naxye: At inDios, at inDios, ¿c'a'ut nak

xinäcanab injunes? ⁴⁷ Nak que'rabi li c'a'ru quixye li cuanqueb aran, cuan li que'yehoc: —Abihomak, yo chixbokbal li profeta Elías, chanqueb. ⁴⁸ Ut jun sa' xyänkeb co sa' anil ut coxtz'a chak jun li esponja sa' vinagre ut quixtaksi chi ru'uj jun li che' ut quixq'ue sa' re li Jesús re taruc'. ⁴⁹ Ut li jun ch'ol chic que'xye: —Kilak cuan ma tächalk na laj Elías chixcolbal, chanqueb. ⁵⁰ A'ut li Jesús quixjap cui'chic re chi cau ut qui-el xch'ol. ⁵¹ Ut li t'icr li cuan chok' tas sa' li Santil Na'ajej sa' li rochoch li Dios quik'iche' sa' xyi. Quiticla chak takec' ut toj tak'a coxrake' lix k'ichilal. Ca' jachal qui-el. Qui-ec'an li ch'och' ut eb li sakonac quilaje'itz'e'. ⁵² Quilaje'teli li que'muke' cui' li camenak ut nabaleb li tiqueb xch'ol que'cuaclí cui'chic chi yo'yo. ⁵³ Ut mokon chic nak li Jesús ac xcuaclí cui'chic chi yo'yo, que'el chak sa' lix muklebal ut que'oc sa' li santil tenamit Jerusalén ut nabal chi aj u que'xc'utbesi cui' ribeb. ⁵⁴ Ut li capitán rochbeneb li yoqueb chi c'ac'alenc re li Jesús, que'rec'a li híc ut que'xq'ue retal li c'a'ru yo chi c'ulmanc. Ma'c'ajo'nak que'xucuac ut que'xye: —Relic chi yal nak li cuink a'in tz'akal Ralal li Dios. — ⁵⁵ Ut cuanqueb ajcui' ixxk yoqueb chak chi iloc chi najt. Eb a'an toj Galilea que'xtake chak li Jesús ut que'c'anjelac chiru. ⁵⁶ Sa' xyänkeb a'an cuanqueb lix María aj Magdala, ut lix María xna'eb laj Jacobo ut laj José, ut lix na'eb li ralal laj Zebedeo.

Nak quimuke' li Jesús

⁵⁷ Ac yo chi oc k'oijin nak quicuulac aran bar que'xcamsi cui' li Jesús jun li cuink biom, aj José xc'aba'. Arimatea xtenamit. A'an xtzolom ajcui' li Jesús nak quicuan. ⁵⁸ Li cuink a'in co riq'uin laj Pilato ut quixtz'ama chiru nak taq'uehek' re lix tz'ejcuál li Jesús re nak tixmuk. Ut laj Pilato quixtakla xk'axtesinquil re. ⁵⁹ Ut laj José quixc'am li camenak ut quixlan sa' jun li ac' t'icr lino. ⁶⁰ Ut quixq'ue sa' jun li ac' muklebal. Re raj a'an li muklebal nak quiyibac sa' jun sakonac. Ut quixbalk'usi jun nimla pec chire li muklebal ut co. ⁶¹ Ut cuanqueb aran lix María aj Magdala ut lix María jun chic. C'ojo'queb aran chi xca'yabal li muklebal.

Que'xakabac li soldado chixc'ac'alenquil li muklebal

⁶² Jo' cuulajak chic, nak ac xnume' lix cutanquil li cauresinc re li hilobal cutan, que'xch'utub ribeb li xb'enil aj tij rochbeneb laj fariseo. Que'coeb riq'uin laj Pilato. ⁶³ Ut que'xye re: —Kacua', xjultico' ke li atin quixye laj balak' nak toj yo'yok. Quixye nak sa' rox li cutan tacuaclich cui'chic chi yo'yo. ⁶⁴ Takla xq'uebal retal chi us li muklebal toj tanumek' li oxib cutan. Mare te'chalk lix tzolom chi k'ek chirelk'anquil li camenak ut te'xye reheb li tenamit, "Xcuaclí cui'chic chi yo'yo sa' xyänkeb li camenak." Ut k'axal cui'chic ch'a'aj toelk lao chiru li xkac'ul xb'en cua. ⁶⁵ Ut laj Pilato quixye reheb: —Cue'queb jun ch'utal chi soldado. Ayukex rochbeneb ut q'uehomak retal nak te'xbanu chi us. Laex nequenau chanru tebanu, chan. ⁶⁶ Ut coeb ut que'xtz'ap chi us li muklebal ut que'xq'ue retalil'li pec ut que'xcanab li soldado aran chixc'ac'alenquil li muklebal.

28

Li Jesús quicuaclí cui'chic chi yo'yo sa' xyänkeb li camenak

¹ Nak ac xnume' li hilobal cutan, sakeuc re li xb'en cutan re li xaman, quicuulac lix María aj Magdala rochben lix María jun chic chirilbal li muklebal. ² Toj maji' ajcui' neque'cuulac nak quicuan jun nimla híc. Ut jun x-ángel li Kacua' quicube chak sa' choxa ut quixbalk'usi li pec ut quic'ojla sa' xb'en. ³ Li rilobal nalemtz'un chanchan rak' çak ut li rak' sak sak jo' li ratz'am que. ⁴ Ut

eb li yoqueb chi c'ac'alenc re li muklebal neque'sicsot xban xxiuheb chirilbal li quic'ulman. Chanchan camenak que'cana. ⁵ Ut nak que'cuulac li iixk, li ángel quixye reheb: —Mexxucuac laex. Lqin ninnau nak yoquex chixsic'bal li Jesús li quicam chiru cruz. ⁶ Ma ani chic arin. Ac xcuacli chi yo'yo jo'quixye ere. Quimkex arin. Ilomak lix na'aj bar que'xq'ue cui' li Kacua'. ⁷ Ayukex sa' junpat ut yehomak reheb lix tzolom nak ac xcuacli chi yo'yo sa' xyankeb li camenak. Ut anakcuan taxic Galilea ut a'an xben cua tacuulak cheru laex. Aran toxeril ru. Ca'aj cui' a'in li tinxé ere, chan li ángel. ⁸ Te'xucuak li iixk nak que'el sa' li muklebal. Abanan quisaho' ajcui' sa' xch'oleb riq'uin li c'a'ru que'rabi. Ut coeb sa' anil chixyebal resil reheb lix tzolom li Jesús. ⁹ Yoqueb chi xic nak xakamil li Jesús chiruheb ut quixq'ue xsahileb xch'ol. Ut eb li iixk que'nach'oc riq'uin ut que'xcuik'ib ribeb chiru. Que'xk'alú li rok ut que'xlok'oni. ¹⁰ Li Jesús quixye reheb: —Mexxucuac. Ayukex ut yehomak resil reheb lin herman re nak te'xic Galilea. Ut aran te'r'il cuu, chan.

Eb li xbenil aj tij que'xtumina ruheb li soldado re nak te'xye li tic'ti'

¹¹ Ut nak yoqueb chi xic li iixk, cuanqueb laj c'ac'alenel que'coeb sa' tenamit chixyebal resil reheb lix benil aj tij chixjunil li c'a'ak re ru quic'ulman. ¹² Ut lix benil aj tij que'xch'utub ribeb rochbeneb li neque'c'amoc be sa' xyankeb laj judío ut que'xc'ub ribeb nak te'xq'ue nabal li tumin reheb li soldado. ¹³ Ut que'xye reheb: —Jo'ca'in te'ye: “Eb lix tzolom que'cuulac chi k'ek ut que'relk'a li camenak nak yoco chi cuarc,” cha'kex. ¹⁴ Ut que'xye cui'chic reheb li soldado li que'c'ac'alen re li muklebal: —Cui tarabi resil a'in li acuabej, lao to-oquenk cherix ut texkacol, chanqueb. ¹⁵ Ut eb li soldado que'xc'ul li tumin ut que'xbanu jo' que'yehe' reheb. Ut li resil a'in quisutun sa' xyankeb laj judío chalen toj sa' li cutan anakcuan.

Li Jesucristo quixc'utbesi rib chiruheb lix tzolom

¹⁶ Ut lix tzolom j unlaju coeb Galilea sa' xben li tzul li que'yehe' reheb xban li Jesús. ¹⁷ Ut nak que'r'il ru li Jesús, que'xlok'oni. Abanan cuanqueb sa' xyankeb lix tzolom li que'cuiban xch'ol chixpabankil. ¹⁸ Li Jesús quinach'oc riq'uineb ut quixye reheb: —Chixjunil li cuanquil q'uebil cue xban li Dios, jo' sa' choxa jo' sa' ruchich'och'. ¹⁹ Jo'can utan texxic sa' chixjunil li ruchich'och' ut tech'olob li xyalal chiruheb chixjunileb li tenamit re nak te'pabank. Tecubsiheb xha' sa' xc'aba' li Dios Acuabej, sa' xc'aba' li Dios C'ajolbej ut sa' xc'aba' li Dios Santil Musik'ej. ²⁰ Tec'ut chiruheb xpabankil chixjunil li xinye chak ere. Chenauhak nak laín cuankin eriq'uin chixjunil li cutan chalen toj sa' roso'jic li ruchich'och'. Jo'can taxak.

Li Resil li Colba-ib li Quixtz'iba li San Marcos

Laj Juan laj Cubsihom Ha' quixye resil lix c'ulunic li Jesucristo

¹ Jo'ca'in nak quiticla chak resilal li colba-ib sa' xc'aba' li Jesucristo li Ralal li Dios. ² Li profeta Isaías quixtz'iba li atin li quixye li Dios re li Ralal: Xben cua fintakla junak lin takl. A'an tayehok resil la' c'ulunic re nak te'xcaresi rib li tenamit re ac'ulbal.

³ A'an tixch'olob xyalal sa' li chaki ch'och' chi cau xyab xcux. Tixye: Yibomak le yu'am ut yo'on cuankex chixc'ulbal li Kacua' jo' nak neque'xyib li be re xc'ulbal junak li nim xcuanguard. (Is. 40:3)

⁴ Jo'can nak co laj Juan laj Cubsihom Ha'sa'li chaki ch'och' ut yo chi cubsinc ha' ut yo chixch'olobanquil lix yalal chiruheb ut quixye: —Canabomak li macobc. Chi yot'ek' ech'ol ut chejal ec'a'ux ut chec'ul li cubi ha' ut li Dios tixcuy tixsach le mac, chan. ⁵ Nabaleb laj Judea ut nabaleb ajcui' laj Jerusalén que'cuulac cuan cui' laj Juan chirabinquil li c'a'ru yo chixyebal. Que'xxoto xmact chiru li Dios ut laj Juan quixcubsi xha'eb sa'li nima' Jordán. ⁶ Li rak' narocsi laj Juan, a'an yibandal riq'uin rix li xul camello ut lix c'amal xsa', a'an tz'um. Ut aq sac' naxtzaca riq'uin xya'al sak c'au. ⁷ Naxjultica li ratin li Dios reheb li tenamit ut naxye: —Chalc re jun chic li k'axal nim xcuanguard chicuu lain. Xban nak k'axal nim xcuanguard, moco inc'ulub ta nak tinc'utzub cuib re xhitbal xc'amal lix xab. ⁸ Lajin xincubsi eha' riq'uin ha'. Aban a'an tixq'ue ere li Santil Musik'ej, chan.

Nak quixc'ul li cubi ha' li Jesucristo

⁹ Sa' eb li cutan a'an li Jesús qui-el chak Nazaret xcuént Galilea. Quicuulac riq'uin laj Juan ut laj Juan quixcubsi xha' aran sa'li nima' Jordán. ¹⁰ Ut nak qui-el chak li Jesús sa'li ha', quiril nak quiteli li choxa, ut li Santil Musik'ej quicube chak sa'xben li Jesús. Chanchan jun li paloma nak yo chak chi cubec. ¹¹ Ut qui-abic xyab xcux li Dios toj sa' choxa. Quixye chi jo'ca'in: —Laat li cualal k'axal raroçat inban. Nasaho' inch'ol aquiq'uin, chan li Dios.

Nak quiyale' ralenquil li Jesús xban laj Tza

¹² Ut chirix a'in, li Jesús qui-ec'asíc lix ch'ol xban li Santil Musik'ej re nak taxic sa'li chaki ch'och' bar mac'a' cui' cristian. ¹³ Ca'cal cutan quicuan chak xjunes sa'li na'ajej a'an sa'xyankeb li josk'aj xul. Ut chiru li ca'cal cutan a'an, li Jesús quiyale' ralenquil xban laj tza, aban inc'a' quixq'ue rib chi alec. Ut eb lix ángel li Dios que'cuulac chi c'anjelac chiru. ¹⁴ Ac cuan laj Juan laj Cubsihom Ha'sa'tzalam nak co li Jesús Galilea ut yo chixjulticanquill resil li colba-ib li naxq'ue li Dios. ¹⁵ Li Jesús quixye: —Xcuulac xk'ehil li nimajcual xcuanguard li Dios. Chiyot'ek' ech'ol chejal ec'a'ux ut pabomak li Santil Evangelio, chan li Jesús.

Li Jesús quixbokeb cahib aj car re nak te'xic chirix

¹⁶ Ut nak coxnumek'li Jesús chire li palau cuan Galilea quixtau laj Simón rochben laj Andrés li ritz'in. Yoqueb chixq'uebal lix yoy sa'li palau xban nak a'aneb aj chapol car. ¹⁷ Li Jesús quixye reheb, —Chinetake. Macua' chic caribe tebanu. Eras eritz'in ban chic tesic' re te'pabank, chan reheb. ¹⁸ Ut sa' junpat que'xcanab lix yoy ut que'xtake li Jesús. ¹⁹ Junpat chic quibec li Jesús nak coxtauheb li ralal laj Zebedeo. Laj Jacobo ut laj Juan xc'aba'eb. Cuanqueb sa'lix jucub. Yoqueb chixxitinquil lix yoy. ²⁰ Li Jesús quixbokeb

ut que'xcanab laj Zebedeo lix yucua'eb sa' li jucub rochbeneb lix mos. Ut que'xtake li Jesús.

Li Jesús quirisi li maus aj musik'ej

²¹ Que'cuulac sa' li tenamit Capernaum. Sa' li hilobal cutan, qui-oc li Jesús sa' li cab li neque'xch'utub cui' ribeb laj judío. Ut qui-oc chixch'olobanquil xyalal chiruheb li tenamit. ²² Neque'sach xch'oleb li tenamit chirabinquil li c'a'ru naxye li Jesús xban nak quixc'ut xyalal chiruheb chi cuan xcuanylil ut moco jo' ta que'xbanu laj tz'ib li neque'c'utuc lix chak'rab li Dios. ²³ Sa' li cab ch'utch'uqueb cui' cuan jun li cuink cuan maus aj musik'ej riq'uin. ²⁴ Li cuink a'an quixjap re ut quixye: —¿C'a'ru tacuaj kiq'uin, at Jesús aj Nazaret? ¿Ma chikasachbal xatchal? Ninnau anihat laat. Laat lix Santil Alal li Dios, chan. ²⁵ Li Jesús quixk'us li maus aj musik'ej ut quixye re: —Matchokin. Elen riq'uin li cuink a'in, chan. ²⁶ Ut li maus aj musik'ej quixch'ikle chi cau li cuink. Quixjap re chi cau ut qui-el riq'uin li cuink. ²⁷ Quilaje'sach xch'ol chixjunileb li tenamit ut que'xye chiribileb rib: —¿C'a'ru xyalal a'in? ¿C'a'ru li ac' tijleb a'in? Li cuink a'in cuan xcuanylil sa' xbeneb li maus aj musik'ej ut li c'a'ru naxye, neque'xpab. —²⁸ Sa' junpat que'rabi resil sa' chixjunileb li tenamit xcuent Galilea c'a'ru quixbanu li Jesús.

Li Jesús quixq'uirtesi li rixakil laj Simón Pedro

²⁹ Nak que'el sa' li cab li neque'xch'utub cui' ribeb laj judío, li Jesús rochbeneb laj Jacobo ut laj Juan que'coeb sa' rochoch laj Simón ut laj Andrés. ³⁰ Nak que'cuulac, ticto que'xye re li Jesús nak nim xyajel lix na' li rixakil laj Simón. Yocyo ut yo xtk. ³¹ Tojo'nak li Jesús quijiloc riq'uin li yaj. Quixchap li ruk' ut quixcuaclesi. Sa' junpat quinume' líx tik ut qui-oc chi c'anjelac chiruheb. ³² Sa' li ecuu a'an nak ac x-oc li sak'e, que'c'ame' chak riq'uin li Jesús nabaleb li yaj. Ut que'c'ame' ajcui' chak li cuan maus aj musik'ej riq'uineb. ³³ Ut li q'quila tenamit que'chal ut que'xch'utub ribeb chire li cab cuan cui' li Jesús. ³⁴ Nabaleb li yaj que'q'uirtesic xban li Jesús. Jalan jalank xyajeleb li junjunk. Ut li Jesús quirisiheb nabal chi maus aj musik'ej riq'uineb. Li Jesús inc'a' quixcanabeb chi atinac li maus aj musik'ej xban nak eb a'an que'xnau nak a'an li Cristo.

Li Jesús quixye resil li colba-ib aran Galilea

³⁵ Cuulajak chic nak toj maji' na-iq'ue' li cutan, li Jesús quicuacli ut qui-el sa' li tenamit. Ut co xjunes chi tijoc sa' jun li na'ajej bar mac'a' cui' cristian. ³⁶ A'ut laj Simón jo'queb ajcui' li rochben que'coeb chixsic'bal li Jesús. ³⁷ Nak coxe'xtau que'xye re, —Nabal li tenamit yoqueb chi sic'oc acue, chanqueb. ³⁸ Aban li Jesús quichak'oc ut quixye reheb: —Tento nak toxic sa' eb li na'ajej li cuanqueb chi' nach' re nak toxinch'olob ajcui' chak resil li colba-ib reheb xban nak a'an aj e nak xinchal, chan. ³⁹ Jo'can nak li Jesús quicuulac sa' eb li na'ajej cuan xcuent Galilea. Yo chixjulticanquil li xyalal chiruheb sa' li cab li neque'xch'utub cui' ribeb laj judío, ut quirisi li maus aj musik'ej riq'uineb nabal chi cristian.

Li Jesús quixq'uirtesi jun li cuink saklep rix

⁴⁰ Sa' jun li cutan jun li cuink saklep rix quicuulac riq'uin li Jesús. Quixcui'ib rib chiru ut quixtz'ama xtenk'anquil. Quixye re: —Lajin ninnau nak laat naru tinaq'uirtesi, chan. ⁴¹ Li Jesús quiril xtok'obal ru li cuink, li saklep rix. Quixye' li ruk' ut quixch'e' li cuink. Quixye: —Nacuaj aq'uirtesinqil. Anakcuan tatinq'uirtesi, chan. ⁴² Ut sa' junpat qui-el li saklep chirix ut quiq'ura. Mac'a' chic xyajel quicana. ⁴³ Li Jesús quixchak'rabi chi us ut

quixye re: ⁴⁴ —Abi li tinye ącue. Ma ani aj e taserak'i li xac'ul. Tic tatxic riq'un laj tij re nak a'an taril nak xatq'uira. Ut tamayeba junak li xul jo' naxye sa' llix chak'rab laj Moisés. Chabanu a'an choc' retalil chiruheb li tenamit nak xatq'uira, chan. ⁴⁵ Co li cuink ut quilaixserak'i reheb chixjunil chanru nak quiq'uira. Riq'un a'an inc'a' chic naxq'ue rib na-oc li Jesúsa' eb li tenamit xban nak li q'uila tenamit yoqueb chixsic'bal li Jesúsa. Quicana ban sa' jun li na'ajej bar māc'a' cui' nabal li cristian ut aran quila'e'cuulac riq'un li neque'chal chak yalak bar.

2

Li Jesúsa quixq'uirtesi jun li cuink yaj ut sic

¹ Nak ac xnume' cuib oxib cutan chic, li Jesúsa co cui'chic sa' li tenamit Capernaum. Ut que'rabi resil nak li Jesúsa cuan sa' li tenamit sa' jun li cab bar nahilan cui'. ² Sa' junpat que'xch'utub rib li cristian sa' li cab cuan cui' li Jesúsa. Ut xban xq'uijal li tenamit, ma ani chic naru na-oc chire li cab xban nak māc'a' chic li na'ajej. Ut li Jesúsa yo chixch'olobanquil li xyalal chiruheb. ³ Nak yo chi atinac li Jesúsa, cahibeb li cuink que'xc'am chak chi pakpo jun li cuink sic. Inc'a' nabec. ⁴ Abanan xban li q'uila tenamit, inc'a' naru te'rocsi li yaj cuan cui' li Jesúsa. Jo'can nak que'take' sa' xbén li cab ut que'xte ca'ch'in xbén li cab ut aran que'xcubsi li yaj yocyo chiru lix cuaribal ut coxcanac chiru li Jesúsa. ⁵ Li Jesúsa quixq'ueetal nak eb li cuink a'an que'xpab nak naru tixq'uirtesi li yaj. Jo'can nak quixye re li yaj: —At cuink, cuybil sachbil chic la māc, chan. ⁶ Ut chunchuqueb ajcui' aran laj tz'ib li neque'c'utuc xchak'rab li Dios. Yoqueb chi c'oxlac. ⁷ Ut que'xye sa' xch'oleb: —¿C'a'ut nak naqtinac chi jo'can li cuink a'in? ¿Ma a'in ta bi' li Dios? Ma ani naru nacuyuc nasachoc māc. Ca'aj cui' li Dios naru nacuyuc nasachoc māc, chanqueb. ⁸ Ticto quixnau li Jesúsa c'a'ru yoqueb chixc'oxlanquil. Quixye reheb: —¿C'a'ut nak nequec'oxla chi jo'can? ⁹ ¿Bar cuan li us tinye re li yaj re nak tac'utunk cheru nak cuan incuanquil? ¿Ma tinye re, "Cuybil sachbil la māc", malaj ut tinye re, "Cuaclin, ayu, ut c'am la cuaribal"? ¹⁰ Lain tinc'ut cheru nak lain li Cristo li C'ajolbej, ut cuan incuanquil sa' ruchich'och' chixcuybal xsachbal li māc, chan reheb. ¹¹ Tojo'nak li Jesúsa quixye re li cuink: —At cuink, lain tinye ącue, cuaclin, c'am la cuaribal ut ayu sa' la cuochoch, chan. ¹² Ut li cuink sic nak quicuan ac tacuaclik. Quixchap lix cuaribal ut ac taelk chiruheb chixjunil li tenamit. Ut riq'un a'in in chixjunileb que'sach xch'ol. Que'xq'ue xlok'al li Dios ut que'xye: —Ma jun cuákilom a'in, chanqueb.

Li Jesúsa quixbok laj Leví re nak taxic chirix

¹³ Ut nak ac xq'uirtesi li cuink sic, li Jesúsa co chire li palau Galilea. Nabaleb li tenamit que'cuulac riq'un ut li Jesúsa qui-oc chixtzolbaleb. ¹⁴ Nak yo chi numec' aran, li Jesúsa quiril laj Leví li ralal laj Alfeo. Laj Leví c'ojo'c' sa' xna'aj ut yo chi titz'oc toj. Li Jesúsa quixye re: —Chinatake. —Tojo'nak laj Leví quicuacli ut quixtaké li Jesúsa. ¹⁵ Ut chirix a'an li Jesúsa co sa' li rochoch laj Leví chi cua'ac. Nabaleb laj titz'ol toj ut nabaleb ajcui' laj māc cuanqueb sa' li mex bar cuan cui' li Jesúsa rochbeneb lix tzolom. Nabaleb xban nak nabal que'taken re li Jesúsa. ¹⁶ Ut eb laj tz'ib ut eb laj fariseo que'r'il nak cuan li Jesúsa sa' mex rochbeneb laj titz'ol toj jo'queb ajcui' laj māc. Ut que'xye reheb lix tzolom li Jesúsa: —¿C'a'ut nak laj tzolol ere nacua'ac sa' xyankeb laj titz'ol toj ut sa' xyankeb laj māc? chanqueb. ¹⁷ Li Jesúsa quirabi li que'xpatz' ut quixye reheb: —Li cauheb māc'a' na-oc cui' aj banonel reheb. Aban li

yajeb, a'aneb li neque'raj banec'. Jo'can nak lajin inc'a' xinchal chixsic'baleb li tiqueb xch'ol. Xinchal ban chixsic'baleb laj mac, chan li Jesús.

Li Jesús quixch'olob xyalal li ayunic

¹⁸ Sa' eb li cutan a'an eb lix tzolom laj Juan laj Cubsihom Ha' ut eb laj fariseo neque'xbanu x-ayun. Li tenamit que'cuulac riq'uin li Jesús ut que'xye re: —Eb lix tzolom laj Juan neque'xbanu x-ayun jo'queb ajcui' laj fariseo. ¿C'a'ut nak inc'a' neque'xbanu x-ayun eb laj tzolom? chanqueb re. ¹⁹ Tojo'nak quichak'oc li Jesús ut quixye reheb, —Lajin jo'jun belomej nak cuanquin. ¿Ma naru te'ayunik li neque'xic riq'uin sumlac nak cuan li belomej riq'uineb? Nak toj cuan li belomej riq'uineb, inc'a' naru neque'xbanu x-ayun. ²⁰ Ut jo'can ajcui' lin tzolom. Tacuulak xk'ehil nak tin-isik sa' xyankeb. Toj sa' li cutan a'an te'xbanu x-ayun, chan reheb.

Lijaljoquil ru qatin chirix li ac'yu'am

²¹ Ma' ani naxxiti junak k'el t'icr riq'uin ac' t'icr. Cui ut naxxiti riq'uin ac' t'icr, nak tixpuch' tac'osk li ac' t'icr ut tixnimobresi xpejelal li k'el t'icr. ²² Ut ma' ani naq'uehoc ac' vino sa' li k'el bols tz'um. Cui tixq'ue li ac' vino sa' li k'el bols tz'um, tapuq'uek' li k'el tz'um, tahoyek' li vino, ut taosok' ajcui' li bols tz'um. Li ac' vino sa' li ac' bols tz'um naq'uemana, chan li Jesús.

Li Jesús quixch'olob xyalal chirix li hilobal cutan

²³ Sa' jun li hilobal cutan li Jesús rochbeneb lix tzolom yoqueb chi numec' bar cui' aubil li acuimk trigo xc'aba'. Eb lix tzolom que'xch'ot ru li trigo nak yoqueb chi numec' xban nak te'tz'ocak. ²⁴ Tojo'nak eb laj fariseo que'xye re li Jesús: —Il c'a'ru yoqueb laj tzolom. ¿C'a'ut nak neque'xbanu li c'anjal moco uxc ta naraj sa' li hilobal cutan? chanqueb. ²⁵ Li Jesús quichak'oc ut quixye reheb: —¿Ma inc'a' ta bi' xeril sa' li Santil Hu c'a'ru quixbanu laj David nak a'an ut li rochben te'tz'ocak? ²⁶ Nak quicuan laj Abiatar chok' xyucua'ileb aj tij, laj David qui-oc sa' li rochoch li Dios. Cuan aran li mayejanbil caxlan cua. Juneseb laj tij naru neque'xcua' li caxlan cua a'an. Abanan laj David quixcua' li caxlan cua li quiq'uehe' re xban laj tij ut quixq'ue ajcui' reheb li rochben xban nak te'tz'ocak, chan. ²⁷ Ut quixye ajcui' reheb: —A' li cuink ut li iixk a'aneb li k'axal lok' chiru li hilobal cutan. Toj mac'a' li hilobal cutan nak ac que'yo'obtesjic chak ut li hilobal cutan quiq'uehe' re xtenk'anquileb li cuink ut li iixk. ²⁸ Jo'can nak lajin li C'ajolbej cuan incuanquil chixyebal c'a'ru tauxmank sa' li hilobal cutan, chan li Jesús reheb.

3

Li Jesús quixq'uirtesi li cuink sic jun li ruk'

¹ Ut li Jesús co cui'chic sa'li cab li neque'xch'utub cui' ribeb laj judío. Ut aran cuan jun li cuink sic jun li ruk'. ² Eb laj fariseo yoqueb chixsic'bal chanru nak te'xjít li Jesús. Jo'can nak yoqueb chiribal ma tixq'uirtesi tana li cuink a'in sa'li hilobal cutan. ³ Li Jesús quixye re li cuink li sic ruk': —Numen chak arin chi ubej, chan re. ⁴ Tojo'nak li Jesús quixpatz' reheb laj fariseo: —¿C'a'ru us xbanunquil sa'li hilobal cutan? ¿Ma naru xbanunquil li us malaj ut li inc'a' us? ¿Ma us xcolbal xyu'am junak malaj ut xsachbal? chan cui'chic reheb. Ut eb a'an mem que'cana. Inc'a' chic que'xtau c'a'ru que'xye. ⁵ Quijosk'o'li Jesús sa' xbeneb, abanan quiril cui'chic xtok'obal ruheb xban nak inc'a' que'raj xtaubal xyalal. Ut li Jesús quixye re li cuink li sic ruk': —Ye' la cuuk', chan. Ut li cuink quixye'li ruk' ut sa' junpat quiq'uiria. ⁶ Tojo'nak eb laj fariseo

que'el riq'uin li Jesús. Que'coeb riq'uineb li neque'oquen chirix laj Herodes. Ut que'oc xc'ubanquil chanru nak te'xcamsi li Jesús.

Li q'uila tenamit que'coeb chire li palau chixsic'bal li Jesús

⁷ Ut chirix a'an li Jesús co chire li palau Galilea rochbeneb lix tzolom. Ut li q'uila tenamit que'xtake li Jesús. Que'chal chak Galilea jo' ajcui' Judea. ⁸ Nak que'rabi resil li xninkal usilal yo chixbanunquil li Jesús, quilaje'chal chiribal. Cuan li que'chal chak Jerusalén ut Idumea. Ut cuan ajcui' que'chal chak jun pac'al li nima' Jordán. Ut que'chal ajcui' chak Tiro ut Sidón chiribal li Jesús. ⁹ Jo'can nak li Jesús quixye reheb lix tzolom nak te'xcauresi junak li jucub. Ac cuank aran re taquank chi sa' re nak inc'a' tānat'ek' xbaneb li q'uila tenamit. ¹⁰ Xban nak nabal ac xq'uirtesi, jo'can nak li q'uila tenamit yoqueb chixtiquisinqul ribeb. Te'raj te'xch'e' li Jesús re nak te'q'uirak. ¹¹ Li cuan māus aj musik'ej riq'uineb, nak que'ril li Jesús, que'xcuik'ib rib chiru ut que'xjap re chixyebal: —Lāat li Lalal li Dios, chanqueb re. ¹² Ut li Jesús quixk'useb li māus aj musik'ej ut quixye reheb nak inc'a' te'xye resil nak a'an Lalal li Dios.

Li Jesús quixsiq'ueb ru lix tzolom cablaju

¹³ Tojo'nak li Jesús quitake' chiru tzul. Quixbokeb li ani quiraj ut eb a'an coeb chirix. ¹⁴ Ut li Jesús quixsiq'ueb ru li cablaju chi cuink re nak te'cuank riq'uin ut re nak tixtaklaheb chixjulticanquil li ratin li Dios. ¹⁵ Ut quixq'ueheb xcuانquil chixq'uirtesinquleb li yaj ut chirisinqul li māus aj musik'ej. ¹⁶ A'aneb a'in li cablaju li quixxakabeb li Jesús: laj Simón li quixq'ue aj Pedro chok' xc'aba', ¹⁷ ut laj Jacobo ut laj Juan. Lix yucua'eb a'an, a'an laj Zebedeo. Aj Boanerges quiq'uehe' chok' xc'aba'eb xban li Jesús. Li c'aba'ej a'an naraj naxye "Ralaleb li Çak". ¹⁸ Quixxakabeb ajcui' laj Andrés, laj Felipe, laj Bartolomé, laj Mateo, laj Tomás, laj Jacobo li ralal laj Alfeo, laj Tadeo ut laj Simón. A'an xcomoneb laj Canaán. ¹⁹ Ut quixsic' ajcui' ru laj Judas Iscariote li quik'axtesin re li Jesús sa' ruk'eb li xic' neque'iloc re.

Mac'a' chic xcuybal xmāc li namajecuan re li Santil Musik'ej

²⁰ Ut nak ac xsiq'ueb ru lix tzolom li Jesús co sa' jun li cab rochbeneb lix tzolom. Ut que'tubla cui'chic li q'uila tenamit; riq'uin a'an moco naxq'ue ta chic rib nacua'ac li Jesús chi moco eb lix tzolom. ²¹ Ut nak que'rabi resil li c'a'ru yo chixbanunquil li Jesús, eb li rech'alal que'chal chixc'ambal. Que'xye nak moco tuktu ta chic xna'leb li Jesús. ²² Ut eb laj tz'ib li que'chal chak Jerusalén yoqueb chixyebal: —Laj Tza cuan riq'uin li Jesús ut sa' xc'aba' laj Tza narisiheb li māus aj musik'ej, chanqueb. ²³ Ut li Jesús quixbokeb ut quixpatz' reheb: —¿Chanru nak laj Tza tq̄risi li rech aj tzahil?— Ut quixye ajcui' li jaljoquil ru atin a'in: ²⁴ —Cui cuan jun tepak chi tenamit xic' te'ril rib chi ribileb rib, li jun tep chi tenamit a'an tixsach xcuانquil xjunes rib. ²⁵ Ut cui cuan ta jun cabalak xic' te'ril rib chi ribileb rib sa' rochocheb, li jun cabal a'an te'xsach xcuانquil lix jun cablal. ²⁶ Jo'can ajcui' laj Tza cui te'xpleti rib chi ribileb rib, a'an tixsach xcuانquil xjunes rib. ²⁷ Mā ani naru taoc sa' rochoch junak cuink cau rib chixmak'bal li c'a'ru cuan re, cui inc'a' ta xben cua tixbac' li cuink cau rib, tojo'nak tāoc chixc'ambal li c'a'ru cuan re. ²⁸ Relic chi ya'l ninye ere nak taquymānk tāsachmānk lix maqueb li cristian ut taquymānk ajcui' li majecuānc neque'xbānu. ²⁹ Abanan li tamajecuānk re li Santil Musik'ej, inc'a' tacuyek' tāsachek' xmāc. Cuank ban sa' xben chi junelic lix tojbal rix li mac a'an.— ³⁰ Li Jesús quixye a'in xban nak yoqueb chixyebal nak cuan māus aj musik'ej riq'uin.

Lix na' ut eb li ritz'in li Jesús

³¹ Quicuulac aran lix na' li Jesús ut que'cuulac ajcui' li ritz'in. Que'cana chirix cab ut que'xtakla xbokbal li Jesús. ³² Ut nabaleb li tenamit c'ojc'oqqueb chixc'atk li Jesús. Que'xye re: —Kacua', xc'ulun la na' rochbeneb la cuitz'in. Cuangueb chirix cab. Yoqueb chasic'bal, chanqueb. ³³ Li Jesús quichak'oc ut quixye reheb: —¿Ani ta bi' lin na'? Ut, ¿ani ta bi' li cuitz'in nak nequec'oxla laex?— ³⁴ Quirileb li c'ojc'oqqueb chixc'atk ut quixye: —A'ineb lin na' ut a'ineb li cuitz'in. ³⁵ Xban nak li ani nabanun re li naraj li Dios, a'an li cuitz'in, a'an li cuanab, ut a'an lin na', chan.

4

Lijaljoquil ru atin chirix laj acuinel

¹ Ut qui-oc cui'chic li Jesús chixtzolbaleb li tenamit chire li palau Galilea. K'axal nabal que'xch'utub rib riq'unin chirabinquil. Xban xq'uialeb li tenamit, li Jesús qui-oc sa' jun li jucub cuan sa' li palau ut quic'ojla chi sa'. Ut chixjunileb li tenamit que'cana chire li palau. ² Ut nabal c'a'ak re ru quixtzoleb cui' riq'unin jaljoquil ru atin. Nak yo chixch'olobanquil li xyalal chiruheb, quixye li serak' a'in reheb: ³ —Abihomak li tanye. Jun aj acuinel co' chi ayc. ⁴ Ut nak yo chixhirbal li iyaj, cuan quinak chire be. Que'chal li xul li neque'xic'an ut que'xcua' li iyaj. ⁵ Ut cuan ajcui' li iyaj quinak sa' li pec ru bar māc'a' cui' mas li ch'och'. Sa' junpat quimok, abanan inc'a' quixchap xxe' xban nak jay li ch'och' sa' xben li pec. ⁶ Nak quichal li sak'e quichakic li acuimk xban nak inc'a' cham cuan li xe': ⁷ Ut cuan cui'chic li iyaj coxnak sa' xyank li q'ui. Ut nak quichamo' li q'ui sa' xben, quixnat' li acuimk ut inc'a' quiuchin. ⁸ Ut cuan cui'chic li iyaj coxnak sa' li chabil ch'och'. Quimok ut quiq'ui ut quiuchin chi us. Cuan quixq'ue lajetk xca'c'al (30) ru. Cuan li quixq'ue oxtakc'al (60) ru ut cuan cui'chic quixq'ue o'takc'al (100) ru li junjunk. ⁹ Tojo'nak quixye li Jesús reheb: —Li ani na-abin, chixq'uehak retal li c'a'ru ninye, chan.

C'a'ut nak cuan li jaljoquil ru atin

¹⁰ Ut nak que'el lix q'ui al li tenamit, li Jesús quicana rochbeneb lix tzolom cablaju. Eb a'an que'xpatz' re ut que'xye: —¿C'a'ru xyalal li jaljoquil ru atin a'in? chanqueb. ¹¹ Ut li Jesús quixye reheb: —Laex q'uebil ere xnaubal xyalal li mukmuquil na'leb chirix lix nimajcual xcuanylal li Dios. A'ut li jun ch'ol chic li inc'a' neque'pában, riq'unin jaljoquil ru atin tayemank reheb. ¹² Usta yoqueb chi iloc, abanan inc'a' te'xq'ue retal. Usta yoqueb chi abinc, abanan inc'a' te'xtau xyalal. Tauxmank chi jo'can re nak inc'a' te'xyot' xch'oleb ut inc'a' te'xjal xc'a'uxeb ut inc'a' tacuyek' xmaqueb.—

Li Jesús quixch'olob xyalal chirix laj acuinel

¹³ Tojo'nak li Jesús quixpatz' reheb: —¿Ma inc'a' nequetau ru li jaljoquil ru atin a'in? Cui inc'a' nequetau xyalal a'in, ¿chanru nak tetau xyalal chixjunil li jaljoquil ru atin chi jo'canan? ¹⁴ A'an a'in lix yáal. Laj acuinel a'an jo' jun laj yehol ratin li Dios. ¹⁵ Ut li iyaj li quinak chire be, a'an chanchaneb li neque'abin re li ratin li Dios. Nak ac xe'rabi, sa' junpat nachal laj Tza chirisinquil li atin ut sa' junpat nasach sa' xch'oleb. ¹⁶ Ut li iyaj li quinak sa' li pec ru, a'an chanchaneb li neque'abin re li ratin li Dios ut sa' junpat neque'xpab chi saheb sa' xch'ol. ¹⁷ Abanan inc'a' nacana sa' xch'oleb. Nak nachal junak raynal, malaj ch'a'ajquinal sa' xbeneb xbaneb lix pabal, inc'a' neque'xcuy xnumsinquil. Sa' junpat neque'ch'inan xch'ol. ¹⁸ Ut li iyaj li quinak sa' xyank li q'ui chanchaneb li neque'abin re li ratin li Dios.

19 Abanan ca'a'j cui' li c'a'ak re ru cuan sa' ruchich'och' neque'xc'oxla, jo' li biomal ut xrabal ru li c'a'ak chic re ru. Ut a'an li naramoc lix yalal chiruheb. Mac'a' na-oc cui' li ratin li Dios rebeb. **20** Ut li iyaj li quit'ane' sa' chabil ch'och', a'an chanchaneb lí neque'rabi ut neque'xpab chi tz'akal li ratin li Dios. Neque'q'ui chi us sa' lix pabaleb, jo' li acuimk li naruchin lajetk xca'takc'al (30) ut li naxq'ue oxatakc'al (60) ut li naxq'ue o'takc'al (100) ru lí junjunk.—

Lijaljoquil ru atin chirix li candil

21 Ut li Jesús quixye ajcui' rebeb: —¿Ma naq'ueman ta bi' junak candil rubel junak chacach malaj ut rubel ch'at? Inc'a' naru. Takec' ban naq'ueman sa' xna'aj re nak tixcutanobresi sa' li cab. **22** Jo'can ajcui' li tijleb li ninch'olob xyalal cheru. Mac'a' taçanak chi mukmu chi inc'a' ta taç'utbesik mokon. Ut li inc'a' natauman ru anakcuan, tataumank ru mokon. **23** Li ani naraj rabinquil, chixq'uehak retal li ninye. **24** Quixye ajcui' rebeb: —Cheq'uehak retal li nequerabi ut teq'ue ech'ol chixbanunquil li nequerabi xban nak li ani naxbanu lí c'a'ru quixtzol cuiq'uin, mas cui'chic lix na'leb taq'uehek' re xban li Dios re nak tixtau ru li cuatin. **25** Li ani tixq'ue xch'ol chixtzolbal li us, k'axal cui'chic li usilal tixc'ul. Li ani inc'a' tixq'ue xch'ol chixtzolbal li us, tásachk sa' xch'ol li jo' q'ual naxnau.

Lijaljoquil ru qtin chirix li iyaj naq'ui

26 Ut li Jesús quixye cui'chic rebeb: —Lix nimajcual cuanquilal li Dios, chanchan junak aj acuinel. Narau li iyaj sa' ch'och'. **27** Li cuink nacuar, nacuacli ut eb li cutan neque'ume'. Ut li iyaj yal xjunes namok chak ut naq'ui ut li cuink inc'a' naxnau chanru nak namok ut naq'ui li acuimk. **28** Li ch'och' naq'uiresin re li acuimk. Naq'ui ut naninkan ut chirix a'an na-oc chi atz'umac ut naxq'ue li ru. **29** Ut nak nacheco' li ru nasic'man sa' junpat xban nak ac xcuulac xk'ehil xxocbal li ru.

Lijaljoquil ru qtin chirix li riyajil li mostaza

30 —¿C'a'ru tinjuntak'eta cui' lix nimajcual cuanquil li Dios? chan li Jesús. —Ut ¿c'a'ru chi jaljoquil ru atin tinye, re xch'olobanquill xyalal lix nimajcual cuanquilal li Dios? **31** Lix nimajcual cuanquilal li Dios, a'an chanchan riyajil li njinki mostaza. Li riyajil li mostaza coc' chiru chixjunil li iyaj cuan sa' ruchich'och'. **32** Nak ac x-auman namok ut naq'ui. Ut njink chi us nacuulac lix che'el. Naxk'ax xteram chixjunil li acuimk. Neque'ninkan li ruk' ut eb laj xic'anel xul neque'xyib lix soc sa' eb li ruk'— **33** Ut li Jesús quixch'olob xyalal chiruheb li tenamit riq'uin nabal chic chi jaljoquil ru atin a'yal bar na cuan te'xtau ru. **34** Ut mac'a' c'a'ru quixye li Jesús rebeb li tenamit chi maqua' ta sa' jaljoquil ru atin. Abanan nak ac xjuneseb chic lix tzolom, quixch'olob li xyalal chiruheb.

Li Jesús quixk'us li ik' ut li palau

35 Nak qui-ecuu sa' li cutan a'an li Jesús quixye rebeb lix tzolom: —K'axonko jun pac'al li palau, chan rebeb. **36** Ut li Jesús quixchak'rabiheb li q'uila tenamit ut quic'ame' sa' li jucub cuan cui'. Ut cuanqueb ajcui' coc' jucub que'coeb chirix. **37** Ut nak ac cuanqueb sa' xyi li palau quichal jun li nimla ik'. Naxcut lix cau ok li ha' sa' li jucub ut qui-oc chi nujac li ha' chi sa' li jucub. **38** Li Jesús cuan chi ixbej sa' li jucub ut yo' chi cuarc sa' xben jun lix soc xjolom. Eb lix tzolom que'rajsi ut que'xye re: —At tzolone, ajsi acuu. ¿Ma inc'a' nacacuil nak osoc' ke? chanqueb. **39** Quicuacli li Jesús ut quixk'us li ik' ut quixye re li palau: —Matchokin. Canab ec'anc, chan. Ut sa' junpat quich'ana li ik' ut quitukla ru li ha'. **40** Ut li Jesús quixye rebeb lix tzolom: —¿C'a'ut nak c'ajo' nak nequexxucuac? ¿Ma inc'a' nequepab nak

li Dios t̄atenk'ānk ere? chan. ⁴¹ Ut c'ajo' nak que'sach xch'ol lix tzolom ut que'xye chi rilbileb rib: —¿Chanru nak cuan xcuanguil li cuink a'in nak naxk'us li ik' ut li palau, ut neque'abin chiru? chanqueb.

5

Li Jesú斯 quirisi li maus aj musik'ej riq'unin li cuink aj Gadara

¹ Li Jesú斯 ut eb lix tzolom que'cuulac aran jun pac'al li palau sa' xch'och'eb laj Gadara. ² Ut nak qui-el li Jesú斯 sa' li jucub, sa' junpat quichal jun li cuink chi c'uluc re. Quichal chak sa' li na'ajej bar neque'muke' cui' li camenak. Li cuink a'an cuan maus aj musik'ej riq'unin. ³ Junes sa' li na'ajej bar neque'muke' cui' li camenak nacuan. Ma aní naru nabac'oc re chi moco riq'unin cadena naru neque'xbac'. ⁴ Nabal sut neque'xyal xbac'bal li rok ruk' riq'unin cadena. Abanan sa' junpat naxt'upi li cadena. Ut ma aní naru natulyanobresin re li cuink a'an. ⁵ Chi k'ek chi cutan naxbeni rib sa' xbeneb li tzul ut sa' xyankeb li muklebal camenak. Junelic yo chixjapbal re ut naxyoq'ui rib riq'unin k'esnal pec. ⁶ Toj najt ajcui' cuan chak li Jesú斯 nak quiile' xban li cuink. Li cuink co sa' anil ut coxcuik'ib rib chiru li Jesú斯. ⁷ Quixjap re chixyebal: —¿C'a'ru t̄acuaj cuiq'unin, at Jesú斯? Laat Ralalat li nimajcual Dios. Sa' xc'aba' li Kacua' Dios, nintz'ama chacuu nák minarahobtesi, chan re. ⁸ Quixye chi jo'can xban nak ac yo li Jesú斯 chixyebal re li maus aj musik'ej: —Elen riq'unin li cuink a'in, at maus aj musik'ej. —⁹ Tojo'nak li Jesú斯 quixpatz're: —¿Ani ac'aba'? —Cuakib mil (6,000) inc'aba' xban nak nabalo, chan nak quichak'oc. ¹⁰ Ut nabal sut quixtz'ama chiru li Jesú斯 nak inc'a' tarisiheb li maus aj musik'ej chi junaj cuása' li na'ajej a'an. ¹¹ Aran cuankeb jun tub li ak yoqueb chi ichajibc chiru li tzul. ¹² Eb li maus aj musik'ej que'xtz'ama chiru li Jesú斯 nak tixtaklaheb riq'uineb li ak. —Choqatakla riq'uineb li ak. Choacanab chi oc riq'uineb, chanqueb. ¹³ Ut li Jesú斯 quixcanabeb chi xic. Que'el li maus aj musik'ej riq'unin li cuink. Coxe'ocak riq'uineb li ak. Ut li ak que'oc chi alinac ut que'xrum chak rib sa' xben ul ut toj sa' li palau coxe'nak. Cuanqueb na cuib mil chi ak que'oso' sa' li palau. ¹⁴ Eb laj ilol ak que'xucuac ut que'elelic ut coxe'xye resil sa' li tenamit jo' ajcui' sa' li c'alebal. Ut nabaleb li tenamit que'coeb chirilbal li c'a'ru quic'ulman. ¹⁵ Que'cuulac cuan cui' li Jesú斯 ut que'r'il li cuink li qui-isic nabal chi maus aj musik'ej riq'unin. Cojc'o aran nak coxe'xtau. Tiktó chic ut tuktú chic xjolom. Riq'unin rilbal a'an que'oc xxiuheb li tenamit. ¹⁶ Ut eb li que'illoc re, que'xserak'i reheb li tenamit chanru qui-ux re li cuink li quicuan maus aj musik'ej riq'unin, jo' ajcui' li c'a'ru que'xc'ul li ak. ¹⁷ Ut que'xtz'ama chiru li Jesú斯 nak taelk sa' lix tenamiteb. ¹⁸ Ut nak qui-oc cui'chic li Jesú斯 sa' li jucub, li cuink li qui-isic maus aj musik'ej riq'unin quixtz'ama chiru li Jesú斯 nak taxic chirix. ¹⁹ A'ut li Jesú斯 inc'a' quiraj nak taxic chirix. Quixye re li cuink: —Ayu sa' la cuochoch ut t̄aserak'i reheb la cuech'alal li usilal xinbanu ácue. Taye reheb chanru nak xcuuxtana áceu, chan re li cuink. ²⁰ Jo'can nak co li cuink sa' eb li tenamit xcuent Decápolis. Qui-oc chixyebal reheb chixjunil li njnki usilal quixbanu li Jesú斯 re. Ut chixjunileb li tenamit quilaje'sach xch'ol chirabinquil li c'a'ru quixye.

Li Jesú斯 quixq'uirtesi lix rabin laj Jairo jo' ajcui' li ixd li quich'e'oc re li rak'

²¹ Qui-oc cui'chic li Jesú斯 sa' li jucub ut quisuk'i cui'chic jun pac'al li palau rochbeneb lix tzolom. Ma ca'ch'in li tenamit coxe'xch'utub rib riq'unin chire li palau. ²² Ut quichal jun li cuink aj Jairo xc'aba'. A'an xcomoneb li neque'taklan sa' li cab li neque'xch'utub cui' ribeb laj judío. Nak quiril li

Jesús, quixcuik'ib rib chiru. ²³ Ut chi anchal xch'ol quixtz'ama chiru li Jesús ut quixye re: —At Kacua', k'axal nim xyajel lin ch'ina rabin. Camc re. Banu usilal, taxtic sa' cuochoch. Toxaq'ue la cuuk' sa' xben re nak taq'uirk ut inc'a' tacamk, chan re li Jesús. ²⁴ Ut li Jesús co chirix laj Jairo ut nabaleb li tenamit que'taken re. Xban xq'ual li tenamit yoqueb chixtiquisinquil ribeb. ²⁵ Sa' xyankeb cuan jun li iix cablaju chihab xticlajic xyajel. Junelic yo lix yajel li iixk a'an ut inc'a' chic natz'ap lix quiq'uel. ²⁶ Quixq'ue rib chi banec' riq'un nabaleb aj banonel ut nabal li raynal quixc'ul. Abanan ma jok'e que' xban. Ca'aj cui' quixsach chixjunil li c'a'ru cuan re, re xtojbaleb. Ut mac'a' qui-oc cui'. Nimanc ban chic naxbanu lix yajel. ²⁷ Quirabi resil nak li Jesús yo chixq'urtesinquileb li yaj. Riq'un a'an qui-oc chixtakenquil li Jesús rochbeneb li q'uila tenamit. Ut quijiloc chixc'atk re nak tixch'e' li rak'. ²⁸ —Usta ca'aj cui' li rak' tinch'e', riq'un a'an ting'uirak, chan li iixk sa' xch'ol. ²⁹ Ut nak quixche' li rak' sa' junpat quiq'uira, ut quitz'ap lix quiq'uel. Ut li iixk quirec'a nak mac'a' chic xyajel. ³⁰ Ut li Jesús quixnau nak cuan li quiq'uira xban lix cuanquil. Quixsuk'isi rib sa' xyankeb li q'uila tenamit ut quixpatz' rebeb: —¿Ani xch'e'oc re li cuak? chan rebeb. ³¹ Eb lix tzolom que'chak'oc ut que'xye re: —At Kacua', laat nacacuil chanru nak yoqueb chixtiquisinquil ribeb li q'uila tenamit chäuix. ¿C'a'ut nak nacapatz' aní xch'e'oc re la cuak? chanqueb. ³² Ut li Jesús quixsuk'isi rib chiribal aní xch'e'oc re li rak'. ³³ Li iixk naxnau nak ac xq'uira. Nasicsot xban xxii. Colxcuik'ib rib chiru li Jesús ut quixye li xyalal re. ³⁴ Li Jesús quixye re: —Kana', xban nak xapab nak cuan incuanquil chaq'urtesinquil, jo'can nak xatq'uira. Ayu chi sa sa' ach'ol ut chi mac'a' chic araylal, chan. ³⁵ Nak toj yo chi atinac li Jesús, que'chal lix comoneb laj Jairo sa' rochoch chixyebal re, —Xcam la rabin. ¿C'a' chic ru aj e nak tach'i ch'i laj tzoloneb? chanqueb. ³⁶ Nak quirabi li Jesús li c'a'ru yoqueb chixyebal re laj Jairo, quixye re: —Matc'oxlac. Ca'aj cui' tapab nak taq'uirk la rabin, chan. ³⁷ Ut inc'a' quiraj nak li tenamit te'xic chirix. Ca'aj cui' laj Pedro ut laj Jacobo ut laj Juan, li ritz'in laj Jacobo, quixc'ameb chirix. ³⁸ Nak que'cuulac sa' rochoch laj Jairo, li Jesús quiril nak yoqueb chixpokokinquil ribeb ut japiroqueb re chi yabac. ³⁹ Qui-oc sa' cab riq'uineb ut quixye rebeb: —¿C'a'ut nak yoquex chixpokokinquil erib? ¿C'a'ut nak yoquex chi yabac? Li xka'al moco xcam ta. Cuarc yo, chan li Jesús rebeb. ⁴⁰ Eb a'an que'oc chixse'enquil li c'a'ru quixye, ut li Jesús quirisiheb chirix cab. Ca'aj cui' lix na' ut lix yucua' ut eb li oxib chi xtzolom que'oc rochben li Jesús bar cuan cui' li camenak. ⁴¹ Quixchap chi ruk' li camenak ut quixye re sa' li ratinobal: —Talita, cumi, chan. Li qatin a'an naraj naxye, "At ch'ina xka'al, lajin tinyehok acue cuaclin". ⁴² Sa' junpat quicuacli li xka'al ut quibec. Li xka'al a'an cablaju chihab cuan re. Ut eb li cuanqueb aran quilaje'sach xch'ol chiribal li c'a'ru quixbanu li Jesús. ⁴³ A'ut li Jesús quixchak'rabiheb chi us nak ma aní aj e te'xye li c'a'ru quic'ulman. Ut quixye rebeb nak te'xq'ue chi cua'ac li xka'al.

6

Li Jesús quitz'ektanac aran Nazaret

¹ Li Jesús qui-el sa' li na'ajej a'an ut co sa' lix tenamit rochbeneb lix tzolom. ² Sa' li hilobal cutan cq sa' li cab li neque'xch'utub cui' ribeb laj judío. Qui-oc chixtzolbaleb li tenamit. Nabal que'abin re ut quilaje'sach xch'ol chirabinquil ut que'xye chi ribileb rib: —¿Bar xtzol lix na'leb? ¿C'a'ru chi na'lebil li naxnau? ¿Chanru nak naxbanu li milagro? chanqueb. ³ —¿Ma macua' ta bi' a'in laj pech? Ut ¿macua' ta bi' lix María lix na'? ¿Ma macua' ta

bi' laj Jacobo li ritz'in ut laj José, laj Judas ut laj Simón? ¿Ma maçua' ta bi' a'in eb li ritz'in li cuanqueb sa' kayank? chanqueb. Ut que'chal xjosk'il sa' xben.
⁴ Ut li Jesús quixye: —Junak profeta naq'uehe' xlok'al yalak bar, abanan sa' lix tenamit ut sa' xyankeb li réch'alal ut sa' rochoch inc'a' naq'uehe' xlok'al.—
⁵ Ut inc'a' quiru quixbanu li milagro sa' lix tenamit xban nak inc'a' que'xpab nak cuan xcuanquil. Cuib oxib ajcui' li yaj quixq'ue li ruk' sa' xbeneb re nak te'q'uirak. ⁶ Ut li Jesús quisach xch'ol chirilbaleb nak inc'a' neque'xpab nak cuan xcuanquil. Ut nak qui-el aran, q̄ sa' chixjunil li c'alebal chixtzolbaleb li tenamit.

Li Jesús quixtaklaheb lix tzolom chixyebal resil li colba-ib

⁷ Tojo'nak quixbokeb lix tzolom cablaju ut quixtaklaheb chi ca'cabil ut quixq'ueheb xcuanquil chirisinguil li māus aj musik'ej. ⁸ Ut quixye reheb: —Mac'a' c'a'ru tec'am nak texxic, ca'aj cui' le xuk'. Inc'a' tec'am etzacaemk, chi moco junak bols, chi moco tumin tec'am. ⁹ Ca'aj cui' le xab cuan cherok tec'am ut ca'aj cui' le rak' cuan cherix tec'am. ¹⁰ Ut quixye ajcui' reheb: —Nak texcuulak sa' junak tenamit, sa' li cab tex-oc cui' chi hilanc, aran texcanaq ut inc'a' yal yokex chixjalbal ena'aj. Nak ac xic ere sa' jalan chic tenamit, tojo'nak tejal le na'aj. ¹¹ Cui texcuulak sa' junak na'ajej bar cui' inc'a' texc'ulek' chi moco te'raj rabinquil le ratin, nak tex-ekl riq'uineb techik' li poks cherok jo' retalil li rayral te'xc'ul. Relic chi yal ninye ere nak k'axal cui'chic li rayral te'xc'ul chiruheb laj Sodoma ut laj Gomorra sa' xk'ehil li rakba atin, chan. ¹² Jo'can nak que'coeb lix tzolom li Jesús ut que'xch'olob xyalal chiruheb li tenamit re nak te'xyot' xch'ol ut te'xjal xc'a'uxeb. ¹³ Que'risi nabal li māus aj musik'ej riq'uineb ut que'xq'ue li aceite sa' xjolomeb li yaj jo' retalil xcuanquil li Dios ut que'xq'uirtesiheb.

Nak que'xcamsi laj Juan laj Cubsihom Ha'

¹⁴ Li tenamit yoqueb chixserak'inquil li milagro yo chixbanunquil li Jesús. Nak quirabi a'an, li rey Herodes quixye: —A'an laj Juan laj Cubsihom Ha'. Xcuaci cui'chic chi yo'yo sa' xyankeb li camenak. Jo'can nak cuan xcuanquil chixbanunquil li milagro, chan. ¹⁵ Ut cuan que'yehoc re nak a'an li profeta Elías. Ut cuan ajcui' que'yehoc re nak a'an jun li profeta jo' li profeta que'cuan najter. ¹⁶ Ut nak quirabi a'an, laj Herodes quixye: —A'an laj Juan li quintakla xch'otbal xcux. A'an xcuaci chi yo'yo sa' xyankeb li camenak, chan. ¹⁷ Quixye chi jo'can xban nak a'an quitaklan re xchabpal laj Juan. Que'xbac' ut que'xq'ue sa' tz'alam. Quixbānu chi jo'can xban nak jo'can quiraj lix Herodías. Lix Herodías a'an rixakil laj Felipe, ritz'in laj Herodes ut laj Herodes quixc'am chok' rixakil. ¹⁸ Nak toj maji' naq'uehe' sa' tz'alam, laj Juan laj Cubsihom Ha' quixye re laj Herodes: —Nimla mac xabānu nak xac'am chok' acuixakil lix Herodías xban nak ac sumsu riq'uin la cuitz'in, laj Felipe, chan re. ¹⁹ Riq'uin a'an ma ca'ch'in nak quijosk'o' lix Herodías sa' xben laj Juan ut quiraj raj xcamsinquil. Abanan inc'a' naru xban nak laj Herodes inc'a' quixcanab chixcamsinquel. ²⁰ Laj Herodes naxnau nak laj Juan tíc xch'ol ut santil cujnk. Jo'can nak naxucuac ut inc'a' naraj nak tacamsik. Quicuulac chiru rabinquil li quixye laj Juan usta c'ajo' nak naq'uehe' chi c'oxlac xban li atin nayehe' re. ²¹ Abanan lix Herodías quixtau chanru nak naru xcamsinquel laj Juan. Jo'ca'in quic'ulman. Nak laj Herodes quixnink'ei lix chihab, quixbokeb chi cua'ac li n̄inkeb xcuanquil sa' li tenamit, ut quixbokeb ajcui' li neque'taklan reheb li soldado ut jo'can ajcui' chixjunileb li xninkal ru cujnk re Galilea. ²² Lix co'lix Herodías qui-oc bar yoqueb cui' chi cua'ac li ula' ut qui-oc chi xajoc chiruheb. Laj Herodes quicuulac chiru chanru naxajoc. Ut quicuulac ajcui' chiruheb li ula'. Jo'can

nak laj Herodes quixye re li xka'al: —Tatz'ama cue li c'a'ru tacular ut laj in ting'ue acue, chan. ²³ Ut quixye ajcui' re li xka'al: —Sa' xc'aba' li Dios, ting'ue acue li c'a'ru tapatz' cue. Usta yijach lin jun cabal tapatz' cue, ting'ue acue, chan. ²⁴ Ut li xka'al co chixpatz'bal re lix na': —¿C'a'ru us tintz'ama re? chan. Ut lix na' quixye re: —Tz'ama re nak tixq'ue acue lix jolom laj Juan laj Cubsihom Ha', chan. ²⁵ Sa' junpat co li xka'al riq'uin laj Herodes ut quixye re: —Lain tincuaj nak anakcuan ajcui' taq'ue cue sa' junak plato lix jolom laj Juan laj Cubsihom Ha', chan. ²⁶ Ut laj Herodes c'ajo' nak quiraho' sa' xch'ol. Abanan mac'a' chic quiru quixye xban nak chixjunileb li ula' que'abin re nak quixye sa' xc'aba' li Dios tixq'ue re li c'a'ru tixtz'ama. ²⁷ Laj Herodes ticto quixtakla jun li soldado chixc'ambal chak lix jolom laj Juan. Li soldado co sa' tz'alam chixch'otbal lix cux laj Juan. ²⁸ Ut quixc'am chak lix jolom sa' jun li plato. Quixq'ue re li xka'al ut li xka'al quixk'axtesi re lix na'. ²⁹ Nak que'rabi lix tzolom laj Juan nak que'xcamsi, que'chal chixc'ambal li camenak ut coxe'xmuk.

Li Jesús quixq'ueheb chi cua'ac li qb mil chi cuink

³⁰ Ut nak que'suk'i chak lix tzolom li Jesús chixbanunquil li c'anjel que'taklac cui', cole'xch'utub rib riq'uin li Jesús ut que'xserak'i re c'a'ru quilaje'xbanu chak. Ut que'xye ajcui' re chanru nak que'xtzol li tenamit. ³¹ Neque'el neque'oc li q'uila tenamit riq'uin li Jesús. Jo'can ajcui' riq'uin eb lix tzolom. Ut riq'uin a'an inc'a' naru neque'hilan chi moco naru te'cua'ak. Jo'can nak quixye li Jesús: —Yo'keb sa' junak na'ajej bar mac'a' cui' tenamit re nak naru tohilank ca'ch'inak kajunes, chan li Jesús. ³² Ut que'oc sa' jun li jucub ut que'coeb sa' jun na'ajej bar cui' te'hilank raj ca'ch'inak xjuneseb. ³³ Abanan nabaleb que'iloc re nak yoqueb chi xic ut que'xnau nak a'an li Jesús. Nabal quilaje'el sa' li tenamit junjunk. Que'coeb chi rokeb sa' anil ut a'aneb xben cua que'cuulac sa' li na'ajej bar yo cui' chi xic li Jesús rochbenet lix tzolom. ³⁴ Ut nak qui-el li Jesús sa' li jucub, quirileb li q'uila tenamit. Quixtok'oba ruheb xban nak chanchaneb li carner mac'a' aj ilol rebeb. Ut nabal li c'a'ak re ru quixtzoleb cui'. ³⁵ Nak que'ril nak yo chi ecuuc, que'coeb lix tzolom riq'uin li Jesús ut que'xye re: —Yo chi ecuuc ut arin mac'a' cuan. ³⁶ Mac'a' xcuaheb. Taklaheb chixlok'baleb lix cua sa' eb li c'alebal ut sa' eb li coc' tenamit li cuanqueb chi nach', chanqueb. ³⁷ Ut nak quichak'oc li Jesús quixye rebeb: —Q'uehomakeb chi cua'ac laex. — Ut eb a'an que'xye: —¿Ma toxic chixlok'bal cuibak ciento denarios chi caxlan cua chi jo'canan re te'kaq'ue chi cua'ac? chanqueb. ³⁸ Li Jesús quixye: —¿Jarub li caxlan cua cuan eriq'uin? Ayukex, ilomak chak. — Que'coeb chi rilbal ut nak que'suk'i que'xye re: —Cuan qb li caxlan cua ut cuib li car, chanqueb. ³⁹ Li Jesús quixtaklaheb lix tzolom chixyebal rebeb li tenamit nak te'cojlak sa' li pach'a' chi junjunk ch'utal. ⁴⁰ Ut que'cojla chi junjunk ch'utal. Cuan que'cojla chi jun ciento sa' junk ch'utal ut cuan cui'chic que'cojla chi mero ciento sa' li junjunk ch'utal. ⁴¹ Tojo'nak li Jesús quixchap li ob chi caxlan cua ut li cuib chi car ut qui-iloc sa' choxa. Quixbantioxi chiru li Dios. Ut quixjachi li caxlan cua ut quixq'ue rebeb lix tzolom re nak te'xeq'ui rebeb li q'uila tenamit. Ut que'xeq'ui ajcui' li car. ⁴² Que'cua'ac chixjunileb toj retal que'cojla xch'ol. ⁴³ Ut qui-ela'an li caxlan cua. Jo'can ajcui' li car. Cablaju chacach li qui-ela'an. ⁴⁴ Nabal chi tenamit que'cua'ac. Sa' xyankeb li que'cua'ac cuanqueb qb mil junes cuink.

Li Jesús quibec chiru li palau

45 Ut chirix chic a'an, li Jesús quixtaklaheb lix tzolom sa' li jucub ut quixye rebeb: —Xben cua texxic jun pac'al li palau sa' li tenamit Betsaida. Lain toj tincanak chixchak'rabinquileb li tenamit, chan rebeb. **46** Ut nak ac xchak'rabiheb li tenamit, li Jesús co chiru tzul chi tijoc. **47** Te'cuulak lix tzolom sa' xyi li palau nak qui-oc li k'oijin, a'ut li Jesús toj cuan xjunes chire li palau. **48** Quiril nak lix tzolom cuanqueb sa' jun ch'a'ajquial sa' li jucub. Yoqueb chixtacuasinquil ribeb chixberesinqui li jucub xban nak sa' xbe ik' yoqueb chixc'ambal. Sakeuc re nak quicuulac li Jesús bar cuanqueb cui' ut yo chi bec chiru ha'. Quixbanu jo' li tjc tanumek'. **49** Nak que'r'il lix tzolom nak cuan jun yo chi bec chiru ha', que'xucuac ut que'xjap re. Que'xc'oxla nak anum yoqueb chirilbal. **50** Chixjunileb que'iloc re ut c'ajo' nak que'xucuac. Li Jesús ticto quiratinaheb ut quixye rebeb: —Mexxucuac. Lain li yoquex chicuilbal. Cacuubresihomak ech'ol, chan rebeb. **51** Nak qui-oc sa' li jucub sa' xyankeb, ch'anamil li ik'. Inc'a' chic qui-ec'an. Ut eb lix tzolom quilaje'sach xch'ol chirilbal. **52** Que'sach xch'ol xban nak toj maji' neque'xtau xyalal chirix li milagro quixbanu li Jesús riq'unin li caxlan cua. K'axal cauheb xch'ol. Jo'can nak inc'a' que'xtau ru.

Li Jesús quixq'urtesiheb li yaj aran Genesaret

53 Nak que'cuulac li Jesús rochbeneb lix tzolom jun pac'alli palau, coxe'elk sa' li tenamit Genesaret. Que'xbac' li jucub chire li ha'. **54** Nak yoqueb chi elc sa' li jucub, eb li cuanqueb aran ticto que'xnau nak a'an li Jesús. **55** Jo'can nak sa' junpat que'coeb sa' chixjunil li na'ajej chixc'ambaleb chak lix yaj chiruheb lix cuarib. Nak que'xnau bar cuan li Jesús, quilaje'xc'am li yaj riq'unin. **56** Yalak bar quinume' li Jesús quilaje'xc'am li yaj riq'unin, jo' sa' tenamit, jo' sa' c'alebal. Que'xq'ueheb li yaj sa' li be bar cui' yo chi numec' li Jesús. Que'xtz'ama chiru: —Banu usilal, q'ue chikach'e la cuak', chanqueb re xban nak neque'xnau nak usta ca'aj cui' re li rak' te'xch'e, te'q'uirak. Ut chixjunileb li que'ch'e'oc re li rak', que'q'uira.

7

Li c'a'ru na-el chak sa' li kach'ol, a'an li nococomacob cui'

1 Eb laj fariseo que'cuulac riq'unin li Jesús rochbeneb cuib oxib laj tz'ib li que'chal chak aran Jerusalén. **2** Ut eb a'an que'xq'ue retal nak cuan lix tzolom li Jesús que'cua'ac chi inc'a' que'xch'aj li ruk'eb chi tz'akal jo' c'aynakeb chixbanunquil laj fariseo. **3** Eb laj fariseo ut chixjunileb laj judío inc'a' neque'cua'ac cui inc'a' te'xch'aj li ruk'eb jo' naxye li chak'rab li canabanbil rebeb xbaneb lix xe'tonil yucua'. **4** Ut nak neque'suk'i chak sa' c'ayil inc'a' neque'cua'ac cui inc'a' neque'ch'ajoc jo' naxye lix chak'rabebe. Ut cuan cui'chic nabal li na'leb li neque'xbanu jo' canabanbil rebeb xbaneb li xe'tonil yucua', jo' li xch'ajbal lix sec', lix xar, li uc'al ch'ich' ut lix ch'at. **5** Eb laj fariseo ut eb laj tz'ib que'xpatz' re li Jesús: —¿C'a'ut nak eb la tzolom inc'a' neque'xbanu li kachak'rabinquil canabanbil ke xbaneb li kaxe' katon? Eb a'an neque'cua'ac chi inc'a' neque'xch'aj li ruk'eb jo' naxye li kachak'rabinquil, chanqueb. **6** Nak quichak'oc li Jesús quixye rebeb: —Yal ajoci'i li quixye laj Isaías chérix laejx aj ca'pac'al u nak quixye chi jo'ca'in: Li tenamit a'in niquine'x-oxlok'i ca'aj cui' riq'unin xtz'umaleb re. Moco neque'xbanu ta chi anchal xch'oleb.

7 Mac'a' aj e nak niquine'xlok'oni xban nak li tijleb li neque'xc'ut a'an yal xchak'rab eb li cuink. (Is. 29:13)

⁸ Laex nequetz'ektana lix chak'rab li Dios, ut a' chic le najter na'leb nequebanu, jo' riq'uin xch'ajbal li sec' ut li xar ut li c'a'ak ru chi chak'rabil reheb li cuink.—⁹ Li Jesús quixye ajcui' reheb: —Laex nequetz'ektana lix chak'rab li Dios re nak tēbanu li najter na'leb canababil ere xbaneb le xe'tonil yucua'. ¹⁰ Laj Moisés quixye, "Cha-oxlok'i la' na' la yucua' ut ani tixhob xna' xyucua', taçamsik." ¹¹ A'ut laex nequeye cui cuan junak li cuink inc'a' naraj xtenk'anquil lix na' xyucua', a'an naru tixye, "Corbán", chirix li c'a'ak re ru tixtenk'a cui' raj lix na' xyucua'. Li atin a'an naraj naxye "yechi'inbil re li Dios". ¹² Riq'uin xbanunquil a'an li cuink inc'a' chic naru tixtenk'a lix na' xyucua', chanquex. ¹³ Ut cuan nabal chic c'a'ak re ru chi na'lebil nalajebanu. Riq'uin xbanunquil li najter na'leb canababil ere, yoquex chixtz'ektananolquil lix chak'rab li Dios, chan li Jesús reheb. ¹⁴ Ut li Jesús quixbokeb li tenamit ut quixye reheb: —Abihomak chejunilex li c'a'ru tinye ut q'uehomak retal re nak tētau xyalal. ¹⁵ Macua' li c'a'ru naxtzaca li cuink namaco' cui'; aban li c'a'ru inc'a' us naxc'oxla, a'an namaco' cui'. ¹⁶ Li ani naraj rabinquil, chixq'uehak retal li ninye.—¹⁷ Nak li Jesús qui-el sa' xyankeb li q'uila tenamit, qui-oc sa' cab. Ut eb lix tzolom que'xpatz' re: —¿C'a'ru xyalal li atin xaye?—¹⁸ Ut li Jesús quixye reheb: —¿Ma inc'a' ajcui' xetau ru laex li xinye? ¿Ma inc'a' nequenau nak macua' li c'a'ru naxtzaca junak namaco' cui'? ¹⁹ Li c'a'ru naxtzaca junak, a'an moco sa' ram ta naxic. Tic sa' xsa' naxic ut chirix a'an naxtz'ek cui'chic, chan. Jo'can nak quixye nak chixjunil li natzacaman moco māc ta xtzacanquil. ²⁰ Ut quixye ajcui' li Jesús reheb: —Li inc'a' us naxc'oxla sa' xch'ol, a'an namacob cui'. ²¹ Sa' xc'a'ux junak nachal chak li maus aj na'leb, li muxuc caxar, li co'bētac yumbetac, ut li xcamsinquel ras ritz'in. ²² Ut sa' xc'a'ux ajcui' nachal li elk'ac, li rahinquel ru c'a'ru re ras ritz'in, li mausilal, li balak'inc, li xbanunquil li xutanalil na'leb, li cakalinc, li majecuanc, li k'etk'etil, ut lix majelil na'leb. ²³ Chixjunil li maus aj na'leb a'in sa' xc'a'ux junak nachal chak ut a'an namacob cui' li junjunk.—

Li ixt aj Sirofenicia quipaban

²⁴ Li Jesús co sa' jalan na'ajej xcient Tiro ut xcient Sidón. Cox-oc sa' jun li cab. Inc'a' raj quiraj quinauhé' nak cuan aran. Abanan inc'a' quiru quixmuk rib. ²⁵ Sa' junpat qui-abic resil xban jun li ixt nak cuan aran. Li ixt a'an cuan jun lix co' cuan maus aj musik'ej riq'uin. Co riq'uin li Jesús ut quixcuik'ib rib chiru. ²⁶ Li ixt a'an macua' aj judío, a'an aj Sirofenicia. Quixtz'ama chiru li Jesús nak tarisi li maus aj musik'ej riq'uin lix co'. ²⁷ Ut li Jesús quixye re: —Cua'akeb cuan junxil li coc'al. Inc'a' us xmak'bal xcuahelb li coc'al ut xq'uebal reheb li tz'i', chan. ²⁸ Ut li ixt quichak'oc ut quixye re: —Yal li nacaye, Kacula', abanan eb li tz'i' neque'xxoc xc'a'j xcuia li coc'al rubel li mex nak yoqueb chi cu'a'ac, chan. ²⁹ Li Jesús quixye re li ixt: —Us li xaye. Ayu sa' la cuochoch. Ac x-el li maus aj musik'ej riq'uin la co', chan. ³⁰ Co li ixt sa' li rochoch ut coxtau lix co' chi yocy o chiru lix ch'at. Mac'a' chic li maus aj musik'ej riq'uin.

Li Jesús quixq'uirtesi jun li cuink tz'ap xic ut tat re

³¹ Nak qui-el li Jesús rochbeneb lix tzolom sa' li na'ajej xcient Tiro, que'nume' sa' li tenamit Sidón. Ut que'nume' ajcui' sa' li na'ajej xcient Decápolis, ut que'cuulac cuan cui' li palau Galilea. ³² Ut quic'ame' chak jun li cuink riq'uin li Jesús tz'ap xic ut tat re. Que'xtz'ama chiru nak tixq'ue li ruk' sa' xben. ³³ Li Jesús quirisi li cuink sa' xyankeb li tenamit ut quixc'am xjunes. Quixch'ic li ru'uj ruk' sa' xxic' li cuink. Quixt'akresi li ru'uj ruk' riq'uin li xya'al re ut quixch'e' li ru'uj rak' li cuink. ³⁴ Qui-iloc sa' choxa, quixjik' xch'ol

ut quixye: —Efata.— Sa' li r̄atinobal naraj naxye, “Chitelik la xic ut chat-abink.” ³⁵ Sa' junpat quitelix xic ut na-abin chic ut sa chic naqtinac. ³⁶ Ut li Jesús quixye reheb li q'uila tenamit: —Ma ani aj e teserak'i li c'a'ru yoquin chixbanunquil, chan. Quixk'useb chi us. Abanan eb a'an k'axal cui'chic nak que'oc chixserak'inquil. ³⁷ C'ajo' nak que'sach xch'oleb chiribal ut que'xye: —Chabil chixjunil li naxbanu. Naxq'ue chi abinc li tz'ap xic ut naxq'ue chi atinac li mem, chanqueb.

8

Li Jesús quixq'ueheb chi cua'ac li cahib mil

¹ Sa' jun chic li cutan que'xch'utub rib nabal li tenamit riq'uin li Jesús. Xban nak mac'a' xcuaheb quixbokeb lix tzolom ut quixye reheb: ² —Tok'obeb ru li q'uila tenamit a'in. Ac cuan oxib cutan roquiqueb arin cuiq'uin ut mac'a' chic xcuaheb. ³ Cui tebintakla sa' rochocheb chi inc'a' te'cua'ak, naru neque'lub sa' be xban nak cuan najt xe'chal chak. — ⁴ Lix tzolom que'xye re: —¿Bar takatau cua sa' li na'ajej a'in re takaq'ueheb chi cua'ac? Arin mac'a' cuan, chanqueb. ⁵ Ut li Jesús quixpatz' reheb: —¿Jarub li caxlan cua cuan eriq'uin? chan. —Cuukub ajcui', chanqueb. ⁶ Tojo'nak quixye reheb li tenamit nak te'chunlak chiru ch'och'. Quixchap li cuukub chi caxlan cua. Quixbantioxi chiru li Dios ut quixjachi. Ut quixq'ue reheb lix tzolom re nak te'xeq'ui reheb li tenamit. ⁷ Ut cuan cuilib oxib li coc' car riq'uineb. Nak quirosobtesi quixye reheb nak te'xeq'ui ajcui' reheb li tenamit. ⁸ Que'cua'ac chi us ut que'c'ojla xch'ol. Ut cuukub chacach chic li qui-ela'an. ⁹ Cuanqueb na cahibak mil li que'cua'ac ut nak ac xe'cua'ac, que'chak'rabiç xban li Jesús. ¹⁰ Ut sa' junpat qui-oc li Jesús sa' li jucub rochbeneb lix tzolom ut que'coeb sa' li na'ajej xcuent Dalmanuta.

Eb laj fariseo que'raj rilbal li milagro

¹¹ Que'cuulac laj fariseo riq'uin li Jesús. Que'oc chixcuech'inquil yal re xyalbal. Que'xye re nak tixbanu junak milagro chiruheb re rilbal ma yal na nak riq'uin li Dios nachal lix cuanquil. ¹² Quixjik' xch'ol li Jesús xban nak quititz' xbaneb, ut quixye: —Ca'aj cui' milagro yoqueb chixpatz'bal eb li tenamit a'in. Relic chi yal tinye ere nak ma jun milagro tinbanu chiruheb. — ¹³ Qui-el riq'uineb laj fariseo. Qui-oc sa' li jucub rochbeneb lix tzolom. Yoqueb chi xic jun pac'al li palau.

Li Jesús quixjuntak'eta lix tijleb eb laj fariseo riq'uin lix ch'amal li caxlan cua

¹⁴ Ut quisach sa' xch'oleb xc'ambal xcuaheb. Ac cuanqueb sa' li jucub nak que'xq'ue retal nak jun ajcui' li caxlan cua cuan riq'uineb. ¹⁵ Li Jesús quixye reheb: —Chebanu cuent. Micuan xch'amal xcaxlan cuahelb laj fariseo eriq'uin chi moco xch'amal xcaxlan cua laj Herodes. — ¹⁶ Eb lix tzolom que'oc chi atinac chi ribileb rib ut que'xye: —¿C'a'ru xyalal a'in? ¿Ma xban nak mac'a' li caxlan cua kiq'uin nak xye ke chi jo'can? chanqueb. ¹⁷ Li Jesús quixnau c'a'ru yoqueb chixyebal chi ribileb rib ut quixye reheb: —¿C'a'ut nak yoquex chixyebal nak mac'a' ecua? ¿Ma inc'a' nequetau ru nak macua' chirix xch'amal li caxlan cua yoquin chi atinac? Chirix ban xtijlebeb laj fariseo yoquin chi atinac. Laex c'ajo' xcacu'il ech'ol. ¹⁸ Inc'a' nequetau xyalal. Cuan xnak' eru ut inc'a' nequex-iloc. Cuan exic ut inc'a' nequex-abin. ¹⁹ ¿Ma inc'a' najultico' ere nak xinjachi li qb chi caxlan cua reheb li qb mil chi cuink? Ut ¿jarub chacach qui-ela'an? chan reheb. —Cablaju, chanqueb. ²⁰ —¿Ma inc'a' najultico' ere nak xinjachi li cuukub chi caxlan cua reheb li cahib mil.

Ut jarub chacach qui-ela'an? chan reheb. —Cuukub chacach, chanqueb.
21 Ut li Jesús quixye reheb: —¿Ma toj maji' ajcui' nequetau xyalal chi jo'canan?

Li Jesús quixq'uirtesi li mutz' aran Betsaida

22 Que'cuulac li Jesús rochbeneb lix tzolom aran Betsaida. Quic'ame' chak jun li cuink riq'uin. Mutz' ru li cuink. Que'xtz'ama chiru nak tixq'ue li ruk' sa' xben re nak tailok. **23** Li Jesús quixchap li ruk' li mutz' ut quixc'am chire li tenamit. Ut quixchuba sa' xnak' ru li mutz'. Quixq'ue li ruk' sa' xben ut quixpatz' re: —¿Ma nacat-iloc bayak anakcuan? chan re. **24** Li mutz' qui-iloc ut quixye: —Nin-iloc ca'ch'in. Nacuileb li cuink chanchaneb li che' nak yoqueb chi bec. —**25** Tojo'nak li Jesús quixq'ue cui'chic li ruk' sa' li xnak' ru li mutz' ut quiq'uiria li ru. Nak qui-iloc li cuink, tz'akal chic naril chixjunil. **26** Li Jesús quixtakla li cuink sa' rochoch ut quixye re: —Matxic sa' li tenamit ut ma'ani aj e taye nak xatinq'uirtesi, chan re.

Laj Pedro quixye nak li Jesús, a'an li Cristo

27 Chirix a'an co li Jesús rochbeneb lix tzolom sa' li coc' tenamit xcuént Cesarea Filipo. Nak yoqueb chi xic, quixpatz' reheb lix tzolom: —¿Anihin laín nak neque'xye li tenamit? chan. **28** Que'xye re: —Cuan neque'yehoc re nak laat laj Juan Iaj Cubsihom Ha' xcuacli cui'chic chi yo'yo. Ut cuan neque'yehoc re nak laat li profeta Elías, li quicuan najter. Ut cuan cui'chic neque'yehoc re nak laat jun chic li profeta, chanqueb. **29** —Ut laex ¿anihin laín nak nequeye? chan cui'chic reheb. Ut laj Pedro quixye: —Laaat li Cristo. —**30** Li Jesús quixye reheb nak ma'ani aj e te'xye nak a'an li Cristo.

Li Jesús quixye resil lix camic

31 Li Jesús quixch'olob xyalal chiruheb nak a'an li Alalbej ut nak nabal li raylal chalc re sa' xben. Quixye reheb nak tatz'ektanak xbaneb li xakanabilbech chi c'anjelac sa' li templo. Tatz'ektanak ajcui' xbaneb li xbenil aj tij. Jo' ajcui' xbaneb laj tz'ib ut quixye ajcui' reheb nak tacamsík ut tacuacılık cui'chic chi yo'yo sa' rox li cutan. **32** Quixye chi tz'akal li c'a'ru tixc'ul. Nak quirabi a'an laj Pedro quirisi xjunes li Jesús ut qui-oc chixk'usbal ut quixye re: —Maye chi jo'can Kacua'. —**33** Ut li Jesús quixsuk'isi rib. Quirileb lix tzolom ut quixk'us laj Pedro. Quixye re: —Elen arin sa' xnak' cuu. Laat chanchanat aj Tza. Laat inc'a' yocat chixc'oxlanquil jo' naxc'oxla li Dios. Laat yocat chixc'oxlanquil jo' naxc'oxla li cuink, chan. **34** Tojo'nak quixbokeb li q'uila tenamit rochbeneb lix tzolom ut quixye reheb: —Li ani taraj inpabanquil, tento nak tixtz'ektana li c'a'ru naxrahi ru lix ch'ol. Tixcuy xnumsinquíl li raylal li tixc'ul usta tacamsík sa' inc'aba'. Ut chinixtäkehak. **35** Li ani tatz'ektanank cue re xcolbal lix yu'am arin sa' ruchich'och', tixtz'ek li junelic yu'am. A'ut li naxsach lix yu'am sa' inc'aba' laín malaj ut sa' xc'aba' li evangelio, a'an tarechani li junelic yu'am. **36** ¿C'a'ru tixra junak cuink nak tarechani chixjunil lix biomal li ruchich'och' ut tixtz'ektana li junelic yu'am xban li biomal? **37** ¿Ma cuan ta bi' li c'a'ru tixtoj cui' li yu'am chi junelic? **38** Li ani taxutanaq chiruheb li tenamit aj mac inban laín malaj ut xban li cuatin, laín li Alalbej tinxtutanak ajcui' xbaneb nak tinchälk chak riq'uin xnimál xlok'al lin Yucua' cuochbeneb li santil ángel.—

1 Ut li Jesús quixye: —Relic chi yal tinye ere nak cuanqueb arin sa' eyank li inc'a' te'camk toj te'r'il lix nimajcual cuanquilal li Dios nak tachälk riq'uin lix xcuanyl.—

Qui-ile' lix lok'al li Jesús nak quijalano' li rilobal

² Cuakib cutan chic xyebal a'an xban li Jesús nak quixc'ameb laj Pedro, laj Jacobo, ut laj Juan sa' xben jun li nimla tzul. Nak cuanqueb aran xjuneseb, quijalano' li rilobal li Jesús chiruheb. ³ Ut li rak' quijalano' rilbal. Nalemtz'un chic li rak'. Saksakpotz'in nac'utun, chanchan li ratz'am que. Ma jun aj puch'unel arin sa' ruchich'och' tixsakobresi junak t'icr jo' nak quisakobresic li rak' li Jesús. ⁴ Ac xakamil laj Elías ut laj Moisés chiruheb nak que'r'il. Ut yoqueb chi atinac riq'uin li Jesús. ⁵ Laj Pedro quixye: —Kacua', c'ajo' xchak'al ru nak cuanco arin. Xkayib ta oxibak muhebal arin. Jun acue, jun re laj Moisés, ut jun re laj Elías.— ⁶ Quixye chi jo'can xban nak inc'a' chic naxnau c'a'ru tixye xban nak c'ajo' lix xiuheb. ⁷ Ut quichal jun nimla chok sa' xbeneb. Li Dios quiatinac chak sa' li chok, ut quixye: —A'in li cualal, raro inban. Cherabi li c'a'ru tixye.— ⁸ Ut nak quiril ac ma aniheb chic laj Elías ut laj Moisés. Ca'aj chic li Jesús quicana xjunes. ⁹ Nak yoqueb chak chi cubec sa' li tzul quixye li Jesús reheb nak ma ani aj e te'xye li c'a'ru que'r'il toj tacuaclik cui'chic li Alalbej chi yo'yo sa' xyankeb li camenak. ¹⁰ Eb a'an ma ani aj e que'xye, ca'aj cui' chi ribileb rib que'atìnac. Que'xye: —¿C'a'ru xyalal a'an nak li Jesús quixye nak tacuaclik cui'chic chi yo'yo sa' xyankeb li camenak?— ¹¹ Que'xpatz' re li Jesús: —¿C'a'ut nak neque'xye laj tz'ib nak xben cua tachalk laj Elías tojo'nak tol-elk li Cristo? chanqueb. ¹² Ut nak quichak'oc li Jesús quixye reheb: —Yal ajcui' tz'ibanol retaliil nak laj Elías xben cua tachalk chixc'ubanquil chixjunil li c'a'ak re ru. Ut tz'ibanol ajcui' sa' li Santil Hu chikuix lain li Alalbej nak nabal li raylal tinc'ul ut tine'xtz'ektana. ¹³ Abanan tinye ere nak laj Elías ac xc'ulun ut c'ajo' li raylal que'xbanu re jo' tz'ibanol sa' li Santil Hu chanru tac'ulmank.—

Li Jesús quirisi li maus aj musik'ej riq'uin li al

¹⁴ Nak coxe'elk cuanqueb cui' li beleb chic lix tzolom li Jesús, que'r'il nak cuan nabal li tenamit riq'uineb. Ut eb laj tz'ib yoqueb chixcuech'inquil lix tzolom li Jesús. ¹⁵ Ut eb li q'uila tenamit que'sach xch'ol chiribal li Jesús, ut que'coeb sa' anil chixc'ulbal ut que'xq'ue xsahil xch'ol. ¹⁶ Li Jesús quixpatz' reheb: —¿C'a'ru nequecuech'i cui' erib? chan. ¹⁷ Quichak'oc jun sa' xyankeb li q'uila tenamit ut quixye re: —At Kacua', xinc'ám chak jun li cualal arin. Mem ut cuan maus aj musik'ej riq'uin. ¹⁸ Yalak bar nacute' sa' ch'och' xban li maus aj musik'ej. Na-el cuokx sa' re ut naxc'uxuxi li ruch re ut naxchec' rib. Xintz'ama chiruheb la tzolom nak te'risi li maus aj musik'ej; abanan inc'a' xe'ru chirisinquil.— ¹⁹ Nak li Jesús quichak'oc, quixye reheb: —Tic inc'a' nequexpaban. ¿Jo' najtil chic tincuank' eriq'uin re nak texpabank? ¿Jo' najtil chic texincuy nak neque'oxla? C'am chak li al arin cuiq'uin, chan li Jesús. ²⁰ Que'xc'am li al riq'uin ut li maus aj musik'ej nak quiril li Jesús quixch'ikle li al, quixcut sa' ch'och' ut quixtold'osi ut qui-oc chi elc cuokx sa' re. ²¹ Ut li Jesús quixpatz' re lix yucua': —Jok'e xticla lix yajel li al a'in? chan. —Toj ca'ch'in nak quixtiquib xc'ulbal chi jo'ca'in, chan lix yucua'. ²²—Nabal sut nacute' sa' xam. Nabal sut nacute' sa' ha' xban li maus aj musik'ej re xcamsinquil. Cui cuan c'a'ru naru tabanu re, banu usilal, il xtok'oba ku ut choatenk'a, chan. ²³ Li Jesús quixye: —¿C'a'ut nak nacaye "cui naru"? Ma inc'a' nacanau nak cui nacatpaban chixjunil naru xbanunquil? chan. ²⁴ Sa' junpat quiatinac lix yucua' li al ut quixye chi cau, —Lain ninpab. Chinatenk'a re nak tinpab chi tz'akal.— ²⁵ Nak li Jesús quiril nak sa' junpat yoqueb chi ch'utlac nabal li tenamit, quixch'ila li maus aj musik'ej. Quixye re: —At maus aj musik'ej, laat nacatmemobresin. Laat nacattz'apoc xic. Lain tinye acue, elen riq'uin

li al a'in ut mat-oc chic riq'uin, chan. ²⁶ Ut li mäus aj musik'ej quixjap re ut quixch'ikle chi cau li al. Tojo'nak qui-el riq'uin. Ut li al chanchan camenak quicana. Nabal li tenamit que'yehoc re nak xcam. ²⁷ Ut li Jesús quixchap chi ruk' li al ut quixcuaclesi ut li al quixakli. ²⁸ Nak qui-oc li Jesús sa' cab xjunes rochbeneb líx tzolom, que'xpatz' re: —¿C'a'ut nak inc'a' xoru lão chirisinqil li mäus aj musik'ej? chanqueb. ²⁹ Ut li Jesús quixye reheb: —Ca'aj cui' riq'uin ayuñ ut riq'uin tijoc naru risinqil li mäus aj musik'ej a'in.—

Li Jesús quixye cui'chic resil líx camic

³⁰ Ut nak que'el aran, que'nume' sa' li na'ajej Galilea. Ut li Jesús inc'a' quiraj nak te'xnau nak cuan aran. ³¹ Yo chixch'olobanquil xyalal chiruheb líx tzolom. Quixye reheb: —Lain li Alalbej, tine'xk'axtesi sa' ruk'eb li cuink li te'camsink cue. Ut nak ac xine'xcamsi, tincuaclik cui'chic chi yo'yo' sa' xyankeb li camenak sa' rox li cutan. —³² Aban eb a'an inc'a' que'xtau ru li c'a'ru quixye reheb, ut que'xucuac chixpatz'bal c'a'ru xyalal li quixye.

Li nim xcuanguil, a'an li nac'anjelac chiruheb li ras ritz'in

³³ Que'cuulac sa' li tenamit Capernaum. Nak cuanqueb sa' cab quixpatz' reheb líx tzolom: —¿C'a'ru li yoquex chixcuech'inquil rix nak yoco chi chalc? chan. ³⁴ Mem que'cana ut inc'a' chic que'chak'oc xban nak yoqueb chixcuech'inquil rix ani reheb li nim xcuanguil. ³⁵ Li Jesús quic'oja ut quixbokeb li cablaju chi xtzolom riq'uin ut quixye reheb: —Li ani taraj nak taq'uehek' xcuanguil, chixcubsihak rib ut chic'anjelak chiruheb chixjunileb. —³⁶ Quixchap chi ruk' jun li ch'ina al ut quixq'ue sa' xyiheb. Quixk'alu ut quixye reheb: ³⁷ —Li ani naxq'ue xlok'al li toj k'un xch'ol jo' li ch'ina al a'in sa' inc'aba' lain, naxq'ue ajcui' inlok'al lain. Ut mäcu'a ca'aj cui' lain naxq'ue inlok'al. Naxq'ue aj ban cui' xlok'al li Dios li quitaklan chak cue.—

Li ani inc'a' xic' na-ilocke, a'an na-oquen chikix

³⁸ Laj Juan quixye re li Jesús: —At Kacua', jun cuink xkil chak le'. Yo chi isinc mäus aj musik'ej sa' ac'aba'. Ut lão xkaye re nak inc'a' tixbanu a'an xban nak moco kacomon ta. —³⁹ Ut li Jesús quixye reheb: —Mek'us xban nak ma ani tabanunk junak milagro sa' inc'aba' lain ut mokon taoc ta chintz'ektananquil. ⁴⁰ Li ani inc'a' xic' na-ilocke, a'an na-oquen chikix. ⁴¹ Li ani taq'uehok jun sec'ak ha' ere sa' inc'aba' lain xban nak laex cualal inc'ajol, reliç chi yal tinye ere nak tixc'ul líx k'ajcamunquil.—

Xiu xiu li t'anec' sa' li mac

⁴² Li ani tapo'ok xch'oleb li toj k'uneb xch'ol, us raj xcutbal sa' li palau chi bac'bo junak nimla pec chi xcux. ⁴³ Cui la cuuk' taq'uehok acue chi macobc, us raj cui tayoc'. Mas us nak cuank la yu'am chi junelic riq'uin jun ajcui' la cuuk' chiru nak tatxic riq'uin cuib la cuuk' sa' li xbalba, bar cui' inc'a' tachupk li xam. ⁴⁴ Aran inc'a' te'camk li motzo' chi moco li xam tachupk. ⁴⁵ Cui la cuok taq'uehok acue chi macobc, us raj cui tayoc'. Mas us nak cuank la yu'am chi junelic riq'uin jun la cuok chiru nak tatxic riq'uin cuib la cuok sa' li xbalba, bar cui' inc'a' tachupk li xam. ⁴⁶ Aran inc'a' te'camk li motzo' chi moco li xam tachupk. ⁴⁷ Cui li xnak' acuu taq'uehok acue chi macobc, us raj cui tacuisi. Mas us nak tat-oc sa' xnimajcual cuanquillal li Dios riq'uin jun li xnak' acuu chiru nak tatxic sa' li xbalba riq'uin cuib xnak' acuu. ⁴⁸ Aran inc'a' te'camk li motzo' chi moco li xam tachupk. ⁴⁹ Jo' nak naq'ueman li atz'am chiru li tib re nak inc'a' nachuho', jo'can ajcui' nak nayale' rix li kapabál. Chanchan riq'uin xam nayale' rix xban li raylal nakac'ul. ⁵⁰ Chabil li atz'am, abanan cui

na-oso' lix qui'al mäc'a' chic na-oc cui'. Jo'can ajcui' laex chi cuqñk ęchabilal ut cuqñkex sa' usilal chi ribil erib.

10

Inc'a' naru te'xjach rib li sumsueb

¹ Ut qui-el li Jesús Capernaum. Que'coeb sa' jun li na'ajej cuan xcuent Judea ut que'coeb ajcui' toj jun pac'al li nima' Jordán. ² Ut que'cuulac laj fariseo riq'uin chi patz'oc yal re xyalbal rix ut que'xye re: —*¿C'a'ru nacaye laat?* *¿Ma taruk tixjach rib junak cuink riq'uin li rixakil?* chanqueb re. ³ Ut nak quichak'oc li Jesús, quixye reheb: —*¿C'a'ru le chak'rabinquil quixcanab ere laj Moisés?* —⁴ Eb a'an que'xye: —Laj Moisés quixye nak junak li cuink taruk tixyib lix hu re jachoc ib ut riq'uin a'an naru tixjach rib riq'uin li rixakil. —⁵ Li Jesús quichak'oc ut quixye: —Xban nak k'axal cau ech'ol, jo'can nak quixq'ue li chak'rab chi jo'can. ⁶ Abanan macua' jo'can sa' xticlajic li ruchich'och'. Nak quixyib li ruchich'och' li Dios, quixyo'obtesi li cuink ut quixyo'obtesi li ixx. ⁷ Jo'can nak li cuink tixcanab xna' xyucua' ut tixlak'ab rib riq'uin li rixakil. ⁸ Li ani te'xlak'ab rib junajeb chic. Moco cuibeb ta chic. ⁹ Li ani naxlak'ab li Dios, ma' ani chic naru najachoc re, chan li Jesús. ¹⁰ Ut nak ac cuanqueb sa' cab, lix tzolom li Jesús que'xpatz' cui'chic re chirix li na'leb a'in. ¹¹ Ut li Jesús quixye reheb: —Li ani tixjach rib riq'uin li rixakil ut tixc'am jalan chic ixx, a'an tixmux ru lix sumlajic. ¹² Ut cui junak ixx tixjach rib riq'uin lix belom, ut tac'amek' xban jalan chic cuink, a'an tixmux ru lix sumlajic.—

Li Jesús quirosobtesiheb li coc'al

¹³ Sa' jun li cutan cuan li coc'al que'c'ame' chak riq'uin li Jesús re nak tixq'ue li ruk' sa' xbeneb ut tarosobtesiheb. Ut lix tzolom que'xk'us li que'c'amoc chak reheb li coc'al. ¹⁴ Nak li Jesús quixq'ue retal li yoqueb chixbanunquil, c'ajo' nak quipo' ut quixye reheb lix tzolom: —Canabomakeb li coc'al chi chalc cuiq'uin. Meram chiruheb xban nak lix nimajcual cuanquilal li Dios, a'an reheb li neque'paban jo' nak neque'paban li coc'al. ¹⁵ Relic chi yal tinye ere li ani inc'a' napaban jo' li coc'al, a'an inc'a' tarechanli xlix nimajcual cuanquilal li Dios, chan. ¹⁶ Ut li Jesús quixk'aluheb li coc'al, quixq'ue li ruk' sa' xbeneb, ut quirosobtesiheb.

Jun li cuink biom quiqatinac riq'uin li Jesús

¹⁷ Nak ac xic re li Jesús sa' jalan chic na'ajej, quichal jun li cuink sa' anil, colxcuik'ib rib chiru ut quixye re: —At chabil tzolone, *¿C'a'ru taruk tinbanu re nak tincuechani li yu'am chi junelic?* —¹⁸ Li Jesús quixye: —*¿C'a'ut nak nacaye chabil cue cui inc'a' nacanau anihin lain?* Jun ajcui' li chabil ut a'an li Dios. ¹⁹ Laat nacanau c'a'ru naxye li chak'rab: Matmxuc caxar. Macamsi aqwas acuitz'in. Mat-elk'ac. Matyo'oban atin chirix aqwas acuitz'in. Matbalak'ic. Cha-oxlok'i la na' ayucua'. —²⁰ Nak quichak'oc li cuink quixye: —At tzolone, chixjunil a'in ac xinbanu ajcui' chak chalen sa' inca'ch'inal. —²¹ Li Jesús c'ajo' nak quixra li cuink. Quixca'ya ut quixye re: —Jun chic toj maji' nacabanu. Ayu, c'ayi chixjunil li c'a'ru cuan acue ut tasi lix tz'ak reheb li neba' re nak tacuank abiomal sa' choxa. Nak ac xabanu a'an, tatchalk cuiq'uin ut tinatake usta camc tac'ul sa' inc'aba, chan. ²² Nak quirabi a'an, li cuink co' chi ra' sa' xch'ol xban nak nabal lix'biomal cuan. ²³ Li Jesús quirileb lix tzolom ut quixye reheb: —C'ajo' xch'a'ajquil chok' re junak biom rechaninquel lix nimajcual cuanquilal li Dios. —²⁴ Lix tzolom que'sach xch'oleb nak que'rabi a'an. Aban li Jesús quixye cui'chic reheb: —Ex cualal inc'ajol, c'ajo' xch'a'ajquil nak te'oc sa' xnimajcual cuanquilal li

Dios li neque'xic xch'ol chirix lix biomal. ²⁵ Mamin taruk tñumek' junak nimla xul camello sa'ru junak cux. Jo'can ajcui' eb li biom. Ma jok'e taruk te'oc sa' xnimajcual cuanquilal li Dios cui ca'aj cui' lix biomal neque'xc'oxla. — ²⁶ Eb lix tzolom c'ajo' nak que'sach xch'oleb ut que'xye: —¿Ani put taruk tacolek' chi jo'canan? — ²⁷ Li Jesús quirileb ut quixye reheb: —Li cuink inc'a naru tixbanu a'an, aban li Dios mac'a ch'aaj chiru. A'an naru tixbanu chixjunil. — ²⁸ Laj Pedro quixye re li Jesús: —Lao xkacanab chixjunil li c'a ru cuan ke xban atakenquil. — ²⁹ Li Jesús quixye: —Relic chi yal tinye ere, li ani naxcanab c'a ru re sa' inc'aba' lain, tixc'ul rekaj. Li ani naxcanab xna' xyucua', li ras ut li ritz'in ut li ralal xc'ajol sa' inc'aba' lain malaj ut sa' xc'aba' li evangelio, a'an tixc'ul rekaj. Jo'can ajcui' li naxcanab xch'och' ut li rochoch sa' inc'aba' lain, tixc'ul ajcui' rekaj. ³⁰ A'an tixc'ul o'takc'al (100) chic chok' rekaj li c'a ru re li tixcanab jo' rochoch, jo' li ras, jo' li ritz'in, jo' li ralal xc'ajol, jo' xna' xyucua' ut jo' lix ch'och'. Usta naxc'ul ra xic' arin sa' ruchich'och', abanan tarechanli junelic yu'am sa' eb li cutan chalel. ³¹ Li cuanqueb xcuانquil anakcuan, mac'a'ak chic xcuانquileb mokon. Ut li mac'a'eb xcuانquil anakcuan, a'aneb chic li te'cuank xcuانquil mokon, —chan li Jesús.

Li Jesús quixye cui'chic resil lix camic

³² Nak yoqueb chi xic Jerusalén c'amol be li Jesús chiruheb. Nak cuanqueb chiru be sachsoqueb xch'ol lix tzolom ut li yoqueb chi takenc reheb te'xucuak ajcui'. Tojo'nak li Jesús quixc'ameb cui'chic lix cablaju chi tzolom xjuneseb ut qui-oc chixyebal reheb li c'a ru tixc'ul. ³³ Quixye reheb: —Q'uehomak retal. Anakcuan yoco chi xic Jerusalén. Aran tink'axtesik lain li C'ajolbej sa' ruk'eb lix benil aj tij jo' ajcui' sa' ruk'eb laj tzib. Eb a'an te'xteneb cämc sa' inben ut tine'xk'axtesi sa' ruk'eb li macua'eb aj judío. ³⁴ Ut tine'xhob, tine'xsac', tine'xchuba ut tine'xcamsi. Aban sa' rox li cutan tincuaçlik cui'chic chi yo'yo sa' xyankeb li camenak. —

Laj Jacobo ut laj Juan que'xtz'ama chiru li Kacua' nak tixq'ueheb xcuانquil

³⁵ Laj Jacobo ut laj Juan, eb li ralal laj Zebedeo, que'jiloc chixc'atk li Jesús ut que'xye re: —Kacua', lao nakaj nak tabanu li usilal li takatz'ama chacuu. —³⁶ Ut li Jesús quixye reheb: —¿C'a ru li usilal teraj tinbanu ere? chan reheb. ³⁷ Que'xye re: —Nak ac xat-oc sa' la lok'al, nakatz'ama chacuu nak jun ke tacuank sa' la nim ut jun tacuank sa' la tz'e. — Que'xye chi jo'can xban nak te'raj oc sa' xcuانquileb. ³⁸ Ut li Jesús quixye reheb: —Laex inc'a nequenau xyalal li yoquex chixtz'amanquil chicuu. ¿Ma tecuy xc'ulbal li raylal li oc cue chixc'ulbal lain? Ut, ¿ma tecuy xnumsinquil li raylal jo' li tinc'ul lain? — ³⁹ —¡Takacu! chanqueb. Ut li Jesús quichak'oc ut quixye: —Yal ajcui' nak laex tec'ul li raylal jo' li tinc'ul lain. Ut tecuy xnumsinquil li raylal jo' li tincuy xnumsinquil lain. ⁴⁰ Abanan li na'ajej sa' lin nim ut sa' lin tz'e macua' lain ting'uehok re li na'ajej a'an, xban nak ac ch'olch'o chiru li Dios ani aj e li na'ajej a'an, chan li Jesús reheb. ⁴¹ Ut nak que'rabi li c'a ru que'xpatz' laj Jacobo ut laj Juan, li lajeb chic lix tzolom que'po' riq'uineb. ⁴² Ut li Jesús quixbokeb riq'uin ut quixye reheb: —Laex nequenau nak li neque'taklan sa' ruchich'och' neque'numta sa' xben li tenamit. Li njinkeb xcuانquil, a'aneb li neque'taklan. ⁴³ Abanan macua' jo'can tebanu laex. Li ani naraj xcuانquil sa' eyank, tento nak tixcubsi rib ut tac'anjelak cheru. ⁴⁴ Li ani naraj nimak xcuانquil sa' eyank, tento tixcubsi rib ut tac'anjelak chiruheb li ras ritz'in. ⁴⁵ Laj li C'ajolbej. Abanan inc'a xinchal re nak te'c'anjelak chicuu. Xinchal

ban re nak tinc'anjelak chiruheb chixjunileb ut chixq'uebal lin yu'am re xtojbal rix lix maq'ueb, chan li Jesús reheb.

Li Jesús quixq'uirtesi laj Bartimeo li mutz'

⁴⁶ Que'cuulac Jericó ut nak qui-el chak li Jesús sa' li tenamit a'an rochbeneb lix tzolom nabal li tenamit que'taken re. Ut chunchu jun li mutz' chire be. Yo chi lemoxníc. Lix xc'aba', a'an aj Bartimeo, ralal laj Timeo. ⁴⁷ Nak quirabi li mutz' nak yo chi chalc li Jesús aj Nazaret, quixjap re chixyebal: —¡At Jesús, ralalat xc'ajol laj David, chacuuxtana taxak cuu! chan. ⁴⁸ Ut nabaleb li tenamit que'k'usuc re ut que'xye re, —¡Matchokin! chanqueb re. Ut a'an k'axal cui'chic cau quixjap re ut quixye, —¡At ralalat xc'ajol laj David, chacuuxtana taxak cuu! —⁴⁹ Nak quirabi a'an li Jesús quixakul ut quixtakla xbokbal li mutz'. Que'coeb chixc'ambal ut que'xye re: —Mach'in aach'ol. Quim. Yo chabokbal li Kacua'. —⁵⁰ Li mutz' quirisi lix t'icr lanlo cui'. Quicuacl sa' junpat ut co riq'uin li Jesús. ⁵¹ Li Jesús quixye re: —¿C'a'ru taciuj tinbanu ącue? —Ut li mutz' quixye: —Kacua', taciuj nak tañol li xnak' cuu. —⁵² Li Jesús quixye re: —Anakcuan naru tatxic. Xatq'uiria xban nak xapab nak cuan incuanquil chaq'uirtesinquel, chan re. Ut sa' junpat qui-iloc li mutz' ut co chirixeb.

11

Li Jesús quiq'uehe' xuanquil aran Jerusalén

¹ Que'nach'oc Jerusalén bar cuan cui' li cuib chi tenamit Betfagé ut Betania. Cuanqueb chiru li tzul Olivos nak li Jesús quiatinac riq'uin cuibeb lix tzolom. ² Quixye reheb: —Ayukex sa' li ch'ina tenamit a'an, ut nak texcuulak, tetau jun li ch'ina bür bac'bo. Li ch'ina bür a'an toj ma ani nabec chirix. Téhit chak ut tec'am chak arin. ³ Ut cui ani nayehoc ere, “¿C'a'ru yoquex?”, teye reheb nak li Kacua' taajok re li ch'ina bür ut a que ajcui' tixtakla chak hon, cha'kex reheb. —⁴ Que'coeb ut que'xtau li ch'ina bür bac'bo sa' be chire puerta. Ut que-oc chixhitbal. ⁵ Eb li cuanqueb aran que'xye: —¿C'a'ru yoquex? ¿C'a'ut nak yoquex chixhitbal li ch'ina bür? —⁶ Eb lix tzolom que'xye reheb li c'a'ru quixye li Jesús, ut eb a'an que'canabac re nak te'xc'am li ch'ina bür. ⁷ Que'xc'am riq'uin li Jesús ut que'xq'ue li rak'eb chirix li ch'ina bür ut li Jesús quitake' chirix. ⁸ Nabaleb que'xhel li rak'eb sa' be bar tanumek' cui' li Jesús. Cuan que'xyoc' chak ruk' che' ut que'xq'ue li xak sa' be. ⁹ Nak yo chi xic li Jesús cuan li yoqueb chi xic chiru ut cuan li yoqueb chi xic chirix. Japjogueb re chixyebal: —¡Aj Colol ke taxak! ¡Osobtesinbil taxak li xchal sa' xc'aba' li Kacua' Dios! ¹⁰ Osobtesinbil taxak li tenamit tataklank cui' li xchal chok' rekaj laj David li kaxe'tonil yucua'. Aj Colol ke taxak li xchal chak riq'uin li Dios, —chanqueb. ¹¹ Nak quicuulac Jerusalén, li Jesús qui-oc sa' li rochoch li Dios. Quixsuti rilbal chixjunil li c'a'ak re ru cuan aran. Xban nak qui-ecuu co aran Betania rochbeneb lix tzolom cablaju.

Li Jesús quixtz'ektana li jun ton chi higo

¹² Jo' cuulajak chic nak que'el aran Betania, quichal xtz'ocajic li Jesús. ¹³ Toj najt ajcui' cuan chak nak quiril jun ton li che' higo ut co chiribal ma cuan ru. Nak quicuulac cuan cui' li che' quiril nak mac'a'ru. Junes xak cuan xban nak toj maji' xk'ehil tauchink. ¹⁴ Ut li Jesús quixye re li jun ton chi higo: —Ma ani chic tatzacank re li nácacuuchin xban nak ma jun cua chic tatuchink, chan. Ut eb lix tzolom que'rabi li c'a'ru quixye.

Li Jesús quirisiheb laj c'ay sa' rochoch li Dios

¹⁵ Nak que'cuulac Jerusalén, li Jesús qui-oc sa' li rochoch li Dios. Quiril nak yoqueb chi c'ayinc ut yoqueb chi lok'oc aran. Qui-oc chixyolesinqueb. Quixbalk'usí lix mèxeb laj jalol tumin ut quixbalk'usí ajcui' líx temeb li yoqueb chi c'ayinc paloma. ¹⁶ Ut inc'a' chic quixcanabeb li tenamit chi numec' sa' rochoch li Dios chi cuan rikeb. ¹⁷ Ut qui-oc xch'olobanquil xyalal chiruheb ut quixye: —¿Ma inc'a' ta bi' tz'ibánbil sa' li Santil Huli c'a'ru quixye li Dios? “Li cuochoch, a'an re te'tijok cui' chixjunileb li tenamit.” Abanan laex xeq'ue li rochoch li Dios chok' xna'ajeb laj elk', chan li Jesús. ¹⁸ Eb li xbenil aj tij ut eb laj tz'ib nak que'rabi a'an que'oc chixc'ubanquil chanru nak te'xcamsi li Jesús. C'ajo' nak que'xucuac xban nak que'r'il nak sachsoqueb xch'ol li q'ula tenamit chirabinquil li tijleb li yo chixyebal li Jesús. ¹⁹ Nak qui-ecuu, qui-el li Jesús sa' li tenamit Jerusalén rochbeneb líx tzolom. ²⁰ Jo' cuulajak chic nak que'nume' cuan cui' lí xtonal li higo, que'r'il nak ac xchakic chi junaj cua. ²¹ Ut laj Pedro quinak sa' xch'ol nak li Jesús quixtz'ektaña li che' ut quixye re: —Kacuá', li li che' li xatz'ektaña. Xchakic chi junaj cua. —²² Ut li Jesús quixye reheb: —Chepab nak nim xcuanguil li Dios. ²³ Relic chi yal tinye ere li ani tixye re junak tzul, “Elen arin ut cut acuib sa' li palau”, ut cui inc'a' tixcuiba xch'ol, ut cui tixpab chi tz'akal nak tauxkli tixye, tauxmank li c'a'ru tixye. ²⁴ Jo'can nak tinye ere nak chixjunil li c'a'ru tetz'ama chiru li Dios nak yoquex chi tijoc, chepab chi tz'akal nak taq'uehek' ere ut tec'ul li c'a'ru tetz'ama. ²⁵ Nak yokex chi tijoc, checuy xmáç li ani cuan xmáç cheru re nak li kaYucua' li cuan sa' choxa tixcuy ajcui' emac laex. ²⁶ Ut cui inc'a' nequecuyebe xmáç li cuanqueb xmáç cheru, inc'a' ajcui' tixcuy emac laex li kaYucua' li cuan sa' choxa, chan li Jesús.

Eb laj tz'ib que'xcuech' rix xcuanguil li Jesús

²⁷ Que'suk'i cui'chic aran Jerusalén. Nak yo chi bęc li Jesús sa' li rochoch li Dios que'cuulac li xbenileb aj tij riq'uin. Ut que'cuulac laj tz'ib ut jo'can ajcui' li xakabnibileb chi c'anjelac sa' li rochoch li Dios. ²⁸ Que'xye re li Jesús: —¿Ani xtaklan chak acue chixbánunquil li c'a'ru yocat chixbánunquil? Ut ¿ani xq'uehoc acuanquil? chanqueb. ²⁹ Li Jesús quixye: —Lain tincuaj ajcui' patz'oc ere. Cui tesume li c'a'ru tinpatz' ere, lain tinye ere ani xq'uehoc incuanquil chixbánunquil li c'a'ru ninbánu. ³⁰ ¿Ani quitaklan chak re laj Juan chi cubisinc ha'? ¿Ma li Dios malaj ut cuink quitaklan chak re? Yehomak cue anakcuán, chan reheb. ³¹ Ut que'oc chixyebal chi ribileb rib: —¿C'a'ru takasume cui'? Cui takaye nak li Diós xtaklan chak re, a'an tixye ke c'a'ut nak inc'a' xkapab li c'a'ru quixye laj Juan. ³² Ut cui takaye nak cuink xtaklan chak re, te'pok' li tenamit sa' kabéñ, chanqueb. Eb a'an que'xxucua ru li tenamit xban nak chixjunileb neque'xnau nak laj Juan, a'an tz'akal profeta. ³³ Ut eb a'an que'chak'oc ut que'xye re li Jesús: —Lao inc'a' nakanau, chanqueb. Tojo'nak li Jesús quixye reheb: —Chi moco laín tinye ere ani quiq'uehoc incuanquil, chan reheb.

12

Lijaljoquil ru qtin chirixeb laj ilol re li acuimk inc'a' useb xna'leb

¹ Li Jesús qui-oc chixyebal li jaljoquil ru qtin reheb ut quixye chi jo'ca'in: Jun li cuink quirau jun sir li racuimk uvás ut quixsut sa' corral. Quixyib jun xna'aj bar te'xyatz' cui' li uvás ut quixyib ajcui' jun ch'ina cab najt xteram re li tac'ac'alenk re li acuimk. Quixsiq'ueb laj ilol re li racuimk. Ut laj echal re li acuimk co sa' jalanil tenamit. ² Nak quicuulac xk'ehil xsic'bal ru li acuimk, laj echal re quixtakla jun líx mos riq'uineb laj ilol re chixc'ulbal li ru li racuimk

li jo' q'uijal tatz'ak a'an. ³ A'ut eb laj ilol re li acuimk que'xchap li mos ut que'xsac'. Ut que'xtakla chi māc'a' que'xq'ue re. ⁴ Laj échal re li acuimk quixtakla jun chic lix mos riq'uineb. Ut que'xjor xjolom chi pec. K'axál ra que'xbanu re. ⁵ Ut laj echal re quixtakla cui'chic jun lix mos ut li jun a'an que'xcamsi. Ut toj nabal cui'chic lix mos quixtakla riq'uineb laj ilol re li racuimk. Cuan yal que'xsac' ut cuan que'xcamsi. ⁶ Ca'aj chic li ralal quicana, li k'axal naxra. —Li cualal te'x-oxlok'i, chan sa' xch'ol. Jo'can nak quixtakla li ralal riq'uineb. ⁷ Nak quicuulac li ralal, eb laj ilol re li acuimk que'xye chi ribileb rib, —A'an li ralal li tæchanink re li na'ajej. Kacamsihak, chanqueb, ut lão chic toechanink re. —⁸ Jo'can nak que'xchap. Nak ac que'xcamsi que'xcut chak jun pac'al li ch'och'. ⁹ Ut li Jesús quixye reheb: —¿C'a'ru tixbanu laj échal re li acuimk nak nequec'oxla laex? Tächalk ut tixcamsiheb laj ilol re li racuimk, ut jalan chic aj e tixq'ue li jun s̄ir chi uvas. ¹⁰ ¿Ma inc'a' xeril sa' li Santil Hū li naxye chi jo'ca'in?

Li pec li que'xtz'ektañna laj cablanel, a'an li k'axal lok' li quiq'ueman chok' xxuc li cab.

¹¹ Li Kacua' a'an quixq'ue xlok'al li pec. Ut a'an xsachba ch'olej chok' ke lão. —(Sal. 118:22, 23)

¹² Eb laj tij ut eb laj tz'ib ut eb li xakabanbileb chi c'anjelac sa' rochoch li Dios que'xc'oxla raj xchapbal li Jesús re te'xq'ue sa' tz'alam xban nak que'xtau ru nak chirixeb a'an yo chi atinac nak quixye li jaljoquil ru atin a'an. Abanan que'xucuac xbaneb li tenamit. Jo'can nak que'xcanab ut que'el sa' li na'ajej a'an.

Chikaq'uehak li katoj re li acuabej

¹³ Mokon chic que'xtakla riq'uin li Jesús cuib oxibeb laj fariseo rochbeneb cuib oxibeb li neque'oquen chirix laj Herodes re xsic'bil c'a'ru tapaltok cui' riq'uin li ratin re nak te'xchap. ¹⁴ Que'cuulac riq'uin li Jesús ut que'xye re: —At tzolonel, nakanau nak laat yäl nacat-atinac ut inc'a' nacaxucua ruheb li tenamit. Yalak ani aj e nacayé lix yalal. Ut nacac'ut chiruheb li c'a'ru naraj li Dios. Ye ke, ¿ma us xq'uebal li toj re li acuabej malaj ut inc'a'? ¿Ma takaq'ue malaj ut inc'a'? chanqueb. ¹⁵ Li Jesús naxnau nak aj ca'pac'aleb. Quixye reheb: —¿C'a'ut nak nequeraj xyalbal cuix? C'amomak chak li tumin. Cülak, chan reheb. ¹⁶ Ut eb a'an que'xc'ut li tumin chiru. Ut li Jesús quixye reheb: —¿Ani aj e li jalal um chí li cuan chiru? Ut ¿ani aj c'aba' li tz'ibánbil chiru? —Eb a'an que'chak'oc ut que'xye: —Re li acuabej, chanqueb. ¹⁷ Ut li Jesús quixye reheb: —Tojomak re li acuabej li c'a'ru re li acuabej ut tojomak re li Dios li c'a'ru re li Dios, chan. Ut c'ajo' nak que'sach xch'oleb xban li ratin.

Li Jesús quixch'olob xyalal li cuaclijiqueb li camenak chi yo'yo

¹⁸ Tojo'nak que'cuulac riq'uin li Jesús cuib oxib laj saduceo. Eb a'an inc'a' neque'xpab nak te'cuaclik cui'chic chi yo'yo li camenak. Que'xye re li Jesús: ¹⁹ —At tzolonel, laj Moisés quixtz'iba jun kachak'rabinquil ut quixye chi jo'ca'in: Cui junak cuink tacamk ut tixcanab li rixakil chi māc'a' ralal xc'ajol, tento nak tac'amek' lí rixakil xban li ritz'in li camenak re nak tacuank ralal xc'ajol sa' xc'aba' li camenak. ²⁰ Que'cuán cuukub li cuink ritz'ineb rib. Li asbej quixc'am rixakil ut quicam chi inc'a' quixcanab ralal xc'ajol. ²¹ Ut quic'ame' li iixk xban li itz'inbej. Ut quicam ajcui' a'an chi inc'a' quixcanab ralal xc'ajol. Ut jo'can cui'chic li rox itz'inbej. ²² Li iixk a'an quic'ame' xbaneb li cuukub. Ut ma jun reheb quixcanab ralal xc'ajol. Ut quicam ajcui' li iixk. ²³ Sa' xcuaclijiqueb li camenak chi yo'yo, nak te'cuaclik eb a'an, ¿ani aj ixakil tacanák cui' lí iixk a'an xban nak cuukub lix belom quicuan? chanqueb. ²⁴ Quichak'oc li Jesús ut quixye reheb: —Laex inc'a' nequetau xyalal xban

nak inc'a' nequetau ru li Santil Hu chi moco lix nimal xcuauquil li Dios. ²⁵ Nak te'cuaclik chi yo'yo sa' xyānkeb li camenak, inc'a' chic te'sumlak chi moco te'sumubāk chic. Jo'keb ban chic li ángel sa' choxa. ²⁶ Ut chirix lix cuaclijiqueb li camenak chi yo'yo, ¿ma inc'a' erilom sa' lix hu laj Moisés li c'a'ru quiyeh'e re xban li Dios nak quiatinaç chak sa' li q'uix li yo chi c'atc? Quixye chi jo'ca'in, "Lain lix Dios laj Abraham, lix Dios laj Isaac ut lix Dios laj Jacob", chan li Dios. ²⁷ A'an retalil chok' ke nak toj yo'yoqueb chiru li Dios usta que'cam. Li Dios moco xDiobeb ta li camenakeb; xDiobeb ban li yo'yoqueb. Jo'can nak lajex chi tjc inc'a' nequetau xyālal, chan li Jesús reheb.

Li chak'rab k'axal nim xcuauquil

²⁸ Quicuulac jun reheb laj tz'ib. Ut quirabi nak yoqueb chixcuech'inquil ribeb. Quixq'ue retal nak li Jesús quixchak'beheb chi us, ut quixpatz' re li Jesús: —¿Bar cuan reheb li chak'rab li k'axal nim xcuauquil? —²⁹ Li Jesús quichak'oc ut quixye re: —Li xben chak'rab, li k'axal nim xcuauquil, a'an a'in: Abihomak laex aj Israel, li Kacua' li kaDios jun ajcui'. ³⁰ Tara li Kacua' la Dios chi anchal ach'ol ut chi anchal la cuam ut chi anchal la c'a'ux ut chi anchal la metz'eu. A'an a'in li chak'rab li k'axal nim xcuauquil. ³¹ Ut li xcab chanchan ajcui' a'an: Tara la cuas acuitz'in jo' nak nacara acuib laat. Mac'a' chic junak chak'rab nim xcuauquil chiruheb li cuij a'in, chan. ³² Laj tz'ib quichak'oc ut quixye re: —Us li xaye at tzolonej. Yal li xaye nak jun ajcui' li Dios cuan ut mac'a' chic junak chirix a'an. ³³ Tento nak takara li Dios chi anchal li kach'ol, chi anchal li kac'a'ux, chi anchal li kám ut chi anchal li kametz'eu. Ut takara li kas kitz'in jo' nak nakara kib lao. A'an k'axal nim xcuauquil chiruheb chixjunil li c'atbil mayej ut li mayejanbil xul, chan. ³⁴ Li Jesús quixq'ue retal nak li cuij quixnau xsumenquil ut quixye re: —Yal ca'ch'in aj chic ma' nacak'axtesi acuib rubel xcuauquil li Dios, chan. Ut ma' jun chic que'raj patz'oc xban nak qui-oc xc'a'uxeb.

Li Cristo xcomoneb li ralal xc'ajol laj David

³⁵ Mokon chic nak cuan sa' rochoch li Dios, li Jesús yo chixch'olobanquil li xyālal chiruheb ut quixye: —¿C'a'ut nak eb laj tz'ib neque'xye nak li Cristo, a'an xcomoneb li ralal xc'ajol laj David? ³⁶ Laj David quixye li c'a'ru quirec'a sa' xch'ol xban li Santil Musik'ej ut quixye chi jo'ca'in:

Li Kacua' Dios quixye re laj Colol cue, C'ojlan sa' lin nim uk' toj retal ting'ueheb li xic' neque'illoc acue rubel laj cuauquil. (Sal. 110:1)

³⁷ Li rey David quixye "aj Colol cue" re li Kacua' usta a'an xcomoneb li ralal xc'ajol, chan li Jesús. Ut li q'uila tenamit que'rabi li rātin chi sa sa' xch'oleb.

Li Jesús quixk'useb laj tz'ib

³⁸ Nak yo chixch'olobanquil li xyālal chiruheb, li Jesús quixye: —Metzol erib riq'uineb laj tz'ib li neque'raj bēc chi najt rok li rak'eb re xc'utbal nak cuanqueb xcuauquil. Eb a'an neque'cuulac chiruheb nak te'q'uehek' xllok'al sa' eb li be. ³⁹ Ut nak cuanqueb sa' li cab li neque'xch'utub cui' ribeb laj judío, neque'raj c'ojlac sa' li na'ajej k'axal lok' ut neque'raj cuanc chi xjolomil li mex nak neque'xic chi cua'ac sa' junak nink'e. ⁴⁰ Neque'xmak' li c'a'ru cuan reheb li xmalca'an ut re xmukbal li māusilal neque'xbanu, najt rok neque'tijoc chiruheb li tenamit. Ut xban a'an k'axal ra cui'chic te'xtoj cui' li māc neque'xbanu.—

Lix mayej li xmalca'an neba'

⁴¹ Sa' jun cutan quicuulac li Jesús sa' rochoch li Dios. Quic'ojla chixc'atklix caxil li mayej. Yo chiribal li tenamit nak yoqueb chixq'uebal li tumin

sa' li cax. Nabaleb li biom nabal lix mayej yoqueb chixq'uebal. ⁴² Quichal ajcui' jun xmålca'an neba'. Ut quixq'ue cuib chi tumin jo' tana li jun centavo. ⁴³ Tojo'nak li Jesús quixbokeb lix tzolom ut quixye rebeb: —Relic chi yal tinye ere nak li xmålca'an neba' nabal xq'ue chiru li mayej li xe'xq'ue chixjunileb. ⁴⁴ Chixjunileb a'an xe'xq'ue li na-ela'an chiruheb. A'ut li iixk a'in sa' neba'il xq'ue chixjunil li jo' nimal cuan re.—

13

Tacuulak xk'ehil nak tajuq'uek' li rochoch li Dios

¹ Nak qui-el chak li Jesús sa' rochoch li Dios, jun rebeb lix tzolom quixye re: —At tzolonej, il, ma c'ajo' xchak'al ru li cab a'in ut ma c'ajo' xchak'al ru li pec yíbanbil cui'. —² Li Jesús quichak'oc ut quixye re: —Us ajcui' nak teril chi us xban nak tacuulak xk'ehil nak ma jun chic li pec a'an tacanák sa' xna'aj chi inc'a' ta tajuq'uek', chan li Jesús.

Retalil roso'jic li ruchich'och'

³ Que'coeb sa' li tzul Olivos sa' xca'yabal li rochoch li Dios. Li Jesús quic'ojla aran ut nak cuan xjunes quipatz'e' re xbaneb laj Pedro, laj Jacobo, laj Juan ut laj Andrés. ⁴ —Ye ke jok'e tac'ulmank li yocat chixyebal chirix li rochoch li Dios ut ⁵ c'a'ru retalil tacuank nak talajc'ulmank li c'a'ak re ru a'in? —⁵ Li Jesús quichak'oc ut quixye: —Cheq'ue retal re nak ma ani tabalak'ink ere. ⁶ Nabal te'chálk chi balak'inc ut tole'xye, "Lain li Cristo", cha'keb. Ut nabal te'balak'ik xbaneb. ⁷ Nak terabi nak yo li plet ut nak terabi resil nak ticlaci re li plet yalak bar, mexxucuac xban nak tento nak tac'ulmank chi jo'can. Abanan moco ac a'an ta roso'jiqueb li cutan. ⁸ Nabal li tenamit te'pletek riq'unin jalan chic tenamit. Ut eb li acuabej te'xpleti ribeb. Talajcuank hic sa' nabal chi na'ajej ut tacuank cue'ej. Abanan a'an ya' xticlajic li raylal tachalk. ⁹ A'ut laex cheq'uehak retal li raylal tachalk sa' eben. Texk'axtesik chiruheb laj rakol atin ut texsaq'uek' sa' li cab li neque'xch'utub cui' ribeb laj judío. Texc'amek' chiruheb li acuabej ut chiruheb li rey sa' inc'aba' lain ut taruk tech'olob xyalal li cuatin chiruheb. ¹⁰ Tento nak xben cua tasutunk xch'olobanquil resilal li colba'ib chiruheb chixjunil li tenamit nak toj maji'na-oso'li ruchich'och'. ¹¹ Ut nak texchapek' ut texk'axtesik chiruheb li acuabej, mex'oxlac chirix li c'a'ru teye. Li c'a'ru teye sa' li honal a'an macua' c'oxlanbil atin li teye. Aban li tixye ere li Santil Musik'ej, a'an li teye. ¹² Eb li cuink te'xk'axtesi chi camsic li ras ritz'in. Ut li yucua'bej tixk'axtesi li ralal. Ut li alalbej c'ajolbej te'xq'ue chi camsic li na'bej yucua'bej. ¹³ Ut xic' tex-ilek' xbaneb chixjunileb sa' inc'aba' lain. Ut li tixcuy xnumsinquil li raylal a'in toj sa' roso'jic lix yu'am, a'an tacolek' xban li Dios. ¹⁴ Chetzolak rix chi us li c'a'ru quixye li profeta Daniel re nak tetu ru li c'a'ru tac'ulmank. A'an quixye nak eb laj balak' te'chalk ut tole'xq'ue li k'axal yibru ut xucuajel ribil sa' li rochoch li Dios li macua' xc'ulub cui' cuanc. Nak teril nak yoqueb chixmuxbal ru li rochoch li Dios, laex li cuanquex Judea chex-elelik sa' junpat ut texxic toj sa' li tzul. ¹⁵ Cui cuan chak junak sa' xben li rochoch nak tac'ulmank a'an, chi cubec chak ut tic taelelik ut inc'a' chic taoc sa' rochoch chirisinquil li c'a'ru cuan re. ¹⁶ Cui ani cuan chak sa' xc'alebal inc'a' chic tasuk'ik sa' cab chixxocbal li rak'. ¹⁷ K'axal ra cui'chic li elelic chok' rebeb li yaj aj iixk ut li yoqueb chi tu'resink sa' eb a cutan a'an. ¹⁸ Chextijok ut chetz'ama chiru li Dios re nak inc'a' tac'ulmank a raylal a'in sa' habalk'e. ¹⁹ Sa' eb li cutan a'an ma ca'ch'in li raylal tacuank. Ma jun cua quic'ulman chi jo'can chalen chak sa' xticlajic nak li Dios quixyib li ruchich'och', chi moco

tac'ulmank chi jo'can mokon. ²⁰ Cui ta mac'a sa' xch'ol li Kacula' xrakbaleb li cutan a'an ma ani raj tacolek'. Abanan nim xrahom li Kacula' sa' xbeneb li sic'bileb ru xban. Jo'can nak cuan sa' xch'ol li Kacula' xrakbal eb li cutan a'an re nak te'colek'. ²¹ Jo'can nak ani tayehok ere, "Cue' li Cristo", malaj, "le' cuan li Cristo", mepab li c'a'ru te'xye. ²² Nabaleb aj balak' te'ulunk ut te'xye nak a'aneb li Cristo. Ut cuan te'xye nak a'aneb li profeta. Nabal li c'a'ak re ru te'xc'utbesi ut sachba ch'olej telaje'xbanu re xbalak'inquileb li sic'bileb ru xban li Dios. ²³ Abanan ac xinye ere li c'a'ru tac'ulmank. Jo'can nak meq'ue erib chi balak'ic.

Nak tol-elk cui'chic li C'ajolbej Dios

²⁴ Ut sa' eb li cutan a'an nak tac'ulmank li raylal, ták'ojyinok' ru li sak'e ut li po inc'a' chic tacutanol' ru. ²⁵ Taec'ank ru li choxa ut li chahim telaje't'anek'. ²⁶ Nak acak x-ec'an ru li choxa, te'ril cuu lain li C'ajolbej nak yo'kin chak chi chalc sa' li chok riq'unin lix nimal incuanquil ut lin lok'al. ²⁷ Tojo'nak tintaklaheb lin ángel ut te'xch'utub li sic'bileb ru inban li cuankeb yalak bar sa' chixjunil li ruchich'och'. ²⁸ Cheq'uehak retal c'a'ru naxbanu li jun ton chi higo. Nak nak'unk'ut chak li xak chi elc, riq'unin a'an tenau nak yo' chak chi nach'oc li sak'ehil. ²⁹ Jo' nak li higo naxc'utbesi retalil li sak'ehil, jo'can ajcui' nak li raylal talaje'c'ulmank tixc'utbesi retalil nak yo' chi cuulac xk'ehil nak tolinelk cui'chic lain li C'ajolbej. ³⁰ Relic chi yal tinye ere nak talaje'c'ulmank chixjunil li c'a'ak re ru a'in nak toj maji' neque'oso' li tenamit a'in. ³¹ Li choxa ut li ruchich'och' talaje'osok'. Abanan li c'a'ru ninye inc'a' tacanak' yal chi jo'can. Talajc'ulmank ban chixjunil li c'a'ak re ru xinye. ³² Abanan ma ani nana'oc re jok'e tacuulak xk'ehil li cutan a'an chi moco li honal jok'e tac'ulmank. Eb li ángel sa' choxa inc'a' neque'xnau chi moco lain li C'ajolbej ninna'oc re. Ca'aj cui' li Dios Acuabej nana'oc re jok'e tac'ulmank a'in. ³³ Jo'can nak yo'on cuankex. Chexyo'lek ut chextijok xban nak inc'a' nequenau jok'e tacuulak xk'ehil inc'ulunlic. ³⁴ Chanchan jun li cuink najt co sa' xviaj. Toj maji' naxic nak quixq'ueheb xcuanguileb laj c'anjel chiru. Quixcanab xc'anjel li junjunk. Ut quixye re laj ilol cab nak junelic yo'on cuank. ³⁵ Jo'can ajcui' laex. Junelic yo'on cuankex xban nak inc'a' nequenau jok'e honal tinc'ulunk. Mare tinchálk ecuu, malaj tuktu k'ojyin, malaj ut nak nayabac laj tzo' xul malaj ut ek'ela. ³⁶ Yo'on cuankex re nak inc'a' toleintau chi cuarc xban nak inc'a' nequenau jok'e tinc'ulunk. ³⁷ Ut li c'a'ak re ru ninye ere lain, a'an ajcui' ninye reheb chixjunileb re nak yo'on cuankeb, chan li Jesús.

14

Que'raj xchabpal li Jesús

¹ Cuib cutan chic ma nacuulac xk'ehil li nink'e re xjulticanquil li reliqueb laj Israel sa' li tenamit Egipto. Pascua nayeman re li nink'e a'an. A'an ajcui' xk'ehil li nink'e nak neque'xcua' li caxlan cua chi mac'a' xch'amal. Sa' eb li cutan a'an eb lix benil aj tij ut eb laj tz'ib yoqueb chixsic'bal chanru nak te'xyo'ob atin chirix li Jesús re nak te'xq'ue chi camsic. ² Ut que'xye chi ribileb rib: —Inc'a' takachap li Jesús nak yok li nink'e xban nak te'pok' li tenamit kiq'unin ut te'oc chi pletic, chanqueb.

Nak quiyule' li sununquil ban sa' xjolom li Jesús xban jun li iixk

³ Li Jesús cuan aran Betania sa' rochoch laj Simón li saklep rix. Chunchu sa' mex nak quichal jun li iixk. Cuan chak jun ch'ina botella sununquil ban riq'unin. Lix na'aj li ban a'an yibabil riq'unin chabil pec alabastro

xc'aba' ut li sununquil ban a'an nardo xc'aba' ut k'axal terto xtz'ak. Li iixk quixtok xcux li ch'ina botella ut quixq'ue li ban sa' xjolom li Jesús. ⁴ Cuan li que'josk'o' ut que'xye chi ribileb rib: —¿C'a'ut nak xsach li sununquil ban a'an chi mac'a' rajbal? ⁵ Xru raj xc'ayiman chi numenak oxib ciento denarios (Q150) ut xkajeq'ui raj reheb li neba', chanqueb. Ut que'oc chixcuech'inquil li iixk. ⁶ Ut li Jesús quixye reheb: —¿C'a'ut nak yoquex chixch'i'ch'i'inquil li iixk? Canabomak xcuech'inquil xban nak us li xbanu cue. ⁷ Li neba' junelic cuanqueb sa' eyank. Yalak jok'e naru teteenk'aheb. Abanan laín moco cuanquin ta junelic eriq'uin. ⁸ Li iixk a'in xbanu li jo' q'ual xru xbanunquil. Mají' nincam abanan ac xinixban re lin mukbal. ⁹ Relic chi yal tinye ere nak tayemank resil li colba-ib yalak bar, tayemank ajcui' resil li c'a'ru xbanu li iixk a'in re xjulticanquil a'an, chan. ¹⁰ Ut laj Judas Iscariote, xcomoneb li cablaju, co' riq'uineb lix benil aj tij chixyebal reheb nak tixk'axtesi li Jesús sa' ruk'eb. ¹¹ Ut eb laj tij nak que'rabi a'an c'ajo' nak que'saho' sa' xch'oleb ut que'xyechi'i xtumin. Ut laj Judas quixsic' xyalal chanru nak tixk'axtesi li Jesús sa' ruk'eb.

Xticlajic chak li Lok'onincre Xjulticanquil lix Camic li Jesucristo

¹² Sa' li xben cutan re li nink'e nak neque'xcua' li caxlan cua chi mac'a' xch'amal, neque'xmaya ja jun li carner. Li nink'e a'an re xjulticanquil li reliqueb laj Israel sa' li tenamit Egipto. Eb lix tzolom que'xye re li Jesús: —¿Bar tacuaj takacauresi chak li na'ajej re tatzaca cui' li mayejanbil xul? chanqueb. ¹³ Li Jesús quixye reheb cubi lix tzolom: —Ayukex sa' li tenamit. Aran tec'ul jun li cuink yo' chak chixc'ambal jun cuc xha'. Tetake a'an. ¹⁴ Bar taoc a'an aran ajcui' tex-oc laex. Ut teye re laj echal cab, "Chan laj tzolonel, ¿bar len cuan li na'ajej tacu'a'ak cui' rochbeneb lix tzolom?" cha'kex re. ¹⁵ Ut a'an tixc'ut cheru jun nimla na'ajej takec' sa' xca' tasalil li cab. Ac yibanbil li na'ajej. Ut aran toxecauresi li nink'e chok' ke, chan li Jesús. ¹⁶ Que'coeb sa' li tenamit ut qui-uxman jo' quixye li Jesús. Ut aran que'xcauresi li nink'e. ¹⁷ Nak qui-ecuu, quicuulac li Jesús rochbeneb lix tzolom. ¹⁸ Nak ac yoqueb chi cua'ac sa' li mex, li Jesús quixye reheb lix tzolom, —Relic chi yal tinye ere nak jun ere laex ták'axtesink cue sa' ruk'eb li xic' neque'iloc cue, chan. ¹⁹ Ut eb a'an que'raho' sa' xch'oleb ut eb li junjunk que'oc chixyebal re li Jesús: —¿Ma laín ta bi' tink'axtesink acue, Kacua'? chanqueb. ²⁰ Ut li Jesús quichak'oc ut quixye reheb: —Li ták'axtesink cue, a'an jun ere laex li yo' chixtz'abal lix caxlan cua cuochben sa' li sec'. ²¹ Relic chi yal laín li C'ajolbej tinc'ul li c'a'ru tz'ibanol chak retalil chicuix. Abanan rayjal cuan sa' xben li cuink li ták'axtesink cue. K'axal us raj chok' re li cuink a'an nak inc'a' ta quioyo'la. — ²² Ut nak yoqueb chi cua'ac, li Jesús quixchap li caxlan cua. Quixbantioxi chiru li Dios, quixjachi, tojo'nak quixjeq'ui reheb lix tzolom. Ut quixye reheb: —Cua'inkex. A'an a'in intz'ejcual. — ²³ Ut quixchap ajcui' li sec' re uc'ac ut quixbantioxi chiru li Dios, tojo'nak quixq'ue reheb ut chixjunileb que'uc'ac. ²⁴ Ut li Jesús quixye reheb: —A'an a'in lin quiq'uel li tahoyek' sa' xc'aba'eb chixjunileb ut a'an taxakabank xcuauquil li Ac' Contrato. ²⁵ Relic chi yal tinye ere nak inc'a' chic tincuu'c' lix ya'al rù li uva toj tacuulak xk'ehil nak tincuu'c' cui'chic sa' lix nimajcual cuanquilal li Dios, chan li Jesús.

Li Jesús quixye nak tatz'ektanak xbaneb lix tzolom

²⁶ Ut nak ac xe'rake' xbichanquil jun li bich, que'coeb sa' li tzul Olivos. ²⁷ Ut li Jesús quixye reheb: —Chejunilex laex tach'inak le ch'ol ut tinecanab injunes chiru a'ojyin a'in xban nak jo'ca'in tz'ibanol retali' xbaneb li profeta: Tincanab chi camsic' laj ilol reheb li carner ut eb li carner te'xcha'cha'i

ribeb. ²⁸ Ut nak acak xincuaci cui'chic chi yo'yo sa' xyānkeb li camenak, lajñ xben cua tinxic chéru aran Galilea. — ²⁹ Ut laj Pedro quixye re: — Usta chixjunileb tate'xcanab abanan lajñ inc'a' tatincanab. — ³⁰ Ut li Jesús quichak'oc ut quixye re: —Relic chi yal tiney acue nak toj mají' nayabac xca' sut li tzo' xul nak laat ac xaye oxib sut nak inc'a' nacanau cuu. — ³¹ Ut laj Pedro quixye cui'chic chi cau: —Ma jok'e tiney nak inc'a' ninnau acue usta tine'xcamási acuochben, chan. Ut jo'can que'xye chixjunileb lix tzolom.

Nak quitijoc chak li Jesús aran Getsemani

³² Li Jesús quicuulac rochbeneb lix tzolom sa' li na'ajej Getsemaní xc'aba'. Li Jesús quixye reheb lix tzolom: —Canäkex arin. Xic cue chi tijoc lajñ. — ³³ Ut quixc'am oxib lix tzolom chirix. A'aneb laj Pedro, laj Jacobo ut laj Juan. Ut c'ajo' nak qui-oc chi yot'ec' xch'ol li Jesús. ³⁴ Quixye reheb lix tzolom: —Cuan jun raylal sa' inch'ol yo' chinyot'bal. Lajñ nacuec'a nak inc'a' chic tincuy. Canakex arin ut yo'lenkex. — ³⁵ Ut li Jesús quibec chic ca'ch'in ut quixcuik'ib rib sa' ch'och' ut qui-oc chi tijoc ut quixtz'ama re li Kacu'a Dios ut quixye: —Cui ta tixq'ue rib, inc'a' raj tinc'ul li raylal a'in. — ³⁶ Ut quixye ajcui': —At inYucua', lajñ ninnau nak chixjunil narú xbanunquil chäcuu. Cui ta naru inc'a' raj tinc'ul li raylal a'in. Abanan chi-uxmank li c'a'ru nacacuaj laat ut mäcu'a' li nacuaj lajñ. — ³⁷ Ut nak quisuk'i chak li Jesús, quixtauheb chi cuarc lix tzolom. Ut quixye re laj Pedro: —At Simón, ¿ma yoquex chi cuarc? ¿Ma inc'a' xru xexyo'lec jun orak cuochben? ³⁸ Chexyo'lek ut chextijok re nak inc'a' teq'ue ərib chi alec. Laex nequeraj raj xbanunquil li us, abanan ejunes inc'a' texruk. — ³⁹ Ut li Jesús co cui'chic chi tijoc ut quixtz'ama cui'chic sa' lix tij nak inc'a' raj tixc'ul li raylal. ⁴⁰ Ut nak quisuk'i cui'chic li Jesús quixtauheb cui'chic chi cuarc lix tzolom xban nak ma ca'ch'in lix cuaraheb. Ut eb a'an inc'a' chic neque'xtau c'a'ru te'xye. ⁴¹ Ut quisuk'i cui'chic sa' rox sut, coxtauheb cui'chic chi cuarc ut quixye reheb: —¿Ma toj yoquex ajcui' chi cuarc? Tz'akalak li hilanc xebanu. Ac xtau xk'ehil nak lain li C'ajolbej tink'axtesik sa' ruk'eb laj mac. ⁴² Cualinkex anakcuan, ut yo'keb chixc'ulbal li yo' chi chalc chi k'axtesinc cue, chan.

Nak que'xc'am chi prexil li Jesús

⁴³ Toj yo ajcui' chi atinac li Jesús riq'uineb lix tzolom nak quicuulac lajñ Judas. A'an jun reheb li cablaju. Nabal que'chal rochben lajñ Judas taklanibileb chak xbaneb li xbenil aj tij ut xbaneb laj tz'ib. Taklanibileb ajcui' xbaneb lajñ c'amol be sa' li rochoch li Dios. Cuanqueb xch'ich' ut cuanqueb xche'. ⁴⁴ Ut laj Judas quixye reheb nak tixq'ue jun retalil chanru nak tixk'axtesi li Jesús. Ac quixye reheb: —Li ani tincuutz' ru, a'an li tecchap ut tec'am. — ⁴⁵ Ut nak quicuulac lajñ Judas quijiloc chixc'atk, ut quixye: —At Kacu'a, — ut quirutz' ru. ⁴⁶ Ut eb a'an que'xchap li Jesús re nak te'xc'am riq'uin laj rakol atin. ⁴⁷ Ut jun reheb li rochben li Jesús quirisi chak lix ch'ich' ut quixch'ot lix xic lix mos li xyucua'ileb aj tij. ⁴⁸ Ut li Jesús quixye reheb li tenamit: —¿Ma lain ta bi' aj əlk' nak xexchal chinchapbal riq'uin che' ut riq'uin ch'ich'? ⁴⁹ Rajlal cutan cuanquin sa' eyank chetzelbal sa' rochoch li Dios ut inc'a' quinechap. Abanan xc'ulman chi jo'ca'in re nak tatz'aklok ru li tz'ibanal sa' li Santil Hu, — chan li Jesús. ⁵⁰ Ut chixjunileb lix tzolom que'elelic ut que'xcanab xjunes li Jesús sa' ruk'eb li xic' neque'iloc re. ⁵¹ Jun li al yo' chi takenc re li Jesús lanlo sa' xt'icr. A'an que'xchap raj. ⁵² Abanan a'an quielelic chiruheb. Quicana lix t'icr sa' ruk'eb ut quielelic chi t'ust'u.

Que'xtz'il qatin chirix li Jesús nak cuan chiru lix yucua'ileb aj tij

⁵³ Tojo'nak que'xc'am li Jesús riq'uin lix yucua'ileb aj tij ut que'ch'utla chixjunileb lix benil aj tij. Ut que'ch'utla ajcui' eb laj c'amol be sa' rochoch li Dios ut eb laj tz'ib. ⁵⁴ Ut laj Pedro chi najt yo chixtakenuil li Jesús ut quicuulac toj chi ru'uj nebal sa' rochoch lix yucua'il eb aj tij ut aran quic'ojla chire xam chi k'ixinc rochbeneb laj c'ac'alenel. ⁵⁵ Eb li xbenil aj tij ut li neque'tz'iloc atin yoqueb chixsic'bal chanru nak te'xyo'ob junak atin chirix li Jesús re nak te'xq'ue chi camsic. Abanan inc'a' que'xtau. ⁵⁶ Nabal li que'y'o'ban tic'ti' chirix ut inc'a' natukla ru li ratineb xban nak jalan jalank neque'xye li junjunk. ⁵⁷ Cuan li que'xakli chixyebal li yo'obanbil atin chirix. ⁵⁸ Ut que'xye: —Lao quikabi nak quixye, "Lain tinjuc' li rochoch li Dios li yibanbil xbaneb li cuink, ut lain chiru oxib cutan tinyib jun chic, aban macua' yibanbil xbaneb li cuink." Jo'can quixye li cuink a'in, chanqueb. ⁵⁹ Abanan inc'a' nach'ola ru li ratineb xban nak jalan jalank neque'xye li junjunk. ⁶⁰ Ut li xyucua'ileb aj tij quixakli sa' xyankeb ut quixye re li Jesús, —¿Ma mact'a' nacaye laat chirix li yoqueb chixyebal chäcuix? — ⁶¹ Ut li Jesús ma jun atin quixye. Ut li xyucua'ileb aj tij quixpatz' cui'chic re li Jesús ut quixye re: —¿Ma laat li Cristo li Ralal li nimajcual Dios? chan re. ⁶² Ut li Jesús quixye: —Lain. Ut sa' jun cutan tineril lain li C'ajolbej nak c'ojc'okin sa' xnim uk' li nimajcual Dios ut teril ajcui' nak yokin chak chi chalc sa' li chok sa' choxa, chan. ⁶³ Nak quirabi li quixye li Jesús, li xyucua'il eb aj tij quixpej li rak' xban xjosk'il ut quixye: —¿C'a' chic ru aj e nak toj te'xye ke c'a'ru xmact? ⁶⁴ Ac xerabi nak xjuntak'eta rib riq'uin li Dios. ¿C'a'ru nequeye? ¿Ma cuan xmact malaj ut inc'a'? chan. Ut chixjunileb que'xye nak cuan xmact re camsic. ⁶⁵ Cuan li yoqueb chi chubanc re ut cuan ajcui' que'tz'apoc re li ru li Jesús riq'uin t'icr re nak inc'a' tailok, ut que'xsac' ut que'xye re: —Ye ke ani xsac'oc acue, chanqueb. Tojo'nak que'xk'axtesi sa' ruk'eb laj c'ac'alenel prex ut eb a'an que'xsac' cui'chic.

Laj Pedro quixye nak inc'a' naxnau ru li Jesús

⁶⁶ Ut nak cuan laj Pedro tak'a chi ru'uj nebal, quicuulac jun li ixb, xmos li xyucua'il eb aj tij. ⁶⁷ Ut li ixb a'an quiril laj Pedro nak yo chi k'ixinc chire li xam. Quixca'ya ut quixye re: —Laaat xat-ochbenin re li Jesús aj Nazaret, chan re laj Pedro. ⁶⁸ Ut nak quichak'oc laj Pedro, quitic'ti'ic ut quixye: —¿Ani nacaye? Lain inc'a' ninnau ru ani li nacaye. — Ut laj Pedro qui-el chire li oquebal ut li tzo' xul quiyabac. ⁶⁹ Ut li ixb nak quiril cui'chic laj Pedro, qui-oc chixyebal reheb li cuanqueb aran: —Li cuink a'in, a'an jun reheb lix tzolom li Jesús, chan. ⁷⁰ Ut laj Pedro quitic'ti'ic cui'chic. Ut ac junpat na chic nak eb li cuanqueb aran que'xye cui'chic re laj Pedro: —Yal. Laat xcomoneb xban nak la cuatinobal nac'utuc re nak laat aj Galilea. — ⁷¹ Ut laj Pedro qui-oc chi majecuanc ut quixye: —Cutan saken chiru li Dios nak inc'a' ninnau ru li cuink li nequeye. Cui tic'ti'li yoquin chixyebal, chinixtz'ektanak li Dios, chan. ⁷² Tojo'nak quiyabac cui'chic xca' sut li tzo' xul. Ut quinak sa' xch'ol laj Pedro li atin quiyeh'e' re xban li Jesús, "Nak toj maji' nayabac xca' sut li tzo' xul, laat ac xaye oxib sut nak inc'a' nacanau cuu". Nak quijultico' re laj Pedro li atin a'in, c'ajo' nak quiraho' sa' xch'ol ut qui-oc chi yabac.

15

Quic'ame' li Jesús sa' rakleb atin chiru laj Pilato

¹ Nak quisakeu eb lix benil aj tij que'xch'utub cui'chic rib riq'uineb laj c'amol be sa' rochoch li Dios, ut riq'uineb laj tz'ib ut riq'uin chixjunileb laj q'uehol na'leb ut que'xc'ub chanru te'xbanu. Ut que'xc'am li Jesús chi bac'bo

ut que'xk'axtesi sa' ruk' laj Pilato. ² Laj Pilato quixye re li Jesús: —¿Ma laat lix reyeb laj judío?— Li Jesús quichak'oc ut quixye re: —Yal li xaye nak lajn. — ³ Ut eb lix benil aj tij nabal li c'a'ak re ru yoqueb cui' chixjibal. ⁴ Ut laj Pilato quixpatz' cui'chic re: —¿Ma inc'a' nacatchak'oc? ¿Ma inc'a' nacacuabi li jo' q'ual yoqueb chixyebal chacuix? chan laj Pilato re. ⁵ Aban li Jesús ma jun q'atn quixye re xcolbal rib ut riq'unin a'an quisach xch'ol laj Pilato.

Quitenebac cämc sa' xben li Jesús

⁶ Rajlal chihab sa' li nink'e Pascua laj Pilato narach'ab jun li prex, a' yal bar cuan te'raj li tenamit. ⁷ Jun li cuïnk aj Barrabás xc'aba' cuan sa' tz'alam rochbeneb lix comon xban li camsinc que'xbanu nak yoqueb chpletic chirix li acuabej. ⁸ Ut que'chal li q'uila tenamit riq'unin laj Pilato chixtz'amanquil chiru nak tarach'ab junak prex jo' c'aynakeb xbäñunquil. ⁹ Laj Pilato quichak'oc ut quixye reheb: —¿Ma teraj nak tincuach'ab lix reyeb laj judío?— ¹⁰ Laj Pilato naxnau nak xban xcakaleb xch'ol lix benil aj tij nak que'xk'axtesi li Jesús sa' rakleb atin. ¹¹ Aban eb lix benil aj tij que'xtacchi'i li q'uila tenamit re nak a' laj Barrabás li te'xtz'ama re nak taach'abák. ¹² Ut laj Pilato quixpatz' cui'chic reheb: —¿C'a'ru nequeye? ¿C'a'ru teraj tinbanu riq'unin lix reyeb laj judío?— ¹³ Ut eb li q'uila tenamit que'xjap cui'chic re chixyebal: —¡Q'ue chiru cruz! chanqueb. ¹⁴ A'ut laj Pilato quixpatz' cui'chic reheb: —¿C'a'ut? ¿C'a'ru tz'akal xmac ere? chan. Ut eb a'an k'axal cui'chic cau que'xjap re chixyebal: —¡Q'ue chiru cruz!— ¹⁵ Ut laj Pilato taraj nak sahakeb sa' xch'ol li tenamit riq'unin. Jo'can nak quirach'ab laj Barrabás chiruheb. Tojo'nak quixtakla xsac'bal li Jesús riq'unin tz'um ut quixk'axtesi sa' ruk'eb li soldado re nak te'xq'ue chiru cruz.

Li Jesús quirahobtesic xbaneb li soldado

¹⁶ Ut eb li soldado que'xc'am li Jesús sa' li popol ut que'xch'utub ribeb chixjunileb li soldado. ¹⁷ Que'xq'ue jun caki ak' chirix li Jesús jo' neque'rocsi li rey. Ut que'xq'ue ajcui' jun tz'ulbil corona q'uix sa' xjolom. ¹⁸ Tojo'nak que'oc chixjapbál reheb chixyebal: —Sahak taxak sa' aäch'ol, at xReyeb laj judío, chanqueb. ¹⁹ Ut yoqueb chixsaq'uinquil sa' xjolom riq'unin che'. Cuan que'chuban re ut cuan ajcui' que'xcuik'ib ribeb chiru re retz'unquil. ²⁰ Ut nak ac que'xtacuasi, que'risci li caki ak' chirix ut que'xq'ue cui'chic li rak' chirix. Tojo'nak que'xc'am re te'xq'ue chiru cruz.

Li Jesús quiq'uehe' chiru cruz

²¹ Jun li cuïnk aj Simón xc'aba' yo chi chalc sa' c'alebal. Cirene lix tenamit. Li cuïnk a'an xyucua' laj Alejandro ut laj Rufo. Eb li soldado que'xmin ru laj Simón chixpakonquil lix cruz li Jesús. ²² Que'xc'am li Jesús sa' li na'ajej Gólgota xc'aba'. Chi jalbil ru naraj naxye: Xna'aj Xbakel Xjolom Camenak. ²³ Ut que'xq'ue vino re li Jesús yubil riq'unin c'ahil ban re xc'osbal li raylal aban li Jesús inc'a' quiruc'. ²⁴ Tojo'nak que'xq'ue chiru cruz. Ut eb li soldado que'bulic chirix li rak' re rilbal ani na taechanïnk re li junjunk. ²⁵ Beleb or re ek'ela que'xq'ue li Jesús chiru cruz. ²⁶ Sa' xben li cruz que'xq'ue jun retalil c'a'ut nak que'xcamsi ut naxye: A'an a'in lix reyeb laj judío. ²⁷ Ut cuib laj elk' que'q'uehe' chiru cruz rochben, jun sa' xnim uk' ut jun sa' xtz'e. ²⁸ Jo'can nak quitz'akloc ru li naxye sa' li Santil Hu: A'an quiq'uehe' sa' ajl sa' xyänkeb laj mac. (Is. 53:12) ²⁹ Ut eb li tenamit nak que'nume' aran que'xhob li Jesús. Que'rec'asi xjolomeb ut que'xye: —Laaat pe' xatjuc'uc raj re rochoch li Dios, ut yal chiru oxib cutan raj xayib cui'chic. ³⁰ Col acuib anakcuan ut cuben chak chiru li cruz, chanqueb. ³¹ Jo'can ajcui' que'xbanu eb li xbenil aj tij.

Que'xhob li Jesús nak que'xye chi ribileb rib rochbeneb laj tz'ib: —Jalan chic xcoleb ut a'an inc'a' naru naxcol rib xjunes. ³² Chicubek chak chiru li cruz anakcuan li Cristo lix Reyeb laj judío re nak takil ut takapab, chanqueb. Ut eb li que'q'uehe' chiru cruz rochben que'xhob ajcui' li Jesús.

Lix camic li Jesucristo

³³ Tuktu li cualeb nak quik'ojyino' sa' chixjunil li ruchich'och' ut oxib or re ecuu quicutano' cui'chic. ³⁴ Ut sa' li or a'an li Jesús quiatinac chi cau ut quixye: —Eloí, Eloí, ¿lama sabactani? — Chi jabil ru naraj naxye, "At inDios, at inDios, ¿c'a'ut nak xinacanab injunes?" ³⁵ Nak li cuanqueb aran que'rabi li ratin, cuan li que'xye: —Abihomak, yo chixbokbal li profeta Elías,— chanqueb. ³⁶ Ut jun sa' xyankeb coo sa' anil ut coxtz'a chak jun li esponja sa' vinagre ut quixtaksi sa' ru'uj jun che' re xq'uebal chi ruc' li Jesús ut quixye: —Kilak cuan ma tachalk na laj Elías chixcubsinqil, chan. ³⁷ A'ut li Jesús quixjap re chi cau ut qui-el xch'ol. ³⁸ Ut lix t'icrul li rochoch li Dios quik'iche', ut lix pejelat quiticla chak takec' ut toj tak'a coxrake'. Ca' jachal qui-el. ³⁹ Jun li capitán aj Roma cuan aran xakxo chiru li Jesús. Nak quiril chanru nak quicam, li capitán quixye: —Yal nak li cuink a'in tz'akal Ralal li Dios.— ⁴⁰ Cuanqueb ajcui' iixk yoqueb chi iloc chi najt. Sa' xyankeb a'an cuan lix María aj Magdala, lix Salomé ut lix María xna'eb laj José ut laj Jacobo li itz'inbej. ⁴¹ Eb li iixk a'in, a'an li que'taken re li Jesús nak toj cuan chak Galilea ut que'c'anjelac chiru. Ut cuanqueb nabal chic li iixk cuotz que'cuulac Jerusalén rochben li Jesús.

Nak quimuke' li Jesucristo

⁴² Nak ac oc re li k'ojyin, ac nach'oc chak re li hilobal cutan. Yoqueb chix-cauresinqil ribeb re li hilobal cutan. ⁴³ Quicuan jun li cuink aj José xc'aba' Arimatea xtenamit. A'an jun xnal ru cuink sa' xyankeb li neque'tz'iloc atin ut yo chixyo'oninqil lix nimal xcuancuil li Dios. Inc'a' quixucuac laj José nak quicuulac chixtz'amanqil chiru laj Pilato nak a'an tamukuk re lix tz'ejcuall li Jesús. ⁴⁴ Laj Pilato quisach xch'ol chirabinqil nak ac xcam li Jesús. Ut quixtakla xbokbal li capitán ut quixpatz' re: —¿Ma yal nak ac xcam li Jesús? chan re. ⁴⁵ Li capitán quixye re nak ac xcam. Tojo'nak laj Pilato quixye re laj José nak naru tixc'am. ⁴⁶ Ut laj José quixlok' jun chabil t'icr lino. Quixcubsi chak li camenak chiru li cruz ut quixlan sa' li chabil t'icr. Ut quixq'ue sa' jun muklebal yibambil sa' jun sakonac. Ut quixbalk'usi jun nimla pec chire li muklebal. ⁴⁷ Ut lix María aj Magdala ut lix María xna' laj José que'ril bar quixmuk.

16

Li Jesús quicuacli cui'chic chi yo'yo sa' xyankeb li camenak

¹ Nak quinume' li hilobal cutan, lix María aj Magdala ut lix Salomé ut lix María xna' laj Jacobo que'xlok' li sununqil ban re te'xic chixq'uebal sa' xb'en li camenak. ² Toj ek'ela que'coeb sa' li xb'en li cutan re li xaman. Ac x-el chak li sak'e nak yoqueb chi xic sa' li muklebal. ³ Ut yoqueb chixyebal chi ribileb rib: —¿Ani taisink re li pec li cuan chire li muklebal? chanqueb. ⁴ Ut nak que'cuulac cuan cui'li muklebal, que'ril nak ac isinbil chic li nimla pec chire li muklebal. ⁵ Ut nak que'oc sa' li muklebal que'ril jun li saj cuink chunchu chak sa' li muklebal sa' xnim uk'eb. Li saj cuink a'an tikto riq'uin jun saki t'icr nim xbas ut eb li iixk c'ajo' nak que'xucuac chiribal. ⁶ Ut li cuink quixye rehreb: —Mexxucuac. Lain ninnau nak yoquex chixsic'bal li Jesús aj Nazaret

li que'xcamsi chiru cruz. A'an mā ani chic arin. Ac xcuaclí cui'chic chi yo'yo. Ilomak lix na'aj li xcuán cui' li camenak. ⁷ Ayukex, yehomak chak rehēb lix tzolom, jo'ajcui' re laj Pedro, nak a'an xben cua taxic Galilea cheru laex. Aran toxeril ru jo' quixye ere, chan. ⁸ Ut eb li iixk que'el aran ut que'coeb sa' anil ut neque'sicsot xbaneb xxiu. Ut mā ani aj e que'xye xban nak te'xucuak.

Li Jesucristo quixc'utbesi rib chiru lix María Magdala ut cuib lix tzolom

⁹ Toj ek'ela sa' li xben li cutan re li xaman quicuacli li Jesús chi yo'yo sa' xyankeb li camenak. Li xben li quixc'utbesi cui' rib li Jesús, a'an lix María aj Magdala. A'an li iixk li qui-isic li cuukub chi māus aj musik'ej riq'uin xban li Jesús. ¹⁰ Li iixk a'an co chixyebal rehēb lix tzolom li Jesús. Nak quicuulac riq'uineb, coxtauheb chi yabac xban xrahil xch'oleb. ¹¹ Ut lix María quixserak'i rehēb nak yo'yo li Jesús ut nak quiril ru. Abanan eb a'an inc'a' que'xpab li c'a'ru quixye. ¹² Ut chirix a'an, li Jesús quixc'utbesi cui'chic rib chiruheb cuib lix tzolom nak yoqeb chi xic sa' c'alebal. Jalan chic rilbal nak quixc'utbesi rib chiruheb. ¹³ Eb a'an que'coeb ut coxe'xye resil rehēb li jun ch'ol chic. Ut chi moco li cuib a'an que'xpab.

Li Jesucristo quixtaklaheb lix tzolom chixyebal resil li colba-ib

¹⁴ Mokon chic eb li junlaju chi xtzolom cuanqueb sa' mex nak quixc'utbesi rib li Jesús chiruheb. Ut quixk'useb xban nak inc'a' que'paban ut xban xcacuil lix ch'oleb. Inc'a' que'xpab li c'a'ru que'xye li que'iloc ru li Jesús xben cua nak ac xcuaclí cui'chic chi yo'yo sa' xyankeb li camenak. ¹⁵ Ut li Jesús quixye rehēb: —Texxic sa' chixjunil li ruchich'och' ut tech'olob xyalal li colba-ib chiruheb chixjunileb li tenamit jun sut rubel choxa. ¹⁶ Li ani tapabank ut taçubek xha', a'an taçolek'; aut li ani inc'a' tapabank, a'an taxic sa' tojba māc. ¹⁷ A'an a'in li retalil li talaje'xbənu li te'pabank. Sa' inc'aba'lāin te'isink māus aj musik'ej ut te'atínak sa' jalan atinobal. ¹⁸ Cui te'xchap c'anti' chi ruk'eb, māc'a'te'xc'ul ut cui te'ruc' li c'a'ak re ru nacamsin, māc'a'te'xc'ul. Cui te'xq'ue li ruk' sa' xbeneb li yaj, te'q'uirak, chan li Jesús.

Li Jesucristo co sa' choxa

¹⁹ Nak ac xratinahéb lix tzolom li Kacua' Jesucristo, quic'amé' sa' choxa xban li Dios, ut quic'ojla sa' xnim uk' li Acuabej Dios. ²⁰ Ut eb lix tzolom que'coeb sa' chixjunil li na'ajej chixch'olobanquil xyalal li colba-ib. Ut li Kacua' yo chi tenk'anc rehēb. Ut quebil xcuanguil li ratineb xban li Dios riq'uin li milagro quilaje'xbənu chiruheb li tenamit. Jo'can taxak.

Li Resil li Colba-ib li Quixtz'iba li San Lucas

Xticlajic li hu li quixtz'iba laj Lucas re laj Teófilo

¹ Nabaleb li que'yaloc re xtz'ibánquil chi tz'akal re ru chanru lix na'leb li Jesucristo nak quicuan sa' kayank. ² Li que'c'utuc chak chiku, a'an eb li tz'akal que'iloc chak re riq'uin xnak'eb ru chanru quic'ulman chalen nak quixtiquib chak lix c'anjal ut que'xch'olob li xyalal. ³ At Kacua' Teófilo, laat cuan acuanquil. Nak ac xintz'ili rix chi us chixjunil li c'a'ru quic'ulman, xinc'oxla nak us tintz'ibák acuiq'uin re xyebal acue chi tz'akal re ru chanru tz'akal quic'ulman. ⁴ Yoquin chi tz'ibac acuiq'uin re nak taq'ue retal chi tz'akal li xyalal li xatzol cui' acuib.

Li ángel quixye re laj Zacarías nak tacuank jun li ralal ut aj Juan te'xq'ue chok' xc'aba'

⁵ Sa' eb li cutan nak quicuan chok' rey laj Herodes aran Judea, quicuan jun laj tij aj Zacarías xc'aba'. A'an xcomoneb li ralal xc'ajol laj Abías. Li rixakil xElisabet xc'aba'. A'an xcomoneb li ralal xc'ajol laj Aarón. ⁶ Laj Zacarías ut li rixakil, a'an tiqueb xch'ol chiru li Dios. Junelic neque'xq'ue xch'oleb chixbanunquil chi tz'akal lix chak'rabinquileb ut lix taklanquileb xban li Kacua' Dios. ⁷ Abanan mac'a' xcoc'aleb xban nak lix Elisabet inc'a' naq'uiresin ut xban ajcui' nak ac chequeb chic. ⁸ Sa' jun li cutan laj Zacarías yo chixbanunquil lix c'anjal chiru li Dios sa' li templo jo' c'aynakeb xbanunquil. ⁹ Quit'ane' sa' xben laj Zacarías oc sa' li Santil Na'ajej sa' li templo chixc'atbal li incienso. ¹⁰ Nak yo chi c'atc li incienso chixjunileb li tenamit ch'utch'uequeb chirix cab ut yoqueb chi tijoc. ¹¹ Sa' li hōnal a'an quixc'utbesi rib chiru laj Zacarías jun x-ángel li Kacua' Dios. Xakxo sa' xnim chixc'atk li artal li nac'atman cui' li incienso. ¹² C'ajo' nak quisach xch'ol laj Zacarías nak quiril li ángel ut quixucuac. ¹³ Ut li ángel quixye: —At Zacarías, matxucuac. Li Dios xrabi li c'a'ru xatz'ama. Lix Elisabet la cuixakil tacuank jun xc'ula' al ut Juan taq'ue chok' xc'aba'. ¹⁴ Nak tayo'lak la cualal, c'ajo' nak tasahok' sa' ach'ol laat ut nabaleb ajcui' li cristian te'sahok' sa' xch'oleb. ¹⁵ La cualal li tayo'lak taq'uehek' xcuauquil xban li Dios. A'an inc'a' tauc'ak vino chi moco li ha' li nacaltesin. Ut ac cuank chak li Santil Musik'ej riq'uin nak toj maji'ak nayo'la. ¹⁶ Ut sa' xc'aba' a'an nabaleb li ralal xc'ajol laj Israel te'xsic' cui' chic li Kacua' Dios. ¹⁷ A'an xben cua taxic chiru li Kacua' chixch'olobanquil li xyalal. Cuank li Santil Musik'ej riq'uin ut cuank xcuauquil jo' li cuauquilar li quiq'uehe' re laj Elías xban li Dios. Ut sa' xc'aba' a'an te'xc'am cui' chic rib sa' usilal li yucua'bej riq'uineb li alalbej. Eb laj k'etol atin te'xjal xna'leb ut te'xtzol ribeb riq'uineb li tiqueb xch'ol. Tixcauresi li tenamit chixc'ulbal li Kacua', chan li ángel. ¹⁸ Quichak'oc laj Zacarías ut quixye: —¿Chanru nak tinnau nak yal li yocat chixyebal cue? Lain tixin chic. Jo'can ajcui' li cuixakil, chan. ¹⁹ Ut li ángel quixye: —Lain li ángel Gabriel li ninc'anjelac chiru li Dios. Ut a'an xtaklan chak cue xyebal acue li chabil esilal a'in. ²⁰ Anakcuan laat tatcanak chi mem xban nak inc'a' xapab li c'a'ru xinye. Inc'a' tat-atinak toj tacuulak xk'ehil nak tac'ulmānk chixjunil a'in, chan li ángel. ²¹ Eb li tenamit cuanqueb chirix cab. Yoqueb chiroybeninguil laj Zacarías. Yoqueb chixc'oxlanquil c'a'ru xc'ul nak xbay chak sa' li templo. ²² Ut nak qui-el chak sa' li templo mem chic laj Zacarías. Inc'a' chic naatinac. Yal ruk' aj chic

naxc'ut chiruheb li neque'atinan re. Ticto que'xtau ru nak quic'utbesic chak chiru jun li visión sa' li templo. ²³ Nak ac xrake' xbanunquil lix c'anjal sa' li templo, laj Zacarías quisuk'i sa' rochoch. ²⁴ Ut chirix chic a'an lix Elisabet, li rixakil laj Zacarías, quicana chi yaj aj ixx. Ut chiru ob po quicana sa' li rochoch. Ma bar qui-el ut yo chixyebal sa' xch'ol: ²⁵—Jo'ca'in nak xruxtana cuu li Kacua'. Xrisi lin xutan chiruheb li tenamit nak xq'ue jun lin c'ula'al, chan.

Li ángel quixye re lix María nak tacuank jun lix c'ula'al; d'an li Cristo

²⁶ Nak ac yo chic xcuak po xcanajic chi yaj aj ixx lix Elisabet, li ángel Gabriel quitaklac xban li Dios sa' jun li tenamit Nazaret xc'aba' li cuan xcuént Galilea. ²⁷ Quitaklac riq'unin jun li xka'al xMaría xc'aba' toj maji' cuanjenak riq'unin cuink. Ac tz'amabil xban jun li cuink aj José xc'aba'. Li cuink a'an xcomoneb li ralal xc'ajol li rey David. ²⁸ Li ángel quicuulac riq'unin lix María ut quixye re: —Sahak taxak sa' la ch'ol xban nak laat li sic'b'il acuu. Li Kacua' cuan acuiq'unin ut osobtesinbilat sa' xyankeb li ixx, chan li ángel. ²⁹ Ut lix María quisach xch'ol chirabinqul li quixye li ángel. —¿C'a'ru xyalal li atin li xye cue? chan sa' xch'ol. ³⁰ Ut li ángel quixye re: —Matxucuac, María. Li Dios xsic'oc acuu xban nak chabil ana'leb. ³¹ Anakcuan tatcanak chi yaj aj ixx. Li Dios tixq'ue jun ac'ula'al telom ut Jesús lix c'aba' taq'ue. ³² Nimak xcuánquil nak tacuank ut chixjunileb te'na'ok re nak a'an tz'akal Ralal li Dios. Ut li Kacua' taq'uehok xcuánquil chi taklanc jo' nak quicuan chi taklanc li rey David lix xe'tonil yucua'. ³³ A'anak chic li cuank xcuánquil chi taklanc sa' xbenet li ralal xc'ajol laj Jacob. Ut lix cuanquilat tacuank chi junelic. Inc'a' taosok', chan li ángel. ³⁴ Quichak'oc lix María ut quixye: —¿Chanru nak tacuank inc'ula'al xban nak lajin moco cuanquin ta riq'unin cuink? chan lix María. ³⁵ Li ángel quixye re: —Riq'unin xcuánquil li Santil Musik'ej tatcanak chi yaj aj ixx. Lix cuanquil li nimajcual Dios tacuank acuiq'unin. Ut li c'ula'alli tayo'lak, a'an santo ut tz'akal ralal li Dios. ³⁶ Jo'can ajcui' lix Elisabet la cuech'alal yaj aj ixx anakcuan. Ac cuakib po chic xcanajic chi yaj aj ixx, usta ac tix chic ut usta chixjunileb que'xye nak a'an inc'a' tacuank xcoc'al. ³⁷ Riq'unin a'in nac'utun nak mac'a' ch'a'aj chiru li Dios, chan li ángel. ³⁸ Ut lix María quixye: —Lajin aj c'anjal chiru li Kacua' Dios. Xbanuhak cuiq'unin li c'a'ru xaye, chan. Ut chirix chic a'an, cg li ángel.

Lix María quicuulac chirula'aninquil lix Elisabet

³⁹ Ac xnume' chic cuib oxib cutan nak lix María co sa' junpat sa' jun li na'ajej tzul ru cuan sa' xcuént Judea. ⁴⁰ Quicuulac sa' rochoch laj Zacarías ut quixq'ue xsahil xch'ol lix Elisabet. ⁴¹ Nak quirabi lix sahil xch'ol lix Elisabet li quiq'uehe' xban lix María, quirec'a nak qui-ec'an chak lix c'ula'al. Ut sa' ajcui' li honal a'an lix Elisabet quinujac chi Santil Musik'ej. ⁴² Ut lix Elisabet quixye chi cau xyab xcux: —Osobtesinbilat sa' xyankeb chixjunileb li ixx ut osobtesinbil ajcui' laj c'ula'al li tayo'lak. ⁴³ Lajin moco inc'ulub ta nak tatchalk chicuilbal xban nak laat lix na'li Kacua', li ninlok'oni lain. ⁴⁴ Nak xcuabi lix sahil inch'ol xaq'ue, xcuec'a nak lin c'ula'al x-ec'an chak xban xsahil xch'ol. ⁴⁵ Us xak acue xban nak xapab nak tac'ulmank li c'a'ru xye li Kacua', chan lix Elisabet.

Lix María c'ajo' xsahil sa' xch'ol ut quixlok'oni li Kacua'

⁴⁶ Ut lix María quixye:

—Chi anchal inch'ol ninq'ue xlok'al li Kacua'.

⁴⁷ Nasaho' sa' inch'ol riq'unin li Dios laj Colol cue,

- ⁴⁸ xban nak xruxt^{an}na cuu lajn aj c'anjel chiru, usta m^ac'a' incuanquil. Chalen anakuan us xak re cha'keb cue chixjunileb li tenamit.
- ⁴⁹ Lok'oninbil taxak ru li Kacua' li k'axal nim xcuanquil xban nak quixc'utbesic chicuu lix nimal lix cuanquinal. A'an tz'akal santo.
- ⁵⁰ Li Kacua' junelic na-uxt^{an}an u. Naruxt^{an}na ruheb li neque'xucuan ru.
- ⁵¹ Sachba ch'olej li quixbanu riq'unin xnimal xcuanquil. Quixpo' ru li yoqueb chixc'oxlanquil xbanunquil li k'etk'eteb, li neque'rec'a sa' xch'oleb nak ninkeb xcuanquil.
- ⁵² Quirisi sa' xna'ajeb li cuanqueb sa' xcuanquil. Ut quixq'ueheb xlok'al li m^ac'a'eb xcuanquil.
- ⁵³ Li m^ac'a' cuan reheb naxq'ue chi nabal c'a'ru reheb. Ut eb li biom naxtaklaheb chi m^ac'a' cuan reheb.
- ⁵⁴ A'an junelic quixtenk'aheb laj Israel lix tenamit ut inc'a' quisach sa' xch'ol ruxt^{an}anquil ruheb,
- ⁵⁵ xban nak jo'can quixyechi'i reheb li kaxe'tonil yucua'. Quixyechi'i re laj Abraham nak taruxt^{an}na ruheb li rala^l xc'ajol chi junelic, chan lix María.
- ⁵⁶ Ut lix María quicuan oxib po riq'unin lix Elisabet. Ut chirix a'an quisuk'i sa' rochoch.

Li xyo'lajic laj Juan laj Cubsihom Ha'

⁵⁷ Quicuulac xk'ehil nak tayo'lak lix c'ula'al lix Elisabet ut quicuan jun lix c'ula'al ch'ina telom. ⁵⁸ Nak que'rabi resil li rech cabal jo' cui' eb li rech'alal nak qui-uxt^{an}ac ru lix Elisabet xban li Kacua', que'saho' ajcui' sa' xch'oleb a'an. ⁵⁹ Ac cuan cuakxakib cutan re li c'ula'al, nak quixc'ul li circuncisión. Aj Zacarías raj que'xq'ue chok' xc'aba' chok' reka^j lix yucua'. ⁶⁰ Abanan li na'bej quixye: —Inc'a'. Aj Juan takaq'ue chok' xc'aba', chan. ⁶¹ Que'chak'oc ut que'xye re: —¿C'a'ut nak t^acuaj xq'uebal aj Juan chok' xc'aba'? Ma jun sa' xyankeb la cuech'alal cuan ta xc'aba' jo' a'an, chanqueb. ⁶² Que'xc'ut li ruk'eb chiru laj Zacarías re xpatz'bal re c'a'ru c'aba'ej taraj xq'uebal chok' xc'aba' li rala^l. ⁶³ Laj Zacarías quixpatz' jun xhu reheb re tixtz'iba li c'aba'ej chiru. Ut sa' li hu quixtz'iba "Juan lix c'aba' teq'ue". Nak que'r'il li hu, que'sach xch'oleb chixjunileb. ⁶⁴ Ut sa' ajcui' li hognal a'an laj Zacarías quiru chic chi atinac ut qui-oc chixlok'oninquil li Kacua' Dios. ⁶⁵ C'ajo' nak que'oc xxiuheb chixjunileb li rech cabal ut yalak bar sa' li na'ajej tzul ru li cuan sa' xcuent Judea qui-el resil li c'a'ru quic'ulman. ⁶⁶ Ut chixjunileb li que'abin re que'xq'ue sa' xch'oleb ut que'xye: —¿C'a'ru anchal tixc'anjela li c'ula'al a'in nak tanimank? Nac'utun nak cuan xcuanquil li Dios riq'unin, chanqueb.

Li Profeta Zacarías quixye li c'a'ru quic'utbesic chiru xban li Dios

- ⁶⁷ Ut laj Zacarías lix yucua' laj Juan quinujac chi Santil Musik'ej. Qui-oc chi atinac ut quixye li c'a'ru quic'utbesic chiru xban li Dios. Ut quixye chi jo'ca'in: ⁶⁸—Lok'oninbil taxak li Kacua' Dios li neque'xlok'oni laj Israel xban nak xtol'obal ruheb lix tenamit ut xcoleb.
- ⁶⁹ Xq'ue jun laj Colol ke k'axal nim xcuanquil. Quixsic' ru sa' xyankeb li rala^l xc'ajol li rey David laj c'anjel chiru.
- ⁷⁰ A'in quixyechi'i chak junxilaj jo' que'xye ke li santil profetas.
- ⁷¹ Quixye reheb nak toxcol chiruheb li xic' neque'iloc ke ut torisi rubeleb xcuanquil.
- ⁷² Quixye nak taruxt^{an}na ruheb li kaxe'tonil yucua' xban nak jultic re li quixye sa' li santil contrato.

- ⁷³ Li Kacula' riq'uin juramento quixyechi'i a'an re laj Abraham li kaxe'tonil yucua'.
- ⁷⁴ Quixye re nak a'an tacolok ke chiruheb li xic' neque'iloc ke re nak toc'anjelak chiru a'an chi mac'a'ak kaxiu,
- ⁷⁵ ut re ajcui' nak junelic toucuank sa' santilal ut sa' tiquilal chiru li Dios.
- ⁷⁶ At cunal, laat xprofeta li nimajcual Dios. Laat tatxic xben cua chiru li Kacula' ut tach'olob li xyalal chiruheb li tenamit re nak te'xcauresi ribeb chixc'ulbal li Kacula'.
- ⁷⁷ Tac'ut chiruheb li tenamit chanru nak te'cuyek' te'sacheck' lix maqueb ut te'colek'.
- ⁷⁸ Xban nak k'axal nim ruxtan li Kacula' Dios, xtakla chak li Jun li taçutanolobresink re li kac'a'ux.
- ⁷⁹ Ut tixcutanobresi xc'a'uxeb li cuanqueb sa' xk'ojoinal ru li mac, li camqueb re sa' li mausilal. Ut a'an taberesink ke sa' li tuktuk'ilal, chan laj Zácarias.
- ⁸⁰ Ut li c'ula'al yo chi q'ujic ut yo chi cacuuc sa' xpabal. Ut quicuan sa' li chaki ch'och' bar inc'a' q'uiheb li tenamit toj quicuulac xk'ehil nak quixtiquib xch'olobanquil li xyalal chiruheb laj Israel.

2

Jo'ca'in nak quiyo'la li Jesús

¹ Sa' eb li cutan a'an li acuabej César Augusto quixq'ue jun li chak'rab re nak chixjunileb li tenamit te'ajlak ut te'xq'ue xc'aba'eb chi tz'ibac. ² A'in li xben sut nak que'xtz'iba xc'aba'eb li tenamit. A'an quic'ulman nak cuãnk laj Cirenio chi taklanc sa' li na'ajej Siria. ³ Chixjunileb que'coeb xq'uebaleb xc'aba' chi tz'ibac. Ac sa' xtenamiteb li junjunk que'coeb chixtz'ibanquileb lix c'aba'. ⁴ Laj José qui-el sa' li tenamit Nazaret li cuan sa' xcuént Galilea ut co Belén li cuan xcuént Judea. A'an xtenamit li rey David. Aran co xban nak a'an xcomoneb li ralal xc'ajol laj David. ⁵ Aran quixq'ue xc'aba' chi tz'ibac rochben lix María li ac tz'amabil xban. Lix María ac yaj aj ixs. ⁶ Nak ac cuanqueb aran Belén quicuulac xk'ehil nak tayo'lak lix c'ula'al. ⁷ Ut quiyo'la li xben xc'ula'al, quixlan sa' t'icr ut quixyocob sa' xna'aj xcuahéb li cuacax xban nak mac'a' xna'ajeb sa' eb li ochoch.

Nak que'rabi resil lixyo'lajic li Jesús, eb laj ilol xul que'coeb chixlok'oninquel

⁸ Nach' riq'uin li tenamit Belén cuanqueb aj ilol xul yoqueb chixc'ac'alenquil lix quetomk chi k'ek. ⁹ Mac'a' sa' xch'oleb nak xakamil jun x-ángel li Kacula' chiruheb. Ut quisakeno' chi xjun sutam li cuanqueb cui'. Ut eb laj ilol xul c'ajo' nak que'xucuac. ¹⁰ Abanan li ángel quixye reheb: —Mexxucuac xban nak lain xinchal xyebal ere jun chabil esilal. A'in jun sahil ch'olej chok' reheb chixjunileb li tenamit. ¹¹ Anakcuan xyo'la jun laj Colol ere sa' lix tenamit laj David ut a'an li Cristo li Kacula' li yechi'ibil xban li Dios. ¹² Jo'ca'in nak tetau. Li c'ula'al lanbil sa' t'icr ut yocyoo sa' xben li q'uim sa' xna'aj xcuahéb li cuacax. A'in li retalik nak a'an li tetau, chan li ángel. ¹³ Ut sa' junpat que'chal nabaleb chic li ángel sa' choxa. Yoqueb chixlok'oninquel li Kacula' ut yoqueb chixyebal: ¹⁴ —Chinimak taxak xlok'al li Kacula' Dios li cuan sa' choxa ut chicuank taxak li tuktuk'ilal sa' xyankeb li cristian li raroqueb xban li Dios. — ¹⁵ Nak ac xcoeb li ángel sa' choxa, eb laj ilol xul que'oc chixyebal chi ribileb rib: —Yokeb Belén ut takil chak li c'a'ru xc'ulman, li xtakla xyebal ke li Kacula', chanqueb. ¹⁶ Coeb sa' anil ut que'xtau lix María rochben laj José ut li c'ula'al yocyoo sa' xna'aj xcuahéb li xul. ¹⁷ Ut

nak ac xe'xtau, que'xserak'i reheb li c'a'ru quiyehe' reheb chirix li c'ula'al.
18 Ut chixjunileb li que'abin re li c'a'ru que'xye laj ilol xul, sachsoqueb xch'ol que'cana. **19** Ut lix María quixc'ula sa' xch'ol chixjunil li c'a'ru quic'ulman ut yo chixc'oxlanquil rix. **20** Ut chirix chic a'an eb laj ilol xul que'suk'i sa' lix na'ajeb. Yoqueb chixlok'oninquil ut yoqueb chixnimanquil ru li Kacua' riq'unin li c'a'ru que'rabi ut que'r'il xban nak chixjunil li que'r'il, a'an jo' li quiyehe' reheb.

Li Jesús quik'axtesic sa' ruk' li Dios sa' li templo

21 Cuakxakib cutan cuan re li c'ula'al nak quixc'ul li circuncisión ut Jesús que'xq'ue chok' xc'aba', jo' quiyehe' re lix María xban li ángel nak toj mají' nacana chi yaj. **22** Lix María quixbánu jo' naxye sa' lix chak'rab laj Moisés. Nak ac xnume' ca'c'ál cutan, lix María rochben laj José que'xc'am li c'ula'al Jerusalén ut que'xk'axtesi chiru li Kacua'. **23** Que'xbánu chi jo'can xban nak sa' li chak'rab li quiq'uehe' reheb xban li Kacua' naxye nak li xben alalbej tento tak'axtesijk sa' ruk' li Kacua'. **24** Ut te'xq'ue chok' xmayejeb jun sumalak li mucuy malaj ut cuibak li paloma li toj sajéb, jo' naxye sa' li chak'rab.

Laj Simeón quixq'ue xlok'al li Jesús ut quixye ajcui' resil li raylal li tixc'ul

25 Aran Jerusalén cuan jun li cuink aj Simeón xc'aba'. Li cuink a'an tic xch'ol ut naxq'ue xlok'al li Dios. Yo chiroybeninquil nak li Dios tarishiéb sa' raylal laj Israel. Ut cuan li Santil Musik'ej riq'unin. **26** Li Santil Musik'ej quixc'utbesi chiru laj Simeón nak a'an inc'a' tacamk toj taril ru li Cristo li Colonel li quixyechi'i li Kacua' Dios. **27** Li Santil Musik'ej quixc'ut chiru laj Simeón nak tacxic sa' li templo xban nak sa' li honal a'an quic'ame' li Jesús sa' li templo xban laj José ut lix María re nak te'xk'axtesi sa' ruk' li Dios jo' naxye sa' li chak'rab. **28** Ut laj Simeón quixk'alu li Jesús, quixq'ue xlok'al li Kacua' ut quixye:

29 —At Kacua', anakcuán xabánu jo' xayechi'i cue. Anakcuán naru tincamk chí c'oj'c'o inch'ol,

30 xban nak riq'unin xnak' cuu xcuil li Colonel li yechi'inbil qaban,

31 li xaq'ue chak re xcolbaleb chixjunileb li cuanqueb sa' ruchich'och'.

32 A'an li tacutonobresink re lix c'a'uxeb li macua'eb aj Israel ut a'an lix lok'aleb laj tenamit Israel, chan laj Simeón.

33 Laj José ut li na'bej sachsoqueb xch'ol que'cana chirabinquil li yo chixyebal laj Simeón chirix li Jesús. **34** Ut laj Simeón quixtz'ama rusilal li Dios sa' xbeneb ut quixye re lix María li na'bej: —Chacuabi li oc cue xyebal aq'ue. Sa' xc'aba' li c'ula'al a'in, nabaleb laj Israel te'colek' ut sa' xc'aba' ajcui' a'an nabaleb li te'sachk. Ut nabaleb li te'tz'ektanank re. **35** Riq'unin li raylal te'xbánu re, tac'utunk chi tz'akal li c'a'ru cuan sa' xch'oleb li xic' neque'iloc re. Ut c'ajo' nak tarahok' ach'ol laat xban li raylal te'xbánu re. Chanchan nak te'xnumsi jun ch'ich' sa' la cuam, chan laj Simeón. **36** Ut cuan ajcui' jun li xmalca'an aran profeta, xAna xc'aba'. A'an xrabin laj Fanuel xcomoneb li ralal xc'ajollaj Aser. Ac tix chic. Toj saj nak quisumla ut cuukub chihab ajcui' quicuan rochben lix belom. **37** Ac cuan chic cahib ro'c'al chihab (84) xcanajic xjunes. A'an cuan junelic sa' li templo. Yo chi c'anjelac chiru li Kacua' chi k'ek chi cutan. Junelic yo chi tijoc ut yo chixbanunquil x-ayun. **38** Sa' li honal a'an quicuulac cuan cui' li Jesús. Yo chixlok'oninquil li Dios ut qui-oc chi atinac chirix li c'ula'al riq'uineb laj Jerusalén li yoqueb chiroybeninquil lix colbaleb. **39** Nak ac que'xbánu chixjunil li naxye sa' li chak'rab li quixq'ue li Kacua', laj José ut lix María que'suk'i sa' li tenamit Nazaret li cuan sa' xcuent

Galilea. ⁴⁰ Ut li c'ula'al yo chi q'uic ut yo chi cacuuc xch'ol. Ut yo chixtaubal xna'leb. Ut li rusilal li Kacua' cuan riq'uin.

Li Jesúsc quicana sa' li templo ut quiatinac riq'uineb laj tzolol chak'rab

⁴¹ Rajlal chihab neque'xic lix na' xyucua' aran Jerusalén chixnink'einquil li reliqueb Egipto. Pascua neque'xye re li nink'e a'an. ⁴² Nak ac cuan cablaju chihab re li Jesúsc, coeb aran Jerusalén sa' li nink'e jo' c'aynakeb xbənunquil. ⁴³ Ut nak ac xrake' li nink'e que'suk'i sa' lix tenamiteb. Ut li Jesúsc quicana Jerusalén chi inc'a' naxnau laj José chi moco li na'bej. ⁴⁴ Sa' xch'oleb a'an nak cuan sa' xyankeb li rochben. Jun cutan ac xe'bec nak que'xq'ue retal nak ma'an. Ut que'oc chixsic'bal sa' xyankeb li rech'alal ut sa' xyankeb li neque'na'oc ru. ⁴⁵ Que'r'il nak inc'a' que'xtau. Que'suk'i cui'chic Jerusalén chixsic'bal. ⁴⁶ Nak ac xnume' chic oxib cutan, que'xtau aran sa' li templo. C'ojc'o sa' xyankeb li neque'xnau chi us li c'a'ru naxye sa' li chak'rab. Yo chirabinquil li yoqueb chixyebal ut yo ajcui' chi patz'oc rehēb. ⁴⁷ Ut chixjunileb li yoqueb chi abinc re sachsoqueb xch'ol neque'cana xban nak cuan xna'leb ut naxnau xsumenquil li c'a'ru neque'xpatz' re. ⁴⁸ Lix na' xyucua' sachsoqueb xch'ol que'cana nak que'r'il nak li Jesúsc yo chi atinac riq'uineb. Ut lix na' quixye re: —At inyum, ¿c'a'ut nak xabanu ke chi jo'ca'in? C'ajo' kac'a'ux chacuix. La yucua' ut lain yoco chasic'bal, chan lix María. ⁴⁹ Quichak'oc li Jesúsc ut quixye re: —¿C'a'ut nak yoquex chinsic'bal? ¿Ma inc'a' ta bi' nequenau nak tento tinbanu lix c'anjal lin Yucua'? chan li Jesúsc. ⁵⁰ Ut eb a'an inc'a' que'xtau ru c'a'ut nak quixye rehēb chi jo'can. ⁵¹ Li Jesúsc quisuk'i Jerusalén rochbeneb lix na' xyucua' ut na-abin chiruheb. Ut lix na' quixc'ula sa' xch'ol chixjunil li quic'ulman. ⁵² Li Jesúsc yo chi q'uic ut yo ajcui' chixtaubal xna'leb. Quirahe' xban li Dios ut quirahe' ajcui' xbaneb li tenamit.

3

Laj Juan laj Cubsihom Ha' quixye resil lix c'ulunic li Jesucristo

¹ Yo o'laju chihab roquic chok' acuabej laj Tiberio César, nak cuank laj Poncio Pilato chi taklanc sa' li tenamit Judea. Laj Herodes a'an cuank chi taklanc sa' li tenamit Galilea. Ut laj Felipe li ritz'in cuank chi taklanc sa' li tenamit Iturea ut sa' li na'ajej Traconite, ut laj Lisanias cuank chi taklanc sa' li tenamit Abilinia. ² Ut cuanqueb chok' xbenil aj tij laj Anás ut laj Caifás. Sa' eb li cutan a'an laj Juan li ralal laj Zacarías quiatinac xban li Dios nak cuan chak sa' li chaki ch'och'. ³ Laj Juan co sa' li na'ajej cuan cui' li nima' Jordán ut qui-oc chixch'olobanquil li xyalal chiruheb li tenamit li cuanqueb aran. Quixye rehēb nak tento te'yo'tek' xch'ol te'xjal xc'a'ux ut te'xc'ul li cubi ha're nak li Dios tixcuy tixsach lix maqueb. ⁴ Li profeta Isaías quiatinac chirix laj Juan nak quixye chi jo'ca'in:

A'an tačh'olobank xyalal chi cau xyab xcux sa' li chaki ch'och' ut tixye:
Yibomak le yu'am ut yo'on cuankex chixc'ulbal li Kacua' jo' nak
neque'xyib li be re xc'ulbal junak nim xcuankind.

⁵ Te't'anek' li tzul ut eb li coc' bol ut te'but'ek' eb li tak'a ruheb. Tačicobresik
li be re nak tjc'ru tačanak.

⁶ Ut chixjunileb li cuanqueb sa' ruchich'och' te'ril ru laj Colonel li xtakla chak
li Dios. (Is. 40:3-5)

⁷ Quiril nak nabaleb li yoqueb chi cuulac yal re tačubsik xha'eb. Jo'can nak quixye rehēb: —Laex chanchanex li ral li c'ambolay. ¿Ani xyehoc e're nak taruk' tecol erib chiru lix josk'il li Dios li tačhalk sa' ebeen? ⁸ Chebanuhak ban
li us re nak tac'utunk nak xyot'e' ech'ol ut xejal ec'a'ux. Chanchanakex li che'
chabil li ru naxq'ue. Mec'oxla nak inc'a' tec'ul xjosk'il li Dios yal xban nak

læx li ralal xc'ajol laj Abraham. Læin tiney ere nak li Dios tärük tixyo'obtesi li pec a'in chok' ralal xc'ajol laj Abraham. ⁹ Q'uehomak retal xban nak chalc re li rakba atin sa' eben jo' nak ac cauresinbil li mal re xyoc'bal lix xe' li che'. Ut chixjunil li che' inc'a chabil li ru naxq'ue, nayo'c'man ut naq'uemán sa' xam, chan laj Juan. ¹⁰ Ut eb li tenamit yoqueb chixpatz'bal re: —¿C'a'ru tento takabánu re nak inc'a' tarakek' atin sa' kabé? chanqueb. ¹¹ Quichak'oc laj Juan ut quixye reheb: —Li ani cuan cuibak sumal rak' chixq'uehak jun sumalak re li mac'a' re. Ut li ani cuan xtzacae'mk, chixq'uehak re li mac'a' re, chan. ¹² Cuanqueb ajcui' aj titz'ol toj que'chal re te'cubsik xha' xban laj Juan ut que'xye re: —¿C'a'ru takabánu lão? chanqueb. ¹³ Ut a'an quixye reheb: —Mepatz' xben li toj li ac yebil reheb nak te'xq'ue, chan. ¹⁴ Ut cuanqueb ajcui' soldado que'patz'oc ut que'xye re: —Ut lão, ¿c'a'ru takabánu? chanqueb. Quixye reheb: —Mä ani temak' c'a'ru re ut mä ani tek'aba chi mac'a' rajbal. Chic'ojlak ban ech'ol riq'uin li jo' q'ual nequextoje' cui', chan. ¹⁵ Chixjunileb li tenamit yoqueb chixc'oxlanquil ut que'xye sa' xch'oleb: —¿Ma macua' ta cui' a'an li Cristo, laj Colonel li yoco chiroybeninguil? chanqueb. ¹⁶ Laj Juan quichak'oc ut quixye reheb chixjunileb: —Yal nak lain nincubsin ha' riq'uin ha'. Abanan chalc re li k'axal nim xcuanquil. Xban nak k'axal nim xcuanquil chicuu lajin, moco inc'ulub ta nak tinhít xc'amal lix xab. A'an tixcubsi eha' riq'uin li Santil Musik'ej ut riq'uin xam. ¹⁷ A'an chanchan jun aj acuinel ac cuan chak xc'anjelebal sa' ruk'. Tarapu chi us li ru li trigo ut tixxoc lix trigo sa' lix c'ulebal ut li rix tixc'at sa' li xam. Jo'can ajcui' nak li Dios tarishiheb li inc'a' neque'paban sa' xyankeb li ralal xc'ajol ut tixtaklaheb sa' li xam li inc'a' nachup. Li ralal xc'ajol tacuank xyu'ameb chi junelic, chan laj Juan. ¹⁸ Jo'can nak yo chixch'olobanquil xna'lebeb li tenamit. Naxsic' chanru nak naxch'olob chi tz'akal li chabil esilal chiruheb. ¹⁹ Ut laj Herodes, li nataklan sa' li tenamit Galilea, quik'use' chi cau xban laj Juan xban nak quixc'am chok' rixakil lix Herodías, li rixakil laj Felipe li rjtz'in. Ut quik'use' ajcui' riq'uin chixjunil li mäusilal naxbanu. ²⁰ Ut k'axal cui'chic numtajenak li mäusilal quixbanu nak quixq'ue sa' tz'alám laj Juan.

Quicubsic xha' li Jesús xban laj Juan laj Cubsihom Ha'

²¹ Sa' jun li cutan nak toj maji' quiq'uehe' sa' tz'alám laj Juan, yo chixcub-sinquel xha'eb nabal li tenamit, ut quicubsi ajcui' xha' li Jesús. Ut nak yo chi tijoc li Jesús, quiril nak quiteli li choxa chiru. ²² Li Santil Musik'ej chanchan jun li paloma nak yo chak chi cubec sa' xben li Jesús ut qui-abic xyab xcux li Dios toj sa' choxa nak quixye: —Laat li cuaal rarocat inban. Nasaho' inch'ol ajcuiq'uin, chan.

A'an eb a'in lix xe'tonil yucua' li Jesús

²³ Ac cuan tana lajeb xca'c'al (30) chihab re li Jesús nak quixtiquib lix c'anjel. Chiruheb chixjunileb, li Jesús a'an ralal laj José, li ralal laj Elí. ²⁴ Ut laj Elí, a'an li ralal laj Matat. Laj Matat, a'an li ralal laj Leví. Ut laj Leví, a'an li ralal laj Melqui. Ut laj Melqui, a'an li ralal laj Jana. Ut laj Jana, a'an li ralal laj José. ²⁵ Laj José, a'an li ralal laj Matatías. Ut laj Matatías, a'an li ralal laj Amós. Ut laj Amós, a'an li ralal laj Nahum. Ut laj Nahum, a'an li ralal laj Esli. Ut laj Esli, a'an li ralal laj Nagai. ²⁶ Ut laj Nagai, a'an li ralal laj Maat. Ut laj Maat, a'an li ralal laj Matatías. Ut laj Matatías, a'an li ralal laj Semei. Ut laj Semei, a'an li ralal laj José. Ut laj José, a'an li ralal laj Judá. ²⁷ Laj Judá, a'an li ralal laj Joana. Ut laj Joana, a'an li ralal laj Resa. Ut laj Resa, a'an li ralal laj Zorobabel. Ut laj Zorobabel, a'an li ralal laj Salatiel. Ut laj Salatiel, a'an li ralal laj Neri. ²⁸ Ut laj Neri, a'an li ralal laj Melqui. Ut laj Melqui, a'an li ralal laj Adi. Ut

laj Adi, a'an li ralal laj Cosam. Ut laj Cosam, a'an li ralal laj Elmodam. Ut laj Elmodam, a'an li ralal laj Er. ²⁹ Ut laj Er, a'an li ralal laj Josué. Ut laj Josué, a'an li ralal laj Eliezer. Ut laj Eliezer, a'an li ralal laj Jorim. Ut laj Jorim, a'an li ralal laj Matat. ³⁰ Ut laj Matat, a'an li ralal laj Leví. Ut laj Leví, a'an li ralal laj Simeón. Ut laj Simeón, a'an li ralal laj Judá. Ut laj Judá, a'an li ralal laj José. Ut laj José, a'an li ralal laj Jonán. Ut laj Jonán, a'an li ralal laj Eliaquim. ³¹ Ut laj Eliaquim, a'an li ralal laj Melea. Ut laj Melea, a'an li ralal laj Mainán. Ut laj Mainán, a'an li ralal laj Matata. Ut laj Matata, a'an li ralal laj Natán. ³² Ut laj Natán, a'an li ralal laj David. Ut laj David, a'an li ralal laj Isaí. Ut laj Isaí, a'an li ralal laj Obed. Ut laj Obed, a'an li ralal laj Booz. Ut laj Booz, a'an li ralal laj Salmón. Ut laj Salmón, a'an li ralal laj Naasón. ³³ Ut laj Naasón, a'an li ralal laj Aminadab. Ut laj Aminadab, a'an li ralal laj Aram. Ut laj Aram, a'an li ralal laj Esrom. Ut laj Esrom, a'an li ralal laj Fares. Ut laj Fares, a'an li ralal laj Judá. ³⁴ Ut laj Judá, a'an li ralal laj Jacob. Ut laj Jacob, a'an li ralal laj Isaac. Ut laj Isaac, a'an li ralal laj Abraham. Ut laj Abraham, a'an li ralal laj Taré. Ut laj Taré, a'an li ralal laj Nacor. ³⁵ Ut laj Nacor, a'an li ralal laj Serug. Ut laj Serug, a'an li ralal laj Ragau. Ut laj Ragau, a'an li ralal laj Peleg. Ut laj Peleg, a'an li ralal laj Heber. Ut laj Heber, a'an li ralal laj Sala. ³⁶ Ut laj Sala, a'an li ralal laj Cainán. Ut laj Cainán, a'an li ralal laj Arfaxad. Ut laj Arfaxad, a'an li ralal laj Sem. Ut laj Sem, a'an li ralal laj Noé. Ut laj Noé, a'an li ralal laj Lamec. ³⁷ Ut laj Lamec, a'an li ralal laj Matusalén. Ut laj Matusalén, a'an li ralal laj Enoc. Ut laj Enoc, a'an li ralal laj Jared. Ut laj Jared, a'an li ralal laj Mahalaleel. Ut laj Mahalaleel, a'an li ralal laj Cainán. ³⁸ Ut laj Cainán, a'an li ralal laj Enós. Ut laj Enós, a'an li ralal laj Set. Ut laj Set, a'an li ralal laj Adán. Ut laj Adán, a'an li ralal li Dios.

4

Li Jesús quiyale' ralenquil xban laj tza

¹ Li Jesús nujenak chi Santil Musik'ej nak qui-el sa' li na'ajej cuan cui' li nima' Jordán. Li Santil Musik'ej quixc'ut chiru nak tento taxic sa' li chaki ch'och' bar mäc'a' cui' cristian. ² Ut aran quicuan ca'c'al cutan. Ut laj tza quixyal ralenquil. Abanan inc'a' quixq'ue rib chi ałec'. Chiruheb li cutan a'an mäc'a' naxtzaca ut sa' xrakic li ca'c'al cutan quichal xtz'ocajic. ³ Laj tza quixye re: —Cui tz'akal yäl nak laat Ralal li Dios, suk'isi chok' caxlan cua li pec a'in, chan. ⁴ Li Jesús quichak'oc ut quixye: —Tz'ib'anal sa' li Santil Hu chi jo'ca'in: Macua' ca'aj cui' riq'unil li naxtzaca yo'yok cui' li cuink, chan. (Dt. 8:3a) ⁵ Tojo'nak laj tza quixc'am li Jesús sa' jun li tzul k'axal najt xtemer ut sa' li hñonal ajcui' a'an quixc'ut chiru chixjunileb li xninkal ru tenamit li cuan sa' ruchich'och'. ⁶ Laj tza quixye re li Jesús: —Tink'axtesi sa' acuuk' li xninkal ru tenamit a'an ut lix lok'al. Eb li tenamit a'an k'axtesinibileb sa' cuuk' lain ut naru ninq'ue re li ani tincuaj lain. ⁷ Chixjunil a'an ting'ue acue cui laat tacuik'ib acuib chicuu ut tinälok'oni, chan. ⁸ Quichak'oc li Jesús ut quixye re: —Elen chicuu laat aj tza xban nak jo'ca'in tz'ib'anal sa' li Santil Hu: Li Kacua' la Dios tñlok'oni ut ca'aj cui' chiru a'an tatc'anjelak, chan. (Dt. 6:13) ⁹ Ut laj tza quixc'am li Jesús sa' li tenamit Jerusalén ut coxxakab toj takec' sa' xben li templo. Quixye re: —Cui tz'akal yäl nak laat Ralal li Dios, cut äcuib tak'a. ¹⁰ Mäc'a' tac'ul xban nak jo'ca'in tz'ib'anal sa' li Santil Hu: Tixtaklaheb lix ángel chacuilbal. ¹¹ Ut riq'unin ruk'eb tate'xchap re nak inc'a' tñtoch' la cuok chiru pec, chan. (Sal. 91:11-12) ¹² Li Jesús quichak'oc ut quixye re: —Tz'ib'anal ajcui' sa' li Santil Hu chi jo'ca'in: Matz'ama xmilagro li Kacua' la

Dios yal chi mäc'a' rajbal. (Dt. 6:16) ¹³ Quiril laj tza nak inc'a' quiru rälenquil li Jesùs, toj quixcanab cuan.

Nak quixtiquib lix c'anjal li Jesùs aran Galilea

¹⁴ Ut quisuk'i li Jesùs Galilea chi cuan xcuanquil li Santil Musik'ej riq'uin. Sa' chixjunil li na'ajej li cuanqueb chi xjun sutam li tenamit Galilea, que'rabi resil li Jesùs. ¹⁵ Yo chixch'olobanquil li xyalal sa' eb li cab li neque'xch'utub cui' ribeb laj judío. Ut chixjunileb yoqueb chixq'uebal xlok'al.

Quitz'ektanac li Jesùs sa' li tenamit Nazaret li quiq'ui cui'

¹⁶ Sa' jun li cutan quicuulac li Jesùs sa' li tenamit Nazaret li quiq'ui cui'. Sa' li hilobal cutan co sa' li cab li neque'xch'utub cui' ribeb laj judío jo' c'aynak xbanunquil. Ut quixakli chiruheb re taril xsa' li Santil Hu. ¹⁷ Quiq'uehe' re li hu li quixtz'iba li profeta Isaías. Nak quixte, quixtau aran li atin li naxye chi jo'ca'in:

¹⁸ Lix musik' li nimajcual Dios cuan cuiq'uin xban nak li Dios quixsic' cuu chixyebal li chabil esil reheb li cuanqueb sa' neba'il. Quinxatxla chixcolbaleb li cuanqueb sa' raylal ut chixyebal resil nak te'ach'abak li cuanqueb chi prexil ut re ajcui' nak tinq'ueheb chi iloc li mutz' ut te'cuisi ajcui' sa' raylal li rahobtesinbileb.

¹⁹ Quinxatxla xyebal resil nak ac xcuulac xk'ehil nak li Kacula' tixcoleb lix tenamit. (Is. 61:1-2)

²⁰ Nak quixbot li hu, quixk'axtesi re li nac'anjelac sa' li cab a'an ut quic'oja' chiruheb. Ut chixjunileb li cuanqueb aran que'cana chirilbal li Jesùs. ²¹ Quixye reheb: —Anakcuan xtz'akloc ru chéru li c'a'ru tz'ibanol chak sa'li Santil Hu a'in, chan. ²² Chixjunileb li cuanqueb aran chabil yoqueb chixyebal chirix li Jesùs ut sachsoqueb xch'ol chirabinquil li chabil atin li yo chixyebal. Ut que'xe: —¿Ma mäcua' ta bi' a'in li ralal laj José? chanqueb.

²³ Ut li Jesùs quixye reheb: —Mare teye cue jun li atin li naxye: "At aj banonel, ban acuib ajunes. Lao xkabi resil nak nabal li c'a'ak re ru xabanu Capernaum. ¿C'a'ut nak inc'a' tabanu a'an arin sa' la tenamit?" mare cha'kex cue. ²⁴ Ut quixye ajcui' reheb: —Chi yal tinye acue ma jun profeta nac'ule' ta chi chabil sa' lix tenamit. ²⁵ Relic chi yal nak nabaleb li xmalca'an sa' li tenamit Israel nak quicuan laj Elías chok' profeta. Sa' eb li cutan a'an inc'a' quixq'ue hab chiru oxib chihab riq'uin cuakib po. Ut c'ajo' li cue'ej quicuan sa'li tenamit a'an. ²⁶ Usta ra que'xc'ul eb a'an, aban inc'a' quitaklac li profeta Elías chixtenk'anquileb li xmalca'an aj judío. Quitaklac ban chixtenk'anquil jun li xmalca'an li mäcua' aj judío cuan sa' li na'ajej Sarepta li cuan nach' riq'uin li tenamit Sidón. ²⁷ Jo'can ajcui' sa' eb li cutan nak cuank chok' profeta laj Eliseo, nabaleb li saklep rixeb aran Israel. Abanan ma jun reheb laj judío quiq'urtesjc. Ca'aj cui' jun li cuink li mäcua' aj judío. Li cuink a'an aj Naamán xc'aba'. Siria xtenamit, chan li Jesùs. ²⁸ Nak que'rabi li atin a'in chixjunileb li ch'utch'uequeb aran, c'ajo' nak que'josk'o'. ²⁹ Quilaje'cuacli chixjunileb li cuanqueb aran ut que'risi li Jesùs sa' li tenamit ut que'xc'am toj sa' xben li tzul li c'oj'o cui' lix tenamiteb re nak te'xcut chak toj tak'a. ³⁰ Abanan li Jesùs quinume' sa' xyankeb ut co.

Li Jesùs quixq'uirtesi jun li cuink cuan mäqus aj musik'ej riq'uin

³¹ Li Jesùs co sa' li tenamit Capernaum li cuan sa' xcuent Galilea. Yo chixch'olobanquil li xyalal chiruheb li tenamit sa' eb li hilobal cutan sa' li cab li neque'xch'utub cui' ribeb laj judío. ³² Naxc'ut li xyalal chiruheb chi cuan xcuanquil. Ut chixjunileb li yoqueb chi abinc re que'sach xch'ol

chirabinquil li tijleb li yo chixyebal xban nak naxc'ut li xyalal chiruheb chi cuan xcuanquil. ³³ Cuan jun li cuink sa' xyankeb cuan maus aj musik'ej riq'unin. Qui-oc chixjapbal re chi cau ut quixye: ³⁴ —Canabo kajunes. ¿C'a'ru tacuaj kiq'unin, at Jesús aj Nazaret? ¿Ma xatchal chikasachbal? Lain ninnau nak laat lix Santil Alal li Dios, chan. ³⁵ Abanan li Jesús quixk'us li maus aj musik'ej ut quixye re: —Laat maus aj musik'ej, matchokin. Elen riq'unin li cuink a'in, chan li Jesús. Ut li maus aj musik'ej quixt'an li cuink chiruheb a'an, ut qui-el el riq'unin ut mac'a quixbanu re. ³⁶ Chixjunileb li que'iloc re, c'ajo' nak que'xucuac ut yoqueb chixyebal chi ribileb rib: —¿C'a'ru xyalal a'in? ¿C'a'ru li tijleb a'in? Li cuink a'in cuan xcuanquil sa' xbeneb li maus aj musik'ej ut li c'a'ru naxye, a'an neque'xbanu, chanqueb. ³⁷ Ut que'rabi resil sa' chixjunileb li tenamit xcuent Galilea c'a'ru quixbanu li Jesús.

Li Jesús quixq'uirtesi lix na' li rixakil laj Simón Pedro

³⁸ Nak qui-el sa' li cab li neque'xch'utub cui' ribeb laj judío, li Jesús co sa' li rochoch laj Simón. Lix na' li rixakil laj Simón yocio. Yo xtik. Que'xtz'ama chiru li Jesús nak tixq'uirtesi. ³⁹ Li Jesús quijiloc riq'unin li yaj ut quixq'uirtesi. Ut sa' ajcui' li honal a'an quicuaclí li ixk ut qui-oc chi c'anjelac chiruheb. ⁴⁰ Nak ac yo chi ecuuc, chixjunileb li cuanqueb xyaj, a' yal c'a'ru xyajeleb, quilaje'xc'am chak riq'unin li Jesús. Ut a'an quixq'ue li ruk' sa' xbeneb ut quixq'uirtesiheb. ⁴¹ Ut nabaleb ajcui' li quirisi maus aj musik'ej riq'uineb. Li maus aj musik'ej nak neque'el riq'uineb, japjoqueb re chixyebal: —Laat Ralal li Dios, chanqueb. Abanan li Jesús quixk'useb ut inc'a' quixcanabeb chi atinac xban nak eb a'an que'xnau nak a'an li Cristo, laj Colonel li yechi'nbil xban li Dios. ⁴² Cuulajak chic nak ac xsakeu, li Jesús co sa' jun na'ajej bar mac'a cuan. Ut eb li tenamit yoqueb chixsic'bal. Que'cuulac toj bar cuan cui' a'an ut que'raj raj nak quicana riq'uineb. Inc'a' raj que'raj nak taxic. ⁴³ Abanan li Jesús quixye rebeb: —Tento nak tinxic sa' jalan tenamit chixch'olobanquil li chabil esilal chirix lix nimajcual cuanquilar li Dios xban nak a'an aj e nak xintaklac chak arin, chan. ⁴⁴ Ut yo chixch'olobanquil lix yalal sa' eb li cab li neque'xch'utub cui' ribeb laj judío aran Galilea.

5

Numtajenak xq'cial li car que'xchap

¹ Sa' jun li cutan li Jesús cuan chire li palau Genesaret ut k'axal cui'chic nabal li tenamit que'ch'utla chirabinquil li ratin li Dios. ² Quiril cuib li jucub cuan chire li palau. Eb laj car ma anilheb chi sa'. Yoqueb chak chixch'ajbal lix yoy. ³ Qui-oc li Jesús sa' jun li jucub. Li jucub a'an re laj Simón. Li Jesús quixtz'ama chiru laj Simón nak tixjil ca'ch'inak li jucub sa' li ha'. Ut quic'ojla sa' li jucub ut qui-oc chixch'olobanquil lix yalal chiruheb li tenamit li cuanqueb chire li palau. ⁴ Ut nak ac xrake' chi atinac, quixye re laj Simón: —C'am li jucub sa' xchamal li ha' ut taq'ue la yoy sa' li ha' re nak tachap la car, chan li Jesús. ⁵ Quichak'oc laj Simón ut quixye re: —At tzolonel, chixjunil li k'ojoyin xkaq'ue li kayoy sa' li ha' ut ma jun li car xkachap. Abanan xban nak laat xatyehoc cue, ting'ue cui'chic lin yoy sa' li ha', chan. ⁶ Nak que'xq'ue lix yoy sa' li ha', k'axal cui'chic nabal li car que'xchap ut yo chi pejec' lix yoyeb. ⁷ Ut que'xc'ut ruk'eb chiruheb li rochben li cuanqueb sa' li jucub jun chic re xbokbaleb re nak te'chalk chixtenk'anquil. Ut eb a'an que'chal ut que'xnujtesi xcabichal li jucub ut ca'ch'in chic ma nasubun sa' li ha' xban xq'cial li car. ⁸ Nak quiril chixjunil a'in laj Simón Pedro, quixcuik'ib rib chiru li Jesús ut quixye re: —Canabin injunes, at Kacua'. Maçua' inc'ulub nak

cuankat cuiq'uin xban nak lajin jun cuink aj mac, chan. ⁹ Ut quisach xch'ol laj Simón jo'queb ajcui' li cuanqueb rochben xban nak k'axal cui'chic nabal li car que'xchap. ¹⁰ Ut jo'can ajcui' laj Jacobo ut laj Juan, eb li ralal laj Zebedeo. A'an eb li rochben laj Simón. Ut li Jesús quixye re laj Simón: —Matc'oxlac, Chalen anakcuan macua' chic caribc tabanu. Acuas acuitz'in ban chic taśic' re te'pabank, chan li Jesús. ¹¹ Ut que'xc'am li jucub chire li palau ut aran que'xcanab chixjunil ut que'xtake li Jesús.

Li Jesús quixq'uirtesi jun cuink saklep rix

¹² Nak cuan li Jesús sa' jun li tenamit, quicuulac jun li cuink riq'uin saklep rix. Nak quiril li Jesús quixxulub rib sa' ch'och', ut quixtz'ama chiru li Jesús ut quixye re: —Kacua', lajin ninnau nak laat naru tinaq'uirtesi. Cui tabanu li usilal, chinaq'uirtesi, chan. ¹³ Li Jesús quixch'e' li cuink riq'uin ruk' ut quixye re: —Lain tincuaj nak tatq'uirak. Anakcuan tating'uirtesi, chan. Ut sa' ajcui' li honal a'an quiq'uira li cuink. ¹⁴ Ut li Jesús quixye re: —Ma ani aj e taserak'i chanru nak xatq'uira. Ayu ban riq'uin laj tij re nak a'an taril nak xatq'uira. Ut taq'ue la mayej jo' naxye sa' lix chak'rab laj Moisés chok' retalil chiruheb chixjunileb nak xatq'uira, chan li Jesús. ¹⁵ Abanan yalak bar yo chi abic' resil chixjunil li c'a'ru yo chixbanunquil li Jesús. Nabaleb li tenamit neque'xch'utub ribeb chirabinquil li c'a'ru naxye ut re ajcui' nak te'q'uirtesik. ¹⁶ Ut li Jesús rajlal naxic xjunes chi tijoc sa' eb li na'ajej bar mac'a' cuan.

Li Jesús quixq'uirtesi jun li cuink sic li rok ut sic li ruk'

¹⁷ Sa' jun li cutan nak li Jesús yo chixch'olobanquil llix yalal chiruheb li tenamit cuanqueb cuib oxib laj fariseo sa' xyankeb. Ut cuanqueb ajcui' aq tzolol chak'rab. Que'chal chak sa' eb li na'ajej Galilea, Judea ut Jerusalén. Ut li Jesús yo chixq'uirtesinquibleb li yaj riq'uin xcuauquil li Dios. ¹⁸ Sa' li honal a'an que'cuulac cuib oxib li cuink ut yoqueb chixc'ambal jun li cuink sic li rok ut sic li ruk' yocyoo chiru llix cuarib. Ut te'raj rocsinquil li cuink cuan cui' li Jesús. ¹⁹ Abanan que'r'il nak inc'a' que'ru chi oc sa' li cab xban li q'uila tenamit. Jo'can nak que'take' sa' xb'en li cab. Que'xte ca'ch'in li xb'en li cab ut aran que'xcubsi li yaj chi yocyoo sa' lix cuarib. Coxe'xq'ue sa' xyiheb li tenamit bar cuan cui' li Jesús. ²⁰ Quixq'ue retal li Jesús nak eb li cuink a'an que'xpab nak naru tixq'uirtesi li yaj. Jo'can nak quixye re li yaj: —At cuink, cuybil sachbil chic la mac, chan. ²¹ Ut eb laj fariseo ut eb laj tzolol chak'rab que'oc chixyebal chi ribileb rib: —¿Ani li cuink a'an nak naxjuntak'eta rib riq'uin li Dios nak naxye chi jo'can? ¿Ma a'an ta bi' li Dios? ¿Ma macua' ta bi' ca'aj cui' li Dios naru nacyuc mac? chanqueb. ²² Quixnau li Jesús c'a'ru yoqueb chixc'oxlanquil. Quichak'oc ut quixye reheb: —¿C'a'ut nak yoquex chixc'oxlanquil chi jo'can? ²³ ¿Bar cuan li us tinye re li yaj re nak tac'utunk cheru nak cuan incuanquil? ¿Ma tinye re, “cuybil sachbil la mac” malaj ut tinye re, “tatinq'uirtesi”? ²⁴ Lain tinc'ut cheru nak lain li Cristo li C'ajolbej ut cuan incuanquil sa' ruchich'och' chixcuybal xsachbal li mac, chan reheb. Tojo'nak li Jesús quixye re li yaj, —At cuink, lain tinye acue, cuaclin, c'am la cuarib ut ayu sa' la cuochoch, chan. ²⁵ Ut sa' ajcui' li honal a'an li cuink li yaj nak quicuan quicuacli chiruheb chixjunileb li cuanqueb aran. Quixchap llix cuarib ut yo chixlok'oninquil li Dios nak co sa' rochoch. ²⁶ Ut chixjunileb li cuanqueb aran sachsoqueb xch'ol que'cana chiribal li quic'ulman. Que'xlok'oni li Dios ut yo xc'a'uxeb nak que'xye: —Sachba ch'glej li xkil anakcuan, chanqueb.

Li Jesús quixbok chok' xtzolom laj Leví laj titz'ol toj, li nayeman ajcui' Mateo re

²⁷ Nak qui-el sa' li tenamit a'an, li Jesús quixtau jun li cuink aj titz'ol toj aj Leví xc'aba'. Chunchu cuan cui' li mex li neque'c'uluc cui' toj. Li Jesús quixye re: —Chinatake, chan. ²⁸ Quicuacli laj Leví. Quixcanab chixjunil ut quixtake li Jesús. ²⁹ Quixbanu jun li nimla nink'e laj Leví chok' re li Jesús. Cuanqueb nabaleb xcomoneb laj titz'ol toj ut cuanqueb ajcui' nabaleb jalan chic chi cuac sa' li mex rochbeneb. ³⁰ Eb laj fariseo ut eb laj tzolol chak'rab que'oc chixcuech'inquil rixeb lix tzolom li Jesús ut que'xye reheb: —¿C'a'ut nak nequexcuac ut nequex-uc'ac rochbeneb laj titz'ol toj ut rochbeneb laj māc? chanqueb. ³¹ Li Jesús quixye reheb: —Li cauheb māc'a' na-oc cui' aj banonel reheb. Aban li yajeb, a'aneb li te'raj banec'. ³² Jo'can nak lain inc'a' xinchal chixsic'bal li tīqueb xch'ol. Xinchal ban chixsic'baleb laj māc re nak te'yot'ek' xch'ol ut te'xjal xc'a'uxeb, chan li Jesús.

Nak que'xcuech'i rib chirix li ayun

³³ Ut que'xye cui'chic re li Jesús: —Eb lix tzolom laj Juan rajjal neque'xbanu x-ayun ut rajjal neque'tijoc. Jo'can ajcui' neque'xbanu 'lix tzolomeb' laj fariseo. Ut eb la' tzolom laat, ¿c'a'ut nak inc'a' neque'xbanu chi jo'can? Eb a'an neque'cuac ac neque'uc'ac chi māc'a'eb xc'a'ux, chanqueb. ³⁴ Tojo'nak quichak'oc li Jesús ut quixye reheb: —Lain jo' jun belomej nak cuanquin. ¿Ma naru te'ayunik li neque'xic riq'uin sumlāc nak cuan li belomej riq'uineb? Nak toj cuan li belomej riq'uineb inc'a' naru neque'xbanu x-ayun. ³⁵ Ut jo'can ajcui' lin tzolom. Tacuulak xk'ehil nak tin-isik sa' xyankeb. Toj sa' li cutan a'an te'xbanu x-ayun, chan reheb.

Li najter na'leb inc'a' naxc'am rib riq'uin li ac' na'leb

³⁶ Ut li Jesús quixye cui'chic reheb li jaljoquil ru atin a'in: Ma ani naxxiti junak k'el t'icr riq'uin ac' t'icr. Cui ut naxxiñi riq'uin ac' t'icr, naxnimobresi xpejelal li k'el t'icr. Ut inc'a' naxc'am rib li ac' t'icr riq'uin li k'el. ³⁷ Ut ma ani naq'uehoc ac' vino sa' junak k'el bols tz'um. Cui tixq'ue li ac' vino sa' junak k'el bols tz'um, tapuq'uek' li k'el tz'um ut tāhoyek' li vino. Tasachk li vino ut tasachk ajcui' li bols tz'um. ³⁸ Jo'can nak li ac' vino sa' li ac' bols tz'um naq'uemana re nak māc'a' tixc'ul li vino chi moco li bols tz'um. ³⁹ Ut li ani ac xruc' li vino re junxil inc'a' chic tāraj ruc'bal li ac' vino, xban nak neque'xc'oxla nak li vino re junxil, a'an li chābil, chan li Jesús reheb.

6

Que'cuech'ic rixeb lix tzolom li Jesús nak que'xsic' ru li trigo sa' li hilobal cutan

¹ Sa' jun li hilobal cutan li Jesús yo chi numec' sa' jun s̄ir li acuimk trigo rochbeneb lix tzolom. Eb lix tzolom que'xch'ot ru li trigo nak yoqueb chi numec' ut que'risi li rix sa' ruk'eb ut que'xcua'. ² Cuanqueb cuib oxib eb laj fariseo que'ril nak yoqueb chixsic'bal ru li trigo. Que'xye reheb: —¿C'a'ut nak yoquex chixsic'bal ru li trigo sa' li hilobal cutan? ¿c'a'ut nak nequebanu li c'anjal moco uxc ta naraj sa' li hilobal cutan? chanqueb. ³ Li Jesús quichak'oc ut quixye reheb: —¿Ma ma jun cua erilom sa' li Santil Hu li c'a'ru quixbanu laj David nak a'an ut eb li rochben te'tz'ocak? ⁴ Laj David qui-oc sa' li rochoch li Dios ut quixchap li caxlan cua li ac mayejanbil chiru li Dios. Juneseb raj laj tij naru te'tzacank re li caxlan cua a'an. Abanan laj David quixcua' ut quixq'ue ajcui' reheb li cuanqueb rochben xban nak te'tz'ocak. ⁵ Ut li Jesús quixye

cui'chic reheb: —Jo'can nak lajn li C'ajolbej cuan incuanquil chixyebal c'a'ru tauxmank sa'li hilobal cutan, chan reheb.

Li Jesús quixq'uirtesi li cuink sic li ruk'

⁶ Sa' jun chic li hilobal cutan qui-oc li Jesús sa' li cab li neque'xch'utub cui' ribeb laj judío ut quixch'olob lix yalal chiruheb li tenamit. Aran cuan jun li cuink sic lix nim uk'. ⁷ Cuanqueb cuib oxib aj fariseo ut aj tzolol chak'rab aran. Yoqueb chirilbal ma tixq'uirtesi tana lí ruk' li cuink a'in sa' li hilobal cutan re nak naru te'xjit li Jesús. ⁸ Li Jesús quixnau c'a'ru yoqueb chixc'oxlanquil. Jo'can nak quixye re li cuink li sic ruk': —Cuaclin. Xákab acuib chiruheb, chan. Ut li cuink quicuaclí ut quixakli chiruheb. ⁹ Li Jesús quixye reheb: —Cuan c'a'ru nacuaj xpatz'bal ere. ¿C'a'ru us xbanunquil sa' li hilobal cutan? ¿Ma naru xbanunquil li us malaj li inc'a' us? ¿Ma us xcolbal xyu'am junak malaj xsachbal? chan reheb. ¹⁰ Li Jesús quicana chirilbaleb chixjunkaleb, ut quixye re li cuink li sic ruk': —Ye' la cuuk', chan. Ut li cuink quixye' li ruk' ut sa' ajcui' li hñonal a'an quiq'uira li ruk'. ¹¹ C'ajo' nak que'josk'o' eb laj fariseo ut laj tzolol chak'rab, ut que'oc chixyebal chi ribileb rib chanru nak te'xjit li Jesús.

Li Jesús quixsic' ruheb li cablaju chi apóstol

¹² Sa' jun li cutan co'li Jesús chi tijoc sa' xben jun li tzul. Quixnumsi li k'ojojin chi tijoc chiru li Dios. ¹³ Nak ac xsakeu quixbokeb lix tzolom ut quixsic' ruheb li cablaju sa' xyankeb ut quixq'ueheb chok' apóstol. A'aneb a'in li apóstol li quixsic' ruheb: ¹⁴ laj Simón li quixq'ue ajcui' Pedro chok' xc'aba'; laj Andrés li ritz'in laj Pedro; laj Jacobo; laj Juan; laj Felipe; laj Bartolomé; ¹⁵ laj Mateo; laj Tomás; laj Jacobo li ralal laj Alfeo; laj Simón li neque'xye ajcui' Zelote re; ¹⁶ laj Judas li ritz'in laj Jacobo ut laj Judas Iscariote li quik'axtesin re li Jesús mokon sa' ruk'eb li xic' neque'iloc re.

Li Jesús quixq'uirtesi nabaleb li cristian

¹⁷ Li Jesús quicube sa' li tzul rochbeneb lix tzolom ut quicana sa' jun na'ajej tak'a ru rochbeneb lix q'uialeb chic lix tzolom ut li q'uila tenamit li que'chal chak sa' eb li tenamit Judea ut Jerusalén. Ut cuan ajcui' li que'chal sa' eb li tenamit li cuanqueb chire li palau jo' Tiro ut Sidón. Quilaje'chal re nak te'rabi li c'a'ru tixye li Jesús ut re ajcui' nak li Jesús tixq'uirtesiheb li yaj. ¹⁸ Ut quixq'uirtesiheb ajcui' li cuanqueb mäus aj musik'ej riq'uineb. ¹⁹ Ut li q'uila tenamit te'raj xch'e'bal li Jesús re nak te'q'uirtesik. A'an naxq'uirtesiheb riq'uin lix cuanquilal. ²⁰ Ut li Jesús quirileb lix tzolom ut qui-oc chixyebal: —Us xak ere laex li neba'ex, xban nak cuanqueb chic rübel xcuanylil li Dios. ²¹ Us xak ere laex li textz'ocák anakcuan xban nak tac'ojobak ech'ol. Us xak ere laex liyoqex chi yabac anakcuan xban xrahil ech'ol xban nak sa' jun cutan texse'ek xban xsahil ech'ol. ²² Us xak ere laex nak xic' texilek' sa' inc'aba' lajn li C'ajolbej. Us xak ere laex nak tex-isík sa' xyankeb ut texhobek' sa' inc'aba' lajn ut tayehék' ere nak inc'a' us ena'leb. ²³ Chisahok' sa' ech'ol nak te'xbani ere chi jo'can. Chic'ojlak ech'ol xban nak cuan jun le k'ajcamunquil riq'uin li Dios sa' choxa. Jo'can ajcui' nak que'xtz'ektana eb li profeta junxil eb lix xe'tonil xyucua'eb li tenamit a'in. ²⁴ Abanan, laex li biomex raylal chalel sa' ebeen xban nak ac xec'ojob ech'ol arin sa' ruchich'och'. ²⁵ Raylal chalel sa' ebeen laex li cuan nabal c'a'ru ere xban nak tacuulak xk'ehil nak mac'a' chic cuank ere re textzacank. Raylal chalel sa' ebeen laex li nequexse'ec anakcuan xban xsahil ech'ol xban nak mokon texyabak xban xrahil ech'ol. ²⁶ Raylal chalel sa' ebeen laex li naq'uehe' elok'al

arin sa' ruchich'och' xbaneb li tenamit. Jo'ca'in ajcui' nak que'q'uehe' xlok'al eb li profeta aj balak' xbaneb le xe'tonil yucua'.

Cherahakeb li xic' neque'iloc ere

²⁷ Ut laex li yoquex chi abinc re li yoquin chixyebal, cheq'uehak retal li tineyé ere. Cherahakeb li xic' neque'iloc ere. Ut chebanuhak usilal rebeb li neque'tz'ektanan ere. ²⁸ Chetz'ämäk rusilal li Dios sa' xbenet li neque'mausilani ere. Ut chextijok ajcui' chirixeb li neque'hoboc ere. ²⁹ Cui ani tásac'ok xnak' acuu, q'ue li jun pac'al re, re tixsac'. Cui ani taraj xmak'bal la' chaquet, q'ue ajcui' la' camis re. ³⁰ Li ani tixtz'ama c'a'ru re acue, q'ue re. Ut cui ani tixmak' c'a'ru acue chacuu, mapatz' chic rekaj re. ³¹ Cui laex teraj nak chabilakeb le ras eritz'in eriq'unin, chabilakex ajcui' laex riq'uineb a'an. ³² Cui ca'aj cui' li ani narahoc ere nequera, mac'a' xjalanil li yoquex chixbanunquil, riq'uin li neque'xbanu li maji' neque'paban xban nak ca'aj cui' li ani narahoc rebeb neque'xra. ³³ Cui ca'aj cui' li neque'banun usilal ere, nequebanu usilal rebeb, mac'a' xjalanil li yoquex chixbanunquil riq'uin li neque'xbanu li maji' neque'paban. Xban nak ca'aj cui' li ani nabánun usilal rebeb neque'xbanu usilal re. ³⁴ Cui laex nequeto'oni tumin ca'aj cui' rebeb li nequenau nak te'xq'ue rekaj, mac'a' xjalanil li yoquex chixbanunquil riq'uin li neque'xbanu li toj maji' neque'paban xban nak neque'xto'oni tumin ca'aj cui' rebeb li neque'xnau nak te'xq'ue rekaj. ³⁵ Jo'can ut nak cherahakeb li ani xic' neque'iloc ere. Chebanuhak usilal rebeb. Ut cheq'uehak chi to' re li c'a'ru tixpatz' ere chi inc'a' teroybeni rekaj. Cui tebanu a'an, k'axal nim le' k'ajcamunquil li taq'uehek' ere ut laexak li ralal xc'ajol li nimajcual Dios. A'an k'axal nim xcuyum sa' xbenet li inc'a' useb xna'leb li inc'a' neque'xnau bantioxinc. ³⁶ Chex-uxtanank bi' u xban nak le yucua' cuan sa' choxa na-uxtan an u. ³⁷ Metzt'iloc atin chirixeb le ras eritz'in re nak li Dios inc'a' tatz'ilok atin cherix laex. Metz'ektana le ras eritz'in re nak li Dios inc'a' textz'ektana laex. Checuyak xmaqueb le ras eritz'in re nak li Dios tixcuy emac laex. ³⁸ Chesi c'a're re le ras eritz'in ut li Dios tixq'ue rekaj ere. Tixq'ue rekaj ere chi nabal chiru li xeq'ue laex. Tixq'ue chi nujenak li bisleb, chi yók chi pajec' xban nak k'axal cui'chic nabal li tixq'ue ere. Riq'uin li bisleb li texbisok cui' laex, a'an ajcui' li tabisek' cui' li taq'uehek' ere, chan. ³⁹ Li Jesús quixye li jaljoquil ru atin a'in rebeb li tenamit ut quixye: —Junak mutz', ¿Ma naru ta bi' tix'ut xbe junak chic mutz? ¿Ma inc'a' ta bi' sa' cuibal te't'anek' sa' jul xban nak mutz'eb? ⁴⁰ Ma jun aj tzolonek naxk'ax xcuanganquil laj tzolol re. Abanan nak acak xtzol rib chi tz'akal, tixtau ajcui' xcuanganquil laj tzolol re. ⁴¹ ¿C'a'ut nak nacaq'ue retal li c'aj che' cuan sa' xnak' ru la' cuas acuítz'in ut inc'a' nacaq'ue retal li tz'amba cuan sa' xnak' acuu laat? ⁴² ¿Chanru nak taye re la cuas acuítz'in, "Cuisihak li c'aj che' sa' xnak' acuu", nak toj cuan li tz'amba sa' xnak' acuu laat? At aj ca'pac'al u, xben cua ísi li tz'amba cuan sa' li xnak' acuu laat, re nak tat-ilok chi tz'akal re risinquel li c'aj che' cuan sa' xnak' ru la cuas acuítz'in. ⁴³ Jo'can ajcui' riq'uin li che'. Cui chabil junak che', chabil ajcui' li ru naruchin. Ut cui inc'a' us li che', li ru li naruchin inc'a' ajcui' us. Li chabil che' inc'a' naru naruchin li inc'a' us, chi moco li che' inc'a' us naru naruchin li us. ⁴⁴ Ut riq'uin li ru naruchin nanauman ru li che'. Li tun q'uij inc'a' naru naruchin li higos chi moco li q'uij naru naruchin li uvas. ⁴⁵ Jo'can ajcui' riq'uin li cristian. Li ani chabil, chabil ajcui' lix yehom xbanuhom xban nak cuan li chabilal riq'uin. Ut li ani inc'a' chabil, inc'a' chabil lix yehom xbanuhom xban nak mac'a' li chabilal riq'uin. Riq'uin li ratin li junjunk nac'utun chanru li ram. ⁴⁶ ¿C'a'ut nak nequeye, "Kacua', Kacua'" cue cui inc'a' nequebanu li c'a'ru ninye? ⁴⁷ Jo'can nak li ani na-abin re li cuatin ut naxbanu

li c'a'ru ninye, li jun a'an tinjuntak'eta riq'uin jun li cuink quixyib li rochoch. ⁴⁸ Quixbec chi cham ut quixq'ue li cimiento sa' xben li pec. Quichal li hab ut quibut'ir li nima'. Coxsac' rib li ha' chiru li cab ut inc'a' quirec'asi li cab sa' xna'aj xban nak yibanbil chi us sa' xben pec. ⁴⁹ Ut li ani na-abin re li cuatin ut inc'a' naxbanu li c'a'ru ninye, li jun a'an tinjuntak'eta riq'uin li cuink li quixyib li rochoch sa' xben ch'och' ut inc'a' quixbec xna'aj lix cimiento. Nak quibut'ir li nima', li ha' coxsac' rib chiru li cab. Quit'ane' li cab ut quisach chi jun aj cua, chan li Jesús reheb.

7

Li Jesús quixq'uirtesi xmos li capitán aj Roma

¹ Nak quirake' xch'olobanquil lix yalal chiruheb li tenamit, li Jesús co Capernaum. ² Ut aran cuan jun li capitán aj Roma cuan jun lix mos k'axal naxra. Yaj ut cämc re. ³ Li capitán quirabi resil nak cuan li Jesús aran. Quixtaklaheb cuib oxib laj judío xcomoneb li neque'c'amoc be sa' li tenamit re nak te'xtz'ama chiru li Jesús nak tjaxic sa' rochoch li capitán chixq'uirtesinquel lix mos. ⁴ Que'cuulac riq'uin li Jesús ut que'xtz'ama chiru nak tixbanu li yo chixtz'amankil li capitán. Que'xye re li Jesús: —Us cui tabanu li usilal re li capitán, ⁵ xban nak a'an nocoxra lao aj judío ut a'an quitaklan re xyibanquil li cab nakach'utub cui' kib, chanqueb re li Jesús. ⁶ Ut li Jesús co chirixeb. Nak ac cuulaqueb re cuan cui' li rochoch, li capitán quixtaklaheb li ramig chi atinac riq'uin li Jesús ut que'xye re: —Jo'ca'in xye li capitán acue: Mäch'i'ch'i'i acuib chi chalc sa' cuochoch xban nak moco inc'ulub ta nak tatchalk sa' cuochoch. ⁷ Jo'can nak inc'a' xcoin lajn chi atinac acuiq'uin. Ninnau nak moco inc'ulub ta nak tincuulak acuiq'uin. Ca'aj cui' nacuaj nak taye nak taq'uirak lin mos ut ninnau nak taq'uirak. ⁸ Lajn cuan ani nataklan cue ut cuanqueb lin soldado rubel incuanquil. Nak ninye re li jun "ayu", naxic. Ut nak ninye re li jun chic "quim", nachal. Ut nak ninye re lin mos, "banu a'in", naxbanu, chan li capitán. ⁹ Nak li Jesús quirabi a'in, quisach xch'ol ut quixye reheb li cuanqueb rochben: —Relic chi yal tinye ere nak ma jun intauhom chi moco sa' xyänkeb laj Israel cuan tz'akal xpabal jo' li jun a'in, usta mäcua' aj judío, chan. ¹⁰ Nak que'cuulac eb li takl sa' rochoch li capitán, ac xq'uira chic lix mos.

Li Jesús quixcuaclesi cui'chic chi yo'yo jun li saj al xyum jun li xmälca'an

¹¹ Chirix a'in li Jesús qui-el Capernaum ut co sa' jun chic li tenamit Naín xc'aba' rochbeneb lix tzolom. Ut cuanqueb ajcui' nabaleb li tenamit yoqueb chi xic chirix. ¹² Nak yo chi cuulac cuan cui' li oquebal re li tenamit quiril nak nabaleb li cristian yoqueb chi xic chixmukbal'jun li camenak. Li camenak a'an xyum jun li xmälca'an. Jun ajcui' chiru nak quicuan. ¹³ Nak li Kacula' Jesús quiril li xna'li camenak, quiril xtök'obal ru ut quixye re: —Matyabac, chan. ¹⁴ Li Jesús quinach'oc riq'uineb ut quixch'e' li tusbil che'li yoqueb chixpakonquil cui' li camenak. Ut eb li yoqueb chi c'amoc re li camenak que'xakli ut li Jesús quixye re li camenak: —At saj cuink, lajn tinye acue, cuaclin, chan. ¹⁵ Ut li camenak quicuacli ut quichunla ut qui-oc chi atinac riq'uineb. Ut li Jesús quixk'axtesi re lix na'. ¹⁶ Nak que'r'il li c'a'ru quic'ulman chixjunileb li cuanqueb aran, c'ajo' nak que'xucuac ut que'oc chixq'uebal xllok'al li Dios. Ut que'xye: —Jun xanimal ru profeta xc'ulun sa' kayänk. — Ut que'xye ajcui': —Li Dios xchal chixtenk'anquil lix tenamit, chanqueb. ¹⁷ Ut

qui-abjc resil li c'a'ru quixbanu li Jesús sa' chixjunil li na'ajej Judea jo' ajcui' sa' eb lì na'ajej li cuanqueb chi xjun sutam.

Li Jesús quixtakla xyebal re laj Juan nak li milagros li naxbanu naxc'ut nak a'an li Cristo

¹⁸ Lix tzolom laj Juan laj Cubsihom Ha' que'xserak'i re c'a'ru yo chi c'ulmanc. Nak ac xrabi a'an, laj Juan quixtakla cuib lix tzolom riq'uin li Jesús chixpatz'bal re: ¹⁹ —¿Ma laat laj Colonel li yechi'nbil li yoco chiroybeninquil? ¿Malaj toj takoybeni junak chic? — ²⁰ Nak que'cuulac lix tzolom laj Juan riq'uin li Jesús, que'xye re: —Xoxtakla chak laj Juan laj Cubsihom Ha' ącuiq'uin chixpatz'bal ącue, “¿Ma laat laj Colonel li yechi'nbil li yoco chiroybeninquil? ¿Malaj ut toj takoybeni junak chic?” chanqueb re li Jesús. ²¹ Ut sa' li hnjal a'an li Jesús yo chixq'uirtesinquileb nabaleb li cristian li cuanqueb sa' raylal. Cuanqueb li yaj quixq'uirtesiheb. Ut cuanqueb li cuan maus aj musik'ej riq'uin ut li Jesús quirisi li maus aj musik'ej riq'uineb. Ut cuanqueb nabaleb li mutz' li quixq'ueheb chi iloc. ²² Ut li Jesús quixye reheb: —Ayukex ut teserak'i re laj Juan li c'a'ru xeril ut li c'a'ru xerabi. Yehomak re nak eb li mutz' neque'iloc chic; eb li yek rok neque'bèc chic; eb li saklep rix q'uirtesinbileb chic; eb li tz'ap xic neque'abin chic; eb li camenak xe'cuaclesic cui'chic chi yo'yo ut eb li neba' yoqueb chirabinquil resil li usilal. ²³ Us xak reheb li ani inc'a' tach'inank xch'ol chinpabanquil, cha'kex re, chan li Jesús. ²⁴ Ut nak que'el lix takl laj Juan riq'uin, li Jesús qui-oc chi atinac riq'uineb li tenamit chirix laj Juan ut quixye chi jo'ca'in: —¿C'a'ru queril chak sa' li chaki ch'och' nak coex chirilbal laj Juan? ¿Ma junak cuink nacuiban xch'ol chanchan li caxlan aj yo rec'asinquil xban ik' queril chak? ²⁵ ¿C'a'ru queril chak? ¿Ma junak cuink chabil xtikibanquil queril chak? Li chabilb rak' ut li cuanqueb sa' sahil ch'olej, eb a'an sa' rochoch eb li rey cuanqueb. ²⁶ ¿C'a'ru queril chak? ¿Ma junak profeta queril chak? Yal nak a'an jun profeta. Abanan lajin tinye ere nak li jun a'in naxk'ax ru xcuانquil junak profeta. ²⁷ Chirix laj Juan tz'ibanol sa' li Santil Hu li naxye chi jo'ca'in: Aut lajin tintakla lin takl aj c'amol be chàcuu. A'an tach'olobank xyalal chiruheb li tenamit re nak eb a'an yo'on cuanqueb chàc'ulbal laat. (Mal. 3:1)

²⁸ Relic chi yal tinye ere nak ma jun reheb li neque'yo'la arin sa' ruchich'och' naxk'ax xcuانquil laj Juan laj Cubsihom Ha'. Aban li k'axal cubenak xcuانquil sa' lix nimajcual cuanquil li Dios, k'axal us chok' re a'an chiru laj Juan, chan li Jesús. (Quixye chi jo'can xban nak laj Juan inc'a' taril lix nimajcual cuanquilal li Dios arin sa' ruchich'och'). ²⁹ Chixjunileb li tenamit ut eb laj titz'ol toj li que'abin re li c'a'ru quixye laj Juan, que'xq'ue retal nak tic xch'ol li Dios ut que'xc'ul li cubi ha' riq'uin laj Juan. ³⁰ Abanan eb laj fariseo ut eb laj tzolol chak'rab que'xtz'ektana li rusilal li Dios li quixc'oxla xbanunquil reheb. Ut inc'a' que'xc'ul li cubi ha' riq'uin laj Juan. ³¹ Ut quixye ajcui' li Jesús: —¿Ani aj iq'uin taruk tebinjuntak'eta li cuanqueb sa' ruchich'och' anakcuan? Mac'a' nacuulac chiruheb. ³² Chanchaneb li coc'alli neque'ojla chi batz'unc sa' eb li c'ayil ut neque'xjap re chixyebal reheb lix comon, “Xkayabasi li kaxolb ut inc'a' xexxajoc; xobichan chi ra sa' kach'ol ut inc'a' xexyabac xban”, chanqueb. ³³ Nak quic'ulun laj Juan laj Cubsihom ha', cuan li tzacaemk inc'a' quixtzaca ut cuan li inc'a' quiruc', ut eb li tenamit inc'a' que'xc'ul ut que'xye: “Maus aj musik'ej cuan riq'uin”, chanqueb. ³⁴ Ut nak xinc'ulun lain li C'ajolbej inc'a' ajcui' xine'xc'ul sa' xyalal usta nincua'ac ut nin-uc'ac. Que'xye ajcui' chicuix, “Li cuink a'an junes cua'ac naxbanu ut uc'ac vino. A'an ramigueb laj mac ut eb laj titz'ol toj”, chanqueb. ³⁵ Nac'utun nak chabil

li na'leb li naxq'ue li Dios xban li chabilal li neque'xbənu li ralal xc'ajol, chan li Jesús.

Quiyule' sa' sununquil ban li rok li Jesús

³⁶ Jun li cujnk aj Simón xc'aba' xcomoneb laj fariseo quixbok li Jesús chi cua'ac sa' rochoch. Ut li Jesús co sa' rochoch li cujnk a'an ut quichunla sa' mex. ³⁷ Cuan sa' li tenamit a'an jun li iixk xcomoneb li inc'a' useb xna'leb. Quirabi resil nak li Jesús cuan chi cua'ac sa' li rochoch laj fariseo. Co aran ut quixc'am jun ch'ina botella li sununquil ban. Li ch'ina botella yibānil riq'unin li chabil pec alabastro xc'aba'. ³⁸ Li iixk quijiloc riq'unin li Jesús. Qui-oc chi yābac sa' xben li rok ut riq'unin lix ya'al ru quixch'aj. Ut quixmes riq'unin rismal xjolom. Quirutz' li rok ut quixyul riq'unin li sununquil ban. ³⁹ Nak quiril a'in laj fariseo li quibokoc re li Jesús chi cua'ac, quixye sa' xch'ol: Cui ta tz'akal profeta li cujnk a'in tixnau raj chanru lix yu'am li iixk a'in li yo chi ch'e'oc re li rok. Tixnau raj nak li iixk a'in inc'a' us xna'leb. ⁴⁰ Ut li Jesús quixye re laj fariseo: —At Simón, cuan c'a'ru nacuaj xyebal aq'ue, chan re. Ut laj Simón quixye re: —Us. Ye cue, at tzolonel. —⁴¹ Ut li Jesús quixye re: —Cuan jun li cujnk quixq'ue chi to'lix tumin reheb cuib chi cujnk. Li jun o'c'al pes lix c'as ut li jun chic lajeb pes. ⁴² Ut xban nak inc'a' que'ru xq'uebal rekaj li tumin que'xt'o'ni, laj echal re li tumin quixcuyeb xmāc xcabichaleb. Anakcuán ye cue, ¿jani reheb a cuib a'in k'axal tarahok re laj echal re li tumin? chan li Jesús. ⁴³ Quichak'oc laj Simón ut quixye re li Jesús: —Lāin ninc'oxla nak li ani nabal xc'as, a'an li k'axal tarahok re, chan. Ut li Jesús quixye cui'chic re: —Yal nak jo'can, chan. ⁴⁴ Ut li Jesús quiril li iixk ut quixye re laj Simón: —Il a iixk a'in. Nak xinc'ulun sa' la cuochóch, laat inc'a xaq'ue inha' re xch'ajbal li cuok jo' c'aynako xbanunquil. Ut li iixk a'in xch'ajli cuok riq'unin xy'a'l ru ut xmes riq'unin rismal xjolom. ⁴⁵ Laat inc'a xacuutz'li cuu nak xinc'ulun jo' c'aynako xbanunquil. Abanan li iixk a'in chalen xc'ulunic arin inc'a' naxcanab rutz'bal li cuok. ⁴⁶ Laat inc'a xaq'ue li aceite sa' lin jolom jo' c'aynako xbanunquil, abanan li iixk a'in xyuli li cuok sa' sununquil ban. ⁴⁷ Jo'can nak tīnye aq'ue nak li iixk a'in k'axal nabal lix māc. Abanan cuybil sachbil chic. Jo'can nak k'axal cui'chic xinixra. Ut li ani ca'ch'in ajcui' lix māc nacuye', ca'ch'in ajcui' narahoc, chan. ⁴⁸ Ut li Jesús quixye re li iixk: —Ac cuybil sachbil chic lā māc, chan. ⁴⁹ Ut eb li cuanqueb rochbeneb sa' li mex que'oc chixyebal: —¿Ani a cujnk a'in nak naxcuy naxsach li māc? chanqueb. ⁵⁰ Ut li Jesús quixye cui'chic re li iixk: —Xban nak cuan apabál, xatcole'. Jo'can nak ayu chi sa sa' ach'ol, chan re.

8

Eb li iixk li que'c'anjelac chiru li Jesús

¹ Li Jesús co sa' eb li tenamit chixyebal resil li chabil esilal. Ut quila'xebe ni chixjunileb li tenamit ut li c'alebal rochbeneb lix tzolom cablaju. Yo chixch'olobanquil lix yalal chirix lix nimajcual cuanquilal li Dios. ² Cuanqueb ajcui' iixk yoqueb chi ochbeninc reheb. Eb li iixk a'in, a'an eb li que'q'uirtesic xyajebeb ut eb li que'isic māus aj musik'ej riq'uineb xban li Jesús. Sa' xyankeb a'an cuan lix María. Lix Magdalena neque'xye ajcui' re. A'an li iixk li qui-isic cuukub li māus aj musik'ej riq'unin. ³ Cuan lix Susana sa' xyankeb. Ut cuan ajcui' lix Juana li rixakil laj Chuza li quicuan chok' mertom riq'unin laj Herodes. Ut cuanqueb ajcui' nabaleb chic li iixk rochbeneb. A'an eb li neque'tenk'an reheb riq'unin li c'a'ruheb re.

Lijaljoquil ru qtin chirix laj acuinel

⁴ Nabaleb li tenamit que'ch'utla riq'uin li Jesús. Que'chal chak sa' eb li na'ajej yalak bar. Ut li Jesús qui-oc chixyebal jun li jaljoquil ru atin reheb. Ut quixye: ⁵ —Jun aj acuinel co chi auc. Ut nak yo chixhibal li iyaj, cuan li quinak chire be ut quiyek'ic. Que'chal li xul li neque'xic'an ut que'xcua' li iyaj. ⁶ Ut cuan ajcui' li iyaj quinak sa' xyank li pec. Quimok, abanan sa' junpat quichakic xban nak chaki li ch'och'. ⁷ Ut cuan cui'chic li iyaj quinak sa' xyank li q'uix. Ut nak quichamo' li q'uix sa' xben, quixnat' li acuimk. ⁸ Ut cuan cui'chic li iyaj quinak sa' li chabil ch'och'. Quimok ut quiq'ui ut quiuchin chi us. Quixq'ue o'takc'al (100) ru li junjunk chi rok. Ut quixye cui'chic li Jesús. —Li ani t̄araj rabinquil li c'a'ru yoquin chixyebal, chixq'uehak retal li yoquin chixyebal, chan. ⁹ Ut eb lix tzolom que'xpatz' re: —¿C'a'ru xyalal li jaljoquil ru atin li xaye? chanqueb. ¹⁰ Quichak'oc li Jesús ut quixye reheb: —Laex q'uebil ere xnaubal xyalal li mukmuquil na'leb chirix lix nimajcual cuanquilal li Dios. A'ut li jun ch'ol chic li inc'a' neque'paban, riq'uin jaljoquil ru atin t̄ayemank reheb. Usta yoqueb chi iloc, abanan inc'a' te'xq'ue retal. Usta yoqueb chi abjinc, abanan inc'a' te'xtau xyalal. ¹¹ A'an a'in lix yyalal li jaljoquil ru atin li xinye. Li iyaj, a'an retalil li ratin li Dios. ¹² Ut li iyaj li quinak chire li be, a'an retalileb li neque'abin re li ratin li Dios. Nak ac xe'rabi li atin, laj tza inc'a' naxcanabeb re te'xtau ru li xyalal li ratin li Dios re nak inc'a' te'pabank ut te'colek'. ¹³ Ut li iyaj li quinak sa' xyank li pec, a'an retalileb li neque'abin re li ratin li Dios ut neque'xpab chi saheb sa' xch'ol. Abanan inc'a' nacana sa' xch'oleb. Nak nayale' rix lix pabaleb, inc'a' neque'xcuy xnumsinquel. Nach'inan ban xch'oleb. ¹⁴ Ut li iyaj li quinak sa' xyank li q'uix, a'an retalileb li neque'abin re li ratin li Dios. Neque'xpab, abanan inc'a' neque'q'ui sa' xpabaleb xban nak ca'aj cui' li c'a'ak ré ru cuan sa' ruchich'och' neque'xc'oxla, li biomal ut xrabal ru li c'a'ak chic re ru. A'an li naramoc lix yyalal chiruhed. ¹⁵ Ut li iyaj li quit'ane' sa' chabil ch'och', a'an retalileb li neque'abin re li ratin li Dios. Neque'xpab li ratin chi anchaleb xch'ol ut neque'q'ui sa' xpabaleb, chan li Jesús.

Lijaljoquil ru qtin chirix li candil

¹⁶ Ut li Jesús quixye ajcui' reheb: —Má ani tixloch junak candil ut tixq'ue ta rubel junak uc'al malaj ut tixq'ue ta rubel ch'at. Tixq'ue ban sa' junak na'ajej najt xteram re nak cuankeb sa' cutan li ani te'oc sa' li cab. ¹⁷ Jo'can ajcui' mac'a' cuan chi mukmu chi inc'a' ta tanaumank mokon. Utli inc'a' natauman ru anakcuan, tataumank ru mokon. ¹⁸ Jo'can ut cheq'uehak retal li c'a'ru terabi xban nak li ani naxq'ue xch'ol chixtaubal ru li xyalal, taq'uehek' mas xna'leb. Abanan li inc'a' naxq'ue xch'ol chixtaubal ru, tamak'ek' chiru li naxc'oxla nak naxnau, chan.

Eb li ritz'in ut lix na' li Jesús

¹⁹ Ut eb li ritz'in li Jesús rochbeneb lix na' que'cuulac chi atinac riq'uin. Abanan inc'a' que'ru chi oc cuan cui' li Jesús xban nak k'axal cui'chic nabaleb li cristian. ²⁰ Ut quiyeh'e resil re li Jesús: —La na' ut eb la cuitz'in cuanqueb chirix cab ut te'raj acuatinanquil, chan. ²¹ Quichak'oc li Jesús ut quixye reheb: —Li ani neque'abin re li ratin li Dios ut neque'xbənu li c'a'ru naxye, a'aneb lin na' ut li cuitz'in, chan li Jesús reheb.

Li Jesús quixk'us li cak-sut-ik'

²² Sa' jun li cutan li Jesús quixye reheb lix tzolom: —K'axonko jun pac'al li palau, chan reheb. Ut qui-oc sa' jun li jucub rochbeneb lix tzolom ut coeb. ²³ Nak ac yoqueb chi xic chiru li palau, li Jesús quicuar. Sa' li honal a'an

quichal jun li cak-sut-ik' ut qui-oc chi nujac li ha' sa' li jucub ut yoqueb re chi subunc sa' li palau. ²⁴ Eb lix tzolom cgeb cuan cui' li Jesús ut que'rajsi. Ut que'xye re: —At tzolonel, at tzolonel, osoc' ke, chanqueb. Ut li Jesús qui-aj ru ut quixk'us li ik' ut quixk'us li palau ut ch'anamil quicana. Inc'a' chic qui-ec'an. ²⁵ Ut li Jesús quixye reheb: —¿C'a'ru xec'ul? ¿Ma mac'a' chic epabal? chan. C'ajo' nak qui-oc xc'a'uxeb ut que'xsach xch'ol. Que'xye chi ribileb rib, —¿Chanru nak neque'abin li ik' ut li palau chiru li cuink a'in? Ut, ¿chanru nak cuan xcuanguil chixk'usbaleb? chanqueb.

Li Jesús quirisi li maus aj musik'ej riq'un jun li cuink cuan sa' li tenamit Gadara

²⁶ Li Jesús ut eb lix tzolom que'cuulac sa' li na'ajej Gadara li cuan jun pac'al li palau Galilea. ²⁷ Toje' ajcui' te'cuulak li Jesús nak quichal jun li cuink li cuan sa' li tenamit a'an chi c'uluc re. Li cuink a'an ac junxil cuan maus aj musik'ej riq'un. Inc'a' chic nacuan sa' rochoch chi moco naxq'ue chic rak'. Junes sa' li na'ajej li neque'muke' cui' li camenak nacuan. ²⁸ Nak quiril li Jesús li cuink quixcuik'ib rib chiru. Quixjap re chixyebal: —¿C'a'ru tacuaj cuiq'unin, at Jesús? Laat li Ralal li nimajcual Dios. Nintz'ama chacuu nak minach'i ch'i'i, chan re. ²⁹ Quixye chi jo'can xban nak li Jesús ac yo chixyebal re li maus aj musik'ej nak taekl riq'un li cuink. Nabal sut narahobtesic li cuink xban li maus aj musik'ej. Neque'xbac' riq'unin ch'ich' ut riq'unin cadena. Abanan naxt'upi li cadena ut nac'ame' xban li maus aj musik'ej sa' eb li na'ajej bar mac'a' cuan. ³⁰ Li Jesús quixye re: —¿Ani ac'aba'? chan re. —Cuakib mil inc'aba' xban nak nabalo, chan nak quichak'oc. ³¹ Ut eb li maus aj musik'ej que'xtz'ama chiru li Jesús nak inc'a' tixtaklaheb sa' xbalba. ³² Aran cuanqueb jun tub li ak yoqueb chi ichajibc chiru li tzul. Eb li maus aj musik'ej que'xtz'ama chiru li Jesús nak tixtaklaheb chi oc riq'uineb li ak. Ut li Jesús quixcanabeb chi oc riq'uineb. ³³ Que'el li maus aj musik'ej riq'un li cuink ut que'oc riq'uineb li ak. Eb li ak que'oc chi alinac. Sa' xben li ul que'el chak ut toj sa' li palau coxe'nak ut aran que'cam. ³⁴ Ut eb li yoqueb chi iloc reheb li ak que'coeb sa' anil ut coxe'xye resil sa' li tenamit li c'a'ru quic'ulman jo' ajcui' sa' li c'alebal. ³⁵ Ut nabaleb li tenamit que'coeb chirilbal li c'a'ru quic'ulman. Que'cuulac cuan cui' li Jesús ut que'r'il li cuink li qui-isic nabal chi maus aj musik'ej riq'unin. Chunchu chiru li Jesús. Tikto chic ut tuktu chic xjolom. Riq'un rilbal a'an que'sach xch'oleb li tenamit. ³⁶ Ut eb li que'iloc re li c'a'ru quic'ulman, que'xserak'i reheb li tenamit chanru nak quiq'uiria li cuink li quicuan maus aj musik'ej riq'unin. ³⁷ C'ajo' nak que'xucuac chixjunileb li tenamit li cuanqueb sa' eb li na'ajej li cuanqueb sa' xcient Gadara. Ut que'xtz'ama chiru li Jesús nak taekl sa' lix na'ajeb. Jo'can nak li Jesús qui-oc cui'chic sa' li jucub ut qui-el sa' li na'ajej a'an. ³⁸ Ut li cuink li qui-isic maus aj musik'ej riq'unin quixye re li Jesús: —Xicakin chacuix, chan re. Abanan li Jesús quixye re: —Inc'a'. Canaqat. ³⁹ Ayu sa' la cuochoch ut taserak'i reheb chixjunileb chanru nak li Dios xruxtana acuu, chan li Jesús. Jo'can nak co li cuink ut quixserak'i reheb chixjunileb li cuanqueb sa' li tenamit chanru nak li Jesús quiruxtana ru.

Li Jesús quixq'uirtesi lix rabin laj Jairo jo' ajcui' li ixd li quich'e'oc re li rak'

⁴⁰ Nak li Jesús quinume' cui'chic jun pac'al li palau, li q'uila tenamit yoqueb chiroybeninqil chi saheb sa' xch'ol. ⁴¹ Ut sa' li honal a'an quicuulac jun li cuink aran aj Jairo xc'aba'. A'an li nataklan sa' li cab li neque'xch'utub cui' ribeb laj judio. Nak quiril li Jesús, quixcuik'ib rib chiru ut quixtz'ama chiru nak taxic sa' rochoch xban nak camic re lix rabin. ⁴² Jun ajcui' lix rabin chiru.

Cablaju chihab na cuan re. Ut eb li cristian yoqueb chixlatz'anquil li Jesús nak yo chi xic. ⁴³ Sa' xyānkeb cuan jun li iixk cablaju chihab xticlaajc xyajel. Junelic yo lix yajel li iixk a'an ut inc'a' chic natz'ap lix quiq'uel. Quixq'ue rib chi banec' riq'uin nabaleb aj banonel ut nabal li tumín quixsach. Abanan ma jun quiru chi banoc re. ⁴⁴ Li iixk a'an quijiloc riq'uin li Jesús ut quixch'e' li rak'. Ut sa' ajcui' li honal a'an quiq'uira li iixk. ⁴⁵ Ut li Jesús quixye: —¿Ani xch'e'oc cue?— Ut chixjunileb que'chak'oc ut que'xye: —Lao inc'a' yoco chach'e'bal.— Tojo'nak laj Pedro jo'queb ajcui' li cuanqueb rochben que'xye re: —At tzolonel, laat nacacuil chanru nak yoqueb chalatz'anquil li tenamit. ¿C'a'ut nak nacapatz' ani xch'e'oc acue? chanqueb re. ⁴⁶ Ut li Jesús quixye cui'chic reheb: —Lain ninnau nak cuan ani xch'e'oc cue xban nak xcuec'a nak cuan ani xq'uira riq'uin incuanquil, chan. ⁴⁷ Li iixk quixq'ue retal nak li Jesús naxnau nak xch'e' li rak'. Nasicsot xban xxiu li iixk. Sa' xch'ol a'an nak tach'ilak xban li Jesús. Quixcuib' rib chiru li Jesús ut quixye re chiruhel chixjunileb li cristian c'a'ut nak quixch'e' li rak'. Ut quixye ajcui' re nak sa' ajcui' li honal a'an xq'uira. ⁴⁸ Li Jesús quixye re: —Kana', xban nak papab nak cuan incuanquil chaq'uirtesinquel, jo'can nak xatq'uira. Ayu chi sa sa' ach'ol, chan. ⁴⁹ Toj yo ajcui' chi atinac li Jesús nak quichal jun li cuink sa' rochoch laj Jairo li nataklan sa' li cab li neque'xch'utub cui' ribeb laj judío ut quixye re laj Jairo: —Xcam la rabin. Mac'h'i ch'i chic laj tzolonel, chan re. ⁵⁰ Nak quirabi li Jesús li c'a'ru quixye li cuink, quixye re laj Jairo: —Matc'oxlac. Ca'aj cui' tapab ut la rabin tacolek', chan. ⁵¹ Nak quicuulac li Jesús, ma ani quixcanab chi oc sa' li cab. Ca'aj cui' laj Pedro, laj Jacobo ut laj Juan rochbeneb lix na' xyucua' li xka'al. ⁵² Chixjunileb li cuanqueb aran japoqueb re chi yabac xban nak ac xcam. Ut li Jesús quixye reheb: —Mexyabac. Li xka'al a'in moco camenak ta. Cuarc yo, chan. ⁵³ Chixjunileb li cuanqueb aran que'xse'e li Jesús xban nak que'xnau nak li xka'al camenak chic. ⁵⁴ Abanan li Jesús quixchap chi ruk' li xka'al, ut quixye re: —At ch'ina xka'al, cuaclin, chan. ⁵⁵ Sa' li honal a'an quicuacli cui'chic chi yo'yo li xka'al. Ut li Jesús quixye reheb nak te'xq'ue chi cua'ac. ⁵⁶ Ut eb lix na' xyucua' sachsoqueb xch'ol riq'uin li quic'ulman. Abanan li Jesús quixye reheb nak ma ani aje te'xserak'i li c'a'ru quic'ulman.

9

Li Jesús quixtaklaheb lix tzolom cablaju chixch'olobanquil resil li colba-ib

¹ Li Jesús quixch'utubeb lix tzolom cablaju ut quixq'ueheb xcuanyl chirisinquileb li māus aj musik'ej ut quixq'ueheb ajcui' xcuanyl chixq'uirtesinquileb li yaj. ² Quixtaklaheb chixch'olobanquil resil lix nimajual cuanquinal li Dios ut chixq'uirtesinquileb li yaj. ³ Quixye reheb: —Mac'a' tec'am ere nak texxic. Inc'a' tec'am exuk', chi moco ebols, chi moco etzacaemk chi moco etumin. Ca'aj cui' le rak' li cuan cherix tec'am. ⁴ Nak texc'ulek' sa' junak cab, aran texcanaq. Toj tacuulak xk'ehil nak texxic, tex-ek' sa' li na'ajej a'an. ⁵ Cui texcuulak sa' junak na'ajej bar cui' inc'a' texc'ulek', tex-ek' riq'uineb ut techik' li poks cherok jo' retalil li raylal te'xc'ul xban nak inc'a' que'raj rabinquil li ratiñ li Dios, chan li Jesús. ⁶ Coeb ut lix tzolom li Jesús sa' eb li junjunk chi na'ajej ut yoqueb chixch'olobanquil resil li colba-ib. Ut yoqueb ajcui' chixq'uirtesinquileb li yaj.

Qui-oc xc'a'ux laj Herodes xban li Jesús

⁷ Laj Herodes li nataklan aran Galilea quirabi resil chixjunil li yo chixbanunquil li Jesús ut qui-oc xc'a'ux xban nak cuan yoqueb chi yehoc re

nak a'an laj Juan li xcuaceli cui'chic chi yo'yo sa' xyānkeb li camenak. ⁸ Ut cuan ajcui' li yoqueb chi yehoc re nak a'an li profeta Elías li xchal cui'chic. Ut cuan cui'chic li yoqueb chi yehoc re nak māre a'an jun xcomoneb li profeta li que'cuān junxil li xcuaceli cui'chic chi yo'yo sa' xyānkeb li camenak. ⁹ Laj Herodes quixye sa' xch'ol: —A'an mācua' laj Juan xban nak lain quintaklan re xch'otbal xcux. ¿Ani anchal a'an li yoquin chirabinquīl resil? chan. Jo'can nak tāraj rilbab ru.

Li Jesús quixq' ueheb chi cua'ac li qb mil chi cuink

¹⁰ Nak que'suk'i chak lix tzolom chixbānunquīl li c'anjel que'taklac cui', que'xserak'i re li Jesús li c'a'ru quilaje'xbānu chak. Li Jesús quixc'amēb xjuneseb sa' jun na'ajej bar māc'a' cuan, li cuan xcuēnt li tenamit Bet-saida. ¹¹ Abanan li q'uila tenamit que'xq'ue retal nak li Jesús yoqueb chi xic sa' li na'ajej a'an, ut que'coeb chirix. Li Jesús quixc'uleb ut qui-oc chixch'olobanquīl xyālal chiruhēb chirix lix nimajcuāl cuanquīl li Dios. Ut quixq'uirtesiheb ajcui' li yaj. ¹² Nak ac yo' chi ecuūc, lix tzolom cablaju que'coeb bar cuan cui' li Jesús ut que'xye re: —Chak'rabiheb li tenamit re nak te'xic xsic'bal lix na'ajeb bar te'hilank cui' ut te'xic' ajcui' lix tzacaemk sa' eb li c'alebal ut sa' eb li na'ajej li cuanqueb chi nach', chanqueb re. ¹³ Li Jesús quixye reheb: —Q'uehomak xcuahēb laex. Ut eb a'an que'xye: —Māc'a' tzacaemk kiq'uin lao. Qb ajcui' li caxlan cua ut cuib ajcui' li car cuan. ¿Malaj ut yōcat chixc'oxlanquīl nak lao toxic chixlok'bal xtzacaemkeb li q'uila tenamit a'in? chanqueb lix tzolom. ¹⁴ Chixjunileb li cuanqueb aran cuanqueb tana ob mil chi cuink. Li Jesús quixye reheb lix tzolom nak te'xchunub ribeb chi ch'utal, chi lajetk roxc'äl. (50) ¹⁵ Eb lix tzolom li Jesús que'xbānu jo' quiyehē' reheb. Ut li cristian que'chunla chi ch'utal. ¹⁶ Li Jesús quixchap li ob chi caxlan cua ut li cuib chi car. Qui-iloc sa' choxa. Quixbantioxio chiru li Dios. Quixjachi ut quixq'ue reheb lix tzolom re nak te'xjeq'ui reheb li q'uila tenamit. ¹⁷ Que'cua'ac chixjunileb toj retal que'c'oja xch'ol. Ut cablaju chacach chic li rela' quicana.

Laj Pedro quixye nak li Jesús, a'an li Cristo laj Colonel li yeichi' inbil

¹⁸ Sa' jun li cutan li Jesús yo' chi tijoc xjunes nak que'cuulac lix tzolom riq'uin. Li Jesús quixpatz' reheb lix tzolom ut quixye: —¿Anihin lain nak neque'xye li tenamit? chan. ¹⁹ Eb a'an que'xye re: —Cuan neque'yehoc re nak laat laj Juan laj Cubsihom Ha'. Ut cuan ajcui' neque'yehoc re nak laat li profeta Elías. Ut cuan cui'chic neque'yehoc re nak laat jun reheb li profeta li que'cuān najter li xcuaceli cui'chic chi yo'yo, chanqueb. ²⁰ —Ut laex, ¿anihin lain nak neque'oxla? chan li Jesús reheb. Quichak'oc laj Pedro ut quixye re: —Laat li Cristo, laj Colonel li yeichi' inbil xban li Dios, chan. ²¹ Ut li Jesús quixtz'ama chiruheb lix tzolom ut quixye reheb: —Mā ani aj e teye nak lain li Cristo, chan reheb.

Li Jesús quixye resil li raylal li tixc'ul

²² Ut quixye ajcui' reheb: —Lain li C'ajolbej. Tento nak tinc'ul nabal li raylal. Tintz'e ktanak xbaneb li xakababileb chi c'anjelac sa' li templo, jo' ajcui' xbaneb li xbenil aj tij, ut xbaneb laj tz'ib. Tincamsik, abanan tincuaclik cui'chic chi yo'yo sa' rox li cutan, chan li Jesús. ²³ Li Jesús quixye reheb chixjunileb li cuanqueb aran: —Li ani taraj inpābanquīl tento nak tixtze'ktanak li c'a'ru naxrahi ru lix ch'ol. Tixcuy xnumsinquīl li raylal li tixc'ul, usta tacamsik sa' inc'aba'. Ut chinixtakehak. ²⁴ Li ani tātz'e ktanank cue re xcolbal rix liz yu'am arin sa' ruchich'och', tixtze'ek li junelic yu'am. A'ut li ani naxsach liz yu'am arin sa' ruchich'och' sa' inc'aba' lain, a'an tarechanli

junelic yu'am. ²⁵ ¿C'a'ru tixra junak li cuink cui tarechani chixjunil xbiomall li ruchich'och' ut tixtz'ektana li junelic yu'am? ²⁶ Li ani taxutanaq inban malaj ut xban li cuatin, lain li Alalbej tinxtutanak ajcui' xbaneb nak tinchalk chak riq'unin inlok'al ut riq'unin xlok'al lin Yucua' cuochbeneb li santil ángel, chan li Jesús. ²⁷ Ut quixye ajcui': —Relic chi yal tinye ere nak cuanqueb arin sa' eyank li inc'a' te'camk toj te'ril lix nimajcual cuanquilal li Dios, chan li Jesús.

Laj Pedro, laj Jacobo ut laj Juan que'ril nak quijala li rilobal li Jesús

²⁸ Cuakxakib cutan na chic xyebal eb a atin a'in nak li Jesús co chi tijoc sa' xbén jun li tzul rochbeneb laj Pedro, laj Jacobo ut laj Juan. ²⁹ Nak yo chi tijoc li Jesús, quijalano' li rilobal chiruheb. Ut li rak' sak sak ut nalementz'un. ³⁰ Ut que'ril nak cuibeb li cuink yoqueb chi atinac riq'unin li Jesús. A'aneb laj Moisés ut laj Elías. ³¹ Neque'lemtz'un ut c'ajo' llix lok'aleb nak yoqueb chi atinac chirix lix camic li Jesús li tenebanbil sa' xbén aran Jerusalén. ³² Usta yoqueb xcerala laj Pedro ut li cuanqueb rochben, abanan inc'a' que'cuar. Yoqueb ban chirilbal lix lok'al li Jesús jo' ajcui' li cuib chi cuink li cuanqueb rochben. ³³ Nak ac oqueb re xcanabankil li Jesús li cuib chi cuink, laj Pedro quixye re li Jesús: —Kacua', c'ajo' xchak'al ru nak cuanco arin. Xkayib ta oxibak muhebal arin. Jun ącue, jun re laj Moisés ut jun re laj Elías, chan. Quixye chi jo'can xban nak inc'a' quixtau ru li xyalal li quiril. ³⁴ Nak toj yo chi atinac laj Pedro, quichal jun li chok sa' xbeneb. C'ajo' nak que'xucuac nak que'mukun sa' li chok. ³⁵ Que'rabi nak li Dios quiatinac sa' li chok ut quixye: —A'in li cualal li sic'bil ru inban. Cherabi li c'a'ru tixye, chan. ³⁶ Nak quicana li atinac, xjunes chic li Jesús quicana. Ut eb a'an māc'a' chic que'xye. Ut chiruheb li cutan a'an mā aní aj e que'xye li c'a'ru que'ril.

Li Jesús quirisi li māus aj musik'ej riq'unin jun li al

³⁷ Jo' cuulajak chic nak quicube sa' li tzul, nabaleb li q'uila tenamit que'cuulac chi c'uluc re li Jesús. ³⁸ Jun li cuink quiatinac chak sa' xyankeb li tenamit ut quixye chi cau xyab xcux: —At tzolonel, nintz'ama chacuu nak tacuil li cualal xban nak ca'aj cui' a'an chicuu. ³⁹ Cuan māus aj musik'ej riq'unin. Nak naniman xyajel naxjap re ut nach'ikch'ikc chi cau xban li māus aj musik'ej ut na-el xcuokx sa' re. Ut inc'a' naraj xcanabankil li cualal. ⁴⁰ Xintz'ama chiruheb la tzolom nak te'risi li māus aj musik'ej, abanan inc'a' xe'ru chirisinquil, chan li cuink. ⁴¹ Quichak'oc li Jesús ut quixye reheb: —Láex tenamit li cuanquex anakcuan, chi tjc inc'a' nequexpában ut inc'a' us ena'leb. ⁴² Jo' najtil chic tincuank eriq'unin re nak texpabank? ⁴³ Ut chixjunileb li cuanqueb aran sachsoqueb xch'ol chirilbal nak k'axal nim xcuankil li Dios. Nak toj sachsoqueb xch'ol li tenamit chi c'oxlac chirix li quic'ulman, li Jesús quixye reheb lix tzolom: ⁴⁴ —Cherabihak chi us li tinye ere. Tento nak lain li Cajolbej tink'axtesik sa' ruk'eb li cuink li xic' neque'iloc cue, chan li Jesús. ⁴⁵ Abanan eb lix tzolom inc'a' que'xtau ru li c'a'ru quixye, xban nak toj maji' nacuulac xk'ehil nak te'xtau ru. Ut que'xutanaq chixpatz'bal re c'a'ru xyalal li quixye li Jesús reheb.

Lix tzolom li Jesús que'xpatz' ani li nimak xcuankil sa' xyankeb

46 Eb lix tzolom li Jesús que'oc chixcuech'inquil ribeb. Ut yoqueb chixpatz'bal ani reheb li nimak xcuanquil. **47** Nak li Jesús quixq'ue retal li c'a'ru yoqueb chixc'oxlanquil, quixc'am jun li ch'ina al ut quixxakab chiru. **48** Ut quixye reheb: —Li ani tac'uluk re junak ch'ina al jo' a'in sa' inc'aba' lain, tinix'ul ajcui' lain; ut li ani tac'uluk cue lain, tixc'ul ajcui' li ani xtaklan chak cue. Jo'can nak li ani cubenák xcuanquil sa' eyank anakcuan, a'anak chic li nimak xcuanquil. **49** Laj Juan quixye re li Jesús: —At Kacua', xkil jun li cuink yo chi isinc maus aj musik'ej sa' ac'aba'. Ut lao xkaye re nak inc'a' tixbanu a'an xban nak moco kacomon ta, chan. **50** Ut li Jesús quichak'oc ut quixye re: —Mek'us li cuink a'an xban nak li ani inc'a' xic' na-iloc ke, a'an na-oquen chikix, chan.

Li Jesús quixk'useb laj Jacobo ut laj Juan

51 Nak ac cuulac re xk'ehil nak li Jesús tac'amek' cui'chic xban li Dios sa' choxa, quixcacubresi xch'ol chi xic Jerusalén. **52** Li Jesús quixtakla xtakl sa' jun tenamit cuan sa' xcient Samaria, re nak te'xcauresi xna'aj re tahilank cui'. **53** Abanan li cuanqueb sa' li tenamit a'an inc'a' que'raj xc'ulbal li Jesús xban nak que'xq'ue retal nak yo chi xic Jerusalén. **54** Nak laj Jacobo ut laj Juan que'xq'ue retal nak inc'a' quic'ule' li Jesús sa' li tenamit a'an, que'xye re: —¿Ma tacuaj nak takatz'ama nak tacubek chak xam sa' choxa re nak tac'atek' li tenamit a'an jo' quixbanu laj Elías? chanqueb. **55** Quixsuk'isi rib li Jesús ut quixk'useb. Quixye reheb: —¿C'a'ru musik'ejil cuan eriq'uin laex nak inc'a' nequetau ru? **56** Lajin li C'ajolbej inc'a' xinchal chixsachbal ruheb li cristian. Xinchal ban chixcolbaleb, chan li Jesús. Ut chirix a'an, que'coeb sa' jalan chic na'ajej.

Eb li cuink que'xye nak te'raj xtakenquil li Jesús abanan yal xcab rix xch'ol nak que'xye

57 Nak yoqueb chi xic li Jesús, jun li cuink quicuulac riq'uin ut quixye re: —At tzolonel, tincuaj atakenquil yalak bar tattxic, chan re. **58** Li Jesús quichak'oc ut quixye re: —C'oxla chi us ma tacuy intakenquil. Li yac cuanqueb xjul sa' pec, ut li xul li neque'ruplic chiru choxa cuanqueb xsoc. Abanan lain li C'ajolbej mac'a' inna'aj bar taruk tinhilank cui'. — **59** Li Jesús quixye re jun chic: —Chinatake, chan. Quichak'oc li cuink ut quixye: —Kacua', chinacuy. Inmukak cuan lin yucua' tojo'nak tinxic chacuix, chan. **60** Li Jesús quixye re: —Canabeb li toj camenakeb sa' li mac xmukakeb cuan lix camenak. Ut laat, ayu. Ye chak resil lix nimajcual cuanquilar li Dios, chan. **61** Ut jun chic li cuink quixye: —At Kacua', tatintake. Abanan inchak'rabihek cuan chak li cuanqueb sa' cuochoch, chan re. **62** Ut li Jesús quixye re: —Li ani naxtiquib c'angelac chiru li Dios ut cui toj yo chixc'oxlanquil li c'a'ru re, li jun a'an inc'a' us chok' aj c'angel sa' lix nimajcual cuanquilar li Dios, chan li Jesús.

10

Li Jesús quixtaklaheb li lajeb xcac'äl (70) chi cuink chixch'olobanquil li xyalal

1 Ut chirix chic a c'a'ak re ru a'in, li Kacua' quixsiq'ueb ru lajeb xcac'äleb (70) chic chi cuink ut quixtaklaheb chi ca'cabil sa' eb li junjunk chi tenamit ut sa' eb li na'ajej li bar talaje'numek' cui'. **2** Ut quixye reheb, —Relic chi yal nabaleb li inc'a' neque'xnau xyalal. Abanan moco q'uiheb ta li te'xye li xyalal reheb. Chanchaneb li ru li acujmk li mac'a' aj sic'ol re. Jo'can ut tinye ere nak tetz'ama chiru li Kacua' re nak a'an tixtaklaheb laj c'angel chixch'olobanquil li xyalal chiruheb. **3** Ayukex bi' ut chenauhak nak lain

yoquin chi taklanc ere sa' xyankeb li xic' neque'iloc ere. Chanchanakex li coc' carner sa' xyankeb laj xoj. ⁴ Inc'a' tec'am xna'aj li c'a'ak re ru tac'anjelak ere sa' be, chi moco etumin, chi moco xjalbal exab. Ut ma ani aj iq'uin texxalklik chi serak'ic sa' be. ⁵ Nak texcuulak sa' junak cab, teq'ue xsahileb xch'ol ut teye, "A' taxak li tuktuquil usilal chi cuank sa' li cab a'in," cha'kex. ⁶ Cui chabileb li cuanqueb sa' li cab a'an, tacuank li tuktuquil usilal riq'uineb jo' xeyle laex. Cui ut inc'a' chabileb, inc'a' ajcui' tacuank li tuktuquil usilal riq'uineb. Ca'aj cui' eriq'uin ban laex tacanak. ⁷ Nak tex-oc sa' junak cab, aran texcanak. Inc'a' yokex chixbeninqwil erib. Ut chetzacahak li c'a'ru taq'uehek' ere xban nak laj c'anjal tento tixc'ul lix tojbal. ⁸ Nak texc'ulek' sa' junak tenamit, chec'ulak ut chetzaca li c'a'ru taq'uehek' ere. ⁹ Teq'uirtesiheb li yaj li cuanqueb sa' li tenamit a'an ut teye ajcui' rehèb nak yo' chak chi nach'oc lix nimajcual cuanquilal li Dios. ¹⁰ Abanan cui texcuulak sa' junak tenamit ut inc'a' texc'ulek' sa' xyalal, tex-ekl sa' be ut tex-oc xyebal, ¹¹ "Lix poksil le tenamit li xletz chi kok takachik'chik'i chok' retaliil nak tachalk raylal sa' eben. Julticak ere nak lix nimajcual cuanquilal li Dios xc'ulun eriq'uin, abanan inc'a' xec'ul", cha'kex rehèb. ¹² Relic chi yal tinye ere nak toj cubenak ca'ch'in lix tojbal xmaqueb li tenamit Sodoma chiru lix tojbal xmaqueb li tenamit a'in sa' xk'ehil li rakba atin.

Ra te'xc'ul li tenamit cui inc'a' te'xxoto xmac

¹³ Raylal chalel sa' eben laex li cuanquex sa' li tenamit Corazín. Raylal chalel sa' eben laex li cuanquex sa' li tenamit Betsaida. Cui ta quinbanu aran Tiro li milagro a'in li xinbanu cheru ut cui ta quinbanu aran Sidón, ac najter raj que'xq'ue li k'es ru t'icr chirixeb ut que'xchunub raj rib sa' cha ut que'yot'e' raj xch'oleb ut que'xjal raj xc'a'uxeb. ¹⁴ Jo'can ut tinye ere nak sa' xk'ehil li rakba atin, k'axal cui'chic li raylal li tec'ul laex chiru li raylal li te'xc'ul eb laj Tiro ut eb laj Sidón. ¹⁵ Ut laex li cuanquex sa' li tenamit Capernaum, c'ajo' nak nequenimobresi erib. ¿Ma neque'oxla nak tataksik ecuanquil toj sa' choxa? Tacubsik ban ecuanquil nak textaklak sa' xna'ajeb li camenak. ¹⁶ Li ani taabink re le ratin laex, tarabi ajcui' li cuatin lain. Ut li ani tatz'ektanank ere laex, tinixtz'ektana ajcui' lain. Ut li ani natz'ektan anue cue lain, naxtz'ektana ajcui' li quitaklan chak cue, chan li Jesús.

Que'suk'i chak chixyebal resil li que'taklac cui' li lajeb xcac'ql (70) chi cuink

¹⁷ Que'suk'i chak li lajeb xcac'al chi cuink chi saheb sa' xch'ol ut que'xe re li Jesús: —At Kacua', sa' ac'aba' laat neque'pában chiku eb li maus aj musik'ej, chanqueb. ¹⁸ Li Jesús quixye rehèb: —Lain quicuil laj tza chanchan rak' cak nak quit'ane' chak sa' choxa. ¹⁹ Lain xinq'ue ecuanquil. Usta teyek' li c'anti' ut laj xoc', mac'a' tec'ul. Xinq'ue ecuanquil sa' xben laj tza ut mac'a' taruk' tixbanu ere. ²⁰ Misaho' sa' ech'ol xban nak cuan ecuanquil sa' xbenec li maus aj musik'ej. Chisahok' ban ech'ol xban nak tz'ibánbilak le c'aba' sa' choxa, chan. ²¹ Sa' li honal a'an li Jesús quirec'a xsahil xch'ol xban li Santil Musik'ej. Quitijoc ut quixye: —At inYucua', laat laj echal re li choxa jo' ajcui' li ruchich'och'. Ninbantioxia chacuu xban nak xamuk li xyalal chiruhéb li tzolbileb ut li cuanqueb xna'leb. Ut xac'ut li xyalal chiruhéb li cubenakeb xcuanquil. Chanchaneb coc'al. Xabánu chi jo'can xban nak jo'can xcuulac chacuu laat, chan li Jesús nak quitijoc. ²² Ut quixye rehèb li cuanqueb aran: —Chixjunil li c'a'ak re ru xk'axtesi sa' cuuk' lin Yucua'. Ma ani nana'oc cuu lain li C'ajolbej, ca'aj cui' li Acuabej Dios. Ma ani nana'oc ru li Acuabej Dios, ca'aj cui' lain li C'ajolbej. Ut tana'ek ajcui' ru xbaneb li ani tinc'ut cui' li xyalal, chan li Jesús. ²³ Quixsuk'isi rib riq'uineb lix tzolom ut quixye rehèb xjuneseb: —Us xak ere laex xban nak riq'uin xnak' eru yoquex chirilbal li c'a'ru yo chi

c'ulmanc. ²⁴ Laín tiney ere nak nabaleb li profeta ut nabaleb li rey que'raj raj rilbal li c'a'ru yoquex chirilbal laex, abanan inc'a' que'ru rilbal. Ut que'raj raj rabinquil li c'a'ru yoquex chirabinquil laex, abanan inc'a' que'ru rabinquil, chan li Jesús rebeb.

Takara li kas kitz'in usta xic' nocoe'ril

²⁵ Jun aj tzolol chak'rab quixye re li Jesús yal re xyalbal rix: —At tzolonel: ¿C'a'ru us tinbanu re nak tincuechani li junelic yu'am? chan. ²⁶ Quichak'oc li Jesús ut quixye re: —Laat nacacuil sa' li Santil Hu. ¿C'a'ru naxye sa' li chak'rab? — ²⁷ Ut a'an quichak'oc ut quixye: —Chara li Kácu'a la Dios chi anchal ách'ol, chi anchal acuam, chi anchal ametz'eu ut chí anchal ac'a'ux. Ut chara la cuas acuitz'in jo' nák nacara acuib laat, chan. ²⁸ Ut li Jesús quixye re: —Yal li xaye. Bänu a'in ut täcuank ayu'am chi junelic, chan. ²⁹ A'an quiraj raj xtícobresinquil xch'ol xjunes rib. Quixye re li Jesús: —¿Ani tz'akal li cuas cuitz'in? chan. ³⁰ Li Jesús quichak'oc ut quixye re: —Cuan jun li cuink aj judío qui-el Jerusalén ut yo chi xic Jericó. Quic'ule' xbaneb laj elk'. Que'xmak' chiru chixjunil li c'a'ru cuan re. Que'xtacuasi chi us ut coeb. Camc re li cuink que'xcanab. ³¹ Ut sa' li be a'an quinume' jun laj tij. Quiril li cuink t'ant'o aran, aban tjc quinume'. ³² Ut jo'can ajcui' quixbanu jun laj levita xcomobélib li neque'tenk'an rebeb laj tij. Quinume' chixc'atk li cuink li t'ant'o aran, abanan quinume' chi tjc. ³³ Ut quinume' ajcui' jun chic li cuink sa' li be a'an, Samaria xtenamit. Eb laj Samaria xic' neque'r'il rib riq'uineb laj judío. Abanan nak yo chi numec' quiril li cuink t'ant'o aran ut quiril xtok'obal ru. ³⁴ Quicuulac riq'uin. Quixban lix yoc'olal riq'uin vino ut aceite. Quixbati ru lix toch'olal. Quixq'ue chirix lix cacuay ut quixc'am sa' jun li cab ut aran quixq'ue chi hilanc ut a'an qui-iloc re. ³⁵ Jo' cuulajak chic nak ac xic re li cuink aj Samaria, quixq'ue cuib li tumin plata re laj echal cab ut quixye re: —Chacuil chi us li cuink a'in. Ut chixjunil li jo' q'uijal chic tásach, laín tintoj acue sa' insuk'ijic, chan. ³⁶ ¿C'a'ru nacac'oxla laat? ¿Bar cuan rebeb li oxib li que'nume' li tz'akal ras riq'zin li quit'ane' sa' ruk'eb laj elk"? chan. ³⁷ Laj tzolol chak'rab quichak'oc ut quixye: —A'li qui-uxtánan ru, chan. Ut li Jesús quixye re: —Ayu ut jo'can ajcui' chabánu laat, chan.

Li Jesús quixye nak us quixbanu lix María xban nak quirabi li ratin

³⁸ Ut nak yoqueb chi xic li Jesús, que'cuulac sa' jun ch'ina tenamit. Aran quihilan li Jesús sa' rochoch jun li ixb xMarta xc'aba'. ³⁹ Lix Marta cuan jun li ritz'in xMarta xc'aba'. Lix María quixchunub rib chiru li Jesús chirabinquil li c'a'ru yo chixyebal. ⁴⁰ Abanan lix Marta ca'aj cui' lix q'uila c'anjal yo xc'a'ux chirix. Quichal riq'uin li Jesús ut quixye re: —Kácu'a, ¿ma inc'a'ch'a'aj nacacuec'a nak li cuitz'in niquinixcanab chi c'anjelac injunes? Ye re nak tinixten'a, chan. ⁴¹ Li Jesús quichak'oc ut quixye re: —Marta, laat naxic ac'a'ux chirix la q'uila c'anjal xban nak ca'aj cui' a'an nacac'oxla. ⁴² Abanan jun ajcui' li c'a'ru tento xbanunquil ut lix María xsic' ru a'an. Li k'axal us xbanunquil, a'an rabinquil li c'a'ru ninye. Ut mä ani taramok re chiru xbanunquil, chan li Jesús.

11

Li Jesús quixc'ut li tijoc chiruheb lix tzolom

¹ Sa' jun li cutan yo chi tijoc li Jesús. Ut nak quirake' chi tijoc, jun rebeb lix tzolom quixye re: —Kácu'a, c'ut chiku li tijoc jo' nak laj Juan quixc'ut li tijoc

chiruheb lix tzolom, chan. ² Ut li Kacula' quixye reheb: —Nak textijok, teye chi jo'ca'in:

Kacula', cuancat sa'li santil choxa, lok'oninbil taxak la santil c'aba'. Chichalk ta la nimajcual cuanquilal. Chi-uxk ta li nacacuaj jo' sa' choxa, jo' ta ajcui' sa' ruchich'och'.

³ Chaq'ue taxak ke li kacula kuc'a chi cuulaj cuulaj.

⁴ Ut chacuy chasach ta li kamac jo' nak nakacuayeb xmac li neque'macob chiku. Ut moaq'ue chi alec. Choacol ban chiru li inc'a' us.

⁵ Ut quixye ajcui' reheb li Jesús: —Kayehak nak laex cuan ta junak le ramig. Ut texxic raj riq'un tuktuk k'ojojin ut teye raj re, "At cuamig, mare tato'oni oxibak incua. ⁶ Jun li cuamig xchal chak chi najt ut xc'ulun cuiq'unin sa' cab. Ut mac'a' cuan cue re tinq'ue re." ⁷ Ut li jun li cuan chak sa' cab tachak'ok chak ut tixye, "Minach'i ch'i'i. Tz'aptz'ochic li cab. Lain ut eb lin coc'al yoco chi hilanc. Inc'a' naru nincuacl chixq'uebal acue li c'a'ru tacuaj." ⁸ Moco xban ta nak ramig nak tacuaclik chixq'uebal re li c'a'ru taraj ru. Tixq'ue ban re xban nak yok chixpatz'bal ut re nak tixcanab xch'i ch'i'inquil. ⁹ Jo'can ut nak ninye ere: —Nak tapaltok c'a'ru ere, chextz'amank chiru li Dios ut a'an tixq'ue ere. Chetic'ak ut tetau, chebokak ut li puerta tatehek' cheru. ¹⁰ Chebanu a'an xban nak li ani natz'aman chiru li Dios naq'uehe' re. Ut li ani naxsic', naxtau. Ut li ani nabokoc, li puerta natehe' chiru. ¹¹ ¿Ma cuan ta bi' junak yucua'bej sa' eyank tixq'ue junak pec re li ralal nak tixpatz' xcua re? Ut nak tixpatz' junak xcar re, ¿ma c'anti' ta bi' tixq'ue re? ¹² Ut nak tixpatz' junak xmol, ¿ma aj xqc' ta bi' tixq'ue re? ¹³ Cui laex li moco chabilex ta nequenau xq'uebal li c'a'ru chabil re le ralal ec'ajol, ¿ma toja' ta chic le yucua' cuan sa' choxa inc'a' tixq'ue li Santil Musik'ej re li ani tixtz'ama chiru? chan li Jesús reheb.

K'axal nim xcuanylil li Jesús chiru xcuanylil laj tza

¹⁴ Li Jesús quirisi jun li maus aj musik'ej riq'unin jun li cuink mem. Nak qui-el li maus aj musik'ej riq'unin, naatinac chic li cuink. Ut chixjunileb li cuanqueb aran que'sach xch'ol xban li c'a'ru quic'ulman. ¹⁵ Abanan cuanqueb ajcui' li que'yehoc re: —Li cuink a'in na-isin maus aj musik'ej riq'unin xcuanylil laj Beelzebú lix yucua'iléb li maus aj musik'ej, chanqueb.

¹⁶ Ut cuanqueb ajcui' li que'xtz'ama chiru li Jesús nak tixbanu junak li milagro yal re xyalbal rix. ¹⁷ Li Jesús quixnau li c'a'ru yoqueb chixc'oxlanquil ut quixye reheb: —Cui cuan jun tepak chi tenamit xic' te'r'il rib chi ribileb rib, li jun tep chi tenamit a'an tixsach xcuanylil xjunes rib. Ut cui cuan ta jun cabalak xic' te'r'il rib chi ribileb rib, li jun cabal a'an te'xsach xcuanylil lix jun cablaleb. ¹⁸ Jo'can ajcui' laj tza. Cui xic' neque'r'il rib chi ribileb rib, ¿chan ta cui' ru nak xakxok lix cuanquilal? Laex nequeye nak riq'unin xcuanylil laj tza nacuisi li maus aj musik'ej. ¹⁹ Cui lain yoquin chirisinquil maus aj musik'ej riq'unin xcuanylil laj tza, ¿ani aj cuanquil neque'isin cui' maus aj musik'ej li neque'taken ere laex? Jo'can nak a'an eb ajcui' te'yehok re nak inc'a' yal li yoquex chixyebal. ²⁰ Cui ut riq'unin xcuanylil li Dios nacuisiheb li maus aj musik'ej, riq'unin a'an nac'utun nak relic chi yal ac xc'ulun sa' eyank lix nimajcual cuanquilal li Dios. ²¹ Laj tza chanchan jun li cuink cau rib ut cuan sa' ruk' lix ch'ich' re xcolbal rib. Yok chixc'ac'alenquil li rochoch. Mac'a' tixc'ulli c'a'ru re xban nak yok chixc'ac'alenquil. ²² Abanan cui tachalk junak k'axal cau rib chiru a'an, a'an chic tanumtak sa' xben ut tjamak'ek' chiru lix ch'ich' li cau cui' xch'ol ut tajeq'uij li c'a'ru re. ²³ Li ani inc'a' na-oquen chiciuix, a'an xic' ninril. Ut ani inc'a' natenk'an cue, narisi xcuanylil li c'a'ru ninbanu lain, chan li Jesús.

Laj tza tqasuk'ik cui'chic riq'uin li ani inc'a' tixk'axtesi rib chi tz'akal chiru li Cristo

²⁴ Nak ac x-el riq'uin junak cuink, li maus aj musik'ej naxic sa' li na'ajej bar mac'a' cuan chixsic'bal bar taoc chi hilanc. Naril nak inc'a' naxtau xna'a'j. Naxye: —Lain tinsuk'ik cui'chic riq'uin li cuink bar xin-el cui' chak, chan.

²⁵ Ut nak nacuulac riq'uin naxtau li cuink chanchan jun li cab mac'a' chic cuan chi sa'. Mesunbil ut ac cauresinbil roybeninquil li ani taoc chi sa'. ²⁶ Ut li maus aj musik'ej naxsic' cuukub chic chi maus aj musik'ej k'axal cui'chic numtajenak xmausilaleb chiru a'an. Neque'oc chi cuanc riq'uin li cuink. Ut lix na'leb li cuink a'an numtajenak chic xyibal ru chiru nak quicuan junxil.

²⁷ Ut nak yo chixyebal eb li atin a'in li Jesús, jun li iixk quiatinac chak chi cau sa' xyank'eb li q'uila tenamit, ut quixye: —Us xak re li ixk li x-alan acue ut xtu'resin acue, chan. ²⁸ Li Jesús quichak'oc ut quixye: —K'axal cui'chic us chok' reheb li neque'abin re li rätin li Dios ut neque'xbanu li c'a'ru naxye.

Li tenamit que'raj nak tac'utbesik junak milagro chiruheb

²⁹ Nak yoqueb chi ch'utlaci li q'uila tenamit riq'uin, li Jesús quixye reheb: —Li cristian li cuanqueb sa' eb li cutan a'in inc'a' useb xna'leb. Te'raj tac'utbesik junak milagro chiruheb. Abanan ma jun milagro tac'utbesik chiruheb. Ca'aj cui' li milagro li qui-ux re laj Jonás, li quic'utbesik chiruheb junxil. ³⁰ Li milagro li quixc'ul laj Jonás nak quicole', a'an retalil chiruheb li tenamit Nínive nak a'an taklanbil xban li Dios. Jo'can ajcui' lain li C'ajolbej. Li milagro li tinc'ul lain, a'an jun retalil chiruheb li tenamit sa' eb li cutan a'in nak lain taklanbilin xban li Dios, chan. ³¹ Li ixk li quicuan chok' reina sa' li tenamit li cuan sa' li sur, tacuaclik chak sa' xk'ehil nak tarakek' atin sa' eben ut tixye nak cuan emac xban nak inc'a' xerabi li cuatín. A'an quichal chak toj sa' xmaril li ruchich'och' chirabinquil li c'a'ru quixye laj Salomón xban nak cuan xna'leb. Ut lain k'axal cui'chic innal'eb chiru laj Salomón ut cuanquin arin sa' eyank. Abanan inc'a' nequepab li cuatín. ³² Ut te'cuaclik ajcui' eb li que'cuan sa' li tenamit Nínive sa' xk'ehil nak tarakek' atin sa' eben læx li cuanquex sa' eb li cutan a'in. Ut te'xye nak cuan emac xban nak eb a'an que'yot'e xch'ol que'xjal xc'a'ux ut que'paban nak quicuulac laj Jonás chixyebal rätin li Dios reheb. Ut lain cuanquin arin sa' eyank ut k'axal nim incuanquil chiru xcuauquil laj Jonás ut læx inc'a' nayote' ech'ol inc'a' nequejal ec'a'ux, chan li Jesús.

Li Cristo a'an li kacutan saken

³³ Ma'ani tixloch junak candil ut tixq'ue ta chi mukmu malaj ut tixq'ue rubel chacach. Naxq'ue ban sa' junak na'ajej najt xteram re nak cuankeb sa' cutan li ani te'oc sa' li cab. ³⁴ Li xnak' eru chanchan jun li lámpara. Xban nak na'iloc li xnak' eru cuanquex sa' cutan. Cui ta mac'a' li xnak' eru cuanquex raj sa' k'ojojin. ³⁵ Cui inc'a' us li kana'leb, cuanco sa' k'ojojin. Chanchano jun li mitz' li inc'a' na'iloc. Chebanu cuént re nak junelic cuánkex sa' cutan saken. ³⁶ Jo'can ut cui cuanquex sa' cutan saken, moco cuanquex ta chic sa' k'ojojin. Chabilak ban chic le na'leb. Xban nak chabil le na'leb, chanchanakex chic jun li xam li nacutanobresin, chan.

Li Jesús quixk'useb laj fariseo ut eb laj tzolol chak'rab

³⁷ Ut nak li Jesús quirake' chi atinac riq'uineb, jun reheb laj fariseo quixbok li Jesús chi cuac'ac sa' rochoch. Qui-oc li Jesús sa' rochoch laj fariseo ut quichunla chi cuac'ac sa' mex. ³⁸ Laj fariseo quisach xch'ol chirilbal nak li Jesús inc'a' quich'ajoc jo' c'aynakeb xbanuñquil eb laj judío. ³⁹ Li Jesús quixye re: —Laex aj fariseo nequech'aj li rix le sec' ut le plato; abanan tz'aj líx sa'.

Laex chanchanex li sec' li tz'aj xsa' xban nak numtajenak le mäusilal ut li elk'ac nequebänu. ⁴⁰ Laex mac'a' ena'leb. ¿Ma inc'a' nequenau nak li ani quiyo'obtesin re li rix, a'an ajcui' li quiyo'obtesin re lix sa'? ⁴¹ Merahi ru li c'a'ru re jalan. Chesihek ban li c'a'ru cuan ere reheb li neba'. Cui tebanu chi jo ca'chabilakex chic chiru li Dios, chan. ⁴² Ra chalel sa' eben laex aj fariseo. Nequemayeja li junjunk sa' xlajetkil li isqui'ij, li ruda ut li c'a'ak re ru chi ichajil li nat'e'. Abanan inc'a' nequera li Dios ut inc'a' nequebänu li tiquilal. Us xq'uebal li junjunk sa' xlajetkil, abanan k'axal cui'chic tento xrabal li Dios ut xbanunquil li tiquilal. ⁴³ Ra chalel sa' eben laex aj fariseo li nacuulac cheru c'ojlac sa' li na'ajej k'axal lok' nak nequexxic sa' li cab li nequech'utub cui' erib. Ut nacuulac cheru nak taq'uehek' elok'al sa' eb li be. ⁴⁴ Ra chalel sa' eben laex aj tzolol chak'rab ut laex aj fariseo xban nak inc'a' us le na'leb. Laex aj ca'pac'al u. Chanchanex li muklebal li inc'a' nac'utun. Yalak ani nanume' sa' xben xban nak inc'a' neque'xnau c'a'ru cuan aran, chan. ⁴⁵ Quichak'oc jun reheb laj tzolol chak'rab ut quixye re li Jesús: —At tzolonal, riq'uin li c'a'ru yocat chixyebal, yocat chixc'utbal kaxutan lao. — ⁴⁶ Ut li Jesús quixye: —Ra ajcui' chalel sa' eben laex aj tzolol chak'rab. K'axal al li ik neque'ue sa' xbeneb li cristian ut k'axal ch'a'aj xc'ambal. Laex nequeye nak tento te'xbanu chixjunil li naxye li chak'rab. Abanan chi moco laex nequexruxbanunquil. ⁴⁷ Ra chalel sa' eben laex aj tzolol chak'rab xban nak laex aj ca'pac'al u. Nequerutz'u'iji chak ru li que'muke' cui' li profetas li que'xcamsi le xe'tonil yucua'. ⁴⁸ Riq'uin li mäusilal nequebänu nac'utun nak juntak'etex riq'uineb le xe'tonil yucua'. Eb a'an que'camsin reheb li profeta ut laex nequeyib lix muklebaleb. ⁴⁹ Li Dios, a'an cuan xna'leb. Jo'can nak quixye, "Lain tintaklaheb li profeta ut eb li apóstol riq'uineb. Sa' xyankeb a'an cuan tecamsiheb, ut cuan ajcui' tetakeheb re xchabaleb." ⁵⁰ Ut anakcuán laex chic textojok rix lix camiqueb chixjunileb li profeta chalen chak sa' xtclajic li ruchich'och'. ⁵¹ Yal nak laex textojok rix lix camiqueb a'an. Taticlak riq'uin lix camic laj Abel ut toj riq'uin lix camic laj Zacarías li quicamsic chiru nebal chixc'atk li templo ut li artal. ⁵² Ra chalel sa' eben laex, aj tzolol chak'rab, xban nak nequemuk li xyalal chiruheb li tenamit. Laex inc'a' nequepab li Dios, chi moco nequecanabeb chi pabanc li neque'raj raj pabanc, chan li Jesús reheb. ⁵³ Ut nak quirake' chixyebal eb li atin a'in, c'ajo' nak que'josk'o' eb laj tzolol chak'rab ut eb laj fariseo. Que'oc chixch'i ch'i inquil ut nabal li c'a'ak re ru yoqueb chixpatz'bal re. ⁵⁴ Yoqueb chi patz'oc re li Jesús yal re rilbal ma tixye junak atin inc'a' us re nak taruk te'xjít.

12

Mac'a' naru xbanunquil chi mukmu chi inc'a' ta tana'ek'

¹ Nak yoqueb chi ch'utlac li q'quila mil chi tenamit, yoqueb chixtiquisinquil ribeb. Li Jesús qui-oc chi atinac riq'uineb lix tzolom xben cua ut quixye: —Mebänu jo' neque'xbanu laj fariseo. A'neb aj ca'pac'al u. ² Mac'a' naru nauxman chi mukmu chi inc'a' ta tac'utunk. Mac'a' cuan chi mukmu chi inc'a' ta tana'ek'. ³ Mac'a' naru nayeman sa' cab chi mukmu chiru k'ojojin chi inc'a' ta taelk resil chi cutanquil. Ut mac'a' naru nayeman chi hasbanbil sa' cab chi inc'a' ta taabik resil yalak bar.

Ca'aj cui' li Dios tento xxucuanquil ru

⁴ Ex cuamig, lain ninye ere nak mexxucuac chiruheb li ani te'raj camsincere xban nak mac'a' naru te'xbanu riq'uin le ram. ⁵ Lain tinye ere ani li tento texucua ru. Chexucuák ru li Dios li naru tarisi xyu'am li junjunk ut

cuan xcuquil chixtaklanquil li q'mej sa' xbalba. A'an li tento texucua ru. ⁶ ¿Ma inc'a' ta bi' nac'ayic q'b chi tzentzeyul chi cuib centavo? K'axal cubenak xtz'ak, abanan ma jun reheb a'an nasach sa' xch'ol li Dios. ⁷ Jo'can ajcui' li rismal le jolom ajlanbileb chixjunil xban li Dios. Jo'can nak mexxucuac chiruheb li xic' neque'iloc ere xban nak laex k'axal terto etz'ak chiruheb nabal chi tzentzeyul. ⁸ Lain tinye ere nak li ani naxye chiruheb li tenamit nak niquinipab, lain tinye chiruheb lix ángel li Dios nak a'an cualal inc'ajol. ⁹ Ut li ani tatz'ektañank cue chiruheb li tenamit, lain tintz'ektañana ajcui' a'an chiruheb lix ángel li Dios. ¹⁰ Li ani t'ahobok cue lain li C'ajolbej, tacuyek' xmact xban li Dios. Abanan li ani tamajecuank re li Santil Musik'ej inc'a' tacuyek' xmact. ¹¹ Nak texc'amek' chiruheb li neque'taklan sa' li cab li neque'xch'utub cui' ribeb laj judío, malaj ut chiruheb laj rakol atin ut chiruheb li cuanqueb sa' xcuquil, inc'a' yokex chixc'oxlanquil li c'a'ru texsumenk cui' malaj ut li c'a'ru teye, ¹² xban nak li Santil Musik'ej tixc'utbesi cheru sa' li honal a'an chanru texsumenk cui', chan li Jesús.

Inc'a'us nak junes li kabiomal takac'oxla

¹³ Jun li cuink quiatinac chak sa' xyanek li q'uila tenamit ut quixye re li Jesús: —At tzolonel, ye re li cuas nak xjachak li jun cablal li quicanabac chok' ke ut xq'uehak cue li jo' q'uial tintz'ak lain, chan. ¹⁴ A'ut li Jesús quixye re: —At cuink, lain inc'a' xakabanbilin chi rakoc atin sa' eben chi moco xakabanbilin chixjachinquel le jun cablal. ¹⁵ Ut quixye ajcui' reheb chixjunileb li cuanqueb aran: —Q'uehomak retal li c'a'ru tebanu. Inc'a' yokex chixrahinquel ru li biomal, xban nak moco riq'un ta kabiomal yo'yoco, chan. ¹⁶ Ut quixye ajcui' jun li jaljoquil ru atin reheb. Quixye: —Cuan jun li cuink biom. Cuan jun xch'och' chabil ut nabal li acuimk na-el chi sa'. ¹⁷ Qui-oc chixc'oxlanquil ut quixye sa' xch'ol, “¿C'a'ru tinbanu? Mac'a' chic xna'aj li ru li cuacuimk”, chan. ¹⁸ Ut quixye, “Ninnau c'a'ru tinbanu. Timpo' li rochochil li ru li cuacuimk li cuanqueb. Ut tinyib chic jalan ninik chok' rekaj. Ut chi sa' a'an tinxoc chixjunil li ru li cuacuimk jo' ajcui' chixjunil li c'a'ru cuan cue.” ¹⁹ Ut tinye: “Us xak cue. Cuan nabal c'a'ru cue xocxo inban re timunssi nabal chihab. Anakcuan tinhilank, tincua'ak, tin-uc'ak, ut tasahok' sa' inch'ol”, chan. ²⁰ Abanan li Dios quixye re, “Abi, at jip aj cuink. Chiru a k'ojojin a'in tatcamk. Ut chixjunil li xocxo aban, ¿ani aj e tacanak cui?” ²¹ Lain ninye ere: jo'ca'in naxc'ul li naxc'ula xbiomal sa' ruchich'och' ut riq'unin li Dios mac'a' xbiomal, chan li Jesús.

Mec'oxla chanru nak tenumsi li cutan junjunk

²² Ut li Jesús quixye reheb lix tzolom: —Mixic ech'ol chixc'oxlanquil chanru nak tenumsi li cutan junjunk, chi moco riq'unin li c'a'ru tetzaca chi moco riq'unin lix tikibanquil erib. ²³ Li kayu'am, a'an k'axal lok' chiru li katzacae'mk. Ut li katibel, a'an k'axal lok' chiru li kak'. ²⁴ Cheq'uehak retal li xul li neque'ruplic chiru choxa. Eb a'an inc'a' neque'au, chi moco neque'k'oloc, chi moco neque'xxoc xcuahab chi moco cuan xc'ulanquil xtzacae'mkeb. Abanan li Dios naxq'ue xtzacae'mkeb. ¿Ma toja' ta chic laex inc'a' tixq'ue etzacae'mk? ²⁵ ¿Ani ere laex taruk tixtik ru lix yu'am usta naxtacuasi rib xc'oxlanquil? ²⁶ Cui inc'a' nequexru xbanunquil li c'a'ak re ru a'in, ¿c'a'ut nak nequetacuasi erib chixc'oxlanquil? ²⁷ Q'uehomak retal li utz'u'uj chanru nak neque'q'ui chi inc'a' neque'c'anjelac chi moco neque'quemoc. A'ut lain tinye ere, usta c'ajo' xchak'al ru lix tikibanquil laj Salomón, abanan inc'a' quixtau xchak'al ru li utz'u'uj a'in. ²⁸ Ut cui li Dios naxq'ue lix ch'ina'usal li pim li cuan junpat ajcui' ut cuulaj q'uebilak sa' xam,

¿ma toja' ta chic laex inc'a' textikib? Laex inc'a' nequexpabán chi tz'akal. ²⁹ Jo'can ut nak inc'a' yok ec'a'ux chirix le cua eruc'a. ³⁰ Le yucua' li cuan sa' choxa naxnau li c'a'ru nequeraj ru. Li inc'a' neque'xpab li Dios, ca'aj cui' lix tzacaemkeb neque'xc'oxla. ³¹ Abanan laex tesci'lix nimajcual cuanquila li Dios ut chixjunil li c'a'ak re ru a'in talajq'uehek' ere chok' xtz'akob.

Q'uehomak ech'ol chirix li biomal cuan sa' choxa

³² Mexxucuac ex cuala inc'ajol. Usta inc'a' q'uihex, abanan le yucua' cuan sa' choxa c'ojc'o xch'ol chixq'uebal ere fix nimajcual cuanquila. ³³ C'ayihomak li c'a'ru cuan ere ut sihomak reheb li mac'a' cuan reheb re nak cuank' ebiomal sa' choxa. Aran inc'a' na-oc laj elk' chi elk'ac chi moco namaxen. Q'uehomak ech'ol chirix li biomal li inc'a' na-oso'. ³⁴ Jo'can nak chenauhak nak bar cuan cui' le biomal, aran ajcui' cuank' le c'a'ux.

Yo'on cuankex chiroybeninquil lix c'ulunic li Kacua'

³⁵ Checauresihak erib. Yo'kex chiroybeninquil li Kacua'. Chanchanakex li mos li lochlo xxam ut yo chiroybeninquil lix patrón. ³⁶ Chanchanakex li mos li yoqueb chiroybeninquil lix patroneb nak tasuk'ik chak sa' junak sumlac. Nak tixtoch' li puerta, sa' junpat te'zte chiru. ³⁷ Us xak reheb li mos li yoqueb chiroybeninquil lix patroneb. Nak tacuulak li patronej, tixtauhelb chi ajoqueb ru. Relic chi yal ninye ere li patronej tixcauresi rib ut tixchunubeb lix mgs sa' mex ut a'an ajcui' taq'uehok re lix tzacaemkeb. ³⁸ Us xak reheb li mos li yokeb chiroybeninquil lix patrón, usta tuktuk'ojyin malaj ut sakeuc re tacuulak. ³⁹ Cheq'uehak retal a'in: Cui ta naxnau li yucua'bej sa' li cab jok'e honal re li k'ojyin tol-elk laj elk', tayo'lek raj ut inc'a' raj tixcanab chi elk'ac li c'a'ru cuan sa' li rochoch. ⁴⁰ Jo'can ajcui' laex yo'on cuankex chi oybenin' xban nak inc'a' nequenau jok'e honal tincuulak lain li C'ajolbej. Tincuulak chi mac'a' sa' ech'ol, chan li Jesús. ⁴¹ Laj Pedro quixye re li Jesús: —At Kacua', ¿ma ca'aj cui' ke ləo xaye li jaljoquil ru atin a'an, malaj ut reheb ajcui' chixjunileb li tenamit? — ⁴² Ut li Kacua' quixye re: —Li mos li cuan xna'leb ut chabil, a'an li taq'uehok re xtzacaemkeb sa' x-orił. ⁴³ Us xak re li mos li yok chixbanunquil lix c'anjel sa' xyalal nak tac'ulunk lix patrón. ⁴⁴ Relic chi yal tinye ere nak li patrón a'an, tixk'axtesi sa ruk' chixjunil lix jun cablal. ⁴⁵ Abanan cui li mos a'an inc'a' us lix na'leb, tixye sa' xch'ol, "Lin patrón tabayk chi c'ulunc". Ut taoc chixsac'baleb li rech mosil jo' cuink jo' iix ut taoc chi cu'a'ac, chi uc'ac ut chi calac. ⁴⁶ Mac'a'ak sa' xch'ol nak tac'ulunk lix patrón. Ut lix patrón tixq'ue chixtojbal rix lix mac ut tixtakla sa' xyank'eb li inc'a' useb xna'leb. ⁴⁷ Li mos li naxnau c'a'ru naraj lix patrón ut chi tjc mac'a' naxbanu, li jun a'an tasaq'uek' chi cau. ⁴⁸ Abanan li mos li inc'a' naxbanu li us xban nak inc'a' naxnau c'a'ru naraj lix patrón, li jun a'an tixc'ul ajcui' xtojbal xmac. Abanan ca'ch'in ajcui' chiru li tixc'ul li naxnau li c'a'ru naraj lix patrón. Li ani naxnau xyalal, mas cui'chic nabal li ik cuan sa' xben. Ut li ani cuan xna'leb chi us, mas cui'chic li ik cuan sa' xben chiru li jun li mac'a' xna'leb, chan.

Nacuan ch'a'ajquilar nak junak naxpab li Cristo

⁴⁹ Li Jesús quixye ajcui': —Chanchan li xinq'ue xam sa' ruchich'och' nak xinchal lain xban nak sa' inc'aba' lain nabal li ch'a'ajquilar tacuank. Nacuaj ta ac xnume' li ch'a'ajquilar a'in. ⁵⁰ Abanan tento tinc'ul jun li cubi ha' xben cua. Ut li cubi ha', a'an li nimla raynal li tinc'ul. Ut yokin chiroybeninquil li honal a'an chi ra sa' inch'ol toj tacuulak xk'ehil nak tac'ulmank. ⁵¹ Mare

laex nequec'oxla nak junes tuktuquil usilal xinc'am chak sa' ruchich'och'. Inc'a'. Tacuank ajcui' nabal li ch'a'ajquila. ⁵² Chalen anakcuan inc'a' chic sa te'cuank li junk cabal sa' rochocheb xban nak cuan li te'pabank cue ut cuan inc'a'. Mare cuan qb chi cristian sa' li jun cabal. Oxib xic' te'ril li cuib chic. Ut li cuib xic' te'ril li oxib chic. ⁵³ Li yucua'bej xic' taril li ralal, ut li alalbej xic' taril lix yucua'. Li na'bej xic' taril lix co' ut li co'bej xic' taril lix na'. Ut li na'bej xic' taril li ralib ut li alibej xic' taril lix na' lix belom. ⁵⁴ Li Jesús quixye ajcui' reheb li q'uila tenamit: —Nak nequeril nak yo chi chalc li chok bar na-oc cui' li sak'e, nequeye, "Hon naxq'ue hab", chanquex. Ut yal ajcui' nak naxq'ue li hab. ⁵⁵ Ut jo'can ajcui' nak nachal li ik' sa' li sur. Nequeye, "Tik ru li cutan tixq'ue anakcuan," chanquex. Ut yal ajcui' nak naxq'ue li tik. ⁵⁶ Laex aj ca'pac'al u. Nequenau xq'uebal retal ru li choxa ut li ruchich'och'. Abanan ca'aj cui' a'an nequenau rilbal. Inc'a' nequeq'ue retal li yo chi c'ulmanc sa' eb li cutan a'in. ⁵⁷ ¿C'a'ut nak inc'a' nequeq'ue retal c'a'ru li us tebanu? ⁵⁸ Nak yoquex chi xic riq'uin laj rakol atin, yibomak ru le ch'a'ajquila sa' jumpat riq'uin li xic' na-iloc acue nak toj maji' nequexcuulac. Cui inc'a' nacac'am acuib sa' usilal chi jumpat, laj rakol atin tatxtakla sa tz'alam. ⁵⁹ Lain ninye acue nak inc'a' tat-elk aran cui inc'a' tatoj chixjunil li jo' q'uial te'xpatz' acue, chan li Jesús.

13

Li Jesús quixk'useb li neque'xc'oxla nak nakac'ul li raylal xban nak cuan li kamac

¹ Sa' li honal a'an que'cuulac cuib oxibeb li cuink riq'uin li Jesús ut que'xye re chanru nak laj Pilato quixtakla xcamsinquileb li cuink aj Galilea nak yoqueb chi mayejac sa' li templo. ² Ut li Jesús quixye reheb: —¿Ma nequec'oxla laex nak eb li cuink a'an k'axal cui'chic aj maqueb chiruheb li rech tenamitil? ¿Ma xban a'an nak que'xc'ul a raylal a'an nak nequeye laex? chan reheb. ³ Tinye ere nak inc'a'. Cui laex inc'a' teyot' ech'ol ut tejal ec'a'ux, tex-osok' ajcui' laex chejunilex. ⁴ ¿C'a'ru nequec'oxla chirixeb li cuakxaklaju chi cuink li que'cam nak li torre li cuan Siloé quit'an'e sa' xbeneb? ¿Ma xban nak numtajenak lix maqueb a'an chiruheb chixjunileb li cuanqueb Jerusalén nak que'xc'ul chi jo'can? ⁵ Lain ninye ere nak inc'a'. Ut cui laex inc'a' teyot' ech'ol ut tejal ec'a'ux, tex-osok' ajcui' laex, chan li Jesús.

Li jun ton chi higo li inc'a' nauchin

⁶ Quixye ajcui' li jaljoquil ru atin a'in reheb: Jun li cuink cuan jun ton xhigo aubil sa' lix ch'och'. Ut quichal chixsic'bal li ru, abanan mac'a' quixtau. ⁷ Quixye re li cuink li na-iloc re li acuimk: —Oxib chihab cuoquic chirobeninquil ma tauchink li che' a'in, ut inc'a' nauchin. Yoc' li che' a'in. ¿C'a'ru aj e nak yok chixlatz'anquil li ch'och' chi inc'a' nauchin? chan. ⁸ Ut li cuink li na-iloc re li acuimk quixye re: —Kacu'a, canak cuan chic jun chihabak. Ut tinbec li ch'och' sa' xton ut ting'ue xk'emal li ch'och'. ⁹ Ut cui tauchink, us; ut cui inc'a', tayoc' mokon, chan.

Quicuech'ic rix li Jesús xban nak na'uirtesin sa' li hilobal cutan

¹⁰ Sa' jun li hilobal cutan, li Jesús yo chixc'utbal li xyalal chiruheb sa' li cab li neque'xc'utub cui' ribeb laj judio. ¹¹ Ut aran cuan jun li ixs cuan maus aj musik'ej riq'uin. Cuakxaklaju chihab roquic lix yajel. C'utz'c'u rix li ixs nak nabec ut inc'a' naru naxakli chi tjc. ¹² Nak quiril li ixs li Jesús quixbok riq'uin ut quixye re: —At ixs, anakcuan q'uirtesinbilat chic.— ¹³ Ut quixq'ue li ruk' sa' xben li ixs. Ut sa' ajcui' li honal a'an li ixs quixakli chi

tic ut qui-oc chixlok'oninquil li Dios. **14** C'ajo' nak quijosk'o' li nataklan sa' li cab li neque'xch'utub cui' ribeb laj judío xban nak li Jesús quixq'uirtesi li iixk sa' li hilobal cutan. Ut quixye reheb li cuanqueb aran: —Cuakib cutan cuan re nak naru texc'anjelak. Chiruheb a cutan a'an naru nequechhal chi banec' ut inc'a' texchalk chi banec' sa' li hilobal cutan, chan. **15** Ut li Kacua' quichak'oc ut quixye re: —¡Ex aj ca'pac'al u! ¿Ma inc'a' ta bi' tehit eboyx malaj ut ebür sa' li hilobal cutan re nak tec'ameb chi uc'ac? **16** Li iixk a'in, a'an xcomoneb li ralal xc'ajol laj Abraham. Ac cuan cuakxaklaju chihab roquic laj tza xch'i ch'i inquil. Cui laex nequehit le boyx sa' li hilobal cutan, ¿ma inc'a' ta bi' taruk tinq'uirtesi li iixk a'in sa' li hilobal cutan? chan. **17** Ut riq'uin li c'a'ru quixye li Jesús, quixc'ut xxutaneb chixjunileb li yoqueb chixcuech'inquil rix. Abanan li q'uila tenamit que'saho' xch'ol xbaneb li milagro li yo chixbanunquil li Jesús.

Quijuntak'etac lix nimajcual cuanquilal li Dios riq'uin li riyajil li mostaza

18 —¿C'a'ru taruk tinjuntak'eta cui' lix nimajcual cuanquilal li Dios? chan li Jesús. Ut, ¿c'a'ru chi jaljoquil ru atin tnye re xch'olobanquil xyalal lix nimajcual cuanquilal li Dios? **19** Lix nimajcual cuanquilal li Dios, a'an chanchan riyajil li mostaza, li quixc'am jun li cuink ut quirau sa' lix ch'och'. Ut quimok ut quiniman chi us. Nimla che' quiculac. Ut laj xic'anel xul neque'xyib xsoqueb sa' eb li ruk'. **20** Ut quixye cui'chic: ¿C'a'ru taruk tinjuntak'eta cui' lix nimajcual cuanquilal li Dios? **21** Lix nimajcual cuanquilal li Dios, a'an chanchan li na-oc chox' xch'amal li caxlan cua. Li iixk quixq'ue ca'ch'in sa' oxib bisoc li c'aj ut quisipo' chixjunil li k'em xban.

Moco chixjunileb ta te'oc sa'lix nimajcual cuanquilal li Dios, usta neque'xye nak aj pabaneleb

22 Li Jesús quinume' sa' eb li tenamit ut sa' eb li c'alebal nak yo chi xic Jerusalén ut yo chixch'olobanquil li xyalal chiruheb li tenamit. **23** Jun reheb li cuanqueb aran quixye re: —At Kacua', ¿ma yal nak inc'a' q'uiheb li te'colek? chan re. **24** Li Jesús quichak'oc ut quixye: —Jo'can nak q'uehomak ech'ol chi oc sa' li oquebal li ca'ch'in ru. "Nabaleb raj li te'raj oc, abanan inc'a' te'ruk chi oc. **25** Nak acak xtz'ap li oquebal laj echal re li cab, laex texcanák chirix cab ut tetoch' raj chic li puerta ut teye, "Kacua', Kacua', te li puerta chiku", cha'kex. Abanan a'an tachak'ok ut tixye ere, "Inc'a' ninnau eru bar xexchal chak", cha'ak. **26** Ut laex teye cui'chic re, ¿C'a'ut nak inc'a' tanau ku? Lao xocua'ac xo-uc'ac kochbenat. Ut latat xatc'utuc li xyalal chiku sa' li katenamit", cha'kex. **27** Ut laj echal cab tixye cui'chic ere, "Ninje ere nak inc'a' ninnau bar xexchal chak. Elenkex chicuu, laex aj banuhom mäusilal", cha'ak. **28** Nak teril laj Abraham, laj Isaac, laj Jacob ut chixjunileb li profeta cuanqueb sa' lix nimajcual cuanquilal li Dios, ut laex inc'a' tex-ocsik, toj aran texyabak ut tec'uxuxi li ruch ere xban xrahil ech'ol. **29** Nabaleb li telaje'chalk chak yalak bar jun sut rubel choxa, ut te'c'ojlak chi cua'ac sa' lix nimajcual cuanquilal li Dios. **30** Cuanqueb li inc'a' q'uebileb xlok'al arin sa' ruchich'och' te'q'uehek' xlok'al riq'uin li Dios. Ut cuanqueb ajcui' li q'uebileb xlok'al arin sa' ruchich'och'. Eb a'an inc'a' te'xc'ul xlok'al riq'uin li Dios, chan li Jesús.

Laj Herodes taraj xcamsinquel li Jesús

31 Ut sa' ajcui' li hñonal a'an cuanqueb aj fariseo que'cuulac riq'uin li Jesús chixyebal re: —Elen arin. Ayu xban nak laj Herodes taraj acamsinquel, cuanqueb. **32** Li Jesús quixye reheb: —Ayukex ut yehomak re laj Herodes li chanchan yac nak anakcuan ut cuulaj lajin yokin chi isinc mäus aj musik'ej ut yokin chi q'uirtesinc. Ut sa' rox li cutan tinchoy lin c'anjel. **33** Abanan tento

nak yokin chi xic anakcuan, cuulaj, ut ca'bej. Tento tincuulak Jerusalén re nak tincamsík aran xban nak inc'a' naru tacomásk junak profeta sa' jalan na'ajej. Tento nak aran Jerusalén tincamsík, cha'kex re.

Li Jesús quiyot'e' xch'ol chiribal li tenamit Jerusalén

³⁴ Ex aj Jerusalén, laex nequecamsiheb li profeta ut nequecuti chi pec eb li neque'taklác eriq'un xban li Dios. Nabal sut raj xcuaj ecolbal jo' nak naxch'utubeb li ral li caxlan rubel lix xic'. Abanan laex inc'a' xeraj. ³⁵ Ut anakcuan le tenamit taçanák chi naq'uircnac aj chic ru. Tinye ut ere chalen anakcuan inc'a' chic téril cuu toj nak teye, "Osobtesinbil taxak li xchal sa' xc'aba' li Kacula", chan li Jesús.

14

Sa' li hilobal cutan li Jesús quixq'uirtesi jun li cuink sip lix tibel

¹ Sa' jun li hilobal cutan li Jesús co chi cua'ac sa' rochoch jun laj fariseo nim xcuanguard. Ut cuanqueb ajcui' cuib oxib laj fariseo yoq'uebal retal li Jesús. ² Aran cuan jun li cuink sip xakxo chiru li Jesús. ³ Ut li Jesús quixye rebeb laj tzolol chak'rab ut rebeb laj fariseo: —¿C'a'ru naxye sa' li chak'rab? ¿Ma us q'uirtesinc sa' li hilobal cutan? ¿Malaj ut inc'a' us? chan rebeb. ⁴ Ut eb a'an tíc mac'a' que'xye. Tojo'nak li Jesús quixchap li ruk' li cuink ut quixq'uirtesi ut quixye re nak naru taxic. ⁵ Nak quixsuk'isi rib li Jesús, quixye rebeb li cuanqueb aran: —¿Ani junak ere laex tat'anek' ta junak xbur malaj ut xboyx sa' xjulel ha', ma inc'a' ta bi' taxic sa' junpat chirisinquil usta hilobal cutan? chan rebeb. ⁶ Ut eb a'an chi tíc inc'a' que'xnau xsumenquil.

Li Jesús quixye nak inc'a' us li nimobresinc ib

⁷ Li Jesús quixq'ue retal nak li bokbileb chi cua'ac sa' li cab a'an yoq'ueb chixsic'bal ru li na'ajej li neque'q'uehe' cui' li cuanqueb xcuanguard. Jo'can nak quixye jun li jaljoquil ru atin rebeb. Quixye: ⁸ —Nak texbokek' sa' junak sumlac, mexc'oila sa' li na'ajej li naq'uehe' rebeb li cuanqueb xcuanguard. Mare tacuulak junak chic mas nim xcuanguard cheru laex. ⁹ Ut li xbokoc ere tachalk ut tixye ere, "Q'uehomak li na'ajej a'in re li cuink a'in", cha'ak ere. Yók chic exután nak texxic chi c'ojlac sa' li na'ajej li neque'c'oila cui' li mac'a'eb xcuanguard. ¹⁰ Jo'can nak ninye ere nak texbokek' sa' junak sumlac, chexc'ojlak sa' li na'ajej li neque'c'oila cui' li mac'a'eb xcuanguard. Ut li xbokoc ere, tachalk ut tixye ere, "Quimkex, c'ojlankex arin sa' li chabil na'ajej", cha'ak ere. Chi jo'can taq'uehek' elok'al chiruheb chixjunileb li c'ojc'oq'ueb sa' li mex erochben. ¹¹ Jo'can nak chixjunileb li neque'xnimobresi ribeb, tacular xcuanguard. Ut chixjunileb li neque'xcubsi ribeb, eb a'an te'q'uehek' xcuanguard, chan li Jesús. ¹² Ut quixye ajcui' li Jesús re laj échal cab: —Nak tatq'uehok chi tzacanc, malaj ut tabanu junak nink'e, moco ca'aj cui' ta la cuamig tabokeb, chi moco ca'aj cui' eb la cuas ut eb la cuitz'in, chi moco ca'aj cui' la cuech'alal, chi moco ca'aj cui' la cuech cabal li biomeb, xban nak eb a'an naru te'xbanu ajcui' jun nink'e ut tate'xbok ut te'xq'ue rekaj chacuu. ¹³ Nak tabanu junak li nink'e, tabok ajcui' eb li neba' ut eb li tokol rok ruk', ut eb li yék rok ut eb li mutz', ¹⁴ xban nak eb a'an inc'a' taruk te'xq'ue rekaj acue. Abanan li Dios tatrosobtesi ut tixq'ue rekaj acue nak te'cuaclík cui'chic chi yo'yo li tiqueb xch'ol, chan li Jesús re.

Li Jesús quixch'olob xyalal chirixeb li neque'tz'ektan re li rusilal li Dios

¹⁵ Jun rebeb li chunchuqueb sa' li mex quirabi li c'a'ru quixye li Jesús ut quixye re: —Us xak re li aní tat'akonk chi cua'ac sa' li nink'e sa' l'ix nimajcual

cuanquilal li Dios, chan. ¹⁶ Nak quichak'oc, li Jesús quixye jun li jaljoquil ru atin re: Quicuan jun li cuink quixc'ub jun nimla nink'e ut nabaleb li quixbokeb chi cua'ac. ¹⁷ Nak quicuulac xk'ehil li nink'e, quixtakla lix mos chixyebal reheb li bokbileb nak te'chalk chi cua'ac xban nak ac xyalo' li tzacaemk. ¹⁸ Abanan chixjunileb que'oc xpatz'bal xcuybaleb. Jun quiyehoc: —Xinlok' jun inch'och'. Tento nak tinxic chirilbal. Tintz'ama chacuu nak tacuy inmac xban nak inc'a' tinxic, chan. ¹⁹ Ut li jun chic quixye: —Xinlok' ob sumal inbogyx. Xic cue chirilbaleb. Nintz'ama chacuu nak tacuy inmac, chan. ²⁰ Ut li jun chic quixye: —Toje' xinsumla ut inc'a' chic naru tinxic, chan. ²¹ Li mos quisuk'i riq'unin lix patrón ut quixye re li c'a'ru que'xye li bokbileb. Quichal xjosk'il li patrón ut quixye re lix mos: —Ayu sa' c'ayil ut sa' eb li be ut tabokeb li neba', eb li tokol rok ruk'eb, eb li yek rokeb ut eb li mutz' ut tac'ameb chak arin, chan. ²² Cq li mos ut quixbanu jo' quiyeho' re. Nak quisuk'i chak quixye re lix patrón: —Kacua', xinbanu jo' xaye cue ut toj cuan nabal li na'ajej, chan. ²³ Li patrón quixye re lix mos: —Tatxic chire li tenamit ut sa' c'alebal ut tacuelají chak ruheb chi chalc sa' li nink'e re nak tanujak li cuochoch, chan. ²⁴ Lain ninye ere nak ma jun reheb li bokbileb xben cua te'tz'akonk riq'unin li nink'e li xinbanu, chan li patrón.

Cuan ch'a'ajqujal riq'unin xpabankuil li Cristo

²⁵ Nak yo chi xic li Jesús nabaleb li tenamit yoqueb chi takenc re. Quixsuk'isi rib li Jesús ut quixye reheb: ²⁶ —Li ani taraj takenc cue, tento nak tinixra chi tz'akal lain chiruheb lix na' xyucua', li rixakil ut eb lix coc'al, ut eb li rech'alal jo' ajcui' lix yu'am. Cui inc'a' tinixra chi tz'akal, li jun a'an moco us ta chok' intzolom. ²⁷ Li ani taraj oc chok' intzolom, tento nak tinixtake ut tixcuy xnumsinquil li raylal usta tacamsik sa' inc'aba'. ²⁸ Cui cuan junak ere naraj tixyib junak cab najt xteram, ¿ma inc'a' ta bi' tac'ojlak xben cua chixbirbal rix ma cuan tz'akal lix tumin re tixchoy xyibankuil li cab? ²⁹ Cui tixq'ue lix cimiento li cab ut inc'a' chic taruk xchoybal, chixjunileb li te'ilok re te'xtiquib xse'enquil. ³⁰ Ut te'xye, —Li cuink a'in quixtiquib cablac ut inc'a' naru xchoybal, cha'keb. ³¹ ¿Ma cuan ta bi' junak rey taxic chi petic riq'unin junak chic rey cui inc'a' tac'ojlak xben cua chixc'oxlanquil ma tixcuy petic rochbeneb lajebak mil chi cuink riq'unin li rey jun chic, li yo chi chalc chi petic rochbeneb junmay mil chi cuink? ³² Ut cui naxc'oxla nak inc'a' taruk, tixtaklaheb lix takl nak toj cuankeb chi najt chixtz'amanquil chiru li rey jun chic re nak te'canak sa' usilal chi ribileb rib. ³³ Jo'can ajcui' laex. Tento tec'oxla chi us c'a'rú tebanu xban nak li ani inc'a' naraj xcanabanquil li c'a'ru cuan re, li jun a'an moco us ta tqac chok' intzolom.

Li ani inc'a' chic naxcuy xpabankuil li Jesús, a'an chanchan li atz'am li inc'a' chic qui'

³⁴ Li atz'am, a'an chabil. Abanan cui inc'a' chic qui', mac'a' chic tqac cui'. ³⁵ Inc'a' chic tqusak chok' re li ch'och', chi moco chok' re li mul. Yal re tz'eket' aj chic. Li ani taraj rabinquil li cuatin, chixq'uehak retal li yoquin chixyebal.

15

Lijaljoquil ru atin chirix li carner sachenak

¹ Nabaleb laj titz'ol toj ut eb laj mac que'cuulac chirabinquil li c'a'ru yo chixyebal li Jesús. ² Eb laj fariseo ut eb laj tz'ib yoqueb chi cuech'inc ut yoqueb chixyebal: —Li cuink a'in naxc'am rib sa' usilal riq'uineb laj mac ut nacua'ac rochbeneb, chanqueb. ³ Li Jesús quixye reheb li jaljoquil ru atin

a'in: ⁴ ¿Ma cuan junak cujnk sa' eyank cuqank ta o'c'alak (100) xcarner, cui tasachk junak sa' xyankeb a'an, ma inc'a' raj tixcanab li belelaju ro'c'al (99) sa' c'alebal ut taxic chixsic'bal li quisach toj retal tixtau chak? chan. ⁵ Ut nak tixtau, tasahok' sa' xch'ol ut tixq'ue sa' xben xtel, ⁶ ut taxic sa' rochoch. Tixch'utubeb li ramig ut li rech cabal ut tixye reheb: —Chisahok' sa' kach'ol cuochbenex xban nak xintau lin carner li quisach, cha'ak reheb. ⁷ Lain tinye ere nak jo'can ajcui' sa' choxa. Tacuank nimla sahil ch'olej nak junak aj mactiyyot' xch'ol ti xlabel xc'a'ux chiruhéb belelaju ro'c'al chi cristian li ac xe'paban ut ti queb chic xch'oleb.

Lijaljoquil ru atin chirix li tumin sachenak

⁸ Ut quixye ajcui' reheb: Kayehak nak junak ijk cuan lajebak xtumin. Cui tasachk junak lix tumin, ¿ma inc'a' raj tixloch li xam ut taoc chixmesunquil li cab ut tixsiq'ui toj retal tixtau? ⁹ Ut nak tixtau, tixch'utubeb li ramig ut eb li rech cabal ut tixye reheb: —Chisahok' sa' kach'ol cuochbenex xban nak xintau lin tumin li quisach chicu, cha'ak. ¹⁰ Lain ninye ere nak jo'can ajcui' eb lix ángel li Dios te'sahok' sa' xch'oleb nak junak aj mactayot'ek' xch'ol ut xlabel xc'a'ux.

Lijaljoquil ru atin chirix li yucua'bej li quixcuy xmac li ralal

¹¹ Ut quixye ajcui' reheb li jaljoquil ru atin a'in: Jun li cujnk quicuan cubi li ralal. ¹² Li itz'inbej quixye re lix yucua': —At inyucua', q'ue cue anakcuán la jun cablal li jo' q'ual li tintz'ak lain, chan. Tojo'nak li yucua'bej quixjeq'ui lix jun cablal reheb li ralal cubi. ¹³ Ut maji' ajcui' najterak nak li itz'inbej quixch'utub chixjunil li c'a'ru cuan re, ut co' chi najt sa' jalani tenamat. Aran quixsach li c'a'ru re nak yo chixk'axbal li cutan chi jo' majo'. ¹⁴ Ut nak ac xsach chixjunil li c'a'ru cuan re, quicuan jun nimla cue'ej sa' li tenamat a'an. Ut li al yo chixcuybal xtz'ocajic. ¹⁵ Jo'can nak co' riq'uin jun li cujnk cuan sa' li tenamat a'an chixpatz'bal xtrabaj. Ut li cujnk a'an quixtakla sa' c'alebal chi iloc ak. ¹⁶ Quiraj raj xcuábal xcuahéb li ak xban nak tatz'ocák. Abanan inc'a' que'xq'ue ca'ch'inak re. ¹⁷ Quijultico' re chanru nak quicuan sa' rochoch lix yucua' ut quixye sa' xch'ol: —Nabaleb aj c'anjel cuanqueb sa' rochoch lin yucua' ut numtajenak xcuahéb. Ut lain arin osoc' cue xban tz'ocac. ¹⁸ Tinxic cui'chic sa' rochoch lin yucua' ut tinye re, "At inyucua', xinmacob chiru li Dios jo' ajcui' chacuu laat. ¹⁹ Macua' chic inc'ulub nak tinc'aba'in ácuatal. Chinac'ul ban jo' junak ámos," cha'akin re, chan sa' xch'ol. ²⁰ Sa' junpat quicuacli ut quisuk'i sa' rochoch lix yucua'. Toj cuan ajcui' chak chi najt nak qui-ile' xban lix yucua'. Ut li yucua'bej quiril xtok'obal ru. Co' sa' anil chixc'ulbal li ralal. Quixk'alu ut quirutz' ru. ²¹ Ut li ralal quixye re: —At inyucua', xinmacob chiru li Dios jo' ajcui' chacuu laat. Macua' chic inc'ulub nak tinc'aba'in ácuatal, chan re lix yucua'. ²² A'ut li yucua'bej quixye reheb lix mos: —Sic'omak chak sa' junpat li chabil t'icr ut q'uehomak chirix. Q'uehomak xmatk'ab chi ru'uj ruk' ut q'uehomak xxab chi rok. ²³ Ut c'amomak chak li ch'ina cuacax, li ch'olaninbil chi us. Camsihomak ut tonink'eik, ²⁴ xban nak li cualal a'in chanchan camenak nak xcuán chak. A'ut anakcuán xsuk'i cui'chic chi yo'yo. Sachenak nak xcuán ut xtauman cui'chic, chan. Ut que'oc chi nink'ejc. ²⁵ Ut li asbej cuan chak sa' c'alebal. Nak yo chi cuulac sa' cab, quirabi li son ut li xajoc. ²⁶ Quixbok jun li mos ut quixpatz' re c'a'ru yoqueb sa' cab. ²⁷ Li mos quixye re: —Xsuk'i chak la cuitz'in ut la yucua' xtalá xcam sinquil li ral li cuacax li ch'olaninbil chi us, xban nak la cuitz'in xsuk'i cui'chic chi cau ut chi sa sa' xch'ol, chan. ²⁸ Nak li asbej quirabi li c'a'ru quixye li mos, quichal xjosk'il, ut inc'a' quiraj oc

sa' li rochoch. Ut li yucua'bej qui-el chirix cab ut quixtz'ama chiru nak tqoc. ²⁹ Li asbej quichak'oc ut quixye re lix yucua': —At inyucua', laat nacanau nak nabal chihab xinc'anjelac chacuu ut ma jun sut xink'et la cuatin. Ut ma jun cua xaq'ue junak inch'ina chibat re nak tinnink'ejk cuochbeneb li cuamig. ³⁰ Abanan anakcuan xc'ulun la cualal a'in li quisachoc re la jun cablal riq'uineb li iixk li neque'xc'ayi rib ut laat xatakla xcamsinquel chok' re li ch'ina cuacax li ch'olaninbil chi us, chan li asbej. ³¹ Li yucua'bej quixye re: —At cualal, laat junelic cuancat cuiq'un ut chixjunil li c'a'ru cuan cue, a'an aq'ue ajcui' laat. ³² Abanan tento nak tonink'ejk anakcuan ut tasahok' sa' kach'ol xban nak la cuitz'in chanchan camenak nak xcuau; abanan xsuk'i cui'chic chi yo'yo. Quisach ut xtauman cui'chic, chan li yucua'bej.

16

Li mertom li inc'a' us xna'leb

¹ Li Jesús quixye reheb lix tzolom li jaljoquil ru atin a'in: Quicuan jun li cuink' k'axal biom ut quicuan jun xmertom. Cuanqueb li que'jitic chirix li mertom chiru li patrón ut que'xye re: —La mertom yo chixsachbal la biomal, chanqueb re. ² Jo'can nak quixbok lix mertom ut quixye re: —¿C'a'ru xyalal li yoquin chirabinquil chacuix? Tak'axtesi la cuent nak xatcuan chi c'anjelac xban nak inc'a' chic tatcanak chok' inmertom, chan re. ³ Ut li mertom quixye sa' xch'ol: —¿C'a'ru tinbanu anakcuan xban nak lin patrón tinrisi sa' lin c'anjel? Inc'a' tincuy li cacuil c'anjel ut tinxtutanq' chi xic chixtz'amanquil c'a'ru cue chire cablal. ⁴ Anakcuan ninnau c'a'ru tinbanu re nak cuankeb li tine'xc'ul sa' rochocheb nak tin-isik chi mertomil, chan sa' xch'ol. ⁵ Quixbokeb chak chi xjunkaleb li cuankeb xc'as riq'un lix patrón. Ut quixye re li xben: —¿Jo' nimal la c'as riq'un lin patrón? chan. ⁶ Ut li cuink' quixye re: —O'c'al (100) barril chi aceite, chan. Ut li mertom quixye re: —Cue' li hu li tz'ib'anbil cui' retalil la c'as. Chunlan ut jal sa' junpat. Lajeb roxc'al (50) aj chic tatz'iba retalil chiru li hu a'in, chan. ⁷ Ut quixye cui'chic re li jun chic: —Ut laat, ¿jo' nimal la c'as? chan. Ut li cuink' quixye: —O'c'al (100) bisoc chi trigo, chan. Li mertom quixye re: —Cue' li hu li tz'ib'anbil cui' retalil la c'as. Jal ut cac'al (80) bisoc aj chic tatz'iba retalil chiru li hu a'in, chan. ⁸ Ut li patrón quisach xch'ol chirilbal nak k'axal cuan xna'leb li mertom li inc'a' us xna'leb. Eb li inc'a' neque'xnau li xyalal k'axal sebeb xch'ol chixc'oxlanquil chanru tixtenk'a rib, usta inc'a' us tixbanu reheb li ras ritz'in. K'axal sebeb xch'ol chiruheb li ralal xc'ajol li Dios. ⁹ Cuan li neque'xbanu li inc'a' us riq'un lix biomal. Abanan, lain ninye ere, chebanu us'ilal reheb le ras eritz'in riq'un le biomal sa' ruchich'och'. Ut nak talajk taosok' le biomal, texc'ulek' sa' li na'ajej li mac'a' roso'jic. ¹⁰ Li ani tic xch'ol chixbanunquil li yal ca'ch'in, ticak ajcui' xch'ol chixbanunquil li nabal. Ut li ani inc'a' tic xch'ol chixbanunquil li yal ca'ch'in, inc'a' ajcui' ticak xch'ol chixbanunquil li nabal. ¹¹ Cui laex inc'a' nequenau xrabal li biomal sa' ruchich'och', ¿chan ta cui' ru nak tixc'ojob xch'ol li Dios chixq'uebal ere li tz'akal biomal? ¹² Ut cui inc'a' nequenau xrabal li c'a'ru re jalan, ¿chan ta cui' ru nak tak'axtesik ere laex li c'a'ru tz'akal ere? ¹³ Ma ani taruk tac'anjelak chiru cuib chi patrón. Mare tixra li jun ut xic' taril li jun chic, malaj ut xic' taril li jun ut tixra li jun chic. Inc'a' naru texc'anjelak chiru li Dios cui junes le biomal nequec'oxla. ¹⁴ Nak eb laj fariseo que'rabi li quixye li Jesús, que'oc chixse'enquil xban nak neque'xra lix biomaleb. ¹⁵ Ut li Jesús quixye reheb: —Laex nequeticobresi ech'ol ejunes chiruheb li tenamit. Abanan li Dios naxnau chanru le na'leb.

Li c'a'ru k'axal lok' chiruheb li cu_{ink} sa' ruchich'och', a'an tz'ektanabil xban li Dios.

Li chak'rab ut lix nimajcual cuanquilar li Dios

¹⁶ Chixjunil li tijleb li que'xc'ut eb li profeta junxil, jo' ajcui' lix chak'rab laj Moisés, quirake' xyebal nak laj Juan laj Cubsihom Ha' quic'ulun chixch'olobanquil resil nak chalc re lix nimajcual cuanquilar li Dios. Ut nabaleb yoqueb chixyalbal xk'e chi oc rubel lix nimajcual cuanquilar li Dios. ¹⁷ Li choxa ut li ruchich'och', a'an moco ch'a'aj ta nak taosok'. Abanan ma jun li qatin li tz'ibanal sa' li chak'rab, taruk taisik xcuanyl, usta k'axal ca'ch'in. ¹⁸ Li ani tixjach rib riq'uin li rixakil ut tasumlak riq'uin jalan chic ijk, a'an tixmux ru lix sumlajic. Ut li cu_{ink} li tasumlak riq'uin junak ijk li ac xjach rib riq'uin lix belom, tixmux ru lix sumlajic.

Li cuink biom ut laj Lázaro

¹⁹ Quicuan jun li cuink biom. Naxtikib rib riq'uin chabil t'icr k'axal tertio xtz'ak ut rajjal cutan nanink'ejc. ²⁰ Quicuan ajcui' jun li cuink neba' aj Lázaro xc'aba'. Xox rix. Rajjal naxchunub rib chire li oquebal re li rochoch li biom. ²¹ Naxra raj ru xtzacanquil xc'aj li cua li nat'ane' sa' xben xmex li biom. Eb li tz'i' neque'chal riq'uin ut neque'xrek' ru lix xox. ²² Quicuulac xk'ehil nak quicam li neba' ut quic'ame' xbaneb li ángel toj sa' choxa bar cuan cui' laj Abraham. Ut quicam ajcui' li biom ut quimuke'. ²³ Nak ac cuan sa' xbalba, yo chixc'ulbal li raylal aran. Qui-iloc takec' ut quiril laj Abraham ut laj Lázaro cuan chixc'atk. ²⁴ Quixjap re ut quixye: —Kacua' Abraham, chacuil taxak xtok'obal cuu. Chatakla laj Lázaro chintenq'anquil. Chixt'akresi chak li ru'uj ruk' sa' ha' ut tolxquehobresi li ru'uj cuak' xban nak c'ajo' li raylal yoquin chixc'ulbal sa' li xam a'in, chan. ²⁵ Ut laj Abraham quixye re: —At cuas cuitz'in, julticak acue nak toj yo'yocat sa' ruchich'och' nabal qbiomal ut k'axal sa nak xatcuan. Ut laj Lázaro c'ajo' li raylal quic'ul. Anakcuan cojobanbil xch'ol laj Lázaro arin ut lajat k'axal ra cuancat. ²⁶ Ut cuan jun nimla chamar jul naramoc re li na'ajej cuanco cui'. Ut ma jun ke taruk tanumek' re taxic eriq'uin, chi moco laex taruk texnumek' chak arin, chan laj Abraham re li biom. ²⁷ Tojo'nak li biom quixye re: —Tintz'ama chacu, at Kacua' Abraham, takla laj Lázaro sa' rochoch lin yucua'. ²⁸ Aran cuanqueb ob li cuitz'in. Chatakla xch'olobanquil xyalal chiruheb re nak eb a'an inc'a' te'chälk sa' li na'ajej a'in chi c'uluc raylal, chan. ²⁹ Laj Abraham quixye re: —Cuan riq'uineb li hu li tz'ibanal xban laj Moisés, ut eb li profeta. Che'xq'uehak retal li c'a'ru tz'ibanal sa' li hu a'an, chan. ³⁰ Quichak'oc li biom ut quixye: —Inc'a' tz'akal a'an, Kacua' Abraham. Abanan cui junak camenak tacuaclik cui'chic chi yo'yo ut taxic riq'uineb, te'yot'ek' raj xch'ol ut te'xjal raj xc'a'uxeb, chan. ³¹ A'ut laj Abraham quixye re: —Cui inc'a' neque'rabi li quixye laj Moisés ut eb li profeta, inc'a' ajcui' te'pabank usta tacuaclik cui'chic chi yo'yo junak sa' xyankeb li camenak, chan laj Abraham.

17

Li Jesús quixq'ue xna'lebeb lix tzolom

¹ Li Jesús quixye reheb lix tzolom: —Junelic cuan li po'oc ch'ol. Abanan raylal chälel sa' xben li ani tixpo' xch'ol li ras ritz'in. ² K'axal raj us chok' re a'an nak tacutek' sa' xchamal li palau chi bac'bo junak nimla pec chi xcux chiru nak tixpo' xch'ol junak li toj k'un xch'ol sa'lix pabal. ³ Cheq'uehak retal chanru le na'leb. Cui tamacobk chacuu la cuas acuitz'in, chak'usak. Ut cui tayot'ek' xch'ol ut tixjal xc'a'ux, chacuyak xmac. ⁴ Usta tamacobk chacuu

cuukubak sut chiru li jun cutan ut cuukub sut tixpatz' xcuybal chacuu ut tixye nak inc'a' chic tixbānu, tento nak tācuy xmāc, chan li Jesús. ⁵ Eb li apóstol que'xye re li Kacua': —At Kacua', choatenk'a taxak re nak cuank kapabal chi tz'akal, chanqueb. ⁶ Ut li Kacua' quixye reheb: —Usta ca'ch'in ajcui' le pabal cuan jo' li riyajil li mostaza, taruk raj teye re li che' a'in, "Mich' acuīb út au acuīb sa' li palau" ut li che' tixbānu raj jo' teye re, chan. ⁷ Kayehak nak junak ere cuan xmos yok chak chi c'alec malaj ut chi iloc quetqmk. Nak acak xchoy lix c'anjel lix mos, tqasuk'ik sa' cab. ¿Ma tayehek' ta bi' re xban lix patrón, "Ocan, c'ojuan ut cua'in"? ⁸ Inc'a. Tayehek' ban re: "Chac'ub cuan intzacaemk ut chatc'anjelak chicuu. Nak acak xinrake' chi cua'ac, naru tattua'ak laat." ⁹ ¿Ma tixbantioxi re lix mos nak quixbānu li quitaklac xbanunquil? Lain ninye nak inc'a'. ¹⁰ Jo'can ajcui' laex. Nak ac xebānu li sextaklac cui', cheyehak: "Lao aj c'anjel chacuu. Ca'aj cui' li jo' q'uijal xoqatka cui' xkabānu. Jo'can nak mabantioxi chiku", cha'akex, chan li Jesús reheb.

Li Jesús quixq'uirtesiheb li lajeb chi cuink saklepeb rix ut jun ajcui' quibantioxin chiru

¹¹ Nak yo chi xic Jerusalén, li Jesús quinume' sa' li na'ajej li neque'xc'ul cui' rib li tenamit Samaria ut Galilea. ¹² Nak yo chi cuulac sa' jun li c'alebal, que'chal chixc'ulbal lajeb li cuink saklep rixeb. Eb a'an najt que'xakli riq'un li Jesús. ¹³ Ut que'xjap reheb chixyebal: —At Jesús, at aj tzolonel, chacuuxtāna taxak ku, chanqueb. ¹⁴ Nak quirilebli Jesús quixye reheb: —Ayukex riq'uineb laj tij ut c'utumak chak erib chiruheb, chan reheb. Ut nak yoqueb chi xic, que'q'uira. ¹⁵ Jun reheb li cuink quiril nak quiq'uira, quisuk'i riq'un li Jesús ut yo chixlok'oninquil li Dios chi cau xyqb xcux. ¹⁶ Quixcuik'ib rib chiru li Jesús ut quixbantioxi chiru. Li cuink a'an aj Samaria. ¹⁷ Quixye li Jesús: —¿Ma mācua' ta bi' lajeb chi cuink li xinq'uirtesi? ¿Bar cuanqueb li beleb chic? ¹⁸ ¿Ma ca'aj cui' li jun a'in li mācua' aj judío xsuk'i chixlok'oninquil li Dios? chan. ¹⁹ Tojo'nak quixye re li cuink: —Xaklin ut tatic. Xatq'uira xban nak xatpāban, chan.

Li Jesús quixye nak lix nimajcual cuanquinal li Dios ac cuan riq'uineb

²⁰ Eb laj fariseo que'xpatz' re li Jesús jok'e tachalk lix nimajcual cuanquinal li Dios. Li Jesús quichak'oc ut quixye reheb: —Lix cuanquinal li Dios moco cuank ta retalil lix c'ulunic re nak tēnau jok'e xk'ehil. ²¹ Chi moco te'xye, "cuan arin" chi moco te'xye, "le' cuan", xban nak lix cuanquinal li Dios ac cuan sa' eyənk laex, chan.

Li Jesús quixye chanru nak tac'ulunk cui'chic

²² Ut li Jesús quixye reheb lix tzolom: —Tacuulak xk'ehil nak laex tera ru rilbal lin c'ulunic lajin li C'ajolbej, abanan inc'a' teril cuu. ²³ Ut te'xye ere, "cue' arin" malaj ut "cuan toj le". Abanan mexxic chiribal chi moco tetakeheb. ²⁴ Sa' xk'ehil lin c'ulunic lajin li C'ajolbej chanchanakin li rak' cák nak narepoc chak ut naxcutanobresi chixjunil ru li choxa. Laín moco chi mukmu ta tinc'ulunk. ²⁵ Abanan tento nak lajin li C'ajolbej tinrahobtesík ut tintz'ektañak xbaneb li cuanqueb sa' ruchich'och' sa' eb li cutan a'in. ²⁶ Jo' quic'ulman sa' eb li cutan nak toj cuank laj Noé sa' ruchich'och', jo'can ajcui' tac'ulmank nak tacuulak xk'ehil lin c'ulunic lajin li C'ajolbej. ²⁷ Sa' eb li cutan a'an li tenamit yoqueb chi cua'ac ut yoqueb chi uc'ac. Yoqueb chi sumlāc ut yoqueb chi sumubanc toj quicuulac xk'ehil nak laj Noé qui-oc sa' li jucub cab. Nak māc'a' sa' xch'oleb quichal li but'i ha' ut quílajxsacheb chixjunileb

li inc'a' que'oc sa' li jucub cab. ²⁸ Tac'ulmank jo' quic'ulman sa' eb li cutan nak laj Lot toj cuank sa' ruchich'och'. Chixjunileb yoqueb chi tzacanc ut yoqueb chi uc'ac. Yoqueb chi lok'oc ut yoqueb chi c'ayinc. Yoqueb chi aqc ut yoqueb chi cablac. ²⁹ Abanan sa' li cutan nak laj Lot qui-el sa' li tenamit Sodoma, nak mac'a' sa' xch'oleb, quichal chak sa' choxa xam ut azufre ut quilaixsacheb chixjunileb. ³⁰ Jo'can ajcui' tac'ulmank nak tinc'ulunk cui'chic lain li C'ajolbej. Mac'a'ak sa' xch'oleb li tenamit. ³¹ Sa' li cutan nak tinc'ulunk, li ani cuank chak sa' xben li rochoch ut li c'a'ru re cuank sa' li cab, micube chak chixxocbal. Jo'can ajcui' li cuank chak sa' c'alebal, inc'a' tasuk'ik sa' li rochoch. ³² Chijulticok' ere li c'a'ru quixc'ul li rixakil laj Lot nak quiraj raj suk'ic. ³³ Li ani taraj xcolbal rix lix yu'am arin sa' ruchich'och', tasachk chiru. Ut li ani tasachk lix yu'am chiru, a'an tacuank xyu'am chi junelic. ³⁴ Ut tinye ajcui' ere: Sa' li honal a'an nak tinc'ulunk, cuankeb cuib yokeb chi cuarc sa' jun chi cuarib. Jun aj pabanel ut jun macua'. Laj pabanel tac'amek' xban li Dios ut li jun chic li macua' aj pabanel, a'an tacañabak. ³⁵ Ut cuib li iix yokeb chi que'ec sa' jun li que'leb, jun aj pabanel ut li jun chic macua' aj pabanel. Ut laj pabanel tac'amek' xban li Dios ut li jun chic li macua' aj pabanel, a'an tacañabak. ³⁶ Cuankeb cuib chi cuink sa' li c'alebal, jun aj pabanel ut li jun chic macua' aj pabanel. Laj pabanel tac'amek' xban li Dios ut li jun chic, li macua' aj pabanel, tacañabak, chan li Jesús. ³⁷ Eb lix tzolom que'xpatz' re: —¿Bar tac'ulmank li yogat chixyebal? chanqueb. Ut li Jesús quixye reheb: —Læx nequenau nak bar cuan cui' junak li camenak, aran ajcui' te'ch'utlak eb li so'sol, chan.

18

Li jaljoquil ru atin chirix li xmalca'an ut laj rakol qtin

¹ Li Jesús quixye li jaljoquil ru atin a'in reheb lix tzolom re xc'utbal chiruheb nak tento te'tijok junelic ut inc'a' tach'inank xch'oleb. ² Quixye reheb: Sa' jun li tenamit quicuan jun aj rakol atin inc'a' naxxucua ru li Dios, chi moco naxq'ue sa' xnak' ru li cristian. ³ Ut quicuan ajcui' sa' li tenamit a'an jun li xmalca'an cuan jun lix ch'a'ajquidal. Rajal yo chi xic riq'uin laj rakol atin chixtz'amanquil lix tenk'anquil ut naxye re: —Bañu usilal, charak atin sa' xbenet li xic' neque'iloc cue, chan. ⁴ Ut laj rakol atin inc'a' quiraj. Abanan mokon quixye sa' xch'ol: —Lain inc'a' ninxucua ru li Dios chi moco eb li cuink ning'ueheb sa' xnak' cuu. ⁵ Abanan xban nak yoquin chi titz'c chirabinquil li iixk a'in, tinrak atin sa' xbenet li xic' neque'iloc re. Mare yok chinch'i ch'i inquil junelic, chan sa' xch'ol. ⁶ Ut li Kacua' quixye reheb: —Q'uehomak retal c'a'ru quixye laj rakol atin li inc'a' tic xch'ol. Usta inc'a' tic xch'ol, laj rakol atin quixtenk'a li xmalca'an re nak inc'a' chic tach'i ch'i ik xban. ⁷ ¿Ma toja' ta chic li Dios inc'a' tixcoleb li sic'bileb ru xban? ¿Ma tabayk ta bi' chixsumenquil li c'a'ru te'xtz'ama li neque'yaban re lix c'aba' chi k'ek chi cutan? ⁸ Lain tinye ere nak li Dios tixcoleb chi junpat. Abanan lain ninc'oxla, ¿jarub ta cui' li cauhakeb xch'ol sa' lix pabal? Ut, ¿jarubeb ta cui' li yokeb chi tijoc nak tinc'ulunk cui'chic sa' ruchich'och' lain li C'ajolbej?

Laj fariseo ut laj titz'ol toj que'coeb chi tijoc sa' li templo

⁹ Ut li Jesús quixye jun chic li jaljoquil ru atin reheb li neque'xc'oxla nak chabileb ut neque'xtz'ektañabej li jun ch'ol chic. Quixye reheb: ¹⁰ Cuib li cuink coeb sa' li templo chi tijoc. Li jun, a'an aj fariseo. Ut li jun chic aj titz'ol toj. ¹¹ Laj fariseo quixxakab rib ut quitijoc chi cau xyab xcux ut quixye: —At inDios, lain ninbantioxi chacuu nak macua'in jo'queb li jun ch'ol chic. A'an

eb aj elk'eb, aj bənuhom məusilal, ut aj muxuleb caxər. Ləin məcua'in jo' laj titz'ol toj a'an. ¹² Ca' sut ninbənu in-ayun chiru li jun xaman. Ut rajlal ninq'ue li junjunk sa' xlajetkil re chixjunil li jo' q'ual li ninc'ul, chan laj fariseo sa' lix tij. ¹³ Abanan laj titz'ol toj najt quixq'ue chak rib ut quixxulub lix jolom. Yo chixtenbal li re xch'ol chi ruk' xban xrahil xch'ol ut quixye: —At inDios, lajn aj mac. Chacuuxtana taxak cuu, chan. ¹⁴ Lajn ninye ere nak laj titz'ol toj, a'an li quisuk'i sa' rochoch chi ticobresinbil chic lix ch'ol. Ut laj fariseo inc'a', xban nak li ani naxnimobresi rib, a'an tacubsi xcuanylil. Ut li ani naxcubsi rib, a'an taq'uehek' xcuanylil, chan li Jesús.

Li Jesús quirosobtesiheb li coc'al

¹⁵ Sa' jun li cutan cuanqueb li que'xc'am chak lix coc'aleb riq'uin li Jesús re nak tixq'ue li ruk' sa' xbəneb ut tarosobtesiheb. Ut eb lix tzolom li Jesús que'xq'ue retal nak que'c'ame' chak li coc'al riq'uin ut que'oc chixk'usbaleb lix na' xyucua'eb. ¹⁶ Ut li Jesús quixbokeb lix tzolom riq'uin ut quixye rebeb: —Canabomakeb li coc'al chi chalc cuiq'uin. Meram chiruheb xban nak rebeb a'an lix nimajcual cuanquilar li Dios. ¹⁷ Relic chi yal tinye ere li ani inc'a' k'un xch'ol chimpabanquilar li Dios, chan.

Jun li cuink biom quiqatinac riq'uin li Jesús

¹⁸ Jun li cuink nim xcuanylil sa' xyankelaj judio quiqatinac riq'uin li Jesús ut quixye re: —At chabil tzoloneb, ¿c'a'ru taruk tinbənu re nak tincuechanli yu'am chi junelic? chan. ¹⁹ Li Jesús quixye re: —¿C'a'ut nak nacaye chabil cue cui inc'a' nacanau anihin lajn? Jun ajcui' li chabil ut a'an li Dios. ²⁰ Laat ac nacanau c'a'ru naxye sa' li chalk'rab: Matmuxuc caxar. Macamsi aqwas acuitz'in. Mat-elk'ac. Matyo'ban tic'ti chirix aqwas acuitz'in. Chaoxlok'i la na' ayucua', chan li Jesús re. ²¹ Li cuink quichak'oc ut quixye: —Chixjunil a'in ac yoquin ajcui' chak chixbənunquilar chalen sa' inca'ch'inal, chan. ²² Nak quirabi li c'a'ru quixye li cuink, li Jesús quixye re: —Jun chic toj maji' nacabano. C'ayi chixjunil li c'a'ru cuan aqwe ut tasi lix tz'ak rebeb li neba' ut taquənk abiomal sa' choxa. Nak ac xabanu a'an, tatchalk ut tinatake, chan li Jesús re. ²³ Nak quirabi li quixye li Jesús, c'ajo' nak quiraho' sa' xch'ol li cuink xban nak nabal lix biomal cuan. ²⁴ Li Jesús quixq'ue retal nak quiraho' sa' xch'ol li cuink ut quixye: —C'ajo' xch'a'ajqul chok' re junak biom oc rubel lix nimajcual cuanquilar li Dios. ²⁵ Mamin taruk tanumek' junak nimla xul camello sa' ru junak cux. Jo'can ajcui' li biom. Ma jok'e taruk taqc sa' xnimajcual cuanquilar li Dios cui ca'aj cui' lix biomal naxc'oxla, chan li Jesús. ²⁶ Eb li que'abin re li quixye li Jesús, que'chak'oc ut que'xye: —Aniheb li taruk te'colek' chi jo'canan? chanqueb. ²⁷ Li Jesús quixye rebeb: —Li c'a'ru ch'a'aj xbanunquilar chiru li cuink, chiru li Dios moco ch'a'aj ta xbanunquilar, chan. ²⁸ Laj Pedro quixye re li Jesús: —Ləo xkacanab chixjunil li c'a'ru ke xban atakenquilar, chan. ²⁹ Li Jesús quixye: —Relic chi yal tinye ere, li ani naxcanab li c'a'ru re sa' inc'aba' lain, tixc'ul rekaj. Li ani naxcanab li rochoch, lix na' xyucua', li ras ritz'in, li rixakil, malaj ut lix coc'al sa' xc'aba' lix nimajcual cuanquilar li Dios, a'an tixc'ul rekaj. ³⁰ K'axal nabal cui'chic li rekaj tixc'ul sa' li ruchich'och' a'in, jo' ajcui' sa' li choxa tixc'ul li junelic yu'am, chan li Jesús.

Li Jesús quixye cui'chic resil lix camic

³¹ Tojo'nak li Jesús quixc'ameb xjuneseb lix tzolom cablaju ut quixye rebeb: —Anakcuan toxic Jerusalén re nak taq'aklok ru chixjunil li tz'ibanel xbaneb li profeta chicuix lajn li C'ajolbej. ³² Tink'axtesik sa' ruk'eb li

mäcua'eb aj judío. Tine'xhob, tine'xsac' ut tine'xchuba. ³³ Ut nak acak xine'xsac' chi us, tine'xcamsi. Abanan sa' rox li cutan tincuaçlik cui'chic chi yo'yo sa' xyänkeb li camenak, chan li Jesús. ³⁴ Ut eb lix tzolom chi tíc inc'a' que'xtau ru li quixye li Jesús xban nak ch'a'aj xtaubal ru chiruheb.

Li Jesús quixq'uirtesi jun li mutz' nak yo chi cuulac Jericó

³⁵ Nak li Jesús yo chi cuulac Jericó, cuan jun li cuïnk mutz' ru c'ojo' chire li be. Yo chixtz'amanquil c'a'ru re. ³⁶ Nak quirabi li q'uila tenamit yoqueb chi numec', li mutz' quixpatz' c'a'ru yo chi c'ulmanc. ³⁷ Que'xye re nak li Jesús aj Nazaret yo chi numec'. ³⁸ Li mutz' quixjap re ut quixye: —At Jesús, ralalat xc'ajol laj David, laat li yoco chacuoybeninquil. Chacuuxtana taxak cuu! chan. ³⁹ Ut eb li tenamit li yoqueb chi numec' que'oc chixk'usbal ut que'xye re: —Matchokin, chanqueb re. Abanan li mutz' k'axal cui'chic cau quixjap re ut quixye: —At ralalat xc'ajol laj David, chacuuxtana cuu, chan. ⁴⁰ Nak quirabi li quixye li mutz', li Jesús quixakli ut quixtakla xc'ambal li mutz'. ⁴¹ Nak quic'am'e riq'uin, li Jesús quixye re: —¿C'a'ru tacular tinbanu aq'ue? chan. Ut li mutz' quixye: —Kacua', tincuaj nak tajlok li xnak' cuu, chan. ⁴² Li Jesús quixye re: —Chi-ilok li xnak' aq'uu. Xatq'ura xban nak xapab nak cuan incuanquil chaq'uirtesinquel, chan. ⁴³ Ut sa' junpat qui-ilok li mutz' ut co chirixeb. Yo chixlok'oninquel li Dios. Ut nak que'r'il li c'a'ru qui'ulman, chixjunileb li tenamit que'xq'ue xlok'al li Dios.

19

Laj Zaqueo laj titz'ol toj quixpab li Jesús

¹ Nak quicuulac Jericó, li Jesús yo chi numec' sa' li tenamit. ² Aran cuan jun li cuïnk biom aj Zaqueo xc'aba'. Li cuïnk a'an, a'an li nataklan sa' xbeneb laj titz'ol toj. ³ Taraj xnaubal ani li Jesús. Abanan xban nak k'axal nabaleb li tenamit, inc'a' quiru rilbal xban nak ca'ch'in rok. ⁴ Jo'can nak co sa' aq'nil chi ubej ut quitake' sa' ru'uj jun li che' sicómoro xc'aba' re nak taruk taril li Jesús xban nak aran toxnumek'. ⁵ Nak yo chi numec' aran, li Jesús qui-ilok takec'. Quiril laj Zaqueo ut quixye re: —At Zaqueo, cuben chak chi junpat xban nak tento nak tinhilank sa'l a cuochoch anakcuan, chan. ⁶ Ut laj Zaqueo quicube sa' junpat ut quixc'ul li Jesús sa' rochoch chi sa sa' xch'ol. ⁷ Nak li q'uila tenamit que'r'il nak li Jesús qui-oc sa' rochoch laj Zaqueo, que'po' ut que'xye: —X-oc chi hilanc sa' rochoch jun cuïnk aj mac, chanqueb. ⁸ Nak yoqueb chi cu'a'c, laj Zaqueo quixakli chiru li Jesús ut quixye re: —Kacua', chalen anakcuan jalan chic tinbanu. Yijach lin jun cablal tinsi reheb li neba'. Ut cui cuan anihak xcuell'a c'a'ru re, cahib cu'a'c chic xq'ual li rekaj ting'ue, chan. ⁹ Ut li Jesús quixye: —Li cuïnk a'in ralal xc'ajol ajcui' laj Abraham. Anakcuan colbil chic li cuïnk a'in. ¹⁰ Lain li C'ajolbej xinc'ulun chixsic'bal ut chixcolbal li sachenakeb, chan li Jesús.

Cui inc'a' nakaq'ue chi c'anjelac li kamatan li q'uebil ke xban li Dios, tamak'ek' chiku

¹¹ Ut li Jesús quixye jun chic li jaljoquil ru aq'tin reheb li yoqueb chi abinc' re, xban nak cuulaqueb re Jerusalén. Eb a'an que'xc'oxla nak li Jesús ac oc re chixxakabanquil lix nimajcual cuanquilal li Dios. ¹² Li Jesús quixye reheb: Quicuan jun xanimal ru cuïnk. Li cuïnk a'an quiboke' sa' jun najtil tenamit re nak taxakabak chok' rey ut tasuk'ik cui'chic. ¹³ Nak ac xic re li cuïnk quibokeb lajeb lix mos. Quixq'ue lajeb chi tumin re li junjunk ut quixye reheb: —Yaconkex chiru li tumin a'in toja' yal jok'e tana tinsuk'ik chak lain,

chan. ¹⁴ Aban xic' na-ile' xbaneb lix tenamit ut nak ac xco li cujink, que'xtakla xtakl riq'unin li taxakabank re chok' rey chixyebal re: —Lao inc'a' nakaj nak taoc chok' karey li cuink a'in, chanqueb. ¹⁵ Abanan li cuink quixakabac chok' rey. Ut nak ac x-oc chok' rey, li cuink a'an quisuk'i cui'chic sa' xtenamit ut quixtakla xbokbaleb lix mos li quixq'ueheb xtumin re xnaubal li jo' nimal ac xtau li junjunk. ¹⁶ Quicuulac li xben ut quixye re: —Kacua', lajeb chic xrala la tumin li xaq'ue cue, chan. ¹⁷ Li rey quixye re: —Laat chabil aj c'anjel. Us xabanu. Xban nak tic ach'ol riq'unin li ca'ch'in xinq'ue acue, jo'can nak timq'ue acuanquil sa' xben lajeb chi tenamit, chan li rey. ¹⁸ Ut quicuulac li mos jun chic ut quixye: —Kacua', ob chic xrala la tumin li xaq'ue cue, chan. ¹⁹ Ut li rey quixye re: —Jo'can ajcui' laat. Chabil xabanu. Tinq'ue acuanquil sa' xben ob chi tenamit, chan. ²⁰ Ut quicuulac ajcui' li mos jun chic ut quixye: —Kacua', cue' la tumin. Xinc'ula sa' jun sut. ²¹ Xinxucuac qaban xban nak ninnau nak josk'at. Nacac'ul li tumin li inc'a' nacac'anjela ut nacatk'oloc bar cui' inc'a' nacat-au, chan. ²² Quichak'oc li rey ut quixye: —Laat mac'a' nacatoc cui'. Riq'unin ajcui' li c'a'ru xaye, tinrak atin sa' aben. Nacanau nak josk'in ut nacanau nak ninc'ul li tumin li inc'a' ninc'anjela ut nink'oloc bar cui' inc'a' nin-au. ²³ ¿C'a'ut nak inc'a' xaq'ue chi to' lin tumin? Ut lain nak xinsuk'i, xinc'ul raj lin tumin rochben li ral, chan li rey. ²⁴ Ut li rey quixye reheb li cuanqueb aran: —Isihomak li tumin chiru ut q'uehomak re li ac cuan lajeb chi tumin riq'unin, chan. ²⁵ Eb a'an que'chak'oc ut que'xye: —At Kacua', a'an ac cuan ajcui' lajeb chi tumin riq'unin, chanqueb. ²⁶ Li rey quixye reheb: —Lain ninye ere nak li ani cuan nabal c'a'ru re, taq'uehek' cui'chic nabal re; ut li ani ca'ch'in ajcui' c'a'ru re, taisik chiru, usta ca'ch'in ajcui' li c'a'ru re. ²⁷ Ut c'amomakeb chak li xic' neque'iloc cue li inc'a' neque'raj nak tin-oc chok' xreyeb. Ut chicuu ajcui', tecamsiheb, chan li rey.

Li Jesús quiq'uehe' xlok'al nak qui-oc Jerusalén

²⁸ Nak ac xye li jaljoquil ru atin a'in, li Jesús qui-oc cui'chic chi xic Jerusalén. ²⁹ Cuulaqueb re sa' li cuib chi tenamit Betfagé ut Betania. Nach' cuanqueb riq'unin li tzul Olivos nak li Jesús quixtaklaheb cuib lix tzolom. ³⁰ Quixye reheb: —Ayukex sa' li ch'ina tenamit a'an li cuan chi nach'. Ut nak texcuulak tetau jun li ch'ina bur bac'bo. Li ch'ina bur a'an toj ma'ani nabec chirix. Tehit ut tec'am chak arin. ³¹ Ut cui ani napatz'oc ere c'a'ut nak yoquex chixhitbal, teye re nak li Kacua' taajok ru li ch'ina bur, cha'akex, chan li Jesús. ³² Que'coeb lix tzolom li Jesús cuib ut que'xtau chixjunil jo' quiyehe' reheb. ³³ Nak yoquex chixhitbal li ch'ina bur, eb laj echal re que'xpatz' reheb: —¿C'a'ut nak yoquex chixhitbal li kabur? chanqueb. ³⁴ Eb lix tzolom li Jesús que'chak'oc ut que'xye: —Li Kacua' taajok ru li bur, chanqueb. ³⁵ Ut que'xc'am li ch'ina bur riq'unin li Jesús. Que'xq'ue li t'icr chirix ut que'xtenk'a li Jesús chi takec' chirix. ³⁶ Nak yo' chi xic li Jesús, nabaleb li cristian que'xhel lix t'icreb sa' be bar tanumek' cui' li Jesús jo' c'aynakeb xbanunquil nak nacuulac junak nim xcuauquilib. ³⁷ Cuulaqueb re Jerusalén. Yoqueb chak chi cubec sa' li tzul Olivos ut chixjunileb li yoqueb chixtakenquilib li Jesús que'oc chixjapbal reheb xban xsahil xch'oleb. Ut que'xlok'oni li Dios xbaneb li milagro li quilaje'rilib. ³⁸ Que'xye: —Osobtesinbil taxak li rey li xchal sa' xc'aba' li Kacua'. Ut cuank taxak li tutkuquilal sa' choxa. Lok'oninbil taxak li Kacua' li cuan sa' choxa, chanqueb. ³⁹ Ut cuanqueb laj fariseos sa' xyankeb li q'uila tenamit que'xye re: —At tzolonek l'useb la tzolom, ye reheb nak te'xcanab atinac. —⁴⁰ Li Jesús quichak'oc ut quixye reheb: —Lain ninye ere nak cui eb lin tzolom te'xcanab xq'uebal inlok'al, a' chic li pec te'xjap re chixq'uebal inlok'al, chan li Jesús.

Li Jesús quiyot'e' xch'ol nak quiril li tenamit Jerusalén

41 Nak cuulac re Jerusalén, li Jesús quiyabac chirilbal li tenamit. **42** Ut quixye: —¡Cui ta laex aj Jerusalén nequenau xq'uebal retal ani taruk taq'uehok tuktukuil usilal sa' eb li cutan a'in, us raj! Aban anakcuán toj mukmu cheru. Jo'can nak inc'a nequetau xyalal. **43** Tacuulak xk'ehil nak eb li xic' neque'iloc ere te'chálk chi pletic eriq'uin. Te'xsut rix le tenamit. Te'xq'ue ribeb chi xjun sutam le tenamit ut laex ma' bar chic taruk tecol erib. **44** Te'xjuq'ui le tenamit ut te'xt'an, jo'queb ajcui' chixjunileb li cuangueb aran. Ma' jun chic li pec tacanak sa' xna'a. Tec'ul chi jo'can xban nak laex inc'a xeq'ue retal nak li Dios xc'ulun eriq'uin checolbal, chan li Jesús.

Li Jesús quirisiheb laj c'ay sa' li templo

45 Nak qui-oc sa' li templo, li Jesús qui-oc chixyolesinquileb chirix cab li yoqueb chi c'ayinc ut li yoqueb chi lok'oc aran. **46** Quixye reheb: —Tz'ib'anbil retalil sa' li Santil Hu chi jo'ca'in: Li cuochoch a'in re te'tijok cui' li tenamit. Abanan laex xeq'ue li templo chok' xna'ajeb laj elk', chan li Jesús. **47** Ut rajal cutan yo chixch'olobanquil xyalal sa' li templo. Eb li xbenil aj tij, ut eb laj tz'ib ut eb li neque'taklan sa' xyankeb laj judío yoqueb chixc'ubanquil chanru nak te'xcamsi. **48** Abanan inc'a que'xtau chanru te'xbanu xban nak chixjunileb li tenamit yoqueb chixq'uebal xch'oleb chirabinquil li c'a'ru yo chixyebal li Jesús.

20

Eb laj tz'ib que'xpatz' re li Jesús ani quiq'uehuc xcuanguil

1 Sa' jun li cutan li Jesús yo chixch'olobanquil xyalal li colba-ib chiruheb li tenamit li cuangueb sa' li templo, nak que'cuulac riq'uineb li xbenil laj tij ut eb laj tz'ib rochbeneb li xakabanibileb chi c'angelac sa' li templo. **2** Ut que'xye re: —¿Ani xtaklan aq'ue chixbanunquil li c'a'ru yocat chixbanunquil? ¿Ani xq'uehuc aq'uanquil? chanqueb. **3** Li Jesús quixye reheb: —Lain tincuaj ajcui' patz'oc ere. Tesume li tinpatz' ere. **4** ¿Ani quitaklan chak re laj Juan chi cubsinc ha'? ¿Ma li Dios malaj ut cuink quitaklan chak re? chan li Jesús reheb. **5** Ut que'oc chixyebal chi ribileb rib: —¿C'a'ru takasume cui'? Cui takaye nak li Dios xtaklan chak re, a'an tixye ke c'a'ut nak inc'a xkapab li c'a'ru quixye laj Juan. **6** Ut cui takaye nak cuink xtaklan chak re, chixjunileb li tenamit toe'xcamsi chi pec xban nak eb a'an neque'xpab nak laj Juan, a'an tz'akal profeta, chanqueb chi ribileb rib. **7** Jo'can nak que'chak'oc ut que'xye re li Jesús: —Lao inc'a nakanau ani xtaklan chak re, chanqueb. **8** Ut li Jesús quixye reheb: —Chi moco lain tinxie ere ani xq'uehuc incuanquil chixbanunquil li c'a'ru ninbanu, chan reheb.

Li Jesús quixye reheb nak tarakek' atin sa' xbeneb li neque'tz' ektanán re

9 Ut li Jesús qui-oc chixyebal reheb li tenamit li jaljoquil ru atin a'in: Jun li cuink quirau jun sir li racuimk uvas. Quixq'ue chi to' riq'uineb li cuink aj c'alom. Ut co sa' jalan tenamit ut najt quisach. **10** Nak quicuulac xk'ehil xsic'bal ru li acuimk, laj echal re quixtakla jun lix mos riq'uineb li cuink chixc'ulbal li jo' q'ual ru li racuimk li tatz'ak a'an. Abanan eb li cuink que'xchap li mos ut que'xsac'. Ut quisuk'i chi mac'a que'xq'ue re. **11** Laj echal re li acuimk quixtakla jun chic lix mos riq'uineb. Ut jo'can ajcui' que'xbanu re a'an. Que'xhob ut que'xsac' ut quisuk'i a'an chi mac'a que'xq'ue re. **12** Ut laj echal re li ch'och' quixtakla cui'chic jun lix mos. Ut eb li cuink k'axal ra que'xbanu re ut que'xcut chirix li na'ajej a'an. **13** Tojo'nak laj echal re li

ch'och' quixye: —¿C'a'ru tinbanu anakcuan? Tintakla li cualal li k'axal raro inban. Nak te'r'il li cualal, märe te'xc'ul sa' xyalal, chan sa' xch'ol. ¹⁴ Que'r'il nak yo chi cuulac li ralal, ut que'xye chi ribileb rib: —A'an li taechanink re li na'ajej. Kacamsihak, chanqueb, re nak lao chic toechanink re. ¹⁵ Que'risi sa' li na'ajej a'an ut que'xcamsi. ¿C'a'ru nequeye læx? ¿C'a'ru tixbanu laj echal re li acuimk riq'uineb li cuink a'in? Lain tinye ere c'a'ru tixbanu. ¹⁶ Tachalk ut tixcamsiheb laj ilol re li racuimk ut jalan chic aj e tixq'ue li jun sir chi uvas, chan li Jesús. Nak que'rabi li quixye li Jesús, eb a'an que'xye: —Inc'a' taxak chic'ulmank chi jo'can, chanqueb. ¹⁷ Li Jesús quirileb ut quixye reheb: —¿C'a'ru naraj naxye a'in li tz'ibanol sa' li Santil Hu, li que'xye li profeta chicuix?

Li pec li que'xtz'ektana laj cablanel, a'an li k'axal lok' li quiq'uehe' chok' xxuc li cab. (Sal. 118:22)

¹⁸ Li ani tat'anek' sa' xben li pec a'in, tixtoch'i rib. Coc' puc' tacanak. Ut ani sa' aj ben tat'anek' li pec a'in, xujinbil tacanak.

¹⁹ Eb laj tz'ib ut eb li xbenil aj tij que'xtau ru nak reheb a'an quixye li jaljoquil ru atin a'in ut que'raj raj xchabtal sa' li honal a'an. Abanan inc'a' que'ru xban nak que'xucuac chiruheb li tenamit.

Que'yal rix li Jesús riq'uin xpatz'bal ma us xq'uebal li toj re laj César li acuabej

²⁰ Eb laj tz'ib ut eb li xbenil aj tij yoqueb chixq'uebal retal jok'e tz'akal taruk te'xchap li Jesús. Ut que'xtaklaheb aj q'uehol etal riq'uin. Laj q'uehol etal que'xbanu ribeb nak tiqeb xch'ol yal re rilbal cui tixye junak atin re nak taruk te'xchap ut te'xc'am riq'uin li acuabej. ²¹ Xban a'an nak que'xye re chi jo'ca'in: —At tzolone, nakanau nak laat yal nacat-atinac ut sa' xyalal nacac'ut li xyalal chiruheb li tenamit. Inc'a' nacasic' ru aní nacara. Sa' xyalal nacac'ut chiruheb li c'a'ru naraj li Dios. ²² Ye ke c'a'ru naxye li chak'rab. ¿Ma us takaq'ue li katoj re laj César li acuabej malaj ut inc'a'? chanqueb re. ²³ Li Jesús quixnau nak aj balak'eb. Jo'can nak quixye reheb: —¿C'a'ut nak nequeraj xyalbal cuix? ²⁴ C'ut junak li tumin chicuu. ¿Ani aj e li jalalm q'ch li cuan chiru? Ut, ¿ani aj c'aba' li tz'ibanol chiru? chan. Eb a'an que'chak'oc ut que'xye: —Re li acuabej. ²⁵ Ut li Jesús quixye reheb: —Tojomak re li acuabej li c'a'ru re li acuabej, ut tojomak re li Dios li c'a'ru re li Dios, chan. ²⁶ Ut ma jun atin que'xtau re taruk te'xye nak cuan xmäc. Ut que'sach xch'oleb xban li atin li que'sumec cui' xban li Jesús. Jo'can nak mac'a' chic que'xye.

Eb laj saduceo que'patz'oc chirix lix cuaclijkeb li camenak chi yo'yo

²⁷ Cuanqueb cuib oxib laj saduceo que'cuulac riq'uin li Jesús. Eb a'an inc'a' neque'xpab nak te'cuaclik cui'chic chi yo'yo li camenak. Que'xye re li Jesús: ²⁸ —At tzolone, laj Moisés quixtz'iba jun li chak'rab chok' ke. Naxye chi jo'ca'in: Cui junak cuink tacanak ut ma jun li ralal xc'ajol tacuank, tasumlak li ritz'in li camenak riq'uin li xmalca'an re nak tacuank ralal xc'ajol sa' xc'aba' li camenak. ²⁹ Que'cuan cuukub li cuink ritz'ineb rib. Li asbej quic'am rixakil ut quicam chi inc'a' quicuan ralal xc'ajol. ³⁰ Ut quic'ame' li ixs xban li ritz'in li camenak ut quicam ajcui' li cuink a'an ut chi moco a'an quicuan ralal xc'ajol riq'uin li ixs. ³¹ Ut jo'can cui'chic li rox itz'inbej. Li ixs quicuan chok' rixakil li cuukub chi cuink ut ma jun reheb quicuan ralal xc'ajol riq'uin li ixs a'an. ³² Ut quicam ajcui' li ixs. ³³ Sa' xcuaclijqueb li camenak chi yo'yo, nak te'cuaclik eb a'an, ¿ani aj ixakil tacanak cui' li ixs a'an xban nak cuukub lix belom quicuan? chanqueb re li Jesús. ³⁴ Quichak'oc li Jesús ut quixye reheb: —Eb li cuanqueb sa' ruchich'och' anakcuan neque'sumla ut neque'sumubac.

35 Abanan sa' eb li cutan təchälk, li xc'ulubeb cuaclic cui'chic chi yo'yo sa' xyānkeb li camenak, inc'a' chic te'sumläk chi moco te'sumubak. **36** Jo'cakeb ban chic li ángel sa' choxa. Inc'a' chic te'camk. Te'cuaclik cui'chic chi yo'yo sa' xyānkeb li camenak, xban nak a'an eb li ralal xc'ajol li Dios. **37** Laex nequeye nak inc'a' te'cuaclik cui'chic chi yo'yo li camenak. Abanan laj Moisés quixc'utbesi ajcui' chak junxil nak eb li camenak te'cuaclik cui'chic chi yo'yo. Tz'ib'anbil retalil sa' li Santil Hu li quixye nak yo chi c'atc li q'ux. Quixye nak li Dios, a'an lix Dios laj Abraham, lix Dios laj Isaac, ut lix Dios laj Jacob. **38** Li Dios, a'an moco xDioseb ta camenak; xDioseb ban li yo'yoqueb, xban nak toj yo'yoqueb chiru li Dios usta ac camenakeb, chan li Jesús reheb. **39** Cuanqueb laj tz'ib que'chak'oc ut que'xye re: —At tzolonel, tz'akal re ru li xaye, chanqueb. **40** Ut mä ani chic quiraj patz'oc riq'unin li Jesús.

Li Cristo, a'an ralal xc'ajol li rey David ut a'an ajcui' laj Colol re

41 Li Jesús quixye reheb: —Neque'xye nak li Cristo laj Colonel a'an xcomoneb li ralal xc'ajol li rey David. **42** Tz'ib'anbil retalil sa' li Santil Hu sa' li Salmos li quixye li rey David. Quixye:

Li Kacula' Dios quixye re li Kacula' laj Colol cue, c'oqlan sa' li nim uk'

43 toj ting'ueheb li xic' neque'iloc acue rubel la cuanquil. (Sal. 110:1)

44 Li rey David quixye "aj Colol cue" re li Kacula', usta a'an xcomoneb li ralal xc'ajol, chan li Jesús.

Eb laj tz'ib aj ca'pac'al u; inc'a' useb xna'leb

45 Chixjunileb li tenamit yoqueb chirabinquil nak li Jesús quixye reheb lix tzolom: **46** —Metzol erib riq'uineb laj tz'ib li neque'cuulac chiruheb xq'uebal li rak'eb chirixeb chi najt rok nak neque'bec re xc'utbal nak cuanqueb xcuانquil. Eb a'an neque'cuulac chiru nak te'q'uehek' xlok'al sa' eb li be. Ut nak cuanqueb sa' li cab li neque'xch'utub cui' ribeb, neque'cuulac chiruheb c'ojlac toj chi ubej. Ut nak neque'boke' sa' junak nink'e, neque'cuulac chiruheb chunlác sa' li mex li neque'chunla cui' li cuanqueb xcuانquil. **47** Ut neque'xmak' li c'a'ru cuan reheb li xmålca'an. Ut najt rok lix tijeb neque'xbanu nak neque'tijoc chiruheb li tenamit re xmukbal li mausilal li neque'xbanu. Eb a'an k'axal ra te'xtoj cui' li mäc neque'xbanu, chan li Jesús.

21

Li xmålca'an neba' nabal quixq'ue chiru li que'xq'ue li biom

1 Sa' jun li cutan li Jesús cuan sa' li templo ut quiril nak eb li biom yoqueb chixq'uebal lix mayejeb sa' li cax. **2** Ut quiril ajcui' nak jun li xmålca'an neba' quixq'ue sa' li cax cuib li tumin cobre chok' xmayej. **3** Ut li Jesús quixye: —Relic chi yal ninye ere nak li xmålca'an neba' nabal xq'ue chiru li que'xq'ue li biom, **4** xban nak chixjunileb a'an xe'xq'ue li x-ela'an chiruheb. Abanan li ixtk a'in, usta neba', xq'ue chixjunil li jo' nimal cuan re, li re raj xnumsinqul li cutan junjunk.

Tacuulak xk'ehil nak tajuq'uik li templo

5 Cuanqueb li yoqueb chi atinac chirix lix ch'ina'usal li templo. Yoqueb chixyebal: —C'ajo' xchak'al ru li pec li yib'anbil cui' li templo jo' ajcui' li mayej li que'xq'ue chok' xsahob ru, chanqueb. Ut li Jesús quixye reheb: **6** — Tacuulak xk'ehil nak tasachek' ru chixjunil li yoquex chiribal anakcuan. Ma jun reheb li pec a'an tacanak sa' xna'aj chi inc'a' ta tajuq'uik, chan li Jesús.

Li c'a'ru talajc'ulmank nak ac cuulac re xk'ehil li roso'jic li ruchich'och'

⁷ Que'xpatz' re: —At tzolonel, ¿jok'e tac'ulmank li yocat chixyebal? ¿C'a'ru retalil tacuank nak talajc'ulmank li c'a'ak re ru a'in? chanqueb. ⁸ Li Jesúz quixye reheb: —Chebanu cuent re nak inc'a' texbalak'ik xban nak nabal te'chalk chi balak'inc ut te'xye nak sa' inc'aba' lain xe'chal. Te'xye, "Lain li Cristo li yechi'inbil xban lí Dios" cha'keb. Ut te'xye, "Anakcuan xcuulac xk'ehil." cha'keb. Abanan mepab li c'a'ru te'xye eb a'an. ⁹ Nak terabi nak yo li plet ut li ch'a'ajquial yalak bar, mexxucuac xban nak tento nak tac'ulmank chi jo'can. Abanan moco ac a'an ta roso'jiqueb li cutan, chan li Jesúz. ¹⁰ Ut quixye ajcui': —Nabal li tenamit te'pletik riq'uin jalan chic tenamit. Ut eb li acuabej te'xpleti ribeb. ¹¹ Talajcuank hic sa' nabal chi na'ajej ut tacuank cue'ej ut yajel. Tacuank n̄ink'i raylal ut xucuajel rilbal li retalil li talajc'utunk sa' choxa. ¹² Abanan nak toj maji' nac'ulman chixjunil li c'a'ak re ru a'in, texchapek' ut texrahobtesik. Texc'amek' sa' li cab li neque'xch'utub cui' ribeb laj judío ut texc'amek' sa' tz'alam. Texc'amek' chiruheb li rey ut eb laj rakol atin sa' inc'aba' lain. ¹³ Ut a'an tac'anjelak ere re xch'olobanquil resil li colba-ib. ¹⁴ Q'uehomak bi' sa' ech'ol a'in, nak moco toj yokex ta chixc'oxlanquil chanru texsumenç cui' re xcolbal erib, ¹⁵ xban nak lain tinq'ue ena'leb ut tinc'ut cheru c'a'ru teye. Ut eb li xic' neque'iloc ere inc'a' te'ruk chixcuech'bal rix li c'a'ru teye, chi moco te'xnau xsumenquil. ¹⁶ Texk'axtesik sa' ruk'eb li xic' neque'iloc ere xbaneb le na' eyucua' ut xbaneb le ras ut le ritz'in ut eb le rech'alal jo' eb ajcui' le ramig. Ut cuan li cuanqueb sa' eyank li te'camsik. ¹⁷ Ut xic' tex-ilek' xbaneb chixjunileb li tenamit sa' inc'aba' lain. ¹⁸ Abanan mac'a' tec'ul. ¹⁹ Cui inc'a' nach'inan ech'ol sa' le p̄abal usta yokex chi c'uluc raylal terechani li junelic yu'am. ²⁰ Nak teril li tenamit Jerusalén sutsuk xbaneb li q'uila soldado, laex tenua nak ac xcuulac xk'ehil li roso'jic. ²¹ Ut eb li cuanqueb sa' li na'ajej Judea che'elelik sa' junpat ut che'xicak sa' eb li tzul. Eb li cuanqueb sa' li tenamit Jerusalén che'elk aran ut eb li cuanqueb sa' c'alebal inc'a' chic te'suk'ik sa' li tenamit. ²² Ut sa' eb li cutan a'an, li Dios tixq'ueheb chixtojbal rixlix maqueb li xic' neque'iloc re. Chi jo'can tatz'aklok ru chixjunil li tz'ibánbil retalil sa' li Santil Hu. ²³ K'axal ra cui'chic chok' reheb li yaj aj ixt ut li yoqueb chi tu'resink sa' eb li cutan a'an, xban nak ma ca'ch'in li raylal te'x'ul li tenamit a'an xban nak yok xjosk'il li Dios sa' xbeneb. ²⁴ Cuan li te'camsik riq'uin ch'ich' ut cuan li te'chapek' ut te'c'amek' chi prexil sa' eb li jalant tenamit. Ut li tenamit Jerusalén taçanak rubel xcuanguileb li mācu'a'eb aj judío toj taçuuulak xk'ehil nak li Dios tarisiheb lix cuanquileb li mācu'a'eb aj judío, chan li Jesúz. ²⁵ Ut tacuank retalil chiru li sak'e, li po ut eb li chahim. Ut eb li cuanqueb sa' ruchich'och' te'yot'ek' ut te'sach xch'oleb xban lix yab ut lix cau ok li palau. ²⁶ Te'luctak li cuink xbaneb xxiu nak yokeb chixc'oxlanquil li raylal li tachalk sa' ruchich'och'. Ut taec'ank sa' xna'a'j li choxa. ²⁷ Chirix a'an teril nak lain li C'ajolbej yokin chak chi chalc sa' choxa riq'uin lix nimal incuanquilar ut inlok'al. ²⁸ Nak acak xticla xc'ulbal chixjunil li c'a'ak re ru a'in, cacuubresihomak ech'ol ut yo'on cuankex. Chisahok' sa' ech'ol xban nak cuulac re xk'ehil nak texcolek', chan li Jesúz.

Lijaljoquil ru atin chirix li jun ton chi higo

²⁹ Ut quixye jun chic li jaljoquil ru atin reheb. Quixye: Cheq'uehak retal li jun ton chi higo ut chixjunileb li che'. ³⁰ Nak nak unk'ut chak lix xak li che' chi elc, riq'uin a'an nequeq'ue retal nak yo chak chi nach'oc li sak'ehil. ³¹ Jo'can ajcui' laex nak teril nak yok chi c'ulmanc chixjunil li c'a'ak re ru a'in, a'an retalil nak yo chak chi nach'oc lix nimajcual cuanquilar li Dios. ³² Relic

chi yal ninye ere nak inc'a' t̄aosok' li tenamit a'in chi toj maji'ak nac'ulman chixjunil li c'a'ak re ru a'in. ³³ Li choxa ut li ruchich'och' talaje'osok'. Abanan li cuatín inc'a' tacanak yal chi jo'can chi inc'a' ta tac'ulmank li c'a'ru naxye. ³⁴ Chenuahak xcolbal erib. Meq'ue erib chi alec riq'unin li numcua'ac ut li calac, chi moco riq'unin xc'oxlanquil chanru tenumsi li cutan junyunk. Mare anchal tacuulak xk'ehil li cutan a'an chi mac'a' sa' ech'ol. ³⁵ Tachalk chi mac'a' sa' ech'ol jo' nak naq'ueman junak ra'al chi ma ani nana'oc re. ³⁶ Jo'can ut yo'on cuankex ut junelic chextijok re nak cauhak ech'ol chixcuybal xnumsinquil li raylal li tachalk sa' eben, ut re nak taruk texcuulak cuiq'unin lain li C'ajolbej, chan li Jesús. ³⁷ Rajlal cutan li Jesús naxch'olob xyalal chiruheb sa' li templo ut nak na-ecuu, naxic sa' li tzul Olivos chixnumsinquil li k'ojojin. ³⁸ Ut chixjunileb li tenamit neque'xxic sa' li templo rajlal ek'ela chirabinquil li c'a'ru naxye li Jesús.

22

Laj Judas Iscariote quixye rebeb nak tixk'axtesi li Jesús sa' ruk'eb laj judío

¹ Yo chi cuulac xcutanquil li nink'e nak neque'xcua' li caxlan cua mac'a' xch'amal. Pascua nayeman re li nink'e a'an. ² Eb lix benil aj tij ut eb laj tz'ib yoqueb chixsic'bal chanru nak taruk te'xcamsi li Jesús. Abanan yoqueb xc'a'ux xban nak inc'a' que'raj xchik'bal xjosk'ileb li tenamit. ³ Laj Judas Iscariote jun rebeb lix cablaju chi xtzolom li Jesús. A'an quixq'ue rib chi alec xban laj tza. ⁴ Co riq'uineb li xbenil aj tij ut riq'uineb li neque'c'ac'alen re li templo chixyebal rebeb nak tixk'axtesi li Jesús sa' ruk'eb. ⁵ Que'saho' xch'oleb chirabinquil li quixye ut que'xyech'i xtumin. ⁶ Ut quixc'ul xch'ol laj Judas li quiyeh'e re. Jo'can nak qui-oc xsic'bal jok'e taruk tixk'axtesi li Jesús sa' ruk'eb chi inc'a' te'xnau li q'ula tenamit.

Li Jesús quicua'ac rochbeneb lix tzolom re xnumsinquil li nink'e Pascua

⁷ Quicuulac xk'ehil li nink'e Pascua nak neque'xcua' li caxlan cua mac'a' xch'amal. Sa' li nink'e a'an tento nak te'xcamsi junak li carner. ⁸ Li Jesús quixye rebeb laj Pedro ut laj Juan: —Ayukex ut cauresihomak chak li tzacaemk re li pascua re totzacanq, chan. ⁹ Que'xpatz' re: —¿Bar tacuaj takacauresi chak?— ¹⁰ Li Jesús quixye rebeb: —Nak tex-oc sa' li tenamit, aran tetau jun li cuink yo chixc'ambal jun cuc xha'. Tetake a'an toj sa' li cab bar tox-ocak cui'. ¹¹ Ut teye re laj echal cab, "Chan laj tzolonen, ¿bar cuan li na'ajej li tacu'a'ak cui' sa' li nink'e Pascua rochbeneb lix tzolom?" cha'akex re. ¹² Ut a'an tixc'ut cheru jun nimla na'ajej takec' sa' xca' tasalil li cab. Ac yibanbil li na'ajej. Ut aran tecauresi li nink'e chok' ke, chan li Jesús. ¹³ Que'coeb sa' li tenamit ut qui-uxman jo' quixye li Jesús. Ut aran que'xcauresi li nink'e Pascua. ¹⁴ Nak quicuulac x-qril, li Jesús quic'oja sa' li mex rochbeneb lix tzolom. ¹⁵ Ut quixye rebeb: —C'ajo' nak yoquin chixrahinquil ru nak tocua'ak cuochbenex sa' li nink'e a'in nak toj maji' nincam. ¹⁶ Relic chi yal ninye ere nak inc'a' chic tinbanu li nink'e Pascua toj tacuulak xk'ehil nak tinbanu cui'chic sa' lix nimajcual cuanquilar li Dios, chan. ¹⁷ Ut quixchap li sec' re uc'ac. Quixbantioxi chiru li Dios ut quixye: —C'ulumak a'in ut jeq'uihomak sa' eyank li cuan chi sa', ¹⁸ xban nak lain tinye ere nak chalen anakcuan inc'a' chic tincuuc' xya'al li uva toj tacuulak xk'ehil nak tincuuc' cui'chic sa' lix nimajcual cuanquilar li Dios, chan. ¹⁹ Ut quixchap li caxlan cua, quixbantioxi chiru li Dios, tojo'nak quixjachi ut quixq'ue rebeb lix tzolom ut quixye: —A'an a'in lin tz'ejcual, k'axtesinbil re camsjc sa' ec'aba'

laex. Chebanuhak re xjulticanquil lin camic, chan. ²⁰ Jo'can ajcui' quixbañu nak ac xrake' chi cu'a'ac. Quixchap li sec' re uc'ac ut quixye: —A'an a'in retaliil li ac' contrato li t̄axakabāk xcuانquil riq'un lin quiq'uel li tahoyek' nak tincamsik sa' ec'aba' laex, chan. ²¹ Ut quixye ajcui' li Jesús: —Nacuaj nak tenau nak li cuink li tak'axtesink cue yo chi cu'a'ac sa' mex cuochben. ²² Tento nak tincamsik lain li C'ajolbej. Abanan raylal cuan sa' xben li cuink li tak'axtesink cue, chan li Jesús. ²³ Ut eb a'an que'oc chixpatz'inquil chi ribileb rib ut que'xye: —¿Ani anchal li tak'axtesink re? chanqueb.

Que'xcuech'i rix ani k'axal nim xcuانquil

²⁴ Eb lix tzolom li Jesús que'oc chixcuech'inquil rix chi ribileb rib ani tana sa' xyānkeb nimak xcuانquil. ²⁵ Li Jesús quixye reheb: —Eb li rey li cuanqueb sa' ruchich'och' cuanqueb xcuانquil sa' xbeneb li tenamit. Eb a'an neque'raj nak chabil tayehék' chirixeb. ²⁶ Abanan laex inc'a' tebanu chi jo'can. Li ani naraj xcuانquil sa' eyank, tento nak tixcubsi rib ut tac'anjelak cheru. Li ani taraj c'amoc be sa' eyank, tento nak tixcubsi rib ut tac'anjelak cheru. ²⁷ ¿Anili k'axal nim xcuانquil nak nequec'oxla laex? ¿Ma li nac'oja sa' mex, malaj ut li nac'anjelac chiru? ¿Ma maqua' ta bi' li ani nac'oja sa' mex? Lain cuan incuanquil, aban cuanquin sa' eyank jo' jun aj c'anjel cheru. ²⁸ Laex xecuy cuochbeninquil sa' li ra xic' xinc'ul. ²⁹ Jo'can nak ting'ue ecuanquil laex jo' nak xq'ue incuanquil lain lin Yucua'. ³⁰ Laex texcua'ak ut tex-uc'ak sa' lin mex nak cuankin sa' lin cuanquil. Ut laex texc'ojalak sa' le'cojaribal ut texrakok qatín sa' xbeneb li cablaju xtepaleb laj Israel, chan li Jesús.

Li Jesús quixye nak tatz'ektanak xban laj Simón Pedro

³¹ Ut quixye li Kacua': —At Simón, laj tza ac xpatz' xlesens re nak tixyal rix le pabal jo' nak nachik'e' ru li trigo re risinquel li rix. ³² Abanan lain xintijoc chācuix re nak inc'a' t̄acanab la pabal. Ut nak tatsuk'ik cui'chic cuiq'unin, taq'ue xcacuilal xch'oleb la cuech aj pabanelil, chan li Jesús. ³³ Ut laj Pedro quixye re: —At Kacua', lain cau inch'ol chatakenquil usta tine'xq'ue sa' tz'alam malaj ut tine'xcamsi acuochben, chan. ³⁴ Ut li Jesús quixye re: —At Pedro, lain ninye acue, anakkuan ajcui' nak toj maji' nayabac laj tzo' xul, laat ac xaye oxib sut nak inc'a' nacanau cuu, chan. ³⁵ Ut quixye cui'chic reheb lix tzolom: —Nak quexintakla chi mac'a' ebols, chi mac'a' xna'aj etumin, chi mac'a' exab, ¿ma cuan ta bi' c'a'ru xpalto' ere? Ut eb a'an que'xye: —Mac'a' quipalto' ke. ³⁶ Quixye cui'chic li Jesús reheb: —Ut anakkuan li ani cuan xbols, xc'amak chirix jo' ajcui' xna'aj liz tumin. Ut li ani mac'a' xch'ich', tixc'ayi liz chaquet ut xllok ak xch'ich' chiru li tumin a'an. ³⁷ Relic chi yal ninye ere nak tento tatz'aklok ru li c'a'ru tz'ibánbil chicuix sa' li Santil Hu, li naxye chi jo'ca'in: Quiq'uehe' sa' ajl sa' xyānkeb li inc'a' useb xna'leb. Tento nak tac'ulmank li c'a'ru tz'ibánbil retaliil chicuix, chan. ³⁸ Eb a'an que'xye: —Kacua', cuan arin cuib li ch'ich', chanqueb. Ut li Jesús quixye: —Tz'akal li xeye. Mex-qtinac chic.

Nak quitijoc chak li Jesús aran Getsemani

³⁹ Li Jesús qui-el aran ut co sa' li tzul Olivos, jo' c'aynak xbanunquil. Ut eb lix tzolom que'xtake. ⁴⁰ Nak quicuulac sa' li na'ajej a'an, quixye reheb lix tzolom: —Chextijok re nak inc'a' teq'ue erib chi alec, chan. ⁴¹ Ut li Jesús quirisi rib sa' xyānkeb jo' na xnajtil nacute' cui' junak pec. Ut aran quixcuik'ib rib chi tijoc. ⁴² Quixye: —At inyucua', cui laat tacuaj, inc'a' raj tinc'ul li raylal a'in. Abanan chi-uxmank li c'a'ru nacacuaj laat ut macua'

li nacuaj lajin, chan. ⁴³ Ut quichal jun li ángel sa' choxa ut quixq'ue xcacuil xch'ol. ⁴⁴ Nak yo chi yot'ec' xch'ol, quitijoc cui'chic li Jesús chi k'axal anchal xch'ol ut lix tikob yo chi tz'ukuc sa' ch'och' chi ninki tz'ukul chanchan quic'. ⁴⁵ Nak quirake' chi tijoc, quicuaci ut co riq'uineb lix tzolom. Quiril nak yoqueb chi cuarc xban nak k'axal ra sa' xch'oleb. ⁴⁶ Ut li Jesús quixye reheb: —C'a'ut nak yoquex chi cuarc? Cuaclinkex ut tijonkex re nak inc'a' teq'ue erib' chi alec, chan reheb.

Li Jesús quichape' ut quic'ame' chi prexil xbaneb laj c'amol be sa' xyankeb laj judío

⁴⁷ Toj yo ajcui' chi atinac li Jesús nak que'cuulac li q'uila tenamit. Laj Judas, a'an yo chi c'amoc be chiruheb. A'an jun reheb lix tzolom cablaju. Quijiloc chixc'atk li Jesús re nak tarutz' ru. ⁴⁸ Ut li Jesús quixye re: —At Judas, ¿ma tacuutz' cuu re ink'axtesinquil, lajin li C'ajolbej? chan re. ⁴⁹ Ut li cuanqueb rochben que'ril li c'a'ru yo chixbánunquil ut que'xpatz' re: —Kacua', ¿ma takaq'ueheb chi ch'ich'? chanqueb. ⁵⁰ Ut jun reheb quixyoc' lix xic lix mos li xyucua'il aj tij ut quirisi lix xic li cuan sa' xnim. ⁵¹ Li Jesús quixye: —Canabomak xbanunquil a'an, chan. Ut quixch'e' riq'uin ruk' lix xic li cuink ut quixq'uirtesi. ⁵² Ut quixye reheb li xbenil aj tij, ut eb li neque'taklan sa' fi templo, jo'queb ajcui' li neque'c'amoc be, li que'chal chixchapbal: —¿Ma lajin ta bi' aj elk' nak xexchal chinchapbal riq'un che' ut riq'un ch'ich'? ⁵³ Rajlal cutan cuanquin sa' eyank chetzelbal sa'li templo ut inc'a' quinechap aran. Abanan anakcuan xcuulac xk'ehil nak tebanu li c'a'ru teraj laex riq'un xcuquil laj tza, chan li Jesús.

Laj Pedro quixye oxib sut nak inc'a' naxnau ru li Jesús

⁵⁴ Que'xchap li Jesús ut que'xc'am sa' rochoch li xyucua'il aj tij. Ut laj Pedro yo chixtakenquil chi najt. ⁵⁵ Que'xtz'ab jun li xam chiru nebal, ut quilaje'e'c'oja chire xam, ut quic'oja ajcui' laj Pedro sa' xyankeb. ⁵⁶ Ut jun li mos ijk quiril laj Pedro c'ojo'c'o chire xam. Quixca'ya ut quixye: —Li cuink a'in, a'an jun reheb li neque'ochbenin re li Jesús, chan. ⁵⁷ Abanan laj Pedro quitic'ti'ic ut quixye: —At ijk, lajin inc'a' ninnau ru ani li nacaye, chan. ⁵⁸ Junpat na chic nak jun li cuink qui-iloc re laj Pedro ut quixye: —Laat jun xcomoneb a'an, chan re. Ut laj Pedro quixye: —At cuink, macua' lajin xcomoneb, chan. ⁵⁹ Ac xnume' na chic jun or, nak jun chic li cuink quixye: —Relic chi yal nak li cuink a'in, a'an jun reheb li que'ochbenin re li Jesús. Li cuink a'in aj Galilea, chan. ⁶⁰ Ut laj Pedro quixye: —At cuink, inc'a' ninnau c'a'ru yocat chixyebal, chan. Ut toj yo ajcui' chi atinac laj Pedro nak quiyabac li tzo' xul. ⁶¹ Ut li Kacua' quixsuk'isi rib ut quixca'ya laj Pedro. Ut quinak sa' xch'ol laj Pedro li quiyeh'e' re xban li Kacua', "Toj mají' ajcui' nayabac li tzo' xul, nak laat ac xaye oxib sut nak inc'a' nacanau cuu." ⁶² Laj Pedro qui-el chirix cab ut c'ajo' nak quiyabac xban xrahil xch'ol.

Li Jesús quihobe' ut quisaq'ue' xbaneb li soldado aj Roma

⁶³ Eb li cuink li yoqueb chi c'ac'alenc re li Jesús, que'xhob ut que'xsac'. ⁶⁴ Que'xbac' chi t'icr li xnak' ru re nak inc'a' tajilok, que'xsac' ut que'xye: —K'ehi ani xsac'oc ącue, chanqueb re. ⁶⁵ Ut nabal chic c'a'ak re ru que'xye re xhobbal li Jesús.

Li Jesús quic'ame' chiruheb li neque'taklan sa' xbaneb laj judío

⁶⁶ Nak quicutano', que'xch'utub ribeb li neque'c'amoc be sa' xyankeb li tenamit ut eb li xbenil aj tij jo' eb ajcui' laj tz'jb. Ut que'xc'am li Jesús riq'uineb li neque'taklan sa' xbaneb laj judío. Ut que'xye re: ⁶⁷ —Ye ke. ¿Ma laat li Cristo,

laj Colonel li yechi'inbil xban li Dios? chanqueb. Ut li Jesús quixye reheb: —Cui tinye erek nak laín, inc'a' ajcui' raj tēpab, chan. ⁶⁸ Ut cui tinpatz'ok ere, inc'a' aj raj cui' tesume li c'a'ru tinpatz', chi moco tinerach'ab. ⁶⁹ Ut chalen anakcuan laín li C'ajolbej tinc'ojlak sa' xnim uk'li nimajcual Dios, chan. ⁷⁰ Ut chixjunileb que'xye re: —¿Ma laqt li Ralal li Dios chi jo'canan? Ut li Jesús quichak'oc ut quixye: —Yal li xeye nak laín, chan. ⁷¹ Ut chixjunileb que'xye: —¿C'a' chic ru aj e nak toj te'xye ke c'a'ru xmäc? Riq'uin kaxic xkabi'li c'a'ru xye, chanqueb.

23

Li Jesús quic'ame' chiru laj Pilato re tixrak atin sa' xben

¹ Ut chixjunileb li neque'taklan sa' xyankeb laj judío que'xc'am li Jesús riq'uin laj Pilato. ² Que'oc chixjitbal ut que'xye: —Xkaq'ue retal nak li cuink a'in yo chixpo'bal xch'oleb li katenamit. Nocoxk'us riq'uin xq'uebal li katoj re li acuabej. Ut naxye nak a'an li Cristo laj Colonel li yechi'inbil xban li Dios. Naxye nak a'an rey, chanqueb. ³ Laj Pilato quixye re li Jesús: —¿Ma laqt lix reyeb laj judío? Li Jesús quichak'oc ut quixye: —Yal li xaye nak laín, chan. ⁴ Ut laj Pilato quixye reheb li xbenil aj tij ut eb li q'uila tenamit: —Li cuink a'in ma jun xmäc nintau, chan. ⁵ Abanan eb a'an yalyoqueb xk'e chixyebal: —Naxpo' xch'oleb li katenamit. Yo chixc'utbal lix tibleb chiruheb sa' chixjunil Judea. Quixtiquib chak Galilea ut xc'ulun toj arin, chanqueb.

Li Jesús quic'ame' chiru laj Herodes re nak tixrak atin sa' xben

⁶ Nak laj Pilato quirabi nak que'xpatz' Galilea, quixpatz' reheb: —¿Ma Galilea xtenamit li cuink a'in? chan reheb. ⁷ —Aj Galilea, chanqueb re. Nak laj Pilato quixnau nak li Jesús quichal chak sa' li na'ajej li cuan rubel xtakl laj Herodes, quixtakla riq'uin laj Herodes xban nak sa' eb li cutan a'an laj Herodes cuan aran Jerusalén. ⁸ C'ajo' nak quisaho' xch'ol laj Herodes nak quiril ru li Jesús xban nak ac junxil quiraj raj rilbal ru. Quirabi resil li c'a'ru yo chixbānunquil li Jesús ut quiraj rilbal nak tixbānu junak milagro chiru. ⁹ Nabal li c'a'ak re ru quilajxpatz' re ut li Jesús chi tíc inc'a' quichak'oc. ¹⁰ Cuanqueb aran eb li xbenil aj tij ut eb laj tz'ib. C'ajo' lix josk'ileb nak yoqueb chixjitbal. ¹¹ Laj Herodes ut eb li soldado que'xtz'ektana ut que'xhob. Que'retz'u ut que'xq'ue li chabil t'icr chirix jo' neque'rocsí li rey. Ut laj Herodes quixtakla cui'chic riq'uin laj Pilato. ¹² Junxil xic' que'r'il ribeb laj Herodes ut laj Pilato. Abanan sa' eb li cutan a'an que'xc'am cui'chic rib sa' usilal.

Laj Pilato quixye nak mac'a' xmäc li Jesús abanan quitenebac camc sa' xben

¹³ Ut laj Pilato quixch'utubeb li xbenil laj tij, ut eb li neque'taklan sa' li tenamit jo'queb ajcui' chixjunileb li tenamit. ¹⁴ Quixye reheb: —Læx xec'am chak li cuink a'in cui'uin ut xeye nak naxpo' xch'oleb li tenamit. Lain xinpatz'i re cheru ut inc'a' xintau junak xmäc jo' yoquex chixyebal læx. ¹⁵ Chi moco laj Herodes xtau junak xmäc. Jo'can nak xtakla cui'chic chak arin cuiq'uin. Anakcuan laín ninnau nak ma jun mac xbanu xc'ulub cui' camc. ¹⁶ Tintakla xq'uebal xlob, tojo'nak tincuach'ab, chan laj Pilato. ¹⁷ Sa' li nink'e a'an c'aynakeb nak na-ach'abac junak li prex. ¹⁸ Ut chixjunileb li tenamit que'xye chi junajeb xyab xcuxeb: —¡Camsi a'an, ut ach'ab laj Barrabás! chanqueb. ¹⁹ Laj Barrabás cuan sa' tz'alam xban li camsinc quixbānu nak yoqueb chi pletic li tenamit chirix li acuabej. ²⁰ Laj Pilato quiraj raj rach'abanquil li Jesús ut quixpatz' cui'chic reheb ma taruk tārach'ab li Jesús.

21 Abanan eb li tenamit que'xjap reheb chixyebal: —¡Q'ue chiru cruz! ¡Q'ue chiru cruz! chanqueb. **22** Ut laj Pilato quiqtinac cui'chic rox sut riq'uineb ut quixye: —¿C'a'ru tz'akal xmac ere? Ma jun xmac nintau lajn re nak tintakla chi camsic. Lajn tintakla xsac'bal ut tincuach'ab, chan reheb. **23** Abanan eb a'an k'axal cau cui'chic que'xjap re chixyebal: —¡Q'ue chiru cruz! —Japjoqueb re li tenamit jo' eb ajcui' laj tij toj retal quixbanu laj Pilato li c'a'ru que'raj. **24** Ut laj Pilato quixteneb camc sa' xbən li Jesús jo' que'raj li tenamit. **25** Ut quirach'ab laj Barrabás li quiq'uehe' sa' tz'alām xban li pletic ut camsinc quixbanu chirix jun li acuabej. Ut quixk'axtesi li Jesús sa' ruk'eb re te'xbənū li c'a'ru te'raj riq'uin.

Li Jesús quiq'uehe' chiru cruz

26 Eb li tenamit que'xc'am li Jesús ut nak yoqueb chi xic que'xc'ul jun li cuink aj Simón xc'aba' yo chi chalc sa' c'alebal. Cirene lix tenamit. Ut que'xmin ru chixpakonquil li cruz re xtenk'anquil li Jesús. **27** Nabaleb li tenamit yoqueb chi takēnc re. Ut cuanqueb ajcui' ixx k'axal ra sa' xch'oleb. Yoqueb chi yabac xban li c'a'ru yo chixc'ulbal li Jesús. **28** Ut li Jesús quixsuk'isi rib ut quirileb li ixx. Quixye reheb: —Ex ixx aj Jerusalén, mexyabac chicuix lajn. Chexyəbak ban cherix lajex ut chirixeb ajcui' le ralal ec'ajol. **29** Täcuulak xk'ehil nak eb li tenamit a'in te'xye, “Us xak reheb li ixx li inc'a' neque'q'uiresin ut li inc'a' neque'tu'resin.” **30** Ut te'xye ajcui' reheb li tzul, “T'anekekex chak sa' kabən ut choemuk taxak”, cha'keb. **31** Cui jo'ca'in te'xbənū cuiq'uin lain li chanchanin jun ton chi che' rax rax ru, ¿c'a'ru inc'a' te'xbənū ere lajex li chanchanex chaki che'? chan li Jesús. **32** Que'xc'am ajcui' rochben li Jesús cuibeb li cuink li cuanqueb xmac re te'camsik rochben li Jesús. **33** Ut que'cuulac sa' li na'ajej Gólgota xc'aba'. Chi jalbil ru naraj naxye: Xna'aj Xbakel Xjolom Camenak. Ut aran que'xq'ue chiru cruz li Jesús. Ut que'xq'ue ajcui' chiru cruz li cuib chi cuink li cuanqueb xmac. Jun li cruz que'xq'ue sa' xnim uk' li Jesús ut li jun chic que'xq'ue sa' xtze. **34** Ut li Jesús quitijoc ut quixye: —At inYucua', cuy taxak xmaqueb li tenamit a'in xban nak inc'a' neque'xnau c'a'ru yoqueb chixbanunquil, chan. Ut eb li soldado que'bulic chirix li rak' re rilbal aní na tächanink re. **35** Eb li tenamit xakxoqueb aran chi iloc. Ut eb li neque'taklan sa' xbəneb li tenamit yoqueb chixhobbal li Jesús ut que'xye: —Jalan chic quixcoleb. Cui yal nak a'an li Cristo, li sic'bil ru xban li Dios, chixcolak rib xjunes, chanqueb. **36** Ut eb li soldado yoqueb ajcui' chixhobbal. Que'jiloc chixc'atk ut que'xyechi'i vinagre re. **37** Ut que'xye re: —Cui yal nak lajat lix reyeb laj judío, col acuib ajunes, chanqueb. **38** Chiru li cruz que'xq'ue jun retalil tz'ib'anbil sa' eb li atinobal griego, hebreo, ut latin, li naxye chi jo'ca'in:

A'an a'in lix reyeb laj judío.

39 Jun reheb laj māc li que'q'uehe' chiru cruz rochben, quixhob ajcui' li Jesús ut quixye: —Cui lajat li Cristo, col acuib lajat, ut choacol ajcui' ləo, chan re.

40 Abanan li jun chic quichak'oc ut quixk'us ut quixye re: —Chi moco lajat nacaxucua ru li Dios, usta juntak'et li raylal li yoco chixc'ulbal kochben a'an. **41** Relic chi yal nak ləo kac'ulub xc'ulbal li raylal a'in xban nak ləo cuan kamāc. Abanan li cuink a'in māc'a' junak māc xbanu, chan re. **42** Ut li cuink a'an quixye ajcui' re li Jesús: —At Kacua', chinjulticok' taxak acue nak tat-oc sa' la nimajcual cuanquilal, chan. **43** Ut li Jesús quixye re: —Relic chi yal tinye acue nak hon ajcui' cuankat cuiq'uin sa' li paraíso, chan re.

Lix camic li Jesús

⁴⁴ Tuktu cu'a'leb quik'ojoyino' sa' chixjunil li ruchich'och' ut toj sa' oxib or re ecuu quicutano' cui'chic. ⁴⁵ Nak quik'ojoyino' ru li sak'e, lix t'icrul li templo quik'iche' sa' xyi. ⁴⁶ Quiatinac li Jesús chi cau xyab xcux ut quixye: —At inYucua', sa' acuuuk' tink'axtesi lin musik', chan. Nak quixye a'an, qui-el xch'ol. ⁴⁷ Li capitán aj Roma quixq'ue retal li quic'ulman. Quixlok'oni li Dios ut quixye: —Relic chi yal nak li cuink a'in tic xch'ol, chan. ⁴⁸ Chixjunileb li q'ulla tenamat li cuanqueb aran chi iloc, que'xq'ue retal li c'a'ru quic'ulman. Que'suk'i sa' rochocheb ut yoqueb chixtenbal li re xch'ol chi ruk'eb nak yoqueb chi xic xban xrahil xch'oleb. ⁴⁹ Ut chixjunileb li neque'na'oc ru li Jesús, jo' eb ajcui' li ixx li que'taken chak re toj Galilea xakxoqueb chak chi najt ut yoqueb chirilbal chixjunil li c'a'ak re ru a'in.

Quimuke' li Jesús xban laj José aj Arimatea

⁵⁰ Quicuan jun li cuink aj José xc'aba'. Arimatea xtenamat li cuan sa' xcuént Judea. Laj José, a'an jun xcomoneb li neque'taklan sa' xbeneb laj judío. Tjc xch'ol ut chabil. ⁵¹ Inc'a' quixc'ul xch'ol li c'a'ru que'xc'ub ru xbanunquil re li Jesús, chi moco quixc'ul xch'ol nak que'xcamsi xban nak a'an yo chixyo'oninquil lix nimajcual cuanquilal li Dios. ⁵² Co riq'uin laj Pilato ut quixtz'ama chiru nak tixq'ue re lix tz'ejcual li Jesús re tixmuk. ⁵³ Jo'can nak quixcubsi chak li camenak chiru cruz, quixlan sa' li chabil t'icr lino ut quixq'ue sa' jun muklebal yibambil sa' jun sakonac. Toj ma jun mukbil aran. ⁵⁴ Chixjunil a'in quic'ulman sa' li cutan nak neque'xcauresi li c'a'ru reheb re li hilobal cutan xban nak ac cuulac re xcutanquil. ⁵⁵ Eb li ixx, li que'taken chak re li Jesús toj Galilea, que'xtake laj José ut que'r'il li muklebal li quimuke' cui' li camenak ut que'r'il ajcui' chanru nak quiq'uehe' sa' li jul. ⁵⁶ Que'suk'i sa' rochocheb ut que'xcauresi li sununquil ban re xbanbal li camenak, ut que'hilan sa' li hilobal cutan jo' naxye sa'lix chak'rabe.

24*Li Jesús quicuacli cui'chic chi yo'yo sa' xyankeb li camenak*

¹ Sa' li xben li cutan re li xaman, toj ek'ela chi us, coeb li ixx cuan cui' li muklebal. Que'xc'am li sununquil ban li que'xyib. Ut cuanqueb jalaneb chic ixx rochbeneb. ² Nak que'cuulac, que'r'il nak ac isinbil chic li nimla pec li natz'apoc re li muklebal. ³ Ut nak que'oc chi sa' li muklebal, inc'a' que'xtau li camenak. ⁴ Que'sach xch'oleb ut inc'a' que'xnau c'a'ru te'xbanu. Ut xakamil chiruheb cuib li cuink. Nalemtz'un li rak'eb. ⁵ C'ajo' nak que'xucuac li ixx. Que'xxulub li rilobal. Ut eb li cuink que'xye reheb: —¿C'a'ut nak nequesic' li yo'yo sa' xyankeb li camenak? ⁶ A'an ma ani chic arin. Ac xcuacli cui'chic chi yo'yo. Chijulticok' ere li c'a'ru quixye chak nak toj cuank chak Galilea. ⁷ Quixye nak tento ta'k'axtesik li C'ajolbej sa' ruk'eb li cuink aj mac. Taq'uehek' chiru cruz ut ta'camsik. Ut quixye ajcui' nak ta'cuaclik cui'chic chi yo'yo sa' xyankeb li camenak sa' rox li cutan, chanqueb. ⁸ Riq'uin a'an quinak sa' xch'oleb li ixx li c'a'ru quixye li Jesús. ⁹ Que'el sa' li muklebal ut coeb. Cole'xye resil chixjunil li c'a'ak re ru a'in reheb li junlaju ut reheb ajcui' li jun ch'ol chic. ¹⁰ Eb li ixx li que'yehoc re li esilal a'in reheb li apóstol, a'an eb lix María Magdala xtenamat, lix Juana ut lix María lix na' laj Jacobo rochbeneb li jun ch'ol chic li ixx. ¹¹ Abanan eb li junlaju chi apóstol inc'a' que'xpab li c'a'ru que'xye li ixx. Sa' xch'oleb a'an nak moco yal ta li yoqueb chixyebal. ¹² Abanan laj Pedro co sa' anil sa' li muklebal. Qui-iloc chi sa' ut

quiril nak ca'aj chic li t'icr lino cuan aran. Jo'can nak sachso xch'ol chi c'oxlac nak quisuk'i sa' rochoch.

Li Jesús quixc'utbesi rib chiruheb li cujnk nak yoqueb chi xic Emaús

13 Sa' ajcui' li cutan a'an, cuibeb lix tzolom li Jesús yoqueb chi xic sa'li ch'ina tenamit Emaús. Li tenamit a'an junlaju kilómetro na xnajtil riq'un Jerusalén. **14** Yoqueb chi atinac chi rilbileb rib chirix chixjunil li c'a'ak re ru quic'ulman sa' eb li cutan a'an. **15** Nak yoqueb chi atinac ut chixtz'ilbal rix chi ribileb rib li c'a'ru quic'ulman, li Jesús quijiloc riq'uineb ut qui-oc chi bec rochbeneb. **16** Usta que'ril ru, abanan inc'a' que'xnau nak a'an li Jesús xban nak cuan c'a'ru quiramoc re chiruheb. **17** Ut li Jesús quixye reheb: —¿C'a'ru chi aj ix yoquex chi serak'ic chi ribil ərib nak yoquex chi bec? ¿C'a'ut nak ra sa' ech'ol? chan reheb. **18** Jun reheb a'an, aj Cleofas xc'aba', quichak'oc ut quixye: —Jo' li ca'aj cui' laqat li yocat chi numec' sa'li tenamit Jerusalén li inc'a' nacatna'oc re li c'a'ru xc'ulman sa' eb li cutan a'in, chan. **19** Ut li Jesús quixye reheb: —¿C'a'ru anchal a'an? chan. Eb a'an que'xye re: —Chirix li Jesús aj Nazaret. A'an profeta nak quicuan. Nim xcuanyl. Chabil quixbanu ut chabil quixye chiru li Dios ut chiruheb li tenamit. **20** Eb li xb'enil aj tij ut eb li neque'taklan sa' kab'en que'xk'axtesi chi camsic ut que'xq'ue chiru cruz. **21** A'an raj li tacolok re li katenamit Israel sa' kach'ol. Abanan anakcuan ac oxib cutan xc'ulbal a'an. **22** Xsach kach'ol chirabinquil li c'a'ru xe'xye ke li ixl li xe'cuulac sa'li muklebal toj ek'ela. **23** Xban nak inc'a' xe'xtau li camenak, xe'suk'i sa' cab ut xe'xye ke nak cuib li ángel xe'xc'utbesi rib chiruheb ut xe'xye reheb nak yo'yo li Jesús. **24** Ut cuanqueb ajcui' kacomon xe'cuulac chak sa'li muklebal ut xe'r'il nak yal li xe'xye li ixl. Abanan inc'a' xe'r'il ru li Jesús, chan laj Cleofas. **25** Ut li Jesús quixye reheb: —¡Laex mac'a' ena'leb ut al le ch'ol chixpabankuil chixjunil li c'a'ru que'xye chak li profeta! **26** ¿Ma inc'a' ta bi' tento nak tixc'ul chixjunil li raylal a'in li Cristo laj Colonel li yechi' inbil xban li Dios re nak taq'uehek' xlok'al? chan reheb. **27** Ut quixch'olob xyalal chiruheb chirix li c'a'ru quixtz'iba laj Moisés. Quixch'olob ajcui' li xyalal li que'xtz'iba chak li profeta chirix li Cristo li yechi' inbil xban li Dios jo' tz'ibanbil sa'li Santil Hu. **28** Que'cuulac sa'li ch'ina tenamit li yoqueb cui' chi xic. Ut li Jesús quixbanu rib nak tic taxic. **29** Abanan eb a'an que'relaji ru re tacanak riq'uineb. Que'xye re: —Canakat kiq'un xban nak yo'chi ecuuc. Óc re li k'ojojin, chanqueb re. Ut li Jesús qui-oc sa' cab ut quicana riq'uineb. **30** Nak c'ojc'o sa' mex rochbeneb, quixchap li caxlan cua, quixbantioxi chiru li Dios, quixjachi ut quixq'ue reheb. **31** Sa'li honal a'an que'xq'ue retal nak a'an li Jesús. Ut nak ac xe'xnau nak a'an, nak que'r'il ac ma'ani chic sa' xyankeb. **32** Ut eb a'an que'xye chi ribileb rib: —Jo'can pe'nak yoco chak rec'anquil jun sahil ch'olej sa' kam nak yo'chak chikatinanquil sa'be ut nak yo'chixch'olobanquil chiku li naxye sa'li Santil Hu, chanqueb. **33** Sa' ajcui' li honal a'an que'suk'i Jerusalén. Aran que'xtau li junlaju chi apóstol ch'utch'uyqueb rochbeneb lix comon. **34** Yoqueb chixyebal: —Relic chi yal nak xcuagli cui'chic chi yo'yo li Kacua' xban nak xc'utbesi rib chiru laj Simón, chanqueb. **35** Tojo'nak li cuib chi cujnk que'xserak'i reheb li c'a'ru quic'ulman sa'be nak yoqueb chi xic Emaús. Que'xye reheb chanru nak que'xnau ru li Jesús nak quixjachi li caxlan cua.

Li Jesús quixc'utbesi rib chiruheb lix tzolom

36 Toj yoqueb ajcui' xserak'inquil li c'a'ru que'xc'ul nak ac xakamil li Jesús sa' xyankeb ut quixye reheb: —¡Chicuank taxak li tuktuquil usilal eriq'un!

chan reheb. ³⁷ Ut eb a'an sachsoqueb xch'ol que'cana ut te'xucuak. Sa' xch'oleb a'an nak märe junak musik'ej yoqueb chirilbal. ³⁸ Ut li Jesús quixye reheb: —¿C'a'ut nak nequexxucuac? Ut, ¿c'a'ut nak na-oc ec'a'ux? ³⁹ Lain li Jesús. Ilomak li cuok ut li cuuk'. Ch'e'omakin re nak teq'ue retal nak lain tz'akal. Junak musik'ej, a'an mac'a' xbakel, chi moco cuan xtibel. Ilomak. Lain cuan inbakel ut cuan intibel, chan reheb. ⁴⁰ Ut nak yo chixyebal a'in, quixc'ut li rok ut li ruk' chiruheb. ⁴¹ C'ajo' nak quisaho' sa' xch'oleb. Abanan toj sachsoqueb xch'ol. Inc'a' que'xnau ma yal li yoqueb chirilbal malaj ut inc'a'. Ut li Jesús quixye reheb: —Ma cuan ca'ch'inak tzacaemk eriq'uin? chan reheb. ⁴² Ut que'xq'ue re jun jachal li pombil car ut ca'ch'in li xya'al cab. ⁴³ Li Jesús quixc'ul ut quixtzaca. ⁴⁴ Ut quixye reheb: —Li c'a'ru xinc'ul, a'an ajcui' li quinserak'i chak ere nak toj cuanquin chak sa' eyank. Tento nak tatz'aklok ru chixjunil li tz'ib'anbil chak retalil chicuix sa' lix chak'rab laj Moisés, jo' ajcui' sa' lix hu eb li profeta ut sa' ajcui' li Salmos, chan reheb. ⁴⁵ Ut quixq'ueheb xna'leb re nak te'xtau ru li tz'ib'anbil sa' li Santil Hu. ⁴⁶ Quixye reheb: —Jo'ca'in tz'ib'anbil chak retalil sa' li Santil Hu chicuix lajin: tento nak li Cristo tixc'ul li raylal ut sa' rox li cutan tacuaclik cui'chic chi yo'yo sa' xyankeb li camenak. ⁴⁷ Tz'ib'anbil ajcui' retalil nak tajulticamán chiruheb chixjunileb li tenamit nak tento te'xyot' xch'oleb ut te'xjal xc'a'uxeb re tacuymank tasachmank llix maqueb sa' xc'aba' a'an. Taticlak xch'olobanquil arin Jerusalén. ⁴⁸ Laex texyehok resil xban nak laex xex-abin re ut laex xex-iloc re chixjunil li c'a'ak re ru a'in. ⁴⁹ Ut lain tintakla chak ere le mañan li quixyechi'i lin Yucua'. Abanan canaqek arin sa' li tenamit Jerusalén toj tec'ul le cuanquil li tachalk sa' choxa, chan li Jesús reheb.

Li Jesucristo quic'ame' cui'chic sa' choxa xban li Dios

⁵⁰ Ut li Jesús quixc'ameb toj sa' li tenamit Betania. Quixtaksi li ruk' ut quirosobtesiheb. ⁵¹ Nak yo chirosoobtesinquileb, quirisi rib sa' xyankeb ut quic'ame' takec' sa' choxa. ⁵² Nak ac xe'xlok'oni li Kacua', eb a'an que'suk'i cui'chic Jerusalén chi c'ajo' xsahil sa' xch'oleb. ⁵³ Ut junelic cuanqueb sa' li templo. Yoqueb chi bantioxinc ut yoqueb chixlok'oninquil li Dios. Jo'can taxak.

Li Resil li Colba-ib li Quixtz'iba li San Juan

Li Jesucristo quitz'ejcualo' ut quic'ulun sa'ruchich'och'

¹ Chalen chak sa' xticladic li ruchich'och' ac cuan chak li Atin. Li Atin cuan chak riq'uin li Dios ut a'an tz'akal Dios. Li Atin, a'an li Cristo. ² Li Cristo ac cuan chak sa' xticladic riq'uin li Dios. ³ Chixjunil li c'a'ru cuan, li Dios quixyib sa' xc'aba' li Cristo. Ut māc'a' c'a'ak re ru cuan chi mācua' a'an ta li quiyib'an re. ⁴ Li Cristo, a'an li naq'uehoc junelic yu'am. Ut li yu'am li naxq'ue naxcutanobresi lix c'a'uxeb li cristian. ⁵ Li Cristo naxcutanobresi lix c'a'uxeb li toj cuanqueb sa' xk'ojyinal ru li māc. Li māc inc'a' quinumta sa' xben li Cristo. ⁶ Quicuan jun li cuink aj Juan xc'aba' taklanbil chak xban li Dios. ⁷ Quitaklāc chak chixch'olobanquil xyālal nak li Jesūs, a'an li cutan saken re nak chixjunileb li ani te'abink re, te'pabank. ⁸ Li Cristo, a'an li tz'akal cutan saken. Mācua' laj Juan. Laj Juan quic'ulun chixch'olobanquil xyālal ani li tz'akal cutan saken. ⁹ A'an li tz'akal cutan saken li quic'ulun sa'ruchich'och' chixcutanobresinqul xc'a'uxeb chixjunileb li cristian. ¹⁰ Li Cristo quicuan sa'ruchich'och'. Abanan li cuanqueb sa'ruchich'och' inc'a' que'xq'ue retal chi tz'akal nak a'an li Cristo usta sa' xc'aba' a'an quiyibac li ruchich'och'. ¹¹ Quic'ulun sa' lix tenamit. Abanan inc'a' quic'ule' sa' xyālal xbaneb. ¹² Abanan chixjunileb li que'c'uluc re ut que'paban re nak a'an taklanbil chak xban li Dios, a'neb li quic'uleb chok' ralal xc'ajol li Dios. ¹³ Que'oc chok' ralal xc'ajol li Dios xban nak jo'can quiraj li Dios. Moco yal xc'a'ux cuink ta. Moco jo' ta nak nayo'la junak cristian arin sa'ruchich'och'. Yo'lajenakeb ban chic sa'musik'ej ut ralal xc'ajoleb chic li Dios. ¹⁴ Li Jesucristo quitz'ejcualo' ut tz'akal cuink nak quicuan arin sa' kayank. C'ajo' li rusilal ut a'an naxc'ut li xyālal. A'an li Ralal li Dios li junaj chi ribil ut lāo xkil lix lok'al. ¹⁵ Laj Juan laj Cubsihom Ha' quixch'olob xyālal chi cau xyāb xcux ut quixye: —A'an a'in li quinch'olob chak xyālal cheru nak quinye ère: Mokon tachālk jun k'axal nim xcuانquil chicuu lāin xban nak a'an ac cuan ajcui' chak junxil chicuu lāin, chan. ¹⁶ Xban xnimal rusilal, k'axal numtajenak li kosobtesinqul naxq'ue. ¹⁷ Li Dios quixq'ue li chak'rab re laj Moisés re nak tixc'ut chiku. Aban li xyālal chirix li Dios ut li rusilal quic'utbesi chiku li Jesucristo. ¹⁸ Ma' ani qui-iloc ru li Dios. Ca'aj cui' li Dios C'ajolbej, a'an tz'akal li cuan chi sum qatín riq'uin li Dios Acuabej. Ut a'an li quic'utbesin chiku chanru li Dios.

Laj Juan laj Cubsihom Ha' quixye nak a'an mācua' li Cristo li yechi'inbil xban li Dios

¹⁹ Eb laj judío li cuanqueb Jerusalén que'xtaklaheb laj tij ut eb laj levita chixpatz'bal re laj Juan, ut que'xye re: —¿Anihat lāat? ¿Ma lāat li Cristo li taklanbil chak xban li Dios? chanqueb re. ²⁰ Quichak'oc laj Juan ut quixye rebeb: —Lāin mācua'in li Cristo, chan. ²¹ Ut que'xye cui'chic re: —Ye ke anihat lāat. ¿Ma lāat laj Elías?— Quichak'oc laj Juan ut quixye: —Moco lāin ta, chan. —¿Ma lāat li profeta li tachālk? chanqueb cui'chic re. —Inc'a', chan laj Juan. ²² —Ye ke chi tz'akal anihat re nak taruk takaye rebeb li xe'taklan chak ke. Tento nak taye ke anihat, chanqueb. ²³ Quixye laj Juan: —Lāin li yoquin chixch'olobanquil li xyālal chiruhéb li cristian chi cau xyāb incux sa' li chaki ch'och' ut ninye resil li quixye li profeta Isaías:

Yibomak le yu'am ut yo'on cuankex chixc'ulbal li Kacua' jo' nak neque'xyib
li be re xc'ulbal junak li nim xcuanyl. (Is. 40:3)

24 Li que'taklac chi atinac riq'uin laj Juan, a'an xcomoneb laj fariseo.
25 Que'xye cui'chic re laj Juan: —¿C'a'ut nak nacatcubsin ha' cui mācua' laat li
Cristo, chi moco laat laj Elías, chi moco laat li profeta? chanqueb re laj Juan.
26 Quichak'oc cui'chic laj Juan ut quixye: —Lain nincubsin ha' riq'uin ha'.
Abanan cuan jun sa' eyank laex inc'a' nequenau chi tz'akal ani a'an. **27** A'an
li taqc chi c'anjal mokon. K'axal nim xcuanyl a'an chicuu lain. Moco
inc'ulub ta xbanunquil lix c'anjal a'an xban nak cubenak incuanquil. Jo'can
nak moco inc'ulub ta xhitbal xc'amat lix xab, chan. **28** Chixjunil a c'a'ak re ru
a'in quic'ulman sa' li na'ajej Betania li cuan jun pac'al li nima' Jordán, li yo
cui' chi cubsinc ha' laj Juan.

Laj Juan quixjuntak'eta li Jesús riq'uin jun li carner

29 Jo' cuulajak chic laj Juan quiril li Jesús yo chak chi chalc riq'uin ut quixye:
—Ilomak. Cue' chak li Cristo, li taklanbil chak xban li Dios. Chanchan jun
li carner. Taqcamsik re xtojbal rix lix maqueb li cuanqueb sa' ruchich'och'.
30 A'an a'in li quinatinam chak chirix nak quinye ere nak tachalk jun cuink
k'axal nim xcuanyl chicuu lain xban nak a'an ac cuan ajcu' chak junxil
chicuu lain. **31** Lain inc'a' ninnau nak a'an li Cristo. Abanan yoquin chi
cubsinc ha' re nak li Dios tixc'utbesi chiku lao aj Israel ani tz'akal li Cristo,
chan. **32** Laj Juan quixch'olob xyalal li c'a'ru quiril. Quixye: —Quicuil nak li
Santil Musik'ej quicube chak sa' choxa. Chanchan jun li paloma nak quicube
ut quihilan sa' xben li Jesús. **33** Inc'a' raj xinnau nak a'an li Cristo cui ta inc'a'
quicuil li quic'ulman. Xinnau nak a'an li Cristo xban nak li Dios li quitaklan
chak cue chi cubsinc ha' quixye cue, “Nak taq'uil li Santil Musik'ej chanchan
jun li paloma yok chi cubec ut tahilank sa' xben jun li cuink, a'an retaliil nak
a'an li taq'uehok ere li Santil Musik'ej”, chan li Dios. **34** Ut lain quicuil nak
quicube chak li Santil Musik'ej sa' xben li Jesús. Jo'can nak ninnau chi tz'akal
nak a'an tz'akal Ralal li Dios, chan laj Juan.

Laj Andrés ut laj Simón, a'aneb li xben li quixsiq'ueb ru chok' xtzolom li Jesucristo

35 Jo' cuulajak chic laj Juan cuan cui'chic chire li nima' Jordán rochben
cuibeb lix tzolom. **36** Nak quiril li Jesús yo chi numec' nach' cuanqueb cui',
laj Juan quixye: —Cue' chak li Cristo, li chanchan Carner q'uebil chak xban li
Dios, chan. **37** Ut eb lix tzolom cuib, nak que'rabi li quixye laj Juan, que'xtake
li Jesús. **38** Li Jesús quixakli ut quixsuk'isi rib. Quiril nak yoqueb chi xic chirix.
Quixye reheb: —¿C'a'ut nak yoqueb chintakenquil? ¿C'a'ru teraj? chan reheb.
Que'chak'oc eb a'an ut que'xye: —At tzolonej ¿bar nacathilan? chanqueb
re. **39** Quichak'oc li Jesús ut quixye reheb: —Yo'keb chichuix re nak tenau
bar ninhilan, chan li Jesús reheb. Jo'can nak que'coeb chirix ut que'r'il bar
nahilan. Ut que'cana riq'uin xban nak ac cahib or chic re ecuu. **40** Laj Andrés
li riq'z'in laj Simón Pedro, a'an jun reheb li cuib li que'abin re li c'a'ru quixye
laj Juan ut que'xtake li Jesús. **41** Nak ac x-atinac riq'uin li Jesús, ticto cq laj
Andrés riq'uin laj Simón ut quixye re: —Anakcuan xkatau li Mesías, chan.
(Chi jalbil ru naraj naxye “li Cristo li taklanbil chak xban li Dios”.) **42** Ut
quixc'am laj Simón riq'uin li Jesús. Li Jesús quiril a'an ut quixye re: —Laat
laj Simón li ralal laj Jonás. Anakcuan Pedro chic ac'aba'. —(Chi jalbil ru naraj
naxye “Pec”.)

Laj Felipe ut laj Natanael que'siq'ueb ru xban li Jesucristo

⁴³ Jo' cuulajak chic li Jesús quiraj xic sa li na'ajej Galilea. Quixtau laj Felipe ut quixye re: —Chinatake, chan. ⁴⁴ Laj Felipe, a'an Betsaida xtenamit. A'an ajcui' xtenamiteb laj Andrés ut laj Pedro. ⁴⁵ Laj Felipe ticto co' chixsic'bal laj Natanael ut quixye re: —Xkatau li Mesías li tz'ibánbil chak retalil sa' li chak'rab xban laj Moisés ut xbaneb li profeta. A'an li Jesús ralal laj José. Nazaret xtenamit, chan laj Felipe. ⁴⁶ Laj Natanael quixye re: —¿Ma cuan ta bi' junak chabil tachalk chak Nazaret? chan. Ut laj Felipe quixye re: —Yo'o rilbal re nak tapab, chan. ⁴⁷ Li Jesús quiril nak laj Natanael yo' chak chi chalc riq'uin ut quixye: —Cue' chak jun cuink tz'akal aj Israel. Chabil xna'leb. A'an inc'a' nabalak'ic, chan li Jesús. ⁴⁸ Laj Natanael quixye re li Jesús: —¿Chanru nacanau nak chabil inna'leb? chan. Li Jesús quichak'oc ut quixye re: —Xinnau chanru ana'leb nak cuancat rubel li jun ton chi higo nak toj maji' nacatxbok laj Felipe, chan. ⁴⁹ Quichak'oc laj Natanael ut quixye re: —At tzolonej, lajat li Ralal li Dios. Lajat lix Reyeb laj Israel, chan re li Jesús. ⁵⁰ Li Jesús quixye re: —Xapab nak lajin li Cristo xban nak xinye acue nak xinnau chanru la na'leb nak cuancat rubel li jun ton chi higo. Abanan toj cuan cui'chic xninkal ru na'leb talajacuil chiru a'in, chan li Jesús. ⁵¹ Ut quixye ajcui' reheb: —Relic chi yal tinye ere nak teril li choxa chi teto. Ut eb lix ángel li Dios yokeb chi takec' ut yokeb chi cubec cuanquin cui' lajin li C'ajolbej, chan li Jesús reheb.

2

Li Jesús quixc'utbesi lix cuanquil nak quixsuk'isi li ha' chok' vino sa' jun li sumlac

¹ Yo' chic rox cutan xc'ulbal a c'a'ak re ru a'in nak quicuan jun li sumlac sa' li tenamit Caná re Galilea. Cuan lix na' li Jesús aran. ² Ut quiboke' sa' li sumlac li Jesús rochbeneb lix tzolom. ³ Nak ac yo' li nink'e, qui-oso' li vino. Ut lix na' li Jesús quixye re: —Mac'a' chic li vino, chan re. ⁴ Ut li Jesús quixye re: —¿C'a'ut nak nacatchal xyebal cue a'an? Toj maji' xk'ehil nak tinc'utbesi lin cuanquil, chan re lix na'. ⁵ Lix na' li Jesús quixye reheb li yokeb chi c'anjelac: —Chebanuhak li c'a'ru tixye ere, chan. ⁶ Ut aran cuanqueb cuakib li ninki cuc yibanbil riq'uin pec. A'an nac'anjelac chok' xna'aj xha'eb laj judío re xch'ajobresinquel ribeb jo' naxye sa' lix chak'rabej. Li junjunk chi cuc a'an naxc'am oxib ninki cuc chi ha'. ⁷ Li Jesús quixye reheb li yokeb chi c'anjelac aran nak te'xnujtesi li ninki cuc riq'uin ha'. Ut eb a'an que'xq'ue li ha' sa' li cuc toj retal que'nujac. ⁸ Quixye cui'chic li Jesús reheb: —Lecomak ca'ch'inak ut tec'am riq'uin li najolomin re li nink'e, chan. Ut eb a'an que'xbanu jo' quiyeho' reheb xban li Jesús. ⁹ Li ha' ac suk'isnibil chok' vino xban li Jesús nak que'xc'am riq'uin li najolomin re li nink'e. A'an inc'a' quixnau bar ta xchal li vino. Ca'aj cui' eb laj c'anjal li que'lecoc chak re que'xnau. Li najolomin re li nink'e quixyal li vino. Tojo'nak quixbok li belomej ut quixye re: ¹⁰ —Chixjunileb li neque'nink'ejc xben cua neque'xjec' li chabil vino. Ut nak ac xe'uc'ac chi nabal li ula', neque'xjec' li inc'a' mas chabil. Abanan lajat xac'ula li chabil vino ut toj anakcuan xacuisi chak, chan re. ¹¹ A'an a'in li xben milagro li quixbanu li Jesús nak quixsuk'isi li ha' chok' vino aran Caná re Galilea. Riq'uin li milagro a'in quixc'utbesi nak cuan xcuanguil ut eb lix tzolom que'xpab nak li Jesús a'an li Ralal li Dios. ¹² Chirix chic a'an co Capernaum li Jesús rochben lix na' ut eb li rjitz'in. Que'coeb ajcui' lix tzolom ut que'cana aran cuib oxib cutan.

Li Jesús quirisiheb laj c'ay sa' li templo

¹³ Nak ac yo chi cuulac xk'ehil li Pascua, lix nink'e eb laj judío, li Jesús quicuulac Jerusalén. ¹⁴ Quicuulac sa' li templo ut aran quixtauheb li yoqueb chi c'ayinc boyx, carner ut paloma. Chunchuqueb ajcui' aran laj jalol ru tumin. ¹⁵ Li Jesús quixyib jun lix tz'um riq'uin c'am ut quixyolesiheb. Quirisiheb chixjunileb chixcab rochbeneb lìx xul. Quixpaji lix tumin eb laj jalol ru tumin ut quixballk'usí lix mexeb. ¹⁶ Quixye reheb li yoqueb chi c'ayinc paloma: —Isihomak chixjunil a'in sa' li templo. Mesuk'isi chok' c'ayil li rochoch lin Yucua', chan li Jesús reheb. ¹⁷ Tojo'nak quinak sa' xch'oleb lìx tzolom nak tz'ibánbil retalil sa' li Santil Hu li naxye chi jo'ca'in: Lain ninra la cuochoch ut naraho' sa' inch'ol nak neque'xbanu li inc'a' us sa' la cuochoch. (Sal. 69:9) ¹⁸ Ut eb laj judío que'xye re li Jesús: —¿C'a'ru retalil tac'ut chiku re nak takanau nak cuan acuanquil chirisinquileb sa' li templo? chanqueb re. ¹⁹ Quichak'oc li Jesús ut quixye reheb: —Juc'umak li templo a'in ut chiru oxib cutan tincuaclesi cui'chic chi ac', chan reheb. ²⁰ Eb laj judío que'chak'oc ut que'xye re li Jesús: —Chiru cuakib roxc'al (46) chihab que'cablac re xyibánquil li templo a'in. ¿Ma nacac'oxla laat nak yal chiru oxib cutan tacuaclesi cui'chic? chanqueb. ²¹ Abanan li Jesús inc'a' yo chi atinac chirix li templo. Yo ban chi atinac chirix lix camic ut lix cuaclijic cui'chic chi yo'yo. ²² Jo'can nak ac xcuaclí cui'chic chi yo'yo sa' xyankeb li camenak, que'nak sa' xch'oleb lìx tzolom li c'a'ru quixye li Jesús nak toj maji' nacam. Ut que'xpab li c'a'ru tz'ibánbil chak najter sa' li Santil Hu ut que'xpab ajcui' li c'a'ru quiyehe' reheb xban li Jesús.

Li Jesús naxnau chanru xna'leb li junjunk

²³ Nak li Jesús cuan aran Jerusalén chixnumsinquileb li nink'e Pascua, nabaleb que'paban re xban nak que'r'il li milagro li quilajxbanu. ²⁴ Abanan li Jesús inc'a' quixc'ojob xch'ol riq'uineb xban nak naxnau chanru lix c'a'uxeb. ²⁵ Inc'a' tento nak tach'olobák chiru chanru lix c'a'uxeb xban nak ac naxnau chanru lix na'leb li junjunk.

3

Laj Nicodemo quicuulac chi atinac riq'uin li Jesús

¹ Quicuan jun li cuink aj fariseo aj Nicodemo xc'aba'. A'an xcomoneb li neque'taklan sa' xyankeb laj judío. ² Sa' jun li k'ojojin laj Nicodemo quicuulac chi atinac riq'uin li Jesús ut quixye re: —At tzolanel, lao nakanau nak riq'uin li Dios chalenakat chak chok' aj tzolol ke xban nak ma ani taruk tixbanu li milagros li nacabánu laat cui ta macua' riq'uin xcuanquil li Dios, chan. ³ Quichak'oc li Jesús ut quixye re: —Relic chi yal ninye acue, ma ani naru taoc rubel xnimajcual cuanquileb li Dios cui inc'a' tayo'lak cui'chic xca' sut, chan li Jesús. ⁴ Laj Nicodemo quixye re: —¿Chan ta cui' ru nak tayo'lak cui'chic xca' sut junak cuink? ¿Ma taruk ta bi' taoc cui'chic riq'uin lix na' ut tayo'lak cui'chic xca' sut? chan. ⁵ Quichak'oc li Jesús ut quixye re: —Relic chi yal ninye acue nak ani inc'a' tayo'lak riq'uin ha' ut riq'uin li Santil Musik'ej moco taruk ta taoc rubel lix nimajcual cuanquileb li Dios. ⁶ Li ani yo'lajenak riq'uin lix na' xyucua' cuan xyu'am sa' ruchi'ch'och'. Abanan li ani yo'lajenak riq'uin li Santil Musik'ej cuan xyu'am chi junelic. ⁷ Misach ach'ol xban nak xinye acue nak tento tayo'lak cui'chic xca' sut. ⁸ Li ik' nanume' bar naraj chi inc'a' nacanau bar nachal chak chi moco nacanau bar yo chi xic. Inc'a' nacacuili ru. Ca'aj cui' lix yab nacacuabi nak nanume'. Jo'can ajcui' lix yu'ameb li yo'lajenakeb riq'uin li Santil Musik'ej. Cuan xyu'ameb chi junelic chi inc'a' nacanau chi tz'akal chanru, chan li Jesús. ⁹ Quichak'oc

laj Nicodemo ut quixye re: —¿Chanru nak nac'ulman a'in? Inc'a' nintau ru, chan. ¹⁰ Li Jesús quixye re: —Laat aj tzolol reheb laj Israel ut inc'a' nacatau ru li yoquin chixyebal. ¹¹ Relic chi yal ninye ere: Lao nocoatinac chirix li nakanau. Ut nakach'olob resil li c'a'ru nakil. Abanan laex inc'a' nequec'uluban li c'a'ru nakach'olob xyalal cheru. ¹² Laat inc'a' nacapab li c'a'ru ninye acue chirix li c'a'ru nac'ulman sa' ruchich'och'. ¿Ma toja' ta chic tapab nak tinye acue li choxahil na'leb? ¹³ Ma ani quicuulac sa' choxa. Ca'aj cui'lain li C'ajolbej. Lain xinchal chak sa' choxa. ¹⁴ Nak toj cuanqueb laj judío sa' li chaki ch'och', laj Moisés quixtaksi chiru jun che' jun li c'anti' yibanol riq'uin li ch'ich' bronce. Jo'can ajcui' lain li C'ajolbej. Tento nak tintaksik chiru jun li che', ¹⁵ re nak chixjunileb li te'pabank cue lain inc'a' te'sachk. Te'cuank ban xyu'am chi junelic. ¹⁶ Li Dios c'ajo' nak quixraheb li cuanqueb sa' ruchich'och' nak quixq'ue li Ralal junaj chí ribil re nak chixjunileb li ani te'pabank re inc'a' te'sachk. Tacuank ban xyu'ameb chi junelic. ¹⁷ Li Dios inc'a' quixtakla chak li Ralal sa' ruchich'och' chixtenebanquil li tojba mac sa' xbeneb li cuanqueb sa' ruchich'och'. Quixtakla ban chak re nak sa' xc'aba' a'an te'colek'. ¹⁸ Li ani napaban re, mac'a' li tojba mac sa' xben. Abanan li ani inc'a' napaban re, ac cuan li tojba mac sa' xben xban nak inc'a' xpab li Ralal li Dios, li junaj chi ribil. ¹⁹ Xban nak inc'a' neque'paban, cuan li tojba mac sa' xbeneb. Li C'ajolbej quic'ulun sa' ruchich'och' chixc'utbal li xyalal chiruheb li cuanqueb sa' ruchich'och'. A'an chanchan li cutan. Abanan eb li cuanqueb sa' ruchich'och' k'axal que'raj cuanc sa' xk'oijinal ru li mac ut inc'a' que'raj cuanc sa' li cutan xban nak inc'a' us lix na'lebeb. ²⁰ Li ani neque'xbanu li mausilal, xic' neque'r'il li xyalal. Inc'a' nacuulac chiruheb cuanc sa' xyalal xban nak inc'a' neque'raj tac'utunk li mausilal neque'xbanu. ²¹ Abanan li ani cuanqueb sa' tiquilal, neque'cuulac chiru cuanc sa' xyalal re nak tac'utunk nak neque'xbanu li c'a'ru naraj li Dios, chan li Jesús.

Laj Juan naxch'olob cui'chic xyalal nak li Jesús a'an li Mesías

²² Chirix chic a'in, li Jesús co sa' li na'ajej Judea rochbeneb lix tzolom. Aran que'cana cubi oxib cutan ut yo chi cubsinc ha'. ²³ Laj Juan laj Cubsihom Ha' yo ajcui' chi cubsinc ha' sa' li na'ajej Enón li cuan nach' riq'uin li na'ajej Salim xban nak aran cuan nabal li ha'. Ut neque'cuulac li cristian riq'uin ut naxcubsi xha'eb. ²⁴ A'in quic'ulman nak toj maji' quiq'uehe' sa' tz'alam laj Juan. ²⁵ Que'oc chixcuech'inquil ribeb lix tzolom laj Juan riq'uineb laj judío. Que'xcuech'i ribeb chirix li cubi ha' li yoqueb chixbanunquil. ²⁶ Que'cuulac lix tzolom laj Juan riq'uin ut que'xye re: —At tzolonel, li cuink li quicuulac acuig'uin aran jun pac'al li nima' Jordán, li cach'olob chak resil chiku, a'an yo chi cubsinc ha'. Ut chixjunileb li cristian yoqueb chi cuulac riq'uin, chanqueb. ²⁷ Quichak'oc laj Juan ut quixye: —Junak cuink mac'a' c'a'ru tixbanu chi inc'a' ta q'uebil re xban li Dios. ²⁸ Laex querabi ajcui' chak nak quinye nak moco lain ta li Cristo. Yal taklanabilin ban chak xben cuu chiru a'an chixch'olobanquil li resilal. ²⁹ Junak cuink xic re chi sumlac cuan li ixakilbej riq'uin. Ut li ramig cuan aran ut nasaho' sa' xch'ol chirabinquil li naxye li belomej. Li Cristo, a'an jo' jun li belomej ut lain yal jo' jun li ramig. Lain nasaho' sa' inch'ol nak yoqueb chi xic li cristian riq'uin xban nak a'an li tz'akal aj Colonel. ³⁰ Tento nak a'an tanimank xcuanguil ut lain tacubek incuanquil, chan laj Juan.

Li xchal chak sa' choxa, a'an li k'axal nim xcuanguil

³¹ Ut quixye ajcui' laj Juan: —A'an xchal chak sa' choxa ut k'axal nim xcuanguil sa' xben chixjunil. Lain quinyo'la sa' ruchich'och' ut rehin ajcui'

li ruchich'och'. Ut ninatinaç chirix li c'a'ru nac'ulman sa' ruchich'och'. Li jun li xchal chak sa' choxa, a'an li k'axal nim xcuanquil sa' xbən chixjunil. ³² Ut li c'a'ru quiril ut quirabi, a'an li naxch'olob xyalal. Abanan moco q'uiveb ta li neque'paban re li c'a'ru naxye. ³³ Abanan li ani naxpab li c'a'ru naxye, riq'uin a'an naxc'ut nak naxpab nak tz'akal yal li c'a'ru yebil xban li Dios. ³⁴ Li Jesucristo, a'an taklanbil chak xban li Dios ut naxye li c'a'ru nayehe' re xban li Dios xban nak li Santil Musik'ej cuan riq'uin chi tz'akal. ³⁵ Li Acuabej Dios naxra li Ralal ut quixk'axtesi chixjunil sa' ruk' a'an, ut a'an chic yal re sa' xbən. ³⁶ Li ani napaban re li C'ajolbej cuan xyu'am chi junelic. Ut li ani inc'a' napaban re li C'ajolbej inc'a' t̄acuank xyu'am chi junelic. Cuan ban li tojba mac sa' xbən, chan laj Juan.

4

Li Jesús quiatinac riq'uin jun li ixt aj Samaria

¹ Quicuulac resil riq'uineb laj fariseo nak k'axal nabaleb li yoqueb chi takenc re li Jesús chiruheb li yoqueb chi takenc re laj Juan ut yoqueb chi cubsic xha'eb. ² Abanan macua' li Jesús li yo chi cubsinc ha'. A'aneb ban lix tzolom li yoqueb chi cubsinc ha'. ³ Nak quixnau li c'a'ru yoqueb chixyebal laj fariseo, li Jesús qui-el Judea ut co cui'chic Galilea. ⁴ Nak yo chi xic Galilea, tento nak tanumek' aran Samaria. ⁵ Nak yo chi numec' Samaria, quicuulac sa' li tenamit Sicar. Li tenamit a'an nach' cuan riq'uin li na'ajej li quixq'ue laj Jacob re laj José li ralal. ⁶ Ut aran cuan jun li becbil ha' li quixtakla xbecbal laj Jacob najter. Cua'leb na chic quicuulac aran li Jesús. Quic'oja chire li becbil ha' chi hilanc xban nak quilib chi bec. ⁷ Quicuulac jun li ixt aj Samaria chirisinquil xha'. Ut li Jesús quixye re: —Si bayak cuuc'a, chan. ⁸ Ut eb lix tzolom li Jesús ac xcöeb sa' tenamit chixlok'bal lix tzacaemkeb. ⁹ Quichak'oc li ixt ut quixye re: —Lain aj Samaria ut laat, laat aj judío. ¿C'a'ut nak nacapatz' acuuc'a cue? chan. Quixye re chi jo'can xban nak eb laj judío inc'a' neque'xc'am rib sa' usilal riq'uineb laj Samaria. ¹⁰ Li Jesús quixye re: —Cui ta nacanau c'a'ru li m̄atan li naxq'ue li Dios, ut cui ta nacanau anihin lain li yoquin chixtz'amanquil cuuc'a acue, laat t̄atz'ama raj acuuc'a cuiq'uin ut tinq'ue raj acue li ha' li naq'uehoc junelic yu'am, chan li Jesús. ¹¹ Quichak'oc li ixt ut quixye re: —Kacua', ¿C'a' ta cui' ru t̄acuisi cui' li ha'? Cham cuan chak. Ut, ¿chan ta cui' ru nak taq'ue li ha' li naq'uehoc yu'am? ¹² Laj Jacob li kaxe'tonil yucua' quixcanab chok' ke li becbil ha' a'in. Arin qui'uc'ac a'an ut arin ajcui' que'uc'ac li ralal xc'ajol ut lix quetomk. ¿Ma laat ta bi' k'axal nim acuanquil chiru a'an? chan li ixt. ¹³ Quichak'oc li Jesús ut quixye re: —Chixjunileb li te'uc'ak re li ha' a'in, t̄achakik cui'chic reheb. ¹⁴ A'ut li te'uc'ak re li ha' tinq'ue lain, ma jok'e chic t̄achakik reheb. Li ha' li tinq'ue lain jalan cui'. A'an li junelic yu'am. Chanchan jun li yu'am ha' li cuan chi junelic. Mac'a' roso'jic, chan li Jesús. ¹⁵ Li ixt quixye re: —Kacua', q'ue cue li ha' a'an re nak inc'a' chic t̄achakik cue, chi moco tinchalk chic toj arin chirisinquil inha', chan. ¹⁶ Li Jesús quixye re: —Ayu. Bok chak la belom ut tatchalk cui'chic arin acuochben, chan. ¹⁷ —Mac'a' inbelom, chan li ixt. Li Jesús quixye re: —Yal li xaye nak mac'a' abelom, ¹⁸ xban nak ob li cuink cuanjenak acuiq'uin. Ut li jun li cuan acuiq'uin anakcuarn macua' ajcui' abelom. Yal li xaye nak mac'a' abelom, chan li Jesús. ¹⁹ Quixye li ixt re: —Kacua', jo' li laat anchal profeta. ²⁰ Eb li kaxe'tonil yucua' lao aj Samaria que'tijoc chiru li Dios sa' li tzul li cuan arin. Abanan laex aj judío nequeye nak toj aran Jerusalén cuan li tz'akal na'ajej re lok'oninc. Ye cue

bar cuan li tz'akal xyalal, chan li iixk. ²¹ Quixye li Jesús re: —At iixk, pab li c'a'ru tanye acue. Tacuulak xk'ehil nak moco tento ta chic taxxic sa' li tzul li cuan arin, chi moco Jerusalén re textijok chiru li Dios Acuabej. ²² Laex aj Samaria inc'a nequenau chi tz'akal ani neque'ue xlok'al. Lao aj judío nakanau chi tz'akal ani nakaq'ue xlok'al xban nak li colba-ib riq'uineb laj judío xchal chak. ²³ Tacuulak xk'ehil, ut anakcuan ajcui', nak eb li te'xlok'oni li Acuabej Dios chi tz'akal, te'xbanu chi anchal xch'oleb ut chi yal xban nak li Acuabej Dios naraj nak te'xlok'oni chi tz'akal re ru. ²⁴ Li Dios, a'an musik'ej ut li ani talok'onink re, tento nak tixbanu chi anchal xch'ol ut chi tz'akal re ru, chan li Jesús. ²⁵ Quichak'oc li iixk ut quixye re: —Lain ninnau nak tachalk li Mesías li tacolok ke. Li Cristo neque'xye re. Nak tol-élk a'an, tixch'olob chiku chixjunil li c'a'ak re ru a'in, chan li iixk. ²⁶ Quixye li Jesús re: —Lain li Cristo li yoquin chi atinac acuiq'uin, chan. ²⁷ Sa' ajcui' li honal a'an, que'cuulac eb lix tzolom li Jesús. Ut que'sach xch'oleb chirilbal nak yo chi atinac riq'uin li iixk aj Samaria. Abanan ma jun quiyehoc re: —¿C'a'ut nak yocat chi atinac riq'uin li iixk a'an?— Chi moco que'xye: —¿C'a'ru yocat chixyebal re? — ²⁸ Li iixk quixcanab llix cuc aran ut co sa' li tenamit ut quixye reheb li cuanqueb aran: ²⁹ —Yo'keb chicuix chirilbal jun li cuink quixye cue chixjunil lin yehom inbanuhom. Mare a'an li Cristo li yoco chiroybeninquil, chan. ³⁰ Jo'can nak li cuanqueb sa' li tenamit a'an coeb riq'uin li Jesús. ³¹ Nak toj maji' neque'cuulac, eb lix tzolom li Jesús yoqueb chixtz'amankul chiru nak tacua'ak. Que'xye re: —At tzololon, cua'in, chanqueb re. ³² Li Jesús quixye reheb: —Macua' tzacaemk nasaho' cui' inch'ol. Lain cuan jun xsahil inch'ol ut laex inc'a nequenau c'a'ut, chan. ³³ Ut eb llix tzolom que'xye chi ribileb rib: —Mare ani xc'amoc chak xcua, chanqueb. ³⁴ Li Jesús quixye reheb: —Lain nasaho' inch'ol nak ninbanu li c'a'ru naraj li quitaklan chak cue ut tinchoy xbanunquil llix c'anjal. A'an ruchil li cua chok' cue lain, chan. ³⁵ Laex nequeye, “Toj tanumek' cahib po chíto'nak to-oc chi k'oloc”, chanqueb. Abanan lain ninye ere us xtiiquibanguil anakcuan. Ilomak li q'ula tenamit. Chanchaneb li acuijmkl li ac xk'ano'. Tento nak tach'olobak li xyalal chiruheb. ³⁶ Laj k'olonek naxc'ul xtojbal ut nasaho' sa' xch'ol rochben laj acuinel. Jo'can ajcui' li ani naxch'olob xyalal re nak te'pabank li cristian. Li jun a'an tacuank llix k'ajcamunquil xban nak cuankeb li te'rechani li junelic yu'am sa' xc'aba' a'an. ³⁷ Riq'uin a'in na-el chi yal li neque'xye: Jun li na-acuoc re ut jun chic li nak'oloc re. ³⁸ Lain xexintakla chixk'olbal li moco laex ta xexc'anjelan re. Jalaneb xe'c'anjelan re ut laex chic xexyaloc xsahil llix c'anjeleb, chan li Jesús reheb. ³⁹ Nabaleb laj Samaria li cuanqueb sa' li tenamit a'an que'xpab nak li Jesús a'an li Cristo, xban nak li iixk quixye reheb: —Li cuink a'an xye cue chixjunil li c'a'ru quilajinbanu.— ⁴⁰ Nak que'cuulac eb laj Samaria riq'uin li Jesús, que'relaji ru chi canac riq'uineb. Ut a'an quicana cuib cutan riq'uineb. ⁴¹ Ut k'axal cui'chic nabaleb li que'pabán re li Jesús xban nak que'rabi li c'a'ru quixye. ⁴² Ut que'xye re li iixk: —Anakcuan nakapab, moco xban ta li c'a'ru xaye ke. Lao xkabi chi tz'akal li c'a'ru xye ut nakanau nak a'an tz'akal li Cristo laj Colol re li cuanqueb sa' ruchich'och', chanqueb.

Li Jesús quixq'uirtesi li ralal jun li cuink aj c'anjal chiru li rey

⁴³ Nak ac xnume' li cuib cutan, li Jesús qui-el aran ut co Galilea. ⁴⁴ Ut li Jesús quixch'olob xyalal ut quixye nak junak profeta inc'a' naq'uehe' xlok'al sa' llix tenamit. ⁴⁵ Nak quicuulac li Jesús sa' li tenamit Galilea, quic'ule' sa' xyalal xbaneb li que'cuulac aran Jerusalén chixnumsinquil li nink'e Pascua xban nak que'r'il chixjunil li quilajxbanu li Jesús. ⁴⁶ Li Jesús co cui'chic sa' li tenamit

Caná re Galilea li quixsuk'isi cui' li ha' chok' vino. Ut aran Capernaum cuan jun li cuink aj c'anjal chiru li rey. Yaj li ralal. ⁴⁷ Li cuink a'an quirabi resil nak li Jesús ac xsuk'i chak Judea ut cuan aran Galilea. Co riq'un li Jesús ut quirelaji ru chi xic Capernaum re tixq'uirtesi li ralal. Cám̄c re xban nak nim xyajel. ⁴⁸ Li Jesús quixye re li cuink: —Laex inc'a' nequepab nak li Dios quitaklan chak cue cui inc'a' tinc'ut junak milagro cherū retalil nak cuan incuanquil, chan. ⁴⁹ Ut li cuink quixye cui'chic re li Jesús: —Kacua', banu usilal cue. Yo'o chi junpat xban nak k'axal nim xyajel li cualal. Cám̄c re, chan li cuink. ⁵⁰ Li Jesús quixye re li cuink: —Ayu sa' la cuochoch. La cualal inc'a' taçam̄k. Taq'uirak ban, chan. Ut li cuink quixpab li quiyeh'e re xban li Jesús ut co. ⁵¹ Nak ac cuulac re sa' li rochoch, eb lix mos que'coeb chixc'ulbal ut que'xye re: —Yo'yo la cualal. Yo chi usac, chanqueb re. ⁵² Ut li cuink quixpatz' reheb jok'e honal quixtiquib usac. Ut que'xye re: —Ecuer sa' jun or re li ecuu quinume' lix tik, chanqueb re. ⁵³ Ut quinak sa' xch'ol li yucua'bej nak sa' ajcui' li honal a'an quiyeh'e re xban li Jesús nak taq'uirak li ralal. Ut li cuink a'an quixpab li Jesús jo'queb ajcui' chixjunileb li cuanqueb sa' li rochoch. ⁵⁴ A'an a'in li xcab milagro li quixbanu li Jesús nak qui-el Judea ut co cui'chic Galilea.

5

Li Jesús quixq'uirtesi jun li cuink inc'a' nabec, li cuan chire li ha' Betesda xc'aba'

¹ Chirix chic a'in, li Jesús co Jerusalén sa' li nink'e li neque'xbanu eb laj judío. ² Sa' li tenamit Jerusalén bar cuan cui' li oquebal li neque'rocsi cui' li carner, cuan jun li ha' Betesda xc'aba' sa' ratinobaleb laj hebreo. Aran cuan ob li muhebal. ³ Sa' eb li muhebal a'an cuanqueb nabaleb li yaj. Cuanqueb mutz', cuanqueb yek rokeb, ut cuanqueb li sic rokeb ut sic ruk'eb. Yoqueb chiroybeninquil nak taec'ank li ha'. ⁴ Jun x-ángel li Kacua' nacube chak sa' choxa yalak jok'e ut narec'asi li ha'. Li ani xben cua na-oc chi sa' nak ac x-ec'asíc li ha', li jun a'an naq'uira a' yal c'a'ru xyajel. ⁵ Cuan jun li cuink aran cuakxaklaju xca'c'al (38) chihab roquic lix yajel. ⁶ Nak li Jesús quiril li cuink jiljo aran chire li ha' quixnau nak ac najter roquic lix yajel. Quixye re: —¿Ma tacuaj q'uirac? chan re. ⁷ Quixye li cuink: —Kacua', nacuaj raj abanan ma ani na-ocsin cue sa' li ha' nak na-ec'asíc. Nak yoquin chixyalbal oc, jalan chic na-oc xben cua chicuu, chan. ⁸ Quixye li Jesús re: —Cuaclin, xoc la cuarib ut ben, chan re. ⁹ Sa' ajcui' li honal a'an li cuink quiq'uira. Quixakli, quixxoc lix cuarib ut quibec. A'in quic'ulman sa' li hilobal cutan. ¹⁰ Que'oc chi cuech'inc li neque'taklan sa' xyankelb laj judío. Que'xye re li cuink li quiq'uira: —Hilobal cutan anakcuan. Yocat chixk'etbal li kachak'rāb xban nak yocat chixc'ambal la cuarib chiru li hilobal cutan, chanqueb. ¹¹ Quichak'oc li cuink ut quixye reheb: —Li cuink li xq'uirtesin cue, xye cue, “c'am la cuarib ut ben”, chan. ¹² Que'xpatz' re: —¿Ani li cuink li xyehoc ácue nak taxoc la cuarib ut tatbek? chanqueb. ¹³ Li cuink li quiq'uirtesic inc'a' naxnau ani ta a'an, xban nak k'axal nabaleb li cuanqueb aran ut li Jesús ac x-el sa' xyankelb. ¹⁴ Mokon chic li Jesús quixtau cui'chic li cuink sa' li templo ut quixye re: —Chaq'uehak retal nak xatq'uira. Canab xbanunquil li inc'a' us mare anchal tachalk junak chic nimla raylal sa' aben, chan li Jesús re. ¹⁵ Qui-el li cuink riq'un li Jesús ut quixye resil reheb li neque'taklan sa' xyankelb laj judío nak li Jesús, a'an li quiq'uirtesin re.

Lix cuanquil li C'ajolbej q'uebil re xban li Yucua'bej

16 Eb li neque'taklan sa' xyānkeb laj judío xic' que'ril li Jesús xban nak naq'uirtesin sa' li hilobal cutan. Ut que'raj xcamsinqil. **17** Li Jesús quixye rebeb: —Lin Yucua' toj yo chixtenk'anquileb li cristian ut tento ajcui' nak tintenk'aheb lajin, chan. **18** K'axal cuū'chic que'josk'o' laj judío riq'uin a'in. Jo'can nak que'raj xcamsinqil xban nak moco ca'aj ta cui' naqx'et lix chak'rabeb nak naq'uirtesin chiru li hilobal cutan; riq'uin aj ban cui' nak naxjuntak'eta rib riq'uin li Dios nak naxye nak li Dios, a'an lix Yucua'. **19** Jo'can nak li Jesús quixye rebeb: —Relic chi yal tiney ere, Lajin li C'ajolbej. Mac'a' naru tinbanu injunes. Li c'a'ru naxc'ut chicuu lin Yucua', a'an li ninbanu. Chixjunil li naxbanu lin Yucua', a'an li ninbanu lajin. **20** Lajin li C'ajolbej. Raroquin xban lin Yucua'. A'an naxc'ut chicuu chixjunil li c'a'ak re ru naxbanu. Ut toj cuan cui'chic c'a'ak re ru xninkal ru na'leb chiru a'in tixc'ut chicuu xbanunquil. Ut laex tāsachk ech'ol chirilbal. **21** Li Yucua'bej naxcuaclesiheb cui'chic chi yo'yo li camenak. Ut jo'can ajcui' lajin li C'ajolbej. Lajin ninq'ue li junelic yu'am rebeb li ani nacuaj. **22** Li Yucua'bej ma ani naxrak atin sa' xben. Quixk'axtesiheb ban sa' cuuk' re nak lajin chic tinrakok atin sa' xben. **23** Quixbanu chi jo'can re nak chixjunileb te'xq'ue inlok'al jo' nak neque'xq'ue xlok'al li Yucua'bej. Li ani inc'a' naxq'ue inlok'al lajin li C'ajolbej, inc'a' ajcui' naxq'ue xlok'al li Yucua'bej li quitaklan chak cue. **24** Relic chi yal ninye ere nak li ani na-abin re li c'a'ru ninye ut naxpab li Dios li quitaklan chak cue, li jun a'an cuan xyu'am chi junelic. Inc'a' taxic sa' tojba mac xban nak inc'a' chic tenebanbil li cāmc sa' xben. Cuānk ban chic xyu'am chi junelic. **25** Chi yal ninye ere tācuulak xk'ehil ut anakuan ajcui' xcuulac xcutanquil, nak eb li chanchan camenakeb xban li mac te'rabi li cuatin lain li C'ajolbej. Ut li te'abink cue te'cuank xyu'am chi junelic. **26** Li Yucua'bej cuan xcuankuil chi q'uehoc junelic yu'am ut a'an ajcui' qui'q'uehoc cue lajin li C'ajolbej lin cuanquil chi q'uehoc junelic yu'am. **27** Ut quixq'ue ajcui' incuanquil chi rakoc atin xban nak lajin li C'ajolbej. Taklanbiliban chak xban li Dios. **28** Misach ech'ol chirabinquil li yoquin chixyebal. Tācuulak xk'ehil nak chixjunileb li camenak te'rabi li c'a'ru tiney. **29** Li que'xbanu li us te'cuaclik cui'chic ut te'cuank xyu'am chi junelic. Ut eb li que'xbanu li inc'a' us te'cuaclik ajcui' re te'taklak sa' li tojba mac. **30** Lain mac'a' naru ninbanu injunes. Lajin ninrakoc atin jo' naxye cue li Yucua'bej. Jo'can nak ninrakoc atin sa' tiquilal. Inc'a' ninbanu li c'a'ru nacuaj lajin. Ninbanu ban li c'a'ru naraj li Yucua'bej li quitaklan chak cue. **31** Cui lajin tinch'olob xyalal cheru anihin tz'akal lajin, laex teye nak inc'a' yal li yoquin chixyebal. **32** Abanan cuan jun chic li naxch'olob xyalal cheru anihin tz'akal lajin ut lajin ninnau nak yal li yo chixyebal chiciuix. **33** Laex xetakla xpatz'bal re laj Juan laj Cubsihom Ha' ut a'an quixch'olob li xyalal cheru ut yal li quixye chiciuix. **34** Abanan inc'a' tento nak junak cuink tixch'olob xyalal anihin. Ninye ban ere anihin re nak texcolek'. **35** Laj Juan chanchan jun li xam quixcutanobresi ebe nak quixch'olob li xyalal cheru. Ut quisaho' jun c'amoc sa' ech'ol chirabinquil li quixye. **36** Li c'a'ru quixch'olob laj Juan chiciuix, a'an yal. Abanan riq'uin li c'a'ru ninbanu, k'axal cui'chic naxc'ut chi tz'akal anihin lajin. Lajin ninbanu li c'a'ru quixye cue li Yucua'bej. Li c'a'ru ninbanu lain, a'an naxc'ut nak taklanbiliban xban li Yucua'bej. **37** Ut li Yucua'bej li quitaklan chak cue, a'an quixch'olob ajcui' li xyalal chiciuix usta ma jun sut xerabi chi atinac chi moco queril chanru na-iloc. **38** Laex inc'a' nequeraj xc'ulbal li rātin xban nak inc'a' niquinepab lajin, li taklanbiliban chak xban a'an. **39** Laex nequeq'ue ech'ol chixtzolbal xsa' li Santil Hu. Laex nequec'oxla nak aran tētau chanru tācuank le yu'am chi junelic. Abanan inc'a' nequeq'ue retal nak li Santil

Hu a'an naxch'olob ajcui' li xyalal chicuix laín. ⁴⁰ Læx inc'a' nequeraj xpabánquil nak laín ninq'uehoc ere le yu'am chi junelic. ⁴¹ Laín inc'a' nacuaj nak teq'ue inlok'al læx. ⁴² xban nak ninnau chanru le na'leb. Ninnau nak inc'a' nequera li Dios chi anchal ech'ol. ⁴³ Laín xinchal sa' xc'aba' lin Yucua'. Abanan inc'a' xeraj inc'ulbal. Cui ut ani ta chic junak tachalk yal naxtakla chak rib xjunes, læx tec'ul raj a'an. ⁴⁴ Nak nequeq'ue elok'al chi ribil erib, c'ajo' nak nacuulac cheru. Abanan inc'a' nequesic' li lok'al li naxq'ue li jun chi Dios. ¿Chan ta cui' ru nak tinépab laín chi jo'canan? ⁴⁵ Mec'oxla nak laín tinjítok ere chiru lin Yucua'. Cuan jun li tajitok ere. A'an li chak'rab li quiq'uehe' re laj Moisés li c'ojc'o cui' ech'ol. ⁴⁶ Cui ta nequepab li c'a'ru quixye laj Moisés, tinépab aj raj cui' laín xban nak laj Moisés quixch'olob ajcui' chak xyalal chicuix laín. ⁴⁷ Cui inc'a' nequepab li c'a'ru quixtz'iba laj Moisés chicuix, ¿chan ta cui' ru nak tépab li c'a'ru ninye laín?

6

Li Jesús quixq'ueheb chi cua'ac li ob mil chi cuink

¹ Mokon chic li Jesús co cui'chic jun pac'al li palau Galilea. Neque'xye ajcui' Tiberias re li palau a'an. ² Nabaleb yoqueb chi takenc re xban nak que'rileb li milagro li yo chixbanunquil nak naxq'uirtesiheb li yaj. ³ Ut quitake' li Jesús chiru jun li tzul ut aran quic'oja rochbeneb lix tzolom. ⁴ Ac cuulac re xk'ehil li nink'e Pascua, li neque'xbanu eb laj judío. ⁵ Li Jesús quiril nak nabaleb li yoqueb chi cuulac riq'uin. Quixye re laj Felipe: —¿Bar taruk takalok' xcuahéb chixjunileb li tenamit a'in? chan. ⁶ Quixye chi jo'can yal re rilbal c'a' na ru tixye laj Felipe xban nak ac cuan sa' xch'ol li Jesús nak tixq'ue xcuahéb. ⁷ Quixye laj Felipe: —Kacua', cuib ciento denario chi caxlan cua inc'a' tatz'aklok re te'tz'ak ca'ch'inak chi xjunkaleb, chan. ⁸ Jun chic reheb lix tzolom aj Andrés xc'aba' ras laj Simón Pedro. Quixye: ⁹ —Cuan jun li al arin cuan cuib li car riq'uin ut ob li caxlan cua yibanbil riq'uin cebada. Abanan a'in ma jok'e tatz'aklok reheb li q'uila tenamit, chan. ¹⁰ Ut quixye li Jesús reheb: —Q'uehomakeb chi c'ojalac li tenamit.— Nabal li pach'aya' cuan aran. Chixjunileb que'c'oja sa' li pach'aya'. Ob mil na chi cuink li cuanqueb aran. ¹¹ Tojo'nak li Jesús quixchap li caxlan cua. Quixbantioxi chiru li Dios. Quixjachi li caxlan cua ut quixq'ue reheb lix tzolom re nak te'xejq'ui reheb li q'uila tenamit li c'ojc'oqueb aran. Jo'can ajcui' quixbanu riq'uin li car. Ut que'cua'ac chixjunileb toj retal que'c'oja xch'oleb. ¹² Nak ac xe'rake' chi cua'ac, li Jesús quixye reheb lix tzolom: —Xocomak li jo' q'ual xela'an re nak mac'a' tatz'ekmank, chan. ¹³ Que'xxoc cablaju chachac rela' li caxlan cua yibanbil riq'uin cebada. A'an li qui-ela'an nak que'rake' chi cua'ac chixjunileb li cuanqueb aran. ¹⁴ Nak que'r'il li milagro li quixbanu li Jesús, eb li cuanqueb aran que'xye: —Relic chi yal li cuink a'in, a'an li profeta li quiyehé' chak resil junxil nak tachalk sa' ruchich'och', chanqueb. ¹⁵ Li Jesús quixnau nak te'raj xpuersinqui ru re nak taoc chok' rey. Jo'can nak qui-el sa' xyankeb ut co xjunes sa' li tzul.

Li Jesús quibec chiru li palau

¹⁶ Oc re k'ojoyn nak coeb lix tzolom li Jesús chire li palau. ¹⁷ Li Jesús mají' nacuulac riq'uineb. Que'oc sa' jun li jucub ut yoqueb chi xic sa' li tenamit Capernaum li cuan jun pac'al li palau. ¹⁸ Ac x-oc li k'ojoyn nak quichal jun cacuil ik' ut qui-oc chi ec'anc ru li palau chi cau. ¹⁹ Cuan na xcab legua ac xe'béc chiru li ha' sa' li jucub nak que'r'il nak yo chak chi chalc li Jesús. Yo chi

b̄ec chiru li ha'. Yo chak chi nach'oc chixc'atk li jucub. C'ajo' nak que'xucuac xban nak inc'a' que'xnau ru. ²⁰ Ut li Jesús quixye reheb: —Lain. Mexxucuac, chan. ²¹ Ut c'ajo' xsahil xch'oleb nak que'rocsi sa' li jucub. Ut sa' ajcui' li honal a'an que'cuulac sa' li na'ajej li yoqueb cui' chi xic. ²² Cuulajak chic li q'uila tenamit li cuanqueb chire li palau li que'el cui', que'xq'ue retal nak jun ajcui' li jucub qui-el aran. Ut que'xnau nak li Jesús inc'a' qui-oc chi sa' li jucub a'an rochbeneb lix tzolom. Xjuneseb ban coeb. ²³ Ut cuanqueb cui'chic jucub que'el chak Tiberias que'cuulac chixc'atk li na'ajej li que'cua'ac cui' nak ac xbantioxli Jesús chiru li Dios. ²⁴ Li q'uila tenamit que'xq'ue retal nak ma ani chic li Jesús sa' li na'ajej a'an, chi moco cuanqueb lix tzolom. Que'oc sa' eb li jucub li que'chal Tiberias ut coeb Capernaum chixsic'bal. ²⁵ Nak que'xtau li Jesús jun pac'al li palau, que'xye re: —At tzolonel, ¿Jok'e xatchal arin? — ²⁶ Quichak'oc li Jesús ut quixye reheb: —Relic chi yal ninye ere nak laex yoquex chintakenquil xban nak xexinq'ue chi cua'ac toj retal xexnujac. Inc'a' yoquex chintakenquil xban nak xeril li milagro li xinbanu. ²⁷ Mixic ech'ol ca'aj cui' riq'uín xsic'bal li tzacaemk li na-oso'. Cheq'uehak ban ech'ol chixsic'bal li tzacaemk li inc'a' nalaj na-oso'. A'an li junelic yu'am li ning'ue lain li C'ajolbej. A'an aj e nak quixq'ue incuanquil ut quinixtakla chak li Yucua'bej, chan li Jesús. ²⁸ Ut que'xye re li Jesús: —¿C'a' raj ru takabānu lao re nak tasahok' xch'ol li Dios kiq'uin? chanqueb. ²⁹ Li Jesús quixye reheb: —Li c'a'ru naraj li Dios nak tebānu, a'an a'in: nak tinepab lain xban nak taklanbilin chak xban, chan. ³⁰ Ut que'xye cui'chic re: —Tento tac'ut chiku junak li milagro re nak takapab nak taklanbilat xban li Dios. ¿C'a'ru li retalil tac'ut chiku? ³¹ Eb li kaxe'tonil yucua' que'q'uehe' chak li maná chixcua'eb nak yoqueb chak chi numec' sa' li chaki ch'och' jo' tz'ibānil retalil sa' li Santil Hu: Choxahil cua quiq'uehe' chixcua'eb. ³² Ut li Jesús quixye reheb: —Relic chi yal ninye ere, moco a' ta laj Moisés quiq'uehoc reheb li choxahil cua. A' ban lin Yucua', a'an li quiq'uehoc reheb. Ut a'an naq'uehoc li tz'akal choxahil cua. ³³ Li tz'akal choxahil cua li naxq'ue li Dios, a'an li jun li quichal chak sa' choxa ut naxq'ue li junelic yu'am reheb li cuanqueb sa' ruchich'och', chan. ³⁴ Eb a'an que'xye re: —At Kacua', taq'ue ta ke rajlal li cua a'an. — ³⁵ Li Jesús quixye reheb: —Lain li cua a'an. Lain ning'uehoc junelic yu'am. Li ani napaban cue tac'ojobak xch'ol. Inc'a' chic tatz'ocak ut inc'a' chic tachakik re. Chanchan nak ac xrake' chi tzacanc. ³⁶ Aban ac xinye ere nak usta ac xeril cuu, toj inc'a' ajcui' niquinepab. ³⁷ Chixjunileb li tixk'axtesi cue li Yucua'bej, tine'xpab. Ut li ani napaban cue, lain inc'a' tintz'ektana. ³⁸ Lain xinchal chak sa' choxa re tinbanu li c'a'ru naraj li Dios li quitaklan chak cue. Moco xinchal ta chixbanunquil li c'a'ru nacuaj lain. ³⁹ Li c'a'ru naraj lin Yucua' li quitaklan chak cue, a'an nak ma jun reheb li cualal inc'ajol li xk'axtesi cue tasačh chicuu. Tincuaclesiheb ban chi cuankeb xyu'am sa' roso'jiqueb li cutan. ⁴⁰ Li Yucua'bej li quitaklan chak cue, a'an naraj nak chixjunileb li te'xq'ue retal nak lain li C'ajolbej ut tine'xpab tacuank xyu'ameb chi junelic. Ut lain tincuaclesiheb ut ting'ue xyu'ameb sa' roso'jiqueb li cutan, chan li Jesús. ⁴¹ Ut eb laj judío que'oc chixcuech'inquil rix li quixye li Jesús xban nak quixye, "Lain li cua. Lain xinchal chak sa' choxa." ⁴² Que'xye chi ribileb rib: —¿Ma macu'a ta bi' a'in li Jesús li ralal laj José? Lao nakanau ruheb lix na' xyucua'. ¿C'a'ut nak naxye nak sa' choxa xchal chak? chanqueb. ⁴³ Quixye li Jesús reheb: —Canabomak xcuech'inquil erib, chan. ⁴⁴ Ma ani naru tapabank cue cui inc'a' ta k'axtesinbil cue xban li Yucua'bej li quitaklan chak cue. Li neque'pabán cue, lain tincuaclesiheb cui'chic chi yo'yo sa' roso'jiqueb li

cutan. ⁴⁵ Tz'ibabil retali chi jo'ca'in sa'li Santil Hu xbaneb li profeta: Li Dios tixc'ut li xyalal chiruheb chixjunileb. Jo'can nak chixjunileb li neque'abin re ut neque'xtau ru li c'a'ru naxye li Dios, eb a'an tine'xpab ajcui' lain. ⁴⁶ A'in moco naraj ta naxye nak cuan li que'iloc chak ru li Acuabej Dios. Ca'aj cui' lain ninna'oc ru xban nak riq'uin quinchal chak. ⁴⁷ Relic chi yal tinye ere nak li ani napaban cue, li jun a'an cuan xyu'am chi junelic. ⁴⁸ Lain li cua li nag'uehoc yu'am chi junelic. ⁴⁹ Le xe'tonil yucua' que'xcua' chak li cua li quichal chak sa' choxa junxil nak yoqueb chi numec' sa' li chaki ch'och'. Usta que'xcua' li cua li quichal sa' choxa, abanan moco cuanqueb ta xyu'am chi junelic. ⁵⁰ Abanan, lain li xinchal chak sa' choxa, lain li tz'akal choxahil cua xban nak ninq'uehoc yu'am chi junelic. Li ani napaban cue, a'an inc'a' tacamk. Cuank ban xyu'am chi junelic. ⁵¹ Lain li yo'yoquil cua. Quinchal chak sa' choxa. Li ani napaban cue lain inc'a' tasachk. Cuank ban xyu'am chi junelic. Li cua li ting'ue lain, a'an lin tibel nak tink'axtesi cuib chi c'cmc re nak taruk te'cuank xyu'ameb chi junelic li cuanqueb sa' ruchich'och', chan li Jesús. ⁵² Nak que'rabi li c'a'ru quixye, eb laj judío que'oc chixcuech'inquil rix li quixye ut que'xye: —¿Chanru nak tixq'ue lix tibel re takatzaca? chanqueb. ⁵³ Quixye li Jesús reheb: —Relic chi yal ninye ere: Cui inc'a' tetzaca lin tibel lain li C'ajolbej ut cui inc'a' t'eruc' lin quiq'uel, inc'a' t'acuank le yu'am chi junelic. ⁵⁴ Chixjunileb li neque'xtzaca lin tibel ut neque'ruc' lin quiq'uel, cuank xyu'ameb chi junelic, ut lain tincuaclesiheb cui'chic chi yo'yo sa' roso'jiqueb li cutan. ⁵⁵ Lin tibel, a'an li tzacaemk li naq'uehoc junelic yu'am. Ut lin quiq'uel, a'an li uc'a li naq'uehoc junelic yu'am. ⁵⁶ Li ani naxtzaca lin tibel ut naruc' lin quiq'uel, li jún a'an cuan chi sum atin cuiq'uin ut lain cuanquin chi sum atin riq'uin a'an. ⁵⁷ Li yo'yoquil Dios, a'an li quitaklan chak cue. Jo'nak yo'yo chi junelic a'an, jo'can nak yo'yoquin ajcui' lain chi junelic. Jo'can ajcui' li ani naxtzaca lin tibel, li jun a'an t'acuank xyu'am chi junelic sa' inc'aba' lain. ⁵⁸ Jo'can nak lain li cua li quinchal chak sa' choxa. Moco jo' ta li cua li que'xcua' le xe'tonil yucua'. A'an inc'a' quixq'ue xyu'ameb chi junelic. Abanan chixjunileb li te'cua'ok re li cua a'in, eb a'an te'cuank xyu'ameb chi junelic, chan li Jesús. ⁵⁹ Chixjunil li c'a'ak re ru a'in li Jesús quixye reheb nak yo'chix'utbal li xyalal chiruheb aran Capernaum sa'li cab li neque'xch'utub cui' ribeb laj judío.

Nabaleb que'xcanab xtakenquil li Jesús

⁶⁰ Nak que'rabi li c'a'ru quixye, nabaleb lix tzolom que'oc chi atinac chi ribileb rib, ut que'xye: —C'ajo' xch'a'ajquik xtaubal ru li xye. ¿Ani ta cui' tata'ok ru? chanqueb. ⁶¹ Li Jesús quixnau nak yoqueb chixcuech'inquil rix li c'a'ru quixye usta ma' ani quiyehoc re. Jo'can nak quixye reheb: —¿Ma inc'a' xcuulac cheru li c'a'ru xinye ere? ¿Ma tecanab intakenquil xban? ⁶² ¿Ma ra xerec'a nak xinye ere chi jo'can? ¿C'a' raj ru tebanu nak teril nak lain li C'ajolbej yokin cui'chic chi xic sa' choxa li xincuan cui' chak junxil? ⁶³ Li naq'uehoc junelic yu'am, a'an li Santil Musik'ej. A'an macua' re li tibezej. Lain xinch'olob xyalal cheru. Li xinye ere yebil cue xban li Santil Musik'ej. Cui tepab li c'a'ru xinye, li Santil Musik'ej tixq'ue ere li junelic yu'am. ⁶⁴ Abanan toj cuanqueb ajcui' sa' eyank li inc'a' neque'pabán, chan li Jesús. Chalen sa' xticlajic li Jesús quixnau aniheb li inc'a' te'pabán re. Ut quixnau ajcui' ani li tak'axtesink re sa'ruk'eb li xic' que'iloc re. ⁶⁵ Ut quixye ajcui' li Jesús reheb: —Jo'can nak xinye ere nak ma' ani taruk tapabank cue cui inc'a' ta k'axtesinbil cue xban li Yucua'bej, chan. ⁶⁶ Chalen sa' li cutan a'an nabaleb lix tzolom que'ch'inan xch'oleb ut inc'a' chic que'xtake li Jesús. ⁶⁷ Ut li Jesús quixye reheb lix tzolom cablaju: —¿Ma teraj ajcui' xic laex? ¿Ma

tinecanab ajcui' laex? chan reheb. ⁶⁸ Quichak'oc laj Simón Pedro ut quixye re: —At Kacua', ¿ani aj iq'un toxic? Laat nacaye ke chanru tacular kayu'am chi junelic. ⁶⁹ Lao nakapab li c'a'ru nacaye ut nakanau nak laat li Cristo, li Ralal li yo'yoquil Dios, chan. ⁷⁰ Quixye li Jesús: —¿Ma macua' ta bi' lain xinsic'oc eru laex li cablaju? Lain xinsic'oc eru ut jun sa' eyank xk'axtesi rib re laj tza, chan. ⁷¹ Yo chi atinac chirix laj Judas Iscariote, li ralal laj Simón. Usta a'an jun reheb li cablaju, mokon laj Judas Iscariote quixk'axtesi li Jesús sa' ruk'eb li xic' neque'iloc re.

7

Li Jesús quihobe' xbaneb li ritz'in

¹ Chirix chic a'an, li Jesús yo chixbeninquileb li na'ajej li cuanqueb Galilea. Inc'a' quiraj xic Judea xban nak eb li neque'taklan sa' xyankeb laj judío te'raj xcamsinquil. ² Yo chi cuulac xk'ehil li nink'e nak eb laj judío neque'xyib'lix coc' muhebal. ³ Eb li ritz'in li Jesús que'xye re: —Elen sa' li na'ajej a'in. Ayu Judea re nak eb li neque'taken acue te'rileb li milagro li nacabánu. ⁴ Ma ani junak tixbanu lix c'anjal chi mukmu cui naraj nak tana'lik ru. Cui tabánu li milagro a'in, c'utbesi la c'anjal chiruheb chixjunileb, chanqueb. ⁵ Yal ta eb li ritz'in neque'pában re nak a'an taklanbil chak xban li Dios. ⁶ Quixye li Jesús reheb: —Toj mají' nacuulac xk'ehil nak tinxic. Laex naru texxic yalak jok'e. ⁷ Eb li cuanqueb sa' ruchich'och' xic' niquine'r'il xban nak lain ninye reheb nak inc'a' us li yoqueb chixbanunquil. Abanan laex inc'a' xic' nequexile' xbaneb. ⁸ Ayukex laex sa' li nink'e. Lain inc'a' tinxic xban nak toj mají' nacuulac xk'ehil nak tinxic, chan li Jesús. ⁹ Nak quixye reheb a'in, li Jesús toj quicana aran Galilea.

Li Jesús co Jerusalén chixnumsinquil li nink'e

¹⁰ Nak ac xcoeb li ritz'in sa' li nink'e aran Jerusalén, li Jesús co ajcui'. Abanan moco quixye ta rib. Chanchan sa' mukmu co. ¹¹ Eb li neque'taklan sa' xyankeb laj judío yoqueb chixsic'bal li Jesús sa' li nink'e. —¿Bar anchal cuan li cuink a'an? chanqueb. ¹² Nabaleb li cuanqueb aran yoqueb chixcuech'inquil rib chirix li Jesús. Cuan yoqueb chi yehoc re: —Chabil cuink a'an, chanqueb. Ut cuan cui'chic yoqueb chi yehoc: —Inc'a'. Li cuink a'an naxbalak'iheb li tenamit, chanqueb. ¹³ Abanan ma ani quiatinaq chi cau xban nak que'xucuac chiruheb li neque'taklan sa' xyankeb laj judío. ¹⁴ Nak ac yo li nink'e li Jesús co sa' li templo ut qui-oc chixch'olobanquil li xyalal chiruheb li cuanqueb aran. ¹⁵ Que'sach xch'oleb li neque'taklan sa' xyankeb laj judío chirabinqil li c'a'ru quixye li Jesús. Que'xye: —¿Chanru nak naxnau li cuink a'in chixjulin li c'a'ak re ru a'in? A'an moco tzolbil ta, chanqueb. ¹⁶ Quixye li Jesús reheb: —Li tijleb li yoquin chixc'utbal macua' cue. A' li Dios li quitaklan chak cue, a'an li quic'utuc chicuu li yoquin chixyebal, chan. ¹⁷ Li ani tajajok xbanunquil li c'a'ru naraj li Dios, a'an tinxna ma re li Dios li tijleb li yoquin chixc'utbal malaj ut yal inc'a'ux injunes. ¹⁸ Cui junak naxch'olob xyalal li naxc'oxla xjunes, li jun a'an naraj nak taq'uehek' xllok'al xbaneb li neque'abin re. Abanan li ani naraj nak taq'uehek' xllok'al li quitaklan chak re, li jun a'an tíc xch'ol ut mac'a' balak'ic riq'uin. ¹⁹ ¿Ma inc'a' ta bi' quixq'ue ere li chak'rab laj Moisés? ¿C'a'ut nak ma jun sa' eyank naxbanu chi tz'akal li c'a'ru naxye li chak'rab? Ut, ¿c'a'ut nak teraj incamsinquel? chan li Jesús. ²⁰ Eb a'an que'chak'oc ut que'xye re: —Cuan na li mäus aj musik'ej acuq'uin. ¿Ani tajajok qacamsinquel? chanqueb

re. ²¹ Quixye li Jesús reheb: —Lain xinbanu jun li milagro sa' li hilobal cutan ut sachso ech'ol xexcana xban. ²² Laj Moisés quixye ere nak tento tebanu li circuncisión reheb le ralal. (Mácu'a' laj Moisés li quitiquiban re. A' le xe'tonil yucua', a'aneb li que'tiquiban re xbánunquíl li circuncisión.) Usta hilobal cutan, laex nequebanu li circuncisión. ²³ Cui laex nequebanu li circuncisión usta hilobal cutan re nak inc'a' tek'et li chak'rab li quiq'uehe' re laj Moisés, ¿c'a'ut nak xexjosk'o' cuiq'unin nak xinq'uirtesi jun li cuink sa' li hilobal cutan? ²⁴ Mexrakoc atin jo' nequeraj laex yal ejunes. Chexrakok ban atin sa' xyalal, chan li Jesús. ²⁵ Cuanqueb aj Jerusalén que'xye: —¿Ma mácu'a' ta bi' a'in li cuink li te'raj xcamsinquil eb lí neque'taklan sa' kayank lão aj judío? ²⁶ Q'uehomak retal. Cuan arin ut yo chi atinac chiruheb chixjunileb li tenamit ut mac'a' neque'xye re. Mare xe'xnau nak a'an li Cristo. ²⁷ ¿Chanru nak a'anak li Cristo? ¿Ma inc'a' ta bi' nakanaubar xtenamit li cuink a'in? Nak tachalk li Cristo, ma ani tana'ok re chi tz'akal bar tachalk chak, chanqueb. ²⁸ Nak li Jesús yo chixch'olobanquíl li xyalal sa'li templo, quixye chi cau xyab xcux: —Yal nak nequenau cuu. Ut nequenau bar intenamit. Abanan inc'a' nequenau chi tz'akal bar xinchal chak. Lain inc'a' xintakla chak cuib yal injunes. Li Dios, li tjc xch'ol, a'an li xtaklan chak cue. Laex inc'a' nequenau ru a'an. ²⁹ Ca'aj cui' lain ninna'oc ru xban nak riq'unin a'an xinchal chak. Li Dios, a'an li quitaklan chak cue, chan li Jesús. ³⁰ Ut que'raj raj xchapbal re nak te'xq'ue sa' tz'alam. Abanan inc'a' ajcui' que'xchap xban nak toj maji' nacuulac xk'ehil nak tachapek'. ³¹ Nabaleb li tenamit que'xpab li Cristo ut que'xye: —Lao nakanaubar nak tac'ulunk li Cristo, nabaleb li milagro tixbanu. Li cuink a'in nabal li milagro yo chixbanunquíl. Cui ta mácu'a' li Cristo, ¿chan ta cui' ru nak tixbanu li milagro li yo chixbanunquíl?

Eb li neque'c'ac'alen sa'li templo que'taklac chixchapbal li Jesús

³² Eb laj fariseo que'rabi li yoqueb chixyebal chirix li Jesús. Jo'can nak eb a'an, rochbeneb li xbénil aj tij, que'xtakla li neque'c'ac'alen sa'li templo chixchapbal li Jesús re te'xq'ue sa' tz'alam. ³³ Li Jesús quixye reheb: —Toj maji' tinechap. Toj tincuank chic ca'ch'inak sa' eyank, tojo'nak tinsuk'ik cui'chic riq'unin li quitaklan chak cue. ³⁴ Tinesic' ut inc'a' tinetau xban nak bar cuankin lain, laex inc'a' texruk chi xic, chan. ³⁵ Ut eb laj judío que'oc chi atinac chi ribileb rib ut que'xye: —¿Bar anchal taxic li cuink a'in nak inc'a' taruk takatau? Märe taxic riq'uineb laj judío li cuanqueb sa' xtenamiteb laj griego. Malaj taoc chixtzolbaleb laj griego. ³⁶ A'an xye, "Tinesic' ut inc'a' tinetau. Inc'a' naru texxic bar cuankin cui'," chan. ¿C'a'ru xyalal a'an? chanqueb.

Li Jesús quixye nak li ani tachakik re tixq'ue ruc'a

³⁷ Li roso'jic li nink'e, a'an li cutan li k'axal lok' chiruheb. Sa' li honal a'an, li Jesús quixakli chiruheb ut quixye chi cau xyab xcux: —Li ani tachakik re, chalk cuiq'unin. Lain ting'ue ruc'a. ³⁸ Xban nak jo'ca'in tz'ibabil retalil sa'li Santil Hu: Chixjunileb li ani te'pabank cue lain, li Santil Musik'ej li naq'uehoc junelic yu'am tacuank riq'uineb. Chanchan jun li yu'am ha' li inc'a' noso'. — ³⁹ Nak quixye a'in, li Jesús yo chi atinac chirix li Santil Musik'ej li tacuank riq'uineb li te'pabank re. Sa'li cutan a'an, li Santil Musik'ej toj maji' na'ulun xban nak li Jesús toj maji' naxic sa' choxa chixc'ulbal lix lok'al. ⁴⁰ Nak que'rabi li c'a'ru quixye li Jesús, cuan que'yehoc: —Relic chi yal li cuink a'in profeta. — ⁴¹ Ut cuanqueb ajcui' que'xye: —Li cuink a'in, a'an li Cristo. — Abanan cuanqueb cui'chic li que'chak'oc ut que'xye: —¿Ma Galilea ta bi' tachalk li Cristo li yechi'nbil ke? ⁴² Tz'ibabil retalil sa'li Santil Hu nak

li Cristo li Mesías tāchālk sa' xyānkeb li ralal xc'ajoll li rey David. Tāchālk aran Belén li quicuan cui' li rey David najter, chanqueb. ⁴³ Jo'can nak li tenamit que'xjachi ribeb xban nak jalan jalank yoqueb chixc'oxlanquil chirix li Jesús. ⁴⁴ Cuanqueb li que'ajoc xchapbal li Jesús abanan inc'a' ajcui' que'xbānu.

Li cuanqueb xcuanylinc'a' que'xpab li Jesús

⁴⁵ Nak que'suk'i li que'taklāc chixchapbal li Jesús, eb laj fariseo ut eb li xbenil aj tij que'xpatz rebeb: —¿C'a'ut nak inc'a' xec'am chak li cuink a'an? chanqueb. ⁴⁶ Eb li neque'c'ac'alen sa' li templo que'chak'oc ut que'xye: —¡Ma jun cúa kabiom junak cuink chi atinac jo' naqfinac li cuink a'an! Ch'ina'us li c'a'ru naxye, chanqueb. ⁴⁷ Ut eb laj fariseo que'xye rebeb: —¿Ma xeq'ue ajcui' erib laex chixbalak'i li cuink a'an? ⁴⁸ ¿Ma cuan ta bi' junak xcomoneb li neque'taklan sa' kayānk li xpab li c'a'ru naxye a'an? Ut, ¿ma cuan ta bi' junak kacomon lāo aj fariseo xpaban re? ⁴⁹ Eb li q'uila tenamit a'in inc'a' neque'xnau c'a'ru naxye sa' li chak'rab li quiq'uehe' re laj Moisés. ¿C'a'ru te'oc cui' eb a'an? chanqueb laj fariseo. ⁵⁰ Cuan aran laj Nicodemo li quicuulac riq'uin li Jesús chi k'ek. A'an jun rebeb laj fariseo. Quixye rebeb: ⁵¹ —Naxye sa'li kachak'rab nak inc'a' naru rakoc atin sa' xben junak cuink chi toj maji' naxye ma cuan xmac malaj ut inc'a'. Tento takanau chi tz'akal c'a'ru lix mac, chan laj Nicodemo. ⁵² Que'chak'oc ut que'xye re: —¿Ma lāat ajcui' aj Galilea laat? Tzol acuib chi us sa' li Santil Hu re tāq'ue retal nak mā jun profeta chalenak chak Galilea, chanqueb. ⁵³ Ut chirix chic a'an, chixjunileb que'cgeb sa' rochocheb.

8

Quic'ame'riq'uin li Jesús jun li ixtli quixmux ru xsumlajic

¹ Li Jesús co sa' li tzul Olivos. ² Cuulajak chic nak toj ek'ela co cui'chic sa' li templo. Li q'uila tenamit que'cuulac riq'uin. Ut nak quic'oja, qui-oc cui'chic chixch'olobanquil li xyalal chiruheb. ³ Eb laj fariseo ut eb laj tzolol chak'rab que'xc'am riq'uin li Jesús jun li ixtli yo chixmuxbal ru xsumlajic nak que'xtau ut coxxe'xxakab chiruheb chixjunileb. ⁴ Que'xye: —At tzolonel, li ixtli a'in yo chixmuxbal ru xsumlajic nak xkatau. ⁵ Sa' li chak'rab li quixq'ue ke laj Moisés naxye nak cutbileb chi pec nak te'camsik eb li ixtli neque'xmux ru lix sumlajic jo' xbanu li ixtli a'in. Ut lāat, ¿c'a'ru nacaye? chanqueb. ⁶ Que'xye re li Jesús chi jo'can yal re rilbal c'a'na ru tixye xban nak yoqueb chixsic'bal c'a'ru te'xjít cui'. Aban li Jesús quixxulub rib ut qui-oc chi tz'ibac chiru ch'och' riq'uin ru'uj ruk'. ⁷ Ut xban nak yoqueb chixpatz'bal, li Jesús quixa'kli cui'chic ut quixye rebeb: —Li ani māc'a' xmac sa' eyānk, a'an li xben li tixcut li pec, chan. ⁸ Ut quixxulub rib ut qui-oc cui'chic chi tz'ibac chiru ch'och'. ⁹ Nak que'rabi li c'a'ru quixye, que'rec'a rib xban nak cuanqueb xmac ut que'oc chi elc chi xjunkaleb. Xben cua que'el li chequel cuink ut chirixeb a'an que'el li toj sajeb. Quicana xjunes li Jesús ut li ixtli xakxo chiru. ¹⁰ Li Jesús quixa'kli cui'chic ut quixye re li ixtli: —¿Bar cuanqueb li yoqueb chi jitoc acue? ¿Ma mā ani xq'uehoc acue chixtobal amāc? chan. ¹¹ Ut li ixtli quixye re: —Mā jun, Kacua'. — Ut li Jesús quixye re: —Chi moco lāin tatinq'ue chixtojbal amāc. Ayu ut matmācōb chic, chan.

Li Jesús quixch'olob xyalal chiruheb nak a'an li Cristo

¹² Li Jesús quiatinac cui'chic riq'uineb li tenamit ut quixye rebeb: —Lāin lix cutan saken li ruchich'och'. Li ani tapabank cue lain, inc'a' chic tacuank sa' xk'ojojinal ru li māc. Tacuank ban sa' cutan saken ut tacuank xyu'am

chi junelic, chan. ¹³ Ut eb laj fariseo que'xye re: —Mäc'a' na-oc cui' li c'a'ru yocat chixyebal xban nak chäcuix ajcui' lqat yocat chi atinac, chanqueb. ¹⁴ Li Jesús quixye reheb: —Cuan xcuanguil li ninye usta yoquin chi atinac chichuix lain xban nak tz'akal yal li ninye. Laex inc'a' nequenau bar xinchal chak, chi moco nequenau bar tinxic. Ca'aj cui' lain ninna'oc re bar xinchal chak ut bar tinxic. ¹⁵ Laex nequexrakoc atin jo' nequeraj laex ejunes. Lain ma ani sa' aj bën yoquin chi rakoc atin. ¹⁶ Abanan cui tinrakok atin, tinbanu sa' tiquilal xban nak inc'a' ninrakoc atin injunes. Ninbanu ban jo' naraç lin Yucua' li quitaklan chak cue. ¹⁷ Sa' le chak'rab tz'ibanol retalil cui cuan cuibeb li cuink junaj lix c'a'uxeb riq'uin li c'a'ru te'xye, tento xpabanquil li ratineb. ¹⁸ Lain ninye li yal chichuix ajcui' lain. Ut lin Yucua' li quitaklan chak cue, a'an naxch'olob ajcui' li yal chichuix, chan li Jesús. ¹⁹ Eb laj fariseo que'chak'oc ut que'xye re: —¿Ani la yucua? chanqueb re. Li Jesús quixye reheb: —Laex inc'a' nequenau ani lin Yucua' xban nak inc'a' nequenau cuu lain. Cui ta nequenau cuu lain, nequenau aj raj cui' ru lin Yucua', chan reheb. ²⁰ Chixjunil a'in quixye li Jesús reheb nak yo chixch'olobanquil li xyalal chiruheb li cuanqueb sa' li templo sa' li na'ajej bar neque'xq'ue cui' lix mayejeb. Ut ma ani quichapoc re xban nak toj maji' nacuulac xk'ehil. ²¹ Ut li Jesús quixye cui' chic reheb: —Lain tinxic. Tinësic' raj chic abanan inc'a' tinetü xban nak inc'a' taruk texxic bar tinxic cui' lain. Texcamk ban sa' le mac, chan. ²² Ut eb laj judío que'xye: —A'an xye nak inc'a' naru toxic bar taxic cui' a'an. ¿C'a'ut nak xye ke chi jo'can? ¿Ma yo chixc'oxlanquil xcamsinqul rib? chanqueb. ²³ Li Jesús quixye reheb: —Laex aj ruchich'och'. Abanan lain macua'in aj ruchich'och'. Lain sa' choxa xinchal chak. ²⁴ Jo'can nak xinye ere nak texcamk sa' le mac. Laex texcamk sa' le mac cui inc'a' nequepab nak lain ac cuanquin ajcui' chak sa' xticlajic jo' xinye ere, chan li Jesús. ²⁵ Ut eb a'an que'xye re: —Ye ke. ¿Anihat tz'akal lqat? chanqueb. Li Jesús quixye reheb: —Chalen sa' xticlajic quinye chak ere anihin lain. ²⁶ Nabal li c'a'ak re ru naru tinxie raj ere re xrakbal atin sa' eben. Li ani quitaklan chak cue, a'an tic xch'ol ut naxye li yal. Li c'a'ru xc'ut chicuu li quitaklan chak cue, a'an li ninye ere laex li cuanqueb sa' ruchich'och', chan. ²⁷ Abanan eb a'an inc'a' que'xtau ru nak li Jesús yo chi atinac chirix li Acuabej Dios. ²⁸ Ut quixye ajcui' li Jesús reheb: —Nak acak xenetaksi chiru li cruz re incamsinqul toj aran teq'ue retal nak lain li taklanbilin chak xban li Dios. Ut tenau nak mac'a' ninbanu injunes. Li c'a'ru ninye lain, a'an li quixc'utbesi chicuu lin Yucua'. ²⁹ Li ani quitaklan chak cue, a'an cuan cuiq'uin. A'an inc'a' quinixcanab injunes xban nak lain junelic ninbanu li c'a'ru naraj a'an, chan li Jesús. ³⁰ Nabaleb que'pabán re li Jesús nak que'rabi li c'a'ru quixye.

Li Jesús quixye aniheb li ralal xc'ajol laj Abraham ut aniheb li ralal xc'ajol laj tza

³¹ Li Jesús quiatìnac riq'uineb laj judío li que'pabán re. Quixye reheb: —Cui laex tebanu li c'a'ru ninye ere, laexak tz'akal intzolom. ³² Tenau chic li xyalal. Ut nak acak xenau chic li xyalal, libre chic cuankex, chan. ³³ Eb a'an que'chak'oc ut que'xye: —Lao ralal xc'ajol laj Abraham. Ma jun cua c'ayinbilo chi c'anjelac chiru anihak. ¿C'a'ut nak nacaye nak libre chic cuanko? ³⁴ Li Jesús quixye reheb: —Relic chi yal ninye ere nak chixjunileb li neque'xbanu li mausilal cuanqueb rubel xcuanguil li mac. Chanchan nak c'ayinbileb chi c'anjelac chiru. ³⁵ Junak c'ayinbil chi c'anjelac moco taçanak ta chi junaj cua sa' rochoch lix patrón. A'ut li alalbej, a'an tento nak taçanak sa' rochoch chi junaj cua. ³⁶ Jo'can nak cui lain li C'ajolbej tincolok ere chiru

li mac, relic chi yal libre chic cuãkex. ³⁷ Lain ninnau nak laex xcomonex li ralal xc'ajol laj Abraham. Abanan cuan sa' eyank li te'raj incamsinqul xban nak inc'a' nacuulac chiruheb li c'a'ru yoquin chixyebal. ³⁸ Lain ninye li c'a'ru quixc'ut chicuu lin Yucua'. Ut eb a'an neque'xbanu li c'a'ru quixye rebeb lix yucua'eb a'an, chan. ³⁹ Eb a'an que'xye re: —Laj Abraham, a'an li kaxe'tonil yucua', chanqueb. Li Jesús quixye rebeb: —Cui ta laex ralal xc'ajol laj Abraham, t̄ebanu raj jo' quixbanu laj Abraham. Chabil raj le na'leb jo' xna'leb a'an nak quicuan. ⁴⁰ Abanan laex teraj incamsinqul xban nak lain xinye ere li xyalal jo' quic'utbesic' chicuu xban li Dios Acuabej. Laj Abraham inc'a' quixbanu jo' yoquex laex. ⁴¹ Inc'a' yoquex chixbanunquil li quixye laj Abraham. Yoquex ban chixbanunquil li naxye le yucua', chan li Jesús. Eb a'an que'chak'oc ut que'xye re: —Moco lāo ta ralal xc'ajol laj co'b̄et. Jun ajcui' li kayucua' cuan. A'an li Dios, chanqueb. ⁴² Li Jesús quixye rebeb: —Cui ta yal nak li Dios eyucua', niquinera raj lain xban nak riq'uin li Dios quinchal chak. Cuanquin arin sa' eyank. Inc'a' quintakla chak cuib injunes. A' li Dios, a'an li quitaklan chak cue. ⁴³ ¿C'a'ut nak inc'a' nequeretru li c'a'ru ninye? Inc'a' nequec'ul li cuatin xban nak inc'a' nequeraj rabinquil li c'a'ru yoquin chixyebal. ⁴⁴ Laex ralal xc'ajol laj tza. A'an li nataklan sa' eben. Laex nequebanu li c'a'ru naraj a'an xban nak cuanquex rubel xcuanganil. A'an aj camsinel chalen sa' xticlavic. Inc'a' nacuulac chiru li yal xban nak a'an aj tic'ti'. Ac re nak natic'ti'ic. A'an li xyucua'il li tic'ti'. ⁴⁵ Lain ninye ere li xyalal. Jo'can nak inc'a' niquinepab. ⁴⁶ ¿Ma cuan junak sa' eyank taruk tixye nak cuan inmac lain? Cui ninye li yal, ¿c'a'ut nak inc'a' niquinepab? ⁴⁷ Cui ta laex ralal xc'ajol li Dios, nequepab raj li c'a'ru naxye. Abanan laex mācua'ex ralal xc'ajol li Dios. Jo'can nak inc'a' nequeraj rabinquil li c'a'ru naxye, chan li Jesús. ⁴⁸ Que'chak'oc eb laj judío ut que'xye re: —Yal ajcui' nacaye. Samaria la tenamit ut cuan māus aj musik'ej aquiq'uin, chanqueb. ⁴⁹ Li Jesús quixye rebeb: —Māc'a' māus aj musik'ej cuiq'uin. Li c'a'ru yoquin chixbanunquil lain, a'an xq'uebal xllok'al lin Yucua'. Abanan laex niquinetz'ektana. ⁵⁰ Lain inc'a' ninsic' inlok'al. Abanan cuan jun naraj nāk tq̄q'uehek' inlok'al. Ut a'an li tarakok atin sa' eben xban nak yoquex chintz'ektanquil. ⁵¹ Relic chi yal ninye ere nak li ani tixbanu li c'a'ru ninye, li jun a'an inc'a' tācamk, chan. ⁵² Eb laj judío que'chak'oc ut que'xye: —Anakcuan nakanau chi tz'akal nak cuan māus aj musik'ej aquiq'uin. Laj Abraham quicam ut que'cam ajcui' eb li profeta. Abanan laat nacaye nak li ani tābanunk re li c'a'ru nacaye inc'a' tācamk. ⁵³ ¿Ma k'axal nim ta bi' acuanquil laat chiru laj Abraham li kaxe'tonil yucua'? A'an quicam ut que'cam ajcui' li profeta. ¿Anihat laat nak nacaye chi jo'can? chanqueb re. ⁵⁴ Li Jesús quixye rebeb: —Cui lain tinq'ue inlok'al injunes, māc'a' na-oc cui' lin lok'al. Li naq'uehoc lin lok'al, a'an lin Yucua' li nequeye laex nak a'an le Dios. ⁵⁵ Laex inc'a' nequenau ru a'an. Abanan lain ninnau ru. Cui ut tinye ta nak inc'a' ninnau ru, lainak raj aj tic'ti' jo' laex. Aban lain ninnau ru ut ninbanu li c'a'ru naxye a'an. ⁵⁶ Laj Abraham le xe'tonil yucua' quisaho' sa' xch'ol nak tinchalk' sa' ruchich'och'. Quiril nak quinc'ulun ut quisaho' sa' xch'ol xban, chan li Jesús rebeb. ⁵⁷ Eb a'an que'xye re: —¿Chanru nak xacuil ru laj Abraham? Laat toj maji' nacabanu lajeb roxc'al (50) chihab, chanqueb. ⁵⁸ Li Jesús quichak'oc ut quixye rebeb: —Relic chi yal tinye ere nak chalen chak sa' xticlavic nak toj maji' nayo'la laj Abraham, ac cuanquin ajcui' chak lain, chan li Jesús. ⁵⁹ C'ajo' nak que'josk'o' ut que'oc raj chixcutinquel chi pec. Abanan li Jesús quixmuk rib chiruheb. Qui-el sa' li templo ut co'.

9

Li Jesús quixq'urtesi jun li cuink mutz' ru chalen sa' xyo'lajic

- 1 Nak yo chi xic li Jesús, quiril jun li cuink mutz' ru chalen sa' xyo'lajic.
- 2 Eb lix tzolom li Jesús que'xpatz' re: —At tzolone, ¿c'a'ut nak mutz' ru li cuink a'in? ¿Ani cuan xmac? ¿Ma li cuink a'in malaj ut lix na' xyucua? chanqueb.
- 3 Li Jesús quixye: —Ma ani cuan xmac. Chi moco a'an, chi moco lix na' xyucua'. A'an xc'ul chi jo'can yal re nak tac'utbesik lix cuanguilal li Dios, chan.
- 4 Tento nak tinseba cuib chixbanunquil li c'a'ru naraj li Dios li xtaklan chak cue. Anakcuán xcutanquil xbanunquil xban nak tacuulak xk'ehil nak mā ani chic taruk tac'anjelak.
- 5 Nak toj cuankin sa' ruchich'och', lain tincutanobresi lix c'a'uxeb li cuanqueb sa' ruchich'och', chan.
- 6 Nak ac xye a'in, li Jesús quichubac sa' ch'och'. Riq'un lix chub quixyib li sulul. Ut quixyul sa' rix ru li mutz'. 7 Ut quixye re: —Ayu. Ch'aj chak la cuu sa' li ha' Siloé, chan. Siloé naraj naxye "taklanbil chak". Li mutz' co ut quixch'aj chak li ru ut na-iloc chic nak quisuk'i chak.
- 8 Ut eb li rech cabal ut chixjunileb li neque'na'oc nak mutz' ru, que'xye: —¿Ma macua' ta bi' a'an li nac'oja chire be chixtz'amankuil c'a'ru re? chanqueb.
- 9 Ut cuan li que'yehoc: —Yal. A'an li cuink, chanqueb. Cuan cui'chic li que'xye: —Chanchan a'an, aban macua', chanqueb.
- 10 Ut que'xye re: —Cui laat li cuink a'an, ¿chanru nak xtehon li xnak' acuu? chanqueb.
- 11 Quichak'oc li cuink ut quixye reheb: —Li cuink Jesús xc'aba', quixyib li sulul. Quixyul sa' rix cuu ut quixye cue nak tinxic chí ch'ajoc sa' li ha' Siloé. Jo'can nak coín ut quinch'aj li cuu ut anakcuán nin-iloc chic, chan li cuink.
- 12 Ut que'xye re: —Bar cuan li cuink a'an? chanqueb. Ut li cuink quixye reheb: —Inc'a' ninnau bar cuan, chan.
- 13 Ut que'xc'am riq'uineb laj fariseo li cuink li mutz' nak quicuan,
- 14 xban nak li Jesús quixyib li sulul sa' li hilobal cutan ut quixq'ue chi iloc li mutz'.
- 15 Ut eb laj fariseo que'xpatz' cui'chic re li cuink chanru nak quiteli li xnak' ru. Li cuink quixye reheb: —Li Jesús quixq'ue li sulul sa' rix cuu, ut quinch'aj li cuu ut anakcuán nin-iloc chic, chan.
- 16 Cuanqueb laj fariseo que'xye: —Li cuink a'an, li Jesús xc'aba', moco taklanbil ta chak xban li Dios xban nak inc'a' naxq'ue xllok'al li hilobal cutan, chanqueb.
- 17 Ut cuanqueb cui'chic que'yehoc re: —¿Chanru nak tixbanu li milagro junak cuink aj mac? chanqueb. Xban nak jalan jalank neque'xc'oxla chirix li Jesús, inc'a' chic junajeb xch'oleb.
- 18 Ut eb laj judío li neque'taklan inc'a' que'raj xpabankuil nak li cuink mutz' junxil ut na-iloc chic. Jo'can nak que'xtakla xbokbal lix na' xyucua'.
- 19 Ut que'xpatz' reheb: —¿Ma a'in le ralal? ¿Ma yal nak mutz' li ru chalen sa' xyo'lajic?
- 20 ¿Chanru nak na-iloc chic anakcuán? chanqueb.
- 21 Abanan inc'a' nakanau ani xtehoc li ru chi moco nakanau chanru nak na-iloc chic. Patz'omak re a'an. Ac cuan xchihab, Tixnau chic xsumenquil a'an, chanqueb.
- 22 Que'xye chi jo'can lix na' xyucua' xban nak que'xucuac xbaneb li neque'taklan sa' xyankeb laj judío xban nak ac c'ubanbil ru xbaneb cui ani tixye nak li Jesús, a'an li Cristo, li jun a'an inc'a' chic tac'ulek' sa' li cab li neque'xch'utub cui' ribeb laj judío.
- 23 Jo'can nak lix na' xyucua' que'xye: —A'an ac cuan xchihab. Patz'omak re a'an.
- 24 Eb laj fariseo que'xbok cui'chic xca' sut li cuink, li mutz' nak quicuan, ut

que'xye re: —Sa' xc'aba' li Dios taye ke li xyālal. Lao nakanau nak li cuink a'an aj mac, chanqueb re. ²⁵ Li cuink, li mutz' nak quicuan, quixye reheb: —Lain inc'a' ninnau ma aj mac mālaj ut inc'a'. Ca'aj cui' li ninnau lajnak mutz'in nak xincuan ut anakcuan nin-iloc chic, chan. ²⁶ Ut que'xye cui'chic re: —¿C'a'ru xbanu acue? ¿Chanru nak xatxq'ue chi iloc? chanqueb. ²⁷ Li cuink quixye reheb: —Ac xinye ere chanru xbanu nak xinixq'ue chi iloc ut inc'a' xeraj xpābanquil. ¿C'a'ut nak teraj tērabi cui'chic? ¿Ma teraj ajcui' oc chok' xtzolom laex? chan reheb. ²⁸ Ut que'xhob li cuink ut que'xye re: —Laat xtzolom li cuink a'an. Lao inc'a'. Lao xtzolom laj Moisés, chanqueb re. ²⁹ —Lao nakanau nak li Dios quiatinac riq'un laj Moisés; abanan li cuink a'an inc'a' nakanau bar xchal chak, chanqueb. ³⁰ Li cuink quixye reheb: —Laex nequeye nak inc'a' nequenau bar xchal chak li cuink a'an. Nasach inch'ol eban xban nak li cuink a'an xq'uehoc cue chi iloc laj. ³¹ Lao nakanau nak li Dios inc'a' narabi nak neque'tijoc laj mac. Narabi ban līx tijeb li neque'xxucua ru ut neque'xbanu li c'a'ru naraj. ³² Chalen chak sa' xticladic li ruchich'och', ma jun sut qui-abiman nak cuan ta junak cuink tixte ta xnak' ru junak mutz' chalen sa' xyo'lajic. ³³ Cui ta inc'a' taklanbil chak xban li Dios li cuink a'in, mac'a' raj naru naxbanu, chan li cuink reheb. ³⁴ Eb a'an que'chak'oc ut que'xye re: —Laat aj mac chalen chak sa' ayo'lajic. ¿Ma nacac'oxla nak naru taq'ue kana'leb lao? chanqueb. Ut que'risi li cuink sa' xyankeb ut inc'a' chic que'xc'ul. ³⁵ Li Jesús quirabi resil li c'a'ru que'xbanu. Nak quixtau li cuink li quixq'urtesi, quixye re: —¿Ma nacapab li Ralal li Dios? chan re. ³⁶ Li cuink quixye re: —Ye cue ani a'an, Kacua', re nak taruk tinpab laj, chan. ³⁷ Li Jesús quixye re: —A'an li yocat chirilbal ru anakcuan. Li Ralal li Dios, a'an laj li yoquin chi atinac acuiq'uin, chan. ³⁸ Li cuink quixye: —At Kacua', lajnak nacatinpab, chan ut quixcuik'ib rib chiru ut quixlok'oni. ³⁹ Li Jesús quixye re: —Lain xinchal sa' ruchich'och' chi rakoc' atin. Lain tincutanobresi xna'lebeb li inc'a' neque'xtau xyālal. Ut timuk li xyālal chiruheb li neque'xc'oxla nak cuanqueb xna'leb. Chanchan nak tinq'ueheb chi iloc li inc'a' neque'iloc. Ut tinq'ueheb chi mutz'oc' li neque'iloc, chan li Jesús. ⁴⁰ Cuanqueb laj fariseo aran ut yoqueb chirabinquil li quixye li Jesús. Eb a'an que'xye re li Jesús: —¿Ma mutz'o' ta bi' lao nak nacac'oxla laat? chanqueb. ⁴¹ Li Jesús quixye reheb: —Chanchanex mutz'. Cui ta laex inc'a' nequenau xyālal, mac'a' raj emac. Abanan cuan emac xban nak nequeye nak nequenau xyālal, chan li Jesús.

10

Li Jesús quixye nak a'an li chabil pastor

¹ Relic chi yal tinye ere, li ani na-oc sa' xcorraleb li carner chi inc'a' na-oc sa' li tz'akal oquebal re li corral, li jun a'an aj elk'. ² Abanan li ani na-oc sa' li tz'akal oquebal re li corral, li jun a'an aj ilol reheb li carner. ³ Li nac'ac'alen re li oquebal naxnau ru a'an ut naxte li oquebal chiru. Ut eb li carner neque'xna'u ru li xyab xcux nak naxbokeb chi xjunkaleb riq'un līx c'aba'eb ut narisheb sa' li corral. ⁴ Nak ac xrisiheb, naxberesiheb ut eb li carner neque'xtake xban nak neque'xnau ru xyab līx cux. ⁵ Abanan junak li inc'a' neque'xnau ru, ma jok'e te'xtake. Elelic ban chic te'xbanu chiru xban nak inc'a' neque'xnau ru xyab līx cux, chan li Jesús. ⁶ A'an a'in li jaljoquil ru atin li quixye li Jesús reheb. Abanan inc'a' que'xtau ru līx yālal. ⁷ Jo'can nak li Jesús quixye cui'chic reheb: —Relic chi yal ninye ere, Lain li oquebal reheb li te'pabank cue. ⁸ Chixjunileb li que'c'ulun xben cua chicuu laj,

a'aneb aj ḥek'eb ut aj balak'eb. Ut eb li neque'pāban cue, inc'a' neque'xpab li c'a'ru neque'xye. ⁹ Lain li oquebal. Chixjunileb li neque'pāban cue lain, te'colek' ut lain tin-ilok reheb. Chanchaneb li carner li neque'oc ut neque'el ut neque'xtau lix cuahet. ¹⁰ Laj elk' nachal chi elk'ac ut chi camsinc ut chi sachoc. Lain xinchal re nak tācuānky eyu'am chi tz'akal. Tācuānky eyu'am chi junelic. ¹¹ Lain chanchanin jun li chābil pastor. Junak chābil pastor naxk'axtesi lix yu'am sa' xc'aba'eb lix carner. ¹² Junak tojibil mos mācua' tz'akal pastor xban nak mācua' a'an laj echal re li carner. Naril nak yo' chi chālc laj xoj, naxcanabeb li carner ut naelelic. Ut laj xoj naxchapeb li carner ut naxcha'cha'i ruheb. ¹³ Li tojibil mos naelelic xban nak yal mos. A'an inc'a' naxq'ue xch'ol chixcolbaleb li carner. ¹⁴ Lain chanchanin jun chābil pastor. Lain ninnau ruheb li cualal inc'ajol. Ut eb a'an neque'xnau cuu lain. ¹⁵ Jo' nak lin yucua' naxnau cuu lain, jo'can ajcui' nak ninnau ru lin yucua' ut tink'axtesi cuib chi camsic re xcolbaleb li cualal inc'ajol. ¹⁶ Cuanqueb ajcui' cualal inc'ajol jalaneb xtenamiteb. Tento nak lain tinc'ameb chak. Eb a'an te'rabi ajcui' xyab lin cux. Ut junajakeb chic ru nak te'cuānk ut junak ajcui' laj ilol reheb. ¹⁷ Ninxra li Yucua'bej xban nak lain tink'axtesi cuib chi camsic ut tinc'ul cui'chic lin yu'am. ¹⁸ Ma ani taq'uehok cue chi camsic cui inc'a' nacuaj lain. Xban nak lain nacuaj, tink'axtesi cuib chi camsic. Cuan incuanquil chixk'axtesinquil lin yu'am. Ut cuan ajcui' incuanquil chixc'ulbal cui'chic lin yu'am. A'an a'in li quixye cue lin Yucua' nak tento tinbañu, chan li Jesús. ¹⁹ Ut xban nak jalan jalank yoqueb chixc'oxlanquil chirix li quixye li Jesús, quicuan cui'chic jachoc ib sa' xyankeb. ²⁰ Nabaleb que'yehoc re: —Cuan maus aj musik'ej riq'uin. Inc'a' tuktu xjolom. ¿C'a'ut nak nequerabi li c'a'ru naxye a'an? chanqueb. ²¹ Ut cuanqueb cui'chic yoqueb xyebal: —Inc'a' naru taatínak chi jo'can cui cuan māus aj musik'ej riq'uin. ¿Ma taruk ta bi' tixq'ue chi iloc junak mutz' cui cuan māus aj musik'ej riq'uin? chanqueb.

Li Jesús quitz'ektanqac xbaneb laj judío

²² Yo' li habalk'e aran Jerusalén nak quicuulac xk'ehil li nink'e re xjulti-canquil nak que'xk'axtesi li templo sa' ruk' li Kacua' Dios. ²³ Ut li Jesús yo' chi béc sa' li templo bar cuan cui' li oquebal Salomón xc'aba'. ²⁴ Quisute' xbaneb laj judío ut que'xye re: —¿Jok'e taye ke chi tz'akal anihat? ¿Ma yal yokat chixq'uebal kac'a'ux? ¿Ma laat li Mesías, li yechi'nbil xban li Dios? Cui laat li Cristo, ye ke chi tz'akal anakcuan, chanqueb. ²⁵ Li Jesús quixye reheb: —Ac xinye ere anihin ut inc'a' niquinepab. Li milagros li yoquin chixbanunquil sa' xc'aba' lin Yucua', a'an naxc'ut chi tz'akal anihin. ²⁶ Læx inc'a' niquinepab xban nak laex mācua'ex cualal inc'ajol. ²⁷ Eb li cualal inc'ajol neque'rabi li c'a'ru ninye. Lain ninnauheb ru ut eb a'an neque'xbanu li c'a'ru ninye. ²⁸ Lain tinq'ueheb xyu'am chi junelic. Inc'a' te'osok' ut mā ani taruk tamak'ok reheb chicuu. ²⁹ Lin Yucua' li k'axal nim xcuánquil chiruheb chixjunil, a'an li quik'axtesin reheb sa' cuuk'. Mā ani naru tamak'ok reheb chiru a'an. ³⁰ Lain ut li Yucua'bej junajo chi kibil kib, chan li Jesús. ³¹ Ut eb laj judío que'xchap xpequeb ut que'raj cui'chic xcubtal chi pec. ³² Li Jesús quixye reheb: —Nabal li chabilal xinbañu cheru jo' quic'utbesic chicuu xban lin Yucua'. ¿Bar cuan reheb li chabil c'anjal a'in li xinbañu tineçuti cui' chi pec? chan. ³³ Eb a'an que'chak'oc ut que'xye: —Inc'a' tatkacut chi pec xban li chābilal xabánu. Tatkacut chi pec xban nak nacajuntak'eta acuib riq'uin li Dios. Laat yal cuinkat. Moco Diosat ta jo' yocat chixyebal, chanqueb re li Jesús. ³⁴ Li Jesús quixye reheb: —¿Ma inc'a' ta bi' tz'ibañbil retalil sa' le chak'rab nak li Dios quixye reheb li que'c'uluc re li ratin "diosex læx"? (Sal.

82:6) ³⁵ Nakanau nak inc'a' naru takaye nak inc'a' yal li tz'ib'anbil sa' li Santil Hu. Li Dios quixye "dios" reheb li quixxakab. ³⁶ Li Acuabej Dios xsic'oc cuu ut xinixtakla chak sa' ruchich'och. ¿C'a'ut nak nequeye laex nak yoquin chixmajecuanquil li Dios riq'uin nak ninye nak lain li Ralal? ³⁷ Cui lain inc'a' yoquin chixbanunquil li c'a'ru naraj lin Yucua', mepab nak lain li Ralal li Dios. ³⁸ Abanan cui yoquin chixbanunquil li c'a'ru naraj li Dios, usta inc'a' niquinepab lain, cheq'ue retal li milagro li yoquin chixbanunquil re nak tenau chi tz'akal nak li Dios cuan cuiq'un ut lain cuanquin riq'uin a'an, chan li Jesús. ³⁹ Ut que'xyal cui'chic xchapbal, abanan li Jesús qui-el chiruheb. ⁴⁰ Ut co jun pac'al li nima' Jordán sa' li na'ajej li quicubsin cui' ha' laj Juan junxil. Ut aran quicana. ⁴¹ Nabaleb li tenamit que'cuulac riq'uin. Yoqueb chixyebal chi ribileb rib: —Laj Juan ma jun milagro quixbanu. Abanan yal chixjunil li quixye chirix li cuink a'in, chanqueb. ⁴² Ut nabaleb li cuanqueb aran que'xpab li Jesús.

11

Laj Lázaro quicam, abanan li Jesús quixcuaclesi cui'chic chi yo'yo

¹ Jun li cuink aj Lázaro xc'aba' quiyajer. Betania xtenamit. Ut aran ajcui' cuanqueb li ranab cuib, lix Marta ut lix María. ² (Lix María, a'an li quiq'uehoc re li sununquil ban chiru rok li Jesús ut quixmes riq'uin rismal xjolom.) ³ Eb li ranab que'xtakla xyebal re li Jesús: —Kacua', laj Lázaro li nacara yaj. ⁴ Li Jesús quirabi nak yaj laj Lázaro, ut quixye: —Laj Lázaro inc'a' tacamk chi junaj cua xban li yajel a'an. Li yajel a'an yal re nak taq'uehek' xlok'al li Dios ut taq'uehek' ajcui' inlok'al lain li Ralal li Dios, chan. ⁵ Li Jesús naxraheb lix María ut lix Marta jo' ajcui' laj Lázaro. ⁶ Abanan inc'a' co chiribal chi junpat, usta quirabi nak nim xyajel laj Lázaro. Toj quicana ban cuib cutan chic sa' li na'ajej li cuan cui'. ⁷ Nak ac xnume' li cuib cutan, li Jesús quixye reheb lix tzolom: —Yo'keb cui'chic Judea, chan. ⁸ Lix tzolom que'chak'oc ut que'xye: —At tzolonel, nak cuanco aran, eb laj judío li cuanqueb aran que'raj raj acamsinquel chi pec. ¿Ma toxic cui'chic aran? chanqueb. ⁹ Li Jesús quixye reheb: —¿Ma inc'a' ta bi' cablaju or ru li jun cutan? Li ani nabec chi cutan inc'a' naxtich rib xban nak cutan. ¹⁰ Abanan li ani nabec chiru k'oijin, naxtich rib xban nak mac'a' li cutan saken riq'uin. Li ani naxbanu jo' naraj li Dios inc'a' te'xcamsi chi toj maji' nacuulac xk'ehil. ¹¹ Nak ac xye a'in, li Jesús quixye reheb lix tzolom: —Laj Lázaro li nacara, yo chi cuarc. Abanan lain xic cue chirajsinquel, chan. ¹² Eb lix tzolom que'xye: —Kacua', cui yo chi cuarc, a'an retaliq nak taq'uirak, chanqueb. ¹³ Eb a'an inc'a' que'xtau ru nak li Jesús quixye nak camenak chic laj Lázaro. Sa' xch'oleb a'an nak yal nak yal cuarc yo. ¹⁴ Tojo'nak li Jesús quixye chi tz'akal reheb: —Laj Lázaro camenak chic. ¹⁵ Abanan nasaho' sa' inch'ol nak ma anihin chak aran nak xcam re nak laex tēpab nak cuan incuanquil. Yo'keb riq'uin, chan li Jesús. ¹⁶ Laj Tomás, li neque'xye lut re, quixye reheb li rech aj tzolonelil: —Yo'keb ajcui' lao usta tocamsik kochben laj tzolonel, chan. ¹⁷ Nak quicuulac li Jesús aran Betania, ac cuan chic cahib cutan xmukbal laj Lázaro. ¹⁸ Li tenamit Betania nach' cuan riq'uin Jerusalén, mero legua tana xnajtil. ¹⁹ Nabaleb laj judío que'chal chix'ojobanquil xch'oleb lix María ut lix Marta xban nak ac xcam li raseb. ²⁰ Que'rabi nak yo chi chalc li Jesús, ut lix Marta co chix'ulbal. Abanan lix María quicana sa' cab. ²¹ Lix Marta quixye re li Jesús: —Kacua', cui ta cuancat arin, inc'a' raj xcam li cuas. ²² Abanan lain ninnau nak chixjunil li c'a'ru

tat'z'ama chiru li Dios, a'an tixq'ue acue, chan lix Marta. ²³ Li Jesús quixye re: —La cuas tacuaclik cui'chic chi yo'yo, chan. ²⁴ Ut lix Marta quixye: —Lain ninnau nak tacuaclik cui'chic chi yo'yo nak te'cuaclik li camenak sa' roso'jiqueb li cutan, chan. ²⁵ Ut li Jesús quixye re: —Lain li nincuaclesin reheb li camenak chi yo'yo. Lain li ning'uehoc junelic yu'am. Li ani napabán cue laj tacuank xyu'am chi junelic usta nacam. ²⁶ Ut li ani cuan xyu'am ut niquinixpab, inc'a' tacqamk chi junaj cua. Cuank ban xyu'am chi junelic. ¿Ma nacapab a'in? chan li Jesús. ²⁷ Quichak'oc lix Marta ut quixye: —Ninpaḥ, Kacua'. Lain ninnau nak lqat li Cristo li Ralal li Dios li yoco chiroybeninq'il, chan lix Marta. ²⁸ Nak ac xye a'in, lix Marta co sa' rochoch chixbokbal lix María li ritz'in. Ut quixye re chi timil re nak inc'a' te'rabi chixjunileb: —Xc'ulun laj tzolonel ut taraj atinac acuiq'unin, chan re. ²⁹ Nak lix María quirabi nak ac xc'ulun li Jesús, co sa' junpat chixc'ulbal. ³⁰ Li Jesús toj maji' na-oc sa' li tenamit. Toj cuan chak sa' li na'ajej bar quic'ule' cui' xban lix Marta. ³¹ Nabaleb laj judío li cuanqueb sa'li rochoch yoqueb chixc'ojobanquil xch'ol lix María. Que'ril nak co sa' junpat. Que'xtake xban nak eb a'an que'xc'oxla nak lix María co chi yabac sa'li muklebal. ³² Lix María quicuulac cuan cui' li Jesús. Nak quiril ru, quixcuik'ib rib chiru ut quixye re: —Kacua', cui ta cuancat arin, inc'a' raj xcam li cuas, chan re. ³³ Li Jesús quiril nak yo chi yabac ut yoqueb ajcui' chi yabac li cuanqueb rochben. C'ajo' nak quiyot'e' xch'ol chi rilbal. ³⁴ Ut quixye reheb: —¿Bar xemuk? — Que'xye re: —Yo'o re tacuil bar xkamuk, chanqueb. ³⁵ Ut li Jesús quiyabac xban xrahil xch'ol. ³⁶ Cuanqueb aran que'xye: —Ilomak c'ajo' nak quixra li camenak, chanqueb. ³⁷ Ut cuanqueb cui'chic li que'xye: —A'an quixq'ue chi iloc li mutz'. ¿Ma inc'a' raj xru quixcol laj Lázaro chiru li cämc? chanqueb. ³⁸ Ut quiyot'e' cui'chic xch'ol li Jesús. Co aran cuan cui'li muklebal yibanbil sa' jun ochoch pec. Li muklebal tz'aptz' riq'uin jun nimla pec. ³⁹ Quixye li Jesús: —Isihomak li pec. —Lix Marta, li ranab li camenak quixye re: —Kacua', ac xchuho'. Cuan chic cahib cutan xmukbal, chan. ⁴⁰ Quixye li Jesús re: —¿Ma inc'a' xinye acue nak cui tapab, tacuil xcuanylal li Dios? chan. ⁴¹ Ut que'risi li pec chire li muklebal li que'xq'ue cui' li camenak. Li Jesús qui-iloc takec' ut quitijoc. Quixye: —At inYucua', ninbantioxi chacuu nak nacacuabi li c'a'ru nintz'ama chacuu. ⁴² Lain ninnau nak junelic niquinacuabi. Abanan ninye acue a'in re nak eb li cuanqueb arin te'ril li c'a'ru tinbanu ut te'xpab nak lqat xattaklan chak cue, chan li Jesús nak quitijoc. ⁴³ Nak quirake' chi tijoc, li Jesús quixye chi cau xyab xcux: —At Lázaro, cuaclin chak ut quim arin, chan. ⁴⁴ Ut laj Lázaro li quicam qui-el chak. Lanlo sa' jun t'icr jo'c'aynakeb chixbanunquil reheb li camenak. Li ru lanlo ajcui' sa' t'icr ut bac'bo li rok ut bac'bo li ruk'. Li Jesús quixye reheb: —Hitomak ut canabomak chi bęc, chan.

Eb laj judío que'xc'ub ru chanru nak te'xcamsi li Jesús

⁴⁵ Ut nabaleb laj judío li cuanqueb rochben lix María que'xpab li Jesús nak que'ril li milagro li quixbañu. ⁴⁶ Abanan cuanqueb ajcui' li que'coeb riq'uineb laj fariseo ut que'xye reheb chixjunil li quixbañu li Jesús. ⁴⁷ Ut eb laj fariseo rochbeneb li xbénil aj tij que'xch'utub ribeb riq'uineb li neque'taklan sa' xyānakeb laj judío ut que'xye reheb: —¿C'a'ru takabánu? Li cuink a'in nabal li milagro yo chixbanunquil. ⁴⁸ Cui takacanab chi jo'can, chixjunileb li tenamit te'pabank re. Út te'josk'ok kiq'uin eb laj Roma li neque'taklan sa' kabən. Te'xjuc' li katempo ut te'xsach li katenamit, chanqueb. ⁴⁹ Jun li cuink

aj Caifás xc'aba', a'an li xyucua'il aj tij sa' li chihab a'an. Quixye reheb: — Laex mäc'a' ena'leb. ⁵⁰ ¿Ma inc'a' nequec'oxla nak k'axal us raj nak tacamk jun chi cuink sa' xc'aba'eb li tenamit chiru nak täsachek' ku chikajunilo lao aj judío xbaneb laj Roma? chan. ⁵¹ Laj Caifás, a'an li xyucua'il aj tij sa' li chihab a'an. Ut li c'a'ru quixye inc'a' quixye yal xjunes. Quixye ban xban nak li Dios quic'utuc chiru li c'a'ru tixye. Jo'can nak quixye nak li Jesús tacamk sa' xc'aba'eb laj judío. ⁵² Ut mäcu'a' ca'aj cui' sa' xc'aba'eb a'an nak tacamk li Jesús. Re aj ban cui' nak junajakeb chic ru chixjunileb li ralal xc'ajol li cuanqueb sa' chixjunil li ruchich'och'. ⁵³ Ut chalen sa' li cutan a'an, eb li neque'taklan sa' xyänkeb laj judío que'oc xc'ubanquil ru sa' comonil chanru nak te'xcamsi li Jesús. ⁵⁴ Xban nak que'raj xcamsinquil li Jesús, inc'a' chic quiraj xc'utbal rib chiruheb laj judío. Qui-el aran ut co sa' li tenamit Efraín li cuan nach' riq'uin li chaki ch'och'. Ut aran quicana rochbeneb lix tzolom. ⁵⁵ Nak yo chi cuulac xk'ehil li nink'e Pascua, nabaleb li cristian coeb Jerusalén chixch'ajobresinquil ribeb jo' c'aynakeb chixbanunquil re xtz'amanquil xcuybal xmaqueb chiru li Dios. Tento te'xbanu a'an re nak taruk te'oquenq sa' li nink'e. ⁵⁶ Yoqueb chixsic'bal li Jesús nak que'xch'utub ribeb sa' lí templo. Que'xye chi ribileb rib: —¿C'a'ru nequec'oxla laex? ¿Ma tächalk ta cui' sa' li nink'e li cuink a'an?— ⁵⁷ Eb li xbënil aj tij ut eb laj fariseo que'xye reheb li tenamit nak cui ani taabink resil bar cuan li Jesús, tento te'xye resil, re nak tarük te'xtakla xchapbal.

12

Lix María quixq'ue li sununquil ban chiru rok li Jesús

¹ Cuakib cutan chic mä nacuulac xk'ehil li nink'e Pascua nak quicuulac li Jesús Betania. A'an xtenamit laj Lázaro, li quicam ut quicuaclesic cui'chic chi yo'yo xban li Jesús. ² Que'xauresi xtzacaemk li Jesús. Laj Lázaro cuan sa' xyänkeb li c'oj'oquenq sa' mex rochben li Jesús. Ut lix Marta yo chixq'uebal li tzacaemk sa' li mex. ³ Lix María quixc'am chak mero botella li sununquil ban terto xtz'ak yibanbil riq'uin nardo. Quixq'ue chiru rok li Jesús ut quixmes riq'uin li rismal xjolom. Ut c'ajo' xsununquil sa' li cab quicana xban xböc li sununquil ban. ⁴ Laj Judas Iscariote li ralal laj Simón, a'an jun reheb lix tzolom. A'an li tak'axtesink re li Jesús sa' ruk'eb li xic' neque'iloc re. ⁵ Quixye: —¿C'a'ut nak inc'a' xc'ayiman li sununquil ban a'in chi oxib ciento denarios ut xq'ueeman raj li tumin a'an reheb li neba'? chan. ⁶ Mäcu'a' xban nak naxraheb li neba' nak quixye a'an. Quixye chi jo'can xban nak aj elk'. Riq'uin a'an cuan lix bolsil li tumin ut cuan nak naxchap chok' re a'an li tumin cuan chi sa'. ⁷ Li Jesús quixye re: —Mecuech' rix li c'a'ru xbanu li ijk a'in, xban nak re inmukbal nak xq'ue li ban a'in chiru li cuok. ⁸ Li neba' junelic cuanqueb sa' eyänk. Yalak jok'e naru teten'aheb. Abanan lain moco cuankin ta chi junelic eriq'uin, chan li Jesús. ⁹ Nabaleb laj judío que'rabi resil nak li Jesús cuan aran Betania ut que'cuulac aran. Mäcu'a' ca'aj cui' li Jesús que'cuulac chirilbal. Que'cuulac aj ban cui' chirilbal laj Lázaro li quicuaclesic cui'chic chi yo'yo xban li Jesús. ¹⁰ Ut eb li xbënil aj tij que'xc'ub ru nak te'xcamsi ajcui' laj Lázaro, ¹¹ xban nak nabaleb laj judío yoqueb chi elc sa' xyänkeb ut yoqueb chixpabanquil li Jesús xban nak quicuaclesi cui'chic chi yo'yo laj Lázaro.

Li Jesús quiq'uehe' xlok'al ut quixakabac raj chok' rey nak qui-oc Jerusalén

¹² Jo' cuulajak chic li q'uila tenamit que'cuulac sa' li nink'e. Que'rabi resil nak li Jesús cuulac re Jerusalén. ¹³ Quilaje'xc'am chak xxak li mococh ut

que'chal chixc'ulbal li Jesús. Japjoqueb re chixyebal: —Lok'oninbil taxak li Kacua'. Osobtesinbil taxak li xchal sa' xc'aba' li Kacua' Dios. Osobtesinbil taxak li karey, lao aj Israel, chanqueb. ¹⁴ Li Jesús quíxto'oni jun li ch'ina bür, quitake' chirix ut yo chi xic Jerusalén jo' tz'ibánbil retalil sa' li Santil Hu:

¹⁵ Mexxucuac laex li cuanquex Sión xban nak yo chak chi chalc le rey. Chirix jun ral bür yo chak chi chalc. (Zac. 9:9)

¹⁶ Sa' li honal a'an nak yo chi c'ulmanc li c'a'ak re ru a'in, eb lix tzolom inc'a' que'xtau ru li xyalal. Abanan mokon nak ac quicuaclesic cui'chic chi yo'yo sa' xyankeb li camenak ut quiq'uehe' xlok'al, tojo'nak que'xq'ue retal nak quixc'ul jo' tz'ibánbil chak retalil sa' li Santil Hu chirix. ¹⁷ Eb li tenamit li cuanqueb rochben li Jesús nak quixcuaclesi cui'chic chi yo'yo laj Lázaro yoqueb chixyebal resilal yalak bar. ¹⁸ Li quila tenamit que'cuulac chixc'ulbal li Jesús xban nak que'rabi resil li milagro li quixbanu. ¹⁹ Eb laj fariseo que'xye chi ribileb rib: —¿Ma xeq'ue retal nak mac'a' aj e li yoco chixbanunquil? Q'uehomak retal. Anakcuan chixjunileb li tenamit yoqueb chi tákenc re li cuink a'an, chanqueb.

Li Jesús quixye resil nak tacamsik

²⁰ Cuanqueb li maçua'eb aj judío que'cuulac Jerusalén chi lok'oninc nak yo li nink'e. ²¹ Que'cuulac riq'uin laj Felipe Betsaida xtenamit xcent Galilea ut que'xye re: —Kacua', takaj xnaubal ru li Jesús, chanqueb. ²² Laj Felipe co' ut quixye resil re laj Andrés ut coeb xcabichaleb chixyebal re li Jesús.

²³ Li Jesús quixye reheb: —Xcuulac x-oril nak taq'uehok' inlok'at laj li C'ajolbej. ²⁴ Relic chi yal ninye ere nak cui li jun t'orol chi riyajil trigo inc'a' na-auman, jun t'orolak ajcui'. Út cui na-auman, naoso' sa' lí ch'och'. Jun ajcui' ru li naoso', abanan nabal li ru naxq'ue nak nauchin. ²⁵ Li ani k'axal naxra lix yu'am sa' li ruchich'och' a'in, a'an tixsach li junelic yu'am. A'ut li ani inc'a' naxra lix yu'am sa' ruchich'och', a'an tacuank xyu'am chi junelic.

²⁶ Li ani taraj c'anjelac chicuu, tento tinixtake ut tixbanu li c'a'ru ninye. Bar cuankin laj, aran ajcui' tacuank a'an. Út lin Yucua' taq'uehok xlok'al li ani tac'anjelak chicuu, chan li Jesús reheb. ²⁷ Li Jesús quixye ajcui': —Anakcuan k'axal ra sa' inch'ol. ¿Ma taruk ta bi' tinye re li Dios, "At inYucua', chinacol chiru li raylal a'in"? Lain inc'a' tinye chi jo'can xban nak a'an aj e nak xinchal sa' ruchich'och'. ²⁸ At inYucua', chinimak taxak la lok'al, chan. Ut li Dios quiatinac chak sa' choxa ut quixye: —Ac xnimac inlok'at, ut tanimak cui'chic, chan li Dios. ²⁹ Ut li que'abin re nak quiatinac li Dios inc'a' que'xnau nak a'an li Dios. Cuan que'xye: —Cák x-ec'an, chanqueb. Ut cuan cui'chic que'yehoc re: —Jun ángel x-atinac riq'uin, chanqueb. ³⁰ Ut li Jesús quixye reheb: —Moco re ta intenk'anquil laj nak x-atinac li Dios. Re ban etenk'anquil laex. ³¹ Anakcuan xcuulac xk'ehil nak li Dios tarakok atin sa' xbeneb li cuanqueb sa' ruchich'och'. Anakcuan tasacheck' xcuanquil laj tza li nataklan sa' ruchich'och'. ³² Ut nak ting'uehek' laj chiru cruz, nabaleb te'pabank cue, chan. ³³ Nak quixye chi jo'can, li Jesús yo chixyebal reheb chanru nak tacamsik. ³⁴ Eb li quila tenamit que'xye re: —Sa' li kachak'rab lao aj judío tz'ibánbil retalil nak li Cristo li Mesías tacuank xyu'am chi junelic. ¿C'a'ut nak nacaye lajat nak li C'ajolbej taq'uehek' chiru cruz? ¿Ani li C'ajolbej li yocat chixyebal? chanqueb. ³⁵ Quichak'oc li Jesús ut quixye reheb: —Lain li cutan saken. Xinchal chixch'olobanquil li xyalal cheru. Toj tincuank chic ca'ch'inak sa' eyank. Jo'can nak q'uehomak ech'ol chinpabankuil nak toj cuanquin sa' eyank re nak inc'a' texcuank sa' xk'ojoyinal ru li mac. Li ani nacuan sa' xk'ojoyinal ru li mac inc'a' naxnau bar yo chi xic. ³⁶ Chinépab laj

nak toj cuanquin eriq'uin re nak laexak chic li cualal inc'ajol ut cuānkex sa' cutan, chan li Jesús. Nak ac xye li ətin a'in, li Jesús qui-el sa' xyānkeb ut co sa' jun na'ajej bar inc'a' te'xtau.

Eb laj judío inc'a' que'xpab li Jesús

³⁷ Usta nabal li milagro quixbānu li Jesús chiruheb, abanan inc'a' ajcui' que'paban. ³⁸ A'in quic'ulman re nak tātz'aklok ru li quixye li profeta Isaías nak quixye:

Kacua', əani ta bi' taq'uehok xcuānquil li c'a'ru xkaye? Ut, əani ta bi' taq'uehok xcuānquil li milagro li yocat chixc'utbesinquil chiruheb? (Is. 53:1)

³⁹ Inc'a' quiru que'pāban xban nak ac tz'ibānbil chak retalil xban laj Isaías nak jo'can te'xc'ul.

⁴⁰ Chanchaneb li mutz' xban nak que'iloc ut inc'a' que'xtau xyalal. Que'cacubresic lix ch'oleb xban li Dios re nak inc'a' te'xtau xyalal chi moco te'suk'ik riq'uin re nak tixq'uirtesiheb. (Is. 6:10)

⁴¹ Quixye a'in laj Isaías nak quic'utbesic chiru lix lok'al li Jesús. Jo'can nak quixch'olob li xyalal. ⁴² Cuanqueb nabaleb laj judío que'xpab nak li Jesús, a'an li Mesías. Sa' xyānkeb a'an cuanqueb junjunk li neque'taklan. Abanan inc'a' que'xye resil nak que'pāban xban nak que'xucuac xbaneb laj fariseo. Inc'a' que'raj nak te'isik sa' li cab li neque'xch'utub cui' ribeb laj judío. ⁴³ A' chic li lok'al li neque'xq'ue li tenamit que'xq'ue xcuānquil. Ut inc'a' que'xq'ue xcuānquil li lok'al li naxq'ue li Dios. ⁴⁴ Quixye li Jesús chi cau xyāb xcux: —Li ani napaban cue lāin, moco ca'aj cui' ta lāin niquinixpab. Naxpāb aj ban cui' li quitaklan chak cue. ⁴⁵ Li ani nana'oc cuu lāin, naxnau ajcui' ru li quitaklan chak cue. ⁴⁶ Lain xinchal chixq'uebal li cutan saken sa' ruchich'och'. Li ani tapabank cue lāin, a'an inc'a' chic tacuank sa' xk'oijinal ru li mac. ⁴⁷ Lain inc'a' xinchal sa' ruchich'och' chixq'uebaleb chixtojbal rix lix maqueb li ani neque'abin re li c'a'ru ninye ut inc'a' neque'xbānu. Mācua' re xq'uebaleb chixtojbal lix maqueb nak xinchal. Xinchal ban chixcolbaleb. ⁴⁸ Tento nak tarakek' ətin sa' xbeneb li neque'tz'ektakan cue, li inc'a' neque'pāban re li c'a'ru ninye. Li ətin li xinye, a'an ajcui' li taq'uehok reheb chixtojbal rix lix maqueb sa' roso'jiqueb li cutan. ⁴⁹ Li c'a'ru yoquin chixyebal, a'an tz'akal yal xban nak moco injunes ta yoquin chi ətinac. Li Yucua'bej li quitaklan chak cue, a'an li nayehoc cue c'a'ru tinye. ⁵⁰ Lain ninnau nak li c'a'ru naxye cue li Yucua'bej, a'an li naq'uehoc yu'am chi junelic. Ut li c'a'ru ninye lāin, a'an li naxc'utbesi chicuu li Yucua'bej.

13

Li Jesús quixch'aj li rokeb lix tzolom re xc'utbal chiruheb nak tento te'xcubsi rib

¹ Ac cuulajak naticla li nink'e Pascua. Li Jesús ac naxnau nak cuu-lac re xk'ehil lix camic re nak taxic cui'chic riq'uin lix Yucua' sa' choxa. Junelic naxraheb li ralal xc'ajol li te'canák sa' ruchich'och' ut nak ac cāmc re quixc'utbesi chi tz'akal lix rahom chiruheb. ² Li Jesús yo chi cua'ac rochbeneb lix tzolom. Laj tza ac xq'ue sa' xch'ol laj Judas li ralal laj Simón Iscariote nak tixk'axtesi li Jesús sa' ruk'eb li xic' neque'iloc re. ³ Li Jesús naxnau nak q'uebil re lix cuānquil xban li Dios ut a'an yal re sa' xben chixjunil. Naxnau nak riq'uin li Dios quichal chak ut riq'uin ajcui' li Dios taxic. ⁴ Nak yoqueb chi cua'ac, li Jesús quicuacli. Quirisi lix t'icr li cuan sa' xben li rak'. Quixchap jun chic li t'icr ut quixbac' chi xsa'. ⁵ Quixq'ue li ha' sa' jun li emel ut qui-oc chixch'ajbal li rokeb lix tzolom. Ut quixmes li

rokeb riq'unin li t'icr bac'bo chi xsa'. ⁶ Nak qui-oc raj chixch'ajbal li rok laj Simón Pedro, a'an quixye re: —Kacua', q'ma laat tatch'ajok re li cuok lajin? chan. ⁷ Li Jesús quixye re: —Anakcuan inc'a' nacatau ru li c'a'ru yoquin chixbənunquil. Abanan mokon tatau ru li xyalal, chan li Jesús. ⁸ Laj Pedro quixye re: —Kacua', ma jok'e tinq'ue li cuok re tach'aj, chan. Li Jesús quixye re: —Cui laat inc'a' taq'ue la cuok re tinch'aj, laat macua'at intzolom, chan. ⁹ Laj Simón Pedro quixye: —Kacua', macua' ca'aj cui' li cuok tach'aj. Tach'aj aj ban cui' li cuuk' ut lin jolom, chan. ¹⁰ Li Jesús quixye reheb: —Li ani ac x-atin, ca'aj chic xch'ajbal li rok taraj, xban nak ac ch'ajbil. Ac sak chic ru. Jo'can ajcui' laex. Laex ac tjc ech'ol xban nak ac xinepab. Abanan moco chejunilex ta tjc ech'ol. Cuan jun sa' eyank inc'a' tjc xch'ol, chan. ¹¹ Li Jesús ac naxnau ani li tak'axtesink re sa' ruk'eb li xic' neque'iloc re. Jo'can nak quixye nak cuan jun sa' xyankeb inc'a' tjc xch'ol. ¹² Nak ac xrake' xch'ajbal li rokeb, quixq'ue cui'chic li rak' chirix. Quic'oja cui'chic sa' li mex. Ut quixye reheb lix tzolom: —¿Ma nequenau c'a'ru xyalal nak xinch'aj le rok? chan reheb. ¹³ —Laex nequeye aj tzolonek cue ut nequeye ajcui' Kacua' cue. Us nak nequeye chi jo'can xban nak yal ajcui' nak lajin li Kacua' ut lajin aj tzolol ere. ¹⁴ Lain li Kacua' ut lajin laj tzolol ere. Abanan xinch'aj le rok. Jo'can ajcui' tebanu laex. Tech'aj le rok cheribil erib. ¹⁵ Lain xinc'ut cheru chanru tebanu. Jo'can nak chebanu jo' xinbanu lajin. ¹⁶ Relic chi yal ninye ere nak ma jun mos tixk'ax ta ru xcuanquil lix patrón ut li ani nataklac inc'a' naxk'ax ru lix cuanquil li quitaklan chak re. ¹⁷ Ac nequenau chic xyalal. Us xak ere cui laex tebanu li c'a'ru xetzol cuiq'unin. ¹⁸ Inc'a' yoquin chi atinac cherix chejunilex. Lajin ninnau chanru le na'leb xban nak lajin xinsic'oc eru. Abanan tento nak tatz'aklok ru li tz'ib'anbil sa' li Santil Hul naxye chi jo'ca'in: Li jun li nacua'ac cuochben, a'an li tatz'ektanank cue. ¹⁹ Lain ninye ere a'in anakcuan nak toj maji' nac'ulman. Ut nak tac'ulmank, laex tenau nak yal li xinye nak lajin li Cristo li taklanbil chak xban li Dios. ²⁰ Relic chi yal tinye ere nak ani tac'uluk re li ani tintakla, tinixc'ul ajcui' lajin. Ut li ani tac'uluk cue lajin, tixc'ul ajcui' li quitaklan chak cue, chan li Jesús reheb.

Li Jesús quixye nak tak'axtesik sa' ruk'eb li xic' neque'iloc re xban laj Judas Iscarioote

²¹ Nak ac xye chixjunil li c'a'ak re ru a'in, li Jesús quiyot'e' xch'ol. Ut quixye chi tz'akal reheb: —Relic chi yal ninye ere nak jun sa' eyank laex tak'axtesink cue sa' ruk'eb li xic' neque'iloc cue, chan. ²² Ut eb lix tzolom que'oc xc'a'uxeb. Que'xca'ya ribeb chi ribileb rib ut que'xye: —¿Ani anchal naxyehan? chanqueb. ²³ Jun reheb lix tzolom, li raro xban, c'oj'o chixc'atk. ²⁴ Laj Simón Pedro quixc'ut li ruk' chiru ut quixye re nak tixpatz' re li Jesús ani li yo chixyebal. ²⁵ Ut li jun, li c'oj'o chixc'atk li Jesús, quijiloc riq'un ut quixpatz' re: —Kacua', q'ani li yocat chixyebal? chan. ²⁶ Li Jesús quixye re: —Li ani tinq'ue cui' li caxlan cua a'in nak acak xintz'a sa' li sec', a'an li cuink li tak'axtesink cue sa' ruk'eb li xic' neque'iloc cue, chan. Ut li Jesús quixtz'a li caxlan cua sa' li sec' ut quixq'ue re laj Judas li ralal laj Simón Iscarioote. ²⁷ Ut laj Judas quixc'ul li caxlan cua ut sa' ajcui' li honal a'an quixk'axtesi rib chixbənunquil li c'a'ru naraj laj tza. Ut li Jesús quixye re: —Li c'a'ru yocat chixc'oxlanquil xbanunquil, banu chi junpat, chan. ²⁸ Ma jun reheb li cuanqueb sa' li mex que'xtau ru li quixye li Jesús. ²⁹ Cuan li que'xc'oxla nak li Jesús taraj nak laj Judas taxic chixlok'bal li c'a'ak re ru re li nink'e. Ut cuan ajcui' li que'xc'oxla nak taraj nak laj Judas tixq'ue ca'ch'inak li tumin

reheb li neba' xban nak riq'uin laj Judas cuan lix bolsil lix tumineb. ³⁰ Nak ac xc'ul li caxlan cua laj Judas, qui-el sa' junpat chirix cab. Ac k'ojoyn chic.

Li Jesús quixq'ue jun li ac' chak'rab

³¹ Nak laj Judas ac x-el sa' xyankeb, li Jesús quixye: —Anakcuan xculac xk'ehil nak tac'utbesik lin lok'al lain li C'ajolbej ut tac'utunk ajcui' lix lok'al li Dios riq'uin li c'a'ru tinc'ul lain. ³² Cui lain tinc'utbesi lix lok'al li Dios, a'an chi seb ajcui' tixc'utbesi lin lok'al lain li C'ajolbej. ³³ Ex cualal inc'ajol, inc'a' chic najt tincuank eriq'uin. Laex tinësic' raj chic. Abanan lain ma anihakin chic. Ninye ere jo' quinye reheb laj judío li neque'taklan sa' eyank. Bar tinxic lain, laex inc'a' texruk chi xic. ³⁴ Jun li ac' chak'rab tinq'ue ere anakcuan nak cherahak erib cheribil erib. Jo' nak nequexinra lain, jo'can ajcui' nak tera erib laex cheribil erib. ³⁵ Cui tera erib cheribil erib, chixjunileb te'xnau nak laex intzolom, chan li Jesús.

Li Jesús quixye nak laj Pedro tixye nak inc'a' naxnau ru li Jesús

³⁶ Laj Simón Pedro quixpatz' re: —At tzolonej, ¿bar xic acue? — Li Jesús quixye re: —Anakcuan inc'a' naru texxic chicuix bar tinxic cui' lain. Abanan mokon naru texxic li bar xic cui' cue, chan. ³⁷ Laj Pedro quixye cui'chic re: —Kacua', ¿c'a'ut nak inc'a' taruk tinxic chacuix anakcuan? Lain tatintake usta tincamsik xban atakenquil, chan. ³⁸ Li Jesús quixye re: —¿Ma yal nak tinaatake usta tincamsik sa' inc'aba'? Relic chi yal ninye acue nak toj maji' ajcui' nayabac laj tzo' xul nak laqat ac xaye oxib sut nak inc'a' nacanau cuu, chan li Jesús.

14

Li ani napaban re li Jesús naxpab ajcui' li Dios Acuabej

¹ Misach ech'ol chi c'oxlac. Chepab li Dios ut chinepab ajcui' lain. ² Sa' rochoch lin Yucua' nabal li na'ajej cuan. Cui ta mac'a' li na'ajej, ac xinye raj ere. Lain xic cue chixcauresinquip ena'aj. ³ Nak ac xyalo' le na'aj, tinchalk cui'chic ut texinc'am cuiq'uin re nak bar cuankin lain, aran ajcui' cuankex laex. ⁴ Laex nequenau lix behil li na'ajej li xic cui' cue, chan li Jesús. ⁵ Laj Tomás quixye re: —At Kacua', inc'a' nakanau bar xic acue. ¿Chan ta cui' ru nak takanau li be? chan. ⁶ Li Jesús quixye re: —Lain aj c'amol be cheru. Lain ninch'olob li xyalal li Dios ut lain ninq'uehoc junelic yu'am. Ma ani taruk taoc riq'uin lin Yucua' cui inc'a' tinixpab lain. ⁷ Li ani naxnau cuu lain naxnau ajcui' ru lin Yucua'. Chalen anakcuan nequenau chic ru lin Yucua' ut xeril ru, chan li Jesús. ⁸ Laj Felipe quixye re: —Kacua', c'utbesi chiku li Yucua'bej ut tac'ojalak kach'ol, chan. ⁹ Li Jesús quixye re: —At Felipe, ac junxil nin-oc sa' eyank. ¿Ma toj maji' nequenau cuu? Li ani nana'oc cuu lain, a'an naxnau ajcui' ru li Yucua'bej. ¿C'a'ut nak nacaye cue, "C'ut chiku li Yucua'bej?" ¹⁰ Felipe, ¿ma inc'a' nacapab nak lain ut li Yucua'bej junaj ku chi kibil kib? Li c'a'ru xinye ere moco yal injunes ta xinye. Li Yucua'bej cuan cuiq'uin, ut a'an nac'utuc chicuu li c'a'ru ninbanu. ¹¹ Chepab nak lain cuanquin riq'uin li Yucua'bej ut a'an cuan cuiq'uin. Junaj ku chi kibil kib. Cui inc'a' niquinepab xban li c'a'ru ninye, chinepabak xbaneb li milagro li yoquin chixbanunquij. ¹² Relic chi yal ninye ere, li ani napaban cue lain, a'an tixbanu li c'anjel ninbanu lain. Ut k'axal cui'chic nabal li tixbanu chiru li xinbanu lain xban nak lain xic cue riq'uin li Yucua'bej. ¹³ Chixjunil li tetz'ama sa' inc'aba', lain tinq'ue ere re nak tanimak xlok'al li Yucua'bej sa' inc'aba' lain. ¹⁴ Jo'can ut nak yalak c'a'ru tetz'ama sa' inc'aba', lain tinq'ue ere.

Li Jesús quixye nak tixtakla li Santil Musik'ej re tācuq'ank riq'uineb li ralal xc'ajol

¹⁵ Cui niquinera, chebanuhak jo' xexinchak'rabi cui'. ¹⁶ Lain tintz'ama chiru lin Yucua' nak tixq'ue ere li Santil Musik'ej. A'an tac'ojobānk ech'ol ut a'an tatenk'ank ere. A'an tacuank eriq'un chi junelic. ¹⁷ Ut a'an ajcui' li Santil Musik'ej li tac'utuk re li xyalal cheru chirix li Dios. Li inc'a' niquine'xpab inc'a' naru nacuan li Santil Musik'ej riq'uineb xban nak inc'a' neque'xnau ani a'an, chi moco neque'xq'ue retal li c'a'ru naxbanu li Santil Musik'ej. Abanan laex nequenau ani a'an xban nak a'an cuan sa' eyank anakcuan ut tācuq'ank eriq'un chi junelic. ¹⁸ Nak tinxic inc'a' texincanab ejunes. Tinchalk cui'chic eriq'un. ¹⁹ Cuulac re xk'ehil nak inc'a' chic te'r'il cuu li inc'a' neque'paban cue. Abanan laex teril cuu. Ut xban nak yo'yokin lain, yo'yokex ajcui' laex. ²⁰ Toj sa' li cutan a'an laex teq'ue retal nak li Yucua'bej cuan cuiq'un ut lain cuanquin riq'un a'an. Junaj ku chi kibil kib. Ut laex cuānkex cuiq'un ut lain cuānkin eriq'un. ²¹ Li ani naxc'ul lin chak'rab ut naxbanu li naxye, a'an li narahoc cue. Li ani narahoc cue narahe' ajcui' xban lin Yucua'. Ut lain tinra ajcui' a'an ut tinc'utbesi cuib chiru, chan li Jesús rebeb lix tzolom. ²² Laj Judas jun chic, li macua' laj Judas Iscariote, quixye re: —Kacua', ¿chanru nak tac'utbesi acuib chiku lao, ut inc'a' tac'utbesi acuib chiruheb li inc'a' neque'paban acue? chan. ²³ Quichak'oc li Jesús ut quixye re: —Lain tinc'utbesi cuib chiruheb li neque'rahoc cue ut neque'xbanu li c'a'ru ninye. Eb a'an te'rahek' xban lin Yucua'. Lain ut lin Yucua' toxic riq'uineb ut tocuanq riq'uineb. ²⁴ Li ani inc'a' narahoc cue inc'a' naxbanu li c'a'ru ninye. Li c'a'ru xinye ere, inc'a' xinye yal injunes. Lin Yucua' li quitaklan chak cue, a'an li nac'utuc chicuu c'a'ru tinye. ²⁵ Yoquin chixyebal ere a'in nak toj cuanquin sa' eyank. ²⁶ Li Santil Musik'ej li tixtakla chak li Yucua'bej chok' cuuchil, a'an tatenk'ank ere ut a'an tac'utuk cheru chixjunil li c'a'ak re ru li inc'a' nequetau ru. ²⁷ Ut a'an tixjultica ere chixjunil li c'a'ru xinye ere. ²⁸ Lain tincanab li tuktuquil usilal eriq'un nak tinxic. Li tuktuquil usilal li ting'ue ere moco jo' ta' li neque'xq'ue li cuanqueb sa' ruchich'och'. Lain ting'ue xtuktuquilal le ch'ol. Mexc'oxlac chi moco texxucuak. ²⁹ Ac xinye ere nak tinxic, ut tinchalk cui'chic. Cui yal nak niquinera, tāsahok' raj sa' ech'ol nak tinxic riq'un lin Yucua', xban nak a'an k'axal nim xcuānquil chicuu lain. ³⁰ Lain yoquin chixyebal ere a'in nak toj maji' nac'ulman. Nak tac'ulmank li c'a'ru xinye, laex tepab nak yal li c'a'ru xinye ere. ³¹ Inc'a' chic taruk tinaatinak chi nabal eriq'un xban nak yo' chi chalc li nataklan sa' li ruchich'och', usta a'an mac'a' xcuānquil sa' inben lain.

³¹ Lain yoquin chixbanunquil chixjunil li quixye cue lin Yucua' re nak chixjunileb li cuanqueb sa' ruchich'och' te'xq'ue retal nak lain ninra li Yucua'bej. Anakcuan yo'keb. Elko sa' li na'ajej a'in, chan li Jesús.

15

Li Jesús quixjuntak'eta rib riq'uin li xtonal li uvas

¹ Li Jesús quixye ajcui' rebeb: —Lain chanchanin li xtonal li uvas. Ut lin Yucua' jo' jun li nasabesin re. ² Li ani inc'a' naxbanu li c'a'ru naraj lin Yucua', a'an chanchan li ruk' li che' li na-isic xban nak inc'a' nauchin. Abanan li ani naxbanu li c'a'ru naraj lin Yucua', a'an chanchan li ruk' li che' li nauchin. Ut li na-iloc re naxsabesin re nak tixq'ue nabal li ru. ³ Laex chanchanex li chabil ruk' li che' li nauchin chi nabal xban nak sabesinbil chic ru. Laex ac tic chic le yu'am xban li xyalal xinch'olob cheru. ⁴ Cuankek cuiq'un ut lain cuānkin eriq'un. Jo' li ruk' li che', cui inc'a' letzlo riq'un lix tonal, inc'a' naru nauchin.

Jo'can ajcui' laex. Cui inc'a' cuankex cuiq'uin, inc'a' taruk texq'uij sa' le pabal.⁵ Lain jo' li xtonal li uvas ut laex jo' li ruk'. Cui cuankex cuiq'uin ut lain cuankex eriq'uin, laex texcuank sa' tiquilal ut texq'uij sa' le pabal. Yal ejunes mac'a' naru tebanu.⁶ Li ani inc'a' tacuank cuiq'uin taisik jo' nak nayoq'ue' li ruk' li che' li inc'a' us. Nak nachakic nacute' sa' xam ut nac'at.⁷ Cui laex cuankex cuiq'uin ut tebanu li c'a'ru xinye ere, taq'uehek' ere chixjunil li c'a'ru tetz'ama.⁸ Nequeq'ue xlok'al lin Yucua' riq'uin li chabilal nequebanu. Cui yokex chixbanunquil li c'a'ru naraj li Dios, laexak tz'akal intzolom.⁹ Lain nequexinra laex jo' nak ninxra lin Yucua' lain. Checxuank cuiq'uin re nak texinra chi junelic.¹⁰ Cui tebanu li c'a'ru ninye ere, lain texinra junelic. Lain xinbanu li c'a'ru xye cue lin Yucua' ut a'an junelic niquinixra lain.¹¹ Lain ninye ere a'in re nak textz'akonk riq'uin lix sahil inch'ol lain. Cui tebanu li c'a'ru ninye ere, numtajenakak xsahil ech'ol laex.¹² A'an a'in li chak'rab li ning'ue ere nak cherahak erib cheribil erib jo' nak nequexinra lain.¹³ Li rahoc chi tz'akal a'an nak junak tixk'axtesi lix yu'am sa' xc'aba' li ras ritz'in.¹⁴ Cui tebanu li c'a'ru ninye ere, laexak li rarokek inban.¹⁵ Laex macua'akex chic yal aj c'anjal xban nak junak laj c'anjal inc'a' naxnau c'a'ru yo'lix patron. Abanan lain xinye ere chixjunil li naxye cue lin Yucua'. A'an naxc'ut nak raroquex inban.¹⁶ Macua'laex xexsic'oc cuu lain. Lain ban xinsic'oc eru laex ut xexinxakab chixbanunquil li tiquilal. Le tiquilal inc'a' taosok'. Tacuank ban chi junelic. Ut lin Yucua' tixq'ue ere chixjunil li tetz'ama sa' inc'aba' lain.¹⁷ A'an a'in li yoquin chixyebal ere nak cherahak erib cheribil erib.

Xic' qui-ile' li Jesùs ut xic' ajcui' te'ilek' li ralal xc'ajol

¹⁸ Cui laex xic' nequex-ile' xbaneb li inc'a' neque'paban, chenauhak nak xben cua lain xic' xine'ril cheru laex.¹⁹ Cui ta laex inc'a' xinepab lain, rarokek raj xbaneb li inc'a' neque'paban. Abanan laex macua'ex chic jun sa' xyankeb xban nak lain xinsic'oc eru. Jo'can nak xic' nequex-ile' xbaneb.²⁰ Chijulticok' ere nak xinye ere nak ma jun aj c'anjal naxk'ax ru xcuankuil lix patron. Cui xine'xrahobtesi lain, texrahobtesik ajcui' laex. Cui ta xe'xbanu li c'a'ru xinye lain, te'xbanu aj raj cui' li c'a'ru teye laex.²¹ Texrahobtesik xban nak laex cuaal inc'ajol. Te'xbanu chi jo'can xban nak inc'a' neque'xnau ru li ani quitaklan chak cue.²² Mac'a'eb raj xmac cui ta lain inc'a' xinc'ulun ut cui ta inc'a' xinye reheb li xyalal. Abanan mac'a' c'a'ru te'xcol cui' ribeb xban nak cuanqueb xmact.²³ Li ani xic' na-iloc cue lain, xic' ajcui' naril lin Yucua'.²⁴ Mac'a'eb raj xmac cui ta inc'a' xe'rili milagros li xinbanu chiruheb, li milagros li ma ani chic naru xbanunquil. Abanan eb a'an que'rili xinbanu. Jo'can nak xic' niquine'ril lain ut xic' ajcui' neque'rili lin Yucua'.²⁵ Jo'ca'in xc'ulman xban nak tz'ibanol chak retaliil sa'li chak'rab li quiq'uehe' reheb: Mac'a' raj inmac, abanan xic' quine'rili.²⁶ Nak tachalk li Santil Musik'ej, laj C'ojobanel Ch'ol, eriq'uin a'an fixc'ut chi tz'akal li xyalal cheru chiciuix lain. Lain tintakla chak eriq'uin li Santil Musik'ej li nachal riq'uin lin Yucua'.²⁷ Ut laex tech'olob ajcui' li xyalal chiciuix xban nak laex cuanqueb cuiq'uin chalen nak xintiquib lin c'anjal arin sa' ruchich'och'.

16

¹ Yoquin chixyebal ere chixjunil li c'a'ak re ru a'in re nak inc'a' tach'inank ech'ol sa' le pabal nak tachalk li raylal sa' eben.² Tex-isik sa' li cab li neque'xch'utub cui' ribeb laj judío. Tacuulak xk'ehil nak eb li te'camsink ere te'xc'oxla nak yoqueb chi c'anjelac chiru li Dios nak te'xbanu chi jo'can.³ Te'xbanu li raylal a'in ere xban nak inc'a' neque'xnau ru lin Yucua' chi

moco neque'xnau cuu lajn. ⁴ Ac xinye ere chixjunil li c'a'ak re ru a'in re nak tajulticok' ere li c'a'ru xinye ere nak yokex chixc'ulbal li raylal. Lajn inc'a' quinye chak ere junxil nak quintiquib chak lin c'anjel xban nak cuanquin eriq'uin.

Li Jesús quixye c'a'ru li c'anjel li tixbanu li Santil Musik'ej nak tachalk

⁵ Anakcuan xic cui'chic cue riq'uin li quitaklan chak cue. Ut mä jun ere napatz'oc cue bar xic cue. ⁶ Xraho' sa' ech'ol xban li c'a'ru xinye ere. ⁷ Abanan lajn xinye li xyalal ere. K'axal us chok' ere nak tinxic xban nak cui inc'a' ninxic, inc'a' tachalk li Santil Musik'ej eriq'uin. A'an li tatenk'ank ere ut a'an li tac'ojobank re le ch'ol. Nak tinxic, lajn tintakla chak li Santil Musik'ej eriq'uin. ⁸ Nak tachalk li Santil Musik'ej, a'an tixc'utbesi chiruhéb li cuanqueb sa' ruchich'och' nak inc'a' neque'xtau ru c'a'ru li mac ut c'a'ru li tiquilal chi moco neque'xtau ru li rakba atin li tixbanu li Dios. ⁹ Inc'a' neque'xtau ru c'a'ru li mac xban nak inc'a' niquine'xpab. ¹⁰ Inc'a' neque'xtau ru c'a'ru li tiquilal. Cui ta que'xtau ru te'xnau raj nak lajn tjc inch'ol. Xban nak tjc inch'ol, tinxic riq'uin li Dios ut inc'a' chic teril cuu. ¹¹ Inc'a' neque'xtau ru c'a'ru li rakba atin. Cui ta que'xtau ru, te'xnau raj nak ac tenebanbil li rakba atin sa' xbén laj tza li nataklan sa' ruchich'och'. ¹² Toj cuan raj nabal chic li tinye ere, abanan inc'a' tecuy rabinquil anakcuan. ¹³ Abanan nak tachalk li Santil Musik'ej, a'an tixc'ut cheru chixjunil li xyalal. Inc'a' taatinak yal xjunes. Tixye ban ere chixjunil li c'a'ru tarabi riq'uin li Dios ut tixch'olob cheru li c'a'ru tachalk mokon. ¹⁴ Li Santil Musik'ej tixq'ue inlok'al xban nak li c'a'ru tinye re, a'an ajcui' li tixch'olob xyalal cheru. ¹⁵ Chixjunil li c'a'ru cuan re lin Yucua', cue ajcui' lajn. Jo'can nak xinye ere nak li c'a'ru tinye ere, a'an ajcui' li tixc'utbesi cheru li Santil Musik'ej. ¹⁶ —Chi seb inc'a' chic teril cuu. Abanan mokon chic teril cui'chic cuu, chan li Jesús. ¹⁷ Cuanqueb lix tzolom yoqueb chixyebal chi ribileb rib: —¿C'a'ru xyalal nak xye ke nak taxic riq'uin lix yucua'? ¿C'a'ut nak xye ke nak chi seb inc'a' chic takil ru ut mokon chic takil cui'chic ru? ¹⁸ ¿C'a'ut nak xye chi jo'can? Inc'a' nakatau ru c'a'ut nak quixye nak chi seb inc'a' chic takil ru, chanqueb. ¹⁹ Li Jesús quixnau nak que'raj xpatz'bal re c'a'ru xyalal li yo chixyebal. Jo'can nak quixye reheb: —¿Ma yoquex chixpatz'bal cheribil erib c'a'ru xyalal li xinye? ¿Ma inc'a' xetau ru nak xinye ere nak chi seb inc'a' chic teril cuu ut mokon chic teril cui'chic cuu? ¿Ma a'an li teraj xnaubal? ²⁰ Relic chi yal ninye ere nak eb li inc'a' neque'pában cue tasahek' sa' xch'oleb nak tinc'ul li raylal. Laex tayot'ek' ech'ol ut texyabak nak tinc'ul chi jo'can. Tarahok' sa' ech'ol, abanan mokon tasahek' cui'chic sa' ech'ol nak teril cui'chic cuu. ²¹ Junak ixit yo'lac re lix c'ula'al narec'a xrahil li raylal. Abanan nak ac xyo'la lix c'ula'al, nasach sa' xch'ol li raylal li quixc'ul ut nasaho' sa' xch'ol xban nak ac xyo'la lix c'ula'al. ²² Jo'can ajcui' laex. Anakcuan ra sa' ech'ol. Abanan nak teril cui'chic cuu, tasahek' sa' ech'ol. Ut mä ani taisink cheru lix sahil ech'ol. ²³ Tacuulak xk'ehil nak mac'a' chic tetz'ama cue lajn. Chiru ban chic lin Yucua' textz'amank. Relic chi yal tinye ere nak chixjunil li tetz'ama chiru lin Yucua' sa' inc'aba' lajn, a'an tixq'ue ere. ²⁴ Chalen anakcuan toj mac'a' nequetz'ama sa' inc'aba'. Chehtz'amank ut taq'uehek' ere re nak k'axal cui'chic tasahek' sa' ech'ol, chan li Jesús. ²⁵ Chixjunil li c'a'ak re ru a'in xinye ere sa' jaljoquil ru atin. Abanan tacuulak xk'ehil nak inc'a' chic tinye ere chi jaljo ru. Tinye ban ere chi tz'akal riq'uin atin inc'a' ch'a'aj xtaubal ru ut tinch'olob cheru li xyalal chirix lin Yucua'. ²⁶ Nak tacuulak xk'ehil laex chic textz'amank chiru li Yucua'bej sa' inc'aba' lajn. Inc'a' chic tento nak lajn tintz'amank chiru li Yucua'bej cherix laex. ²⁷ Lin Yucua' nequexra

laex xban nak laex niquinera laín ut xban nak xepab nak riq'unin li Dios xinchal chak. ²⁸ Laín riq'unin lin Yucua' xinchal chak. Ut anakcuan tincanab li ruchich'och' ut tinxic cui'chic riq'unin lin Yucua', chan li Jesús. ²⁹ Ut eb lix tzolom que'xye re: —Anakcuan yocat chi atinac riq'unin atin inc'a' ch'a'aj xtaubal ru. Inc'a' chic xaye ke riq'unin jaljoquil ru atin. ³⁰ Anakcuan nakaq'ue retal nak laat nacanau chixjunal li c'a'ak re ru. Moco toj ta tayehek' acue. Jo'can nak nakapab nak laat riq'unin li Dios xatchal chak, chanqueb. ³¹ Li Jesús quixye reheb: —¿Ma yal nak niquinepab anakcuan? ³² Xcuulac xk'ehil, ut anakcuan ajcui', nak tacha'cha'ik eru chejunilex. Ac xbe xbe li junjunk tixchap ut tinécanab injunes. Abanan moco injunes ta xban nak lin Yucua' cuank cuiq'unin. ³³ Xinye ere li c'a'ak re ru a'in re nak texcuank cuiq'unin ut tacuank eriq'unin li tuktuquilal. Sa' li ruchich'och' tec'ul li raylal. Abanan cacuubresihomak le ch'ol xban nak laín ac xinnumta sa' xben li nataklan sa' ruchich'och', chan li Jesús reheb lix tzolom.

17

Li Jesús quitijoc chirixeb lix tzolom

¹ Nak quirake' xyebal li atin a'in, li Jesús quixtaksi li rilobal ut qui-oc chi tijoc. Quixye: —At inYucua', xcuulac xk'ehil nak tincamsík. Taq'ue taxak inlok'al laín li C'ajolbej re nak laín tinq'ue ajcui' alok'al laat. ² Laat xatq'uehoc incuanquil sa' xben chixjunal re nak tinq'ue li junelic yu'am reheb li xak'axtesiheb cue. ³ Li junelic yu'am, a'an nak te'xnau acuu laat li junajat chi tz'akal Dios ut te'xnau ajcui' cuu laín li Jesucristo li quinatakla chak. ⁴ Laín xinq'ue alok'al arin sa' ruchich'och' xban nak xinchoy xbanunquil li c'anjel li xaq'ue cue re tinbánu. ⁵ At inYucua', chaq'ue ta cui'chic lin lok'al li quicuan nak toj cuanquin chak acuiq'unin nak toj maji' naticla chak li ruchich'och'. ⁶ Eb li xasiq'ueb ru sa' ruchich'och' xak'axtesiheb cue. Laín xinc'ut chiruheb chi tz'akal anihat laat ut xinch'olob li xyalal chiruheb. Ut eb a'an xe'xbánu li c'a'ru xaye reheb. ⁷ Anakcuan neque'xnau nak chixjunal li c'a'ru xinbanu, laat xatq'uehoc cue chixbanunquil. ⁸ Laín xinye reheb li c'a'ru xaye cue ut xe'xc'ul li cuatín. Xe'xq'ue retal nak relic chi yal acuiq'unin xinchal chak ut xe'xpab nak laat xattaklan chak cue. ⁹ Laín inc'a' yoquin chixtz'amanquil acue nak tatenk'ahet li inc'a' xine'xpab. Yoquin ban chixtz'amanquil chacuu nak tatenk'ahet lin tzolom li xak'axtesiheb cue xban nak a'aneb la cualal ac'ajol. ¹⁰ Chixjunileb li cualal inc'ajol, acualal ac'ajol ajcui' laat. Ut chixjunileb la cualal ac'ajol, cualal inc'ajol ajcui' laín. Ut eb a'an neque'xnima inlok'al. ¹¹ Anakcuan laín tinxic acuiq'unin. Inc'a' chic tincuank sa' ruchich'och'. Abanan eb a'an toj te'cuank sa' ruchich'och'. At inYucua', laat Santo. Chacuileb taxak riq'unin lix nimal la cuanquinal li xak'axtesiheb cue re nak junajak ruheb jo' laat ut lain junaj ku. ¹² Nak cuanquin sa' xyankeb, riq'unin xnalim la cuanquinal xincuileb lin tzolom li xak'axtesiheb cue ut ma jun xsach chicuú. Ca'aj cui' li jun xsach li ac q'uebil chak re sache. A'in xc'ulman re nak tatz'aklok ru li tz'ibánbil sa' li Santil Hu. ¹³ Anakcuan xic cue acuiq'unin. Abanan yoquin chixyebal li c'a'ak re ru a'in nak toj cuanquin sa' ruchich'och' re nak tacuank xsahil xch'oleb a'an jo' li xsahil inch'ol lain. ¹⁴ Laín xinch'olob xyalal la cuatín chiruheb. Jo'can nak xic' neque'ile' xbaneb li inc'a' neque'pabán. Xic' neque'ile' xban nak moco xcomoneb ta chic ut moco juntak'et ta chic lix na'lebeb. Jo'can ajcui' lain. Moco lain ta xcomoneb li cuanqueb sa' ruchich'och'. ¹⁵ Inc'a' yoquin chixtz'amanquil chacuu nak tacuisehib lin tzolom sa' ruchich'och'. Ca'aj cui' yoquin chixtz'amanquil chacuu nak tacoleb chiru laj tza. ¹⁶ Laín mäcu'a'in

xcomoneb li cuanqueb sa' ruchich'och'. Jo'can ajcui' eb a'an. Macua'eb chic xcomonebli inc'a' neque'paban. ¹⁷ Chasantobresiheb taxak riq'uin la cuatin, xban nak a'an li tz'akal yal. ¹⁸ Jo' nak xinatakla chak lajin sa' ruchich'och' chixch'olobanquil li xyalal, jo'can ajcui' nak tintaklaheb chixch'olobanquil li xyalal chiruheb li inc'a' neque'paban. ¹⁹ Sa' xc'aba' eb a'an xink'axtesi cuib lajin chixbanunquil li c'a'ru xaye cue. Ut sa' xc'aba' li yal li xinye eb a'an te'xk'axtesi ajcui' ribeb chixbanunquil li c'a'ru nacacuaj. ²⁰ Macua' ca'aj cui' chirixeb lin tzolom yoquin chi tz'amanc chacuu. Yoquin aj ban cui' chi tz'amanc chacuu chirixeb li te'pabank mokon nak te'xch'olob li xyalal chiruheb. ²¹ At inYucua', li c'a'ru nintz'ama chacuu, a'an nak junajak taxak ruheb. Che'cuank kiq'uin jo' nak cuanquin lain acuiq'uin ut laat cuancat cuiq'uin. Junajak taxak ruheb re nak li cuanqueb sa' ruchich'och' te'xpab nak laat xattaklan chak cue. ²² Lain xinq'ueheb lix lok'al jo' nak xaq'ue inlok'al lain re nak junajak ruheb jo' nak junaj ku lao. ²³ Lain cuankin riq'uineb ut laat cuankat cuiq'uin re nak junajak chic ruheb chi tz'akal kiq'uin. Ut xban nak junajak chic ruheb kiq'uin, eb li inc'a' neque'paban te'xq'ue retal nak laat xattaklan chak cue ut te'xq'ue ajcui' retal nak laat nacaraheb jo' nak niquinara lain. ²⁴ At inYucua', nintz'ama chacuu nak chixjunileb li xak'axtesiheb cue te'cuank cuiq'uin sa' li na'ajej li tincuank cui' lain. Nacuaj nak te'r'il lin lok'al li caq'ue chak cue nak toj maji' quiyibac li ruchich'och' xban nak niquinara. ²⁵ At inYucua', laat tic ach'ol. Eb li inc'a' neque'paban inc'a' neque'xnau acuu. Abanan lain ninnau acuu ut eb lin tzolom neque'xnau chic nak laat xattaklan chak cue. ²⁶ Lain xinc'ut chiruheb anihat laat ut toj tinch'olob cui'chic chiruheb re nak te'rahok jo' nak niquinara laat, ut lain tincuank riq'uineb, chan li Jesús nak quitijoc.

18

Li Jesús quik'axtesic sa' ruk'eb li xic' neque'i loc re

¹ Nak quirake' chi tijoc li Jesús, qui-el sa' li na'ajej a'an rochbeneb lix tzolom. Coeb jun pac'al li ha' Cedrón xc'aba' bar cuan cui' jun sir li acuimk. ² Laj Judas Iscariote, li tak'axtesink re li Jesús, naxnau li na'ajej a'an xban nak nabal sut quicuulac li Jesús aran rochbeneb lix tzolom. ³ Jo'can nak laj Judas co sa' li na'ajej a'an ut quixc'am chirix jun ch'utal li soldado aj Roma. Ut coeb ajcui' chirixeb li neque'c'ac'alen sa' li templo. Taklanbileb xbaneb laj fariseo ut li xbenil aj tij. Cuan cuanqueb xxameb sa' ruk' ut cuan cuanqueb xxameb sa' ru'uj che' ut cuanqueb ajcui' xch'ich'eb. ⁴ Li Jesús ac naxnau chixjunil li c'a'ru tixc'ul. Jo'can nak quichal ut quixakli chiruheb ut quixye: —¿Ani nequesic? chan reheb. ⁵ Eb a'an que'xye: —Yoco chixsic'bal li Jesús laj Nazaret.— Li Jesús quixye: —Lain li yoquex chinsic'bal, chan. Cuan ajcui' sa' xyankeb laj Judas li tak'axtesink re. ⁶ Nak li Jesús quixye reheb, “Lain li yoquex chinsic'bal”, k'ajel ix nak que'coeb ut jun t'aniqueb nak que'tane' chi ch'och'. ⁷ Ut li Jesús quixye cui'chic reheb: —¿Ani nequesic? Que'chak'oc ut que'xye re: —Li Jesús laj Nazaret, a'an li yoco chixsic'bal.— ⁸ Li Jesús quixye reheb: —Ac xinye ere nak lain. Cui yoquex chinsic'bal lain, canabomakeb chi xic li neque'taken cue, chan. ⁹ Quixye chi jo'can re nak tat'aklok ru li quixye nak quitijoc: At inYucua', ma jun reheb li cak'axtesiheb cue xsach chicuu. ¹⁰ Laj Simón Pedro cuan xch'ich'. Quirisi chak lix ch'ich' sa' xna'aj. Ut riq'uin lix ch'ich' quirisi lix xic laj Malco lix mos li xyucua'il aj tij. Li xic li quixyoc', a'an li cuan sa' xnim. ¹¹ Li Jesús quixye re laj Pedro: —Xoc la ch'ich' sa' xna'aj. ¿Ma inc'a' ta bi' tento nak tinc'ul li raylal a'in? ¿Ma inc'a' ta bi' a'an aj e nak xinixtakla chak lin Yucua'? chan. ¹² Ut eb li soldado aj Roma rochben li

nataklan sa' xbeneb ut eb laj judío li neque'c'ac'alen sa' li templo, que'xchap li Jesús ut que'xbac'. ¹³ Que'xc'am riq'uin laj Anás lix yucua' li rixakil laj Caifás. Laj Caifás, a'an li xbenal aj tij sa' li chihab a'an. ¹⁴ Laj Caifás a'an li quiyehoc reheb li neque'taklan sa' xbeneb laj judío nak us raj nak tacamk jun chi cuink sa' xc'aba'eb chixjunileb.

Laj Pedro quixye nak inc'a' naxnau ru li Jesús

¹⁵ Nak yoqueb chixc'ambal li Jesús, laj Simón Pedro rochben jun chic lix tzolom li Jesús yoqueb chixtakenquil. Li tzolom a'an nana'e' ru xban li xyucua'il aj tij. Jo'can nak qui-oc rochben li Jesús sa' li nebal li cuan chiru li rochoch li xyucua'il aj tij. ¹⁶ Abanan laj Pedro quicana sa' be chire li oquebal. Ut lix tzolom jun chic qui-el sa' li nebal li cuan chiru li cab ut quiatinac riq'uin li iixk li nac'ac'alen re li oquebal. Ut quiroci laj Pedro chi sa'. ¹⁷ Ut li iixk, li nac'ac'alen re li oquebal quixye re laj Pedro, —¿Ma macua' ta bi' laat jun reheb lix tzolom li cuink a'an? chan re. Laj Pedro quichak'oc ut quixye: —Inc'a'. Macua'in. —¹⁸ Eb laj c'anjel ut eb li neque'c'ac'alen sa' li templo que'xt'ab xxameb xban nak que te'rec'a. Xakxoqueb chi k'ixinc chire xam. Laj Pedro yo ajcui' chi k'ixinc sa' xyankeb. ¹⁹ Li xyucua'il aj tij qui-oc chixpatz'bal re li Jesús chirixeb lix tzolom ut chirix ajcui' li tijleb li naxc'ut. ²⁰ Li Jesús quixye re: —Junelic xinch'olob li xyalal chiruheb li tenamit sa' eb li cab li neque'xch'utub cui' ribeb laj judío ut sa' li templo. Mac'a' xinye reheb chi mukmu. ²¹ ¿C'a'ut nak nacapatz' cue lain? Patz' reheb li neque'abin cue. Eb a'an naru neque'xye ere c'a'ru xinye, chan li Jesús. ²² Nak quixye a'an, jun reheb li neque'c'ac'alen sa' li templo quixsac' sa' xnak' ru li Jesús ut quixye re: —¿C'a'ut nak nacasmé li xyucua'il aj tij chijo'can? chan re. ²³ Li Jesús quixye re: —Cui inc'a' us li xinye, ye reheb li cuanqueb arin c'a'ru inc'a' us xinye. Cui ut us li xinye, ¿c'a'ut nak niquinásac'? chan re. ²⁴ Ut laj Anás quixtakla li Jesús chi bac'bo riq'uin laj Caifás li xyucua'il aj tij. ²⁵ Laj Pedro toj xakxo chi k'ixinc chire xam. Ut que'xye cui'chic re: —¿Ma macua' ta bi' laat xcomoneb lix tzolom li cuink a'an? Ut laj Pedro quitic't'i'ic ut quixye: —Inc'a'. Macua'in. —²⁶ Jun lix mos li xyucua'il aj tij rech'alal li cuink li quiyoq'ue' xxic xban laj Pedro, quixye re: —Laat xcomoneb. ¿Ma inc'a' ta bi' xcuil nak acuochben aran sa' li xna'aj li acuimk? chan. ²⁷ Ut laj Pedro quixye cui'chic re: —Inc'a'. Macua'in, chan. Toje' ajcui' tarakek' xyebal a'an nak quiyabac laj tzo' xul.

Quic'ame' li Jesús riq'uin laj Pilato

²⁸ Toj ek'ela chi us que'risi li Jesús riq'uin laj Caifás ut que'xc'am sa' li na'ajej li narakoc cui' atin laj Pilato li acuabej aj Roma. Eb li neque'taklan sa' xbeneb laj judío inc'a' que'oc sa' li rochoch laj Pilato xban nak a'an macua' aj judío. Cui ta que'oc sa' rochoch junak macua' aj judío, que'xmux raj rib sa' lix pabaleb. Xban nak que'raj cua'ac re li nink'e Pascua, inc'a' que'ru chi oc sa' li cab a'an. ²⁹ Xban nak inc'a' que'oc sa' li cab, laj Pilato qui-el chirix cab ut quixye reheb: —¿C'a'ru xmäc li cuink a'in nak xexchal chixjibal? chan reheb. ³⁰ Que'chak'oc ut que'xye re: —Cui ta mac'a' xmäc, inc'a' raj xkac'am chak acuiq'uin re nak tatrakok atin sa' xbén, chanqueb. ³¹ Laj Pilato quixye reheb: —C'amomak laex ut rakomak atin sa' xbén jo' naxye sa' le chak'rab laex, chan. Eb laj judío que'xye re: —Moco q'uebil ta kalesens lao aj judío nak takacamsi junak cristian, chanqueb. ³² Riq'uin a'in quitz'akloc ru li quixye li Jesús chanru nak tacamsik. ³³ Laj Pilato qui-oc cui'chic sa' li na'ajej li narakoc cui' atin. Quixbok li Jesús riq'uin ut quixye re: —¿Ma laat lix reyeb laj judío? chan re. ³⁴ Li Jesús quixye re: —¿Ma sa' ach'ol x-ala li

xaye, malaj jalan xyehoc ącue li xaye? chan. ³⁵ Laj Pilato quixye re: —¿Ma laín ta bi' aj judío? Eb la cuech tenamitil rochbeneb li xbenil aj tij, a'aneb li xe'k'axtesin ącue sa' cuuk'. Ye cue c'a'ru amac, chan. ³⁶ Li Jesús quixye re: —Lin cuanquil laín macua' re sa' ruchich'och'. Cui ta laín tintaklank arin sa' ruchich'och', eb li neque'taken cue te'pletik raj re incolbal chiruheb li neque'c'amoc be chiruheb laj judío. Abanan lin cuanquil laín macua' re sa' ruchich'och', chan. ³⁷ Laj Pilato quixye re: —Laaat rey chi jo'canan.— Li Jesús quixye re: —Yal li xaye nak laín rey. A'an aj e nak quinchal chi yo'lac arin sa' ruchich'och' re xch'olobanquil li xyalal. Ut chixjunileb li neque'raj xnaubal li xyalal, neque'rabi li c'a'ru ninye, chan. ³⁸ Laj Pilato quixye: —Ut, ¿c'a'ru li xyalal?— Ut co cui'chic riq'uineb laj judío ut quixye reheb: —Má jun xmáç li cuink a'in nintau. ³⁹ Laex c'aynakex nak na-ach'abac junak li prex sa' li nink'e Pascua. ¿Ma téraj nak tincuach'ab cheru le rey laex aj judío? chan laj Pilato. ⁴⁰ Eb a'an que'xjap re ut que'xye: —Inc'a'. Macuach'ab li cuink a'an. Ach'ab laj Barrabás, chanqueb. Laj Barrabás, a'an jun aj elk'.

19

Quitenebac camc sa' xben li Jesús

¹ Laj Pilato quixtakla li Jesús chi saq'uec' riq'unin tz'um. ² Eb li soldado que'xyib jun li corona riq'unin q'uir ut que'xq'ue sa' xjolom li Jesús. Ut que'xq'ue jun li caki t'icr chirix xcomon li neque'rocsí li rey. ³ Ut que'xye re: —¡Sahak taxak sa' ach'ol, at xreyeb laj judío! chanqueb re. Ut que'xsac' riq'unin ruk'eb. ⁴ Laj Pilato co cui'chic riq'uineb laj judío ut quixye reheb: —Xinc'am chak arin chirix cab re nak tenau nak má jun xmáç xintau, chan. ⁵ Ut li Jesús qui-el chirix cab. Cuan sa' xjolom li corona li yíbanbil riq'unin q'uir ut cuan li caki t'icr chirix. Laj Pilato quixye reheb: —Cue' li cuink. Ilomak, chan. ⁶ Eb li neque'c'ac'alen sa' li templo ut eb li xbenil aj tij que'r'il li Jesús ut que'xjap reheb ut que'xye: —¡Q'ue chiru cruz! ¡Q'ue chiru cruz! chanqueb. Ut laj Pilato quixye reheb: —C'amomak laex ut q'uehomak chiru cruz cui téraj. Lain má jun lix māç xintau, chan. ⁷ Abanan eb laj judío que'xye: —Lao cuan kachak'rab ut li kachak'rab naxye nak tacamsík xban nák a'an quixq'ue rib chok' Ralal li Dios.— ⁸ Nak quirabi li que'xye, k'axal cui'chic quixucuac laj Pilato. ⁹ Qui-oc cui'chic sa' cab rochben li Jesús ut quixye re: —Ye cue bar xatchal chak.— Abanan li Jesús má jun li atin quixye. ¹⁰ Laj Pilato quixye re: —¿C'a'ut nak inc'a' nacatchak'oc? ¿Ma inc'a' nacanau nak cuan incuanquil chaq'uebal chiru cruz ut cuan incuanquil chacuach'abanquil? chan re li Jesús. ¹¹ Li Jesús quixye re: —Mac'a' raj ącuanquil sa' inben cui ta inc'a' q'uebil ącue xban li Dios. Ut li jun li xk'axtesin cue sa' ącuuk' re nak tatrakol atin sa' inben, a'an k'axal cui'chic nim xmáç chacu laat, chan. ¹² Ut chalen a'an laj Pilato yo chixsic'bal chanru nak tarach'ab li Jesús. Abanan eb laj judío que'xjap reheb ut que'xye: —Cui nacacuach'ab li cuink a'an, laat macua'akat chic ramig li Acuabej César. Li ani naraj xq'uebal rib chok' rey, li jun a'an xic' chic naril li Acuabej, chanqueb. ¹³ Nak laj Pilato quirabi li que'xye, quixc'am li Jesús chirix cab. Quic'ojla sa' li na'ajej li narakoc cui' atin. Li c'ollebal a'an cuan sa' xben li tusbil pec. C'ajo' xch'ina'usal. Gabata xc'aba' li na'ajej a'an sa' li atinobal hebreo. ¹⁴ Cua'leb na re cutan nak quic'ulman a'in. Li tenamit yoqueb chixcaresinquil li nink'e Pascua, li tatiçlak sa' li cutan jun chic. Laj Pilato quixye reheb: —Cue' le rey, chan. ¹⁵ Que'xjap cui'chic reheb chixyebal: —¡Q'ueomak chiru cruz! ¡Q'uehomak chiru cruz! Ut laj Pilato quixye reheb: —¿Ma téraj nak ting'ue chiru cruz le rey? chan. Eb li xbenil aj tij

que'xye: —Jun ajcui' li karey cuan. A'an li Acuabej César, chanqueb. ¹⁶ Laj Pilato quixk'axtesi li Jesús sa' ruk'eb li soldado re nak taq'uehek' chiru cruz. Ut que'xc'am li Jesús.

Jo'ca'in nak quiq'uehe' li Jesús chiru cruz

¹⁷ Li Jesús yo chixpakonquil lix cruz nak co sa' li na'ajej Xbakel Xjolom Camenak xc'aba'. Sa' li atinobal hebreo Gólgota xc'aba'. ¹⁸ Ut aran que'xq'ue chiru cruz. Ut que'xq'ue cuib chic li cuink chiru cruz rochben. Jun que'xq'ue sa' xnim uk' ut li jun chic que'xq'ue sa' xtz'e. Li cruz li que'xq'ue cui' li Jesús quicana sa' xyi. ¹⁹ Laj Pilato quixtz'iba jun li retalil ut que'xq'ue sa' xjolom li cruz li quiq'uehe' cui' li Jesús. Li retalil a'an quixye: Li Jesús aj Nazaret, a'an lix reyeb laj judío. ²⁰ Nabaleb laj judío que'r'il li retalil li quitz'ibac, xban nak li na'ajej li quiq'uehe' cui' chiru cruz li Jesús nach' cuan riq'uin li tenamit. Li retalil tz'ibanol bil sa' eb li atinobal hebreo, griego ut latín. ²¹ Inc'a' quicuulac chiruhueb lix xbenil aj tij li quixtz'iba. Que'xye re laj Pilato: —Matz'iba nak a'an xreyeb laj judío. Tz'iba ban nak a'an xyehoc re, “Lain xreyeb laj judío”, chanqueb. ²² Ut laj Pilato quixye rebeb: —Li c'a'ru xintz'iba, xintz'iba. Inc'a' chic tajalmal, chan. ²³ Nak ac xe'xq'ue chiru cruz li Jesús, eb li soldado que'xc'am li rak' chok' rebeb. Cahib echal que'risi, jun re li junjunk chi soldado. Ut que'xc'am ajcui' li rak' li mac'a' xbojbal. Junaj ru lix quembal. ²⁴ Que'xye chi ribileb rib: —Inc'a' takapeji. Us takabuli rix re rilbal ani taqechanink re, chanqueb. Jo'can que'xbanu re nak taq'atz'aklok ru li tz'ibanol sa' li Santil Hu li naxye chi jo'ca'in: Que'xjeq'ui chirixeb lin t'icr ut que'xbuli rix li cuak'. (Sal. 22:18) ²⁵ Nach'riq'uin li cruz xakxo li xna' li Jesús rochben lix María li ras. A'an li rixakil laj Cleofas. Ut cuan ajcui' aran lix María, Magdala xtenamit. ²⁶ Li Jesús quiril líx na' ut quiril ajcui' líx tzolom li raro xban. Li Jesús quixye re líx na': —At inna', li cuink a'in, a'an chic la yum. — ²⁷ Ut quixye re líx tzolom: —Li iixk a'in, a'an chic la na'. — Ut chalen a'an lix tzolom quixc'ul líx na' li Jesús riq'uin sa' li rochoch.

Jo'ca'in nak quicam li Jesús

²⁸ Chirix chic a'an quixnau li Jesús nak ac xtz'akloc ru chixjunil. Re nak taq'atz'aklok ru li tz'ibanol sa' li Santil Hu, li Jesús quixye: —Tachakik cue, chan. ²⁹ Cuan aran jun sec' nujenak chi vinagre. Que'xtz'a sa' li vinagre jun li esponja ut que'xtaksi sa'ru'uj jun li ruk' che' hisopo xc'aba' ut que'xq'ue sa' re. ³⁰ Li Jesús quiruc' li vinagre ut quixye: —Anakcuan xtz'akloc ru chixjunil. — Quixxulub lix jolom ut quicam. ³¹ Eb li neque'taklan sa' xyankeb laj judío que'xtz'ama chiru laj Pilato re nak tixtakla xtobal xbakel li ra'eb li que'q'uehe' chiru cruz re nak te'camk chi junpat. Que'raj nak te'isik chiru cruz xban nak cuulac re li hilobal cutan. Yoqueb chixcauresinquel ribeb re li nink'e Pascua xban nak a'an li k'axal lok' chiruhueb. ³² Que'chal eb li soldado ut que'xtok xbakel li ra'eb li cuib chi cuink li que'q'uehe' chiru cruz rochben li Jesús. ³³ Abanan nak que'cuulac cuan cui' li Jesús, que'r'il nak ac xcam ut inc'a' que'xtok xbakel li ra'. ³⁴ Jun li soldado quixhop xc'atk xsa' riq'uin líx ch'ich' ut sa' junpat qui-el li quic' ut qui-el ajcui' li ha'. ³⁵ Lain quin-iloc re chi tz'akal li c'a'ru quic'ulman ut li c'a'ru yoquin xyebal ere tz'akal yal. Yoquin chixyebal ere a'in re nak tepab nak tz'akal yal nak quic'ulman chi jo'can. ³⁶ Quic'ulman chi jo'can re nak taq'atz'aklok ru li tz'ibanol sa' li Santil Hu: Ma jun lix bakel tatokmank. (Ex. 12:46) ³⁷ Ut tz'ibanol ajcui' sa' li Santil Hu: Eb a'an te'r'il li ani quihope' chi ch'ich'. (Zac. 12:10)

Jo'ca'in nak quimuke' li Jesús

³⁸ Jun li cu_{ink} aj José xc'aba' Arimatea xtenamit quicuulac riq'uin laj Pilato chixtz'amanquil chiru nak tixq'ue lix tz'ejcual li Jesús re, re tixmuk. Laj José, a'an jun reheb li neque'pában re li Jesús. Abanan inc'a' quixye xban nak quixucuac xbaneb li neque'taklan sa' xbeneb laj judío. Laj Pilato quixye re nak tarük tixmuk, ut laj José co chixc'ambal li camenak. ³⁹ Laj Nicodemo li quicuulac riq'uin li Jesús chi k'ek, co rochben laj José. Quixc'am na o'c'alak (100) libra li sununquil ban yibambil riq'uin mirra ut áloes. ⁴⁰ Li cuib chi cu_{ink} que'xc'am lix tz'ejcual li Jesús ut que'xlan riq'uin li chabil t'icr lino ut que'xq'ue li sununquil ban jo' c'aynakeb chi mukuc eb laj judío. ⁴¹ Sa' li na'ajej li quiq'uehe' cui' li Jesús chiru cruz cuan jun sir li acuimk. Aran cuan jun li muklebal toj ac'. Toj ma' ani mukbil aran. ⁴² Aran que'xmuk li Jesús xban nak nach' cuan li na'ajej a'an ut que'raj ru xmukbal chi junpat xban nak cuulac re li hilobal cutan.

20

Li Jesús quicuacli cui'chic chi yo'yo sa' xyankeb li camenak

¹ Sa' li xben li cutan re li xaman nak toj maji' nasakeu co lix María Magdala xtenamit sa' li muklebal. Nak quicuulac cuan cui' li muklebal, quixq'ue retal nak ac isinbil chic li nimla pec li que'xq'ue chire li muklebal. ² Co sa' anil riq'uin laj Simón Pedro ut riq'uin li jun chic xtzolom li Jesús li raro xban, ut quixye reheb: —Xe'risi li Kacua' sa' li muklebal ut inc'a' nakanau bar ta xe'xq'ue, chan. ³ Coeb sa' li muklebal laj Pedro rochben li jun chic xtzolom li Jesús. ⁴ Coeb sa' anil xcabichaleb. Ut lix tzolom jun chic k'axal cau quialinac chiru laj Pedro ut a'an xben cua quicuulac sa' li muklebal. ⁵ Quixc'utzub rib chi iloc chi sa'. Quiril li t'icr li que'xlan cui' li Jesús. Abanan inc'a' qui-oc toj chi sa'. ⁶ Quicuulac laj Pedro toj chi ixbej. Ticto qui-oc chi sa' li muklebal ut quiril li t'icr sok'so aran. ⁷ Cuan ajcui' aran li t'icr li que'xbac' cui' lix jolom li Jesús. Moco cuan ta sa' xyankeb li t'icr. Jalan basbo cui' xjunes. ⁸ Ut qui-oc ajcui' chi sa' li muklebal li tzolom li quicuulac xben cua. Quiril li t'icr aran ut quixpab nak ac xcuacli cui'chic chi yo'yo li Jesús. ⁹ Toj maji' que'xtau ru chi tz'akal li tz'ibambil sa' li Santil Hu li naxye nak tento t_acuacl_ik cui'chic chi yo'yo sa' xyankeb li camenak. ¹⁰ Ut eb lix tzolom que'suk'i cui'chic sa' li cab li cuanqueb cui'.

Li Jesús quixc'utbesi rib chiru lix María, Magdala xtenamit

¹¹ Lix María cuan chire li muklebal. Yo chi yabac. Quixc'utzub rib chi iloc chi sa' li muklebal. ¹² Quiril cuib li ángel sak li rak'eb. C'ojc'oqueb aran bar quicuan cui' li Jesús. Jun cuan sa' xjolom ut jun cuan chi rok. ¹³ Que'xye re: —At ixx, ¿c'a'ut nak yocat chi yabac? —Lix María quixye reheb: —Yoquin chi yabac xban nak xe'risi li Kacua' arin ut inc'a' ninnau bar xe'xq'ue. — ¹⁴ Sa' li honal a'an, lix María qui-iloc chirix ut quiril li Jesús xakxo aran, abanan inc'a' quixnau nak a'an ta li Jesús. ¹⁵ Li Jesús quixye re: —At ixx, ¿c'a'ut nak yocat chi yabac? ¿Ani nacasic'? chan. Sa' xch'ol lix María nak a'an aj ilol acuimk ut quixye re: —Kacua', cui la_{at} xatc'amoc re, bánu usilal, ye cue bar xaq'ue re nak tinc'am, chan. ¹⁶ Li Jesús quixye re: —¡María! — Quixsuk'isi rib lix María ut quixye sa' ratinobal aj hebreo: —Raboni. — (Chi jalbil ru naraj naxye aj tzolonel). ¹⁷ Li Jesús quixye re: —Minabay. Canabin chi xic. Tento nak tinxic riq'uin lin Yucua'. Ayu ut ye reheb lin herman nak xic cue riq'uin lin Yucua'. A'an ajcui' le yucua' laex. A'an lin Dios ut a'an ajcui' le Dios laex, chan li Jesús.

18 Co lix María ut quixye reheb lix tzolom li Jesús nak quiril ru li Kacua' Jesús ut quixye ajcui' reheb chixjunil li quiyehe' re xban.

Li Jesús quixc'utbesi rib chiruheb lix tzolom

19 Sa' li xben cutan re li xaman, nak ac oc re li k'ojojin, que'xch'utub ribeb lix tzolom li Jesús. Tz'aptz'o chi us lix puertil li cab li ch'utch'uqueb cui' xban nak que'xucuac xbaneb li neque'taklan sa' xbaneb laj judío. Xakamil li Jesús chiruheb ut quixye reheb: —Chicuank taxak li tuktukil usilal eriq'unin, chan reheb. **20** Ut quixc'ut chiruheb li ruk' ut lix c'atk xsa' li quihope'. C'ajo' nak que'saho' sa' xch'oleb lix tzolom nak que'r'il cui'chic ru li Kacua'. **21** Li Jesús quixye cui'chic reheb: —Chicuank taxak li tuktukil usilal eriq'unin. Jo' nak xinixtakla chak lin Yucua' lain, jo'can ajcui' nak texintakla laex, chan. **22** Ut nak quixye a'an, quirapuheb ut quixye reheb: —C'ulumak li Santil Musik'ej. **23** Li ani tecuy xmactaex, tacuyek' ajcui' xmactaex xban li Dios. Ut li ani inc'a' tecuy xmactaex, inc'a' ajcui' tacuyek' xmactaex xban li Dios, chan li Jesús.

Nak quiril li retalil li claux sa' ruk' li Jesús, laj Tomás quixpab nak yo'yo chic

24 Laj Tomás, a'an jun reheb lix tzolom cablaju, li neque'xye ajcui' lut re. A'an mañani sa' xyankeb nak quixc'utbesi rib li Jesús chiruheb. **25** Li rech aj tzolonelil que'xye re: —Xkil ru li Kacua', chanqueb re. Abanan laj Tomás quixye reheb: —Cui inc'a' tincuil li retalil li claux sa' ruk' ut cui inc'a' tinq'ue li ru'uj cuuk' sa' xna'aj li claux ut cui inc'a' tinch'ic li cuuk' sa' xc'atk xsa', lain inc'a' tinq'ab nak xcuaci cui'chic chi yo'yo, chan laj Tomás. **26** Ac xnume' chic cuukub cutan nak que'xch'utub cui'chic ribeb lix tzolom li Jesús. Laj Tomás cuan sa' xyankeb. Tz'aptz'oqueb lix puertil li cab chi us. Nak que'r'il ac xakamil li Jesús chiruheb ut quixye reheb: —Chicuank taxak li tuktukil usilal eriq'unin, chan. **27** Tojo'nak quixye re laj Tomás: —Il chi us li cuuk'. Chi'c li ru'uj laj cuuk' arin sa' xna'aj li claux. Ut chi'c laj cuuk' sa' xc'atk lin sa'. Chatpabank. ¿C'a'ut nak inc'a' xapab nak xincuaci cui'chic chi yo'yo?— **28** Ut laj Tomás quixye re: —¡At Kacua', at inDios!— **29** Li Jesús quixye re: —Laat toj xacuul cuu, tojo'nak xinapab. Abanan lain ninye aq'ue, us xak reheb li neque'pabán cue chi inc'a' xe'r'il cuu, chan li Jesús re.

Li hu a'in tz'ibanol re nak tenua'nak li Jesús, a'an li Cristo li Ralal li Dios

30 Nabal chic li milagro quixbanu li Jesús chiruheb lix tzolom li inc'a' tz'ibanol retalil sa' li hu a'in. **31** Abanan li jo' q'uijal tz'ibanol retalil sa' li hu a'in, quitz'ibac re nak tepab nak li Jesús, a'an li Cristo. A'an li Ralal li Dios. Quitz'ibac re nak riq'unin xpabankil tacuank eyu'am chi junelic sa' xc'aba' a'an.

21

Li Jesús quixc'utbesi rib chiruheb cuukub lix tzolom

1 Mokon chic quixc'utbesi cui'chic rib li Jesús chiruheb lix tzolom chire li palau Tiberias. Jo'ca'in nak quixc'ut rib chiruheb: **2** Ch'utch'uqueb laj Simón Pedro ut laj Tomás li nayehe' lut re, ut laj Natanael, Caná xtenamit li cuan sa' xcuént Galilea. Cuanqueb ajcui' aran li ralal laj Zebedeo ut cuibeb chic lix tzolom li Jesús. **3** Laj Simón Pedro quixye reheb: —Lain xic cue chi caribc, chan. —Toxic ajcui' lago chacuix, chanqueb re. Ut que'oc sa' jun li jucub ut que'xnumsi li k'ojojin chi caribc. Abanan mañani li car que'xchap. **4** Nak ac yo' chic chi sakeuc, li Jesús quixc'utbesi cui'chic rib chiruheb chire li palau. Abanan eb lix tzolom inc'a' que'xnau nak a'an li Jesús. **5** Quixye li Jesús reheb: —Ex cualal inc'ajol, ¿ma xechap li car? chan. Eb a'an que'chak'oc ut que'xye:

—Ma jun xkachap.—⁶ Li Jesús quixye rebeb: —Cutumak le yoy chixc'atk li jucub, sa' le nim re nak techap li car, chan. Ut que'xcut lix yoy sa' li ha' ut inc'a' chic que'xcuy risinquel xban xq'ual li car li que'xchap.⁷ Ut lix tzolom li Jesús, li raro xban, quixye re laj Pedro: —¡A'an li Kacua'!— Ut laj Pedro, nak quirabi nak a'an li Kacua', quixq'ue cui'chic li rak' chirix xban nak quirisi nak qui-oc chi caribc, ut quixcut rib sa' li ha' re taxic riq'uin li Jesús.⁸ Ut eb lix comon que'chal sa' li jucub. Yoqueb chixquelonqu'il lix yoy nujenak chi car. Moco najt ta cuanqueb chire li palau, yal oc'al metro tana.⁹ Nak que'el sa' li jucub que'r'il nak cuan jun li xam c'ubc'u. Li Jesús yo chixpombal jun li car sa' xben li ru xam ut cuan ajcui' caxlan cua riq'uin.¹⁰ Li Jesús quixye rebeb: —C'amomak chak cuib oxibak li car li xechap.—¹¹ Laj Simón Pedro qui-oc sa' li jucub ut quixquelo li yoy chi ch'och'el nujenak chi ninki car. Jun ciento riq'uin oxlaju rox'äl (153) li car cuan sa' li yoy. Usta k'axal nabaleb li car cuan chi sa', abanan inc'a' quipeje' li yoy.¹² Li Jesús quixye rebeb: —Quimkex ut cuia'inkex.— Ut ma jun rebeb lix tzolom quiraj xpatz'bal re ma a'an li Kacua' xban nak ac neque'xnau nak a'an li Kacua'.¹³ Ut li Jesús quixchap li caxlan cua ut quixq'ue rebeb. Ut quixq'ue ajcui' li car.¹⁴ A'in li rox sut nak quixc'utbesi cui'chic rib li Jesús chiruheb lix tzolom nak ac xcuacli cui'chic chi yo'yo sa' xyānkeb li camenak.

Li Jesús quixye re laj Pedro nak tarileb lix carner

¹⁵ Nak ac xe'cua'ac, li Jesús quixye re laj Simón Pedro: —At Simón, ralalat laj Jonás, ¿ma k'axal niquinara chiruheb a'in?— Laj Pedro quixye re: —Kacua', laat nacanau nak nacatinra, chan. Ut li Jesús quixye re: —Chacuilakeb li cualal inc'ajol li toj k'uneb xch'ol sa' lix pabaleb jo' jun li pastor narileb lix coc' carner.—¹⁶ Ut li Jesús quixye cui'chic re: —At Simón, ralalat laj Jonás, ¿ma niquinara?— Laj Pedro quixye: —Kacua', laat nacanau nak nacatinra.— Ut li Jesús quixye re: —Chacuilakeb li cualal inc'ajol jo' jun li pastor narileb lix carner, chan.¹⁷ Ut li Jesús quixpatz' cui'chic re rox sut: —At Simón, ralalat laj Jonás, ¿ma niquinara?— Ut quiraho' sa' xch'ol laj Pedro xban nak li Jesús quixpatz' re rox sut “¿ma niquinara?”. Jo'can nak quixye re li Jesús: —Kacua', laat nacanau chixjunil li c'a'ak re ru. ¡Laat nacanau nak nacatinra!— Ut li Jesús quixye cui'chic re: —Chacuilakeb li cualal inc'ajol jo' jun li pastor narileb lix carner.¹⁸ Relic chi yal ninye aq'ue nak toj sajat, nacabac' asa' ajunes ut nacatxic yalak bar nacacuaj xic. Abanan nak ac tixakat chic, taye' la cuuk' ut jalan tābac'ok re ut tatxc' am bar inc'a' nacacuaj xic, chan.¹⁹ Riq'uin li a'tin a'in li quixye li Jesús, yo chixyebal chanru nak tācamsik laj Pedro. Ut riq'uin xcamic tixq'ue xlok'äl li Dios. Nak ac xye a'in, li Jesús quixye re laj Pedro: —Chinatäke, chan re.

Laj Pedro quixpatz' c'a'ru tixc'ul li tzolom li raro xban li Jesús

²⁰ Laj Pedro quixsuk'isi rib ut quiril lix tzolom li Jesús, li raro xban, yo chi xic chirixeb. A'an lix tzolom li quipatz'oc re li Jesús nak yoqueb chi cua'ac, “¿Ani tāk'axtesink aq'ue, at Kacua'? ”²¹ Nak laj Pedro quiril a'an, quixpatz' re li Jesús: —Ut li cuink a'an, Kacua', ¿ma tixc'ul jo' tinc'ul lain? chan.²² Li Jesús quixye re: —Cui lain tincuaj nak yo'yok a'an toj tinc'ulunk cui'chic, ¿c'a'ru tācuaj re laat? Laat q'ue aq'ol chintakenqu'il, chan li Jesús re laj Pedro.²³ Jo'can nak qui-el resil sa' xyānkeb laj pabanel nak li jun a'an inc'a' tācamk. Abanan macua' jo'can quixye li Jesús. Inc'a' quixye nak inc'a' tācamk. Ca'aj cui' quixye, “Cui lain tincuaj nak yo'yok toj tinc'ulunk, ¿c'a'ru tācuaj re laat?”²⁴ Ut li tzolom a'an, a'an lain laj Juan. Lain quin-iloc re li c'a'ru quic'ulman

ut xinch'olob xy_älal sa' li hu a'in. Ut l_äo nakanau nak tz'akal y_äl li c'a'ru xintz'_äba sa' li hu a'in. ²⁵Toj cuan chic nabal li c'a'ak re ru quilajxbanu li Jesús. Cui ta tz'ibabil retalil chi xjunjunkal, lain ninye nak ma jok'e raj tatz'aklok li ruchich'och' chok' xna'aj li hu li tatz'_äbamank cui' retafl. Jo'can taxak.

Lix Yehom Xbanuhomeb li Apóstol

Li Dios quixyechi'i li Santil Musik'ej rebeb li ralal xc'ajol

¹ Sa' li xben hu quintz'iba acuiq'uin, at Teófilo, quintz'iba retalil chixjunil li jo' q'ual quixc'ut ut quixbanu li Kacua' Jesús chalen nak quixtiquib'lix c'anjel sa' ruchich'och' ² toj sa' li cutan nak quic'ame' sa' choxa. Nak toj maji' naxic sa' choxa, riq'uin xcuauquil li Santil Musik'ej, quixye rebeb c'a'ru tento te'xbanu lix apóstol li quixsiq'ueb ru. ³ Nak ac xrahobtesic ut ac xcamsic, quicuacli cui'chic chi yo'yo ut quixc'utbesi cui'chic rib chiruheb. Ca'c'al cutan quicuan sa' ruchich'och' ut nabal sut quixc'utbesi rib chiruheb re nak te'xnau chi tz'akal nak quicuacli cui'chic chi yo'yo. Quixch'olob xyal chiruheb chanru nak tacular xnimal xcuauquilal li Dios sa' xbeneb li tenamit. ⁴ Nak toj cuan sa' xyankeb li Jesús quixye rebeb chi jo'ca'in: —Inc'a' texxic sa' jalan na'ajej. Texcanaq ban Jerusalén roybeninquil li Santil Musik'ej li yechi'nbil ere xban li Dios Acuabej, li ac xinye ere lain. ⁵ Yal nak laj Juan quicubsin ha' riq'uin ha'. Abanan anakcuan a' chic lix cuauquilal li Santil Musik'ej tec'ul chi səb ut a'an chic tacular eriq'uin, chan.

Li Jesús quic'ame' sa' choxa xban li Dios

⁶ Eb li apóstol li ch'utch'uequeb aran que'xpatz' re li Jesús: —At Kacua', ¿ma anakcuan taq'ueheb cui'chic xcuauquileb laj Israel re te'xtakla cui'chic rib xjuneseb? chanqueb. ⁷ Quichak'oc li Jesús ut quixye rebeb: —Mäcu'a' ere laex xnaubal li c'a'ak re ru a'in. Ca'aj cui' li Dios Acuabej nana'oc re jok'e tixbanu xban nak ca'aj cui' a'an yal re sa' xben chixjunil. ⁸ Laex tec'ul le cuauquil nak tachalk li Santil Musik'ej eriq'uin. Laex chic texch'olobank resilal chicuix lain arin Jerusalén, aran Judea ut Samaria. Jo' ajcui' yalak bar jun sut sa' ruchich'och' tec'h'olob li xyalal, chan. ⁹ Nak quirake' xyebal chixjunil a'in quic'ame' sa' choxa li Jesús xban li Dios. Yoqueb chirilbal nak quichal jun li chok ut quimukun sa' li chok. Ut inc'a' chic que'r'il ru. ¹⁰ Toj yoqueb ajcui' chirilbal nak yo chi xic li Jesús sa' choxa nak xakamileb cuibeb li cuink chiruheb. Sakeb li rak'. ¹¹ Ut que'xye rebeb: —Ex cuink aj Galilea, ¿C'a'ut nak yoquex chi iloc sa' choxa? Li Jesús li xcuau sa' eyank ut xc'ame' sa' choxa, a'an tachalk cui'chic. Chanru nak xeril chi xic sa' choxa, jo'can cui'chic nak teril nak yok chi chalc, chanqueb rebeb.

Quixakabac laj Matías chok' apóstol chok' rekaj laj Judas

¹² Chirix a'an eb li apóstol que'cube chak sa' li tzul Olivos ut que'coeb cui'chic Jerusalén. Li tzul a'an nach' cuan riq'uin li tenamit Jerusalén, jun kilómetro tana xnajtil, jo' xnajtil li naru neque'xbeni sa' li hilobal cutan. ¹³ Nak que'cuulac Jerusalén que'take' sa' xca' tasal li cab li neque'hilan cui' nak cuanqueb Jerusalén. A'aneb laj Pedro, laj Juan, laj Jacobo, laj Andrés, laj Felipe, laj Tomás, laj Bartolomé, laj Mateo, laj Jacobo li ralal laj Alfeo, laj Simón li na-oquen sa' xyankeb li jun ch'utal Celote neque'xye rebeb, ut laj Judas li ralal laj Jacobo. ¹⁴ Chixjunileb a'an yoqueb chi tijoc chi junajeb xch'ol rochbeneb li ritz'in li Jesús ut lix María lix na'. Ut cuanqueb ajcui' ixx yoqueb chi tijoc rochbeneb. ¹⁵ Sa' eb li cutan a'an jun ciento riq'uin junmay chixjunileb laj pabanel li ch'utch'uequeb aran. Laj Pedro quixakli sa' xyankeb ut qui-oc chixyebal rebeb: ¹⁶ —Ex inherman, tento nak tauxmank li tz'ibabil sa' li Santil Hu li quic'ute' chiru li rey David xban li Santil Musik'ej

chirix laj Judas li quik'axtesin re li Jesús reheb li que'chapoc re. ¹⁷ Laj Judas, a'an raj jun sa' kayank sa' li c'anjel a'in. ¹⁸ Riq'uin lix tojbal li quiq'uehe' re xban nak quixbanu li mausilal, quilok'e jun li ch'och'. Quixyatz' rib ut nak quit'ané chi xulxu, quichire' ut qui-el chak chixjunil sa' lix sa'. ¹⁹ Qui-el ut resil a'an sa' xyank'eb chixjunileb li cuanqueb Jerusalén. Jo'can nak Acéldama neque'xye re li na'ajej a'an sa' li ratinobaleb. A'an naraj naxye "Lok'bil riq'uin quic'". ²⁰ Quic'ulman chi jo'can xban nak sa' li hu Salmos tz'ibanal retalil fi naxye chi jo'ca'in.

Chicanak ta lix na'aj chi mact'a chic cuan chiru. Ut mañani ta chic chi cuank' sa' lix muhebal. (Sal. 69:5)

Ut naxye ajcui':

Jalan ta chic chiq'uehek' chok' rekaj sa' lix c'anjel. (Sal. 109:8)

²¹ Jo'can nak tento takaxakab junak chok' rekaj laj Judas. Cuanqueb cuink' sa' kayank que'ochbenin chak ke nak toj cuan li Jesús sa' kayank, ²² chalen nak quicubsjc chak xha' li Jesús xban laj Juan ut toj chalen nak quic'ame' sa' choxa chiku. Jun reheb li cuink' a'an naru takaxakab chok' rekaj laj Judas re nak tixch'olob ajcui' xyalal nak quicuacli cui'chic chi yo'yo li Jesús sa' xyank'eb li camenak, chan laj Pedro. ²³ Que'xxakab laj José li neque'xye Barsabás re. Aj Justo lix c'aba' jun chic neque'xq'ue. Ut que'xxakab ajcui' laj Matías. ²⁴ Ut que'oc chi tijoc ut que'xye: —At Kacu'a, laat nacanau chanru li ram li junjunk. Jo'can nak nakatz' amá chacuu nak tac'utbesi chiku ani reheb li cuib a'in tasic' ru re taçanak chi c'anjelac chok' rekaj laj Judas. ²⁵ A'an tixc'ul xcuquil chi c'anjelac chok' apóstol. Tixbanu li c'anjel li quixtz'ektana laj Judas xban li inc'a' us quixbanu. Laj Judas co sa' li na'ajej chixtojbal xmact bar xc'ulub cui' xic, chanqueb. ²⁶ Jo'can nak que'xbulí rix li ani taçanak chi c'anjelac. Ut nak ac xe'búlic, li c'anjel a'an quicana sa' xbéñ laj Matías. Ut sa' ajcui' li honal a'an laj Matías qui-oc chok' apóstol sa' xyank'eb li junlaju chic.

2

Que'xc'ul li xcuquilal li Santil Musik'ej eb laj pabanel sa' xk'ehil li nink'e Pentecostés

¹ Sa' xk'ehil li nink'e re li Pentecostés ch'utch'uqueb chixjunileb laj pabanel sa' jun chi na'ajej ut junajeb xch'ol. ² Que'rabi jun chok'inc chanchan xyab cacuil ik' yo' chi chalc' sa' choxa. Chixjunileb li cuanqueb sa' li cab que'rabi. ³ Que'r'il li chanchan rak' xam. Li rak' xam que'xeq'ui rib ut que'hilan sa' xbeneb chi xjunjunkaleb. ⁴ Que'xc'ul li xcuquilal li Santil Musik'ej, ut que'oc chi atinac sa' jalan atinobal a' yal chanru quic'ute' chiruheb xban li Santil Musik'ej. ⁵ Cuanqueb aj judío aran Jerusalén cauhed xch'ol sa' xpabaleb. Que'chal chak sa' chixjunil li tenamit jun sut rubel choxa. ⁶ Nak que'rabi li c'a'ru yoqueb chixc'ulbal eb a'an, que'xch'utub ribeb li q'ula tenamit. Sachsoqueb xch'ol xban nak que'rabi nak yoqueb chi atinac sa' li ratinobaleb li junjunk chi tenamit. ⁷ C'ajo' nak que'xucuac ut sachsoqueb xch'ol que'cana ut que'xye chi ribileb rib: —¿Ma mactua'eb ta bi' aj Galilea chixjunileb a'in li yoqueb chi atinac sa' jalanił atinobal? ⁸ ¿C'a'ut nak yoco chirabinquileb chi atinac sa' li katinobal chikajunkal? ⁹ Anakcuan eb a'an yoqueb chi atinac sa' ratinobaleb laj Partos, laj Medo, laj elamitas ut chikajunilo lao li cuanco Mesopotamia, ut Judea, Capadocia, Ponto ut Asia, ¹⁰ jo'queb ajcui' laj Frigia ut laj Panfilia, laj Egipto ut eb li cuanqueb sa' eb li na'ajej xcuient Libia li cuanqueb nach' riq'uin Cirene, jo'queb ajcui' laj Roma. ¹¹ Cuanqueb aj judío sa' xyo'lajiqueb ut cuanqueb

ajcui' li que'xjal xpabal ut que'oc sa' xyānkeb laj judío. Cuanqueb ajcui' li que'chá'l Creta ut Arabia. Nakabi nak yoqueb chixyebal sa' katinobal li c'a'ru yo chixbānunqu'il li Kacua' Dios riq'uin xnimál xcuānquil, chanqueb. ¹² Ut chixjunileb sachsoqueb xch'ol ut inc'a' que'xtau ru. Que'xye chiribileb rib: —¿C'a'ru xyalal a'in li yoco chixc'ulbal? chanqueb. ¹³ Cuanqueb ajcui' yoqueb chi hoboc ut yoqueb chixyebal: —Mare te'calak, chanqueb.

Laj Pedro naxch'olob xyalal chiruheb li q'uila tenamit

¹⁴ Tojo'nak quixakli laj Pedro rochbeneb li junlaju chic chi apóstol ut quioc chi atinac chi cau xyab xcux. Quixye rebeb li q'uila tenamit: —Ex cuech tenamitil aj judío ut chejunilex laex li cuanquex Jerusalén, laín tinye ere c'a'ru xyalal a'in. Q'uehomak retal chi us li oc cue xyebal ere. ¹⁵ Li jo' q'uialeb li cuanqueb arin moco te'calak ta jo' yoqueb chixc'oxlanquil laex. Anakcuan toje' beleb or re li cutan cuanco. ¹⁶ Yoco ban chixc'ulbal li quixye chak resil li profeta Joel nak quixye chi jo'ca'in:

¹⁷ Sa' eb li cutan li telajechalk, chan li Dios, laín tinq'ue lin musik' chi cuanc riq'uineb chixjunileb li tenamit. Eb le ralal ec'ajol te'yehok ratin profeta. Ut tinc'ut li xyalal chiruheb li tixil cuink sa' xmatq'ueb ut tinc'uteb li visión chiruheb li saj cuink.

¹⁸ Ut tinq'ue ajcui' lin musik' chi cuanc riq'uineb lin mos cuink ut lin mos ixs, ut talaje'xye resil li c'a'ru tac'ulmank mokon.

¹⁹ Ut sachba ch'olej tinc'utbesi cheru chiru choxa jo' ajcui' sa' ruchich'och' ut teril li quic', li xam ut li sib chanchan li chok.

²⁰ Tak'ojyinok' ru li sak'e ut li po tacakok' ru chanchan li quic' toj tacuulak xk'ehil li cutan a'an, li k'axal xiu xiu, nak laín tinrakok atin, chan li Dios.

²¹ Abanan chixjunileb li neque'yaban re lix c'aba' li Kacua', te'colek'. (Joel 2:28-32)

²² Ex aj Israel, abihomak li tinye ere. Laex ac nequenau nak li Jesús aj Nazaret, a'an q'uebil xcuānquil xban li Dios sa' eyank laex riq'uin li sachba ch'olej ut li milagro quilaixbanu. Laex ac nequenau nak riq'uin xcuānquil li Dios quixbanu li sachba ch'olej. ²³ Li Jesús quik'axtesic sa' eruk' laex xban nak ac jo'can chak sa' xch'ol li Dios nak jo'can tixc'ul. Ut laex quechap ut quek'axtesi sa' ruk'eb li cuink li inc'a' useb xna'leb. Ut eb a'an que'xcamsi chiru cruz. ²⁴ Abanan li Dios quicuaclesin cui'chic re chi yo'yo sa' xyānkeb li camenak. Li Dios quirisi xcuānquil li cāmc sa' xben xban nak li cāmc inc'a' naru nanumta sa' xben. ²⁵ Jo'ca'in quixye li rey David chirix li Jesús: Lain junelic ninc'oxla li Dios. A'an cuan cuiq'uin. Mac'a' c'a'ru taisink cue riq'uin li Dios.

²⁶ Numtajenak li saylal cuan sa' li cuqm xban nak c'ojo'c'o inch'ol riq'uin li Kacua'.

²⁷ Lain ninnau nak tinaquaclesi cui'chic chi yo'yo sa' xyānkeb li camenak. Ut ninnau ajcui' nak inc'a' tacanab chi k'ac lix tibel la Santil Alal.

²⁸ Lain ninnau nak laat nacatc'utuc chicuu chanru nak tintau li junelic yu'am. Xban nak laat cuancat cuiq'uin, junelic sa sa' inch'ol. Ut ca'aj cui' acuiq'uin cuan li sahil ch'olejil. (Sal. 16:8-11)

²⁹ Ex kech tenamitil, lain ninye ere chi anchal inch'ol nak tz'akal yal nak laj David li kaxe'tonil yucua' quicam ut quimuke'. Lao nakanau nak li muklebal li cuan cui' toj cuan ajcui' chalen anakcuan. ³⁰ Laj David a'an jun profeta. A'an quixnau nak li Dios quixye riq'uin juramento nak sa' xyānkeb li ralal xc'ajol tayo'lak li Cristo, ut a'an chic taxakabak chok' rey. ³¹ Ut laj David quixnau li c'a'ru tac'ulmank mokon. Jo'can nak quixch'olob xyalal nak li

Cristo tacular cui'chic chi yo'yo sa' xyānkeb li camenak. Quixnau nak a'an inc'a' tacular sa' xna'ajeb li camenak chi moco lix tibel tāk'āk. ³² A'an a'in li Jesús li quicuaclesic cui'chic chi yo'yo xban li Dios. Lao xkil tz'akal riq'unin xnak' ku. Jo'can nak nakanau nak yal. ³³ Quic'ame' xban li Dios re nak tac'ojlak sa' lix nim uk' ut quiq'uehe' xcuanguil. Ut quiq'uehe' li Santil Musik'ej re xban li Dios. Ut quixq'ue ajcui' ke ləo li Santil Musik'ej jo' quiyechi'ic ke. A'an a'in li yoqex chiribal ut chirabinqwil anakcuan. ³⁴ Li rey David inc'a' quic'ame' sa' choxa jo' nak quic'ame' li Cristo sa' choxa. Abanan quixye chi jo'ca'in:

Li Dios quixye re li Kacua': C'ojlan sa' lin nim uk',

³⁵ toj ting'ueheb li xic' neque'iloc ącue rubel la cuanguil. (Sal. 110:1)

³⁶ Chenuahak chejunilex laex aj Israel nak li Jesús li queq'ue laex chiru cruz, a'an li quiq'uehe' chok' Kacua' ut chok' Cristo xban li Dios, chan laj Pedro. ³⁷ Nak que'rabi a'an li ch'utch'uequeb aran, que'yot'e' xch'oleb ut que'xye re laj Pedro jo' ajcui' reheb li apóstol li jun ch'ol chic: —Ex kas kitz'in, ¿c'a'ru takabau? chanqueb. ³⁸ Laj Pedro quichak'oc ut quixye reheb: —Chiyot'ek' ech'ol ut jalomak ec'a'ux ut tacubtsik eha' chi junjunkalex sa' xc'aba'li Jesucristo re nak tixcuy emac li Dios ut tixq'ue ere li Santil Musik'ej. ³⁹ Yechi' inbil ere laex li matan a'in, ut yechi' inbil ajcui' reheb le ralal ec'ajol ut reheb ajcui' li macua'eb aj judío. Yechi' inbil reheb chixjunileb li jo' q'uialeb te'bokek' xban li Kacua' li kaDios, chan. ⁴⁰ Macua' ca'aj cui' a'an li quixye laj Pedro reheb. Quixch'olob ban ajcui' xyalal chiruheb riq'unin nabal chi ątin ut quixq'ue xna'lebeb. Quixye reheb: —Chenuahak xcolbal erib chiru li tojba mact li tachalk sa' xbenet li inc'a' useb xna'leb, chan. ⁴¹ Ut chixjunileb li que'paban re li ratin que'cubsic xha'. Oxib mil tana li que'paban sa' li cutan a'an ut que'oc chok' xcomoneb.

Chanru nak que'cuan chi junaj xch'oleb li xbən aj pəbanel

⁴² Cauheb xch'ol chixpəbanquil li tijleb li quich'olobac chiruheb xbaneb li apóstol. Junaj xch'oleb nak cuanqueb ut sa' comonil que'tijoc ut que'cua'ac re xjulticanquil lix camic li Jesucristo. ⁴³ Chixjunileb sachsoqueb xch'ol xban li milagro ut li sachba ch'olej li yoqueb chixbanunquil li apóstol. ⁴⁴ Ut eb li que'paban junaj xch'oleb ut chixjunil li c'a'ru cuan reheb, reheb sa' comonil. ⁴⁵ Que'x'ayi lix ch'och'eb ut chixjunil li c'a'ru cuan reheb ut que'xjeq'ui lix tz'ak reheb chixjunileb a'yal chanru tac'anjelak chiruheb li junjunk. ⁴⁶ Rajlal cutan que'xch'utub ribeb sa' li templo chi lok'oninc. Ut sa' eb li rochoch que'cua'ac sa' comonil chi sa sa' xch'oleb ut chi junaj xch'oleb. ⁴⁷ Que'xlok'oni li Kacua' Dios ut que'q'uehe' xcuanguil xbaneb chixjunileb li tenamit. Ut rajlal cutan li Dios quixtenk'aheb chi q'uianc laj pəbanel.

3

Laj Pedro quixq'uirtesi jun li cuink inc'a' nabec

¹ Sa' jun li cutan que'coeb sa' li templo laj Pedro rochben laj Juan oxib or re ecuu sa' x-oril li tijoc. ² Rajlal cutan nac'ame' jun li cuink inc'a' nabec chalen sa' xyo'lajic ut naq'uehe' chire li oquebal re li templo. Lix c'aba' li oquebal a'an "Ch'ina'us". Naq'uehe' li yaj aran re tixtz'ama c'a'ru re riq'unieb li neque'oc sa' li templo. ³ Li cuink a'in quiril nak yoqueb chi oc sa' li templo laj Pedro ut laj Juan. Qui-oc chixtz'amanguil c'a'ru re reheb. ⁴ Laj Pedro ut laj Juan que'cana chiribal li yaj ut laj Pedro quixye re: —Ilon chak kiq'unin.— ⁵ Nak quirabi li cuink li c'a'ru quixye, qui-oc chiroybeninquil c'a'ru te'xq'ue re. ⁶ Laj Pedro quixye re: —Mac'a intumin lain re tinq'ue

äcue. Abanan li c'a'ru cuan cuiq'uin tinq'ue äcue. Sa' xc'aba' li Kacua' Jesucristo laj Nazaret, ninye äcue cuaclin ut bëen, chan re. ⁷ Ut nak quixye a'in, quixchap ut quixcuaclesi riq'uin lix nim uk'. Sa' junpat quicacuu li xben rak ut li rok li cuink. ⁸ Sa' junpat quixakli ut quibec. Ut qui-oc sa' li templo rochbeneb. Yo chi pisc'oc xban xsahil xch'ol ut yo chixlok'oninquil li Dios. ⁹ Chixjunileb li tenamit que'iloc re chi bëc ut chixlok'oninquil li Dios. ¹⁰ C'ajo' nak que'xucua ut sachsoqueb xch'ol chirilbal li cuink a'an, xban nak que'xnau ru nak a'an li nac'oja chixtz'amanquil c'a'ru re chire li oquebal "Ch'ina'us" xc'aba'.

Laj Pedro quixye reheb laj judío nak li Jesús a'an laj Colonel li yechi'inbil xban li Dios

¹¹ Ut li cuink li quiq'uirtesic inc'a' quiraj xcanabanquil rib riq'uineb laj Pedro ut laj Juan. Yo chi bëc rochbeneb. Ut chixjunileb sachsoqueb xch'ol chirilbal li quic'ulman. Que'coeb sa' anil sa' li templo ut que'xch'utub ribeb sa' li oquebal Salomón xc'aba', cuanqueb cui' laj Pedro ut laj Juan. ¹² Nak laj Pedro quirileb, quixye reheb: —Laex aj Israel, ¿c'a'ut nak sachso ech'ol nequexcana xban li c'a'ru xc'ulman? ¿C'a'ut nak yoquex chikilbal? ¿Ma nequec'oxla laex nak lao xkaq'uirtesi li cuink a'in kajunes? ¿Ma xban ta bi' kacuanquil ut li kachabilal nak xkaq'ue chi bec li cuink a'in? ¹³ Li Dios li que'xlok'oni chak laj Abraham, laj Isaac ut laj Jacob jo'queb ajcui' li kaxe'tonil yucua', a'an quiq'uehoc xcuanduil li Jesucristo laj c'anjel chiru. Ut laex quek'axtesi a'an re laj Pilato. Ut nak laj Pilato quiraj raj rach'abanduil, laex inc'a' queraj. ¹⁴ Laex inc'a' queraj xcolbal rix li santil cuink a'in, li tic xch'ol. A' chic laj camsinel queq'ue chi ach'abac. ¹⁵ Laex queq'ue chi camsic'a'an, ut a'an li naq'uehoc yu'am. Abanan quicuaclesic cui'chic chi yo'yo xban li Dios sa' xyankeb li camenak. Ut a'an li nakach'olob xyalal lao xban nak lao xkil chi tz'akal nak quicuaci. ¹⁶ Li cuink a'in xq'uira sa' xc'aba' li Jesús. Riq'uin xpabanquil li Jesús xq'uira chi junaj cua li cuink a'in li nequenau ru ut yoquex chirilbal. ¹⁷ Jo'can ut ex cuas cuitz'in, laín ninnau nak queq'ue chi camsic li Jesús xban nak inc'a' nequenau xyalal jo'queb ajcui' li neque'taklan sa' ebën. ¹⁸ Riq'uin a'in quitz'akloc ru li que'xye chak li profeta najter nak que'xye nak tento tixc'ul li rahobtesic li Cristo li Mesías, xban nak jo'can quixye li Dios. ¹⁹ Jo'can ut nak yot'omak ech'ol ut jalomak ec'a'ux ut sic'omak li Kacua' re nak a'an tixcuy tixsach le mact. Ut li Kacua' tixq'ue xcauilal ut xsaylal ech'ol. ²⁰ Li Dios tixtakla cui'chic chak li Jesucristo sa' ruchich'och' xban nak a'an li Mesías li ac xakabanbil chak najter re xcolbaleb chiru li raylal li cuanqueb sa' ruchich'och'. ²¹ Abanan tento nak cuank chak aran sa' choxa toj tåcuulak xk'ehil nak tåtz'aklok ru chixjunil jo' que'xch'olob xyalal li santil profeta junxilaj jo' quiyeh'e reheb xban li Dios. ²² Laj Moisés quixye reheb li kaxe'tonil yucua', "Li Kacua' le Dios tixq'ue junak profeta sa' eyank sic'bil ru xban jo' laín. Ecomon ajcui' laex. Chebanu chixjunil li c'a'ru tixye ere. ²³ Ut li ani inc'a' tixpab li c'a'ru tixye li profeta a'an, tásik sa' xyankeb lix tenamit li Dios ut tásachek' ru." (Dt. 18:18-19) ²⁴ Chalen nak quicuan li profeta Samuel chixjunileb li profeta que'xye ajcui' resil li c'a'ru tåc'ulmank sa' eb li cutan a'in. ²⁵ Laex ralal xc'ajol eb li profeta ut laex texc'uluk re li quiyech'i'ic reheb le xe'tonil yucua'. Nak li Dios quixbanu li contrato riq'uin laj Abraham, quixye re, "Chixjunileb li cuanqueb sa' ruchich'och' te'osobtesik sa' xc'aba'eb la cualal ac'ajol." ²⁶ Nak li Dios quixtakla chak li ralal, quixtakla xben cua eriq'uin laex aj judío re

erosobtesinqil re nak chejunjunkalex teyot' ech'ol ut tejal ec'a'ux ut tecanab xbanunqil li mausilal.

4

Laj Pedro yo chixch'olobanquil li xyalal chiruheb li neque'taklan sa' xbeneb laj judío

¹ Toj yoqueb ajcui' chi atinac laj Pedro ut laj Juan nak que'cuulac laj tij riq'uineb. Rochbeneb laj tij cuan li nataklan sa' xbeneb li soldado li neque'c'ac'alen re li templo ut rochbeneb ajcui' laj saduceo. ² Yoqueb xjosk'il xban nak laj Pedro ut laj Juan yoqueb chixc'utbal li xyalal chiruheb li tenamit ut yoqueb chixch'olobanquil xyalal chiruheb chirix llix cuaclijiqueb li camenak chi yo'yo sa' xc'aba' li Jesús. ³ Xbaneb xjosk'il que'xchap laj Pedro ut laj Juan ut que'xq'ue sa' tz'alam toj sa' li cutan jun chic xban nak ac x-ecuu. ⁴ Abanan nabaleb li que'paban re li atin li yoqueb chixyebal laj Pedro ut laj Juan. Cuanqueb na obak mil li cuink li que'paban. ⁵ Sa' li cutan jun chic que'ch'utla Jerusalén eb li xbénil aj tij, ut eb li neque'taklan sa' xbeneb laj judío, jo'queb ajcui' laj tz'ib. ⁶ Cuanqueb ajcui' aran laj Anás li xyucua'il laj tij, ut laj Caifás, ut laj Juan, ut laj Alejandro jo'queb ajcui' li jun ch'ol chic llix comoneb li xyucua'il aj tij. ⁷ Que'xtakla xc'ambal laj Pedro ut laj Juan. Que'xakabac chiruheb ut que'xye reheb: —¿Ani xq'uehoc ecuanquil? Ut, ¿ani sa' aj c'aba' yoquex chixbanunqil li milagro a'in? chanqueb. ⁸ Ut laj Pedro qui-oc chi atinac riq'uin xcuanyl li Santil Musik'ej ut quixye reheb: —Læxi li nequextaklan sa' xbeneb laj judío ut læx li nequexc'amoc be chiruheb, abihomak li oc cue xyebal, ⁹ xban nak yoquex chixtz'ilbal atin sa' kabén riq'uin li usilal li xc'ul li cuink a'in. Yoquex chixpatz'bal ke chanru nak quiq'urtesic li cuink a'in. ¹⁰ Takaye li xyalal ere re nak tenau nak li cuink a'in xq'uirsa sa' xc'aba' li Jesucristo laj Nazaret li queq'ue læx chi camsic chiru cruz. Ut a'an li quicuaclesic cui'chic chi yo'yo xban li Dios sa' xyankeb li camenak. Sa' xc'aba' a'an xq'uirsa li cuink a'in li yoquex chiribal arin anakcuan. ¹¹ Li Jesús a'an chanchan li chabil pec tz'ektanabil xbaneb laj cablanel. Læxi xetz'ektana li Jesús. Chanchanex laj cablanel li que'tz'ektan re li chabil pec li quiq'uehe' chok' xxuc li cab mokon. ¹² Ut ma ani chic aj iq'uin taruk takatau kacolbal, xban nak mac'a' chic junak c'aba'ej sa' chixjunil li ruchich'och' q'uebil ta ke re taruk tocolek' cui', chan laj Pedro. ¹³ Que'r'il nak cauheb xch'ol laj Pedro ut laj Juan chi atinac. Que'xq'ue retal nak moco tzolbileb ta ut mac'a'eb xcuanyl. Ut que'xsach xch'oleb chirabinquil li c'a'ru que'xye. Ut que'xq'ue retal nak eb li cuink a'in que'bèc chak rochben li Jesús. ¹⁴ Ut mac'a' chic naru neque'xye xban nak yoqueb chiribal li cuink li quiq'urtesic xakxo chixc'atkeb laj Pedro ut laj Juan. ¹⁵ Jo'can nak que'xtakla risinquel chirix cab laj Pedro ut laj Juan. Ut que'oc chixc'ubanquil chi ribileb rib c'a'ru te'xbanu riq'uineb. ¹⁶ Ut que'xye: —¿C'a'ru takabánu riq'uineb li cuink a'in? Chixjunileb li tenamit arin Jerusalén neque'xnau nak tz'akal milagro que'xbanu re li cuink. Lao inc'a' naru takaye nak inc'a'yal a'an. ¹⁷ Takase'besiheb re nak inc'a' chic te'xye resil li na'leb a'in sa' eb li tenamit. Takaye reheb nak chalen anakcuan inc'a' chic te'atinak sa' xc'aba' li Jesús, chanqueb. ¹⁸ Ut nak que'boke' cui'chic laj Pedro ut laj Juan, que'xye reheb nak inc'a' chic taruk te'atinak chi moco taruk chic te'xtzoleb li tenamit sa' xc'aba' li Jesús. ¹⁹ Ut que'chak'oc laj Pedro ut laj Juan ut que'xye reheb: —C'oxlahomak chi us bar cuan li us chiru li Dios. ¿Ma us nak texkapab læx malaj ut us nak takapab li Dios? ²⁰ Lao inc'a' naru takacanab xyebal

resil li c'a'ru xkil ut xkabi, chanqueb. ²¹ Nak ac xe'xse'besiheb riq'uin cacuil atin, que'rach'abeb. Mac'a' que'ru xbanunquil reheb xban nak chixjunileb li tenamit yoqueb chixlok'oninquil li Dios riq'uin li c'a'ru quic'ulman. ²² Ac numenak ca'c'al chihab cuan re li cuink li quíq'uirtesic riq'uin milagro.

Eb laj pabanel que'xtz'ama xtenk'anquil re nak cauhakeb xch'ol chixyebal resíl li Jesús

²³ Ut nak ac xe'ach'abac laj Pedro ut laj Juan, que'coeb riq'uineb li rech aj pabanelil. Que'xserak'i reheb chixjunil lí que'xye eb li xbénil aj tij ut eb lí neque'taklan. ²⁴ Nak que'rabi a'an, chixjunileb laj pabanel que'tijoc chiru li Dios sa' comonil ut que'xye: —At Kacua' at nimajcuáil Dios, laat catyiban re li choxa, li ruchich'och', ut li palau. Laat catyiban re chixjunil li c'a'ru cuan. ²⁵ Riq'uin li Santil Musik'ej caye re li rey David laj c'anjal chacuu nak tixye chi jo'ca'in:

¿C'a'ut nak yoqueb xjosk'il li tenamit li inc'a' neque'xpab li Dios? Ut, ¿c'a'ut nak yoqueb xc'ubanquil ribeb chixbanunquil lí yal mac'a' na-oc cui?

²⁶ Eb li rey que'josk'o' riq'uin li c'a'ru quixbanu li Kacua'. Ut que'xch'utub rib chixc'ubanquil chanru nak te'risi sa' xcuانquil li Mesías li xakabanbil chak xban li Dios. (Sal. 2:1-2)

²⁷ At Kacua', yal ajcui' nak que'xch'utub ribeb sa' li tenamit a'in laj Herodes ut laj Poncio Pilato rochbenel li tenamit aj Israel jo'queb ajcui' li mācu'a'eb aj Israel ut que'xc'ub ru chanru nak te'xbanu raylal re li Jesús la Santil Alal li sic'bil ru aban xban nak xic' que'r'il. ²⁸ Jo'ca'in que'xbanu xban nak ac jo'can chak sa' ach'ol laat. Ut ac yebil chak q̄aban nak jo'can tac'ulmank. ²⁹ Ut anakcuan, at Kacua', chaq'ue taxak retal li kase'besinquil yoqueb, ut choatenk'a lao aj c'anjal chacuu re nak takaye la cuesilal chi cau kach'ol. ³⁰ Ut riq'uin taxak xnimal la cuanquil, taq'uirtesiheb li yaj ut chabānu li sachba ch'olej ut milagro sa' xc'aba' li Jesús la Santil Alal, chanqueb sa' lix tijeb. ³¹ Nak ac xe'rake' chi tijoc, qui-ec'asic li na'ajej li ch'utch'uqueb cui'. Ut chixjunileb li cuanqueb aran que'nujac riq'uin li Santil Musik'ej. Ut cauheb xch'ol chixyebal li ratin li Dios.

Chixjunil li c'a'ru cuan reheb laj pabanel, a'an reheb sa' comonil

³² Ut chixjunileb li que'paban junajeb chic xch'oleb ut junajeb chic xc'a'uxeb. Ut ma ani quixye nak junes re a'an li c'a'ru cuan re. Reheb ban sa' comonil chixjunil li c'a'ru cuan reheb. ³³ Eb li apóstol cauheb xch'ol chixch'olobanquil xyalal lix cuacilic cui'chic chi yo'yo li Jesucristo sa' xyankeb li camenak. Ut li Dios quirosobtesiheb chixjunileb chi nabal. ³⁴ Ma jun sa' xyankeb mac'a' ta cuan re xban nak chixjunileb li cuanqueb xch'och' ut li cuanqueb rochocheb que'xc'ayi ut que'xk'axtesi reheb li apóstol lix tz'ak li que'xc'ayi. ³⁵ Coxe'xq'ue li tumin reheb re te'xjeq'ui a'yal jo'q'ual tac'anjelak chiru li junjunk. ³⁶ Quicuan jun li cuink aj José xc'aba'. Eb li apóstol que'xq'ue Bernabé chok' xcab xc'aba'. Chi jalbil ru naraj naxye "Aj C'ojobanel Ch'olej". A'an xcomoneb li neque'tenk'an reheb laj tij. Chipre xtenamit. ³⁷ Cuan jun xch'och' quixc'ayi. Quixc'am lix tz'ak ut quixq'ue reheb li apóstol.

5

Li c'a'ru que'xc'ul laj Ananías ut lix Safira xban li mac que'xbanu

¹ Quicuan jun li cuink aj Ananías xc'aba'. Quixc'ayi jun lix ch'och' rochben lix Safira li rixakil. ² Ut que'xc'ub ru chi ribileb rib nak yijach lix tz'ak li ch'och' tacanak chok' reheb. Ut li yijach chic quixc'am laj Ananías riq'uineb li

apóstol ut quixye reheb: —A'an a'in chixjunil lix tz'ak li kach'och' li xkac'ayi, chan. ³ Laj Pedro quixye re: —At Ananías, ¿c'a'ut nak xaq'ue acuib chirale laj tza? ¿C'a'ut nak yocat chixbalak'inquil li Santil Musik'ej riq'uin nak yocat chixcanabanquil yijach lix tz'ak li ch'och' chok' acue? ⁴ ¿C'a'ut nak tat-oc xmukbal xtz'ak laj ch'och'? ¿Ma macua' ta bi' acue? Cui xac'ayi laj ch'och', ¿ma inc'a' ta bi' raj xru xcana chok' acue lix tz'ak? Macua' chiku Iao yocat chi tic'ti'ic. Chiru ban li Dios, chan. ⁵ Nak quirabi li atin li quixye laj Pedro, quit'ane' laj Ananías ut camenak quicana. Ut c'ajo' nak qui-oc xxiuheb chixjunileb li que'iloc re jo'queb ajcui' li que'abin resil. ⁶ Ut eb li cuink li toj sajeb li cuanqueb aran que'xlan li camenak, que'xpako ut que'xc'am re te'xmuk. ⁷ Ac xnume' na chic oxib or nak quicuulac lix Safira li rixakil. Inc'a' naxnau c'a'ru ac xc'ulman. ⁸ Laj Pedro quixye re: —Ye cue. ¿Ma jo' a'in xec'ayi cui' le ch'och'? — Ut lix Safira quixye: —Yal, jo'can xkac'ayi cui', chan. ⁹ Ut laj Pedro quixye cui'chic re: —¿C'a'ut nak xec'ub cheribil erib xyalbal rix li Santil Musik'ej? Cue'queb chak li xe'mukuc chak re laj belom ut tate'xc'am ajcui' laat, chan. ¹⁰ Ut sa' ajcui' li honal a'an lix Safira quit'ane' chi rok laj Pedro ut camenak quicana. Eb li cuink que'oc sa' cab ut que'r'il nak camenak chic. Que'risi ut coxe'xmuk chak chixc'atk lix belom. ¹¹ C'ajo' nak qui-oc xxiuheb chixjunileb laj pabanel jo'queb ajcui' chixjunileb li que'abin re li resil a'in.

Nabal li milagro ut li sachba ch'olej que'xbanu li apóstol

¹² Rajlal neque'xch'utub ribeb sa' xmu li templo chixjunileb laj pabanel cuan cui' li oquebal Salomón xc'aba'. Nabal li milagro que'xbanu eb li apóstol ut nabal li sachba ch'olej. ¹³ Usta eb li tenamit neque'xq'ue xlok'aleb laj pabanel, abanan neque'xucuac chi xic sa' xyankeb. ¹⁴ C'ajo' nak yoqueb chi tamc li yoqueb chi pabanc re li Kacula', jo' cuink jo' ixk. ¹⁵ Ut nabaleb li que'xc'am chak lix yajeb ut que'xyocob sa' lix cuarib malaj chiru lix pop chire be. Que'raj nak laj Pedro tixq'uirtesiheb. Eb a'an que'xc'oxla nak usta yal tanumek' chiruheb, te'q'uirak. ¹⁶ Nabaleb li que'chal chak sa' eb li tenamit li cuanqueb chi nach' riq'uin Jerusalén. Que'xc'am chak li yaj ut eb li cuan maus aj Musik'ej riq'uineb. Ut chixjunileb quilaje q'uirtesic.

Eb li apóstol que'c'ame' cui'chic chiruheb li neque'taklan sa' xbeneb laj judío

¹⁷ Ut li xyucua'il aj tij ut eb laj saduceo li cuanqueb rochben, c'ajo' nak que'oc xcakalinquileb li apóstol. ¹⁸ Jo'can nak que'xtakla xchapaleb ut que'xq'ueheb sa' li tz'alam li neque'q'uehe' cui' yalak ani. ¹⁹ Abanan chiru li k'ojojin a'an jun lix ángel li Kacula' quixte lix puertil li tz'alam ut quirisiheb sa' tz'alam ut quixye reheb: ²⁰ —Ayukex sa' li templo ut tec'h'olob xyalal chiruheb li tenamit chirix li ac' yu'am, chan reheb. ²¹ Cuulajak chic nak toj ek'ela que'coeb sa' li templo eb li apóstol ut que'oc chixch'olobanquil li xyalal chiruheb li tenamit jo' quiyeh'e reheb xban li ángel. Sa' ajcui' li ek'ela a'an que'cuulac li xbenil aj tij rochbeneb chixjunileb li neque'tenk'an re, ut que'xbokeb li jun ch'ol chic li neque'c'amoc be chiruheb laj judío jo'queb ajcui' li neque'taklan sa' xbeneb. Ut que'xtakla xyebal re laj ilol tz'alam nak te'c'amek' li apóstol riq'uineb. ²² Que'cuulac li takl sa' li tz'alam ut inc'a' chic que'ta'e' li apóstol aran. Jo'can nak que'suk'i chixyebal resil ut que'xye: ²³ —Relic chi yal li tz'alam tz'aptz'o chi us nak xkatau. Ut eb laj c'ac'alenel cuanqueb chire li oquebal. Nak xkate li tz'alam, inc'a' chic xkatauheb li cuink chi sa', chanqueb li takl. ²⁴ Nak que'rabi a'an, eb li xbeneb li neque'c'ac'alen sa' li templo, que'sach xch'oleb ut que'oc chixc'oxlanquil c'a'ru tacanak cui' li yo chi c'ulmanc.

25 Quichal jun ut quixye reheb: —Eb li cuink li que'q'uehe' sa' tz'alam ecuer cuanqueb sa' li templo ut yoqueb chixch'olobanquil li xyalal chiruheb li tenamit, chan. ²⁶ Co ut li jun li nataklan sa' xbeneb li soldado rochbeneb lix takl. Ut que'xc'ameb chak li apóstol sa' usilal xban nak que'xucuac. Que'xc'oxla nak mare te'cutek' chi pec xbaneb li tenamit. ²⁷ Que'c'ame' laj Pedro ut laj Juan ut que'xakabac chiru li xyucua'il aj tij ut chiruheb li cuanqueb rochben. Ut li xyucua'il aj tij quiatìnac riq'uineb ut quixye reheb: ²⁸ —¿Ma inc'a' ta bi' xkaye ere nak inc'a' chic tzotzoleb li tenamit sa' xc'aba' li cuink a'an? Laex yoquex chixc'utbal li tijleb a'an sa' chixjunil Jerusalén ut teraj xq'uebal sa' kabèn lix camic li cuink a'an, chanqueb. ²⁹ Laj Pedro, jo'queb ajcui' li rech apostolil, que'chak'oc ut que'xye: —¿Ma takak'et li c'a'ru naxye li Dios ut takapab li c'a'ru neque'xye li cuink? Inc'a'. Tento takapab li c'a'ru naxye li Dios. ³⁰ Li Dios li que'xlok'oni chak li kaxe'tonil yucua', a'an li quicuaclesin cui'chic re li Jesús chi yo'yo sa' xyankeb li camenak, li queq'ue chi camsic chiru cruz laex. ³¹ Li Jesús, a'an li quiq'uehe' xlok'al xban li Dios ut quiq'uehe' chi c'ojalac sa' xnim uk' ut quiq'uehe' xcuanguil chi taklanc ut chi coloc, re nak laj Israel naru te'yot'ek' xch'oleb te'xjal xc'a'ux ut te'cuyek' xmaqueb. ³² Lao xkil a'an riq'uin ku. Jo'can nak nakach'olob xyalal a'in ut li Santil Musik'ej li naxq'ue li Dios reheb li neque'pában, a'an ajcui' nac'utuc re li xyalal a'in, chanqueb. ³³ Li xyucua'il aj tij ut li cuanqueb rochben, c'ajo' nak que'josk'o' nak que'rabi li quixye laj Pedro ut que'raj raj xcamsinquileb li apóstol. ³⁴ Abanan sa' xyankeb a'an cuan jun aj fariseo aj Gamaliel xc'aba'. Li cuink a'an aj tzolol chak'rab ut naq'uehe' xcuanguil xbaneb li tenamit. Quixakli chiruheb ut quixtakla risinquileb li apóstol junpat chirix cab. ³⁵ Ut quixye reheb: —Ex cuink aj Israel, c'oxlahomak chi us c'a'ru tebanu riq'uineb li cuink a'in. ³⁶ Q'uehomak retal li c'a'ru quixc'ul laj Teudas. A'an quixye nak k'axal nim xcuanguil. Cuan na cahibak ciento chi cuink li neque'taken re. Aban li jun a'an quicamsic ut chixjunileb li que'taken re quilaje'xcha'cha'i ribeb ut que'oso' yal chi jo'can. ³⁷ Ut jo'can ajcui' quixc'ul laj Judas, Galilea xtenamit, nak quic'ulun sa' xk'ehil chixtz'ibanquil xc'aba'eb li tenamit. Quixbalak'iheb nabaleb li tenamit. Quicam ajcui' a'an ut chixjunileb li que'taken re que'cha'cha'ic. ³⁸ Anakcuan lain tinye ere: Canabomakeb li cuink a'in. Mech'i ch'i iheb chic xban nak cuí li c'anjel a'in yal xc'a'ux cuink, taoxor'. ³⁹ Abanan cui ut re li Dios, inc'a' texruk chixpo'bal ru. Q'uehomak retal chi us mare anchal yoquex chi pletic riq'uin li Dios, chan laj Gamaliel. ⁴⁰ Ut que'xc'ul xch'ol li quixye. Que'xbokeb li apóstol ut que'xq'ueheb chi saq'uec' ut que'xye reheb nak inc'a' chic te'atinak sa' xc'aba' li Jesús. Ut chirix a'an, que'ach'abac. ⁴¹ Ut eb li apóstol que'el chiruheb chi k'axal sa sa' xch'oleb xban nak chiruheb a'an lok' xc'ulbal li raylal sa' xc'aba' li Jesús. ⁴² Ut inc'a' que'xcanab xch'olobanquil xyalal chiruheb li tenamit sa' li templo ut sa' eb li rochoch ut que'xye resil nak li Jesucristo, a'an laj Colonel li yechi'nbil xban li Dios.

6

Cuukub chi cuink que'xakabac chi c'anjelac

¹ Sa' eb li cutan a'an c'ajo' nak yoqueb chi q'uianc eb laj pabanel. Ut eb laj judío li neque'atínac sa' griego que'oc chixcuech'inquileb laj judío li neque'atínac sa' hebreo. Que'xye nak inc'a' tz'akal li c'a'ru naq'uehe' rajlal cutan reheb lix malca'an li cuanqueb sa' xyankeb a'an. ² Jo'can nak li cablaju chi apóstol que'xch'utub chixjunileb laj pabanel ut que'xye reheb: —Inc'a' naru takacanab xch'olobanquil ratin li Dios yal re nak tojec'ok tzacaemk

lao. ³ Ex herman, sic'omak sa' eyank cuukubak chi cuïnk chabilakeb xna'leb ut nujenakeb chi Santil Musik'ej riq'uin. Chabilak xyehom xbanuhomeb. A'aneb li te'q'uehek' sa' li c'anjel a'in. ⁴ Ut lao takayal kak'e chi tijoc ut chixjulticanquil li ratin li Dios, chanqueb. ⁵ Ut que'xc'ul xch'oleb chixjunil li cuanqueb aran. Que'xsic' ru laj Esteban li napabán chi tz'akaI ut nujenak chi Santil Musik'ej. Ut que'xsic' ajcui' ruheb laj Felipe, laj Prócoro, laj Nicanor, laj Timón, laj Parmenas, ut laj Nicolás aj Antioquía li qui-oc sa' xyankeb laj judío. ⁶ A'aneb a'in in li que'xakabac chi c'anjelac. Ut eb li apóstol que'xq'ue li ruk' sa' xbeneb ut que'tijoc. ⁷ Jo'can nak yo chi abjc li ratin li Kacula' yalak bar. Ut yoqueb chi tãmc laj pãbanel aran Jerusalén. Ut nabaleb laj tij que'pãban.

Nak que'xchap laj Esteban

⁸ Laj Esteban a'an jun cuïnk osobtesinbil xban li Dios ut q'uebil xcuanquil chixbanunquil li milagro ut sachba ch'olej sa' xyankeb li tenamit. ⁹ Cuanqueb xcomoneb li neque'tzoloc sa' li cab li neque'xch'utub cui' ribeb laj judío. Aj libertos neque'xye reheb. Sa' xyankeb a'an cuanqueb li neque'chal chak sa' eb li tenamit Cirene, Alejandría, Cilicia ut Asia. Eb a'an yoqueb chixcuech'inquil laj Esteban. ¹⁰ Abanan nak quiatinac laj Esteban, eb a'an inc'a' chic que'ru xsumenquil xban nak a'an q'uebil xna'leb xban li Santil Musik'ej. ¹¹ Aban cuanqueb li que'tuminac ru re te'xye tic'ti' chirix laj Esteban. Ut que'xye: —Lao xkabi nak yo chixmajecuanquil li Dios ut laj Moisés, chanqueb. ¹² Ut que'xtacchi'i ajcui' li tenamit, jo'queb ajcui' laj c'amol be ut eb laj tz'ib. Que'xchap laj Esteban ut que'xc'am chiruheb li neque'taklan sa' xbeneb laj judío. ¹³ Ut que'xsic' ani tatic'ti'ik chirix ut que'xk'aba a'an ut que'xye: —Li cuïnk a'in junelic yo chixsachbal xcuanquil li santil na'ajej a'in ut naixt'ektana li chak'rab li quiq'uehe' re laj Moisés. ¹⁴ Lao quikabi nak yo chixyebal nak li Jesús laj Nazaret tixjuc' li na'ajej a'in, ut tixjal ru li chak'rab li coxtzol cui' laj Moisés, chanqueb. ¹⁵ Ut chixjunileb li neque'taklan sa' xbeneb laj judío li c'ojc'oqueb aran que'r'il laj Esteban ut que'xq'ue retal nak nalementz'un li rilobal. Chanchan na-iloc jun li ángel.

7

Laj Esteban quixch'olob xyalal chiruheb li neque'taklan sa' xbeneb laj judío

¹ Ut li xyucua'il eb laj tij quixpatz' re laj Esteban ma yal li yoqueb chixyebal. ² Quichak'oclaj Esteban ut quixye: —Ex cuas cuítz'in ut laex li nequexc'amoc be, abihomak li oc cue chixyebal. Li Dios li k'axal lok' quixc'utbesi rib chiru laj Abraham li kaxe'tonil yucua' nak cuan aran Mesopotamia nak toj maji' naxic chi cuanc sa' li na'ajej Harán. ³ Quixye re: —Tat-elk sa' li na'ajej a'in. Tacanabeb laj cuech'alal ut taxtic sa' jun li na'ajej li tinc'ut chacuu lajn, chan. ⁴ Qui-el ut laj Abraham sa' li na'ajej Caldeo ut co' chi cuanc sa' li na'ajej Harán. Nak ac cuan sa' li na'ajej a'an quicamlix yucua'. Ut chirix a'an li Dios quixtakla chi cuanc sa' li na'ajej li cuanqueb cui' laex anakcuán. ⁵ Abanan li Dios inc'a' quixq'ue xch'och' laj Abraham aran. Chi tic mact'a' quixq'ue re. Abanan quixye re nak tixq'ue chok' reheb li ralal xc'ajol li te'cuank mokon usta toj ma jun lix coc'al cuan. ⁶ A'an a'in li quixye li Dios re laj Abraham: —Eb laj cualal ac'ajol te'cuank sa' jalan tenamit macua' xtenamiteb. Ut sa' li tenamit a'an te'cuank chok' rahobtesinbil mos ut xic' te'ilek' chiru cahib ciento chihab. ⁷ Ut lajn tinrakok atin sa' xben li tenamit a'an li te'rahobtesink reheb laj cualal ac'ajol. Ut nak te'elk sa' li tenamit a'an te'c'anjelak chicuu sa' li na'ajej a'in, chan li Dios. ⁸ Nak li Dios quixbanu li contrato riq'uin laj Abraham quixye re nak tento te'xbanu li circuncisión. Jo'can nak laj

Abraham quixbānu li circuncisión riq'uin laj Isaac li ralal nak ac cuan cuakxakib cutan re. Ut laj Isaac quixbānu riq'uin laj Jacob li ralal ut jo'can ajcui' quixbānu laj Jacob riq'uineb li ralal cablaju. ⁹ Eb li ralal laj Jacob c'ajo' nak que'xcakali laj José li ritz'ineb. Jo'can nak que'xc'ayi laj José ut quic'ame' aran Egipto. Abanan nak ac cuan aran Egipto, li Dios yo chi tenk'anc re. ¹⁰ Ut a'an quitenk'an re chixcuybal li raylal li quixc'ul. Quirosobtesi ut quixq'ue xna'leb. Ut laj Faraón li acuabej aran Egipto quixq'ue retal nak laj José cuan xna'leb ut quixxakab chi taklanc sa' xben li tenamit ut sa' xbeneb ajcui' li cuanqueb sa' li rochoch. ¹¹ Ut quicuan jun nimla cue'ej ut jun nimla raylal sa' eb li tenamit Egipto ut Canaán. Ut eb li kaxe'tonil yucua' inc'a' chic que'xtau xtzacaemkeb. ¹² Nak quirabi laj Jacob nak aran Egipto cuan nabal li trigo, quixtaklaheb li ralal aran chixc'ambaleb xtrigo. ¹³ Nak que'coeb cui'chic xca' sut li ralal aran Egipto, laj José quixye reheb nak a'an laj José li ritz'ineb. Ut sa' ajcui' li cutan a'an laj Faraón quixnau nak laj José, a'an xcomoneb li ralal xc'ajoleb laj judío. ¹⁴ Ut chirix a'an laj José quixtakla xc'ambal lix yucua' jo'queb ajcui' li rech'alal. Chixjunileb li rech'alal cuanqueb o'laju xcac'al (75). ¹⁵ Jo'ca'in nak coeb aran Egipto laj Jacob li kaxe'tonil yucua' ut aran quicam jo'queb ajcui' li ralal. ¹⁶ Lix bakeleb que'c'ame' Siquem ut que'muke' sa' li na'ajej li quixlok' laj Abraham riq'uineb li ralal xc'ajol laj Hamor. ¹⁷ C'ajo' nak yoqueb chi q'uianc li ralal xc'ajol laj Israel aran Egipto nak ac yo chi cuulac xk'ehil nak te'isik sa' li tenamit a'an jo' quiyechi'ic re laj Abraham xban li Dios. ¹⁸ Ut qui-oc jalan chic acuabej ut a'an inc'a' quixnau ru laj José chi moco quixnau chanru lix na'leb nak quicuan. ¹⁹ Li acuabej a'an quixsic' xyalal chanru nak tixbanu raylal reheb li kaxe'tonil yucua'. Quixrahobtesiheb nak quixtakla xcamsinqueleb li coc' telom li te'yo'lak re nak inc'a' chic te'tamk li ralal xc'ajoleb. ²⁰ Sa' eb li cutan a'an quiyo'la laj Moisés. Li c'ula'al a'an raro xban li Kacua'. Ut oxib po quiq'uiresic' xbaneb lix na' xyucua'. ²¹ Abanan quicuulac xk'ehil nak quicanabac chak sa' li nima' ut lix rabin laj Faraón quixococ re, re tarük tacolek'. Quixc'am chok' re ut quixq'uiresi jo' tz'akal re. ²² Laj Moisés quixtzol rib jo' neque'xtzol ribeb laj Egipto. Ut cuan xna'leb chi atinac ut chixbanunquil li chabil na'leb. ²³ Nak ac xbanu li ca'c'al chihab (40), qui-ala sa' xch'ol xic chirilbaleb laj Israel li rech tenamitil. ²⁴ Nak quiril jun reheb yo chi saq'uec' xban jun aj Egipto, quixcol sa' ruk'. Quixchap laj Egipto ut quixcamsi. Chi jo'ca'in quixq'ue rekaj li quixbānu re li rech tenamitil. ²⁵ Laj Moisés quixc'oxla nak eb li rech tenamitil te'xq'ue retal nak a'an li tac'anjelak chiru li Dios re xcolbaleb. Abanan eb a'an inc'a' que'xq'ue retal. ²⁶ Cuulajak chic laj Moisés quixtau cuib laj Israel yoqueb chi pletic. Quixk'useb re te'xcanab xch'e'bal rib. Quixye reheb: — Laex ecomon erib. ¿C'a'ut nak yoquex chixpletinqul erib? chan reheb. ²⁷ Ut li jun li yo chi sac'oc re li jun chic quixtiquisi laj Moisés ut quixye re: — ¿Ani xq'uehoc acue chi taklanc ut chi rakoc atin sa' kabən? ²⁸ ¿Ma tacuaj tinacamsi lain jo' nak xacamsi laj Egipto ecuer? chan re laj Moisés. ²⁹ Nak quirabi li c'a'ru quixye, laj Moisés quixcuac ut quielelic. Co chi cuanc sa' li na'ajej Madian li moco tz'akal xtenamit ta. Nak cuan aran, que'yo'la cuib li ralal. ³⁰ Ac xnume' chic ca'c'al chihab roquic sa' li chaki ch'och' a'an, nak quiril jun ton li q'uix yo xxamel nach' riq'uin li tzul Sinaí. Ut sa' li xam a'an quixc'utbesi rib jun li ángel chiru. ³¹ Ut laj Moisés c'ajo' nak quisach xch'ol chirilbal ut quinach'oc riq'uin re taril chi us. Quirabi xyab xcux li Kacua' nak quixye: ³² —Lain li Kacua' Dios li que'xlok'oni chak la xe'tonil yucua'. Lain li Dios li que'xlok'oni chak laj Abraham, laj Isaac, ut laj Jacob,

chan. Ut laj Moisés nasicot xban xxiu ut inc'a' chic quixcuy rilbal. ³³ Ut quixye li Kacua' re: —Isi la xab chacuok xban nak li na'ajej cuancat cui', a'an santil na'ajej. ³⁴ Relic chi yal lain yoquin chiribal li rayral li yoqueb chix'ulbal lin tenamit li cuanquéb Egipto. Ut yoquin ajcui' chirabinqu'il nak yoqueb xk'okonqu'il ribeb xban li rayral. Jo'can nak xinchal chixcolbaleb sa' ruk'eb laj Egipto. Abi li tinxue acue. Tatintakla Egipto, chan li Kacua' re laj Moisés. ³⁵ Laj Moisés, a'an li que'xtz'ektana laj Israel nak que'xye: —¿Ani xq'uehoc acue chi taklanc ut chi rakoc atin? chanqueb. A'an li quitaklac chixtenk'anquileb laj Israel ut chixcolbaleb. Quitaklac xban li Kacua' nak li ángel quixc'utbesi rib chiru sa' li jun ton chi q'uix yo xxamlel. ³⁶ Laj Moisés, a'an li qui-isin reheb Egipto. Nabal li milagro ut li sachba ch'olej quixbanu aran Egipto ut sa' li Caki Palau. Chiru ca'c'al chihab quic'amoc be chiruheb sa' li chaki ch'och'. ³⁷ A'an laj Moisés li quiyehoc chak re a'in reheb laj Israel: —Li Kacua' le Dios tixq'ue junak profeta sa' eyank sic'b'il ru xban jo'lain. Ecomon ajcui' laex. Chebanu chixjunil li c'a'ru tixye ere, chan. ³⁸ A'an li quicuan rochbeneb laj Israel nak que'xch'utub ribeb sa' li chaki ch'och'. Quicuan rochbeneb li kaxe'tonil yucua' ut rochben ajcui' li ángel li quiatinac riq'uin sa' li tzul Sinaí nak quixye re li ratin li Dios li naq'uehoc yu'am re nak a'an chic tayehok ke lao. ³⁹ Abanan eb li kaxe'tonil yucua' inc'a' que'raj xpabanqu'il li c'a'ru quixye. Que'xtz'ektana ban ut que'raj raj suk'ic cui'chic Egipto. ⁴⁰ Que'xye re laj Aarón: —Yib kadios re te'camok be chiku. Inc'a' nakanau c'a'ru xc'ul chak laj Moisés li qui-isin chak ke Egipto. ¿C'a'ru aj e nak yoko chiroybeninquil? chanqueb li kaxe'tonil yucua'. ⁴¹ Jo'can nak que'xyib riq'uin oro xjalam uch jun li cuacax ut que'mayejac chiru. C'ajo' nak que'saho' sa' xch'oleb chiribal lix dioseb li que'xyib riq'uin ruk'eb. Ut que'xbanu jun li nink'e re xlok'oninquil. ⁴² Jo'can nak li Kacua' Dios quixcanabeb xjuneseb. Quixcanabeb chixlok'oninquil li chahim li cuan chiru choxa. Ut quitz'akloc ru li tz'ib'anbil chak najter xbaneb li profeta nak que'xye:

Laex aj Israel, ¿ma quexmayejac ta bi' chak chicuu lain nak yoquex chak chi numec' sa' li chaki ch'och' chiru ca'c'al chihab?

⁴³ ¿Ma macu'a ta bi' le yibanal dios Moloc ut Renfán quelok'oni? Laex queyib li jalám uch a'in re telok'oni. Jo'can nak texincanab re nak jalán tenamit tanumtak sa' eben ut texc'amek' chi najt sa' jun li na'ajej li cuan jun pac'al li tenamit Babilonia, chan li Kacua'. (Am. 5:25-27)

⁴⁴ Eb li kaxe'tonil yucua' que'xyib ajcui' chak li tabernáculo nak yoqueb chak chi numec' sa' li chaki ch'och' ut aran xocxo li chak'rab. Que'xyib jo' li retalil li quic'ute' chiru laj Moisés xban li Dios. ⁴⁵ Eb li kaxe'tonil yucua' que'xc'ul li muhebal a'in. Ut nak laj Josué quic'amoc be chiruheb chi pletic, que'xc'am li muhebal chirixeb. Ut que'rechani lix ch'och'eb li macua'eb aj judío nak li Dios quirisi chiruheb li kaxe'tonil yucua' li xic' que'iloc reheb. Li muhebal a'an quic'anjelac sa' eb li cutan a'an toj chalen nák quicuan laj David chok' rey. ⁴⁶ Laj David quixbanu li c'a'ru quiraj li Dios, ut li Dios quisaho' xch'ol riq'uin. Quixtz'ama chiru li Dios nak tixyib li templo bar te'xlok'oni cui' li Dios li quixlok'oni laj Jacob. ⁴⁷ Abanan macua' laj David quiyiban re li templo. Laj Salomón, a'an li quiyiban re. ⁴⁸ Quixyib li templo ústa li nimajcual Dios inc'a' nacuan sa' junak cab yib'anbil xban cuink'jo' quixye chak li profeta Isaías nak quixye chi jo'ca'in:

⁴⁹ Li choxa, a'an li na'ajej li ninc'ojla cui' ut li ruchich'och', a'an xna'aj li cuok. ¿C'a'ru chi ochochil taruk teyib chok' cue? Ut, ¿bar cuan lin na'aj li tinhilank cui'?

50 ¿Ma mäcu'a ta bi' laín xinyibán re chixjunil li c'a'ru cuan? chan li Käcua'.
(Is. 66:1-2)

51 Laex inc'a' nequetau xyalal. K'axal cau ech'ol. Chanchanex li inc'a' neque'pabán re li Dios. Junelic nequek'etk'eti ərib chiru li Santil Musik'ej jo' que'xbanu le xe'tonil yucua'. **52** ¿Ma cuan ta bi' junak profeta inc'a' quirahobtesic xbaneb le xe'tonil yucua'? ¿Ma inc'a' ta bi' que'xcamsiheb li que'ch'oloban chak resil lix c'ulunic li jun li Tic Xch'ol, li quek'axtesi laex chi camsic? **53** Laex quec'ul li chak'rab li quixq'ue ere li ángel, abanan inc'a' nequebanu li c'a'ru naxye, chan laj Esteban.

Nak que'xcamsi laj Esteban

54 Nak que'rabi li c'a'ru yo chixyebal laj Esteban, c'ajo' nak que'josk'o'. Que'xc'uxuxi li ruch re xbaneb xjosk'il. **55** Ut laj Esteban nujenak chi Santil Musik'ej. Qui-iloc sa' choxa ut quiril lix nimajcual lok'al li Dios ut quiril li Jesús sa' xnim uk' li Dios. **56** Quixye: —Ilomak. Teto li choxa nak nacuil ut li C'ajolbej cuan chi xnim uk' li Dios, chan. **57** Ut eb li tenamit xic' que'rabi li quixye ut que'xtz'ap lix xiqueb ut que'xjap reheb chi cau xban xjosk'ileb ut jun xiquiqueb sa' xben nak que'xchap. **58** Que'risi laj Esteban sa' li tenamit. Ut eb li oqueb re chi cutuc ré chi pec, que'xcanab li rak'eb chi rok jun li saj cujink aj Saulo xc'aba'. **59** Nak yoqueb chixcutbal chi pec, laj Esteban yo chi tijoc ut quixye: —At Käcua' Jesús, c'ul lin musik'. — **60** Quixcuik'ib rib, quixjap re chi cau ut quixye: —At Käcua', maq'ue li mac a'in sa' xbeneb. — Ut nak quixye a'an, quicam.

8

Laj Saulo xic' narileb laj pabanel

1 Laj Saulo quixc'ul xch'ol nak que'xcamsi laj Esteban. Chalen sa' li cutan a'an que'oc xrahobtesinquileb chixjunileb laj pabanel aran Jerusalén ut c'ajo' li raylal que'xc'ul. Ut chixjunileb quilaje'xjeq'ui rib sa' eb li na'ajej Judea ut Samaria. Ca'aj chic eb li apóstol que'cana Jerusalén. **2** Cuib oxib laj pabanel que'mukuc re laj Esteban ut c'ajo' nak que'raho' xch'oleb xban lix camic. **3** Aban laj Saulo yalyo xk'e chixrahobtesinquileb laj pabanel. Na-oc sa' eb li cab ut narisiheb sa' rochocheb ut naxc'ameb sa' tz'alam, jo' cujink jo' iixk. **4** Ut chixjunileb li que'xjeq'ui ribeb sa' jalan na'ajej yoqueb chixyebal resil li evangelió yalak bar.

Laj Felipe yo chixyebal resil aran Samaria nak li Jesús, a'an li Cristo

5 Laj Felipe co sa' li tenamit Samaria ut qui-oc chixch'olobanquil resil chiruhéb li tenamit nak li Cristo, a'an laj Colonel li yechi'ibil xban li Dios. **6** Ut chixjunileb que'xq'ue xch'ol chirabinquil li atin li quixye laj Felipe xbaneb li milagro quilajxbanu. **7** Nabaleb li cuan mäus aj musik'ej riq'uineb que'q'uritesic. Japjoqueb re li mäus aj musik'ej nak neque'el riq'uineb. Ut nabaleb li yek rokeb ut li sic rok ruk'eb quilaje'q'uritesic. **8** Ut c'ajo' nak que'saho' sa' xch'oleb sa' li tenamit a'an.

Laj Simón laj k'e queiraj xlok'bal xcuánquil li Dios

9 Quicuan jun li cujink aj Simón xc'aba'. A'an aj k'e. Ac najter na-oc chixbalak'inquileb li cuanqueb sa' li tenamit Samaria. A'an naxye nak nim xcuánquil. **10** Ut chixjunileb li tenamit, jo' li cuanqueb xcuánquil jo' ajcui' li mac'a'eb xcuánquil, que'rabi li c'a'ru yo chixyebal laj Simón ut que'xye: —Li cujink a'in, cuan xcuánquil li Dios riq'uin, chanqueb. **11** Ut que'xq'ue xch'ol chixbanunquileb li c'a'ru naxye xban nak ac junxil na-oc chixbalak'inquileb.

12 A'ut laj Felipe yo chixjulticanquil resil xnimal xcuánquíl li Dios ut li Jesucristo. Ut nabaleb que'pában ut que'cub'sic xha', jo' cuink jo' ixt. **13** Ut quipaban ajcui' laj Simón ut quicub'sic xha'. Ut yo chi xic chirix laj Felipe yalák bar. Quisach xch'ol chirilbaleb li milagro ut li sachba ch'olej li yo chixbanunquíl laj Felipe. **14** Eb li apóstol li toj cuanqueb Jerusalén que'rabi resil nak eb laj Samaria yoqueb chixpabánquíl li Dios. Jo'can nak que'xtakla laj Pedro ut laj Juan aran. **15** Nak que'cuulac Samaria, que'tijoc sa' xbeneb laj pabanel re nak te'xc'ul li Santil Musik'ej xban nak toj maji' que'xc'ul. **16** Ca'aj cui' que'cub'sic xha' sa' xc'aba' li Jesucristo. **17** Laj Pedro ut laj Juan que'xq'ue li ruk'eb sa' xbeneb ut que'xc'ul li Santil Musik'ej. **18** Ut quiril laj Simón nak riq'uín xq'uebal li ruk'eb li apóstol sa' xbeneb, neque'xc'ul li Santil Musik'ej. Ut quixyechi'i tumin reheb laj Pedro ut laj Juan ut quixye reheb: **19** —Q'ue cue li cuanquíl a'an re nak li ani tinq'ue li cuuk' sa' xbén tixc'ul li Santil Musik'ej, chan. **20** Laj Pedro quixye re: —Chisachk la tumin acuochben xban nak xac'oxla nak taruk talok' riq'uín tumin li naxq'ue chi mātan li Kacua' Dios, chan. **21** Laat inc'a' taruk tac'ul li mātan a'in xban nak moco tic ta la ch'ol chiru li Dios. **22** Cui tayot' ach'ol tajal ac'a'ux ut tacanab xbanunquíl li māusilal a'in ut cui tatz'ama acuybal chiru li Dios, māre chan nak tixcuy amac riq'uín li xac'oxla. **23** Laat c'ajo' nak nacatcakalin ut junes māusilal nacac'oxla, chan laj Pedro. **24** Quichak'oc laj Simón ut quixye: —Chextijok chicuix chiru li Kacua' re nak inc'a' tinc'ul jo' xaye laat, chan. **25** Nak ac xe'xch'olob xyalal li ratin li Dios ut que'xye resil li Jesucristo, laj Pedro ut laj Juan que'suk'i cui'chic Jerusalén. Ut que'xch'olob xyalal sa' nabal chi tenamit cuanqueb sa' xcuént Samaria.

Laj Felipe quixch'olob xyalal chiru li cuink Etiopía xtenamit

26 Ut jun lix ángel li Kacua' quiatinac riq'uín laj Felipe ut quixye re: —Tatxic sa' li be li cuan sa' li sur. Li be a'an li nanume' sa' li chaki ch'och' naxic Jerusalén toj Gaza. — **27** Laj Felipe co. Nak yo chi xic quiril jun li cuink aj Etiopía. A'an jun eunuco q'uebil xcuánquíl chi c'anjelac chiru lix Candace li reina li cuan Etiopía. Sa' ruk' li cuink a'an k'axtesinbil chixjunil lix biomal li reina. Li cuink a'an co Jerusalén chixlok'oninquíl li Dios. **28** Yo chi suk'ic sa' rochoch. C'ojo' sa' lix carruaje ut yo chirilbal xsa' li hu li quixtz'iba li profeta Isaías. **29** Li Santil Musik'ej quixye re laj Felipe: —Ayu, jilon chix'atk li carruaje a'an, chan. **30** Quijiloc laj Felipe ut quirabi nak li cuink yo chirilbal xsa' li hu li quixtz'iba li profeta Isaías. Laj Felipe quixpatz' re: —¿Ma nacatau ru li yocat chirilbal? chan re. **31** Ut li cuink quixye: —¿Chanru nak tintau ru cui mā ani junak tac'ut lix yalal chicuú? — Ut quixtz'ama chiru laj Felipe nak tatakek' sa' li carruaje ut tac'ojlak chix'atk. **32** Ut li hu li yo chirilbal xsa', a'an li quixtz'iba li profeta Isaías. Naxye chi jo'ca'in: Nak yo xrahobtesinquíl, quicubsi rib ut ma jun atin quixye jo' jun carner nak quic'ame' chi camsic. Chanchan nak naxcanab rib li carner chi besec' li rix chiruheb li neque'besoc re, jo'can quixbánu a'an. Ut mā jun atin quixye.

33 Usta mac'a' xmac, quichape' ut quiq'uehe' chi camsic. Ut ma ani qui-oquen chirix re xcolbal. Quicamsic ban. ¿Ani tarük tayehok li resil lix yibal ru xna'lebeb li rech tenamitul? (Is. 53:7-8)

34 Li cuink quixye re laj Felipe: —Ye cue, ¿ani chi aj ix naxye a'in li profeta? ¿Ma chirix a'an, malaj ut chirix jalan chic? chan. **35** Laj Felipe qui-oc chixch'olobanquíl lix yáyal chiru. Quixtiquib riq'uín li quixtz'iba li profeta Isaías ut toj quixch'olob xyalal chirix li Jesucristo. **36** Nak yoqueb chi xic,

que'cuulac cuan cui' jun li ha'. Ut li cuink quixye: —Arin cuan ha'. ¿Ma inc'a' taruk tacobek inha' lain? chan. ³⁷ Ut laj Felipe quixye re: —Cui nacapab chi anchal ach'ol li Jesucristo, taruk tacobek aha', chan. Li cuink quichak'oc ut quixye: —Ninpab nak li Jesucristo, a'an Ralal li Dios, chan. ³⁸ Ut quixxakab li carruaje. Tojo'nak laj Felipe ut li cuink coeb sa' li ha' ut laj Felipe quixcubsi xha'. ³⁹ Nak que'el chak sa' li ha', li Santil Musik'ej quixc'am laj Felipe ut li cuink inc'a' chic quiril ru. Co xjunes chi sa sa' xch'ol. ⁴⁰ Ut laj Felipe quic'ame' Azoto ut coxnumek' sa' chixjunileb li tenamit. Yo chixch'olobanquil xyalal li evangelio chalen nak quicuulac sa' li tenamit Cesarea.

9

Laj Saulo quipaban

¹ Nak yo chi c'ulmanc a'in, laj Saulo toj yo chixrahobtesinquileb li neque'paban re li Kacua' ut yo chixyebal nak toj tixcamsiheb. Jo'can nak co riq'uin li xyucua'il aj tij. ² Ut quixtz'ama lix hu chiru re tixk'axtesi sa' eb li cab li neque'xch'utub cui' ribeb laj judío aran Damasco re taruk tixchapeb laj pabanel li tixtau aran, jo' cuink jo' ixt. Tixchapeb ut tixc'ameb chi prexil Jerusalén. ³ Yo chi xic ut nak ac cuulac re sa' li tenamit Damasco, sa' junpat quisute' xban jun chanchan xam quichal sa' choxa. ⁴ Quit'ane' sa' ch'och' laj Saulo ut quirabi jun xyab cux yo chixyebal re: —At Saulo, at Saulo, ¿C'a'ut nak yocat chixbanunquil raylal cue? — ⁵ Laj Saulo quixye: —¿Anihat laat, at Kacua'? — Ut li yo chi atinac quixye: —Lajin li Jesús li xic' yocat chiribal. Yocat chixtacuasinquil acuib nak xic' yocat chicuilbal, chan. ⁶ Nasicsot xban xxiu laj Saulo nak quixye: —Kacua', ¿c'a'ru tacuaj tinbanu? chan. Ut li Kacua' quixye: —Cuaclin ut ayu sa' li tenamit, ut aran tayehek' acue c'a'ru us tabanu, chan. ⁷ Ut eb li cuink li yoqueb chi xic rochben sachsoqueb xch'ol que'cana. Yoqueb chirabinquil li yo chi atinac, abanan inc'a' que'rيل ru li ani yo chi atinac. ⁸ Quicuacl laj Saulo ut nak quixte li xnak' ru, inc'a' chic qui-iloc. Ch'ilonbil chi ruk' nak quic'ame' sa' li tenamit Damasco. ⁹ Aran quicuan chiru oxib cutan. Inc'a' na-iloc ut inc'a' quicu'a'ac chi moco qui-uc'ac. ¹⁰ Aran Damasco cuan jun laj pabanel aj Ananías xc'aba'. Li Kacua' quiatinac riq'uin sa' visión ut quixye re: —At Ananías. — Quichak'oc ut quixye re: —Cue'quin, Kacua'. — ¹¹ Ut li Kacua' quixye re: —Lajin tinye acue, ayu sa' rochoch laj Judas li cuan sa' li nim be li Tjc neque'xye re. Aran tasic' jun li cuink li xchal chak Tarso. Aj Saulo xc'aba'. A'an yo chi tijoc aran. ¹² Laj Saulo xril jun li visión. Xat-oc riq'uin nak xril ut xaq'ue la cuuk' sa' xben re nak tajlok cui'chic, chan li Kacua'. ¹³ Laj Ananías quichak'oc ut quixye: —At Kacua', nabal que'yehoc resil cue nak xic' narileb laj pabanel li cuink a'an. C'ajo' li raylal nalajxbanu reheb la cualal ac'ajol li cuanqueb aran Jerusalén. ¹⁴ Ut jo'can ajcui' arin xq'uehe' xcuanganquil xbaneb li xbenil aj tij chixq'uebaleb sa' tz'alam chixjunileb li neque'paban acue, chan laj Ananías. ¹⁵ Ut li Kacua' quixye re: —Ayu xban nak li cuink a'an sic'bil ru inban re xyebal resil li colba-ib sa' inc'aba' lain reheb li cuanqueb sa' xcuanganquil ut reheb ajcui' li macua'eb aj judío jo'queb ajcui' li ralal xc'ajol laj Israel. ¹⁶ Lajin tinc'ut chiru jo' q'uijal li raylal tento tixc'ul sa' inc'aba' lain, chan li Kacua'. ¹⁷ Co ut laj Ananías ut qui-oc sa' li cab jo' quiyeh'e re. Quixq'ue li ruk' sa' xben laj Saulo ut quixye re: —Hermano Saulo, li Kacua' Jesús, li quixc'utbesi rib chacuu sa' li be nak yocat chi chalc arin, a'an xtaklan chak cue arin re nak taruk tatilok cui'chic ut tac'ul li Santil Musik'ej, chan laj Ananías re. ¹⁸ Ut sa' junpat quit'ane' chanchan xpat li ru ut qui-iloc cui'chic. Quixakli ut quicubsic xha'.

19 Ut nak ac xcu'a'c, quicacuu cui'chic. Laj Saulo quicana cuib oxib cutan sa' xyānkeb laj pābanel li cuanqueb Damasco.

Laj Saulo quixye resil li colba-ib aran Damasco

20 Laj Saulo ticto qui-oc chixch'olobanquil li xyalal chirix li Jesús, chiruheb li tenamit sa' eb li cab li neque'xch'utub cui' ribeb laj judío ut quixye rebeb: —Li Jesús, a'an li Cristo li Ralal li Dios, chan. **21** Ut chixjunileb li yoqueb chi abīnc re que'sach xch'oleb chirabinquil ut que'xye: —¿Ma macua' ta bi' a'an li yo chi rahobtesinc rebeb laj pābanel aran Jerusalén? ¿Ma macua' ta bi' re xchapbaleb laj pābanel nak xchal arin re nak tixc'amēb riq'uineb li xbenil aj tij? chanqueb. **22** Ut laj Saulo k'axal cui'chic quixq'ue xch'ol chixch'olobanquil xyalal ut que'sach xch'oleb laj judío li cuanqueb Damasco xban nak yo chixc'utbal chi tz'akal chiruheb nak li Jesús a'an li Cristo laj Colonel li yechi'ibil xban li Dios. **23** Ac cuan cutan xc'ulbal a'an nak que'xc'ub ru chi ribileb rib laj judío chanru nak te'xcamsi laj Saulo. **24** Abanan laj Saulo quirabi resil nak te'raj xcamsinquil. Eb a'an chi k'ek chi cutan yoqueb chixc'ac'alenquil li oquebal re li tenamit re te'xcamsi. **25** Ut eb laj pābanel que'xq'ue sa' jun nimla chacach ut chiru k'ojojin que'xcubsi chirix li tz'ac. Jo'can nak quicole' laj Saulo chiruheb li que'ajoc re xcamsinquil.

Quicuulac laj Saulo Jerusalén

26 Nak quicuulac Jerusalén, laj Saulo quiraj oc sa' xyānkeb laj pābanel. Abanan eb a'an que'xucuac. Inc'a' que'xpāb nak a'an aj pābanel chic. **27** Ut laj Bernabé quixc'am laj Saulo riq'uineb li apóstol ut quixserak'i rebeb chanru nak quiril ru li Kacua' sa' lí be ut quixye ajcui' rebeb chanru nak quixch'olob xyalal li Jesucristo chi cau xch'ol aran Damasco. **28** Ut laj Saulo quicana riq'uineb laj pābanel aran Jerusalén ut co'yalak bar chixyebal resil li Jesucristo chi cau xch'ol. **29** Ut quixch'olob li xyalal chiruheb laj judío li neque'atina'c sa' griego. Eb a'an inc'a' que'raj rabinquil. Que'raj ban xcamsinquel. **30** Nak eb laj pābanel que'rabi resil nak te'raj xcamsinquel, que'xc'am laj Saulo aran Cesarea ut aran chic que'xtakla Tarso. **31** Ut inc'a' chic que'rahobtesic laj pābanel li cuanqueb Judea, Galilea, ut Samaria. Yoqueb chi q'ui'c sa' xpābaleb. Neque'xxucua ru li Kacua'. Ut li Santil Musik'ej yo chixq'uebal xcacuila xch'oleb. C'ajo' nak yoqueb chi tamc.

Nak quiq'uirtesic laj Eneas

32 Ut laj Pedro, nak yo chirula'aninquileb chixjunileb laj pābanel yalak bar, quicuulac ajcui' riq'uineb laj pābanel li cuanqueb Lida. **33** Aran quixtau jun li cuink aj Eneas xc'aba'. Cuakxakib chihab roquic lix yajel ut inc'a' chic nacuaci. Sic li rok ruk'. **34** Ut laj Pedro quixye re: —At Eneas, li Kacua' Jesucristo taxq'uirtesi anakcuan. Xaklin ut xoc laj cuarib, chan. Ut sa' junpat quixakli li cuink. **35** Ut chixjunileb li cuanqueb Lida ut Sarón que'r'il nak quiq'ura li cuink ut que'xpāb li Kacua'.

Lix Dorcas quicuaclesic cui'chic chi yo'yo xban laj Pedro

36 Ut quicuan aran Jope jun li ixk aj pābanel xTabita xc'aba'. Chi jalbil ru naraj naxye Dorcas. Junelic yo chixbānunquileb usilal rebeb li ras rítz'in ut naxtenk'aheb li neba'. **37** Sa' eb li cutan a'an quiyajer ut quicam. Que'ratesi ut que'xjilib sa' jun li na'ajej li cuan sa xca' tasal li cab. **38** Li tenamit Jope nach' cuan riq'uin li tenamit Lida bar cuan cui' laj Pedro. Eb laj pābanel que'rabi nak cuan aran. Que'xtakla cuib li cuink chixbokbal. —Chalkat chi junpat kiq'uin, chanqueb re laj Pedro. **39** Laj Pedro co'rochbeneb. Nak quicuulac, que'xc'am sa' li na'ajej li cuan cui' li camenak. Aran quisute'

xbaneb li xmälca'an. Yoqueb chi yäbac ut que'xc'ut chiru li t'icr li quixyib lix Dorcas nak toj cuan sa' xyankeb. ⁴⁰ Laj Pedro quirisiheb chirix cab. Quixcuik'ib rib ut qui-oc chi tijoc. Ut quiril li camenak ut quixye re: —Tabita, cuaclin, chan. Ut li iixk quixte li xnak' ru, ut nak quiril ru laj Pedro, quic'oila. ⁴¹ Laj Pedro quixchap chi ruk' ut quixcuaclesi. Quixbokeb li xmälca'an jo' ajcui' chixjunileb laj pabanel ut quixxakab chiruheb chi yo'yo chic. ⁴² Quiel resil sa' chixjunil li tenamit Jope li c'a'ru quic'ulman. Xban a'an nabaleb que'päban re li Kacua'. ⁴³ Laj Pedro najt quicuan aran Jope. Quihilan sa' rochoch jun li cuïnk aj yibom tz'um, aj Simón xc'aba'.

10

Laj Pedro ut laj Cornelio

¹ Quicuan jun li cuïnk aran Cesarea aj Cornelio xc'aba'. A'an li nataklan sa' xbeneb jun ch'utal chi soldado aj Italia neque'xye re. ² Li cuïnk a'an quixxucua ru li Dios jo'queb ajcui' chixjunileb li cuanqueb sa' li rochoch. Chabil xna'leb ut junelic natijoc chiru li Dios ut junelic naxtenk'aheb li neba'. ³ Sa' jun li cutan sa' oxib or tana re ecuu laj Cornelio quiril sa' visión nak qui-oc jun li ángel riq'uin ut quixye re: —At Cornelio, chan. ⁴ Laj Cornelio taxucuak nak quiril li ángel ut quixye: —C'a'ru tåcuaj tinbanu, Kacua'. —Li ángel quixye: —Li Dios xrabi la tij. Nacuulac chiru li c'a'ru nacabanu re xtenk'anquileb li neba'. ⁵ Anakuan tinye äcue takla cuib oxibakeb li cuïnk aran Jope chixc'ambal chak li cuïnk aj Simón xc'aba'. Aj Pedro nayeman ajcui' re. ⁶ A'an tayehok äcue c'a'ru us tåbanu. A'an yo chi hilanc sa' rochoch laj Simón laj yibom tz'um. Li rochoch cuan chire li palau, chan li ángel. ⁷ Nak ac x-el li ángel riq'uin, laj Cornelio quixbok cuib lix mos cuïnk ut quixbok ajcui' jun reheb lix soldado li naxxucua ru li Dios. ⁸ Quixserak'i reheb chixjunileb li quiyehe' re xban li ángel ut quixtaklaheb Jope re nak te'xc'am chak laj Pedro. ⁹ Cuulajak chic ac cuulaqueb na re sa' li tenamit Jope nak laj Pedro quitake' sa' xca'tasal li cab chi tijoc. Ca'ch'in na chic ma cualeb. ¹⁰ Quichal xtz'ocajic ut quiraj raj ru cu'a'ac. Abanan toj yoqueb chixyibankuil lix tzacaemk. Nak toj yo chirobeninquil lix tzacaemk, quiril jun li visión. ¹¹ Quiril nak teto li choxa ut chanchan jun nimla saki t'icr yo chak chi cubec. Pixbil sa' xca pac'alil lix xuc li t'icr ut yo chak chi cubec sa' ruchich'och'. ¹² Chi sa' li t'icr a'an cuanqueb chak nabal pay ru li xul xcomoneb li neque'cuán sa' ruchich'och'. Cuanqueb cuan cuib rokeb ut cuib ruk', cuanqueb xcomoneb li c'anti' ut cuanqueb xcomoneb li xul li neque'ruplic chiru choxa. ¹³ Ut quirabi jun xyab cuux quixye re: —At Pedro, chap acue li xul a'in. Tacamsi ut tatiu, chan. ¹⁴ Laj Pedro quixye: —Inc'a', Kacua'. Ma jun sut xintzaca c'a'ak re ru li naxye sa' li chak'rab nak inc'a' us xtzacanquil, chan. ¹⁵ Ut quixye cui'chic li yo chi atinac: —Laat inc'a' naru nacac'oxla nak inc'a' us tåtzaca li c'a'ru xye li Dios nak us tåtzaca, chan. ¹⁶ Oxib sut quiyehe' re chi jo'can ut chirix a'an quixoque li nimla t'icr a'an ut quic'ame' cui'chic sa' choxa. ¹⁷ Laj Pedro toj yo ajcui' chixc'oxlanquil c'a'ru xyalall li quic'utbesic chiru nak que'cuulac li cuïnk li que'taklac xban laj Cornelio. Cuanqueb chire li cab ut yoqueb chixpatz'bal bar cuan li rochoch laj Simón. ¹⁸ Que'xpatz' ma aran cuan chi hilanc laj Simón li neque'xye aj Pedro re. ¹⁹ Laj Pedro toj yo ajcui' chixc'oxlanquil c'a'ru xyalal li visión li quiril nak li Santil Musik'ej quixye re: —Oxib li cuïnk xe'chal chasic'bal. ²⁰ Ayu, cuben ut atinaheb chak. Matc'oxlac chi xic chirixeb xban nak lain xintaklan chak reheb, chan. ²¹ Jo'can nak laj Pedro quicube ut quixye reheb li cuïnk: —Cue'quin. Lain laj Simón

Pedro li niquinesic'. ¿C'a'ru xc'amoc chak ̄re toj arin ut c'a'ru teraj cuiq'uin? chan. ²² Eb a'an que'xye: —Laj Cornelio li capitán xtaklan chak ke. A'an jun cuink t̄c xch'ol ut naxxucua ru li Dios. Chixjunileb laj judío neque'xq'ue sa' xnak' ruheb. Jun x-ángel li Dios quixc'utbesi rib chiru ut quixye re nak tatxbok sa' rochoch re nak taruk tarabi li c'a'ru taye re, chanqueb re. ²³ Laj Pedro quirosiheb ut que'xnumsi li k'ojoyn sa' li cab a'an. Sa' li cutan jun chic laj Pedro co chirixeb. Ut cubi oxib laj pābanel re Jope que'coeb chirix. ²⁴ Jo' cuulajak chic que'cuulac Cesarea ut laj Cornelio yo chiroybeninquileb rochbeneb li rech'alal ut eb li tz'akal ramig li quixbok riq'uin. ²⁵ Nak laj Pedro quicuulac sa' li rochoch, laj Cornelio qui-el chixc'ulbal. Quixcuk'ib rib chiru re xlok'oninquil. ²⁶ Abanan laj Pedro quixye re: —Cuaclin. Minalok'oni lain xban nak lain yal cuinkin jo' laat, chan. ²⁷ Yo chi atinac riq'uin laj Cornelio nak yoqueb chi oc sa' li cab. Nak que'oc, que'xtau nabaleb ac ch'utch'uequeb sa' li cab. ²⁸ Laj Pedro quixye reheb: —Laex nequenau nak lix chak'rabej laj judío naxye nak inc'a' naru takajunaji kib riq'vineb li macua'eb aj judío chi moco taruk to-oc sa' rochocheb. Abanan xc'ut chicuu li Kacua' Dios nak ma jun li cristian tintz'ektana chi moco tinye nak inc'a' us atinac riq'vineb. ²⁹ Jo'can nak inc'a' xink'etk'eti cuib chi chalc nak xine'xbok chak. Ye cue c'a'ut nak xatakla inbokbal, chan. ³⁰ Quichak'oc laj Cornelio ut quixye: —Cahib cutan anakcuan jo'ca'in ajcui' honal nak yoquin chi ayunic út chi tijoc sa' li cuochoch. Oxib or re ecuu quixc'utbesi rib chiciu jun li cuink nalemtz'un li rak'. ³¹ Quixye cue, "At Cornelio, li Dios quirabi la tij. Nacuulac chiru li c'a'ru nacabánu re xtenk'anquileb li neba". ³² Takla xc'ambal laj Simón Pedro li cuan aran Jope. Yo chi hilanc sa' li rochoch laj Simón laj yibom tz'um. Li rochoch a'an cuan chire li palau. Nak tac'ulunk laj Pedro, tixch'olob chaciu li xyalal," chan cue li ángel. ³³ Jo'can nak xintakla ac'ambal sa' junpat. Ut laat xabánu usilal ke. Xatc'ulun. Anakcuan ut chikajunilo cuanco arin chiru li Dios chirabinquil chixjunil li c'a'ru taye ke li xye chak ̄cue li Dios, chan laj Cornelio re laj Pedro.

Laj Pedro quixye re laj Cornelio nak li Dios inc'a' naxsic' ru li ani naxra

³⁴ Quixtiquib atinac laj Pedro ut quixye: —Anakcuan xinq'ue retal chi tz'akal nak li Dios inc'a' naxsic' ru li ani naxra. ³⁵ Li ani naxxucua ru li Dios ut naxbánu li t̄quilib a' yalbar xtenamit, li jun a'an narahe' xban li Dios. ³⁶ Laex nequenau nak li Dios quixtakla resil li colba'-ib reheb laj Israel. Li colbabib, a'an li naq'uehoc tuktuquil usilal sa' xc'aba' li Jesucristo. Ut li Jesucristo, a'an li Kacua', ut nim xcuanylil sa' xben chixjunil. ³⁷ Laex nequenau c'a'ru quic'ulman sa' chixjunil li tenamat Judea. Quiticla aran Galilea nak ac xch'olobac resil li cubi ha' xban laj Juan. ³⁸ Ac erabiom resil li Jesucristo aj Nazaret. Li Dios quixq'ue li Santil Musik'ej re, ut quixq'ue xcuanylil. A'an quibec yalak bar chixbanunquil li usilal ut chixq'uirtesinquileb li tacuasinbileb xban laj tza xban nak li Dios cuan riq'uin. ³⁹ Lao quikil riq'uin ku chixjunil li c'a'ru quixbánu li Jesús aran Judea ut Jerusalén. Abanan eb a'an que'xcamsi chiru cruz. ⁴⁰ Ut li Dios quixcuaclesi cui'chic chi yo'yo sa' xyankeb li camenak sa' rox li cutan. Ut mokon li Jesús quixc'utbesi rib chiku. ⁴¹ Inc'a' quixc'utbesi rib chiruheb chixjunileb. Ca'aj cui' chiruheb li quisiq'ue' ruheb junxil xban li Dios. Lao cocua'ac ut co-uc'ac riq'uin nak ac xcuaclí cui'chic chi yo'yo sa' xyankeb li camenak. ⁴² Ut coxtakla chixch'olobanquil xyalal ut chixjulticanquil chiruheb li tenamat nak a'an q'uebil xban li Dios chi rakkoc atín sa' xbeneb chixjunileb, li yo'yoqueb jo' ajcui' li camenakeb. ⁴³ A'an a'in li Jesús li que'xye chak resil chixjunileb li

profeta junxil. Que'xye nak sa' xc'aba' a'an tacular' xmaqueb chixjunileb li neque'pabán re.

Li Santil Musik'ej quiq'uehe' reheb li macua'eb aj judío

⁴⁴ Toj yo ajcui' chi atinac laj Pedro nak que'xc'ul li Santil Musik'ej chixjunileb li yoqueb chi abinc re li ratiñ li Dios li yo chixyebal. ⁴⁵ Eb laj pabanel aj judío, li que'chal chirix laj Pedro, que'sach xch'ol chiribal nak li Dios quixq'ue li Santil Musik'ej reheb li mācua'eb aj judío. Gentiles nayeman ajcui' reheb. ⁴⁶ Que'rabi nak yoqueb chi atinac sa' jalan atinobal ut yoqueb chixnimanquil ru li Dios. ⁴⁷ Ut laj Pedro quixye: —¿Ma cuan ta bi' junak inc'a' taajok nak te'cubek' xha'eb a'in li xe'c'uluc re li Santil Musik'ej, jo' nak xkac'ul lao? chan. ⁴⁸ Ut quixtakla xcubsinquil xha'eb sa' xc'aba' li Kacua' Jesucristo. Ut eb a'an que'xfz'ama chiru laj Pedro nak tacular' cuib oxibak cutan chic riq'uineb.

11

Laj Pedro quixye reheb li cuanqueb Jerusalén nak naru ajcui' te'colek' li macua'eb aj judío.

¹ Ut que'rabi resil eb li apóstol ut eb laj pabanel li cuanqueb Judea nak eb li mācua'eb aj judío yoqueb ajcui' chixpabanelquil li ratiñ li Dios. ² Nak co Jerusalén laj Pedro, quicuech'ic xbaneb laj pabanel aj judío li neque'bānun re li circuncisión. ³ Que'xye re: —¿C'a'ut nak xacuula'aniheb li mācua'eb aj judío? Ut, ¿c'a'ut nak xatcua'ac rochbeneb? chanqueb. ⁴ Tojo'nak laj Pedro qui-oc chixyebal reheb chixjunil li c'a'ru quic'ulman ut quixye reheb; ⁵ —Yoquin chi tijoc aran Jope nak quicuil jun li visión. Sa' li visión quicuil nak yo chak chi cubec jun nimla t'icr sa' choxa. Pixbil sa' xcā pac'allí li xuc li t'icr. Quichal bar cuanquin cui'. ⁶ Quicuil chi sa' li t'icr ut aran cuanqueb nabal pay ru li xul xcomoneb li neque'cuán sa' ruchich'och'. Cuanqueb li josk' aj xul, cuanqueb xcomoneb li c'anti' ut cuanqueb xcomoneb li xul li neque'ruplic chiru choxa. ⁷ Ut quicuabi jun xyāb cux quixye cue, "At Pedro, chap acue li xul a'in. Tacamsi ut tatiu," chan. ⁸ Ut lain quinye re, "Inc'a' Kacua'". Ma jun sut xintzaca c'a'ak re ru li naxye sa' li chak'rab nak inc'a' us tintzaca," chanquin. ⁹ Ut quixye cui'chic cue li yo chak chi atinac sa' choxa, "Lāat inc'a' naru nacac'oxla nak inc'a' us tatzaca li c'a'ru xye li Dios nak us tatzaca," chan. ¹⁰ Oxib sut quiyehue cue chi jo'can ut chirix a'an quic'ame' cui'chic sa' choxa li nimla t'icr a'an. ¹¹ Ut sa' ajcui' li honal a'an que'cuulac sa' li cab cuanquin cui' oxib li cuink que'chal chak toj Cesarea chinsic'bal. ¹² Ut li Santil Musik'ej quixye cue nak tinxic chirixeb chi mac'a' inc'a'ux. Ut que'coeb ajcui' chicuix cuakib li herman. Ut co-oc sa' rochoch jun li cuink. ¹³ Li cuink a'an quixserak'i ke chanru nak quixc'utbesi rib jun li ángel chiru sa' li rochoch. Li ángel quixye re, "Takla xbokbal aran Jope laj Simón li nayehe' ajcui' aj Pedro re. ¹⁴ A'an tayehok acue chanru taruk tatcolek' jo'queb ajcui' li cuanqueb sa' la cuochoch, chan cue li ángel," chan li cuink. ¹⁵ Ut nak quin-oc chi atinac riq'uineb, li Santil Musik'ej quichal sa' xbeneb jo' nak quichal sa' kabən lao junxil. ¹⁶ Ut quinak sa' inch'ol li c'a'ru quixye li Kacua', "Laj Juan relic chi ya'l quicubsin ha' riq'uin ha', abanan laex tec'ul li Santil Musik'ej." ¹⁷ Jo'can ut nak cui li Dios quixq'ue li Santil Musik'ej reheb a'an jo' nak quixq'ue ke lao li xopabán re li Jesucristo, ¿anahin ta bi' laín nak tinram chiru li Dios li c'a'ru taraj xbanunquil? chan laj Pedro. ¹⁸ Nak que'rabi li c'a'ru quixye laj Pedro, eb laj c'amol be sa' xyankeb laj pabanel

aj judío, que'xcanab cuech'inc. Que'xlok'oni li Dios ut que'xye: —Li Kacua' xq'ue ajcui' li junelic yu'am reheb li mācua'eb aj judío xban nak xe'xyot' xch'ol ut xe'xjal xc'a'ux, chanqueb.

Eb laj pābanel li cuanqueb Antioquía que'xtiquib xch'utubanquil ribeb chi lok'oninc

¹⁹ Chirix lix camic laj Esteban, que'xjeq'ui ribeb laj pābanel xban li raylal li yoqueb chixc'ulbal. Que'cuulac toj Fenicia, Chipre ut Antioquía. Aran que'xch'olob resil li evangelio chiruheb laj judío. Inc'a' que'xye re-heb li mācua'eb aj judío. ²⁰ Abanan cuanqueb aj pābanel aj Chipre ut aj Cirene que'cuulac Antioquía. Eb a'an que'xch'olob xyalal chiruheb li neque'atinaç sa' griego ut que'xye resil li colba-ib sa' xc'aba' li Jesucristo. ²¹ Li Kacua' Jesús quixtenk'aheb riq'uin xnimal xcuandal ut nabaleb que'xpab li Kacua' Jesús. ²² Nak que'rabi resil eb laj pābanel li cuanqueb Jerusalén, que'xtakla laj Bernabé aran Antioquía. ²³ Nak quicuulac laj Bernabé quixq'ue retal nak li Dios yo chirosoobtesinquileb laj pābanel li cuanqueb aran. Quixq'ue xacualul xch'oleb ut quixye ajcui' reheb nak che'xq'uehak xch'oleb chixpabanquil li Kacua'. ²⁴ Laj Bernabé, a'an jun cuink chabil ut cuan xpabal. Nujenak chi Santil Musik'ej. Ut chiru a'an nabaleb que'xpab li Kacua'. ²⁵ Chirix chic a'an laj Bernabé co Tarso chixsic'bal laj Saulo. Nak quixtau quixc'am Antioquía. ²⁶ Ut que'cuan aran jun chihab tz'akal riq'uineb ut que'xc'ut li xyalal chiruheb nabal. Ut aran Antioquía que'xtiquib xyebal "cristiano" reheb laj pābanel. ²⁷ Sa' eb li cutan a'an cuanqueb profeta que'el Jerusalén ut que'coeb Antioquía. ²⁸ Cuan jun sa' xyankeb a'an aj Agabo xc'aba'. Quixye nak tacuank jun nimla cue'ej sa' chixjunil li ruchich'och' xban nak jo'can quic'ute' chiru xban li Santil Musik'ej. Ut li cue'ej a'in quic'ulman sa' eb li cutan nak cuank laj Claudio chok' acuabej. ²⁹ Ut eb laj pābanel li cuanqueb Antioquía que'xc'ub ru nak te'xtenk'aheb laj pābanel li cuanqueb Judea. Que'xtenk'a a'yal chanru quixq'ue rib chiru li junjunk. ³⁰ Ut jo'can que'xbanu. Que'xtakla lix tenk'al chirixeb laj Bernabé ut laj Saulo re nak te'xk'axtesi sa' ruk'eb li neque'c'amoc be sa' xyankeb laj pābanel li cuanqueb Judea.

12

Quicamsic laj Jacobo ut quiq'uehe' sa' tz'alam laj Pedro

¹ Sa' eb li cutan a'an laj Herodes quixtiquib xrahobtesinquileb laj pābanel. ² Quixtakla xcamsinquel riq'uin ch'ich' laj Jacobo li ras laj Juan. ³ Laj Herodes quixq'ue retal nak eb laj judío que'saho' xch'ol riq'uin li c'a'ru quixbanu. Jo'can nak quixtakla ajcui' xchapbal laj Pedro. Quixbanu a'in sa' li nink'e nak neque'xcua' li caxlan cua māc'a' xch'amal. ⁴ Nak ac xchape' laj Pedro, li rey Herodes quixtakla sa' tz'alam ut quixk'axtesi sa' ruk'eb cahib ch'utal chi soldado re te'xc'ac'ale. Cahib chi soldado cuan sa' li junjunk ch'utal. Laj Herodes cuan sa' xch'ol nak tixc'am chiruheb li tenamit nak ac xrake' li nink'e re te'xrak atin sa' xben. ⁵ Jo'can nak laj Pedro ilbil chi us xbaneb li soldado re nak inc'a' tælelik. Abanan eb laj pābanel cau yoqueb chi tijoc chirix.

Nak qui-isic laj Pedro sa' tz'alam xban li Dios

⁶ Ac cuulac re xk'ehil nak tac'amek' laj Pedro xban laj Herodes chiruheb li tenamit. Sa' li k'ojojin a'an laj Pedro yo chi cuarc sa' xyiheb li cuib chi soldado bac'bo riq'uin cadena. Ut cuanqueb ajcui' laj c'ac'alenel chire li oquebal re li tz'alam. ⁷ Ut xakamil jun x-ángel li Dios bar cuan cui' laj Pedro

ut quixcutanobresi sa' li tz'alam. Li ángel quixt'otz'otz'i laj Pedro ut quirajsi. Quixye re: —Cuaclin. Sëba ącuib, chan. Ut sa' junpat quit'ane' li cadena chi ruk'. ⁸ Ut li ángel quixye re: —Q'ue la cuak' chäcuix ut q'ue la xab chäcuok, chan re. Ut laj Pedro quixbänu jo' quiyeh'e re. Ut li ángel quixye cui'chic re: —Tz'ap ącuib sa' la t'icr ut yo'o chicuix, chan. ⁹ Laj Pedro co chirix li ángel. Abanan inc'a' naxnau nak tz'akal yal li yo chixbänuñquil li ángel. Sa' xch'ol laj Pedro nak visión li yo chirilbal. ¹⁰ Que'cuulac cuan cui' li jun ch'utal chi soldado ut que'nume' aran. Ut que'cuulac cui'chic cuanqueb cui' li jun ch'utal chic. Ut que'nume' aran toj que'cuulac cuan cui' li puerta ch'ich' li na-ux cui' oc sa' li tenamit. Ut li puerta a'an quixte rib xjunes chiruheb. Que'el ut que'xk'ax jun li nim be. Aran quicanabäc xjunes laj Pedro xban li ángel. ¹¹ Laj Pedro quixq'ue retal li c'a'ru quixc'ul ut quixye sa' xch'ol: —Anakcuan ninnau chi tz'akal nak li Käcua', a'an li xtaklan chak re li ángel. Xinixcol sa' ruk' laj Herodes. Ut xinixcol ajcui' sa' ruk'eb chixjunileb laj judío li te'raj xbañunquil raylal cue, chan. ¹² Nak quixtau ru li c'a'ru quixc'ul, laj Pedro co sa' rochoch lix María lix na' laj Juan li nayeman Marcos re. Aran ch'utch'uqueb nabaleb laj pabanel yoqueb chi tijoc. ¹³ Quixt'och't'och'i li puerta li cuan chiru nebal. Ut co jun li xka'al xRode xc'aba' chirabinquil ani cuan aran. ¹⁴ Quixnau ru xyab xcux laj Pedro. Inc'a' quixte li puerta chiru. Xban xsahil xch'ol, co sa' anil chixyebal resil reheb li cuanqueb sa' cab nak laj Pedro cuan chire puerta. ¹⁵ Eb li cuanqueb sa' cab inc'a' que'xpab li quixye. —Xloco' ącuu, chanqueb re. Abanan lix Rode quixye cui'chic reheb nak yal nak a'an laj Pedro. Que'chak'oc ut que'xye re: —A'an yal xmuhel, chanqueb re. ¹⁶ Nak yoqueb chi atinac, laj Pedro toj yo ajcui' chixtoch'bal li puerta. Nak que'xte li puerta que'r'il laj Pedro. Sachsoqueb xch'ol que'cana. ¹⁷ Quixtaksi li ruk' re nak te'xcanab chokinc, ut quixserak'i reheb chanru nak qui-isic sa' tz'alam xban li Käcua'. Quixye reheb: —Yehomak resil a'in re laj Jacobo ut reheb chixjunileb laj pabanel, chan. Ut chirix a'an co sa' jalan na'ajej. ¹⁸ Nak quisakeu que'xq'ue retal nak ma ani chic laj Pedro sa' tz'alam. C'ajo' nak que'sach xch'oleb li soldado chirilbal li c'a'ru quic'ulman. Yoqueb chixyebal chi ribileb rib: —¿C'a'ru xc'ul laj Pedro? ¿Bar xco? chanqueb. ¹⁹ Ut laj Herodes quixtakla xsiq'uinqwil. Nak inc'a' que'xtau quixq'ue sa' xbeneb laj c'ac'añelen ut quixtakla xcamsinqueb. Chirix a'an laj Herodes qui-el Judea ut co chi cuanc aran Cesarea.

Lix camic laj Herodes

²⁰ Laj Herodes yo xjosk'il sa' xbeneb laj Tiro ut laj Sidón. Eb a'an que'chal sa' comonil. Ut que'xk'unbesi laj Blasto li natenk'an re li rey. Que'xtz'ama chiru nak a'an taaatinak chirixeb chiru li rey re nak taruk' te'xc'am rib sa' usilal riq'uin xban nak sa' xtenamit li rey na-el xtzacaemkeb. ²¹ Laj Herodes quixxakab jun li cutan re nak taaatinak riq'uineb laj Tiro ut laj Sidón. Quixtikib rib riq'uin chabil ak' c'ajo' xchak'al ru li neque'rocsi li rey. Quic'ojla sa' lix na'aj bär narakoc cui' atin ut qui-oc chi atinac riq'uineb li tenamit. ²² Ut eb li tenamit que'oc chixyebal chi cau xyab xcux: —Li yo chi atinac maçua' cuink. A'an Dios, chanqueb. ²³ Ut sa' ajcui' li honal a'an, jun x-ángel li Käcua' quixq'ue jun yajel sa' xben laj Herodes xban nak quixq'ue rib chixlok'oniheb li tenamit ut inc'a' quixq'ue xlok'al li Dios. Quimotzo'in ut a'an quicamsin re. ²⁴ Sa' eb li cutan a'an li rätin li Käcua' yo chi abic'yalak bar. Ut nabaleb yoqueb chi pabanc re. ²⁵ Que'suk'i chak Jerusalén laj Bernabé ut laj Saulo nak ac que'xbänu lix c'anjeleb. Que'xc'am chirixeb laj Juan, li neque'xye ajcui' Marcos re.

13

Que'xtiquib lix c'anjel laj Bernabé ut laj Saulo

¹ Sa' xyankeb laj pabanel aran Antioquía cuanqueb profeta ut cuanqueb aj tzolonel. A'aneb a'in: laj Bernabé, laj Simón li neque'xye Niger re, laj Lucio Cirene xtenamit, laj Manaén li quiq'uiresic riq'uin laj Herodes li acuabej, ut laj Saulo. ² Nak yoqueb chi tijoc chiru li Dios ut chi ayunic, li Santil Musik'ej quixye reheb: —Q'uehomakeb xjuneseb laj Saulo ut laj Bernabé re nak te'xbənu li c'anjel a'in li sic'bileb cui' ru inban, chan. ³ Que'xbənu lix ayun ut que'tijoc nak que'xq'ue li ruk'eb sa' xbeneb laj Saulo ut laj Bernabé. Tojo'nak que'xchak'rabiheb. ⁴ Laj Saulo ut laj Bernabé que'coeb Seleucia jo' quiyeh'e reheb xban li Santil Musik'ej. Que'el aran ut que'coeb chiru ha' toj Chipre. ⁵ Ut nak que'cuulac Salamina, que'xch'olob xyalal li ratin li Dios sa' eb li cab li neque'xch'utub cui' ribeb laj judío. Ut laj Juan Marcos yo ajcui' chixtenk'anquileb. ⁶ Yoqueb chixbeninquil chixjunil li na'ajej li sutsu sa' ha'. Que'cuulac sa' li tenamit Pafos. Aran que'xtau jun aj tul aj judío. Barjesús lix c'aba'. Li cuink a'an aj balak'. Naxye nak sa' xc'aba' li Dios naqtinac. Abanan moco yal ta. ⁷ Li cuink a'an cuan riq'uin laj Sergio Paulo, li q'uebil xcuanyl chi taklanc sa' li na'ajej a'an. Laj Sergio Paulo, li cuan xna'leb, quixtakla xbokbaleb laj Saulo ut laj Bernabé xban nak quiraj rabinquil li ratin li Dios. ⁸ Abanan yo chi chi'chi'inc laj Barjesús laj tul. (Chi jalbil ru li c'aba'ej a'an naraj naxye Elimas.) Yo chixch'i chi'inquileb xban nak inc'a' quiraj nak tapabank laj Sergio Paulo. ⁹ Xban nak cuan li Santil Musik'ej riq'uin, laj Saulo li nayeman ajcui' aj Pablo re, quixnau nak inc'a' us xna'leb laj Barjesús. Jo'can nak quixca'ya sa' ru. ¹⁰ Ut quixye re: —Laat chanchanat laj tza. Laat aj tic'ti'. Xic' nacacuil li tiquinal. Junes balak'ic ut mausil nacabanu. Laat nacapo' ru li rusilal li Kacua'. ¹¹ Anakcuan li Kacua' tarakok atin sa' aben. Tatmutz'ok' ut najt inc'a' tailok xnak' acuu, chan laj Pablo. Ut sa' junpat quimoy ut quik'ojoj'no' sa' xnak' ru. Quixyal xsic'bal aní tach'ilonk re. ¹² Ut nak laj Sergio Paulo quiril li c'a'ru quixc'ul laj tul, quixpab li Kacua'. Sachso xch'ol chirabinquil li tijleb chirix li Kacua'.

Laj Pablo ut laj Bernabé que'xch'olob xyalal aran Antioquía xcuent Pisidia

¹³ Laj Pablo que'el Pafos sa' jucub jo'queb ajcui' li rochben ut que'coeb Perge xcuent Panfilia. Aran que'xcanab ribeb ut laj Juan Marcos quisuk'i Jerusalén. ¹⁴ Eb a'an que'nume' Perge ut que'cuulac Antioquía xcuent Pisidia. Sa' li hilobal cutan que'oc sa' li cab li neque'xch'utub cui' ribeb laj judío ut que'cojla aran. ¹⁵ Eb laj c'amol be que'r'il xsa' li chak'rab ut que'r'il ajcui' xsa' li hu li que'xtz'iba li profeta. Ut chirix a'an que'xye re laj Pablo: —Ex kas kitz'in, cui cuan li c'a'ru teye re xq'uebal xcacuil xch'oleb li tenamit, takaj rabinquil anakcuan, chanqueb. ¹⁶ Quixakli laj Pablo ut quixtaksi li ruk' re xyebal reheb nak inc'a' chic te'chokink. Quixye: —Ex aj judío ut laex li macua'ex aj judío, li nequelok'oni li Kacua', abihomak li tinye ere. ¹⁷ Li Dios li neque'xlok'oni li ralal xc'ajol laj Israel, a'an quixsiq'ueb ru li kaxete'tonil yucua'. Quirosobtesiheb ut quixtamresiheb nak cuanqueb aran Egipto. Ut riq'uin xnimbal xcuanyl quirisiheb sa' li tenamit a'an. ¹⁸ Ca'c'al chihab quixcuy chak rilbaleb nak yoqueb chak chi numec'sa' li chaki ch'och'. ¹⁹ Quixsach ruheb cuukub li xniñkal ru tenamit sa' li na'ajej Canaán ut li na'ajej a'an quicana chok' reheb laj Israel. ²⁰ Chixjunil a'in quic'ulman chiru cahib ciento riq'uin mero ciento chihab. Chirix a'an li Dios quixq'ueheb aj rakol atin chi taklanc sa' xbeneb toj qui-oc laj Samuel li profeta. ²¹ Chirix

chic a'an que'xtz'ama xreyeb. Ut li Dios quixq'ue laj Saúl chok' xreyeb. A'an quitaklan sa' xbeneb chiru ca'c'al chihab. Laj Saúl a'an ralal laj Cis xcomoneb li ralal xc'ajol laj Benjamín. ²² Ut nak qui-isic laj Saúl, li Dios quixq'ue laj David chok' xreyeb ut quixye: —Xinsic' ru laj David ralal laj Isai. Nacuulac chicuu lix na'leb li cujnk a'an. A'an tixbanu chixjunil li c'a'ru nacuaj lain, chan. ²³ Ut sa' xyankeb li ralal xc'ajol a'an, li Dios quixq'ue chi yo'lac li Jesús laj Colol re li tenamit Israel jo' quixyechi'i rebeb. ²⁴ Nak toj maji' nac'ulun li Jesús, laj Juan yo chixch'olobanquil chiruheb chixjunileb laj Israel nak tento te'xyot' xch'ol te'xjal xc'a'ux ut te'x'ul li cubi ha'. ²⁵ Nak ac rakec' re xbanunquil lix c'anjel, laj Juan quixye, "¿Anihin lain nak nequec'oxla? Moco lain ta li yoquex chiroybeninquil. Chalc ban re chicuix li yoquex chiroybeninquil. A'an nim xcuانquil chicuu lain. Moco inc'ulub ta xhitbal xc'amat lix xab," chan laj Juan. ²⁶ Ex kas kitz'in, laex ralal xc'ajol laj Abraham, ut laex li macua'ex aj judío li nequexucua ru li Dios, taklanbil chak chok' ere laj Colonel. ²⁷ Li cuanqueb Jerusalén ut eb li neque'taklan sa' xbeneb li tenamit inc'a' que'xtau ru li que'xye eb li profeta. Inc'a' que'xnau nak li Jesús, a'an laj Colonel. Abanan nak que'xk'axtesi chi camc li Jesús, quitz'akloc ru li qatin li que'xye li profeta, li na-ile' chiruheb rajlal sa' li hilobal cutan. ²⁸ Usta inc'a' que'xtau xmac, que'xtz'ama chiru laj Pilato nak tixq'ue chi camsic li Jesús. ²⁹ Nak ac xc'ul chixjunil li raylal li quiyeho' chak chirix xbaneb li profeta junxil, que'risi chiru cruz ut que'xmuk. ³⁰ Abanan li Dios quixcuaclesi cui'chic chi yo'yo sa' xyankeb li camenak. ³¹ Ut chiru nabal cutan qui-ile' ru xbaneb li que'ochbenin re junxil nak qui-el Galilea ut co' Jerusalén. Ut a'aneb chic neque'yehoc resil li que'r'il rebeb li tenamit anakcuan. ³² Jo'can ajcui' lao yoco chixch'olobanquil cheru li chabil esil a'in: nak li Dios quixcuaclesi cui'chic chi yo'yo li Jesucristo. ³³ Quitz'akloc ru chok' ke lao li alal c'ajolbej li quixyechi'i chak li Dios rebeb li kaxe'tonil yucua' junxil jo' tz'ibanol retali sa' li hu Salmos li naxye chi jo'ca'in: Laat li tz'akal cualal. Anakcuan xating'ue sa' acuanquil, chan li Dios. (Sal. 2:7) ³⁴ Quixcuaclesi cui'chic chi yo'yo sa' xyankeb li camenak ut inc'a' chic tacamk jo' tz'ibanol retali sa' li hu Isaías li naxye chi jo'ca'in: Lain texcuosobtesi ut ting'ue ere li matan li quinyechi'i re laj David junxil. (Is. 55:3) ³⁵ Ut naxye ajcui' sa' li Salmos: Inc'a' tacanab chi k'ac lix tibel la Santil Alal. (Sal. 16:10) ³⁶ Relic chi yal laj David nak toj yo'yok quic'anjelac chiru lix tenamit jo' quiraj li Dios. Quicam ut quimuke' chixc'atk lix xe'tonil yucua' ut quik'a lix tibel. ³⁷ Abanan li jun li quicuaclesic cui'chic chi yo'yo xban li Dios, a'an inc'a' quik'a lix tibel. ³⁸ Jo'can ut nak chenauhak laex, kas kitz'in, nak nakajultica cheru nak ca'aj cui' sa' xc'aba' li Jesús li quicuacla cui'chic chi yo'yo cuan xcybal xsachbal le mac. ³⁹ Inc'a' quiticobresic xch'oleb li kaxe'tonil yucua' riq'uin xbanunquil li naxye sa' lix chak'rab laj Moisés, abanan anakcuan naru chic taticobresik kach'ol riq'uin xpabanquil li Jesús. ⁴⁰ Jo'can nak cheq'uehak retal chi us re nak inc'a' tachalk sa' eben li raylal li que'xye chak li profetas junxil. ⁴¹ A'an a'in li que'xtz'iba li profeta junxil:

Cherabihak, laex li nequextz'ektañan re li cuatin. Chisachk ena'leb ut chehosok' ta. Lain yoquin chixbanunquil jun li sachba ch'olej sa' eb li cutan a'in. Li sachba ch'olej li yoquin chixbanunquil inc'a' raj tepab cui' yal ani ta junak taseraq'ink ere. (Hab. 1:5)

⁴² Nak que'el laj Pablo ut laj Bernabé sa' li cab li neque'xch'utub cui' ribeb laj judío, li macua'eb aj judío que'xtz'ama chiru laj Pablo nak tachalk cui'chic sa' li hilobal cutan jun chic re nak tixch'olob cui'chic xyalal chiruheb. ⁴³ Nak

que'xchak'rabiheb li tenamit, nabaleb laj judío jo'queb ajcui' li que'oc sa' xyānkeb a'an que'xtake laj Pablo ut laj Bernabé. Laj Pablo ut laj Bernabé yoqueb chixq'uebal xna'lebeb re nak te'cuank sa' xyalal jo' naraj li Dios. ⁴⁴ Sa' li hilobal cutan jun chic, yal cuib oxib aj chic li inc'a que'cuulac chi abinc nak que'xch'utub ribeb chixjunileb li cuanqueb sa' li tenamit chirabinquil li ratin li Dios li tixye laj Pablo. ⁴⁵ Ut nak que'r'il li qu'ula tenamit eb li neque'c'amoc be sa' xyānkeb laj judío, c'ajo' nak que'cako' xch'oleb. Que'oc chixcuech'inquil laj Pablo. Que'xhob ut que'xmajecua. ⁴⁶ Laj Pablo ut laj Bernabé que'xye chi cauheb xch'ol: —Relic chi yal nak xben cua raj ere laex aj judío xkaye resil li ratin li Dios. Abanan laex xetz'ektaña ut xec'oxla nak moco ec'ulub ta li junelic yu'am. Jo'can nak anakcuan takaye resil reheb li macua'eb aj judío. ⁴⁷ Tento takaye xban nak jo'can coxtakla cui' chak li Kacua' Dios nak quixye: Xatinxakab re tach'olob xyalal chiruheb li macua'eb aj judío ut taye resil li colba-ib jun sut sa' ruchich'och'. (Is. 49:6)

⁴⁸ Nak que'rabi li c'a'ru quixye laj Pablo, li macua'eb aj judío que'saho' sa' xch'oleb ut que'xq'ue xcuanquil li ratin li Dios. Que'pāban li jo' q'uijal li quixye li Dios nak tācuānk xyu'ameb chi junelic. ⁴⁹ Ut yo rabinquil resil li ratin li Dios sa' chixjunil li na'aiej a'an. ⁵⁰ Eb laj judío que'xtacchi'i chak eb li iixl li neque'xq'ue xcuanquil lix papabeb, li neque'q'uehe' xlok'al jo'queb ajcui' li cuinkli cuanqueb xcuanquil sa' li tenamit. Que'xyo'ob jun ra xic' sa' xbenet laj Pablo ut laj Bernabé. Ut que'risiheb sa' lix tenamiteb. ⁵¹ Laj Pablo ut laj Bernabé que'xchik'chik'i li poks chi rokeb nak que'el sa' li tenamit re xc'utbal nak inc'a' us que'xbanu reheb. Ut chirix a'an que'coeb Iconio. ⁵² Ut eb laj pābanel c'ajo' xsahil sa' xch'oleb ut li Santil Musik'ej cuan riq'uineb.

14

Laj Pablo ut laj Bernabé que'xc'ul raylal xban nak que'xch'olob xyalal aran Iconio

¹ Nak que'cuulac Iconio, laj Pablo ut laj Bernabé que'oc sa' li cab li neque'xch'utub cui' ribeb laj judío. Que'xch'olob li xyalal chiruheb ut nabaleb aj judío que'pāban jo'queb ajcui' li macua'eb aj judío. ² Ut eb laj judío li inc'a' que'pāban, que'xtacchi'iheb li macua'eb aj judío re nak te'xpo' xch'oleb sa' xbeneb laj pābanel. ³ Abanan laj Pablo ut laj Bernabé najt que'cana aran. Ut xban nak cauheb xch'ol riq'uin li Kacua' que'xch'olob xyalal li rusilal li Dios. Ut li Kacua' yo chixq'uebal xcuanquil li ratineb xban nak yo chixtenk'anquileb chixbanunquil li milagros ut li sachba ch'olej. ⁴ Que'xjach ribeb li tenamit. Cuanqueb li que'oquen chirixeb laj judío ut cuanqueb li que'oquen chirixeb li apóstol. ⁵ Sa' xyānkeb li xic' neque'iloc reheb laj Pablo ut laj Bernabé cuanqueb aj judío ut cuanqueb macua'eb aj judío. Que'xjunaji ribeb riq'uineb li neque'taklan sa' li tenamit ut que'xc'ub ru chanru nak te'xrahobtesi ut te'xcuti chi pec laj Pablo ut laj Bernabé. ⁶ Abanan laj Pablo ut laj Bernabé que'rabi resil li yoqueb chix'ubanquil ut que'elelic chiruheb. Coeb sa' eb li tenamit Listra ut Derbe xcient Licaonia ut que'coeb ajcui' sa' eb li c'alebal li cuanqueb chi xjun sutam. ⁷ Ut aran yoqueb chixch'olobanquil resil li colba-ib.

Que'xcuti laj Pablo chi pec aran Listra

⁸ Aran Listra cuan jun li cuink inc'a' naru nabec. Chalen sa' xca'ch'inal inc'a' us li rok. Li cuink a'an chunchu aran. ⁹ Yo chirabinquil li c'a'ru yo chixyebal laj Pablo. Laj Pablo quixca'ya li cuink ut quixq'ue retal nak li cuink a'an quixpab nak naru taq'uirtesik. ¹⁰ Jo'can nak laj Pablo quixye re

chi cau xyab xcux: —Cuaclin. Xaklin chi us, chan. Ac t̄acuacl̄ik ut qui-oc chi b̄ec li cuink. ¹¹ Nak li tenamit que'r'il li c'a'ru quixbanu laj Pablo, que'xjap reheb chixyebal sa' ratinobaleb laj Licaonia: —Xe'chal sa' kayank li dios. Chanchaneb cuink, chanqueb. ¹² Laj Bernabé que'xq'ue xc'aba' chok' Júpiter, ut laj Pablo Mercurio que'xq'ue chok' xc'aba' xban nak a'an aj c'amol be chi atinac. ¹³ Li rochoch laj Júpiter lix dioseb a'an cuan chire li tenamit. Laj tij li nac'anjelac chiru lix dioseb a'an cuan chire li tenamit. Laj tij li nac'anjelac chiru lix dioseb quixc'am chire li tenamit li cuacax ut li cotobanbil utz'u'uj, Quiraj raj xmayejanquil chiruheb li apóstol rochbeneb li tenamit. ¹⁴ Nak que'xq'ue retal li c'a'ru yoqueb li tenamit, laj Pablo ut laj Bernabé que'xpej li rak'eb retalil nak inc'a' quicuulac chiruheb li c'a'ru yoqueb chixbanunquil li tenamit. Ut que'coeb sa' anil sa' xyānkeb li tenamit ut que'xye chi cau xyab xcuxeb: ¹⁵ —Ex tenamit, ¿c'a'ut nak nequebanu chi jo'can? Lao yal cuinko jo' laex. Juntak'eto eriq'uin. A'an aj e nak xochal arin sa' eyank chixyebal ere nak tecanab li jo' majo' il na'leb. Sic'omak ban li yo'yoquil Dios li quiyibán re li choxa, li ruchich'och', li palau ut chixjunil li c'a'ru cuan. ¹⁶ Junxil li Dios quixcanabeb li tenamit chi cuancjo' que'raj eb a'an. ¹⁷ Riq'uin li usilal li naxbanu ke, junelic yo chixc'utbesinquil chiku nak a'an li Dios. A'an naxc'ut chiku nak a'an yal re sa' xben chixjunil. A'an naq'uehoc re li hab. A'an naq'uehoc re chi uchinc li kacuimk chi nabal, ut a'an ajcui' nac'ojoban re li kach'ol riq'uin li katzacaemk ut riq'uin lix sahil kach'ol, chan laj Pablo. ¹⁸ Usta laj Pablo ut laj Bernabé que'xch'olob xyalal chiruheb li tenamit, abanan ra sa nak que'xc'ul xch'ol nak inc'a' te'mayejak chiruheb. ¹⁹ Que'cuulac eb laj judío li que'chal Antioquía ut Iconio. Que'xtacchi'iheb nabaleb li tenamit. Que'xcuti chi pec laj Pablo ut que'risi chire li tenamit. Sa' xch'oleb a'an nak camenak chic laj Pablo que'xcanab. ²⁰ Laj Pablo quiril nak quisite' xbaneb laj pabanel. Quicuacli ut co sa'li tenamit. Ut sa' xcab li cutan co cui'chic Derbe rochben laj Bernabé.

Laj Pablo co cui'chic Antioquía xcuent Siria chixq'uebal xcacuila xch'oleb laj pabanel

²¹ Nak que'xch'olob resil li colba-ib sa' li tenamit Derbe, nabaleb que'pabanel. Chirix chic a'an que'suk'i cui'chic sa' eb li tenamit Listra, Iconio ut Antioquía. ²² Yoqueb chixq'uebal xcacuila xch'oleb laj pabanel. Que'xye reheb nak te'xpab li Kacua' chi anchaleb xch'ol ut inc'a' te'xcanab xpabankuil. Que'xye reheb nak tento te'xcuy xnumpsinquil li raylal re nak te'oc sa' lix nimajcual cuanquillal li Dios. ²³ Que'xxakab aj c'amol be re li junjunk ch'utal chi aj pabanel. Que'xbanu lix ayun ut que'tijoc sa' xbaneb re xk'axtesinquileb sa' ruk' li Kacua' li ac xe'pabán. ²⁴ Nak yoqueb chi xic que'nume' sa' li na'ajej Pisidia ut que'cuulac Panfilia. ²⁵ Que'xye resil li evangelio aran Perge ut que'coeb Atalia. ²⁶ Que'el aran ut que'coeb chiru ha' toj Antioquía sa' li na'ajej li que'taklaci cui' chi c'anjelac chiru li Kacua'. Que'canabac sa' ruk' li Dios re nak a'an taílok reheb. Jo'ca'in nak que'xchoy li c'anjel li quiq'uehe' reheb re te'xbanu. ²⁷ Nak que'cuulac Antioquía que'xch'utub chixjunileb laj pabanel ut que'xserak'i reheb chixjunil li quixbanu li Kacua' reheb. Que'xserak'i ajcui' reheb chanru nak li Dios quixq'ue li evangelio reheb li macua'eb aj judío. ²⁸ Laj Pablo ut laj Bernabé najt que'cana riq'uineb laj pabanel sa' li na'ajej a'an.

te'xbanu laj pabanel li macua'eb aj judío

¹ Cuanqueb aj pabanel que'chal chak Judea. Que'oc chixyebal reheb laj pabanel: —Inc'a' naru texcolek' cui inc'a' tebanu li circuncisión jo' naxye li chak'rab li quiq'uehe' re laj Moisés, chanqueb. ² Riq'uin a'an que'xtiquib xcuech'inquil ribeb riq'uin laj Pablo ut laj Bernabé chirix li na'leb a'in. Ut que'xc'ub ru nak laj Pablo ut laj Bernabé te'xic Jerusalén chixpatz'bal reheb li apóstol ut reheb laj c'amol be ma tento nak te'xc'ul li circuncisión re nak te'colek'. Cuanqueb ajcui' cuib oxib laj pabanel coeb chirixeb. ³ Que'taklac xbaneb laj pabanel aran Antioquía. Nak yoqueb chi numec' Fenicia ut Samaria, que'xe resil nak que'paban li macua'eb aj judío. Ut c'ajo' nak que'saho' sa' xch'oleb chixjunileb laj pabanel rabinquel nak yoqueb chi pabanc. ⁴ Ut nak que'cuulac Jerusalén, que'e'ule' xbaneb li apóstol, eb laj c'amol be jo'queb ajcui' chixjunileb laj pabanel. Ut que'xserak'i reheb chanru nak li Dios quixtenk'aheb riq'uin li c'anjel que'xbanu. ⁵ Abanan cuanqueb cuib oxib laj pabanel aj fariseo. Eb a'an que'xye: —Eb laj pabanel li macua'eb aj judío, tento te'xbanu li circuncisión. Tentó te'xbanu li c'a'ru naxye li chak'rab li quixq'ue ke laj Moisés, chanqueb. ⁶ Que'xch'utub ribeb li apóstol ut eb laj c'amol be chixsic'bal c'a'ru te'xbanu riq'uin li ch'a'ajquilal a'in. ⁷ Ut nak ac xe'xcuech'i ribeb chi us chirix li na'leb a'in, laj Pedro quicuacli ut qui-oc chi atinac. Quixye reheb: —Ex herman, laex nequenau nak ac junxil quixsic' chak cuu li Dios sa' eyank re tinye resil li colbab' reheb li macua'eb aj judío re nak te'pabank ajcui' eb a'an. ⁸ Li Dios naxnau c'a'ru nanume' sa' xch'ol li junjunk. Quixc'ut chiku nak naxraheb a'an nak quixq'ue li Santil Musik'ej reheb jo' nak quixq'ue ke lao. ⁹ Moco jalan ta chic li colba-ib li xq'ue ke lao chiru li xq'ue reheb a'an. Quixcuy quixsach lix maqueb xban nak xe'pabán. ¹⁰ Anakcuan ut ¿c'a'ut nak yoquex chixyalbal rix li Dios riq'uin xq'uebal li ik a'in sa' xbeneb laj pabanel li macua'eb aj judío? ¿C'a'ut nak tepuersiheb chixbanunquil li naxye li chak'rab li inc'a' xoru chixbanunquil lao chi moco eb li kaxe'tonil yucua'? ¹¹ Yal xban rusilal li Kacua' Jesús nak xopabán ut xocole' jo' eb ajcui' a'an, chan laj Pedro. ¹² Que'xcanab atinac chixjunileb li ch'utch'uqueb aran ut que'oc chirabinquel nak laj Pablo ut laj Bernabé yoqueb chixserak'inquil chanru nak li Dios quixtenk'aheb chixbanunquil li milagro ut li sachba ch'olej sa' xyankeb li macua'eb aj judío. ¹³ Nak que'rake' chi atinac, laj Jacobo quichak'oc ut quixye: —Ex inherman, abihomak li oc cue xyebal ere. ¹⁴ Laj Simón Pedro ac xye ere chanru nak li Dios quixtiquib rosobtesinquileb li macua'eb aj judío. Quixsiq'ueb ru sa' xyankeb li ani te'pabank re. ¹⁵ Ut a'an ajcui' li que'xtz'iba chak retalil li profeta junxil li naxye chi jo'ca'in:

¹⁶ Ut chirix a'in lain tinchalk ut tincuaclesi cui'chic lix tenamit laj David, li t'anenak anakcuan. Tinyib cui'chic li tz'ac li sutsu cui' ut tinyib cui'chic li juq'uinbil. Tinq'ueheb cui'chic xcuanyl laj Israel,

¹⁷ re nak tine'xpab li macua'eb aj judío. Tine'xpab chixjunileb li sic'bileb ru inban chok' cualal inc'ajol, chan li Kacua' Dios.

¹⁸ Ut li Kacua' Dios li quiyehoc chak re a'in, a'an ajcui' li tabanunk re. (Amós 9:11-12)

¹⁹ Jo'can nak lain ninye nak inc'a' takapuersi ruheb chixbanunquil li naxye li chak'rab li macua'eb aj judío li yoqueb chixpabankuil li Kacua'. ²⁰ Li tento takabánu, a'an tz'ibac riq'uinéb ut xyebal reheb nak inc'a' te'xmux rib riq'uin xtzacanquil li tzacaemk mayejanbil chiruhéb li yibanbil dios. Inc'a' te'co'betak te'yumbetak. Ut inc'a' te'xtiu xtibel li yatz'bil xul chi moco

te'xtzaca li quic'. ²¹ Jo'ca'in ajcui' naxye li chak'rab li quiq'uehe' re laj Moisés xban li Dios. Ut chalen chak najter cuan li ani najultican re sa' eb li cab li neque'xch'utub cui' ribeb laj judío rajlal hilobal cutan, chan laj Jacobo.

Li hu li que'xtz'iba reheb li macua'eb aj judío

²² Eb li apóstol, ut eb laj c'amol be rochbeneb chixjunileb laj pabanel que'xsic' ruheb li te'xtakla Antioquía chirixeb laj Pablo ut laj Bernabé. Ut que'xsiq'ueb ru laj Silas ut laj Judas, aj Barsabás neque'xye ajcui' re. Eb li cuink a'in q'uebileb xcuauquil xbaneb li rech aj pabanelil. ²³ Que'xtz'iba jun li hu ut que'xtakla chirixeb laj Judas ut laj Silas. Jo'ca'in naxye sa' li hu que'xtakla: Ex herman, li macua'ex aj judío, lao li apóstol, ut eb laj c'amol be jo'queb ajcui' chixjunileb laj pabanel nakatakla xsahil ech'ol laex li cuanquex sa' eb li tenamit Antioquía, Siria ut Cilicia. Sahak taxak sa' ech'ol. ²⁴ Xkabi resil nak cuanqueb li xe'el arin sa' kayank ut xe'coeb aran sa' le tenamit chech'i ch'i'inquil ut chixpo'bal ech'ol riq'uin li c'a'ru neque'xye. Abanan moco lao ta xotaklan reheb. ²⁵ Jo'can nak xkach'utub kib ut xkac'ub ru nak takasic' ruheb li ani takatakla eriq'uin chirixeb laj Bernabé ut laj Pablo, li raroqueb kaban. ²⁶ Eb li kaherman a'in ac xe'xk'axtesi ribeb chi cämc sa' xc'aba' li Kacua' Jesucristo. ²⁷ Ut xkasic' ruheb laj Judas ut laj Silas ut xkataklahel eriq'uin re nak te'xch'olob cheru li c'a'ru xkatz'iba sa' li hu a'in. ²⁸ Xc'ul xch'ol li Santil Musik'ej jo' ajcui' lao nak inc'a' texkapuersi chixbanunquil chixjunil li naxye sa' li chak'rab. Ca'aj cui' eb li na'leb a'in tento tēbanu. ²⁹ Inc'a' tētzaca li tzacaemk mayejanbil chiru li yibambil dios chi moco tētzaca li quic' chi moco tētzaca xtibel li yatz'bil xul. Ut inc'a' temux erib riq'uin co'betac yumbetaq. Cui tecol erib chiru chixjunil a'in, us tēbanu. Cherilak erib, chan laj Jacobo. ³⁰ Eb li cuink li que'taklac coeb Antioquía. Que'xch'utub chixjunileb laj pabanel ut que'xk'axtesi reheb li hu li que'xc'am. ³¹ Nak que'r'il xsa' li hu, c'ajo' nak que'saho' sa' xch'oleb laj pabanel ut que'co'jla xch'oleb riq'uin li c'a'ru quítaklac xyebal reheb. ³² Laj Judas ut laj Silas q'uebileb xmañan chixch'olobanquil xyalal li rātin li Dios. Que'xch'olob xyalal chiruhéb li ch'utch'uequeb aran ut que'xq'ue xcacuial xch'oleb ut que'xc'ojob xch'oleb riq'uin li a'tin li que'xye reheb. ³³ Nait que'cana sa' xyankeb. Mokon chic que'chak'rabic re nak te'suk'ik cui'chic Jerusalén riq'uineb laj pabanel li que'taklan reheb Antioquía. Ut que'xtz'ama rusilal li Dios sa' xbeneb. ³⁴ Abanan laj Silas toj quiraj canac aran. ³⁵ Laj Pablo ut laj Bernabé que'cana ajcui' aran Antioquía. Yoqueb chixc'utbal li rātin li Dios ut yoqueb chixch'olobanquil xyalal li colba-ib. Ut cuanqueb ajcui' nabaleb li que'tenk'an reheb.

Laj Pablo quixjach rib riq'uin laj Bernabé ut co xca' sut chirula'aninquel laj pabanel

³⁶ Mokon chic laj Pablo quixye re laj Bernabé: —Toxic cui'chic sa' eb li tenamit conume' cui' chak chixyebal rātin li Dios re takil chanru cuanqueb laj pabanel li cuanqueb sa' eb li na'ajej a'an, chan. ³⁷ Ut laj Bernabé quiraj raj xc'ambal chirixeb laj Juan li neque'xye ajcui' Marcos re. ³⁸ Abanan inc'a' quixc'ul xch'ol laj Pablo xban nak junxil laj Juan Marcos quixjach rib riq'uineb aran Panfilia ut inc'a' chic co chirixeb chixbanunquil li c'anjel. ³⁹ Que'xcuech'i ribeb laj Pablo ut laj Bernabé ut que'xcanab ribeb. Laj Bernabé co aran Chipre chiru ha' ut quixc'am laj Juan Marcos chirix. ⁴⁰ Laj Pablo quixsic' ru laj Silas re tixc'am chirix. Eb laj pabanel li cuanqueb aran Antioquía que'xk'axtesiheb laj Pablo ut laj Silas sa' ruk' li Kacua' nak que'el

aran. ⁴¹ Quilaje'xbeni li na'ajej Siria ut Cilicia. Que'xch'olob xyalal chiruheb laj pabanel ut que'cacuu xch'oleb sa' xpabaleb.

16

Laj Timoteo cq chirixeb laj Pablo ut laj Silas

¹ Laj Pablo quicuulac sa' eb li tenamit Derbe ut Listra. Ut aran quixtau jun aj pabanel aj Timoteo xc'aba'. Lix na', a'an jun aj pabanel aj judío ut lix yucua', a'an aj griego. Macula' aj judío. ² Chabil neque'xye chirix laj Timoteo eb laj pabanel li cuanqueb Listra ut Iconio. ³ Laj Pablo quiraj xc'ambal laj Timoteo chirix. Jo'can nak quixbanu li circuncisión re. Inc'a' quiraj nak te'ch'inank xch'oleb laj judío li cuanqueb sa' eb li na'ajej aran xban nak chixjunileb que'xnau nak lix yucua' laj Timoteo macua' aj judío. ⁴ Ut nak yoqueb chi numec' sa' li junjunk chi tenamit, yoqueb chixyebal reheb laj pabanel nak tento te'xbanu li c'a'ru que'xc'ub ru eb li apóstol jo'queb ajcui' laj c'amol be li cuanqueb aran Jerusalén. ⁵ Jo'ca'in nak yoqueb chi q'uiç laj pabanel sa' xpabaleb. Ut rajlal cutan yoqueb chi tñmc.

Jun li cuink aj Macedonia quic'ute' chiru laj Pablo sa' visión

⁶ Li Santil Musik'ej quixc'ut chiruheb nak inc'a' te'xic chixch'olobanquil resil li colba-ib sa' li na'ajej Asia. Jo'can nak que'cqeb Frigia ut que'nume' ajcui' sa' li na'ajej Galacia. ⁷ Nak que'cuulac Misia, que'raj raj xic Bitinia. Abanan li Santil Musik'ej inc'a' quixcanabeb re te'xic aran. ⁸ Jo'can nak yal que'nume' Misia ut cqeb Troas. ⁹ Nak cuanqueb aran sa' jun li k'ojoyn quic'ute' jun li visión chiru laj Pablo. Jun li cuink aj Macedonia xakxo chiru nak quiril. Yo chixtz'amanquil chiru ut quixye re: —Chalkat sa' katenamit Macedonia ut choaqten'a, chu'ux re nak quiril. ¹⁰ Ut nak ac xc'ute' li visión chiru laj Pablo, sa' junpat quikacauresti kib lao chi xic Macedonia. Kanau chi tz'akal nak li Dios yo çhi taklanc ke aran chixyebal resil li colba-ib reheb li cuanqueb aran.

Lix Lidia quipaban nak laj Pablo quixch'olob xyalal aran Filipos

¹¹ Co-el aran Troas ut tic coo chiru ha' toj Samotracia. Ut cuulajak chic cocuulac Neápolis. ¹² Chirix a'an coo Macedonia sa' li nimla tenamit Filipos. Li tenamit a'an cuan xcuent Roma. Cocuan cuib oxib cutan sa' li tenamit a'an. ¹³ Ut sa' li hilobal cutan cgo chire li tenamit cuan cui' jun li nima' sa' li na'ajej li neque'tijoc cui' eb laj judío. Coc'oja ut co-oc chixyebal resil li colba-ib reheb li iixk li que'ch'utla aran. ¹⁴ Jun reheb li iixk a'an xLidia xc'aba'. Tiatira xtenamit. A'an nac'ayin chabil t'icr. Naxpab li Dios ut yo chi abinc xban nak li Dios quixc'ut chiru nak tixq'ue retal li yo chixyebal laj Pablo. ¹⁵ Quixc'ul li cubi ha' rochbeneb chixjunileb li cuanqueb sa' rochoch, ut quixye ke: —Cui nequepab nak lain xinpab li Kacua' chi anchal inch'ol, naru nequexcana chi hilanc sa' li cuochoch, chan ke. Ut quirelaji ku chi canac.

Laj Pablo ut laj Silas que'q'uehe' sa' tz'alam aran Filipos

¹⁶ Sa' jun li cutan yoco chi xic chi tijoc nak kac'ul jun li xka'al aj k'e. Cuan maus aj musik'ej riq'uin. A'an jun mos ut naxsic' nabal xtumin lix patrón riq'uin k'ehinc. ¹⁷ Li xka'al a'an yo chikatakenquil. Japjo re chixyebal: —Eb li cuink a'in a'an xmoseb li nimajcual Dios. Yoqueb chixch'olobanquil chiku chanru nak taruk tocolek', chan. ¹⁸ Nabal cutan quixbanu chi jo'can. Nak ac xtitz' chirabinquil, laj Pablo quixxakab rib, ut quiril li xka'al, ut quixye re li maus aj musik'ej: —Sa' xc'aba' li Kacua' Jesucristo, tinye acue: Elen riq'uin li xka'al a'in, chan. Ut sa' ajcui' li honal a'an, li maus aj musik'ej qui-el

riq'uin. ¹⁹ Nak que'xq'ue retal lix patrón li xka'al nak inc'a' chic taruk tixsic' xtumineb, que'xchap laj Pablo ut laj Silas ut que'xc'am sa' popol chiruheb laj rakol atin. ²⁰ Nak que'xxakab chiru laj rakol atin, que'xye: —Eb li cuink a'in, a'aneb aj judío ut yoqueb chikach'i'ch'i'inquïl sa' li katenamit. ²¹ Yoqueb chixc'utbal jalán na'leb sa' li katenamit. Lao inc'a' naru nakac'ul chi moco naru takabánan li neque'xye xban nak lao aj Roma, chanqueb. ²² Ut que'xtub rib li tenamit chixjítbaleb. Eb laj rakol atin que'xk'ichi' li rakteb laj Pablo ut laj Silas ut que'xtakla xsac'baleb riq'uin che'. ²³ Nak ac xe'tacuasic' chi us, que'q'uehe'sa' tz'alam. Ut eb laj rakol atin que'xye reheb laj ilol tz'alam nak te'ril chi us laj Pablo ut laj Silas re nak inc'a' te'elelik. ²⁴ Ut nak quiyehe' chi jo'can, que'c'ame' ut que'q'uehe' sa' tz'alam sa' jun li na'ajej li cuan toj chi sa' ut que'nat'e' li rok sa' che'. ²⁵ Tuktu chic k'ojojin nak laj Pablo ut laj Silas yoqueb chi tijoc ut yoqueb chi bichanc' re xlok'oninquil li Dios. Ut eb li cuanqueb chi prexil yoqueb chi abinc. ²⁶ Mac'a' sa' xch'oleb nak quichal jun nimla hic. Qui-ec'asic' chi cau li tz'alam, ut quilaje'teli lix puertil. Ut quilaje'hite' li cadena li bac'boqueb cui' li prex. ²⁷ Ut nak qui-aj ru laj ilol tz'alam, quiril nak tetó lix puerfil li tz'alam. Quixchap lix ch'ich' ut oc raj re chixcamsinquil rib. Sa' xch'ol a'an nak xe'elelic chixjunileb li prex. ²⁸ Ut laj Pablo quixjap re chi cau ut quixye: —Macamsi acuib. Chikafunilo cuanco arin, chan. ²⁹ Ut laj ilol tz'alam quixpatz' lix xam ut qui-oc chi sa' li tz'alam chiribal. Nasicots xban xxii nak quixcut rib chi rokeb laj Pablo ut laj Silas. ³⁰ Laj ilol tz'alam quirisiheb xjuneseb laj Pablo ut laj Silas ut quixye reheb: —¿C'a'ru us tinbanu re nak tincolek? ³¹ Eb a'an que'xye: —Pab li Kacua' Jesucristo. Tatcolek' laat jo'queb ajcui' li cuanqueb sa' la cuochoch, chan laj Pablo. ³² Ut quixch'olob xyalal li ratin li Kacua' chiru a'an jo' ajcui' chiruheb li jo' q'ual li cuanqueb sa' li rochoch. ³³ Ut sa' ajcui' li honal a'an laj ilol tz'alam quirisiheb sa' tz'alam laj Pablo ut laj Silas. Quixch'aj ru lix toch'oleb xban nak que'saq'ue'. Ut ticto quicubsjc xha' laj ilol tz'alam rochbeneb chixjunileb li cuanqueb sa' li rochoch. ³⁴ Quixc'ameb laj Pablo ut laj Silas sa' rochoch ut quixq'ueheb xtzacaemk. C'ajo' nak quisaho' sa' xch'ol nak quixpab li Dios rochbeneb li cuanqueb sa' rochoch. ³⁵ Nak quisakeu, eb laj rakol atin que'xtakla xyebal re laj ilol tz'alam nak tixcanabéb chi xic eb li cuink a'an. ³⁶ Laj ilol tz'alam quixye reheb: —Eb laj rakol atin xe'xtakla chak xyebal nak tex-ach'abak. Jo'can nak ayukex chi mac'a' ec'a'ux, chan. ³⁷ Laj Pablo quixye reheb: —Inc'a'. Xosaq'ue' chiruheb li tenamit chi maji' que'xrak atin sa' kabén. Xoe'xq'ue sa' tz'alam usta lao aj Roma. Ut anakcuan, te'raj toe'risi chi mukmu. Inc'a' naru chi jo'can. Ch'alkeb ban a'an ut choe'risihak, chan. ³⁸ Ut eb li takl que'coeb chixyebal re laj rakol atin li c'a'ru quixye laj Pablo. C'ajo' nak que'xucuac nak que'rabi nak laj Pablo ut laj Silas, a'aneb aj Roma. ³⁹ Nak que'cuulac, que'xk'unbesiheb ut que'xtz'ama chiruheb nak te'elk sa' li tenamit. ⁴⁰ Nak que'el sa' tz'alam laj Pablo ut laj Silas, coxe'ocak sa' rochoch lix Lidia. Nak ac xe'ril ruheb laj pabanel, que'xq'ue xcacuila xch'oleb ut que'coeb.

17

Li ch'a'ajquinal que'xc'ul laj Pablo ut laj Silas nak cuanqueb Tesalónica

¹ Nak yoqueb chi xic laj Pablo ut laj Silas que'nume' Anfípolis ut Apolonia. Ut chirix a'an, que'cuulac Tesalónica bar cuan cui' jun li cab li neque'xch'utub cui' ribeb laj judío. ² Laj Pablo qui-oc sa' li cab li neque'xch'utub cui' ribeb laj judío jo' c'aynak chixbananquil. Oxib li hilobal cutan quixnumsi aran ut yo chixch'olobanquil chiruheb li xyalal li naxye sa' li Santil Hu.

³ Yo chixch'olobanquil chiruheb nak li Cristo quixc'ul nabal li raylal jo' tenebanbil sa' xben ut quicuaci cui'chic chi yo'yo sa' xyankeb li camenak. Quixye reheb: —Li Jesús li yoquin chixyebal ere, a'an li Cristo laj Colonel, chan. ⁴ Cuanqueb aj judío que'paban ut que'cana chirochbeninquel laj Pablo ut laj Silas. Jo'can ajcui' que'xbanu nabaleb laj griego li neque'xlok'oni li Dios. Ut nabaleb li ixf li na'noqueb ru que'paban. ⁵ Ut eb laj judío li inc'a' que'paban, c'ajo' nak que'josk'o' xban xcakaleb xch'ol. Que'ratinha jun ch'utal li cuink inc'a' useb xna'leb li junes sa' be neque'cuan. Ut li jun ch'utal chi cuink a'an que'oc chixchik'bal xjosk'ileb li tenamit. Xban nak yoqueb xjosk'il, que'oc sa' rochoch laj Jasón chixsic'aleb laj Pablo ut laj Silas re te'xc'ameb chiruheb li tenamit. ⁶ Que'ril nak inc'a' que'xtau laj Pablo ut laj Silas. Que'xchap laj Jasón rochben cuib oxibeb laj pabanel ut que'xc'am chiruheb li neque'taklan sa' li tenamit. Japjoqueb re chixyebal: —Eb li cuink a'in, yoqueb chixpo'bal xch'oleb li tenamit sa' chixjunil li ruchich'och' ut anakcuan xe'chal arin chixpo'bal xch'oleb li katenamit. ⁷ Ut laj Jasón xc'uleb sa' rochoch. Yoqueb chixk'etbal lix chak'rab laj César li Acuabej. Yoqueb chixyebal nak cuan jun chic li rey, a'an li Jesús, chanqueb. ⁸ Li q'uila tenamit jo'queb ajcui' li neque'taklan sa' li tenamit que'sach xch'oleb chirabinquel li c'a'ru yoqueb chixyebal eb a'an. ⁹ Eb li neque'taklan sa' li tenamit que'xye reheb laj Jasón ut li rochben nak tento te'xtoj riq'un tunin li reliqueb. Ut nak ac xe'xc'ul li tunin, que'ach'abac laj Jasón ut eb li rochben.

Laj Pablo ut laj Silas que'xch'olob xyalal aran Berea

¹⁰ Sa' ajcui' li k'ojojin a'an eb laj pabanel li cuanqueb aran que'risi laj Pablo ut laj Silas sa' li tenamit a'an ut que'xtaklaheb toj Berea. Nak que'cuulac aran, que'coeb sa' li cab li neque'xch'utub cui' ribeb laj judío. ¹¹ Eb li cuanqueb aran Berea k'axal k'uneb xch'ol chiruheb li cuanqueb Tesalónica. Que'xc'ul chi sa sa' xch'oleb li ratin li Dios li yo chixyebal laj Pablo. Ut rajjal cutan que'xtzol sa' li Santil Hu re rilbal ma jo'can tana naxye. ¹² Nabaleb laj judío que'paban sa' xyankeb a'an. Cuanqueb ajcui' ixf aj griego xriinkaleb ru que'paban. Ut que'paban ajcui' nabaleb li cuink aj griego. ¹³ Que'rabi resil laj judío li cuanqueb Tesalónica nak laj Pablo yo chixjulticanquil li ratin li Dios aran Berea. Ut que'coeb aran chixpo'bal xch'oleb li tenamit. ¹⁴ A'ut eb laj pabanel sa' junpat que'xtakla laj Pablo chire li palau re nak txaic sa' jalán na'ajej. Aban laj Silas ut laj Timoteo toj que'cana Berea. ¹⁵ Eb li que'coeb chi canabanc re laj Pablo, que'xc'am toj sa' li tenamit Atenas. Nak que'suk'i Berea, laj Pablo quixtakla resil chirixeb nak laj Silas ut laj Timoteo te'xic Atenas chi junpat.

Laj Pablo quixch'olob xyalal chiruheb li tzolbileb li cuanqueb aran Atenas

¹⁶ Nak laj Pablo yo chirobeninquebleb laj Silas ut laj Timoteo sa' li tenamit Atenas, quixq'ue retal nak k'axal cui'chic nabaleb li yibanal Dios cuanqueb sa' li tenamit a'an. C'ajo' nak quiraho' sa' xch'ol. ¹⁷ Jo'can nak qui'oc chixch'olobanquil lix xyalal chi tz'akal chiruheb li tenamit sa' li cab li neque'xch'utub cui' ribeb laj judío jo'queb ajcui' li macua'eb aj judío li que'xlok'oni li Dios. Ut rajjal cutan quixch'olob li xyalal chiruheb li cuanqueb sa' c'ayil. ¹⁸ Cuanqueb cuink aj epicúreos ut eb aj estoicos xc'aba'eb li neque'xc'oxla nak k'axal cuan xna'lebeb. Eb a'an que'oc chixcuech'inquel rix li c'a'ru yo chixyebal laj Pablo. Ut yoqueb chixyebal: —¿C'a'ru yo chixyebal li cuink a'an li junes atinac naxbanu? Ut cuan cui'chic yoqueb chi yehoc re: —Jo' li xchal anchal xyebal resil jalani dios arin sa' katenamit, chanqueb. Que'xye chi jo'can xban nak laj Pablo yo chixch'olobanquil resil li colba'ib

sa' xc'aba' li Jesucristo jo' ajcui' chirixlix cuaclijiqueb cui'chic li camenak chi yo'yo. ¹⁹ Jo'can nak que'xc'am laj Pablo sa' li na'ajej li neque'xch'utub cui' ribeb li k'axal cuanqueb xna'leb. Areópago xc'aba' li na'ajej a'an. Ut que'xye re: —¿Ma tárulk taye ke c'a'ru xyalalliac' tijleb a'in li yocat chixyebal? ²⁰ Ma jun sut kabiom li na'leb a'in. Takaj takanau c'a'ru xyalal, chanqueb re. ²¹ Sa' eb li cutan a'an chixjunileb laj Atenas ut eb li jalaneb xtenamit li cuanqueb aran, mac'a' chic c'a'ak re ru neque'xc'osla. Ca'aj chic rabinquil ut atinac chirix li ac' na'leb neque'xbanu. ²² Ut laj Pablo quixakli chiruheb li cuanqueb sa' li na'ajej a'an, ut quixye reheb: —Ex cuink aj Atenas, yoquin chixq'uebal retal nak nequepab chixjunil li c'a'ak re ru. ²³ Nak yoquin chi béc sa' le tenamit xebinq'ue retal li c'a'ru nequelok'oni ut xintau ajcui' jun li artal tz'ib'anbil chiru "Re li Dios li Inc'a' Naubil Ru". Li Dios li nequelok'oni laex chi inc'a' nequenau ru, a'an ajcui' li yoquin chixch'olobanquil xyalal cheru. ²⁴ Ut a'an ajcui' li Dios, li quiyiban re li ruchich'och' ut chixjunil li c'a'ak re ru cuan. A'an laj échal re li choxa ut li ruchich'och'. A'an inc'a' nacuan sa' junak cab yib'anbil xban cuink. ²⁵ Chi moco a' ta li cuink naq'uehoc c'a'ak re ru re a'an. A'an ban naq'uehoc ke li kayu'am ut a'an naq'uehoc li kamusik'. A'an li naq'uehoc chixjunil li c'a'ru cuan. ²⁶ Riq'uin jun chi cuink quixyo'obtesi chixjunileb li cristian li cuanqueb sa' ruchich'och'. Ut a'an yal re jo' najtil te'cuank li junjunk sa' ruchich'och'. Ut a'an ajcui' quiq'uehoc re lix na'ajej li junjunk chi tenamit. ²⁷ Quixbanu chi jo'can re nak li junjunk te'xsic' li Dios ut märe te'xtau nak te'xsic'. Ut relic chi yal moco ch'a'aj ta xtaubal cui te'xsic' chi anchaleb xch'ol. ²⁸ A'an naq'uehoc kayu'am ut sa' xc'aba' a'an nak yo'yoco ut noco-ec'an. Jo' quixye jun laj bichanel sa' eyank: —Relic chi yal nak lao ralal xc'ajol li Dios, chan. ²⁹ Jo'can nak cui lao ralal xc'ajol li Dios, inc'a' naru takac'oxla nak li Dios chanchan ta li oro, malaj li plata chi moco li pec li yib'anbil yal riq'uin xc'a'ux ut xna'lebeb li cuink. ³⁰ Li Dios inc'a' quixq'ue sa' xbeneb li tenamit lix maqueb sa' eb li cutan nak inc'a' que'xtau ru li xyalal. Abanan anakcuan naxjultica chiruhel chixjunileb li tenamit nak te'xyot' xch'ol te'xjal xc'a'ux. ³¹ Li Dios ac xxakab jun li cutan re tarakok atin sa' xbeneb chixjunileb li cuanqueb sa' ruchich'och'. Ut quixxakab li ani tarakok atin sa' tiquilal. Quixc'ut chiku nak tz'akal yal xban nak quixcuaclesi cui'chic chi yo'yo sa' xyankeb li camenak, chan laj Pablo. ³² Nak eb li cuanqueb xna'leb que'rabi li yo chixyebal chirixlix cuaclijiqueb li camenak chi yo'yo, cuan que'se'en re ut cuan ajcui' que'yehoc re: —Takaj takabi cui'chic li c'a'ru yocat chixyebal sa' junak chic cutan, chanqueb. ³³ Ut chirix a'an, laj Pablo qui-el sa' xyankeb. ³⁴ Cuanqueb ajcui' li que'xc'ul xch'ol li quixye laj Pablo ut que'xpab li Jesús. Sa' xyankeb li que'pában cuan laj Dionisio. A'an jun reheb li que'taklan sa' li tenamit. Ut quipában ajcui' jun li ixx xDámaris xc'aba'. Ut cuanqueb ajcui' cuib oxib chic que'pában.

18

Eb laj pabanel li cuanqueb Corinto que'xtiquib xch'utubanquil ribeb chi lok'oninc

¹ Nak ac xc'ulman a'in, laj Pablo qui-el Atenas. Ut co Corinto. ² Ut aran quixtau jun li cuink aj judío. Aj Aquila xc'aba'. Ponto xtenamit. Inc'a' najter xc'ulunie Italia rochben lix Priscila li rixakil. Que'el aran Roma xban nak laj Claudio li Acuabej quixye nak chixjunileb laj judío te'elk sa' li tenamit a'an. Laj Pablo co chirula'anquileb. ³ Ut quicana rochbeneb chi c'anjelac xban nak juntak'et li c'anjel neque'xbanu. Neque'yiban t'icr re muhebal. ⁴ Sa' li hilobal cutan rajlal naxic laj Pablo sa' li cab li neque'xch'utub cui' ribeb laj Judío.

Aran quiqtinac riq'uineb ut quixch'olob xyalal chiruheb laj judío jo'queb ajcui' li mācua'eb aj judío. ⁵ Nak ac xe'suk'i chak laj Silas ut laj Timoteo Macedonia, laj Pablo quixk'axtesi rib chi junaj cua chixch'olobanquil lix yalal reheb laj judío nak li Jesús, a'an li Cristo, laj Colonel li yech'inbil xban li Dios. ⁶ Abanan eb a'an inc'a' que'cuulac chiru li yo chixyebal laj Pablo. Que'oc chi majecuanc. Jo'can nak laj Pablo quixchik'chik'i lí rak' ut quixye reheb: —Cui laex inc'a' texcolek', a' yal ere. Sa' eben laex cuan li māc. Lain māc'a' inmāc xban nak ac xinye ere li xyalal. Chalen anakcuan lain tinch'olob xyalal reheb li mācua'eb aj judío, chan. ⁷ Jo'can nak laj Pablo quiel sa' xyankeb ut co chi cuanc sa' rochoch jun li cuink mācua' aj judío. Aj Justo xc'aba'. Li cuink a'an naxlok'oni li Dios. Li rochoch cuan chixc'atk li cab li neque'xch'utub cui' ribeb laj judío. ⁸ Laj Crispo, li nac'amoc be sa' li cab li neque'xch'utub cui' ribeb, quixpab Li Kacua' rochbeneb li cuanqueb sa' li rochoch. Nabaleb aj Corinto que'pāban nak que'rabi resil li colba-ib. Ut que'cubsic xha'eb. ⁹ Sa' jun li k'ojojin li Kacua' quixc'utbesi jun li visión chiru laj Pablo ut quixye re: —Matxucuac chi atinac. Ch'olob ban li xyalal chiruheb li tenamit. ¹⁰ Lain cuankin acuiq'uin. Mā ani tabanunk raylal acue xban nak nabaleb li cualal inc'ajol sa' li tenamit a'in, chan li Dios re laj Pablo sa' li visión. ¹¹ Jo'can nak laj Pablo quicana aran jun chihab riq'uin cuakib po ut yo chixch'olobanquil xyalal li rātin li Dios chiruheb.

Laj Galión li cuan chi taklanc aran Acaya quixye nak laj Pablo mac'a' xmāc

¹² Nak laj Galión cuank chi taklanc aran Acaya, eb laj judío que'xc'ub ru chi ribileb rib nak te'xchap laj Pablo. Que'xchap ut que'xc'am sa' popol re nak tarakek' atin sa' xben. ¹³ Ut que'xye: —Li cuink a'in yo chixyebal reheb li tenamit chanru nak te'xlok'oni li Dios. Li na'leb li naxye a'an, moco naxc'uluban ta li chak'rab, li q'uebil ke xbaneb laj Roma, chanqueb. ¹⁴ Oc raj re chi atinac laj Pablo nak quichak'oc chak laj Galión ut quixye reheb laj judío: —Ex aj judío, cui ta xk'et xchak'rabebe laj Roma malaj ut cui ta cuan junak inc'a' us xbanu, tento raj tinch'i-ch'i'i cuib cherabinquil. ¹⁵ Abanan cui yal chirix atinac ut c'aba'ej ut chirix le chak'rab yoquex chi jitoc chirix, tento nak laex tésic' xyalal. Lain inc'a' nacuaj rakoc aṭin chirix li c'a'ak re ru a'in, chan. ¹⁶ Ut quirisiheb sa' li popol. ¹⁷ Eb laj griego que'xchap laj Sóstenes li nataklan sa' li cab li neque'xch'utub cui' ribeb laj judío. Que'xsac' ut que'xtacuasi chiru li popol ut laj Galión māc'a' quixye.

Laj Pablo quisuk'i cui'chic Antioquía ut co cui'chic rox sut chirula'aninquileb laj pabanel

¹⁸ A'ut laj Pablo toj quicana aran nabal cutan. Tojo'nak quixchak'rabiheb laj pabanel ut qui-el. Co chiru ha' toj Siria rochbeneb lix Priscila ut laj Aquila. Aran sa' li tenamit Cencrea quixbes li rismal. A'an retalil nak quixbanu li c'a'ru quixyechi'i re li Dios. ¹⁹ Nak que'cuulac Efeso laj Pablo quixcanabeb lix Priscila ut laj Aquila ut co sa' li cab li neque'xch'utub cui' ribeb laj judío chixch'olobanquil lix yalal chiruheb laj judío. ²⁰ Ut eb a'an que'xtz'ama chiru nak toj taçanak chic ca'ch'inak riq'uineb. Abanan laj Pablo inc'a' quixsume canac. ²¹ Quixchak'rabiheb ban ut quixye reheb: —Tento nak tinxic chixnumsinquil li nink'e Jerusalén xban nak cuulac re xk'ehil. Lain tinchalk cui'chic eriq'uin cui jo'can naraj li Dios, chan. Ut qui-el aran Efeso. ²² Nak quicuulac Cesarea, co Jerusalén. Ut nak ac xq'ueheb xsahil xch'oleb laj pabanel, co Antioquía. ²³ Inc'a' najt quicuan aran nak co ut quinume' sa' eb li na'ajej Galacia ut Frigia ut yo chixq'uebal xcacuial xch'oleb laj pabanel.

Laj Apolos quixch'olob xyalal nak li Jesús, a'an li Cristo

²⁴ Quicuulac Efeso jun li cuink aj judío, aj Apolos xc'aba'. Alejandría xtenamit. K'axal naxnau atinac chi chabil ut naxnau chi us li tz'ibánbil sa' li Santil Hu. ²⁵ Quixtzol rib chi us ut naxnau chanru xpábanquil resil li Kacua'. Ut quixq'ue xch'ol chi atinac chi tz'akal xch'olobanquil resil li Jesús, usta ca'aj cui' quixnau chirix li cubi ha' li quixbanu laj Juan. ²⁶ Qui-oc chi atinac chi cau xch'ol sa' li cab li neque'xch'utub cui' ribeb laj judío. Nak que'rabi lix Priscila ut laj Aquila li yo chixyebal, que'risi xjunes laj Apolos ut que'xch'olob li xyalal chi tz'akal chiru. ²⁷ Nak ac yo xc'oxlanquil xic laj Apolos aran Acaya, eb laj pabanel que'xq'ue xcacuul xch'ol re taxic. Ut que'xtz'iba jun li hu ut que'xtakla reheb laj pabanel li cuanqueb aran. Que'xye reheb nak te'xc'ul chi sa sa' xch'ol. Ut nak quicuulac aran, laj Apolos quixtenk'aheb chi chabil li ac xe'paban xban rusilal li Dios. ²⁸ Ut quiratinahéb laj judío chi cau xch'ol chiruheb chixjunileb li tenamit. Ut quixch'olob xyalal chiruheb chi tz'akal nak li Jesús, a'an li Cristo, jo' tz'ibánbil sa' li Santil Hu.

19

Eb lix tzolom laj Juan que'xc'ul li Santil Musik'ej aran Efeso

¹ Nak laj Apolos cuan Corinto laj Pablo quinume' sa' eb li na'ajej toj quicuulac Efeso. Ut aran quixtauheb jun ch'utaleb laj pabanel. ² Quixye reheb: —¿Ma quec'ul li Santil Musik'ej nak quexpaban? chan laj Pablo reheb. Ut eb a'an que'xye: —Inc'a' nakanau nak cuan ta li Santil Musik'ej, chanqueb. ³ Ut laj Pablo quixye reheb: —¿Chanru nak quicubsc' eha'? Eb a'an que'xye: —Li cubi ha' li xkac'ul, a'an li quixbanu laj Juan, chanqueb. ⁴ Laj Pablo quixye reheb: —Laj Juan quixcubsiheb xha' li que'xyot' xch'ol ut que'xjal xc'a'ux. Quixye reheb nak te'pabank sa' xc'aba' li Jesucristo li tol-elk mokon, chan. ⁵ Nak que'rabi a'an, que'xtz'ama li cubi ha' ut quicubsc' xha'eb sa' xc'aba' li Kacua' Jesús. ⁶ Laj Pablo quixq'ue li ruk' sa' xbeneb ut que'xc'ul li Santil Musik'ej. Que'atinac sa' jalan atinobal ut que'xye resil li c'a'ru quic'utbesic chiruheb xban li Dios. ⁷ Cuanqueb tana cablaju chi cuink li que'paban sa' xyankeb.

Eb laj pabanel que'xtiquib xch'utubanquil ribeb chi lok'oninc aran Efeso

⁸ Chiru oxib po laj Pablo quixch'olob li xyalal chiruheb laj Efeso chi mac'a' xxiu sa' li cab li neque'xch'utub cui' ribeb laj judío. Quixyal xk'e xc'utbal chi tz'akal lix yalal lix nimajcual cuanquilar li Dios. ⁹ Cuanqueb li que'xcacuubresi xch'oleb ut inc'a' que'raj pabanc. Que'oc chixmajecuanquil li evangelio chiruheb chixjunileb. Jo'can nak laj Pablo quixcanab xch'olobanquil li xyalal aran sa'li cab li neque'xch'utub cui' ribeb laj judío. Ut quixc'ameb laj pabanel chirix. Rajlal cutan quixc'ut li xyalal chiruheb sa'li cab li natzoloc cui' jun li cuink aj Tirano xc'aba'. ¹⁰ Cuib chihab quixbanu chi jo'ca'in. Ut chixjunileb li cuanqueb Asia, eb laj judío, jo'eb ajcu'li mācu'a'eb aj judío, que'rabi li ratiñ li Kacua' Jesús. ¹¹ Ut li Kacua' Dios quixq'ue xcuauquil laj Pablo chixbanunquil li sachba ch'olej. ¹² Usta ca'aj cui' lix t'icr ut lix sut laj Pablo neque'xq'ue sa' xbeneb li yaj, neque'q'uira. Ut neque'el li māus aj musik'ej riq'uineb. ¹³ Cuanqueb aj judío neque'xye nak neque'xnau ris-inquileb li māus aj musik'ej ut neque'xbeni ribeb chixbanunquil. Que'xal xpatz'bal xc'aba' li Kacua' Jesús sa' xbeneb li cuan māus aj musik'ej riq'uineb ut que'xye: —Sa' xc'aba' li Jesús li naxjultica laj Pablo, tinye ere elenkek riq'uin li cuink a'an, chanqueb. ¹⁴ Cuukubeb chi cuink li yoqueb chi banunc re a'in. Ralaleb jun li cuink aj judío, aj Esceva xc'aba'. A'an li xbenil aj tij.

15 Sa' jun li cutan jun li mäus aj musik'ej quichak'oc ut quixye reheb: — Ninnau ani li Jesús, ut ninnau ajcui' ani laj Pablo. Ut läex, ¿anihex? Ut ¿ani xq'uehoc ecuanquil chi isinc mäus aj musik'ej? chan reheb. **16** Li cuink li cuan mäus aj musik'ej riq'uin, quixcut rib sa' xbeñeb. A'an k'axal cui'chic cau rib chiruñeb. Tacuasimbileb ut pejeleb chic li rak'eb nak que'elelic sa' li cab a'an. **17** Chixjunileb li cuanqueb Efeso que'rabi resil li c'a'ru quic'ulman, yo' aj judío jo' eb ajcui' li macua'eb aj judío. Quichal xxiuheb chixjunileb ut k'axal cui'chic que'xq'ue xllok'al li Kacua' Jesús. **18** Ut nabaleb li que'paban que'chal ut que'xxoto líx maqueb chiru li Dios chiruñeb chixjunileb li cuanqueb aran. **19** Nabaleb laj tul que'chal ut que'xc'am chak líx huheb li nac'anjelac chiruñeb re tulac ut que'xc'at chiruñeb chixjunileb li tenamit. Nak que'xbir rix líx tz'ak chixjunil li que'xc'at, qui-el lajeb roxc'al mil (50,000) chí tumin plata. **20** Ut li rätin li Kacua' yo' chi elc resil yalak bar ut yo' ajcui' chi c'utunc xcuánquil li Dios. **21** Nak ac xnume' chixjunil a'in, laj Pablo quixc'oxla xic toj Jerusalén, nak acak xbeni chak Macedonia ut Acaya. Quixye: —Nak acak xinnume' aran, tento ajcui' tinxic Roma chirilbaleb laj pabanel li cuanqueb aran, chan. **22** Jo'can nak quixtaklaheb Macedonia laj Timoteo ut laj Erasto, li neque'tenk'an re. Ut laj Pablo toj quicana aran Asia.

Laj tenol ch'ich' xic' que'rabi li c'a'ru quixye laj Pablo

23 Ut sa' eb li cutan a'an quiticla jun nimla ch'a'ajquidal xban nak nabaleb yoqueb chixpabanquil li Dios. **24** Jun li cuink aj tenol plata, aj Demetrio xc'aba'. A'an naxyib riq'uin plata li coc' ochoch re líx Diana líx dioseb. Ut nabal li tumin neque'xc'ul li neque'trabajic rochben. **25** Quixch'utubeb chixjunileb li neque'c'anjelac chiru jo'queb ajcui' chixjunileb laj tenol plata ut quixye reheb: —Läex nequenau nak riq'uin li c'angel a'in nakabánu, nakac'ul nabal li katumin. **26** Ac erabiom resil nak laj Pablo ac xtacchi'i nabaleb li cuanqueb aran Efeso jo' ajcui' sa' chixjunil li tenamit xcuent Asia. Ac nequenau nak yo' chixyebal reheb nak moco dioseb ta li yal yibanbil xban cuink. **27** Mare anchal tásachk li kac'angel xban a'an. Ut mare anchal tatz'ektanak ajcui' xllok'al li rochoch líx Diana li kalok'laj dios. Mare tásachk líx cuanquinal li kadios li neque'xllok'oni chixjunileb aran Asia, jo' ajcui' li cuanqueb sa' chixjunil li ruchich'och', chan laj Demetrio. **28** Ut eb li ch'utch'queb aran c'ajo' nak que'josk'o' nak que'rabi li c'a'ru quixye. Que'xjap reheb chixyebal: —¡Nim xcuánquil líx Diana li kadios lão aj Efeso! chanqueb. **29** C'ajo' nak que'josk'o' li tenamit. Inc'a' chic jultiqueb re c'a'ru neque'xbánu. Jun xiquiqueb nak coeb chixsic'bal laj Gayo ut laj Aristarco li que'chal chak Macedonia rochben laj Pablo. Ut quelonbileb nak que'c'ame' toj sa' li na'ajej li neque'xch'utub cui' ribeb. **30** Ut laj Pablo quiraj raj xic chi atinac riq'uineb li tenamit, abanan eb laj pabanel inc'a' que'xcanab chi xic. **31** Cuanqueb cuib oxib li ramig laj Pablo li neque'c'amoc be sa' li tenamit. A'aneb áj Roma. Eb a'an que'xtakla xyebal re laj Pablo nak inc'a' taxic sa' li na'ajej li neque'xch'utub cui' ribeb li tenamit. **32** Chixjunileb li que'xch'utub ribeb aran yoqueb chixjapbal reheb ut inc'a' chic jultiqueb re li c'a'ru neque'xye. Líx q'uialeb li tenamit inc'a' que'xnau c'a'ut nak que'xch'utub ribeb aran. **33** Ut que'risi sa' xyänkeb li tenamit laj Alejandro. A'an quixtaksi li ruk' re te'xcanab chokinc. Quiraj raj atinac re xcolbal rib chiruñeb li tenamit. **34** Nak que'r'il nak a'an aj judío junaj xyab xcueb chixjunileb chixyebal: —¡Nim xcuánquil líx Diana li kadios lão aj Efeso! chanqueb. Ut ca'ch'in chic ma cuib or que'xjap reheb chixyebal a'an. **35** Nak

ac xk'unbesiheb li tenamit laj tz'ib li nac'anjelac sa' popol, quixye reheb: — Laex aj Efeso, ¿ma cuan ta bi' junak inc'a' naxnau nak li katenamit Efeso, a'an li nac'ac'alen re li rochoch lix Diana, li kalok'laj dios? Chixjunileb neque'xnau nak li jalam uch a'an chalenak chak sa' choxa. ³⁶ Li kadios inc'a' taruk xsachbal ru. Jo'can nak meq'ue ejosk'il. C'oxlahomak rix chi us li c'a'ru tebanu. ³⁷ ¿C'a'ut nak xec'ameb chak li cujink a'in arin? Eb a'an inc'a' yoqueb chixmuxbal ru le dios, chi moco yoqueb ta chixmajecuanquil. ³⁸ Cui ut laj Demetrio ut eb laj tenol ch'ich' li neque'c'anjelac riq'uin cuan junak ani te'xjit, teto li popol ut cuanqueb aj rakol atin. Te'jitol aran re nak taruk tayibak ru lix ch'a'ajquilaleb. ³⁹ Cui ut teraj xc'ubanquil junak c'a'ak re ru, takach'utub kib ut sa' xyalal takac'ub ru. ⁴⁰ Anakcuan xiu xiu cuanco. Cui nocoe'xjit riq'uin li mululij ib yoco, ut cui eb laj Roma li neque'taklan sa' kab'en te'xpatz' ke c'a'ut nak yoco chixmululinquil kib, mac'a' naru takacol cui' kib, chan. ⁴¹ Ut nak quirake' chixyebal a'in, quixchak'rabiheb li tenamit.

20

Laj Pablo co Macedonia ut Grecia

¹ Ut nak ac xnume' li mululij ib, laj Pablo quixbokeb laj pabanel riq'uin. Quixq'ueheb xna'leb, quixk'aluhed, quixchak'rabiheb ut co' Macedonia. ² Nak ac xrula'aniheb li cuanqueb sa' li na'ajej Macedonia, ut nak ac xq'ueheb xna'leb chi chabil, co aran Grecia. ³ Oxib po quicuan aran Grecia ut xic raj re Siria chiru ha' nak quirabi resil nak eb laj judío te'xram sa' xbe. Jo'can nak co cui'chic Macedonia. ⁴ Qui-ochbenic toj Asia xbaneb laj Sópater li ralal laj Pirro, Berea xtenamit; laj Aristarco ut laj Segundo, Tesalónica xtenamiteb; ut laj Gayo, Derbe xtenamit; rochbeneb laj Timoteo, laj Tíquico ut laj Trófimo, Asia xtenamiteb. ⁵ Eb a'an coeb chi ubej ut aran Troas coe'roybeni. ⁶ Lao toj kanumsi li nink'e nak nacua'e' li caxlan cua mac'a' xch'amal. Chirix a'an co aran Filipos chiru ha'. Nak ac xnume' ob cutan coxe'katau aran Troas, ut cocana cuukub cutan aran. ⁷ Ut sa' xben li cutan re li xaman, ch'utch'iqueb laj pabanel chi cua'ac sa' comonil. Laj Pablo yo chixtzolbaleb. Ac cuulajak naxic. Tuktu k'ojojin toj yo chi atinac. ⁸ Cuanqueb nabal li xam lochloqueb sa' li na'ajej bar ch'utch'uco cui' toj sa' xben li cab. ⁹ Jun li saj al, aj Eutico xc'aba', c'ojc'o sa' li ventana. Xban nak quinajto' k'ojojin laj Pablo chi atinac, quicube xcuara laj Eutico, ut quit'an'e' chak sa' rox tasal li cab. Toj tak'a quinak. Ut camenak chic nak que'xcuaclesi. ¹⁰ Laj Pablo quicube tak'a, quixc'utzub rib sa' xben li al, quixk'alu ut quixye reheb: —Meq'ue ec'a'ux. Yo'yo, chan. ¹¹ Quitake' cui'chic, quixjachi li caxlan cua, ut que'cua'ac. Ut qui-oc cui'chic chi atinac. Ac xsakeu chic nak quixcanab atinac. Chirix a'an qui-el sa' xyankeb ut co. ¹² Ut li al yo'yo nak que'xc'am. Ut c'ajo' nak quisaho' sa' xch'oleb. ¹³ Lao coo toj Asón chiru ha' chixc'ulbal laj Pablo. A'an co chi ch'och'el xban nak jo'can quiraj. ¹⁴ Nak cocuulac Asón kanume'c'am laj Pablo ut coo Mitilene. ¹⁵ Sa' xcab li cutan coo chiru ha' ut cocuulac sa' xca'yabal Quío. Jo' cuulajak chic co-el aran ut cocuulac aran Samos. Ut coxohilank sa' li tenamit Trogilio. Toj sa' li cutan jun chic cocuulac Miletto. ¹⁶ Laj Pablo ac cuan sa' xch'ol nak inc'a' tanumek' Efeso re nak inc'a' tąbayk Asia. Yo' chixsebanquil rib xban nak taraj cuanc sa' li nink'e Pentecostés aran Jerusalén.

Laj Pablo quixchak'rabiheb li neque'c'amoc be sa' xyankeb laj pabanel aran Efeso

¹⁷ Nak toj cuan Mileto quixtakla chak xbokbaleb li neque'c'amoc be sa' xyānkeb laj pābanel aran Efeso re te'xic riq'uin. ¹⁸ Ut nak que'cuulac riq'uin aran Mileto, quixye reheb: —Laex nequenau nak chalen cuoquic Asia sa' xyalal cuanquin sa' eyank. ¹⁹ Nak yoquin chi c'anjelac chiru li Kacua' quīncubsi incuanquil ut quinyābac xban li raylal ut li yalec li quichal sa' inben xbaneb laj judío. ²⁰ Lain xinch'olob chi tz'akal li xyalal cheru. Mac'a' xinmuk cheru. Quinch'olob ban xyalal chiruheb li tenamit jo' ajcui' sa' ēb li cab. ²¹ Yoquin chixjulticanquil chiruheb laj judío ut chiruheb li mācua'eb aj judío, nak te'xyot' xch'ol ut te'xjal xc'a'ux chiru li Dios ut te'pābānk sa' xc'aba' li Kacua' Jesucristo. ²² Anakcuan tenebanbil sa' inben xban li Santil Musik'ej xic Jerusalén. Ut inc'a' ninnau c'a'ru tinc'ul aran. ²³ Ca'aj cui' ninnau nak li Santil Musik'ej quixc'ut chicuu nak sa' li junjunk chi tenamit tinnumek' cui', tinc'ul raylal ut tine'xq'ue sa' tz'alam. ²⁴ Abanan lain māc'a' ninxucua, chi moco ninra lin yu'am chok' cue injunes. Abanan nacuaj nak tinchoy lin c'anjal chi sa sa' inch'ol. Ut ninnau nak taklanbilin xban li Kacua' Jesús chixyebal resil li evangelio li quixq'ue li Dios xban li rusilal. ²⁵ Lain xinch'olob chak xyalal lix nimajcual cuanquilal li Dios sa' eyank laex. Ut ninnau ajcui' nak mā jun chic ere laex tailok cuu. ²⁶ Jo'can nak anakcuan lain ninye ere nak lajin māc'a' inmac cui laex inc'a' texcolek', ²⁷ xban nak ac xinch'olob chi tz'akal re ru li na'leb li taklanbilin cui' xban li Dios. ²⁸ Jo'can nak ilomak ərib chi us laex ut ilomakeb laj pābanel li xe'q'uehe' cheril xban li Santil Musik'ej, li quixlok'eb riq'uin lix lok'laj quiq'uel. Cherilak laj pābanel jo' nak naril chi us llix carner li pastor. ²⁹ Lain ninnau nak tinelk sa' eyank, chanchanakeb laj xoj nak te'chālk li jalaneb xna'leb chixpo'bal ru le pabal. Eb a'an inc'a' te'r'il xtok'obal eru. ³⁰ Ut sa' eyank ajcui' laex cuankeb li te'oc chixyebal c'a'ak re ru inc'a' yal re xk'unbesinquileb laj pābanel re te'xic chirixeb. ³¹ Yo'on cuānkex ut chijulticok' ere nak chiru oxib chihab, chi k'ek chi cutan yoquin chi yābac ut inc'a' xinhilan chixch'olobanquil ena'leb chejunjunkal. ³² Anakcuan ut ex herman, texink'axtesi sa' ruk' li Dios ut li ratin li quixq'ue chak ere xban lix rahom chitenk'ank ere chi q'ujc sa' le pabal. Ut a'an ajcui' taq'uehok ena'aj sa' xyānkeb li sic'bileb ru xban li Dios. ³³ Laex nequenau nak lajin inc'a' xinrahi ru lix tumin jalan, chi moco lix biomal, chi moco li rak'eb. ³⁴ Ut nequenau ajcui' nak lain xinc'anjelac riq'uin cuuk' re xsic'bal li c'a'ru cue jo' ajcui' li c'a'ru reheb li cuanqueb cuochben. ³⁵ Riq'uin chixjunil li xinbānu, xinc'ut cheru chanru xtenk'anquileb li te'raj tenk'ac. Chijulticok' ke li quixye li Kacua' Jesús: K'axal us li q'uehoc chiru li c'uluc, chan. ³⁶ Ut nak quirake' chixyebal chixjunil a'in, laj Pablo quixcuik'ib rib ut qui-oc chi tijoc rochbeneb chixjunileb. ³⁷ C'ajo' nak que'yabac chixjunileb. Que'xk'alu laj Pablo ut que'rutz' ru. ³⁸ C'ajo' xrahil que'rec'a nak que'rabi li atin li quixye laj Pablo nak inc'a' chic te'r'il ru. Ut nak co, coxe'xcanab chak chire li palau cuan cui' li jucub.

21

Eb laj pābanel que'xye re laj Pablo nak inc'a' raj taxic Jerusalén

¹ Nak coe'xcanab laj pābanel chire ha', co-oc sa' li jucub ut coo toj Cos. Ut sa' xcab li cutan cocuulac Rodas. Chirix chic a'an, cocuulac Pátara. ² Aran quikatau jun li jucub xic re Fenicia. Co-oc chi sa' ut coo. ³ Nak yoco chi xic Siria conume' sa' xjatal li tenamit Chipre, li nacana sa' katz'e. Chirix chic a'an cocuulac Tiro ut aran quicanaban ik li jucub. ⁴ Aran katauheb cuib oxib laj pābanel ut cocana cuukub cutan riq'uinieb. Ut eb laj pābanel que'xye

re laj Pablo nak quic'ute' chiruheb xban li Santil Musik'ej nak inc'a' t̄xic Jerusalén. ⁵ Nak ac xnume' li cuukub cutan, co-el sa' li tenamit Tiro ut coo. Ut que'coeb laj pabanel chickacanabanquil rochbeneb li rixakil ut lix coc'aleb. Nak cocuulac chire li palau, cocuik'la ut co-oc chi tijoc. ⁶ Nak corake' chi tijoc, quikachak'rabiheb ut coo sa' li jucub. Ut eb a'an que'suk'i cui'chic sa' li rochocheb. ⁷ Nak cocuulac Tiro corake' chi b̄ec chiru ha' ut coo sa' li tenamit Tolemaida. Quikaq'ue xsahil xch'gleb laj pabanel li cuankeb aran ut cocana jun cutan riq'uineb. ⁸ Jo' cuulajak chic coo Cesarea. Nak cocuulac aran, coo sa' rochoch laj Felipe laj yehol resil li colba-ib. A'an jun reheb li cuukub li que'siq'ue' ruheb Jerusalén re te'xtenk'aheb li apóstol. ⁹ A'an cuan cahib xarbin toj tuk' ixeb. Eb li xka'al a'an neque'yehoc ratin profeta. ¹⁰ Ac cuan cutan kacuulajic aran Cesarea nak quicuulac jun profeta quichal chak Judea, aj Agabo xc'aba'. ¹¹ Li cuink a'an quicuulac chikilbal. Quixchap lix c'amal xsa' laj Pablo. Quixbac'li ruk' ut li rōk riq'uin. —Jo'ca'in xc'ut chicuu li Santil Musik'ej, chan. —Laj echal re li c'amal sa' a'in tābaq'uek'li ruk' ut li rōk xbaneb laj judío aran Jerusalén ut tāk'axtesik sa' ruk'eb li macua'eb aj judío, chan. ¹² Nak quikabi li c'a'ru quixye, lao ut eb li cuankeb aran quikatz'ama chiru laj Pablo nak inc'a' t̄xic Jerusalén. ¹³ Abanan laj Pablo quichak'oc ut quixye ke: —¿C'a'ut nak yoquex chi yabac ut chixq'uebal xrahil inch'ol? Lain cau inch'ol, moco ca'aj cui' ta re tinbaq'uek'. Re ej ban cui' nak tincamsik aran Jerusalén sa' xc'aba' li Kacua' Jesú, chan. ¹⁴ Lao inc'a' coru chixjalbal ru lix c'a'ux laj Pablo. Jo'can nak mac'a' chic kaye re. Chi-uxk ta jo' naraj li Kacua', chanco.

Laj Pablo co Jerusalén chiribal laj Jacobo li nac'amoc be chiruheb laj pabanel

¹⁵ Chirix chic a'an quikacauresi kib ut coo Jerusalén. ¹⁶ Cuanqueb aj pabanel aj Cesarea coeb chickix. Quikac'ameb sa' li rochoch laj Mnasón Chipre xtenamit. Ac najter aj pabanel. Ut aran cohilan. ¹⁷ Nak cocuulac Jerusalén, eb laj pabanel coe'xc'ul chi saheb sa' xch'ol. ¹⁸ Jo' cuulajak chic laj Pablo co chiribal laj Jacobo ut lao coo chirix. Ac ch'utch'uequeb aran chixjunileb li neque'c'amoc be sa' xyank'eb laj pabanel. ¹⁹ Ut nak ac xq'ueheb xsahil xch'ol, laj Pablo quixserak'i reheb chixjunil li quixbanu li Dios sa' xyank'eb li macua'eb aj judío nak yo chi c'anjelac sa' xyank'eb. ²⁰ Nak que'rabi a'in que'xbantioxi chiru li Dios. Ut que'xye re laj Pablo: —Laaat nacacuil, at herman, jarub mil eb laj judío ac xe'pabán. Ut chixjunileb a'an neque'xq'ue xch'ol chixbanunquil li naxye li chak'rab. ²¹ Ac xe'rabi resil nak laat yocat chix'utbal chiruheb laj judío, li cuankeb sa' xyank'eb li macua'eb aj judío, nak inc'a' te'xbanu li circuncisión reheb li ralal xc'ajol, chi moco te'xbanu li c'a'ru c'aynak'eb xbanunquil laj judío. ²² ¿C'a'ru takabánu? Anakcuan te'rabi resil nak laat cuancat arin. ²³ Banu li c'a'ru yoco chixyebal acue. Cuanqueb cahib chi cuink sa' kayank te'rakek' xbanunquil li c'a'ru que'xyechi'i chiru li Dios. ²⁴ C'ameb li cuink a'in chacuix. Acuochbenakeb nak tābanu li c'a'ru tento xbanunquil xban nak ac xe'rakek' xbanunquil li c'a'ru que'xyechi'i chiru li Dios. Tach'ajobresi acuib laat ut taq'ue chi besec'li rismaleb ut tatoj lix besbaleb. Chi jo'can te'xq'ue retal nak moco yal ta li yoqueb chixyebal chacuix. Banu chi jo'can re nak te'xnau nak inc'a' yocat chixk'etbal li chak'rab. ²⁵ Ac xotz'ibac riq'uineb li que'pabán sa' xyank'eb li macua'eb aj judío. Ac xkatakla xyebal reheb nak inc'a' tento te'xbanu li circuncisión. Li c'a'ru tento te'xbanu, a'an a'in: inc'a' naru te'xtzaca li tzacaemk mayejanbil chiruheb li yibanbil dios, chi moco te'xtzaca li quic', chi moco te'xtiu xtibel li yatz'bil xul.

Ut inc'a' te'co'b̄etak te'yumbetak, chanqueb re laj Pablo. ²⁶ Cuulajak chic laj Pablo quixc'ameb li cahib chi cuink chirix. Ut quixch'ajobresi rib rochbeneb nak qui-oc sa' li templo chixyebal reheb c'a'ru cutanquil te'xq'ue lix mayej li junjunk re nak tatz'aklok ru li xch'ajobresinquel ribeb li que'xbanu.

Laj Pablo quichape' sa' li templo xbaneb laj c'amol be sa' xyankeb laj Judío

²⁷ Nak ac numec' re li cuukub cutan, cuanqueb laj judío que'chal chak Asia. Nak que'r'il laj Pablo sa' li templo, que'josk'o' ut que'xtiquib jun li ch'a'ajquibal sa' li tenamit ut que'xchap laj Pablo. ²⁸ Japjoqueb re chixyebal: —Ex aj Israel, choetenk'a. A'an a'in li cuink li napo'oc xna'lebeb li tenamit yalak bar chixtz'ektananganquil li katenamit, jo' ajcui' li chak'rab li quixq'ue ke laj Moisés. Ut naxtz'ektana li templo a'in. Jo' cui' anchal xrocsieb li macua'eb aj judío sa' li templo ut riq'uin a'an, xmux ru li Santil Na'ajej, chanqueb. ²⁹ Que'xye a'an xban nak que'r'il ru laj Trófimo aj Efeso chirochbeninquel sa' li tenamit. Sa' xch'oleb a'an nak laj Pablo qui-ocsin re laj Trófimo sa' li templo. ³⁰ Jo'can nak k'axal cui'chic quichal xjosk'ileb li tenamit. Japjoqueb re nak que'xchap laj Pablo ut quelonbil que'xbanu re, nak que'risi sa' li templo. Ut que'xtz'ap li oquebal chi junpat.

Eb laj Roma que'xcol laj Pablo chiruheb laj judío

³¹ Oqueb raj re chixcamsinquel nak quiyehé' chak re li coronel nak chixjulin li tenamit Jerusalén yoqueb chixmululinqul ribeb xbaneb xjosk'il. ³² Ut li coronel quixc'ameb nabal li soldado chirix jo' ajcui' li cuanqueb xcuanquinal sa' xbaneb li soldado, ut coeb sa' anil bar ch'utch'uequeb cui' li tenamit. Nak li tenamit que'r'il li coronel rochbeneb chak li soldado, que'xcanab xtacuasinqul laj Pablo. ³³ Ut li coronel quixchap laj Pablo. Quixtakla xbac'bal riq'uin cuib chi cadena. Ut quixpatz' ani a'an ut c'a'ru xmac. ³⁴ Ut li tenamit jalan jalank yoqueb chixyebal ut inc'a' nach'ola ru li c'a'ru yoqueb chixyebal. Li coronel quiril nak inc'a' quixtau c'a'ru tz'akal xmac. Quixtakla xcanabanquil laj Pablo sa' li cuartel. ³⁵ Nak que'cuulac cuan cui' li gradas, pakpo nak quic'a'me' xbaneb li soldado xban nak li tenamit yoqueb xjosk'il sa' xben ut inc'a' neque'xcanab chi numec'. ³⁶ Li q'uila tenamit yoqueb chi xic chirixeb ut japjoqueb re chixyebal: —¡Camsihomak li cuink a'an! chanqueb.

Laj Pablo quiatina re xcolbal rib

³⁷ Nak ac oqueb re chirocsinquel sa' li cuartel laj Pablo, quixye re li coronel: —¿Ma taruk tatcuatina junpaqtak? — Ut li coronel quixye: —Nacanau pe' atinac sa' li atinobal griego. ³⁸ ¿Ma macua' laat li cuink laj Egipto li qui-tiquiban jun ch'a'ajquibal inc'a' mas najter? ¿Ma macua' laat cat' amoc reheb li cahib mil chi cuink aj camsinel sa' li chaki ch'och? chan. ³⁹ Quichak'oc laj Pablo ut quixye: —Inc'a'. Lain aj judío. Yo'lajenakin sa' li tenamit Tarso li cuan xcuent Cilicia. Na'no ru lin tenamit. Tintz'ama chacuu nak tinacanab chiratinanquileb li tenamit, chan. ⁴⁰ Ut nak quiq'uehe' xlesens chi atinac xban li coronel, laj Pablo quixakli sa' li gradas. Quixtaksi li ruk' re nak te'xcanab chokinc. Ut nak que'xcanab chokinc, laj Pablo qui-oc chi atinac sa' ratinobaleb laj judío ut quixye reheb:

22

¹ Ex cuas cuitz'in, ut laex li nequex'amoc be sa' xyankeb laj judío. Abihomak li tinye ere anakcuan re xcolbal cuib, chan. ² Que'rabi nak yo chiratinanquileb sa' ratinobaleb. Que'xcanab chokinc ut que'rabi li c'a'ru quixye. Ut laj Pablo qui-oc chi atinac. ³ —Relic chi yal nak lain aj judío. Yo'lajenakin Tarso xcuent Cilicia. Ut arin quinqui'li Jerusalén. Quintzol cuib

riq'uin laj Gamaliel chirix li chak'rab li quiq'uehe' chak reheb li kaxe'tonil yucua'. Chi anchal inch'ol ninq'ue xlok'al li Dios jo' yoquex laex anakcuan. ⁴ Xic' neque'cuil li neque'paban re li aq'uil na'leb a'in toj retal quinq'ueheb chi camsjc. Quinchapeb ut quinq'ueheb sa' tz'alam, jo' cuink jo' ixk. ⁵ Li xbenil aj tij, jo' ajcui' eb li neque'taklan sa' xyānkeb laj judío, neque'xnau nak tz'akal yal li yoquin chixyebal. Eb a'an que'xq'ue jun li hu cüe retalil nak que'xq'ue inlesens chixchappaleb laj pabanel li cuanqueb Damasco, ut tinc'ameb chak chi prexil arin Jerusalén re te'rahobtesik.

Laj Pablo quixserak'i reheb chanru nak quipaban

⁶ Abanan nak ac cuulac cue Damasco, ca'ch'in na chic mā cua'leb, mac'a' sa' inch'ol nak quinixsut jun li chanchan xam k'axal saken quichal chak sa' choxa. ⁷ Quint'ane' chi ch'och' ut quicuabi jun xyāb cuc quixye cue, "At Saulo, at Saulo, ¿c'a'ut nak yocat chinrahobtesinquil?" chan cue. ⁸ Lāin quinchak'oc ut quinye, "¿Anihat lāat, Kācua?" chanquin. Ut a'an quixye cue, "Lāin li Jesús laj Nazaret li yocat chixrahobtesinquil," chan cue. ⁹ Li cuanqueb cuochben que'r'il chi tz'akal li chanchan xam ut c'a'o' nak que'xucuac. Abanan inc'a' que'rabi li atin li quiyeh'e cue. ¹⁰ Quinpatz' re, "Kācua", ¿c'a'ru tacuaj tinbānu?" Ut li Kācua' quixye cue, "Cuaclin. Ayu Damasco ut aran tayéhek' acue chixjunil li c'a'ru tenebanbil sa' aben re tābanu", chan. ¹¹ Ut lāin inc'a' chic nin-iloc xban nak k'axal nalem̄tz'un li chanchan xam. Ch'ilonbilin aj chic xbaneb li cuanqueb cuochben nak coín toj Damasco. ¹² Jun li cuink aj Ananías xc'aba' quicuulac chicuilbal. Naxbānu jo' naxye li chak'rab li quiq'uehe' re laj Moisés. Chabil neque'xye chirix li cuink a'an chixjunileb laj judío li cuanqueb aran. ¹³ Nak quicuulac cuanquin cui', quixakli chinc'atk ut quixye cue, "At hermano Saulo, chat-ilok cui'chic," chan cue. Ut sa' ajcui' li hōnal a'an qui-iloc cui'chic li xnak' cuu ut quicuil ru laj Ananías. ¹⁴ Ut quixye cui'chic cue, "Li Dios li que'xlok'oni chak li kaxe'tonil yucua', a'an quisic'oc chak acuu re nak tānau ut tabanu li c'a'ru naraj a'an. A'an naraj nak tacuil ru li jun li Tīc Xch'ol ut tacuabi li c'a'ru tixye acue. ¹⁵ Lāat taye reheb chixjunileb li c'a'ru xacuabi ut li c'a'ru xacuileb. ¹⁶ ¿C'a'ut nak nacabay acuib? Cuaclin. Li Dios tixcuy tixsach la' mac nak tāyāba lix c'aba'. Ut c'ul li cubi ha', chan cue. ¹⁷ Chirix chic a'an, quinsuk'i cui'chic Jerusalén. Nak yoquin chi tijoc sa' li templo, quic'utbesic chicuu jun li visión. ¹⁸ Ut quicuil li Kācua' nak quixye cue, "Seba' acuib. Elen chi junpat arin Jerusalén xban nak arin Jerusalén inc'a' te'raj rabinquil li xyalal li tāch'olob chiruheb chikuix lāin," chan cue. ¹⁹ Lāin quinye re, "At Kācua', chixjunileb neque'xnau nak lāin coín sa' li junjunk chi cab li neque'xch'utub cui' ribeb laj judío chixchappaleb laj pabanel re nak te'q'uehek' sa' tz'alam ut te'saq'uek". ²⁰ Nak que'xcamsi laj Esteban li quich'oloban li xyalal chācuix, lāin cuanquin ajcui' aran. Yoquin chirilbal ut quisaho' inch'ol riq'uin lix camic. Ut lāin ajcui' quin-iloc re li rak'eb li que'camsin re," chanquin re. ²¹ Ut li Kācua' quixye cue, "Ayu xban nak lāin tatintakla chi najt sa' xyānkeb li mācua'eb aj judío," chan cue, chan laj Pablo. ²² Ut nak li tenamit que'rabi nak taxic riq'uineb li mācua'eb aj judío, c'ajo' nak que'po'. Inc'a' chic que'xcuy rabinquil xban nak yo xjosk'ileb. Ut jaqpoqueb reheb chixyebal: —Camsihomak li cuink a'in. Inc'a' us nak yo'yok, chanqueb. ²³ Yoqueb chixjapbal reheb ut yoqueb chixk'ichbal li rak' ut yoqueb chixcutbal li poks sa' ik' xban xjosk'ileb. ²⁴ Ut li coronel quixtaklahet li soldado re te'xc'am sa' cuartel laj Pablo. Quixye reheb nak te'xsac' re nak tixye xyalal c'a'ut nak jaqpoqueb reheb li tenamit chixyebal chi jo'can. ²⁵ Nak ac xe'xbac', laj Pablo quixye re li capitán li cuan aran: —¿C'a'ru naxye li

chak'rab? ¿Ma naru xsac'bal junak cuink aj Roma chi toj māji' rakkil qatin sa' xben? chan. ²⁶ Quisach xch'ol li capitán nak quirabi li c'a'ru quixye laj Pablo. Co sa' anil ut quixye re li coronel: —¿C'a'ru tabanu riq'uin li cuink a'in? A'an tz'akal aj Roma, chan. ²⁷ Ut quichal li coronel ut quixye re laj Pablo: —Ye cue li xyalal. ¿Ma laat aj Roma? — Ut laj Pablo quixye re: —Lain. — ²⁸ Quichak'oc li coronel ut quixye: —Lain nabal li tumin xinq'ue re nak tinc'ulek' chok' aj Roma, chan. Út laj Pablo quixye re: —A'ut lain chalen chak sa' inyo'lajic, lain ajcui' chak aj Roma, chan. ²⁹ Jo'can nak que'xcanab laj Pablo xjunes. Inc'a' chic que'xrahobtesi. Jo'can ajcui' li coronel. Qui-oc xxiu nak quixnau nak laj Pablo a'an tz'akal aj Roma xban nak que'xbac' riq'uin cadena.

Laj Pablo quic'ame' chiruheb li neque'taklan sa' xbeneb laj judío

³⁰ Jo' cuulajak chic li coronel quixtakla xhitbal lix bac'bal laj Pablo. Ut quixtakla xbokbaleb lix bənil aj tij ut eb li neque'taklan sa' xbeneb laj Judío ut quixxakab laj Pablo chiruheb. Quiraj xtaabal xyalal chi tz'akal c'a'ru xmāc laj Pablo nak yo xjitbal xbaneb laj judío.

23

¹ Laj Pablo quixca'yaheb li neque'taklan sa' xbeneb laj judío ut quixye rebeb: —Ex cuech tenamitil, lain c'ojo'c inch'ol riq'uin li xinbanu chiru li Dios chalen toj sa' li cutan anakcuan, chan. ² Laj Ananías li xyucua'il aj tij quixye rebeb li cuanqueb chixc'atk laj Pablo nak te'xsac' sa' re. ³ Ut laj Pablo quixye re: —A' li Dios təsac'ok acue laat. Chanchanat jun li tz'ac bonbil ru. Laat chunchucat aran chi rakoc atin sa' inben jo' naxye li chak'rab. Ut laat xak'et li chak'rab nak xatakla insac'bal, chan. ⁴ Eb li cuanqueb chixc'atk que'xye re: —Laat yocat chixhobbal li xyucua'il aj tij li nac'anjelac chiru li Dios, chanqueb. ⁵ Quichak'oc laj Pablo ut quixye rebeb: —Ex cuech tenamitil, chinēcuy, inc'a' ninnau nak a'an ta xyucua'il aj tij. Tz'ibānbil retalil sa' li Santil Hu naxye chi jo'ca'in: Inc'a' tətz'ektəna li nataklan sa' le tenamit. (Ex. 22:28) ⁶ Nak quixq'ue retalil laj Pablo nak sa' xyankeb li ch'utch'ub que'arán cuanqueb aj saduceo ut cuanqueb ajcui' aj fariseo, quixye rebeb chi cau xyab xcux: —Ləex aj judío, cuech tenamitil, lain aj fariseo. Ut aj fariseo ajcui' inyucua'. Xban nak ninpəb nak te'cuacılık cui'chic chi yo'yo li camenak, jo'can nak yo xrakbal qatin sa' inben lain, chan laj Pablo. ⁷ Ut nak quixye a'in, inc'a' chic junaj xc'a'uxeb laj fariseo ut eb laj saduceo ut que'oc chixcuech'inquil rib. ⁸ Eb laj saduceo inc'a' neque'xpəb nak neque'cuacılık cui'chic chi yo'yo li camenak, chi moco neque'xpəb nak cuan ángel, chi moco neque'xpəb nak cuan Musik'ej. Abanan eb laj fariseo neque'xpəb chixjunil a' c'a'ak re ru a'in. ⁹ Ut neque'xejejnac chixcuech'inquil ribeb. Ut eb laj tz'ib xcomoneb laj fariseo yoqeb chixcolbal rix laj Pablo. —Mā jun mac nakatau chirix li cuink a'in. Māre anchal junak musik'ej, māre anchal junak ángel x-atinan re. Inc'a' naru topletik riq'uin li Kacua', chanqueb. ¹⁰ K'axal cui'chic que'xcuech'i ribeb. Quichal xxiu li coronel ut quixc'oxla nak mare te'xpedasi laj Pablo. Quixbokeb li soldado ut quixtaklaheb chirisinquil laj Pablo chiruheb re te'xc'am cui'chic sa' li cuartel. ¹¹ Chiru li k'ojojin a'an li Kacua' quixc'ut rib chiru laj Pablo ut quixye re: —Cauhak ach'ol, at Pablo. Jo' nak xach'olob li yal chicuix arin Jerusalén, jo'can ajcui' nak toxach'olob li yal chicuix aran Roma, chan.

Eb laj c'amol be sa' xyankeb laj judío que'xc'ub ru chanru nak te'xcamsi laj Pablo

¹² Cuulajak chic cuanqueb laj judío que'xch'utub ribeb ut que'xc'ub ru c'a'ru te'xbanu. Que'xye riq'unin juramento nak inc'a' te'cua'ak chi moco te'uc'ak cui inc'a' te'xcamsi laj Pablo. ¹³ Numenakeb na ca'c'al chi cuink li que'xc'ub ru xcamsinquel laj Pablo. ¹⁴ Que'coeb riq'uineb li xbenil aj tij ut riq'uineb li neque'c'amoc be sa' xyankeb laj judío ut que'xye reheb: —Lao xkac'ub kib ut xkabánu li juramento nak inc'a' totzacánk cui'inc'a' takacamsi laj Pablo. ¹⁵ Jo'can nak laej rochbeneb li neque'taklan sa' xbeneb laj judío yehomak re li coronel nak tixtakla chak arin laj Pablo cuulaj. Ye re nak teraj tenau tz'akal xyalal chirix. Lao ac xkacauresi kib re nak takacamsi nak toj maji' nac'ulun arin, chanqueb. ¹⁶ Ut lix yum li ranab laj Pablo quirabi li c'a'ru yoqueb chixc'ubanquil. Co riq'unin laj Pablo sa' cuartel ut quixserak'i re li c'a'ru yoqueb chixc'ubanquil chirix. ¹⁷ Jo'can nak laj Pablo quixbok jun li capitán ut quixye re: —C'am li al a'in riq'unin li coronel xban nak cuan c'a'ru tixye re, chan. ¹⁸ Ut li capitán quixc'am li al riq'unin li coronel ut quixye: —Laj Pablo li prex xinixbok ut xtz'ama chicuu nak tinc'am chak acuiq'unin li al a'in. Cuan c'a'ru tixye acue, chan. ¹⁹ Ut li coronel quixchap chi ruk'. Quixc'am xjunes ut quixpatz' re: —¿C'a'ru tacuaj xyebal cüe? chan re. ²⁰ Ut li al quixye: —Eb laj judío xe'xc'ub ribeb re xtz'amanquil chacuu nak tatakla cuulaj laj Pablo re taxic chiruhéb li neque'taklan sa' li templo. Xe'xye nak toj cuan c'a' re ru te'raj te'xtau xyalal chirix. A'an moco yal ta. Raylal ban te'raj xbanunquil re. ²¹ Mābanu c'a'ru te'xye xban nak numenak ca'c'al chi cuink te'ramok re sa' be re xcamsinquel. Eb a'an que'xc'ub rib. Que'xbanu li juramento ut que'xye nak inc'a' te'cua'ak chi moco te'uc'ak cui inc'a' te'xcamsi laj Pablo. Anakcuan yoqueb chiroybeninquel c'a'ru taye laat, chan li al. ²² Ut li coronel quixchak'rabi li al ut quixye re nak mā ani aj e tixye li c'a'ru quixye resil re.

Laj Pablo quic'ame' chiru laj Félix li acuabej

²³ Li Coronel quixtakla xc'ambal cuib li capitán ut quixye reheb nak te'xcauresi cuib ciento chi soldado, ut lajeb xcac'äl li te'xic chirix cacuay ut cuib ciento li cuanqueb xlans re te'xic toj Cesarea sa' beleb or re k'ojojin. ²⁴ Ut quixye ajcu' nak te'xcauresi li cacuay li taxic cui' laj Pablo. Te'r'il chi us re nak mac'a' tixc'ul nak te'xc'am riq'unin laj Félix li acuabej. ²⁵ Ut quixtz'iba ajcu' jun li hu re tixtakla chirixeb. Naxye chi jo'ca'in: ²⁶ Lajin laj Claudio Lisias. Nintakla xsahil ach'ol, at acuabej Félix. Laat li k'axal nim acuanquil. ²⁷ Li cuink a'in li yoquin chixtaklanquil acuiq'unin quichape' xbaneb laj judío. Oqueb raj re chixcamsinquel nak quebintau ut quinmak' chiruhéb lain cuochbeneb li soldado xban nak quinq'ue retal nak a'an tz'akal aj Roma. ²⁸ Ut quicuaj raj xnaubal c'a'ru xmäc nak yoqueb chixchapbal. Jo'can nak quinc'am chiruhéb li neque'taklan sa' xyankeb laj judío. ²⁹ Lajin quiq'ue retal nak yoqueb chixjitbal yal xban lix chak'rabebe a'an. Ninnau nak mac'a' xmäc re te'xcamsi, chi moco re te'xq'ue sa' tz'alam. ³⁰ Ut xcuabi ajcu' resil nak eb laj judío que'xc'ub ru chanru nak te'xcamsi. Jo'can nak quintakla chi junpat acuiq'unin. Xinye ajcu' reheb li yoqueb chi jitoc chirix nák te'xye acue c'a'ru xmäc. Chacuil acuib, chan re li acuabej sa' li hu li quixtakla laj Claudio. ³¹ Eb li soldado que'xc'am laj Pablo jo' quiyeh'e reheb. Que'xc'am chi k'ek toj sa' li tenamit Antípatris. ³² Ut sa' li cutan jun chic eb li soldado li que'coeb chi rok que'suk'i cui'chic sa' li cuartel. Ut eb li cuanqueb chirix cacuay que'coeb riq'unin li acuabej chixcanabankil laj Pablo. ³³ Nak que'cuulac Cesarea, que'xk'axtesi li hu re li acuabej, ut que'xk'axtesi ajcu' laj Pablo. ³⁴ Ut li acuabej nak quiril xsa' li hu, quixpatz' re laj Pablo bar xtenamit. Nak quirabi

nak a'an aj Cilicia, quixye re: ³⁵—Chalkeb cuan laj jitol acue, tojo'nak takabi c'a'ru amac, chan re. Ut quixtakla laj Pablo sa' rochoch laj Herodes. Aran que'xtz'ap sa' jun li na'ajej ut que'xc'ac'ale re nak inc'a' tælelik.

24

Laj Pablo quiatinac re xcolbal rib chiru laj Félix

¹ Nak ac xnume' chic ob cutan, quicuulac Cesarea laj Ananías li xyucua'il aj tij. Cuanqueb rochben cuib oxib li neque'c'amoc be sa' xyankeb laj judío, ut cuan jun naqatinac chirixeb, aj Tértulo xc'aba'. Que'cuulac riq'un li acuabej chixjitbal laj Pablo. ² Nak quic'am'e' laj Pablo, laj Tértulo quioc chixjitbal laj Pablo chiru laj Félix li acuabej ut quixye: —Kacua' Félix, sa' ac'aba' laq cuanco sa' tuktukuil usilal. Xban nak chabil nacattaklan sa' kabén, jo'can nak yoco chi usac sa' li katenamit. ³ Riq'un a'in nasaho' kach'ol chikajunilo yalak bar sa' li na'ajej a'in. Ut nakabantioxi chacuu, at acuabej Félix. ⁴ Nintz'ama chacuu nak tåbanu usilal ke. Täcuabi taxak li oc ke chixtz'amanquil chacuu. Junpat ajcui' tatkach'i'ch'i'i. ⁵ Lao xkaq'ue retal nak li cuink a'in k'axal yibru xna'leb. Naxtiquib ra xic' sa' xyankeb chixjunileb laj judío sa' chixjunil li ruchich'och'. Ut a'an najolomin re li jun ch'utal aj Nazareno neque'xye re. ⁶ Quiraj raj xmuxbal ru li katemplo. Jo'can nak xkachap, ut quikaj raj xrakbal åtin sa' xben jo' naxye li kachak'rab. ⁷ Abanan laj Lisias li coronel qui-oquen chirix ut sa' josk'il quixmak' chiku. ⁸ A'an quixye nak laj jitol re tento te'chalk acuiq'uin. Tarük ajcui' tapatz' re a'an re tånau chi tz'akal li c'a'ru yoco chixjitbal cui', chan. ⁹ Ut eb laj judío li que'cuulac rochben, que'xye nak yal li yo chixyebal laj Tértulo. ¹⁰ Ut li acuabej quixbok laj Pablo ut quixye re nak tåqatinak. Ut laj Pablo quixye: —Lain ninnau nak nabal chihab acuoquic chok' aj rakol åtin sa' li tenamit a'in. Jo'can nak chi mac'a' inc'a'ux tinye li c'a'ru tincol cui' cuib. ¹¹ Laat naru tattz'ilok åtin chirix li tinye. Cablaju cutan anakcuan inc'ulunic chi tijoc aran Jerusalén. ¹² Lain inc'a'yoquin chixyo'obanquil ra xic' sa' xyankeb li tenamit. Ma ani nintacchi'i, chi moco sa' li templo, chi moco sa' li cab li neque'xch'utub cui' ribeb laj judío, chi moco sa' li tenamit. ¹³ Ut eb laj jitol cue inc'a' naru neque'xye nak yal li c'a'ru yoqueb chixyebal xban nak mac'a' junak retalil naru naxc'ut nak yal. ¹⁴ Lain tinye xyalal acue. Ninlok'oni li Dios li que'xlok'oni chak li kaxe'tonil yucua'. Ninpab li evángelio li neque'xye nak moco yal ta. Ninpab chixjunil li tz'ibanal sa' li chak'rab li quiq'uehe' re laj Moisés, jo' ajcui' li que'xtz'iba li profetas. ¹⁵ Lain cau inch'ol chixpabanquil li Dios jo' neque'xbanu li yoqueb chi jitoc cue. Lain ninpab ajcui' nak te'cuaclik cui'chic chi yo'yo li camenak, jo' li tiqueb xch'ol jo' ajcui' li inc'a' tiqueb xch'ol. ¹⁶ Jo'can nak ning'ue inch'ol chixbanunquil li us re nak mac'a'ak inmac chiru li Dios chi moco chiruheb li cuas cuitz'in. ¹⁷ Q'ula chihab ma anihin sa' lin tenamit Jerusalén. Jo'can nak xinsuk'i chi mayejac chiru li Dios ut re xq'uebal ca'ch'inak lix tenk'anquileb li neba' li cuanqueb aran. ¹⁸ A'an a'in li yoquin chixbanunquil nak quine'xtau sa' li templo laj judío li que'chal chak Asia. Toje' xinrake' xbanunquil li c'a'ru quinyechi'i chiru li Dios. Ac xinbanu li nabánuman re xsantobresinquel cuib. Moco nocotububnac ta chi moco yoco ta chi yo'obanc ch'a'ajquilal. ¹⁹ Eb laj judío li que'chal chak Asia, a'aneb raj li xe'chal arin chinjibal chacuu cui cuan ta c'a'ru tine xjit cui'. ²⁰ Xyehakeb anakcuan chacuu li neque'taklan sa' xbeneb laj judío li cuanqueb arin cui cuan c'a'ru inc'a' us xinbanu nak quine'xc'am chiruheb laj rakol atin. ²¹ Ca'aj cui' a'in lin mac chiruheb: Nak xakxoquin chiruheb, quinye chi cau xyab incux nak te'cuaclik cui'chic chi yo'yo li camenak. Sa' xc'aba' a'an nak oc

ere chixrakbal atin sa' inben, chanquin reheb, chan laj Pablo. ²² Laj Félix ac rabiom resil li pabal a'an. Yal re xbaybaleb nak quixye: —C'ulunk cuan laj Lisias ut tinchoy xtz'ilbal rix li yoquex chixyebal, chan. ²³ Ut quixtakla cui'chic laj Pablo sa' li na'ajej li tz'aptz'o cui' xbaneb. Ut quixtakla ajcui' xyebal re li capitán nak tixq'ue xlesens chiratinanquileb lix comon li jo' q'uial te'raj chalc chirula'aninquil ut chixq'uebal c'a'ru re. ²⁴ Inc'a' chic q'uila cutan chirix a'in nak quicuulac cui'chic laj Félix rochben lix Drusila li rixakil. Li iixk a'an aj judío. Laj Félix quixbok laj Pablo riq'uin re nak tixch'olob chiru chanru xpabankil li Kacua' Jesucristo. ²⁵ Ut nak laj Pablo yo chixch'olobankil liyal li tiquilal, li cuyuc ib, ut li rakba qatin chalel, quichal xxiu laj Félix. Quixye re laj Pablo. —Anakcuan ayu. Nak tixq'ue rib chicuu tintakla cui'chic abokbal, chan. ²⁶ Sa' xch'ol laj Félix nak tatuminak ru xban laj Pablo re taisik sa' tz'alam. Jo'can nak nabal sút quixtakla xbokbal ut quiatinac riq'uin. ²⁷ Xban nak quiraj nak us taçanak riq'uineb laj judío, jo'can nak quixcanab chi prexil laj Pablo. Nak ac xnume' cuib chihab, laj Félix quiel chok' acuabej ut qui-oc laj Porcio Festo chok' rekjá.

25

Laj Pablo quic'ame' chiru laj Festo li acuabej li toj qui-oc sa' xcuanquil

¹ Oxib cutan chic roquic chok' acuabej laj Festo, nak qui-el Cesarea ut co toj Jerusalén. ² Ut que'cuulac riq'uin laj Festo eb li xbenil aj tij ut eb li neque'c'amoc be sa' xyankeb laj judío re xjitbal laj Pablo. ³ Que'xtz'ama chiru laj Festo nak tixbanu li usilal, tixtakla cui'chic Jerusalén laj Pablo xban nak que'xc'oxla xrambal sa' be re xcamsinqual. ⁴ Quichak'oc laj Festo ut quixye reheb: —Laj Pablo ac cuan chi prexil aran Cesarea ut c'ac'alenbil chi us. Ut chi seb tinxic lain aran, chan. ⁵ Ut quixye ajcui' reheb: —Eb laj c'amol be sa' eyank te'xic chicuix. Cui cuan xmact li cuink a'in, che'xjitat, chan reheb. ⁶ Quicuan tana chic cuakxakibak malaj ut lajebak cutan chic sa' xyankeb ut quisuk'i Cesarea. Sa' xcab li cutan nak quic'ojla sa' li na'ajej li narakoc cui' atin, quixtakla xc'ambal laj Pablo riq'uin. ⁷ Nak quicuulac, quisute' xbaneb laj judío li que'chal Jerusalén. Junes rayral que'xye chirix laj Pablo nak que'xjít. Abanan inc'a' qui-el chi yal li c'a'ru que'xye xban nak mac'a junak c'a'ru tixc'ut nak yal li yoqueb chixyebal. ⁸ Ut laj Pablo qui-oc cui'chic chi atinac re xcolbal rib chiruheb ut quixye: —Chi moco lix chak'rabeb laj judío chi moco lix templo li Kacua' quinsach xcuanquil. Chi moco cuan ta junak mac xinbanu chiru li acuabej César, chan. ⁹ Laj Festo quiraj nak us taçanak riq'uineb laj judío. Jo'can nak quixye re laj Pablo: —¿Ma tacuaj xic toj Jerusalén ut aran tarakmank atin sa' aben chicuu? chan re. ¹⁰ Laj Pablo quixye: —Cuanquin chiru li rakba atin li cuan sa' xcuent li acuabej César. Jo'can nak arin ajcui' tarakek' atin sa' inben. Ac nacanau ajcui' laat nak mac'a inmac chiruheb laj judío. ¹¹ Cui ut cuan junak mac xinbanu re nak tento tine'xcamsi, chine'xcamsihak. Lain inc'a' ninxucua li cämc. Abanan cui inc'a' yal li yoqueb chixyebal chicuix, ma ani taruk tak'axtesink cue sa' ruk'eb a'an. Lain tintz'ama nak li acuabej César li k'axal nim xcuanquil tarakok atin sa' inben, chan laj Pablo. ¹² Ut laj Festo quiatinac riq'uineb laj q'uehol na'leb. Tojo'nak quixye re laj Pablo: —Cui li acuabej César tacuaj tarakok atin sa' aben, naru ajcui' tatintakla riq'uin, chan.

Laj Festo quixserak'i re li rey Agripa li c'a'ru yo chixc'ulbal laj Pablo

¹³ Ac xnume' na chic cuib oxib cutan nak li rey Agripa ut lix Berenice li ranab que'cuulac Cesarea chirula'aninquil laj Festo. ¹⁴ Ac cuan cutan xcuulajiqueb aran, nak laj Festo quixch'olob chiru li rey li yo chixc'ulbal laj Pablo: —Jun li cuink quicanabac chi prexil xban laj Félix, chan re. ¹⁵ Ut nak quincuulac Jerusalén que'chal cuiq'unin lix bñil aj tij ut eb li neque'c'amoc be sa' xyankeb laj judío. Que'xtz'ama chicuu nak tinrak atin sa' xben ut tinteneb camc sa' xben. ¹⁶ Abanan lain quinye reheb nak eb laj Roma moco c'aynakeb ta chixtenebanquil camc sa' xben junak cuink yal chi jo'can. Tento nak cuank chiruheb laj jitol re, re nak tixcol rib a' yal c'a'ru tajitek' cui'. ¹⁷ Nak que'c'ulun arin eb laj c'amol be sa' xyankeb laj judío, inc'a' quinbay. Sa' li cutan jun chic ticto cojn sa' li na'ajej li ninrakoc cui' atin. Ut quintakla xc'ambal laj Pablo. ¹⁸ Sa' inch'ol lain nak k'axal nim li mac quixbanu. Abanan nak que'c'ulun arin li yoqueb chi jitoc re, inc'a' que'jitoc chirix jo' quinc'oxla. ¹⁹ Li c'a'ru yoqueb cui' chixxitbal, a'an chirix lix pabaleb, ut chirix jun li cuink Jesús xc'aba', ac camenak ut laj Pablo naxye nak yo'yo. ²⁰ Lain inc'a' xinnau c'a'ru tinbanu riq'unin li ch'a'ajqujal a'in. Jo'can nak xinpatz' re laj Pablo ma taraj xic Jerusalén ut aran tarakmank atin sa' xben. ²¹ Ut laj Pablo quixtz'ama chicuu nak taroybeni re nak laj César li acuabej li k'axal nim xcuanduil tarakok atin sa' xben. Jo'can nak xintakla cui'chic xtz'apbal sa' tz'alam toj tacuulak xk'ehil nak tintakla riq'unin li acuabej César, chan laj Festo. ²² Ut li rey Agripa quixye re laj Festo: —Lain nacuaj raj rabinquil li c'a'ru naxye li cuink a'an, chan. Ut laj Festo quixye re: —Cualaj ajcui' naru tacuabi, chan. ²³ Cuulajak chic que'oc sa' li na'ajej li neque'rakoc cui' atin li rey Agripa rochben lix Berenice. K'axal chabil xtitikbanquileb. Rochbenel li coronel ut eb li ninkeb xcuanduil sa' li tenamit. Ut laj Festo quixtakla xc'ambal laj Pablo. ²⁴ Quixye: —At rey Agripa ut chixjunilex li ch'utch'uquex arin, cue' li cuink li yoqueb chixxitbal chixjunileb laj judío li cuanqueb arin Cesarea jo'queb ajcui' li cuanqueb Jerusalén. Neque'xjap re chixtz'amanquil chicuu nak tacamsik. ²⁵ Abanan nak xin-oc chi rakoc atin sa' xben xinq'ue retal nak mac'a' xmac re tacamsik. A'an xtz'ama nak li acuabej César tarakok atin sa' xben. Jo'can nak xinye nak tento taxic Roma riq'unin li acuabej. ²⁶ ¿C'a' ta cui' ru tintakla xyebal re li acuabej chirix li cuink a'in? Jo'can nak xinc'am chak cheru laex ut chacuu lqat, at rey Agripa, re nak tetz'il atin chirix. Märe chi jo'can cuan c'a'ru tintakla xyebal chirix. ²⁷ Ninnau nak moco us ta xtaklanquil junak prex chi inc'a' taataklaq xyebal c'a'ru xmac, chan laj Festo.

26

Laj Pablo quiatinac chiru laj Agripa re xcolbal rib

¹ Li rey Agripa quixye re laj Pablo: —Anakcuan naru tat-atinak re tacol acuib, chan. Ut laj Pablo quixtaksi li ruk' ut qui-oc chi atinac re tixcol rib. ² Quixye: —At rey Agripa, nasaho' sa' inch'ol nak taruk tinatinak acuiq'unin re tincol cuib chiruheb laj c'amol be sa' xyankeb laj judío li yoqueb chi jitoc cue. ³ K'axal cui'chic us xban nak lqat nacanau chixjunil li c'a'ru c'aynakeb xbanunquil eb laj judío ut nacanau chanru lix na'lebeb. Jo'can ut nak nintz'ama chacuu nak tacuy rabinquil li c'a'ru oc cue xyebal. ⁴ Chixjunileb laj judío neque'xnau chanru lin yu'am nak xincuan chak sa' lin tenamit chalen chak sa' insajilal ut toj anakcuan. Jo'can ajcui' aran Jerusalén neque'xnau cuu. ⁵ Eb a'an neque'xnau cuu chalen chak sa' inca'ch'inai. Cui te'raj, taruk te'xch'olob xyalal chicuix. Lain aj fariseo xcomoneb li neque'xq'ue xch'olob chixbanunquil chixjunil li naxye sa' li chak'rab jo' naraj

li kapabal. ⁶ Ut anakcuan laex yoquex chi rakoc atin sa' inben yal xban nak yoquin chirobeninqul li quixyechi'i chak li Dios junxilaj reheb li kaxe'tonil yucua'. ⁷ Li cablaju xtepaleb laj Israel yoqueb chirobeninqul nak te'xc'ul li yechi'inbil chak reheb xban li Dios. Chì k'ek chi cutan neque'xlok'oni li Dios. At rey Agripa, xban xyo'oninqul a'an nak yoqueb chinjitbal eb laj judío. ⁸ ¿C'a'ut nak laex inc'a' nequepab nak li Dios tixcuaclesiheb cui'chic chi yo'yo li camenak? ⁹ Yal nak junxil lain xinc'oxla nak us xrahobtesinqueb li neque'xpab li Jesús aj Nazaret. ¹⁰ Lain quinqueheb chi tz'apet' sa' tz'alam nabaleb laj pabanel. Ut q'uebil incuanquil chixbanunquil a'an xbaneb li xbenil aj tij. Ut nak neque'camsic laj pabanel, lain quin-oquen ajcui' chirixeb re te'camsik. A'in quilajinbanu aran Jerusalén. ¹¹ Nabal sut quintakla xsac'baleb sa' li cab li neque'xch'utub cui' ribeb laj judío. Quinpuersiheb chixmajecuanquil xc'aba' li Jesús. Xban nak c'ajo' injosk'il sa' xbeneb, quebintake yalak bar sa' eb li jalanal tenamit re xbanunquil raylal reheb. ¹² A'in yoquin chixbanunquil nak coin Damasco. Q'uebil incuanquil ut taklanbilin xbaneb li xbenil aj tij. ¹³ Chacuabi at rey, li yoquin xyebal. Cua'leb re cutan nak quinixsut jun li chanchan xam sa' be. Li xam a'an quichal chak sa' choxa. Nalemtz'un. Naxk'ax ru nak nalemztz'un ru li sak'e. Quinixsut lain ut que'sute' ajcui' li yoqueb chi xic chicuix. ¹⁴ Nak cot'ané' chickajunil chiru ch'och', quicuabi jun xyab cux yo chi atinac cuiq'uin. Quixye cue sa' ratinobaleb laj judío, "At Saulo, at Saulo, ¿c'a'ut nak yocat chinrahobtesinquil? Yocat chixtacuasinquel acuib ajunes jo' naxbanu li boyx li inc'a' na-abin chiru laj echal re nak yo chixberesinquil," chan cue. ¹⁵ Ut lain quinye re, "¿Anihat laat, Kacua?" Ut li Kacua' quixye cue, "Lain li Jesús li yocat chinrahobtesinquil. ¹⁶ Anakcuan ut cuaclin. Lain xinc'utbesi cuib chacuu re nak tatinxakab chok' aj c'anjel chicuu. Laat tatch'olobank xyalal li c'a'ak re ru xacuil jo' ajcui' li c'a'ak re ru toj tinc'utbesi chacuu. ¹⁷ Lain tincolok acue chiruheb li xic' neque'iloc acue, jo' eb laj judío, jo' eb li macu'a'eb aj judío, ut tatintakla anakcuan sa' xyankeb li macu'a'eb aj judío. ¹⁸ Chanchan nak tateonk li xnak' ruheb nak tac'olob li xyalal chiruheb. Chanchan nak te'elk sa' li k'ojoyn ut te'oc sa' cutan nak te'xtau ru li xyalal. Te'elk rubel xcuanguard laj tza ut te'oc rubel xcuanguard li Dios. Riq'uin inpabankil lain, tacuyek' tasachech' llix maqueb, ut tacuank xna'ajeb sa' xyankeb li sic'bileb ru xban li Dios," chan cue li Kacua'. ¹⁹ Jo'can ut nak inc'a' xink'etk'eti cuib chiru li quixc'utbesi rib chicuu li quichal chak sa' choxa, at rey Agripa. ²⁰ Ut xben cua quinch'olob xyalal chiruheb li cuanqueb Damasco ut Jerusalén. Chirix a'an quinch'olob xyalal chiruheb laj judío li cuanqueb Judea, jo' ajcui' chiruheb li macu'a'eb aj judío. Quinye reheb nak tento te'yot'ek' xch'oleb te'xjal xc'a'uxeb ut te'xk'axtesi ribeb re li Dios ut te'xbanu li us jo' xc'ulubeb li ac xe'paban. ²¹ Sa' xc'aba' a'an nak quine'xchap eb laj judío sa' li templo ut que'raj raj incamsinquel. ²² Abanan lain tenk'anbilin xban li Dios toj chalen anakcuan. Yoquin chixch'olobankil li yal chirix li c'a'ru tac'ulmank. Ninch'olob xyalal chiruheb chixjunileb, li cuanqueb xcuanguard jo' ajcui' li mac'a'eb xcuanguard. Mac'a' junak aq'uil na'leb yoquin chixyebal. Li yoquin chixyebal, a'an ajcui' li que'xch'olob xyalal eb li profeta ut laj Moisés. ²³ Que'xye nak tento tacamsik li Cristo, laj Colonel li yechi'inbil xban li Dios, abanan a'an li xben li tacuaclik cui'chic chi yo'yo sa' xyankeb li camenak ut tixch'olob xyalal li evangelio reheb laj judío jo'queb ajcui' li macu'a'eb aj judío, chan laj Pablo. ²⁴ Nak laj Pablo yo' chi atinac chi jo'can re xcolbal rib, laj Festo quixjap re chixyebal: —Loc acuu laat, Pablo. K'axal nabal li tzoloc xabau ut a'an yo chi locobresinc acuu, chan. ²⁵ Ut laj Pablo quixye re: —At Festo, k'axal nim

acuanquil. Lain moco lóç ta cuu. Li c'a'ru yoquin chixyebal acue, a'an tz'akal yal. ²⁶ Li rey Agripa naxnau chixjunil li c'a'ak re ru a'in. Jo'can nak yoquin chi atinac chiru chi mac'a' inxiu. A'an naxnau chixjunil a'in xban nak moco quic'ulman ta chi mukmu, chan. ²⁷ Ut laj Pablo quixye re li rey Agripa: —At rey Agripa, ¿ma nacapab li c'a'ru que'xtz'iba li profeta? Lain ninnau nak nacapab, chan laj Pablo. ²⁸ Li rey Agripa quichak'oc ut quixye re: —Riq'uin li c'a'ru xaye xak'unobresin inch'ol. C'a'ch'iñ chic ma xinpaban aban, chan. ²⁹ Ut laj Pablo quixye: —Xq'ue taxak acue li Dios nak tatpabank laat jo' eb ajcui' chixjunileb li yoqueb chi abjinc cue anakcuan. Usta ch'a'aj cheru, usta inc'a', texpabank taxak jo' nak xinpaban lain, abanan inc'a' raj texbaq'uek' riq'uin cadena, jo' nak bac'boquin lain, chan. ³⁰ Ut nak quirake' chixyebal li atin a'in, que'cuaci li rey ut lìx Berenice jo' ajcui' laj Festo ut eb li que'c'oja chixc'atk. ³¹ Ut nak yoqueb chi elc sa' li na'ajej a'an, que'xye chi ribileb rib: —Li cuink a'in mac'a' xmac. Mac'a' junak mac xbanu re tacular chi moco re cuank sa' tz'alam, chanqueb. ³² Ut laj Agripa quixye re laj Festo: —Tàruk raj rach'abanquil li cuink a'in cui ta inc'a' xtz'ama nak tarakok atin li acuabej César sa' xben, chan li rey Agripa.

27

Laj Pablo quitaklac aran Roma

¹ Nak quich'ola li kaxiquic chiru ha' toj Italia, laj Pablo rochbeneb li jun ch'ol chic li cuanqueb chi prexil, que'k'axtesic sa' ruk' jun li capitán aj Julio xc'aba'. A'an xcomoneb li jun ch'utal chi soldado re li acuabej César. ² Co-oc sa' jun li jucub li quichal chak sa'li tenamit Adramitio. Li jucub a'an ac xic re. Coo kochben laj Aristarco li quichal chak Tesalónica xcient Macedonia. Li jucub tñumek' chixc'atk eb li na'ajej xcient Asia. ³ Ut sa' li cutan jun chic cocuulac Sidón. Laj Julio quixbanu usilal re laj Pablo. Quixcanab chi xic riq'uineb laj pabanel li cuanqueb aran re nak tñaten'ak xbaneb. ⁴ Co-el aran Sidón sa' li jucub. Nak yoco chi xic, coxonumek' nach' riq'uin Chipre xban nak chiku yo chi chalc li ik'. ⁵ Conume' jun pac'al li palau cuan cui' li tenamit Cilicia ut Panfilia. Ut cocuulac sa'li tenamit Mira li cuan sa' xcient Licia. ⁶ Aran quixtau jun li jucub li capitán re Alejandría. Ac xic re Italia ut coroci sa' li jucub a'an re toxic. ⁷ Nabal cutan cobec chiru ha' chi timil. Ra sa nak cocuulac sa' xjyal li tenamit Gnido. Xban nak k'axal cau li ik', jo'can nak quikajal kabe. Conume' cuan cui' li tenamit Salmón ut coo sa' li na'ajej Creta li sutsu sa' ha'. ⁸ K'axal ch'a'aj ut k'axal timil cocuulac sa' jun li tenamit "Chabil Oquebal" neque'xye re. Nach' riq'uin a'an cuan li tenamit Lasea. ⁹ Nabal cutan cobay sa' li na'ajej a'an ut xiu xiu chic li xic chiru ha' xban nak cuulac re li habalk'e. Jo'can nak laj Pablo qui-oc chixq'uebal xna'lebeb laj ch'e'ol jucub. ¹⁰ Quixye reheb: —Ex cuas cuitz'in, yoquin chixq'uebal retal nak li xic chiru ha' k'axal ch'a'aj. Nabal li raylal takac'ul chi jo'ca'in. Moco ca'aj cui' ta xiu xiu re li jucub uf li rjk. Xiu xiu aj ban cui' chok' ke lqo, chan laj Pablo. ¹¹ Abanan li capitán inc'a' quixq'ue xcuangular li c'a'ru quixye laj Pablo. A'ban chic li c'a'ru que'xye laj echal re li jucub ut laj ch'e'ol re, a'an chic li que'xbanu. ¹² Ut xban nak mac'a' junak na'ajej bar taruk te'xnumsi cui' li habalk'e chi sa' sa' xch'oleb, li xq'ualeble que'xye nak us li elc aran cui taruk te'cuulak Fenice re te'xnumsi li habalk'e aran. A'an jun li tenamit xcient Creta. Sa' li na'ajej a'an cuan cuib li oquebal re li jucub. Jun nacana sa' li suoeste ut li jun chic nacana sa' li noroeste.

Li cak-sut-ik' li quixq'ue nak yoqueb chi numec sa' li palau

¹³ Nak ac yo li ik' li nachal sa' li sur, que'xc'oxla nak naru te'xic. Jo'can nak que'xtiquib xic. Yoqueb chi xic chire li palau nach' riq'unin li na'ajej Creta. ¹⁴ Junpat na chic nak quichal jun cacuil ik'. Lix cau ok li ha' yo chixsac'bal rib chiru li jucub. Euroclidón xc'aba' li ik' a'an li nachal chak sa' li noreoste. ¹⁵ Inc'a' chic que'xcuy xmetz'eu li cacuil ik' laj ch'e'ol re li jucub. Jo'can nak quikacanab kib re toxc'am. Ut li jucub quic'ame' xban li ik'. ¹⁶ Coculac cuan cui' jun sirlil ch'och' Claudio xc'aba' sutsu sa' ha'. Ra sa nak coru xtaksinquel li ch'ina jucub, li yo chi queloc xban li nimla jucub. ¹⁷ Nak kataksa' li nimla jucub, c'ajo' nak que'xucuac li cristian. Que'xc'oxla nak mare tat'ilk li jucub sa' li samaib. Que'xcubsi xt'icrul li jucub ut yoco chi xic chi jo'can. ¹⁸ Jo' cuulajak chic toj cau ajcui' li ik'. C'ajo' nak yo chirec'asinquil li jucub. Jo'can nak quikatiquib xjebbal li rik ut kacut sa' li palau. ¹⁹ Sa' rox li cutan quikisi sa' li jucub li c'a'ru nac'anjelac re li jucub, re nak inc'a' chic alak li jucub. ²⁰ Chiru nabal cutan inc'a' qui-iloc li sak'e chi moco li chahim chiru k'ojojin. K'axal cau li cak-sut-ik' ut xiu xiu cuanco. Inc'a' chic nakayo'oni nak tocolek' ta. ²¹ Ac xnume' nabal cutan ut maji' nakayal cua. Jo'can nak laj Pablo quixakli sa' xyiheb ut quixye rebeb: —Ex cuas cuitz'in, k'axal us raj quinerabi ta. Inc'a' raj co-el chak Creta. Cui ta inc'a' xo-el, inc'a' raj xkac'ul li raylal a'in ut inc'a' raj xosachoc. ²² A'ut anakcuán tinye ere nak mexc'oxlac. Cauhak ban ech'ol xban nak ma' ani ke tacamk. Ca'aj cui' li jucub tásachk. ²³ Sa' li k'ojojin a'in xc'utbesi rib chicuu jun x-ángel li Dios laj echal cue, li ninc'anjela ru. ²⁴ Li ángel xye cue, "Matxucuac, at Pablo, xban nak tento nak tattcuulak riq'unin li acuabej César. Xban xanimal rusilal li Kacua', ma jun rebeb li cuanqueb a'cuochben te'camk," chan cue. ²⁵ Jo'can nak cauhak ech'ol, ex cuas cuitz'in. Lain cau inch'ol riq'unin li Dios nak tac'ulmank jo' xye cue li ángel. ²⁶ Abanan tento nak tocutek' xban li ha' sa' jun na'ajej sutsu sa' ha', chan laj Pablo rebeb. ²⁷ Cuib xaman na yoco chi c'uluc raylal. Li ha' yo chikac'ambal yalak bar chiru li palau Adriático xc'aba' xban li cacuil ik'. Tuktu chic k'ojojin nak eb laj ch'e'ol jucub que'xc'oxla nak ac cuulaqueb re chi ch'och'el. ²⁸ Que'xcubsi jun li c'am re xbisbal xchamal li ha'. Toj cuan cuaklaju xcac'al metro xchamal nak que'xbis. Nak que'jiloc chic ca'ch'in, que'xq'ue cui'chic li bisleb ut cuukub xca'c'al metro chic lix chamal. ²⁹ C'ajo' llix xiuheb xban nak que'xc'oxla nak mare tacutek' li jucub sa' xyank pec xban lix cau ok li palau. Jo'can nak que'xq'ue sa' li ha' chirix li jucub cahib li ninkin ch'ich' ancla xc'aba' re raj xxakabanquil li jucub. Ut neque'raj ta ac xsakeu. ³⁰ Ut eb laj che'ol jucub que'raj elelic sa' li jucub. Que'xq'ue li ch'ina jucub sa' ha' ut que'xbanu ribeb nak te'raj xq'uebal li ch'ich' ancla sa' ha' chiru li jucub. ³¹ Laj Pablo quixye re li capitán ut rebeb ajcui' li soldado: —Cui inc'a' neque'cana eb a'in sa' li jucub, laex inc'a' taruk texcolek', chan. ³² Jo'can nak eb li soldado que'xyoc' llix c'amat li ch'ina jucub ut que'xcanab chi sachc sa' li palau. ³³ Nak qui-oc chi cutanoc', laj Pablo quixq'ue xcacuilal xch'oleb chixjunileb ut quixye rebeb nak te'cua'ak. Quixye rebeb: —Cuib xaman anakcuán eroquic chi oybenjinc ut chixcuybal esa' chi mac'a' nequetzaca. ³⁴ Nintz'ama chéru nak texcua'ak re nak cauhakex ut ma' jun ere tacamk, chan rebeb. ³⁵ Ut nak quixye a'an, quixchap jun li caxlan cua ut quixbantioxi chiru li Dios chiruheb chixjunileb li cuanqueb aran. Ut nak quixjach, qui-oc chixcua'bal. ³⁶ Riq'unin a'in quic'oja xch'oleb chixjunileb ut que'oc ajcui' chi cua'ac eb a'an. ³⁷ Chikajunilo li cuanco sa' li jucub, cuanco cuib ciento riq'unin cuaklaju xcac'al (276). ³⁸ Nak ac xe'rake' chi cua'ac, que'oc cui'chic chixjebbal li rik li jucub ut que'xcut chi ha' li trigo re nak tásabok' li rik. ³⁹ Nak quicutano' que'xq'ue retal nak cuanqueb sa' jun na'ajej inc'a' neque'xnau

ru. Aran na-oc jun li nima' sa' li palau ut aran cuan jun li na'ajej sa' samaib chire li palau. Aran que'xc'oxla nak taruk te'xhiltesi li jucub. ⁴⁰ Que'xyoc' lix c'amal li anclas ut que'xcanab chi subunc sa' li ha'. Que'xcotz ajcui' lix bac'bal li ch'ich' li naberesin re li jucub. Ut que'xtaksi cui'chic li nimla t'icr li naramoc re li ik'. Ut yoqueb chi xic chire li ha'. ⁴¹ Li jucub quic'ame' xban li ik' bar neque'xc'ul cui' rib li nima' ut li palau. Aran quit'il sa' samaib li ru'uj li jucub. Inc'a' chic qui-ec'an sa' xna'aj. Ut li jucub yo chi jorec' xban lix cau ok li palau. ⁴² Eb li soldado que'xc'oxla nak us te'xcamsiheb chixjunil li prex re nak inc'a' te'xcut rib chi numxic chiru ha' re te'xcol rib. ⁴³ Abanan li capitán quiraj xcolbal laj Pablo. Jo'can nak quixpo' ru lix c'a'uxeb li soldado ut quixye reheb nak li ani naxnau numxic xcutakeb rib xb'en cua sa' ha' ut te'numxik re nak te'elk chi ch'och'el. ⁴⁴ Cuan li que'el chiru tz'alaman che' ut cuan que'xchap c'a'ak re ru re li jucub. Jo'ca'in nak que'cole' chixjunileb ut que'el chi ch'och'el.

28

Laj Pablo quicuulac sa' li na'ajej Malta

¹ Nak ac cuanco chic chi ch'och'el, quikanau nak li na'ajej a'an, li sutsu sa' ha', a'an Malta xc'aba'. ² Li cuanqueb aran c'ajo' li usilal que'xbanu ke. Coe'xc'ul sa' xyalal chikajunilo ut que'xtz'ab jun xam xban nak c'ajo' li hab ut c'ajo' li que. ³ Laj Pablo quixxoc chak jun k'al li ruk' che' chaki ut quixq'ue sa' li xam. Jun li c'ambolay quiélelic xban xti'kual li xam ut quixtiu li ruk' laj Pablo. T'uyt'u quicana. ⁴ Li cuanqueb sa' li na'ajej Malta, nak que'ril li c'ambolay t'uyt'u chi ruk', que'xye chi ribileb rib: —Relic chi yal nak li cuink a'in, a'an aj camsinel. Xcole' chak chiru li palau, abanan inc'a' tacanabak chi yo'yo arin chi inc'a' tixc'ul xtojbal rix lix mac, chanqueb. ⁵ Ut laj Pablo quixchik' li ruk' ut li c'ambolay quit'an'e' sa' xam ut mac'a' quixc'ul laj Pablo. ⁶ Eb a'an yoqueb chiroybeninqui jok'e tasipok laj Pablo ut tat'anek' chi camenak. Nait que'roybeni' ut nak que'ril nak mac'a' quixc'ul, que'xjal lix c'a'uxeb ut que'xye: —Dios tana li cuink a'an, chanqueb. ⁷ Aran cuan xc'alebal laj Publio li cuan xcuquil sa' li na'ajej Malta. A'an coxc'ul sa' xyalal ut riq'unin cohilan chiru oxib cutan. ⁸ Lix yucua' laj Publio t'ant'o sa' ch'at. Yo xtitk ut yo xquic' sa'. Laj Pablo qui-oc sa' li na'ajej li cuan cui'. Quixq'ue li ruk' sa' xb'en nak quitijoc ut quiq'uirtesic. ⁹ Nak que'rabi resil nak ac xq'uirtesic lix yucua' laj Publio, nabaleb li yaj li cuanqueb sa' li na'ajej a'an, que'cuulac riq'unin laj Pablo ut que'q'uirtesic. ¹⁰ Riq'unin li usilal qui-ux reheb, k'axal cui'chic coe'xra ut que'xq'ue nabal c'a'ru ke. Ut nak ac xic ke nabal li c'a'ru ke que'xsi ke re tac'anjelak ke chiru be.

Laj Pablo quicuulac Roma ut quiatinac riq'uineb laj c'amol be sa' xyankeb laj judío

¹¹ Ut nak quinume' oxib po, co-oc sa' jun li jucub re Alejandría li yo chixnumsinqui li habalk'e sa' li na'ajej Malta. Li jucub a'an cuan retalil lix dioseb chiru. Cástor ut Pólux xc'aba'eb. ¹² Cocuulac sa' li tenamit Siracusa ut aran cohilan oxib cutan. ¹³ Chirix chic a'an coo cui'chic chiru ha' ut cocuulac sa' li tenamit Regio. Cuulajak chic quiticla' li ik' li nachal sa' li sur. Yo li ik' chalen nak cocuulac sa' li na'ajej Puteoli. ¹⁴ Sa' li na'ajej a'an cuanqueb aj pabanel katauheb. Eb a'an que'xtz'ama chiku nak tocanak cuukubak cutan riq'uineb. Ut chirix a'an coo cui'chic Roma. ¹⁵ Eb laj pabanel li cuanqueb Roma que'rabi resil nak cuulac ke. Cuanqueb laj pabanel que'chal chi c'uluc ke toj cuan cui' li c'ayil Apio xc'aba' ut cuanqueb ajcui' que'c'uluc ke toj sa' li na'ajej Oxit Tabernas. Nak quiril ruheb laj pabanel, laj Pablo

quixbantioxi chiru li Dios ut quic'ojla xch'ol. ¹⁶ Nak cocuulac Roma, li capitán quixk'axtesiheb li prex re li coronel. Ut laj Pablo quicanabac chi cuanc xjunes rochben jun li soldado li na-iloc re. ¹⁷ Nak ac xnume' chic oxib cutan, laj Pablo quixbokeb li neque'c'amoc be sa' xyankeb laj judío li cuanqueb Roma. Nak acak xe'ch'utla quiatinac riq'uineb re xcolbal rib, ut quixye rebeb: —Ex cuas cuitz'in, lain inc'a' xinmacob chiruheb li cuech tenamitil chi moco xink'et lix chak'rabebe li kaxe'tonil yucua'. Abanan xinchape' Jerusalén xbaneb laj judío, ut xine'xk'axtesi sa' ruk'eb laj Roma. ¹⁸ Ut eb laj Roma nak que'rakoc atin sa' inben, ma jun inmac que'xtau re incamsinquil. Que'raj raj cuach'abanquil. ¹⁹ Abanan eb laj judío inc'a' que'raj quine'rishi. Jo'can nak quintz'ama chiruheb nak li acuabej César tarakok atin sa' inben. Moco chixjibal ta lin tenamit xinchal. ²⁰ A'an aj e nak xintakla ebokbal. Xcuaj rilbal eru ut xcuaj atinac eriq'uin. Sa' xc'aba' li jun li nakayo'oni lao aj Israel nak bac'boquin anakcuan riq'uin li cadena a'in, chan rebeb. ²¹ Ut eb a'an que'xye: —Lao ma jun hu xkac'ul chalenak ta Judea, ut ma jun li kas kitz'in xc'ulun chajitbal chi moco chixyebal junak c'a'ak re ru inc'a' us chäuix. ²² Takaj rabinquil c'a'ru nacac'oxla chirix a'an xban nak kabiom nak yalak bar xic' neque'rabi li tijleb chirix li Jesús, chanqueb. ²³ Jo'can nak que'xxakab jun li cutan re nak te'cuulak riq'uin sa' li cab li cuan cui'. Nabaleb que'cuulac riq'uin laj Pablo re nak tixch'olob xyalal chiruheb chirix lix nimajcual cuanquinal li Dios. Quixnumsi li cutan chixch'olobanquil li xyalal chirix li Jesús jo' tz'ibabil sa' lix chak'rabe laj Moisés jo' ajcui' li que'xtz'iba li profeta re nak te'xpab li Jesús. ²⁴ Cuan que'pában re li c'a'ru yo chixyebal. Abanan cuan ajcui' li inc'a' que'xpab. ²⁵ Cuanqueb li inc'a' que'cuulac chiruheb li c'a'ru yo chixyebal laj Pablo, ut que'oc chi elc. Nak ac xiqueb re, laj Pablo quixye li atin a'in: —Yal ajcui' li quixc'utbesi li Santil Musik'ej chiru li profeta Isaías chirixeb li kaxe'tonil yucua' nak quixye:

²⁶ Ayu ut taye rebeb li tenamit chi jo'ca'in: Yoke chirabinquil, abanan moco tetau ta ru lix yáalal li c'a'ru terabi; ut yokex chiribal, abanan inc'a' teg'ue retal c'a'ru xyalal li c'a'ru teril.

²⁷ Xban nak cacuubresinbil lix ch'oleb li tenamit a'in, jo'can nak inc'a' te'xtau xyalal. Inc'a' saken te'abink ut inc'a' saken te'ilok re nak inc'a' te'xtau xyalal li c'a'ru te'r'il ut inc'a' te'xtau xyalal li te'rabi. Inc'a' te'xtau xyalal, chi moco te'xjal xc'a'ux, chi moco tebing'uirtesi, chan li Dios. (Is. 6:9-10.)

²⁸ Jo'can nak chenauhak nak li resil li colba-ib li naxq'ue li Dios quiq'uehe' rebeb li macua'eb aj judío. A'an eb chic te'abink re, chan laj Pablo. ²⁹ Nak que'rabi a'in, eb laj judío que'coeb ut yoqueb chixcuech'inquil rib. ³⁰ Cuib chihab quicuan aran Roma laj Pablo sa' li cab li quixto'oni. Ut quixc'uleb chi sa sa' xch'ol chixjunileb li que'cuulac riq'uin. ³¹ Yo chixch'olobanquil lix yáalal lix nimajcual cuanquinal li Dios ut yo chixyebal resil li Kacua' Jesucristo chi mac'a' xxiu. Ut ma ani quiramoc chiru xyebal.

Li Hu li Quixtz'iba li San Pablo reheb laj Roma

Xq'uebal xsahileb xch'ol

¹ Lajin laj Pablo laj c'anjal chiru li Kacua' Jesucristo. Sic'bil chak cuu xban li Dios chok' x-apóstol ut taklanibilin chixyebal resilal li colba-ib. ² Li Dios quixyechi' li colba-ib a'in chalen chak najter ut eb li profetas que'xtz'iba retalil sa' li Santil Hu. ³ A'an a'in resilal li Kacua' Jesucristo li Ralal li Dios. Li Kacua' Jesucristo tz'akal cuink xban nak quiyo'la arin sa' ruchich'och' riq'un jun reheb li ralal xc'ajol laj David. ⁴ Li Kacua' Jesucristo a'an tz'akal Dios. Numtajenak lix santil. Riq'unin lix nimal xcuauquil, li Dios quixcuaclesi cui'chic chi yo'yo sa' xyankeb li camenak re xc'utbal chiku nak a'an tz'akal Ralal li Dios. ⁵ Sa' xc'aba' li Kacua' Jesucristo q'uebilin chok' apóstol xban li Dios re xch'olobanquil xyalal chiruheb li tenamit yalak bar re nak te'xpab li Jesucristo ut te'xbanu li c'a'ru naraj. ⁶ Jo'can ajcui' laex sic'bil ajcui' eru, ut laex chic ralal xc'ajol li Kacua' Jesucristo. ⁷ Yoquin chi tz'ibac eriq'unin laex li cuanquex aran sa' li tenamit Roma. Raroquex ut bokbilex xban li Dios ut laex aj santil pabanel. Li usilal ut li tuktukilal chi cuanc eriq'unin xban li Dios Acuabej ut xban li Kacua' Jesucristo.

Laj Pablo naraj xic Roma

⁸ Xben cua ninbantioxi chiru li Dios sa' xc'aba' li Kacua' Jesucristo xban nak yalak bar na-abiman resil nak tz'akal nequepab li Cristo. ⁹ Ninc'anjelac chiru li Dios ut chi anchal inch'ol ninye resil li Kacua' Jesucristo li Ralal li Dios. Li Dios naxnau nak junelic yoquin chi tijoc cherix. ¹⁰ Cui li Dios naxq'ue cue, chi seb tincuulak eriq'unin. A'an li nintz'ama junelic chiru li Dios. ¹¹ Nacuaj rilbal eru ut nacuaj etenk'anquil re nak cauhakex sa' le pabal. ¹² Ut nacuaj rilbal eru re nak takatenk'a kib sa' li kapabal, laex jo' ajcui' lajin, xban nak junaj li kapabal. ¹³ Ex herman, nacuaj nak tenau nak nabal sut ninc'oxla raj xic eriq'unin, abanan toj maji' naru ninxic. Mare cuan raj te'pabank aran nak te'rabi ratin li Dios li tinch'olob xyalal chiruheb jo' nak que'paban chak chicu sa' eb li tenamit quinnume' cui' chak. ¹⁴ Tenebanbil sa' inben c'anjelac sa' xyankeb laj griego jo' ajcui' li macua'eb aj griego. Tinc'anjelak sa' xyankeb li tzolbileb jo' ajcui' li inc'a' tzolbileb. ¹⁵ Jo'can nak nacuaj tinch'olob xyalal li colba-ib cheru laex li cuanquex Roma.

Lix cuanquil li colba-ib

¹⁶ Inc'a ninxutanac chixch'olobanquil xyalal li colba-ib xban nak a'an lix nimal xcuauquil li Dios re xcolbal chixjunil li te'pabank re. Li colba-ib xben cua q'uebil reheb laj judío ut q'uebil ajcui' reheb li macua'eb aj judío. ¹⁷ Lix yatal li colba-ib naxc'ut chiku nak ca'aj cui' riq'unin xpabankuil li Dios tic' chic li kach'ol chiru ut cuanko chi sum atin riq'unin, jo' naxye sa' li Santil Hu: Li tic xch'ol riq'unin xpabankuil li Dios cuan xyu'am chi junelic. (Hab. 2:4)

¹⁸ Li Dios yo' chak xjosk'il toj sa' choxa sa' xbeneb laj mac. Riq'unin lix mausilaleb neque'xtz'ektaña lix yatal ut neque'xmuk ajcui' chiruheb li ras ritz'in. ¹⁹ Chixjunil li c'a'ak re ru nanauman chirix li Dios, ac ch'olch'o chiruheb. A' li Dios ajcui' quic'utbesin chiruheb. Aban inc'a neque'xq'ue xcuauquil li xyalal. ²⁰ Chalen chak sa' xticlajic li ruchich'och' nac'utun xcuauquil ut xlok'al li Dios riq'unin li c'a'ak re ru quilaixyib. Nac'utun nak a'an li tz'akal Dios ut k'axal nim xcuauquil chi junelic. Jo'can nak mac'a' junak atin te'xcol cui' rib chiru xjosk'il li Dios. ²¹ Neque'xnau nak cuan

li Dios, aban inc'a' que'xq'ue xlok'al chi moco que'bantioxin chiru. Ca'aj cui' li jo' majo'il na'leb neque'xc'oxla ut xban a'an nak quik'ojyino' ru lix c'a'uxeb. ²² Eb a'an neque'xye nak cuanqueb xna'leb abanan ma'c'eb xna'leb. ²³ Inc'a' neque'xlok'oni li yo'yoquil Dios. A' chic lix jalám uch li cuink li nacam, a'an chic neque'xlok'oni. Út lix jalám uch li xul neque'xq'ue chok' xdiobes jo' li xul li neque'rupucit ut li xul li neque'bëc, jo'queb ajcui' li neque'xjucuqui rib chiru ch'och'. ²⁴ Jo'can nak li Dios quixtz'ektanaheb sa' xyibal ru lix mausilaleb toj retal neque'xc'ut xxutaneb chi ribileb rib xban nak neque'xbanu li jo' majo'il na'leb. ²⁵ Inc'a' que'xpab li tz'akal Dios. A' chic li tic'ti' que'xq'ue xcuanquil. Que'xnima ru ut que'xq'ue xlok'al li c'a'ak re ru yibabil xban li Dios ut inc'a' que'xlok'oni li tz'akal Dios. Ca'aj cui' li tz'akal Dios a'an xc'ulub li lok'onic chi junelic. Jo'can taxak. ²⁶ Li Dios quixtz'ektanaheb sa' lix xutanalil na'leb xban lix mausilaleb. Ut eb li ixx inc'a' chic que'raj cuanc riq'uinbe llix belom. Riq'uin ban chic li rech ixxkil que'xbanu li moco uxc ta naraj. ²⁷ Ut jo'can ajcui' li cuink inc'a' chic que'raj li ixx li quicanabac reheb xban li Dios. Que'tikcuo' xjolomeb xban lix mausilaleb chi ribileb rib ut yoqueb chixbanunquil li tz'ekbetal aj na'leb riq'uin rech cuinkilal. Ut que'xc'ul ajcui' xtojbal rix lix mausilaleb jo' xc'ulubeb. ²⁸ Xban nak inc'a' neque'xc'oxla li Dios, jo'can nak que'tz'ektanac xban li Dios sa' li tz'ekbetal aj na'leb chixbanunquil li moco uxc ta naraj. ²⁹ Numtajenakeb xyibal ru lix na'lebeb ut lix mausilaleb. Aj yumbeteb ut aj co'beteb. Neque'xra ru li c'a'ru cuan reheb li ras ritz'in ut k'axal josk'eb. Numtajenakeb chi aj cakal, aj camsihomeb ras ritz'in, aj pléteb, aj balak'eb ut aj molol atineb. ³⁰ Junes yo'obanc atin neque'xbanu chirixeb li ras ritz'in. Xic' neque'r'il li Dios. Neque'hoboc. Neque'xnimobresi rib ut k'etk'eteb. Aj k'abaneleb ut aj k'etoleb ratin xna' xyucua'. ³¹ Inc'a' neque'xtau xyalal. Inc'a' neque'xbanu li c'a'ru neque'xsume xbanunquil. Inc'a' neque'rahoc. Inc'a' neque'cuyuc mac, ut inc'a' neque'uxtanan u. ³² Ac ch'olch'o chiruheb li c'a'ru quixye li Dios. Neque'xnau nak lix tojbal rix li mac, a'an li cämc. Aban toj yoqueb ajcui' chixbanunquil li mac. Ut macua' ca'aj cui' a'an neque'xbanu. Neque'saho' ajcui' sa' xch'ol chiribaleb li ras ritz'in nak yoqueb chixbanunquil li inc'a' us.

2

Li Dios narakoc atin sa' tiquilal

¹ ¿Anihat laat nak tatrakok atin sa' xbeneb la cuas acuitz'in? Cui nacarak atin sa' xbeneb la cuas acuitz'in ut toj yocat ajcui' chixbanunquil li inc'a' us laat jo' yoqueb a'an, raylal ajcui' yocat chixbokbal sa' aben ut tarakek' atin sa' aben. ² Nakanau nak li Dios tjc xch'ol ut a'an tarakok atin chi tz'akal sa' xbeneb li neque'banun re li mausilal. ³ Laat nacatrakoc atin sa' xbeneb li neque'banun re li mausilal ut nacabánu ajcui' li mausilal laat. ¿C'a'ru nacaye? ¿Ma inc'a' ta bi' tatxq'ue li Dios chixtojbal rix amac laat? ⁴ ¿Ma tatz'ektaña lix nimal ruxtan li Dios? ¿Ma tatz'ektaña lix cuyum ut lix k'unil xch'ol? ¿Ma inc'a' nacaq'ue retal nak xban lix nimal rusilal li Dios naraj nak tayot' ach'ol tajal ac'a'ux? ⁵ Aban laat cau ach'ol. Jo'can nak inc'a' nacayot' ach'ol inc'a' nacajal ac'a'ux. Ut riq'uin a'an yocat chixbokbal xjosk'il li Dios sa' aben. Toxacuul xjosk'il nak tacuulak xk'ehil nak li Dios tarakok atin sa' tiquilal. ⁶ Sa' li cutan a'an li Dios tixq'ue xk'ajcämunquil li junjunk a' yal chanru lix yehom xbanuhomeb. ⁷ Li Dios tixq'ue xyu'am chi junelic li ani naxq'ue xch'ol chixbanunquil li chabilal li naraj li Dios re nak tixtau lix lok'al, lix nimanquil ru, ut lix yu'am chi junelic. ⁸ Aban riq'uin xjosk'il li Dios tixq'ueheb chixtojbal xmaqueb li neque'xnimobresi rib ut inc'a' neque'raj

xpábanquil li xyalal. Eb a'an ca'aj cui' li inc'a' us neque'xc'oxla. ⁹ Raylal ut ra xic' tachalk sa' xbeneb chixjunileb li neque'banun re li inc'a' us. Xben cua tachalk sa' xbeneb laj judío ut tachalk ajcui' sa' xbeneb li macua'eb aj judío. ¹⁰ Aban li Dios tixq'ue xcuanquil, xlok'al ut tuktquil usilal rehēb chixjunileb li neque'banun re li chabilal. Tixq'ue xben cua rehēb laj judío ut tixq'ue ajcui' rehēb li macua'eb aj judío. ¹¹ Li Dios inc'a' naxsic' ru li junjunk. Junajo ban chiru. ¹² Li ani neque'macob chi inc'a' neque'xnau li chak'rab li quiq'uehe' re laj Moisés xban li Dios, tarakek' atin sa' xbeneb ut te'sachk usta inc'a' neque'xnau li chak'rab. Ut chixjunileb li neque'xnau li chak'rab ut neque'macob, tarakek' ajcui' atin sa' xbeneb jo' naxye sa' li chak'rab. ¹³ Chiru li Dios inc'a' tíc xch'ol junak yal riq'uin xnaubal li chak'rab. Aban li neque'banun re li naxye li chak'rab tiqueb xch'ol chiru li Dios. ¹⁴ Li macua'eb aj judío inc'a' neque'xnau li chak'rab li quiq'uehe' re laj Moisés. Abanan usta mac'a'li chak'rab, cuan ajcui' nak neque'xbanu jo' naxye sa' li chak'rab xban nak neque'rec'a sa' xch'ol c'a'ru li us ut c'a'ru li inc'a' us. ¹⁵ Nac'utun riq'uin lix yehom xbanuhomeb nak ac neque'xnau c'a'ru naxye sa' li chak'rab usta ma jun sut rabiomeb li chak'rab. Neque'rec'a sa' xch'oleb ma us malaj inc'a' us li yoqueb chixbanunquil. ¹⁶ Xakabanbil li Jesucristo xban li Dios re tarakok atin sa' xbeneb chixjunileb nak tacuulak xk'ehil. Li Cristo naxnau chanru lix ch'ol li junjunk usta mukmu chiku ləo. Jo'can naxye resilal li colba-ib li ninjultica lain.

Eb laj judío ut lix chak'rab laj Moisés

¹⁷ Laat aj judío, ut riq'uin a'an nacanimobresi acuib, ut nacaye nak li Dios a'an aj échal acue. Ut nacac'ojob aq'ch'ol riq'uin lix chak'rab laj Moisés. ¹⁸ Xban nak xatzol li chak'rab, nacanau c'a'ru naraj li Dios. Nacanau c'a'ru li us ut nacanau c'a'ru li inc'a' us. ¹⁹ Nacaq'ue acuib jo' aj c'utul xbeheb li mutz'. Nacaye nak laat xcutaneb li cuanqueb sa' k'ojojin. Ninc'ut li xyalal chiruheb, chancat. ²⁰ Nacaye nak laat aj tzolol rehēb li inc'a' tzolbileb ut li inc'a' neque'xnau xyalal. Nacaye nak sa' li chak'rab nacatau ana'leb chi tz'akal ut aran nacatau xyalal. ²¹ Cui laat nacatzoleb li jalan chic, ¿c'a'ut nak inc'a' nacatzol acuib laat? Laat nacach'olob xyalal nak inc'a' us li elk'ac. ¿C'a'ut nak toj yocat ajcui' chi elk'ac laat? ²² Laat nacaye nak inc'a' us li muxuc caxar. ¿C'a'ut nak toj nacatmuxuc caxar laat? Cui xic' nacacuil eb li yibanbil dios, ¿c'a'ut nak nacatzic chi elk'ac sa' li rochocheb? ²³ K'axal nim acuanquil nak nacacuec'a acuib xban nak nacanau li chak'rab li quiq'uehe' re laj Moisés. Abanan nacatz'ektana li Dios riq'uin nak nacak'et lix chak'rab. ²⁴ Jo' naxye sa' li Santil Hu: Sa' ec'aba' laex aj judío, neque'xmajecua li Dios li macua'eb aj judío. (Is. 52:5) ²⁵ Relic chi yal li circuncisión cuan xyalal cui nacapab li chak'rab li quiq'uehe' re laj Moisés xban li Dios. Aban cui nacak'et lix chak'rab mac'a'na-oc cui' nak xac'ul li circuncisión. ²⁶ Cui junak cuink macua' aj judío inc'a' naxc'ul li circuncisión, aban naxpab ut naxbanu li c'a'ru naxye li chak'rab, li cuink a'an taq'uehek' ajcui' sa' ajl sa' xyankéb li que'xc'ul li circuncisión. ²⁷ Usta inc'a' xc'ul li circuncisión cui naxbanu tz'akal li tz'ibanol sa' li chak'rab, li cuink a'an naxc'ut axután ut tarakek' atin sa' aben xban nak nacak'et li chak'rab. Mac'a'na-oc cui' acue nak xac'ul li circuncisión, chi moco nak nacanau li tz'ibanol sa' li chak'rab cui inc'a' nacabánu li c'a'ru naxye. ²⁸ Li tz'akal aj judío macua' aj judío yal xban xc'ulbal li circuncisión. Riq'uin ban xpábanquil li chak'rab. Lix yalal li circuncisión macua' ca'aj cui' li na-ux riq'uin li tz'ejcualej. ²⁹ Li tz'akal aj judío naxpab chi tz'akal lix chak'rab li Dios. Ut li tz'akal circuncisión inc'a'

nac'ulman riq'uin xbənunquil li chak'rab. A'an ban li naxbənu li Santil Musik'ej sa'li ram li junjunk. Ut lix lok'al laj pəbanel inc'a' naq'uehe' xbaneb li cujnk. Li Dios ban naq'uehoc xlok'al.

3

¹ ¿C'a'ru rusil li cuānc chok' aj judío? Ut, ¿c'a'ru rajbal xc'ulbal li circunsición? ² Li cuānc chok' aj judío, a'an a'in li rusil: nak li Dios quixq'ue li ratin reheb xbən cua. ³ Cuanqueb laj judío inc'a' que'xbənu li quixye li Dios. ¿Ma yal sa' xmaqueb ta bi' a'an nak li Dios inc'a' tixq'ue li quixyechi'i? ⁴ ¡Ma jok'e bi'an! Li Dios yal naqtinac usta chixjunileb li cristian aj tic'ti'eb. Jo' tz'ib'anbil sa'li Santil Hu li quixye laj David re li Dios. Quixye chi jo'ca'in: Junelic yal nacatatinac. Usta nacate'xk'aba, aban māc'a' amac. ⁵ Cuanqueb neque'yehoc nak riq'uin li māusilal nac'utun chi us li rusilal li Dios. Jo'can nak us xbənunquil li māusilal re nak tac'utunk xchābilal li Dios. Inc'a' us cui li Dios nocoxq'ue chi xtojbal li kamāc, chanqueb. Aban mācu'a' a'an li naxye li Dios. Inc'a' naru nakaye nak inc'a' toxq'ue chixtojbal li kamāc xban nak nakanau nak tíc xch'ol li Dios. Jo'can nak tixq'ue chixtojbal xmāc laj māc. ⁶ Relic chi yal nak tíc xch'ol li Dios. Cui ta inc'a', ¿chan raj ru nak tixrak atin sa' xbeneb li cuānc queb sa' ruchich'och? ⁷ Ut cuānc queb ajcui' li neque'yehoc nak riq'uin li tíc'ti'ic neque'xbənu, taq'uehek' xcuānc queb li yal li naxye li Dios ut k'axal cui'chic talok'onik ru li Dios. Ut cui riq'uin li katic'ti' nālōk'onič ru li Dios, ¿c'a'ut nak naxye nak lāo aj māc chi jo'canan? ⁸ Us cui nakabənu li māusilal re nak tānimāk xlok'al li Dios, chanqueb. ¿C'a'ru nequeye lāex? ¿Ma takabənu li inc'a' us re nak tānimāk xlok'al li Dios? Ma jaruj taruk taq'uemank xlok'al li Dios riq'uin li kamausilal. Cuan li neque'yehoc nak a'an a'in li tijleb ninch'olob xyālal, abanan moco jo'can ta li yoqun chixyebal. Li neque'yehoc re a'an xc'ulubeb nak te'xtoj rixlix maqueb.

Ma ani tíc xch'ol

⁹ ¿C'a'ru takaye chirix a'in? ¿Ma k'axal chābilo ta bi' lāo aj judío chiruhēb li mācu'a'eb aj judío? Relic chi yal nak inc'a'. Chikajunilo ban lāo aj māco, lāo aj judío jo'queb ajcui' li mācu'a'eb aj judío. ¹⁰ Jo' tz'ib'anbil sa'li Santil Hu: Ma ani tíc xch'ol chiru li Dios. Yal ta jun.

¹¹ Ma ani nata'oc ru li xyālal. Ma ani naraj xsic'bal li Dios. (Sal. 14:2)

¹² Chixjunileb xe'xtz'ektana li Dios, ut jun xiquiqueb nak xe'xbənu li māusilal. Jo'can nak mā jun nabənun re li us. Yal ta jun.

¹³ C'ajo' xyibal ru neque'atina. Chanchan xchuhillli camenak sa'li muklebal. Ut junes balak'inc neque'xbənu. Li c'a'ak re ru neque'xye chanchan xmay c'anti' li nacamsin. (Sal. 5:9; 140:3)

¹⁴ Riq'uin xtz'umaleb re neque'majecuan ut junes xic' aj atin na-el sa' reheb. (Sal. 10:7)

¹⁵ Sa' junpat neque'chal xjosk'il. Neque'xrahobtesi ut neque'xcamsi li ras ritz'in.

¹⁶ Yalak bar neque'xic junes raylal ut ra xic' neque'xbənu chak reheb li ras ritz'in.

¹⁷ Ut inc'a' neque'cuan sa' usilal. Junes pletic neque'xbənu. (Is. 59:7-8)

¹⁸ Inc'a' neque'xxucua ru li Dios chi moco neque'x-oxlok'i. (Sal. 36:1)

¹⁹ Nakanau nak chixjunil li tz'ib'anbil sa'li chak'rab, a'an reheb li cuānc queb rubel xcuānc queb li chak'rab. A'an aj e nak cuan li chak'rab re nak chixjunileb te'xnau nak cuānc queb xmāc ut māc'a' chic naru te'xye, re te'xcol cui' rib chiru li Dios nak tarakek' atin sa' xbeneb. ²⁰ Ma jun tíc xch'ol chiru li Dios

yal riq'uin xbanunquil li c'a'ru naxye li chak'rab. Li chak'rab nac'anjelac re xc'utbal chiku nak lao aj mac.

Riq'uin li kapabal natico' li kach'ol

21 Li Dios quixc'utbesi chiku chanru nak taruk taticok' li kach'ol. Moco riq'uin ta xbanunquil li c'a'ru naxye li chak'rab. Ch'olobanbil li xy'alal xban li chak'rab ut xbaneb ajcui' li profeta nak macua'riq'uin xbanunquil li c'a'ru naxye li chak'rab taticok' li kach'ol chiru li Dios. **22** Taticobresik ban li kach'ol chiru li Dios riq'uin xpabankuil li Kacua' Jesucristo. Chixjunileb li te'pabank re, li Dios tixtobicresi lix ch'oleb. Moco jalan ta li junjunk chiru li Dios. **23** Chixjunileb xe'macob ut inc'a' neque'xc'ul li lok'al li naxq'ue li Dios. **24** Ut xban li rusilal li Dios, chixjunileb li neque'paban, neque'xmatani xtquilal xch'oleb sa' xc'aba' li Kacua' Jesucristo laj Colonel. **25** Li Dios quixtakla chak li Kacua' Jesucristo chi c'cmc re xcuybal xmaqueb li te'pabank re. Riq'uin li quixbanu quic'utun lix tiquilal xch'ol li Dios. Xban lix nimal xcuyum, inc'a' quixq'ue sa' xch'ol lix maqueb li tenamit li que'macob chak junxil. **26** Ut anakcuan sa' eb li cutan a'in, nac'utun lix tiquilal xch'ol li Dios riq'uin nak naxticobresi xch'ol li ani napaban sa' xc'aba' li Jesucristo. **27** ¿C'a'ru takanimobresi cui' kib? Mac'a'. Inc'a' naru takanimobresi kib xban nak macua'riq'uin xbanunquil li naxye li chak'rab natico' li kach'ol. Natico' ban li kach'ol riq'uin xpabankuil li Cristo. **28** Nakanau nak taticok' li kach'ol riq'uin xpabankuil li Cristo. Macua'riq'uin xbanunquil li naxye li chak'rab. **29** ¿Ma ca'aj cui' eb laj judio te'colek' xban li Dios? Inc'a'. Li Dios tixcoleb ajcui' li macua'eb aj judio. **30** Nakanau nak jun ajcui' li Dios. Ut a'an naxticobresi xch'oleb laj judio xban lix pabaleb jo' ajcui' li macua'eb aj judio. **31** ¿Ma nakasach xcuanguil li chak'rab xban xpabankuil li Cristo? Inc'a'. Riq'uin ban xpabankuil li Cristo yoco chixq'uebal xcuanguil li chak'rab.

4

Xban nak cuan xpabal laj Abraham, jo'can nak quiticobresic xch'ol xban li Dios

1 Anakcuan tinatinak chirix laj Abraham li kaxe'tonil yucua'. ¿Ma quiticobresic xch'ol chiru li Dios riq'uin lix yehom xbanuhom? Inc'a'. **2** Cui ta riq'uin xyehom xbanuhom quiticobresic xch'ol laj Abraham, cuan raj c'a'ru quixnimobresi cui' rib. Abanan macua'raj chiru li Dios. **3** Tz'ibanol sa' li Santil Hu nak laj Abraham quixpab li c'a'ru quixye li Dios. Ut xban lix pabal, li Dios quixye nak laj Abraham a'an jun cuink tic xch'ol. (Gn. 15:6) **4** Li ani natrabajic naxc'ul xtojbal. Lix tojbal naxc'ul a'an moco yal xmatan ta xban nak ac xtoj rix. **5** Aban li colba-ib inc'a' natojman rix. A'an yal jun maqtan naxq'ue li Dios reheb laj mac li neque'paban re. Xban nak neque'paban, tobicresinbileb xch'ol xban li Dios. **6** Laj David quixye nak us xak re li naxmatani xtquilal xch'ol riq'uin li Dios chi macua' xban xyehom xbanuhom. Yal chi maqtan ban naxc'ul lix tiquilal xch'ol. **7** Laj David quixye chi jo'ca'in:

Us xak reheb li cuybil sachbil xmaqueb, xban nak inc'a' chic nanak sa' xch'ol li Dios lix mausilaleb.

8 Us xak reheb li inc'a' chic neque'c'oxlac lix maqueb xban li Dios. (Sal. 32:1-2)

9 ¿Ut aniheb li te'cuyek' te'sachek' lix mac? ¿Ma ca'aj cui' li que'xc'ul li circuncisión? Inc'a'. Reheb aj ban cui' li inc'a' que'xc'ul li circuncisión. Ac xinye li c'a'ru tz'ibanol sa' li Santil Hu chirix laj Abraham. Xban nak cuan xpabal laj Abraham, li Dios quixye nak a'an jun cuink tic xch'ol. (Gn. 15:6)

10 Laj Abraham maji' naxc'ul li circuncisión nak li Dios quixye nak li cuink a'an tic xch'ol. **11 Mokon chic laj Abraham quixc'ul li circuncisión jo' retalil nak a'an jun cuink tic xch'ol chiru li Dios xban lix pabal.** Laj Abraham quixpab li Dios nak maji' naxc'ul li circuncisión. Jo'can nak nayeman nak laj Abraham a'an xyucua'eb chixjunileb li neque'xpab li Dios ut neque'q'uehe' sa' ajl sa' xyankeb li tiqueb xch'ol usta inc'a' neque'xc'ul li circuncisión. **12 Ut laj Abraham xyucua'eb ajcui' li que'xc'ul li circuncisión.** Macua' ca'aj cui' xban nak que'xc'ul li circuncisión. Xyucua'eb aj ban cui' xban nak que'xpab li Dios jo' nak quixpab li Dios laj Abraham nak toj maji' naxc'ul li circuncisión.

Xban li pabal nac'ulman li naxyechi'i li Dios

13 Li Dios quixyechi'i re laj Abraham jo' ajcui' reheb li ralal xc'ajol nak eb a'an te'echanjek re li ruchich'och'. Macua' riq'uin xbanunquik li naxye li chak'rab nak te'rechani. Quiyechi'ic ban reheb xban nak quipaban laj Abraham ut li Dios quixye nak laj Abraham a'an jun cuink tic xch'ol. **14 Cui ta ca'aj cui' li cuanqueb rubel xcuanquik li najter chak'rab li te'echanjink re li yechi'inbil xban li Dios,** mac'a'raj na-oc cui' li kapabal. Ut mac'a'raj na-oc cui' li yechi'inbil xban li Dios. **15 Nachal xjosk'il li Dios sa' xbeneb li neque'k'etoc re li chak'rab.** Xban nak cuan li chak'rab, cuan li k'etoc atin. Cui ta mac'a' li chak'rab, mac'a' raj k'etoc atin. **16 Xban nak cuan xpabal laj Abraham, li Dios quixyechi'i li matan re xban xnimal rusilal.** Ut quixyechi'i ajcui' reheb chixjunileb li ralal xc'ajol. Li yechi'inbil macua' ca'aj cui' reheb li cuanqueb rubel xcuanquik li chak'rab. Reheb aj ban cui' chixjunileb li neque'paban jo' nak quipaban laj Abraham. Jo'can nak nayeman nak laj Abraham a'an li kayucua' chickajunilo xban nak a'an laj c'amol be chiku sa' li kapabal. **17 Tz'ib'anbil sa' li Santil Hu li quixye li Dios re laj Abraham:** Xatinq'ue chok' xxe'tonil yucua' li q'uila tenamit. (Gn. 17:5)

Ut chiru li Dios toj cuan ajcui' xcuanquik li c'a'ru quixyechi'i re laj Abraham. Laj Abraham quixpab li Dios li nacuaclesin cui'chic reheb li camenak chi yo'yo ut yal riq'uin räatin naxyo'obtesiheb li c'a'ak re ru toj mac'a'. **18 Laj Abraham quixpab li quixye li Dios ut quiroybeni li quiyechi'ic re usta inc'a' naxnau chanru nak taq'uehek' re li ralal xc'ajol.** Jo'can nak a'an xyucua'eb li q'uila tenamit jo' quiyechi' re xban li Dios, —Te'q'uiqank la' cualal ac'ajol, ch'u'x re xban li Dios. (Gn. 15:5) **19 Ca'ch'in chic ma o'c'al chihab cuan re laj Abraham.** A'an naxnau nak xban xtixilal inc'a' raj chic tacuank ralal xc'ajol. Ut naxnau ajcui' nak lix Sara inc'a' naq'uiresin. Aban inc'a' quich'inan xch'ol laj Abraham. Quixpab ban chi tz'akal nak tacuank ralal xc'ajol. **20 Inc'a' quixcuiba xch'ol chi moco quixcanab roybeninquil lix matan li quiyechi'ic re xban li Dios.** Cacuuc ban chic quixbañu sa' lix pabal ut quixlok'oní li Dios. **21 Laj Abraham quixpab chi anchal xch'ol nak li Dios k'axal nim xcuanquik ut tixq'ue li c'a'ru naxyechi'i.** **22 Ut xban lix pabal laj Abraham, li Dios quixye nak a'an jun cuink tic xch'ol.** **23 Ut moco ca'aj cui' ta sa' xc'aba' laj Abraham nak quitz'ibac retalil nak tic xch'ol xban lix pabal.** **24 Quitz'ibac aj ban cui' sa' kac'aba' lão.** Li Dios naxye nak tic ajcui' li kach'ol lão cui takapab chi tz'akal li quicuaclesin re li Kacua' Jesucristo chi yo'yo sa' xyankeb li camenak. **25 Li Jesucristo quixk'axtesi rib chi camc xban li kamac ut quicuaclí cui'chic chi yo'yo sa' xyankeb li camenak re xticobresinquil li kach'ol chiru li Dios.**

5

Chanru nak natauman li tiquil ch'olej

1 Jo'can ut nak t'icobresinbil chic li kach'ol chiru li Dios xban li kapabal, ut cuanco chic sa' usilal riq'uin li Dios xban li Kacua' Jesucristo. **2 Xban**

nak nakapab li Jesucristo nakac'ul lix nimal rusilal li Dios. Jo'can nak cau kach'ol sa' li kapabäl. Ut nasaho' kach'ol xban nak nakanau nak totz'akonk ajcui' sa' lix nimal xlok'al li Dios. ³ Ut moco ca'aj cui' ta nasaho' kach'ol nak totz'akonk sa' lix lok'al li Dios. Nasaho' aj ban cui' sa' kach'ol nak nakac'ul li raylal. Nakanau nak riq'uin xc'ulbal li raylal nakatzol li cuyuc. ⁴ Ut xban li cuyuc nacacuu kach'ol sa' li kapabäl, ut xban xcacuilal kach'ol nakayo'oni li yechi'inbil ke xban li Dios. ⁵ Li c'a'ru nakayo'oni nakanau nak takac'ul, xban nak k'axal nocoxra li Dios ut naxc'ut chiku lix nimal xrahom xban li Santil Musik'ej li q'uebil chak ke. ⁶ Lao inc'a' naru nakacol kib yal kajunes. Abanan quicuulac xk'ehil nak quicam li Kacula' Jesucristo re kacolbal lao aj mac. ⁷ Moco yalak ani ta tixq'ue rib chi cämc sa' xc'aba' junak ras ritz'in usta chabil li ras ritz'in chiru. Abanan cui k'axal tic xch'ol li ras ritz'in, mare cuan ajcui' junak tixq'ue rib chi cämc sa' xc'aba' a'an. ⁸ A'ut li Dios naxc'utbesi chiku nak k'axal nocoxra xban nak toj aj maco chak nak quicam li Cristo sa' kac'aba'. ⁹ Ut anakcuan tic chic li kach'ol chiru li Dios xban xcamic li Jesucristo. Jo'can nak relic chi yal nak sa' xc'aba' li Cristo tocolek' chiru lix josk'il li Dios sa' xk'ehil li rakba atin. ¹⁰ Nak toj aj maco chak xic' nakil li Dios. Aban li Dios xoxc'am sa' usilal riq'uin sa' xc'aba' lix camic li Ralal. Ut anakcuan nakanau chic nak cuanco sa' usilal riq'uin li Dios ut colbilo xban nak li Cristo quicuacli cui'chic chi yo'yo. ¹¹ Ut moco ca'aj cui' ta li kacolbal quixq'ue li Dios. Naxq'ue aj ban cui' lix sahilal kach'ol sa' xc'aba' li Kacula' Jesucristo li quic'amoc ke sa' usilal riq'uin li Dios. ¹² Jo'ca'in nak quiticla li mac sa' ruchich'och', yal xban jun chi cuink aj Adán xc'aba'. Ut xban li mac cuan li cämc ut chixjunileb neque'cam xban nak chixjunileb xe'macob. ¹³ Nak toj maji' quiq'uehe' li chak'rab re laj Moisés, ac cuan li mac sa' ruchich'och'. Aban inc'a' nayeman nak cuanqueb xmäc xban nak toj mac'a' li chak'rab re xc'utbal chiruhel nak a'an eb aj mac. ¹⁴ Chalen nak quicuan chak laj Adán toj nak quiq'uehe' lix chak'rab laj Moisés, chixjunileb quilaje'cam usta inc'a' que'macob riq'uin xk'etbal xchak'rab li Dios jo' quixbanu laj Adán nak quixk'et li atin li quiyeh'e' re xban li Dios. Xban laj Adán quiticla chak li mac ut li cämc, ut xban li Cristo cuan li colba-ib ut li yu'am chi junelic. ¹⁵ A'ut li mañan naxq'ue li Dios moco juntak'et ta riq'uin li mac quixbanu laj Adán li xben cuink. Li camc cuan sa' xbeneb chixjunileb xban nak quiq'etoc atin laj Adán. Aban sa' xc'aba' li Jesucristo nabaleb neque'xc'ul li colba-ib li naxq'ue li Dios. Ut k'axal cui'chic numtajenak li rusilal naxq'ue ke. ¹⁶ Li mac quixbanu laj Adán inc'a' naru xjuntak'etanquil riq'uin li colba-ib quixq'ue li Dios xban nak k'axal nim xcuanguil li colba-ib. Xban nak quimacob laj Adán, jo'can nak cuan li tojba mac. Aban li mañan li naxq'ue li Dios naxticobresi li kach'ol ut sa' xc'aba' li Jesucristo nabaleb te'colek'. ¹⁷ Xban lix mac laj Adán, chixjunileb cuanqueb rubel xcuanguil li camc. Aban xban xnimal rusilal li Dios, nabaleb te'xc'ul li mañan li naxq'ue li Dios, a' li tiquil ch'olej, ut tacuank xcacuil xch'oleb sa' lix pabaleb sa' xc'aba' li Kacula' Jesucristo. ¹⁸ Xban lix k'etba atin laj Adán cuan li tojba mac sa' xbeneb chixjunileb li cuanqueb sa' ruchich'och'. A'ut xban lix tiquilal xch'ol li Cristo, mac'a' chic xcuanguil li tojba mac sa' xbeneb. Cuank ban chic xyu'ameb chi junelic. ¹⁹ Jo'can nak xban lix k'etba atin laj Adán, nabaleb que'cana chok' aj mac. Ut xban nak li Jesucristo quixbanu li c'a'ru quixye li Dios, nabaleb te'ticok' xch'ol chiru li Dios. ²⁰ Li chak'rab quiq'uehe' re xc'utbal nak numtajenak li mac. Ut nak quinumta li mac, k'axal cui'chic quinumta li rusilal li Dios sa' xben li mac. ²¹ Xban nak cuan li mac, cuan ajcui' li cämc. Abanan xban xnimal rusilal, li Dios naxq'ue xtiquilal li kach'ol ut li kayu'am chi junelic sa' xc'aba' li Kacula' Jesucristo.

6

Camenako xban li māc, aban yo'yoco sa' xc'aba' li Jesucristo

¹ ¿C'a'ru takaye chirix chixjunil a'in? ¿Ma toj yoko ajcui' chixbanunquil li māc re nak k'axal cui'chic tanumtak li rusilal li Dios sa' kabēn? ² ¡Ma jok'e! Māmin taruk. Chanchan nak ac camenako lāo xban nak moco cuan ta chic xcuanquil li māc sa' kabēn. Cui māc'a' chic xcuanquil li māc sa' kabēn, ¿c'a'ut nak toj yoko chi macobc? ³ Relic chi yal nequenau nak lao xkac'ul li cubi ha' xban nak xkapab li Jesucristo. Nak xkac'ul li cubi ha' chanchan nak xocam kochben li Jesucristo xban nak xkacanab xbānunquil li kanajter na'leb. ⁴ Jo'can nak riq'uin xc'ulbal li cubi ha', chanchan nak ac xocam ut xomuke' kochben li Cristo re nak tocuaclik cui'chic chi yo'yo ut tocuanq sa' li aq'uil yu'am, jo' nak li Jesucristo quicuaclí cui'chic chi yo'yo sa' xyānkeb li camenak riq'uin xnimāl xlok'al ut xcuanquilal li Dios Acuābej. ⁵ Cui lāo xotz'akon kochben li Cristo sa'lix camic, jo'can ajcui' nak totz'akonk sa'lix cuaclijic cui'chic chi yo'yo sa' li ac' yu'am. ⁶ Nakanau nak li kanajter na'leb quiq'uehe' chiru cruz rochben li Cristo. Naraj naxye nak quisache' xcuanquil li kanajter na'leb nak quicam li Cristo. Ut anakcuan inc'a' chic cuanco rubel xcuanquil li māc jo' nak xocuan chak junxil nak xkac'anjela chak ru li māc. ⁷ Li ac xcam inc'a' chic namācob. Jo'can ajcui' lāo cui camenak chic li kanajter na'leb, inc'a' chic yoko chixbanunquil li māc. ⁸ Cui ac xocam kochben li Cristo, nakanau nak yo'yoco ajcui' kochben sa' li ac' yu'am. ⁹ Lao nakanau nak li Jesucristo quicuaclí cui'chic chi yo'yo sa' xyānkeb li camenak. Li Cristo inc'a' chic tacamk xban nak māc'a' chic xcuanquil li cāmc sa' xben. ¹⁰ Jun sut ajcui' quicam li Cristo ut anakcuan yo'yo chic. Quicam re xsachbal xcuanquil li māc. Ut anakcuan yo'yo chic li Cristo re xq'uebal xlok'al li Dios. ¹¹ Jo'can ajcui' laex. Cheq'uehak retal nak chanchan ajcui' nak camenakex ut māc'a' chic xcuanquil li māc sa' eben. Ac' chic le yu'am q'uebil ere xban li Kacu'a Jesucristo ut junajex chic riq'uin. Yo'yoquex re nak texc'anjelak chiru li Dios. ¹² Jo'can nak meq'ue chic erib rubel xcuanquil li māc ut mebānu chic li c'a'ru naxrahi ru le ch'ol. ¹³ Chi moco cheq'ue erib chixbanunquil li māusilal. Chek'axtesi bān erib sa' ruk' li Dios. Xban nak ac xec'ul li ac' yu'am chanchan nak xexcuacli cui'chic chi yo'yo sa' xyānkeb li camenak. Jo'can nak cheq'ue le rok eruk' chi c'anjelak chiru li Dios re xbānunquil li us. ¹⁴ Inc'a' chic cheq'ue erib rubel xcuanquil li māc. Anakcuan cuanquex rubel xcuanquil līx nimāl rusilal li Dios. Moco cuanquex ta chic rubel xcuanquil li chak'rāb li quiq'uehe' re laj Moisés.

Inc'a' chic toc'anjelak chiru li māc

¹⁵ Anakcuan cuanco sa'rusilal li Dios. Moco cuanco ta chic rubel xcuanquil li chak'rāb. ¿Ma yal xban nak inc'a' cuanco rubel xcuanquil li chak'rāb nak tomācobk? ¡Inc'a' bi'an! ¹⁶ Ac nequenau nak cui teq'ue erib chi c'anjelak chiru junak patrón, a'an chic tataklank ere. Jo'can ajcui' cui teq'ue li māc chok' epatrón ut teq'ue erib chok' aj c'anjel chiru, texcamk. Aban cui teq'ue erib chi taklāc xban li Dios, taticobresik le ch'ol. ¹⁷ Junxil cuanquex rubel xcuanquil li māc. A'ut anakcuan, bāntiox re li Dios, chi anchal ech'ol nequepab li tijleb li xek'axtesi cui' erib. ¹⁸ Anakcuan colbilex chic chiru li māc. Ut xek'axtesi erib jo' aj c'anjel chiru li Dios chixbanunquil li tiquilal. ¹⁹ Ninch'olob xyālāl cheru riq'uin xserak'inquil chirix li nakac'ul arin sa' ruchich'och' re nak tetau ru li ninye. Junxil xek'axtesi erib chixbanunquil li jo' majo'il na'leb ut li c'a'ak re ru chi māusilal. A'ut anakcuan, chek'axtesihak erib chixbanunquil li tiquilal re nak texcuānk sa' santilal chiru li Dios. ²⁰ Nak

toj nequec'anjela chak ru li mac, mac'a' na-oc cui' ere li tiquilal. ²¹ ¿C'a'ru le k'ajcamunquil xec'ul nak xebanu chak li mausilal? Mac'a'. Ca'aj cui' xec'ut chak exutan. Li c'a'ru naxq'ue li mac, a'an li camc. ²² Anakcuan colbilex chic chiru li mac ut k'axtesinbilex chic chi c'anjelac chiru li Dios. Ut le k'ajcamunquil a'an le santobresinquel ut le yu'am chi junelic. ²³ Lix tojbal rix li mac, a'an li camc. Aban li matan naxq'ue ke li Dios, a'an li junelic yu'am sa' xc'aba' li Kacula' Jesucristo laj Colol ke.

7

Li chak'rab naxc'ut chiku c'a'ru li mac

¹ Ex herman, laex nequenau c'a'ru naxye sa' li chak'rab. Nequenau nak li chak'rab cuan xcuanguil sa' xbeneb li toj yo'yoqueb. ² Nak nasumla junak ixb junaj chic ru riq'uin lix belom. Tz'ibanol sa' li chak'rab nak inc'a' chic naru neque'xjach rib a' yal jo' najtil yo'yok li belomej. Aban cui nacam li belomej, li camc najachoc reheb ut li ixb nacana xjunes. ³ Cui toj yo'yo lix belom ut naxsume jalan chic cujink, a'an naxmux ru lix sumlajic. Cui nacam li belomej, mac'a' chic xcuanguil li chak'rab a'an sa' xben li ixb. Moco tixmux ta chic ru lix sumlajic cui nasumla riq'uin jalan chic cujink. ⁴ Jo'can ajcui' lao, ex inherman. Xban nak xkapab li Jesucristo chanchan kochben nak quicam li Cristo. Ut mac'a' chic xcuanguil li chak'rab laj Moisés sa' kabén. Ut mac'a' chic rubel xcuanguil li chak'rab. Lao reho chic li Cristo li quicuaclí cui'chic chi yo'yo sa' xyankeb li camenak re nak toc'anjelak chiru li Dios. ⁵ Junxil xkabanu chak li c'a'ru inc'a' us li quixrahi chak ru li kach'ol. Li chak'rab quixc'ut chiku c'a'ru li inc'a' us ut a' chic li inc'a' us quicuulac chiku xbanunquil. Ut riq'uin xbanunquil a'an cuan li camc. ⁶ A'ut anakcuan chanchan li camenako xban nák li najter chak'rab mac'a' chic xcuanguil chok' ke lao. Macua' chic li chak'rab yal re sa' kabén. Ut inc'a' chic yoco chi c'anjelac rubel xcuanguil li chak'rab tz'ibanol chak najter. Anakcuan nococ'anjelac chiru li Dios sa' li ac' yu'am li naxq'ue ke li Santil Musik'ej.

Li chak'rab ut li mac

⁷ ¿C'a'ru takaye chirix a'in? ¿Ma takaye nak inc'a' us li chak'rab? Inc'a'. Ma jok'e takaye chi jo'can. Ninye ere nak cui ta mac'a' li chak'rab, inc'a' raj xinnau c'a'ru li mac. Moco xinnau ta raj nak inc'a' us xrabal ru li jalan aj'e, cui ta inc'a' tz'ibanol sa' li chak'rab chi jo'ca'in: Mara ru li c'a'ru re la cuas acuitz'in. ⁸ Li chak'rab quic'utuc chicuu c'a'ru li mac. Xban nak ac ninnau chic c'a'ru li mac, k'axal cui'chic quinq'ue inch'ol chixbanunquil. Cui ta mac'a' li chak'rab mac'a' raj li mac. ⁹ Nak toj maji' ninnau c'a'ru naxye li chak'rab, moco nin'oxla ta nak lain aj mac ut inc'a' xinnau nak inc'ulub ta li camc. Aban nak xinnau li chak'rab, xinnau nak lain aj mac. Ut cue li camc. ¹⁰ Li chak'rab xq'ue raj inyu'am, abanan nak quicuabi chanchan incamsinquel quixbanu. ¹¹ Li chak'rab chabil ut xq'ue raj cue li yu'am, abanan li mac xinibalak'i. Ut xban li chak'rabb, li mac xinbanu xq'ue li camc sa' inben. ¹² Relic chi yal nak li chak'rab q'uebil chak xban li Dios, a'an santil chak'rab, ut li kataklanquil xban li Dios santo ajcui', t'ic ut chabil. ¹³ ¿Ma taruk tinye nak li chabil chak'rab quic'amoc chak li camc sa' inben? Inc'a'. Inc'a' naru tinye chi jo'can xban nak macua' li chak'rab quic'amoc chak re li camc. Aban li mac quic'amoc chak re li camc sa' inben. Li chak'rab quixc'ut chicuu lix yibal ru li mac. Jo'can nak li chabil quixc'ut chicuu li inc'a' us. Ut li inc'a' us a'an li mac. ¹⁴ Nakanau nak li chak'rab musik'anbil xban li Dios. Aban lain yal cujinkin. Jo'can nak ninmacob. ¹⁵ Inc'a' nintau ru c'a'ut nak ninbanu li inc'a' us. Nacuaj raj xbanunquil li us, abanan a' chic li inc'a' us li ninbanu.

Xic' raj nacuil li inc'a' us aban a'an chic li ninbənu. ¹⁶ A' chic li inc'a' nacuaj xbanunquil, a'an chic li ninbanu ut riq'uin a'an ninq'ue retal nak li chak'rab chabil xban nak naxc'ut chicuu nak inc'a' us li ninbanu. ¹⁷ Jo'can nak macua' chic lajin li ninbənu re li inc'a' us, aban li mac li cuan cuiq'uin, a'an nataklan cue. ¹⁸ Lain ninnau nak moco chabilin ta. Chalen sa' inyo'lajic lajin chak aj mac. Nacuaj raj xbanunquil li us, aban inc'a' ninbənu. A' chic li məusilal ninbənu, li inc'a' raj nacuaj xbanunquil. ¹⁹ Cui lajin ninbənu li inc'a' nacuaj xbanunquil, macua' chic lajin ninbənu re; aban li mac li cuan cuiq'uin, a'an li nataklan cue. ²¹ A'an a'in li ninc'ul: Nak nacuaj raj xbanunquil li us, a' chic li inc'a' us li ninbənu. ²² Nasaho' sa' lin ch'ol riq'uin lix chak'rab li Dios ut a'an li nacuaj xbanunquil. ²³ Aban xban nak yal cuinkin, nacuec'a nak cuan jun li ch'a'ajqujal sa' li cuam naramoc re chicuu li us li nacuaj raj xbanunquil. Ut li ch'a'ajqujal a'an, a'an li mac li toj cuan cuiq'uin, ut chanchan li cuanquin chi prexil xban. ²⁴ ¡C'ajo' xtok'obal cuu! ¿Ani taçolok cue chiru lin najter na'leb li nac'amoc chak re li camc sa' inben? ²⁵ Ca'aj cui' li Kacua' Jesucristo taçolok cue chiru lin najter na'leb. Ac xink'axtesi cuib rubel xcuanguil lix chak'rab li Dios ut ac' chic lin na'leb. Ninq'ue inch'ol chixpabankuil li Dios, aban xban nak yal cuinkin, toj cuan lin najter na'leb cuiq'uin. Abanan ninbantioxi chiru li Dios xban nak li Kacua' Jesucristo tætenk'ənq cue re nak tincanab xbanunquil lin najter na'leb.

8

Li Santil Musik'ej nocoxtenk'a chi cuanc sa' tiqual

¹ Anakcuán ut mac'a' chic li tojba mac sa' xbeneb li neque'paban re li Cristo, li inc'a' chic neque'xbənu li neque'xrahi ru lix ch'oleb. Neque'xbənu ban li naraj li Santil Musik'ej. ² Lix cuanguil li Santil Musik'ej li naq'uehoc yu'am sa' xc'aba' li Jesucristo, a'an nacoloc cue chiru lix cuanguil li mac ut li cəmc. ³ Li najter chak'rab inc'a' naru toxcol chiru li mac ut li cəmc. Mac'a'xcuanquil re kacolbal xban nak inc'a' nocoru chixbanunquil li naxye. Inc'a' nocoru chixbanunquil li naxye xban nak chalen chak sa' kayo'lajic lao aj mac. Aban li Dios xoxcol chiru li mac. Quixtakla chak li Jesucristo li Ralal chi tz'ejcualoc' sa' ruchich'och'. Li Kacua' Jesucristo quixmayeja rib re xsachbal xcuanguil li mac. ⁴ Li Cristo quixsach xcuanguil li mac re nak naru takabalu li tiqual jo' naxye sa' li chak'rab. Inc'a' chic takabənu li naxrahi ru li kach'ol. Anakcuán takabənu li c'a'ru naxye li Santil Musik'ej. ⁵ Ut eb li toj neque'xbənu li najter na'leb, ca'aj cui' li c'a'ru naxrahi ru lix ch'oleb neque'xc'oxla xbanunquil. Abanan eb li neque'cuan jo' naxye li Santil Musik'ej, eb a'an neque'xq'ue xch'ol chixbanunquil li c'a'ru naraj li Santil Musik'ej. ⁶ Cui ca'aj cui' li naxrahi ru li kach'ol nakac'oxla, a'an naxc'am chak li cəmc sa' kabən. Cui nakaq'ue kach'ol chixbanunquil li naraj li Santil Musik'ej, a'an naxq'ue ke li kayu'am chi junelic ut naxq'ue ajcui' ke li tuktukUIL usilal. ⁷ Li toj yoqueb chixbanunquil li naxrahi ru lix ch'oleb, cuanqueb sa' xiq'uinal riq'uin li Dios ut inc'a' neque'raj xcubsinquil rib rubel xcuanguil lix chak'rab li Dios chi moco neque'ru chixbanunquil. ⁸ Jo'can nak li toj neque'xbənu li naxrahi ru lix ch'oleb, inc'a' nasaho' xch'ol li Dios riq'uin li neque'xbənu. ⁹ Abanan laex inc'a' chic yoquex chixbanunquil li naxrahi ru le ch'ol. Yoquex ban chixbanunquil li c'a'ru naraj li Santil Musik'ej cui yal nak cuan li Santil Musik'ej eriq'uin. Li ani mac'a' li Santil Musik'ej riq'uin, a'an macua' re li Cristo. ¹⁰ Cui li Cristo cuan eriq'uin, usta ac tenebanbil li cəmc sa' ebeen xban li mac, yo'yo le musik' xban nak tacobresinbil chic le

ch'ol xban li Dios. ¹¹ Li Santil Musik'ej, a'an li quicuaclesin cui'chic re chi yo'yo li Cristo sa' xyankeb li camenak. Cui li Santil Musik'ej quicuaclesin re li Cristo, a'an ajcui' tacuaclesink re le tz'ejcual chi yo'yo re li junelic yu'am xban nak li Santil Musik'ej cuan eriq'uin. ¹² Jo'can ut ex inherman, tento nak tebənu li naraj li Santil Musik'ej ut mācua' li c'a'ru naxrahi ru le ch'ol. ¹³ Cui toj yoquex chixbanunquil li naxrahi ru le ch'ol, texcāmk. Aban cui riq'uin etenk'anquil xban li Santil Musik'ej, tecanab xbanunquil le yehom ebanuhom li quilajebaru chak junxil, tacuank eyu'am chi junelic. ¹⁴ Chixjunileb li neque'banun re li c'a'ru naraj li Santil Musik'ej, a'aneb tz'akal ralal xc'ajol li Dios. ¹⁵ Laex xec'ul li Santil Musik'ej ut māc'a' chic exiu. Moco jo'quex ta junak li mos naxxucua ru lix patrón. Xban nak li Santil Musik'ej cuan kiq'uin, lao ban tz'akal ralal xc'ajol li Dios. Jo'can nak nakaye "at inYucua" re nak nocotijoc. ¹⁶ Li Santil Musik'ej naxch'olob xyalal chiku, ut naked'a sa' li kām nak lao chic ralal xc'ajol li Dios. ¹⁷ Ut xban nak lao ralal xc'ajol li Dios, kochben li Cristo nak takechani chixjunil li quixyech'i ke li Dios. Cui totz'akonk riq'uin li raylal li quixc'ul li Cristo, jo'can nak toxotz'akonk ajcui' kochben sa'lix nimal xlok'al. ¹⁸ Lain ninye nak li raylal yoco chixc'ulbal anakcuán inc'a' takaq'ue sa' kach'ol xban nak moco juntak'et ta riq'uin li usilal takac'ul mokon xban nak numtajenak cui'chic lix nimal xlok'al li rusilal li Dios tixq'ue ke. ¹⁹ Chixjunil li c'a' re ru yibānil xban li Dios yoqueb chi xyo'oninquil nak tacuulak xx'ehil nak li Dios tixq'ue xlok'aleb li ralal xc'ajol. ²⁰ Li ruchich'och' tz'ektañanbil xban li Dios. Moco yal quiraj ta nak quitz'ektañac. Xban nak ac jo'can chak sa' xch'ol li Dios. Abanan li ruchich'och' toj yo chixyo'oninquil nak tacolek'. ²¹ Jo'can nak li ruchich'och' tacolek' chiru li tz'ektañac. Ut xban xnimal rusilal li Dios, tacolek' li ruchich'och', jo' nak te'colek' li ralal xc'ajol li Dios. ²² Nakanau nak li ruchich'och' chalen anakcuán cuan sa' raylal ut yo chiroybeninquil nak tauṣak. Li ruchich'och', a'an jo' jun li iixk yo chixc'ulbal li raylal nak ac q'uirac re. ²³ Mācua' ca'aj cui' li ruchich'och' naxc'ul li raylal. Nayot'e' ajcui' li kach'ol lao aj pabanel xban li raylal nakac'ul, usta ac xkac'ul li Santil Musik'ej. Li Santil Musik'ej a'an xben li kamatan naxq'ue ke li Dios. Yoco chiroybeninquil nak li Dios toxc'ul jo' tz'akal ralal xc'ajol ut tajalak li katz'ejcual ut tixq'ue li kalok'al. ²⁴ Xban nak nocopaban, colbilo. Aban cuan ajcui' li matan toj maji' nakac'ul ut a'an li toj yoco chiroybeninquil. Cui ta ac xkac'ul chixjunil, inc'a' raj chic yoco chi oybeninc. ²⁵ Aban li c'a'ru nakoybeni inc'a' nakil ru ut tento takacuy roybeninquil. ²⁶ Ut li Santil Musik'ej nocoxtenk'a xban nak māc'a' naru nakabanu kajunes. Inc'a' nakanau chanru nak totijok chi moco nakanau c'a'ru takatz'ama. Aban li Santil Musik'ej natz'aman chickix chiru li Dios riq'uin yot'ba ch'oleb inc'a' naru xyebal yal riq'uin atin. ²⁷ Li Dios naxnau c'a'ru cuan sa' kach'ol ut naxnau ajcui' lix c'a'ux li Santil Musik'ej. Ut li Santil Musik'ej natz'aman chickix lao aj pabanel jo' naraj li Dios.

Li Jesucristo naxc'ut chiku nak li Dios nocoxra

²⁸ Li Dios naxsuk'isi chok' usilal chixjunil li c'a'ak re ru neque'xc'ul li neque'rahoc re li Dios, a' li bokbileb chixbanunquil li c'a'ru naraj li Dios. ²⁹ Chalen sa' xticlažic li Dios quixnau aniheb li te'pabank re. Jo'can nak quixsiq'ueb ru ut quixc'uleb chok' ralal xc'ajol. Quixxakab li Jesucristo li Ralal re nak a'anak li xben alalbej sa' xyankeb li ralal xc'ajol. ³⁰ Najter chak k'e cutan li Dios ac cuan sa' xch'ol anu li sic'bileb ru xban, ut li sic'bileb ru a'an li quixbokeb; ut li quixbokeb, quixt̄icobresi lix ch'oleb ut naxq'ueheb ajcui' xlok'al. ³¹ ¿C'a'ru takaye chirix a'in? Cui li Dios cuan kiq'uin, eb li xiç' neque'iloc ke inc'a' te'numtak sa' kabén. ³² Usta li Acuabej Dios k'axal

raro li Ralal xban, inc'a' quixcol chiru li cämc. Quixk'axtesi ban chi cämc sa' kac'aba' lão. Cui quixq'ue li Ralal re cämc, ¿ma inc'a' ta bi' tixq'ue ke chixjunil li c'a'ak re ru quixyechi'i ke? ³³ ¿Ani taruk tayehok re nak cuanqueb xmac li sic'bileb ru xban li Dios? Ma ani, xban nak li sic'bileb ru tacobresinibileb chic lix ch'ol chiru li Dios. ³⁴ ¿Ani taruk taq'uehok reheb laj pabanel sa' tojba mac? Ma ani xban nak li Jesucristo quicam sa' kac'aba' ut li Dios quixcuaclesi cui'chic chi yo'yo sa' xyankeb li camenak. Anakcuan a'an cuan sa' xnim uk' li Dios ut yo chi atinac chikix chiru li Dios. ³⁵ ¿C'a'ru taruk taisink ke riq'uin li Cristo li narahoc ke? Mac'a'. Li ra xic' inc'a' naru torisi, chi moco li raylal, chi moco li ch'a'ajqujal, chi moco li xic' ilec', chi moco li cue'ej, chi moco li cuanc sa' neba'il, chi moco li camsic'. Mac'a' naru taisink ke riq'uin li Cristo li narahoc ke. ³⁶ Jo'ca'in tz'ibabil sa' li Santil Hu:

Cuulaj cuulaj yoqueb chixc'oxlanquil kacamsinquel sa' ac'aba'. Chiruheb a'an chanchano li carner li neque'c'ame' chi camsic'. (Sal. 44:22)

³⁷ Aban li Jesucristo nocoxra ut nocoxten'a chixcuybal ut chixnumsinquel chixjunil li raylal nakac'ul. ³⁸ Ninnah chi tz'akal nak mac'a' naru taisink ke riq'uin lix rahom li Dios. Li cämc inc'a' naru torisi riq'uin lix rahom chi moco li c'a'ak re ru nakac'ul sa' li kayu'am. Eb li ángel inc'a' naru toe'risi chi moco eb li cuanqueb xcuangquil sa' ruchich'och', chi moco lix cuanquil li c'a'ak re ru chi musik'ejil. Li c'a'ak re ru nakac'ul anakcuan inc'a' naru torisi riq'uin xrahom li Dios chi moco li c'a'ak re ru tachalk. ³⁹ Li c'a'ak re ru cuan takec', chi moco li c'a'ak re ru cuan tak'a sa' ruchich'och' inc'a' naru torisi riq'uin lix rahom li Dios. Chi yal, mac'a' naru taisink ke riq'uin lix rahom li Dios. Quixc'ut chiku nak nocoxra nak quixq'ue li Jesucristo chi cämc re kacolbal.

9

Li Dios quixsiq'ueb ru laj Israel

¹ Yoquin chixyebal li xyalal xban nak ninpab li Jesucristo. Inc'a' nintic'ti'ic. Nacuec'a sa' lin ch'ol nak yal li ninye ut li Santil Musik'ej nac'utuc chicuuk nak yal. ² Ra nacuec'a ut nayot'e inch'ol xban nak eb laj judío lin tenamit inc'a' neque'raj xpábanquil li Cristo. ³ Tinq'ue raj cuib chi tz'ektañac ut chi isic riq'uin li Cristo cui ta riq'uin a'an taruk tebintenk'a re te'colek'. ⁴ A'an eb li ralal xc'ajol laj Israel. Li Dios quixsiq'ueb ru ut quixc'uleb chok' ralal xc'ajol, ut quixc'ut lix lok'al chiruheb retatalil nak cuan riq'uineb. Quixbanu li contrato riq'uineb ut quixq'ue lix chak'rab reheb. Quic'ute' chiruheb chanru te'xlok'oni li Dios sa' xyalal ut cuan c'a' re ru quixyechi'i li Dios reheb. ⁵ A'aneb li ralal xc'ajol li kaxe'tonil yucua' laj Abraham, laj Isaac ut laj Jacob. Ut sa' xyankeb a'an quiyo'lal li Cristo nak quitz'ejcualo' ut quic'ulun sa' ruchich'och'. Lok'oninbil taxak chi junelic li Cristo li k'axal nim xcuangquil sa' xbenelb chixjunileb. Jo'can taxak. ⁶ Li Dios quixq'ue li quixyechi'i reheb laj Israel. Aban moco chixjunileb ta que'xc'ul li yechi'inbil xban li Dios xban nak moco chixjunileb ta tz'akaleb aj Israel. Aban inc'a' ninye nak li Dios inc'a' quixq'ue li quixyechi'i reheb laj Israel. ⁷ Cuanqueb li ralal xc'ajol laj Abraham inc'a' que'xc'ul li quixyechi'i li Dios xban nak macua'eb a'an li ralal xc'ajol li yechi'inbil re laj Abraham najter xban li Dios nak quixye re: Sa' xc'aba' laj Isaac te'cuankla cualal ac'ajol li xinyechi'i acue. (Gn. 21:9-12) ⁸ A'in naraj naxye nak moco chixjunileb ta li ralal xc'ajol laj Abraham sic'bileb ru xban li Dios. Ca'aj cui' li yechi'inbil re xban li Dios, a'aneb li tz'akal ralal xc'ajol li Dios. ⁹ A'an a'in li quixyechi'i li Dios re laj Abraham nak quixye re: Nak tolinelk sa' li chihab jun chic, lix Sara cuank chic lix c'ula'al telom. (Gn. 18:10) ¹⁰ Lix Rebeca quicuan cuib lix coc'al ut junaj lix yucua'eb. Lix yucua'eb

a'an, a'an laj Isaac li kaxe'tonil yucua'. ¹¹ Toj maji' neque'yo'la lix coc'al lix Rebeca nak quisiq'ue' ru li jun xban li Dios. Moco riq'un ta lix yehom xbanuhom nak quisiq'ue' ru xban nak maji' neque'xbanu li us chi moco li inc'a' us. Riq'un a'an nakanau nak li Dios inc'a' naxsic' ru junak riq'un lix yehom xbanuhom. Naxsic' ban ru jo' naraj a'an. ¹² Li Dios quiatinac riq'un lix Rebeca ut quixye re nak li asbej tac'angelak chiru li itz'inbej. ¹³ Tz'ib'anbil sa' li Santil Hu li rätin li Dios li quixye: Lain xinsic' ru laj Jacob, ut laj Esaú xintz'ektaña. (Mal. 1:2) ¹⁴ ¿C'a'ru takaye chirix a'an? ¿Ma takaye nak macua' tiq'uil li naxbanu li Dios? Ma jok'e takaye chi jo'can. ¹⁵ Inc'a' naru takaye a'an xban nak a'in li quixye li Dios re laj Moisés: Lain tincuil xtok'obaleb ru li ani nacuaj xtok'obanquil ru, ut tincuuxtana ajcui' ru li ani nacuaj ruxtananquil ru. (Ex. 33:19) ¹⁶ Li sic'bil ruheb moco sic'bileb ta ru xban nak jo'can neque'raj eb a'an chi moco riq'un ta xyehom xbanuhomeb. Yal riq'un ban xanimal ruxtán li Dios nak sic'bil ruheb. ¹⁷ Jo'ca'in nak tz'ib'anbil sa' li Santil Hu li atín li quixye li Dios re laj Faraón: Xatinxakab chok' xreyeb laj Egipto re nak tac'utunk lin cuanquinal aban. Chi jo'can tayemank cuesilal yalak bar sa' chixjunil li ruchich'och'. (Ex. 9:16) ¹⁸ Jo'can nak li Dios naril xtok'obal ru li ani naraj xtok'obanquil ru ut naxcacuubresi xch'ol li ani naraj xcacuubresinquel xch'ol sa' li mausilal.

Li Dios naq'uehoc sa' tojba mac ut na-uxtanan u

¹⁹ Mare nacaye chi jo'ca'in, Cui li Dios naxcacuubresi xch'ol junak sa' li mausilal, ¿chanru nak li Dios tixye nak cuan xmac junak? Cui jo'can naraj li Dios, ¿ani taruk tapo'ok ru li c'a'ru naraj li Dios? mare chancat. ²⁰ Aban lain tinye acue, ¿anihat laat nak tacuech'i rix li c'a'ru naxbanu li Dios? Junak li cuc inc'a' taruk tixye re laj pac'ol re, ¿C'a'ut nak xinayib chi jo'ca'in? ²¹ A'yal re laj pac'onel chanru nak tixyib li tixpac'. Cui naraj naru tixyib cuib chi uc'al riq'un junaj chi seb. Naru tixpac' junak sec' chabil, sic'bil ru lix c'angel, ut li jun chic mare re tac'angelak re yalak c'a'ru. ²² Chanchan a'an li naxbanu li Dios. A'an yal re c'a'ru tixbanu. Xc'ulubeb raj li cuanqueb sa' ruchich'och' li rakba atín ut li cämc. Li Dios quixc'ut raj lix josk'il ut lix cuanquinal. Abanan k'axal nim xcyum sa' xbeneb. ²³ Ut riq'un lix nimal rusilal quiruxtana ku ut quixc'ut chiku lix lok'al. Junxil sic'bil chak ku xban re nak totz'akonk sa' lix lok'al. ²⁴ Lao sic'bil ku xban li Dios. Cuan sic'bileb chak ru sa' xyankeb laj judío ut cuan sic'bileb chak ru sa' xyankeb li macua'eb aj judío. ²⁵ Jo'ca'in quixye li Dios jo' tz'ib'anbil sa' li Santil Hu xban laj Oseas:

Tacuulak xk'ehil nak lain tinye "cualal inc'ajol" reheb li macua'eb cualal inc'ajol. Eb a'an inc'a' sic'bileb chak ru inban. Anakcuan tinye reheb: "raroqueb inban". (Os. 2:23)

²⁶ Ut sa' li na'ajej bar quiyehé cui' reheb: "Laex macua'ex cualal inc'ajol", aran ajcui' tayehek' reheb: "Laex tz'akal ralal xc'ajol li yo'yoquil Dios". (Os. 1:10)

²⁷ Jo'ca'in quixye laj Isaías chirixeb laj Israel:
Usta nabaleb li ralal xc'ajol laj Israel jo' xq'uial li samaib chire li palau, aban moco q'uiheb ta li te'colek'.

²⁸ Xban nak li Kacua' chi seb tarakok atín chi tz'akal sa' xbeneb li ralal xc'ajol laj Israel. (Is. 10:22-23)

²⁹ Quixye ajcui' laj Isaías chi jo'ca'in:
Cui ta inc'a' quixcanab kalal kac'ajol nak quixsach ru li katenamit li Kacua'
Dios, li k'axal nim xcuauquil, jo' raj li Sodoma ut li Gomorra nak cooso'. (Is. 1:9)

Eb laj judío ut li colba-ab

30 A'an a'in xyalal li yoco chixyebal: Eb li macua'eb aj judío inc'a' yoqueb chixsic'bal li tiquil ch'olej riq'uin xbanunquil li naxye li chak'rab, ut xban nak que'paban, que'ticobresic xch'oleb. **31** Ut eb laj judío yoqueb chixsic'bal li tiquil ch'olej riq'uin xbanunquil li naxye li chak'rab, aban inc'a' que'xtau. **32** ¿C'a'ut nak inc'a' que'xtau? Xban nak moco yoqueb ta chixsic'bal li tiquil ch'olej riq'uin xpabankuil li Cristo. Que'xsic' ban li tiquilal riq'uin xbanunquil li naxye li chak'rab. Ut xban a'an, chanchan que'xtich rib chiru jun li pec. Ut li pec a'an retalil li Cristo. Ut li neque'xtich rib chiru, a'an li neque'tz'ektañan re li Cristo. **33** Tz'ibanol sa'li Santil Hu li quixye li Dios: Q'uehomak retal xban nak lain tinq'ue jun li pec aran Sión. Nabaleb li tenamit te'xtich rokeb chiru uf te't'anek'. Abanan li ani tapabank re a'an, inc'a' tarahok' xch'ol mokon xban nak tixc'ul li c'a'ru yechi' inbil re xban li Dios. (Is. 28:16)

10

1 Ex inherman, relic chi yal nacuaj nak eb laj Israel te'colek'. A'an li nintz'ama junelic chiru li Dios. **2** Lain ninnau nak neque'x-oxlok'i li Dios, abanan toj maji' neque'xnau chanru xpabankuil li Dios. **3** Ut inc'a' neque'xnau chanru nak natico' li kach'ol chiru li Dios. Que'xyl xticobresinquel xch'oleb chiru li Dios yal xjuneseb rib. Ut inc'a' que'raj xbanunquil li yebil xban li Dios. **4** Nak quic'ulun li Cristo sa' ruchich'och', quirake' xc'anjel li chak'rab li quiq'uehe' re laj Moisés xban li Dios. Ut chixjunileb li te'pabank re li Cristo te'ticok' xch'oleb chiru li Dios.

Chikajunilo naru tocolek'

5 Laj Moisés quitz'ibac chirix li chak'rab ut quixye: Cui ani tixpab li chak'rab ut tixbânu chi tz'akal li c'a'ru naxye, a'an tjc xch'ol chiru li Dios ut tacuank xyu'am. **6** Anakcuan lao tacobresinbil chic li kach'ol chiru li Dios riq'uin xpabankuil li Cristo. Sa'li Santil Hu naxye chi jo'ca'in: Inc'a' taye sa' ach'ol ¿ani tqatakek' sa' choxa re xtz'amanquil chiru li Cristo nak tacubek chak sa' ruchich'och'? Maye chi jo'can xban nak ac c'ulujenak sa' ruchich'och'. **7** Chi moco taye ¿ani tacubek cuanqueb cui' li camenak re xcuaclesinquel li Cristo sa' xyankeb li camenak? Inc'a' naru taye chi jo'can xban nak ac cuaclijenak chi yo'yo. **8** Jo'ca'in naxye li Santil Hu: Ac nequenau lix yatal ut nequeserak'i resilal li quixye li Dios ut cuan ajcui' sa' le ch'ol. Lix yatal a'an nak tento takapab li Cristo ut a'an li pabal li nakach'olob xyalal cheru. **9** Cui riq'uin xtz'umal acue tach'olob xyalal nak li Jesús a'an li Cristo li Ralal li Dios, ut cui tapab chi anchal ach'ol nak li Dios quicuaclesin cui'chic re chi yo'yo sa' xyankeb li camenak, tatcolek'. **10** Li ani naxpab li Cristo chi anchal xch'ol ut naxch'olob xyalal riq'uin xtz'umal re, a'an natico' xch'ol chiru li Dios ut tacolek'. **11** Jo'ca'in tz'ibanol sa'li Santil Hu: Li ani tapabank re a'an, inc'a' tarahok' xch'ol mokon xban nak tixc'ul li c'a'ru yechi' inbil re xban li Dios. (Is. 28:16) **12** Chiru li Dios juntak'eteb laj judío riq'uin li macua'eb aj judío xban nak jun ajcui' li Kacua' sa' xbeneb chixjunileb. Ut nim li ruxtan sa' xbeneb chixjunileb li neque'yaban re lix c'aba'. **13** Jo'ca'in tz'ibanol sa'li Santil Hu: Yalak ani tayabank re xc'aba' li Kacua', a'an tacolek'. **14** Abanan ¿chanru nak te'xyaba xc'aba' li Kacua' cui toj maji' neque'xpab? Ut ¿chanru nak te'xpab cui toj maji' neque'rabi resil? Ut ¿chanru nak te'rabi resil li Kacua' cui ma' ani nach'oloban xyalal chiruheb? **15** Ut ¿chanru nak tach'olobak chak xyalal chiruheb cui ma' ani taklanbil xban li Kacua'? Jo'ca'in tz'ibanol sa'li Santil Hu: C'ajo' xlok'al eb li neque'xic yalak bar chixyebal resil li colba'-ib, li naq'uehoc tuktuquil usilal. (Is. 52:7) **16** Aban moco chixjunileb ta que'paban

re li resil li colba-ib. Laj Isaías quixye: At Kacula', moco q'uiheb ta li xe'pában li resil li colba-ib li nakajultica chiruheb. (Is. 53:1) ¹⁷ Jo'can nak li pabal natauman riq'un rabinquil resil li Jesucristo. ¹⁸ Ut lain ninye, ¿ma yal ta bi' nak eb laj Israel inc'a' que'rabi chak resil junxil? Que'rabi. ¿C'a'ut nak inc'a'? Xban nak tz'ibanol chì jo'ca'in sa' li Santil Hu: Sa' chixjunil li ruchich'och' qui-el resil ut jun sut rubel choxa quicuulac li ratineb. (Sal. 19:4) ¹⁹ Ut ninye ajcui', ¿ma inc'a' ta bi' que'xtau xyalal a'in eb laj Israel? Que'xtau raj aban inc'a' que'raj. Laj Moisés quixye reheb li c'a'ru quixye li Dios. Quixye chi jo'ca'in:

Sa' inc'aba' lain tecakali jun li tenamit macula'eb intenamit. Ut tinchik' ejosk'il sa' xbeneb a'an, li inc'a' neque'xnau xyalal, xban nak eb a'an li te'cuuxtana ru. (Dt. 32:21)

²⁰ Laj Isaías cau xch'ol chixyebal li c'a'ru quixye li Dios nak quixye: A' chic li inc'a' yoqueb chinsic'bal, a'aneb chic li xe'ta'oc cue. Quinc'utbesi cuib chiruhéb li inc'a' yoqueb chinsic'bal. (Is. 65:1)

A'an li quixye li Dios chirixeb li macula'eb aj judío.

²¹ Ut chirixeb laj judío li Dios quixye:

Junelic yoquin chixbokbaleb laj Israel re nak te'chalk cuiq'un. Abanan eb a'an inc'a' neque'abin chicuu. Neque'xk'et ban li cuatín. (Is. 65:2)

11

Moco q'uiheb ta li que'cole' sa' xyankeb laj Israel

¹ Tinpatz' ere, ¿ma xe'tz'ektanac laj Israel xban li Dios chi jo'canan? ¡Chi yal nak inc'a'! Lain ajcui' aj Israel lain ut lain ralal xc'ajol laj Benjamín ut laj Abraham. ² Li Kacula' Dios inc'a' quixtz'ektana lix tenamit, li quixsiq'ueb ru junxil chok' ralal xc'ajol. ¿Ma inc'a' nequenau c'a'ru tz'ibanol sa' li Santil Hu chirix laj Elías nak quitijoc chiru li Dios chixxitbaleb laj Israel? Quixye: ³ At Kacula', quilaje'xcamsi la profetas ut quilaje'xjuc' la artal; lain xincana injunes ut jo'can ajcui' lain, te'raj incamsinqual. ⁴ Li Dios quichak'oc ut quixye re: Si'bileb ru inban cuukub mil chi cuink chok' cue. Eb a'an inc'a' que'xcuik'ib ribeb chixlok'oninqual li yibanol dios aj Baal, chan. ⁵ Jo'can ajcui' sa' eb li cutan a'in. Cuan ajcui' li quixsiq'ueb ru li Dios riq'un lix nimal ruxtán usta moco q'uiheb ta. ⁶ Moco riq'un ta xyehom xbanuhomeb nak quixsiq'ueb ru. Yal riq'un ban lix nimal ruxtán lí Dios nak quixsiq'ueb ru. Cui ta quixsiq'ueb ru sa' xc'aba' xyehom xbanuhomeb, a'an macula'raj chic xban xnimál ruxtán li Dios. ⁷ Nakaq'ue retal nak moco chixjunileb ta laj Israel que'xtau ruisil li Dios li yoqueb chinsic'bal. Ca'aj cui' li sic'bileb ru que'xtau, usta moco q'ui eb ta. Ut li jun ch'ol chic que'cacuubresic'lix ch'oleb ut inc'a' que'xbanu li quiraj li Dios. ⁸ Jo'ca'in tz'ibanol sa' li Santil Hu: Que'canabac xban li Dios jo' eb li aleb xch'ol li inc'a' neque'xtau xyalal.

Cuanqueb xnak' ru ut inc'a' neque'ril c'a'ru li us. Cuanqueb xxic ut inc'a' neque'raj rabinquil lix yaalal. Chalen anakcuan inc'a' neque'raj xtaubal xyalal. (Is. 29:10)

⁹ Tz'ibanol ajcui' sa' li Santil Hu li quixye laj David nak quitijoc: Eb li nink'e neque'xbanu chisuk'ik taxak chok' raylal sa' xbeneb. Raylal taxak tachalk sa' xbeneb re nak te'xtoj rixeb lix maqueb li yoqueb chixbanunqual.

¹⁰ Che'moyk ta li xnak'eb ru re nak inc'a' chic te'iloc, ut inc'a' te'xtau xyalal. Che'c'utzlak ta li rixeb chi junaj cua xban li raylal li yoqueb chixc'ulbal. (Sal. 69:23)

Lix colbaleb li macula'eb aj judío

¹¹ Lain ninye nak usta que'xtich rib laj judío, inc'a' que't'ane' chi junaj cua. Naraj naxye nak usta que'xtz'e ktana li Cristo eb laj judío toj naru te'pabank ut te'colek'. Xban nak que'xk'et rātin li Dios eb laj judío, jo'can nak li colba-ib quiq'uehe' rebeb li macua'eb aj judío re nak eb laj judío te'xrahi ru li colba-ib ut te'xpab li Cristo. ¹² Xban nak que'xk'et li rātin li Dios eb laj judío, li rusilal li Dios quiq'uehe' rebeb chixjunileb li cuanqueb sa' ruchich'och'. Rebeb raj laj judío li osobtesic, aban que'xtz'e ktana. Jo'can nak quiq'uehe' rebeb li macua'eb aj judío. Ut k'axal cui'chic li sahil ch'olejl takac'ul nak te'pabank lix q'uialeb laj judío ut te'q'uehek' sa' ajl sa' kayank lāo li ac colbilo. ¹³ Anakcuan tinātinak eriq'unin laex li macua'ex aj judío. Lain taklanbilin xban li Dios chixyebal resil li colba-ib ere. Ut ninq'ue xlok'al lin c'anjel. ¹⁴ Māre chi jo'can te'yot'ek' xch'oleb laj judío li cuech tenamitil ut te'xpab li Cristo jo' xebanu laex ut te'colek'. ¹⁵ Xban nak que'tz'e ktanac laj judío, li macua'eb aj judío que'c'ame' sa' usilal riq'unin li Dios. Ut k'axal numtajenak li xlok'al nak eb laj judío te'colek'. Chanchan te'cuaclik chak chi yo'yo sa' xyankeb li camenak. ¹⁶ Cui k'axtesinbil sa' ruk' li Dios li xben caxlan cua na-el, k'axtesinbil ajcui' lix comon. Ut cui k'axtesinbil sa' ruk' li Dios li xé' li che', k'axtesinbil ajcui' chixjunil li ruk'. A'in naraj naxye: Xban nak li Dios quixsic' ru laj Abraham, jo'can nak sic'bil ajcui' ruheb li ralal xc'ajol. ¹⁷ Texinjuntak'eta riq'unin li che' olivo. Eb laj judío chanchan li chabil che' aubil ut ch'olaninbil chi us. Aban cuan li ruk' qui-isic' ut a'an retaliil eb laj judío li que'tz'e ktanac re li Cristo. Ut laex li macua'ex aj judío chanchanex li ruk' li che' li moco aubil ta. Yal xjunes quimok chak. Ut anakcuan yoquex chi tz'akonc riq'unin li usilal li quiyechi'ic re laj Abraham xban li Dios. ¹⁸ Jo'can nak mexnumta chiru li ruk' li che' li que'isic' xban nak laex yal ruk' ex ajcui' li che'. Chenuahuk nak moco laex ta nequeqx'uehoc xyu'am lix xe' li che', aban lix xe' naq'uehoc eyu'am laex. ¹⁹ Māre teye laex, que'isic' li ruk' li che' re nak lāo toletzek' sa' xna'ajeb. ²⁰ Yal ajcui' nequeye, aban xban nak inc'a' neque'pabán jo'can nak que'isic'. Ut laex chic quexletze' sa' xna'ajeb a'an xban nak nequexpabán. Jo'can nak chexucua ru li Dios ut menimobresi erib. ²¹ Cui li Dios quirisi eb laj judío, li tz'akal ruk' li che', q'ma toja' ta chic laex inc'a' texrisi cui inc'a' texpabank? ²² Cheq'uehak retal nak k'axal chabil li Dios, abanan najosk'o' ajcui' sa' xbeneb li neque'tz'e ktanac re li Cristo. Riq'unin cacuil atin narakoc' atin sa' xbeneb li neque'k'etoc re li rātin. Chabilak eriq'unin laex cui texcuank junelic sa' li rusilal. Cui inc'a' nequeexcuan sa' li rusilal tex-isik ajcui' laex. ²³ Jo'can nak cui eb laj judío te'pabank, eb a'an te'letzek' cui'chic sa' lix tonaleb. Li Dios nim xcuanyl chixc'ulbaleb cui'chic ut chixcuybal lix maqueb. ²⁴ Laex macua'ex aj judío, nequexinjuntak'eta riq'unin li che' olivo li yal quimok chak. Quex-isic' riq'unin li che' a'an ut quexletze' sa' li aubil che'. Eb laj judío nequebinjuntak'eta riq'unin li tz'akal ruk' li che' olivo li aubil. Inc'a' ch'a'aj nak te'letzek' cui'chic xban li Dios riq'unin li aubil che' xban nak a'aneb tz'akal ruk' li che'.

Li Dios naruxtana ruheb chixjunileb

²⁵ Ex herman, nacuaj nak tenau jun li na'leb mukmu nak quicuan, li quic'utbesic' chak xyalal chicuu. Cui tenau a'in inc'a' tenimobresi erib riq'unin xc'oxlanquil nak cuan ena'leb. Eb laj judío li inc'a' que'pabán que'cacuubresic' lix ch'oleb. Abanan eb a'an te'pabank ajcui' nak talaje'pabank lix q'uialeb li macua'eb aj judío. ²⁶ Jo'can nak te'colek' chixjunileb laj Israel jo' tz'ibanol retaliil sa' li Santil Hu li quixye li Dios:

Aran Sión tachalk chak laj Colonel ut a'an tixcuy xmaqueb li ralal xc'ajol laj Israel. (Is. 59:20-21)

²⁷ Ut lajñ tincuyeb xmac jo' quinye reheb nak quinq'ue li contrato reheb júnxil. (Is. 27:9)

²⁸ Xban nak eb laj judío que'xtz'ektana li colba-ib, moco cuanqueb ta sa' usilal riq'uin li Dios. A'an quic'ulman re nak texpabank laex li mācua'ex aj judío. Abanan li Dios naxraheb laj judío sa' xc'aba'eb lix xe'tqnil yucua'eb xban nak eb a'an ac sic'bileb chak ru xban li Dios. ²⁹ Li Dios inc'a' naxjal xc'a'ux riq'uin li c'a'ru naxyechi'i ke, chi moco naxjal xc'a'ux nak quixsic' ku. ³⁰ Ut laex, li mācua'ex aj judío, laex aj k'etol ratin li Dios nak quexcuan chak. Ut eb laj judío que'xk'et ajcui' chak ratin li Dios. Jo'can nak laex chic x-uxtanac eru xban li Dios. ³¹ Eb laj judío que'xk'et chak ratin li Dios. Abanan tācuulak xk'ehil nak te'pabank ut te'uxtanak ajcui' ruheb xban li Dios jo' nak x-uxtanac eru laex. ³² Li Dios quiril nak chixjunileb li cuanqueb sa' ruchich'och' aj māqueb. Jo'can nak quixcanabeb chixbanunquil lix mausilaleb xbaneb lix k'etba atin. Aban toj cuan ajcui' ruxtan li Dios sa' xbeneb. ³³ Relic chi yal nak k'axal numtajenak li ruxtan li Dios. A'an naxnau chixjunil. Numtajenak cui'chic lix na'leb. Ma ani nata'oc ru chanru nak narakoc atin. Ut ma ani nata'oc ru li naxbanu. ³⁴ Jo'ca'in tz'ibambil sa' li Santil Hu: Ma ani nana'oc re xc'a'ux li Kacua'. Ma ani naru naq'uehoc xna'leb. (Is. 40:13-14) ³⁵ Ma ani naru naq'uehoc c'a'ru re li Dios re nak tāq'uehek' ta cui'chic rekaj re xban li Dios. (Job 35:7; 41:11) ³⁶ Chixjunil li c'a' re ru cuan, riq'uin li Dios nachal chak. Li Dios quiyiban re chixjunil ut a'an aj echal re chixjunil. Lok'oninbil taxak li Kacua' Dios chi junelic k'e cutan. Jo'can taxak.

12

Chikak'axtesihak li kayu'am re li Dios

¹ Ex herman, sa' xc'aba' xnimnal ruxtan li Dios nint'ama cheru nak chek'axtesi erib rubel rok ruk'li Kacua' jo' jun yo'yoquil mayej santobresin-bil xban li Dios, ut chi anchal ech'ol cheexc'anjelak chiru re nak sahak xch'ol li Kacua' eriq'uin. Ut riq'uin xbanunquil a'an, yokex chixlok'oninquil li Dios chi tz'akal re ru. ² Mebanu chic jo' neque'xbanu li toj maji' neque'pabán. K'axtesihomak ban erib rubel rok ruk'li Dios re nak a'an tix-ac'obresi le ch'ol ut le c'a'ux, ut tenau chic li c'a'ru naraj li Dios. Chexcuanq sa' chabilal, ut chi tz'akalak re ru le yu'am re nak sahak xch'ol li Dios eriq'uin. ³ Xban ruxtan li Dios nak q'uebil cue lin c'anjel. Jo'can nak ninch'olob xyalal cheru re nak inc'a' tēnimobresi erib. Cheq'uehak ban xcuanyl le c'anjel q'uebil ere xban li Dios sa' xc'aba' le pabal. ⁴ Nabal pay ru xcha'al li junjunk chi tz'ejcualej, ut jalan jalank xc'anjel li junjunk. ⁵ Jo'can ajcui' lão aj pabanel. Junajo chi tz'ejcualej nak cuanco riq'uin li Cristo. Nabalo, abanan junajo sa' li kapabal. Ut chikajunilo kacha'al kib chi kibil kib. ⁶ Jalan jalank li kamatan q'uebil ke re toc'anjelak xban xnimnal rusilal li Dios. Chikaq'uehak chi c'anjelac eb li mātan a'in. Li ani q'uebil xmatan chixch'olobanquil xyalal li colba-ib, tento tixch'olob xyalal. Chic'anjelak jo' naraj lix pabal q'uebil re xban li Dios. ⁷ Li ani q'uebil xmatan re tenk'anc, chitenk'ank chi sa sa' xch'ol. Li ani q'uebil xmatan chixtzolbaleb li ras ritz'in, chixtzolakeb sa' xyalal. ⁸ Li ani cuan xmatan re q'uehoc na'leb, chiq'uehok na'leb sa' xyalal. Li ani cuan xmatan re sihinc, chisihink chi anchal xch'ol. Li ani cuan xmatan chi c'amoc be chiruheb li ras ritz'in, chixq'uehak xch'ol chixbanunquil sa' xyalal. Li ani cuan xmatan re uxtanac u, chiruxtahak ru li ras ritz'in chi anchal xch'ol.

Lix c'anjeleb laj pabanel

⁹ Mexrahoc chi yal xcab rix ech'ol. Chera ban ərib chi ribil erib chi anchal ech'ol. Chetz'ektana chi junaj cua li inc'a' us ut cheq'uehak ech'ol chixbanunquil li us. ¹⁰ Cherahak ərib chi ribil erib chi anchal ech'ol xban nak əcomon ərib sa' le pabal. Ut che-oxlok'i ərib chi ribil ərib. ¹¹ Q'uehomak ech'ol chi c'anjelac chiru li Kacula'. Mexc'anjelac chi yal minbil eru. Chexc'anjelak ban chiru li Kacula' chi anchal ech'ol. ¹² Chisahok' sa' ech'ol xban nak cuan c'a'ru nequerooybeni. Checuyak li raylal li nachal sa' eben. Ut junelic chextijok. ¹³ Chetenk'a le rech aj pabanelil li cuanqueb sa' raylal ut cheq'uehak rochochnal laj c'anjel chiru li Dios, li yal numequeb re. ¹⁴ Chetz'ama rusilal li Dios sa' xbenet li xic' neque'iloc ere. Metz'ama raylal sa' xbenet. ¹⁵ Chisahok' sa' ech'ol riq'uineb li saheb sa' xch'ol. Ut chiyot'ek' ajcui' ech'ol riq'uineb li neque'yot'e xch'ol xban li raylal li yoqueb chixc'ulbal. ¹⁶ Junajak ech'ol chi ribil ərib. Menimobresi ərib chiruhel le ras eritz'in, ut meç'oxla nak numtajenak ena'leb. ¹⁷ Cui na-ux raylal ere, meq'ue rekaj riq'uin raylal. Cheq'uehak ban ech'ol chixbanunquill li c'a'ru us, li nanauman nak a'an li tz'akal chabil. ¹⁸ Li jo' q'ual texruk chixbanunquil, chebanuhak re nak texcuank sa' usilal riq'uineb le ras eritz'in. ¹⁹ Ex herman, macua' laex texq'uehok rekaj li raylal na-ux ere. Checanabak ban chixjunil sa' ruk' li Dios. Ca'aj cui' a'an laj rakol atin xban nak jo'ca'in tz'ibanyl sa' li Santil Hu: Ca'aj cui' lajin naru tinq'uehok rekaj. Ut lajin tinrahobtesiheb riq'uin li c'a'ru quilaje'xbanu, chan li Dios. (Dt. 32:35) ²⁰ Jo'can nak cui li xic' na-iloc ere tqatz'ocak, cheq'ue chi cuac. Cui tachakik re, q'uehomak chi uc'ac. Chebanuhak usilal reheb ut riq'uin a'an te'xq'ue retal nak xutanal li yoqueb chixbanunquil. ²¹ Mech'inan ech'ol riq'uin li inc'a' us li neque'xbanu ere. Q'uehomak ban ech'ol chixbanunquill li us. Chi jo'can tecoloni xnumsin-quil li inc'a' us.

13

Tento takaq'ueheb sa' xnak' ku li q'uebileb sa' xc'anjel

¹ Chexpabank chiruhel li neque'taklan sa' xben li tenamit. Ma'ani cuan xcuanki' chi taklanc cui inc'a' ta q'uebil re xban li Dios. Eb li cuanqueb xcuanki' sa' xben li tenamit, a' li Dios quixakaban reheb. ² Jo'can nak li ani inc'a' napaban chiruhel li cuanqueb xcuanki', naxk'et li c'a'ru xakabanbil xban li Dios. Ut yo' chixbokbal li tojba mac sa' xben. ³ Li neque'banun re li us moco xiu xiu ta cuanqueb chiruhel li cuanqueb xcuanki'. A' li neque'banun mausilal xiu xiu cuanqueb chiruhel li neque'taklan sa' xben li tenamit. Cui inc'a' nequeraj nak xiu xiu cuankek chiruhel li cuanqueb xcuanki', chebanuhak li us, ut eb a'an te'xye nak chabilex. ⁴ Eb a'an cuanqueb sa' xc'anjel xban li Dios re etenk'anquil. Cui nequebanu li inc'a' us, chexxucuak xban nak cuanqueb xcuanki' re te'rakok atin sa' eben xban nak a'an xakabanbileb xban li Dios ut neque'xrahobtesi li neque'k'etoc re li chak'rab. ⁵ Jo'can nak tento texpabank chiruhel li cuanqueb xcuanki' sa' xben li tenamit. Macua' yal re nak inc'a' texq'uehek' chixtojbal rix le mac; re aj ban cui' nak c'oje'ok ech'ol riq'uin xbanunquill li c'a'ru us. ⁶ Jo'can nak tento xtojbal li naxpatz' li popol. Tento xtojbal xban nak li cuanqueb sa' xc'anjel xakabanbileb xban li Dios, ut a'an lix c'anjeleb. ⁷ Chetokak li c'a'ak re ru tento xtojbal. Cheq'uehak xcuankileb li cuanqueb sa' xcuanki' ut che-oxlok'iheb li cuanqueb sa' xc'anjel.

Chocuank sa' xyalal riq'uineb li kas kitz'in

⁸ Ma'ani aj iq'uin chicuank e'as. Ut cherahak ərib chi ribil ərib xban nak li ani naxra li ras ritz'in naxbanu li c'a'ru naxye li chak'rab. ⁹ Jo'ca'in

naxye sa' li chak'rab: Matmuxuc caxar; mācamsi cuas acuitz'in; mat-elk'ac, matyo'oban atin chirix la cuas acuitz'in; marahu ru li jalán aj e. Ut cui tara la cuas acuitz'in jo' nak nacara acuib laat, riq'unin a'an yocat chixbanunquil chixjunil li naxye li chak'rab. ¹⁰ Li ani narahoc inc'a' naxbanu raylal re li ras ritz'in. Li narahoc naxbanu chi tz'akal li naxye li chak'rab. ¹¹ Chikabalu chixjunil a'in xban nak nakanau nak yo chak chi nach'oc xk'ehil nak tatz'aklok ru li kacolbal nak tol-elk cui'chic li Jesucristo. Yo'on taxak cuango xban nak yo chak chi nach'oc lix c'ulunic chiru nak copaban chak lao. ¹² Chanchan nak yo chi numec' li k'ojojin ut yo chi sakeuc. Chikacanabak xbanunquil li inc'a' us li neque'xbanu li toj cuanqueb sa' xk'ojojinal ru li mac. Chikacolak kib chiru li inc'a' us riq'unin xcuanguil li Jesucristo. ¹³ Xban nak cuanco chic sa' xcutan saken li Jesucristo, chocuank sa' xyalal jo' junak tz'akal aj pabanel. Inc'a' chic tomacobk riq'unin li calac, chi moco riq'unin li num cu'a'c num uc'ac, chi moco riq'unin muxuc caxar, chi moco riq'unin co'betal yumbetac, chi moco riq'unin li c'a'ak chic re ru chi māusilalil. Ut inc'a' chic topletik chi moco tocakcalink. ¹⁴ Kak'axtesihak ban kib chi tz'akal rubel rok ruk' li Kacua' Jesucristo re nak a'an chic tatenk'ank ke riq'unin lix nimnal xcuanguil. Ut inc'a' chic takabalu li māusilal li naxrahi ru li kach'ol nak toj maji' nākapab li Cristo.

14

Chetenk'ahēb li k'uneb xch'ol sa' lix pabaleb

¹ Chec'ulakeb chi sa sa' ech'ol li toj k'uneb xch'ol sa' lix pabaleb ut mecuech'i rix lix c'a'uxeb. ² Cuan neque'xc'oxla nak moco māc ta xtzacanquil chixjunil li c'a'ak re ru natzacaman. Cuanqueb ajcui' li toj k'uneb xch'ol sa' lix pabaleb neque'xc'oxla nak māc xtzacanquil li tib. ³ Li ani naxtzaca chixjunil li c'a'ak re ru natzacaman inc'a' naru tixtz'ektana li ani inc'a' naxtzaca chixjunil li c'a'ak re ru. Ut li ani inc'a' naxtzaca chixjunil li c'a'ak re ru inc'a' naru naxcuech'i rix li jun chic li naxtzaca chixjunil xban nak a'an ac xc'ule' ajcui' xban li Dios. ⁴ Laat inc'a' naru nacatrakoc qatin sa' xben lix mos la cuas acuitz'in. A' lix patrón tayehok re ma us malaj inc'a' us li yo chixbanunquil. Jo'can nak li nimajcual Dios a'an nataklan re li junjunk ut a'an nayehoc reheb ma us malaj inc'a' us li yoqueb chixbanunquil. Ut li Dios tatenk'ank reheb chixbanunquil li us. ⁵ Cuan neque'c'oxlan nak k'axal lok' junak cutan chiruheb li cutan jun ch'ol chic. Ut cuan ajcui' neque'c'oxlan re nak juntak'et xlok'al chixjunileb li cutan. Abanan tento nak li junjunk tixc'oxla chi us chanru tixbanu. ⁶ Li ani naxq'ue xlok'al junak li cutan, a'an naxbanu re xlok'oninquillli Dios. Ut jo'can ajcui' li nati'oc tib naxbanu a'an re xlok'oninquillli Dios ut naxbantioxi ajcui' chiru li Dios. Ut li ani inc'a' nati'oc tib, xlok'oninquillli ajcui' li Dios naxbanu nak inc'a' nati'oc tib, ut naxbantioxi ajcui' chiru li Dios. ⁷ Ma ani yo'yo ta yal xjunes rib. Ut ma ani ajcui' nacam chi yal xjunes rib xban nak macu'a' lao yal ke sa' xben li kayu'am. ⁸ Nak yo'yoco nakaq'ue xlok'al li Kacua' Dios riq'unin li kayu'am. Ut nak nococam, nakaq'ue ajcui' xlok'al riq'unin li kacamic. Jo'can ut cui yo'yoco ut cui nococam a'yal re li Dios sa' kabən xban nak a'an chic laj echal ke. ⁹ Jo'can nak quicam li Jesucristo, ut quicuaci cui'chic chi yo'yo re nak a'anak li Kacua' reheb li yo'yoqueb jo' eb ajcui' li camenakeb. ¹⁰ ¿C'a'ut nak nacatrakoc qatin sa' xben la cuech aj pabanel? Ut c'a'ut nak nacatz'ektaheb aj pabanel? Inc'a' naru tabanu chi jo'can xban nak sa' jun cutan li Cristo tarakok qatin sa' kabən chikajunilo. ¹¹ Tz'ibanal sa' li Santil Hu li quixye li Dios:

Relic chi yal ninye ere nak chixjunileb te'xciuk'ib rib chicuu ut tine'xlok'oni ut chixjunileb te'xye riq'unin xtz'umal re nak lajn li tz'akal Dios. (Is. 45:23)

12 Jo'can nak chikajunilo toxkak'axtesi li kayehom kabauhom chiru li Dios.

Inc'a taxak tach'inank xch'ol la herman aban laat

13 Chikacanabak xuech'inquil kib chi kibil kib ut chikabanu li us re nak li kech aj pabanelil inc'a te'ch'inank xch'oleb sa' lix pabaleb chi moco te'oc cui'chic chi macobc kaban. **14** Xban nak ninpab li Cristo, jo'can nak ninnau nak mac'a rec' xtzacanquil li c'a'ak re ru. Abanan cui junak narec'a sa' xch'ol nak mac xtzacanquil junak tzacaemk, us cui inc'a' tixbanu. **15** Cui riq'unin li c'a'ru nacatzaca nach'inan xch'ol la cuech aj pabanelil, a'an naraj naxye nak inc'a' nacara la cuech aj pabanelil. Mapo' xch'oleb la cuech aj pabanelil riq'unin li c'a'ru nacatzaca xban nak li Jesucristo quicam ajcui' sa' xc'aba' eb a'an. **16** Laat nacanau nak us li yocat chixbanunquil, abanan chaq'uehak retal li c'a'ru tabanu re nak ma anitayehok nak inc'a' us li yocat chixbanunquil. **17** Lix cuanquinal li Dios inc'a' nakatau riq'unin c'a'ru nacatzaca chi moco riq'unin li c'a'ru nakuc'; natauman ban riq'unin li tiquinal, li tuktuquil usilal ut li sahil ch'olejil li naxq'ue ke li Santil Musik'ej. **18** Jo'can nak li ani nac'anjelac chiru li Cristo sa' tiquinal ut chi sa sa' xch'ol, li Dios nasaho' xch'ol riq'unin. Ut naq'uehe' ajcui' xlok al xbaneb li ras ritz'in. **19** Jo'can nak chikaten'uehak kach'ol chi cuanc sa' tuktuquil usilal riq'uineb li kas kitz'in. Ut chikaten'ka kib chi kibil kib re nak toq'uk sa' li kapabal. **20** Mapo' xc'anjel li Dios riq'unin li c'a'ak re ru nacatzaca. Yal nak chixjunil naru xtzacanquil. Abanan cui la herman nach'inan xch'ol riq'unin li nacatzaca, inc'a' us li yocat chixbanunquil. **21** Li us xbanunquil, a'an a'in: cui nach'inan xch'ol la herman xban nak nacatti'oc tib ut nacat-uc'ac vino, matti'oc tib ut mat-uc'ac vino. Inc'a' tabanu li c'a'ak re ru tach'inank cui' xch'ol la herman re nak inc'a' tamacobk aban. **22** Cui nacanau chi tz'akal nak us yocat chixbanunquil, canab sa' ruk' li Dios. Us xak re li ani narec'a sa' xch'ol nak moco mac ta fi yo chixbanunquil. **23** Cui junak narec'a sa' xch'ol nak mac xtzacanquil junak tzacaemk, ut cui naxtzaca, a'an cuan xmac chiru li Dios. Cui nakec'a sa' li kam nak inc'a' us xbanunquil li c'a'ru nakabau, ut cui nakabau, yoco chi macobc.

15

Chikatenk'aheb li kas kitz'in

1 Lao, li ac cau kach'ol sa' li kapabal, chikacuyeb xmac li toj k'uneb xch'ol sa' xpabaleb ut takatenk'aheb sa' li ch'a'ajquinal. Inc'a' chikasic' li us ca'aj cui' chok' ke lao. **2** Tento takabau li us reheb li kech aj pabanelil re nak te'q'uij sa' lix pabal ut re nak sahak sa' xch'oleb. **3** Li Cristo inc'a' quixbanu li quiraj xunes rib. Quixbanu ban li naraj li Dios. Quixtenk'aheb chixjunileb. Jo'can nak quixc'ul jo' tz'ib'anbil sa' li Santil Hu: Sa' inben quinak la majecuanquil li que'xbanu eb li que'hoboc acue. (Sal. 69:9) **4** Chixjunil li c'a'ak re ru quitz'ibac chak najter sa' li Santil Hu, re katzolbal nak quitz'ibac chak. Nocoxtenk'a re nak inc'a' tach'inank li kach'ol ut naxc'ojob li kach'ol re nak takacuy roybeninquil nak tatz'aklok ru li kacolbal. **5** Li Dios chitenk'ank ere re nak inc'a' tach'inank ech'ol ut a'an chiq'uehok xcacuil le ch'ol. A'an chitenk'ank ere chi cuanc sa' usilal chi ribil erib ut junajak le ch'ol jo' naraj li Jesucristo. **6** Li Dios chitenk'ank ere re nak junajak le ch'ol nak telok'oni li Acuabej Dios, liz Yucua' li Jesucristo.

Li colba-ib reheb ajcui' li mācua'eb ajujudío

⁷ Chec'ulak sa' eyānk chi sa sa' ech'ol le rech aj pabanelil jo' nak li Cristo coxc'ul lao. Jo'can chebənuhak re xq'uebal xlok'al li Dios. ⁸ Lain ninye ere nak li Cristo quic'ulun chi c'anjelac chiku lao aj judío. Riq'uin a'in naxc'utbesi chiku nak li Dios xq'ue li quixyechi'i chak reheb li kaxe'tonil yucua'. ⁹ Quic'ulun ajcui' chixtenk'anquileb li mācua'eb aj judío re nak te'xlok'oni li Dios xban nak k'axal nim fi ruxtan. Tz'ibānbil chi jo'ca'in sa' li Santil Hu:

Jo'can nak lain tatinlok'oni sa' xyankeb li mācua'eb aj judío. Ut tinbichank ajcui' re ałok'oninquil. (Sal. 18:49)

¹⁰ Ut naxye ajcui' sa' li Santil Hu chi jo'ca'in:

Chisahok' taxak ech'ol, laex li mācua'ex aj judío, erochbeneb laj judío lix tenamit li Dios. (Dt. 32:43)

¹¹ Ut naxye cui'chic sa' li Santil Hu:

Laex li mācua'ex aj judío, chelok'oni li Kacua' ut chixjunileb taxak li tenamit che'xnimak ru li Dios. (Sal. 117:1)

¹² Tz'ibānbil ajcui' sa' li Santil Hu li quixye laj Isaías:

Sa' xyankeb li ralal xc'ajol laj David li ralal laj Isaí tac'ulunk laj Colonel, li xakabanbil xban li Dios. Ut a'an tacuank xcuānquil sa' xbeneb li mācua'eb aj judío. Ut a'an li yokeb chixyo'oninquil. (Is. 11:10)

¹³ Li Dios a'an li kayo'on. A'an taxak chiq'uehok xsahil ech'ol chi nabal ut tixq'ue ajcui' ere li tutkuquil usilal xban nak nequexpāban. Xban nak cuan xcuānquil li Santil Musik'ej eriq'uin, cauhak taxak ech'ol chi oybeninc. ¹⁴ Ex herman, lain ninnau nak chābilex ut nequenau li xyālal ut nequeq'ue ajcui' ena'leb chi ribil erib. ¹⁵ Abanan sa' li hu a'in cau ca'ch'in li atin xintz'iba eriq'uin re nak inc'a' tāsachk sa' ech'ol li xinye. Ninbānu a'in sa' xc'aba' lin c'anjal li quixq'ue cue li Dios. ¹⁶ Lain ninc'anjelac chiru li Jesucristo sa' xyankeb li mācua'eb aj judío. Lin c'anjal a'an xch'olobanquil xyālal li colba-ib re nak eb li mācua'eb aj judío te'xk'axtesi rib chiru li Dios. Ut li Dios tāsahok' sa' xch'ol riq'uineb, ut te'santobresik xban li Santil Musik'ej.

¹⁷ Ninq'ue xlok'al lin c'anjal xban nak a'an xc'anjal li Dios. Moco injunes ta ninc'anjelac. A' li Cristo natenk'an cue. ¹⁸ Mac'a' inxiu chixyebal resil li c'anjal xinbānu sa' xc'aba' li Cristo nak xinc'anjelac sa' xyankeb li mācua'eb aj judío xban nak mācua' injunes xinc'anjelac. Li Jesucristo xtenk'an cue nak xinc'ameb xbe re nak te'xpab li Dios riq'uin lin yehom inbānuhom.

¹⁹ Xinjultica resil li Jesucristo chiruheb riq'uin li milagros ut li sachba ch'olej ut riq'uin xcuānquil li Santil Musik'ej. Yalak bar quinbeni xyebal resil li colba-ib. Quintiquib Jerusalén, ut quinsuti chixjunileb li na'ajej toj retal quincuulac Ilírico. ²⁰ Jo'can nak quinq'ue inch'ol chixyebal resil li Jesucristo bar toj maji' rabiomeb resil xban nak inc'a' nacuaj c'anjelac sa' li na'ajej ac tiquibanbil cui' c'anjelac junxil. ²¹ Jo'ca'in tz'ibānbil sa' li Santil Hu: Li ma jun sut yebil resilal li Cristo reheb, te'rabi. Ut nak te'rabi resil, te'xtau xyālal.

Laj Pablo naxc'oxla xic sa' li tenamit Roma

²² Q'uita sut xcuaj raj xic eriq'uin abanan xban nak nabal inc'anjal toj maji' naxq'ue rib chicuu. ²³ Ac cuan nabal chihab cuoquic chixc'oxlanquil xic eriq'uin. Ut anakcuan xinchoy lin c'anjal arin sa' li na'ajej cuanquin cui'. ²⁴ Ninc'oxla nak toxinnumek' chéribal nak tinxic España. Nacuaj ribil eru re nak tāsahok' inch'ol ut nacuaj ajcui' nak tineteenk'a re nak taruk tinxic España. ²⁵ Ut anakcuan xic cue chi rilbaleb laj pabanel li cuanqueb aran Jerusalén. Ut tinc'am jun matan re xtenk'anquileb. ²⁶ Eb laj pabanel li cuanqueb aran Macedonia ut Acaya x-ala sa' xch'oleb xtaklanquil jun li

m̄atán chok' reheb li neba' li cuanqueb sa' xyānkeb li herman aran Jerusalén. ²⁷ Qui-ala sa' xch'oleb xtenk'anquileb ut us ajcui' nak te'xbānu xban nak eb a'an mācua'eb aj judío ut sa' xc'aba'eb laj judío nak que'xc'ul li colba-ib. Jo'can nak us nak te'xtenk'aheb laj pābanel aj judío riq'uín xq'uebal reheb li c'a'ak re ru nac'anjelac chiruheb. ²⁸ Ut ca'aj cui' toxink'axtesi li tumin a'in, toxinnumek' eriq'uín ut tinxic España. ²⁹ Nak tincuulak eriq'uín, ninnau nak numtajenak li kosobtesinquil takac'ul xban li Cristo. ³⁰ Ex herman, nintz'ama cheru nak tinetenk'a sa' le tij sa' xc'aba' li Jesucristo ut sa' xc'aba' ajcui' li rahoc ib li q'uebil ke xban li Santil Musik'ej. ³¹ Chextijok chicuix re nak li Dios tācolok cue chiruheb li inc'a' neque'raj pābanc aran Judea. Ut chextijok ajcui' re nak eb laj pābanel aran Jerusalén te'xc'ul lix tenk'anquileb chi saheb sa' xch'ol. ³² Cui li Dios naraj, chincuulak ta eriq'uín chi sa sa' inch'ol. Ut chisahok' taxak kach'ol sa' comonil riq'uín xjulticanquil li Cristo nak toxincuank eriq'uín. ³³ A' taxak li Dios, li naq'uehoc tuktuquil usilal, chicuank eriq'uín chejunilex. Jo'can taxak.

16

Laj Pablo naxtakla xsahileb xch'ol

¹ Nacuaj tinye ere nak li kaherman lix Febe, a'an tz'akal aj pābanel ut a'an aj tenk'anel sa' li iglesia li cuan aran Cencrea. ² Ut nak tacuulak aran eriq'uín, chec'ulak a'an sa' xc'aba' li Kacua' jo' xc'ulubeb laj pābanel. Ut chetenk'ahak riq'uín c'a'ak re ru taraj cui' tenk'ac xban nak ac xtenk'aheb ajcui' nabal li herman ut xinixtenk'a ajcui' lain. ³ Cheq'uehak xsahil xch'ol laj Aquila ut lix Priscila, eb li cuech aj c'anjelil sa' xc'aba' li Jesucristo. ⁴ Usta xiu xiu chok' reheb xcolbal rix lin yu'am, aban que'xq'ue xch'oleb chintenkanquil. Ninbantioxi chiruheb. Mācua' ca'aj cui' lain ninbantioxin chiruheb. Neque'bantioxin aj ban cui' laj pābanel li mācua'eb aj judío. ⁵ Cheq'ue ajcui' xsahil xch'oleb li herman li neque'xch'utub rib sa' li rochoch laj Aquila ut lix Priscila. Cheq'ue xsahil xch'ol laj Epeneto, li raro inban. A'an li xbēn li quixpab li Jesucristo aran Acaya. ⁶ Cheq'ue xsahil xch'ol lix María. A'an k'axal nac'anjelac sa' eyānk laex. ⁷ Cheq'ue xsahil xch'oleb laj Andrónico ut laj Junias. A'aneb aj judío jo' lain. Cuochbeneb nak cocuan chi prexil. Na'no ruheb xbaneb li apóstol. Eb a'an que'xpab chak li Cristo nak toj maji' ninpāban lain. ⁸ Cheq'ue xsahil xch'ol laj Amplias. A'an ninra ajcui' sa' xc'aba' li Kacua'. ⁹ Ut cheq'ue xsahil xch'ol laj Urbano li kech aj c'anjelil sa' xc'aba' li Cristo, ut laj Estaquis li ninra. ¹⁰ Cheq'ue xsahil xch'ol laj Apeles. A'an inc'a' quich'inan xch'ol sa' lix pabal nak quiyale' ralenquil. Ut cheq'ue xsahil xch'oleb li cuanqueb sa' rochoch laj Aristóbulo. ¹¹ Cheq'ue xsahil xch'ol laj Herodión. A'an cuech tenamitil xban nak a'an aj judío ajcui'. Ut cheq'ue ajcui' xsahil xch'oleb li cuanqueb sa' rochoch laj Narciso li ac xe'pāban. ¹² Cheq'ue xsahil xch'oleb lix Trifena ut lix Trifosa li yoqueb chi c'anjelac sa' xc'aba' li Kacua'. Ut cheq'ue xsahil xch'ol lix Pérsida, li nakara sa' xc'aba' li Cristo xban nak a'an naxq'ue xch'ol chi c'anjelac chiru li Dios. ¹³ Cheq'ue xsahil xch'ol laj Rufo, li sic'bil ru chi c'anjelac chiru li Kacua', ut cheq'ue xsahil xch'ol lix na'. A'an chanchan ajcui' inna' chicuú lain. ¹⁴ Cheq'ue xsahil xch'ol laj Asíncrito, laj Flegonte, laj Hermas, laj Patrobas, laj Hermes, jo'queb ajcui' chixjunileb laj pābanel, li neque'xch'utub rib riq'uineb chi xlok'oninquil li Dios. ¹⁵ Cheq'ue xsahil xch'ol laj Filólogo ut lix Julia, laj Neroe ut li ranab. Ut cheq'ue xsahil xch'ol laj Olimpas jo' eb ajcui' chixjunileb laj pābanel li neque'xch'utub rib riq'uineb

chixlok'oninquel li Dios. ¹⁶ Q'uehomak xsahil ech'ol chi ribil erib riq'unin santiil utz'uc u. Chixjunileb laj pabanel neque'xtakla xsahil ech'ol sa' xc'aba' li Jesucristo. ¹⁷ Ut nintz'ama cheru, ex herman, nak cheq'uehak retal li neque'yo'oban jachoc ib sa' eyank ut neque'raj xpo'bal ru le pabal, li tzolbilex cui. Mejunaji erib riq'uineb a'an. ¹⁸ Eb a'an inc'a' neque'xbanu li c'a'ru naraj li Kacua' Jesucristo. Ca'aj cui' li c'a'ru neque'xrahi ru lix ch'oleb, a'an li neque'xbanu. Ut riq'unin k'unil atin neque'k'unbesin ut neque'xbalak'i li inc'a' cauheb xch'ol sa' xpabaleb. ¹⁹ Chixjunileb neque'na'oc re nak laex cau ech'ol sa' le pabal. Jo'can nak nasaho' inch'ol eriq'uin. Aban nacuaj nak teq'ue ech'ol chixbanunquil li us ut mebanu li inc'a' us. ²⁰ Ut li Kacua' Dios, li naq'uehoc li tuktukquil usilal, a'an tixsach xcuanguil laj tza ut textenk'a re nak laex chic texnumtak sa' xben. Li rusilal li Kacua' Jesucristo chicuank eriq'uin. ²¹ Naxtakla xsahil ech'ol laj Timoteo, li cuech aj c'anjelil. Ut neque'xtakla xsahil ech'ol laj Lucio, laj Jasón ut laj Sosipater. Eb a'an cuech tenamitil. ²² Lajin laj Tercio. Yoquin chixtz'ibanolli hu a'in li tixtakla ere laj Pablo. Ut nintakla ajcui' xsahil ech'ol sa' xc'aba' li Cristo. ²³ Naxtakla ajcui' xsahil ech'ol laj Gayo, li naq'uehoc cuochochnal. Ut sa' ajcui' li rochoch a'an neque'xch'utub rib laj pabanel. Laj Erasto, laj c'ulul tumin sa' li tenamit, naxtakla xsahil ech'ol. Ut naxtakla ajcui' xsahil ech'ol laj Cuarto. ²⁴ A' taxak li rusilal li Kacua' Jesucristo chicuank eriq'uin chejunilex laex. Jo'can taxak.

Laj Pablo naxllok'oni li Kacua' Dios

²⁵ Chikalok'onihak taxak li Kacua' Dios, li cuan xcuanguil re xq'uebal xcacuial kach'ol sa' li kapabal. Ninch'olob xyalal cheru chirix li colbabib sa' xc'aba' li Jesucristo. Najter k'e cutan mukmu chak li xyalal chiku; aban anakcuan c'utbesinbil chic lix yalal chiku. ²⁶ Anakcuan xcutano' xyalal chiku xban li Santil Hu li tz'ibanol chak junxil xbaneb li profeta. Que'xtz'iba chak li atin jo' quiyehe' reheb xban li Dios, li mac'a' roso'jic. Ut a'in yo xch'olobanquil xyalal yalak bar sa' chixjunil li ruchich'och' re nak chixjunileb li tenamit te'rabi ut te'pabank. ²⁷ Li jun chi Dios, li naxnau chixjunil, chicuank xlok'al sa' xc'aba' li Kacua' Jesucristo anakcuan ut chi junelic k'e cutan. Jo'can taxak.

Li Xben Hu li Quixtz'iba li San Pablo reheb laj Corinto

Xq'uebal xsahileb xch'ol

¹ Lain laj Pablo. Sic'bil chak cuu xban li Dios re nak tinc'anjelak chok' x-apóstol li Jesucristo xban nak jo'can quiraj li Dios. Cuochben laj Sóstenes li cuech aj pabanelil. ² Yoquin chixtz'ibánquil li hu a'in eriq'unin laex aj pabanel li cuanqueb sa' li tenamit Corinto. Santobresinbilex sa' xc'aba' li Jesucristo ut sic'bil eru xban li Dios chok' ralal xc'ajol. Ut sic'bil ajcui' ruheb chixjunileb li cuanqueb yalak bar li neque'xyaba xc'aba' li Jesucristo. A'an li kaDios chikajunilo lão li nocopában re. ³ Chicuank taxak eriq'unin li usilal ut li tuktukuilal li nachal riq'unin li Dios li kaYucua' út riq'unin li Kacua' Jesucristo.

Li rusilal li Dios nequec'ul sa' xc'aba' li Cristo

⁴ Junelic ninbantioxi chiru li Dios nak nintijoc cherix laex ut ninbantioxi ajcui' chiru li Dios nak xematanli rusilal lí Dios sa' xc'aba' li Jesucristo. ⁵ Xban nak junajex chic riq'unin li Cristo, xematanli rusilal li Dios. Chabil chic nequex-atinac ut chabil chic le na'leb xban nak nequenau chic li xyalal. ⁶ Ac xematanli rusilal li Dios ut nac'utun nak yal li quinye ere chirix li Cristo. ⁷ Ac xematanli usilal li naxq'ue li Santil Musik'ej ut mac'a' chic nequeroybeni. Ca'aj chic lix c'ulunic li Kacua' Jesucristo nequeroybeni. ⁸ Li Dios yok chixq'uebal xcacuub le ch'ol chalen toj sa' roso'jic li cutan re nak mac'a'ak emac sa' li cutan nak tol-elk li Kacua' Jesucristo. ⁹ Li Dios junelic naxq'ue li naxyech'i ut a'an ajcui' li quisic'oc eru re nak texcuank chi sum atin riq'unin li Ralal, a'li Kacua' Jesucristo.

Xq'uebal xna'lebeb laj pabanel re nak junajakeb xch'ol

¹⁰ Ex inherman, sa' xc'aba' li Kacua' Jesucristo nintz'ama cheru nak junajak le na'leb. Mac'a'ak li jachoc ib sa' eyank. Junajak ban le c'a'ux ut junajak le ch'ol. ¹¹ Ninye ere chi jo'ca'in xban nak lix comoneb lix Cloé xe'yehoc resil cue nak cuan cuech'inc ib sa' eyank. ¹² ¿C'a'ut nak jalan jalank nequec'oxla chejunkal? Cuan neque'xye: Lao xtzolom laj Pablo. Ut cuan neque'xye: Lao xtzolom laj Apolos. Ut cuan ajcui' li neque'xye: Lao xtzolom laj Pedro ut cuan cui'chic neque'xye: Lao xtzolom li Cristo. ¹³ Abanan lain tinpatz' ere, ¿ma nabal ta bi' li Cristo? Inc'a'. Jun ajcui'. ¿Ma quinq'uehe' ta bi' lain chiru cruz sa' ec'aba' laex? ¿Ma sa' inc'aba' ta bi' lain quec'ul li cubi ha'? ¹⁴ Ninbantioxi chiru li Dios nak macu'a' lain quincubsin eha'. Ca'aj cui' laj Crispot ulaj Gayo quincubsi xha'eb. ¹⁵ Cui ta lain quincubsin eha', mare raj quec'oxla nak quinbanu sa' inc'aba' lain. ¹⁶ Ut quincubsi ajcui' xha'eb li cuanqueb sa' rochoch laj Estéfanás. Inc'a' chic jultic cue ma cuan chic quincubsiheb xha'. ¹⁷ Li Cristo inc'a' quinixtakla chak chi cubsinc ha'. Quinixtakla ban chak chixjulticanquil resil li colba-ib. Abanan macu'a' riq'un atin ch'a'aj xtaubal ru xyalal quinatinac. Cui ta riq'un atin ch'a'aj xtaubal ru quinatinac, cuan raj inc'a' que'ta'oc ru ut tacanák raj chi mac'a' rajbal xcamic li Cristo chiruheb.

Xjulticanquil Xcamic li Cristo

¹⁸ Nak neque'rabi resil lix camic li Cristo chiru li cruz, mac'a' na-oc cui' chiruheb li te'xic sa' xbalba. Tontil na'leb a'an chanqueb. Aban chiku lão li ac

xocole' k'axal lok' a'an xban nak a'an xcuanquil li Dios. ¹⁹ Jo'ca'in tz'ibanolil
retalil sa' li Santil Hu:

Tinsacheb xcuanquil li cuanqueb xna'leb xjuneseb rib.

Tintz'ektana xc'a'uxeb li neque'rec'a rib nak cuanqueb xna'leb.

²⁰ Chiru li Dios mact'a' neque'oc cui' li cuanqueb xna'leb xjuneseb. Mact'a'
neque'oc cui' laj tzolone. Ut mact'a' neque'oc cui' li neque'xnau atinac chirix
lix na'leb li ruchich'och'. Lix na'leb li ruchich'och' tontil na'leb ut mact'a'
na-oc cui' chiru li Dios. ²¹ Li Dios naxnau chixjunil. Ac cuan sa' xch'ol li
Dios nak li cuanqueb sa' ruchich'och' ma' jaruj te'xtau ru xna'leb li Dios yal
xjuneseb rib. Jo'can nak quiraj xcolbaleb li te'pabank re li resil li colba-
lib usta cuan li neque'yehoc re nak tontil na'leb li yoco chixjulticanquil
cheru chirix li Cristo. ²² A'in tontil na'leb chiruheb laj judío xban nak te'raj
nak tac'utek' junak milagro chiruheb. Tontil na'leb chiruheb li macua'eb
aj judío xban nak ca'aj cui' xna'leb li ruchich'och' neque'xq'ue xcuanquil.
²³ Abanan lao nakach'olob xyalal nak li Cristo quicam chiru li cruz re kacolbal.
Abanan li camc chiru cruz xutanal chiruheb laj judío ut inc'a' neque'raj
xtaubal xyalal lix camic li Cristo. Jo'can nak chiruheb laj judío li xyalal
lix camic li Cristo chanchan jun li pec neque'xtich rokeb chiru. Jo'can
ajcui' chiruheb li macua'eb aj judío, li xyalal lix camic li Cristo tontil na'leb
chiruheb. ²⁴ Abanan chiku lao li sic'bil ku xban li Dios, usta lao aj judío
usta macua'o aj judío, riq'uin xcamic li Cristo chiru cruz nakil xcuanquil li
Dios nak coxcol ut nakanau chic chanru xna'leb li Dios. ²⁵ K'axal cui'chic
cuan xna'leb li Dios chiruheb li cuink usta yal tontil na'leb chiruheb li inc'a'
neque'pabán. Usta neque'xye nak mact'a' xcuanquil li Dios, k'axal cui'chic
nim xcuanquil chiru xcuanquileb li cuink. ²⁶ Ex herman, cheq'ue retal
chanru cuanquex nak quisiq'ue' eru xban li Dios. Moco nabalex ta cuan
ena'leb jo' xna'leb li ruchich'och'. Moco nabalex ta li cuan elok'al ut inc'a'
nabaleb sa' eyank cuanqueb xcuanquil sa' xc'aba'eb lix na' xyucua'. ²⁷ Li
mact'a'eb xna'leb chiruheb li cuink, li Dios quixsiq'ueb ru re nak te'c'utek'
xxutaneb li cuanqueb xna'leb sa' ruchich'och'. Ut li mact'a'eb xcuanquil sa'
ruchich'och' li Dios quixsiq'ueb ru re nak te'c'utek' xxutaneb li cuanqueb
xcuanquil sa' ruchich'och'. ²⁸ Li Dios quixsiq'ueb ru li tz'ektanabileb li
mact'a'eb xlok'al ut li inc'a' neque'q'uehe' xcuanquil xbaneb li cuanqueb sa'
li ruchich'och'. Quixsiq'ueb ban ru re xcubsinquil xcuanquileb li cuanqueb
xna'leb sa' ruchich'och'. ²⁹ Quixbanu chi jo'ca'in re nak ma'ani tixnimobresi
rib chiru li Kacua'. ³⁰ Yal xban rusilal li Dios nak junajex chic riq'uin li
Jesucristo. Li Jesucristo quixakabac xban li Dios re xq'uebal kana'leb. Quix-
akabac chixticobresinquil li kach'ol chiru li Dios ut chikasantobresinquil. Ut
sa' xc'aba' li Cristo cuybil sachbil li kamac. ³¹ Jo'can nak ca'aj cui' li Kacua'
takanimobresi. Jo'ca'in tz'ibanolil retalil sa' li Santil Hu: Mikanimobresi kib.
Chikanimobresihak ban xcuanquil li Kacua'.

2

¹ Jo'can ut ex herman, nak xincuulac eriq'uin chixch'olobanquil xyalal
li ratin li Dios, inc'a' xinatinac riq'uin atin ch'a'aj xtaubal ru ut inc'a'
xinatinac re xc'utbal nak cuan inna'leb. ² Xban nak inc'a' xcuaj xc'utbal
nak cuan inna'leb, jo'can nak ca'aj cui' chirix lix camic li Cristo chiru li
cruz xinatinac. ³ Nak cuanquin eriq'uin ninsicsot xban inxiu nak yoquin
chi atinac eriq'uin xban nak inc'a' cau inch'ol. ⁴ Nak xinch'olob xyalal
cheru inc'a' xinatinac riq'uin atin jo' neque'xbanu li cuanqueb xna'leb
sa' ruchich'och'. Xinch'olob ban xyalal cheru jo' quixc'ut chiccui li Santil
Musik'ej, ut li Santil Musik'ej quiq'uehoc xcuanquil li cuatin. ⁵ Lain inc'a'

xinatinaq eriq'uin jo' neque'xbanu li cuanqueb xna'leb xban nak inc'a' nacuaj nak tacuank epabal sa' xc'aba' xna'lebeb li cuink; sa' xc'aba' ban xcuanquil li Dios xexpaban.

Li Dios naxc'ut chiku li xyalal

⁶ Li ac cauheb xch'ol sa' lix pabaleb, neque'katina riq'uin atin moco yalak ani ta tata'ok ru. A'in macua' xna'leb li ruchich'och' chi moco xna'lebeb li neque'taklan sa' ruchich'och'. Lix na'lebeb na-oso' jo' nak neque'oso' eb a'an.

⁷ Abanan lajin ninch'olob xyalal li na'leb li quixq'ue li Dios. Li na'leb a'an mukmu nak quicuan chak junxil. Inc'a' natauman ru nak quicuan. Abanan chalen chak najter k'e cutan nak toj maji' quixyib li ruchich'och' ac cuan chak sa' xch'ol li Dios nak tixq'ue li kalok'al ut li kalok'al, a'an li kacolbal. ⁸ Ma jun li neque'taklan sa' ruchich'och' que'xtau ru li na'leb a'in. Cui ta que'xtau ru, inc'a' raj que'xcamsi chiru cruz li Kacula' Jesucristo, laj echal re li lok'al.

⁹ Jo'ca'in tz'ibanol sa' li Santil Hu chirix li kalok'al:

Li inc'a' na-ilman ru chi moco na-abic chi moco nac'oxlac xbaneb li cuink, a'an li quixc'ub li Dios chok' rehēb li neque'rahoc re. (Is. 64:4; 65:17)

¹⁰ Aban li Dios quixc'utbesi chiku li na'leb a'in xban li Santil Musik'ej. Li Santil Musik'ej naxnau chixjunil lix na'leb li Dios li k'axal ch'a'aj xtaubal ru.

¹¹ Ma ani nana'oc re c'a'ru cuan sa' xch'ol li junjunk. Ca'aj cui' li junjunk nana'oc re. Jo'can ajcui' lix c'a'ux li Dios. Ma ani nana'oc re. Ca'aj cui' li Santil Musik'ej nana'oc re. ¹² Li Dios quixq'ue ke jun li Musik'ej. Macua' yal xmusik' cuink li cuan kiq'uin. A'lix Santil Musik' ej Dios, a'an li cuan kiq'uin. Li Dios quixq'ue ke li Santil Musik'ej re nak takatau ru li c'a'ru naxq'ue ke riq'uin xnimil risilal. ¹³ Inc'a' yoco chi atinac chirix li na'leb a'in riq'uin atin xkac'oxla kajunes. Yoco ban chi atinac riq'uin atin quic'utbesi chiku xban li Santil Musik'ej. Li xyalal li naxc'ut chiku li Santil Musik'ej lao nakach'olob chiruheb li cuan li Santil Musik'ej riq'uineb. ¹⁴ Li ani mac'a' li Santil Musik'ej riq'uin inc'a' naxc'uluban li xyalal li naxc'ut li Santil Musik'ej. A'an tontil na'leb chiru xban nak inc'a' naxtau ru. Ca'aj cui' li ani cuan li Santil Musik'ej riq'uin naru tixtau ru xban nak li Santil Musik'ej a'an li nac'utuc re li xyalal chiru. ¹⁵ Li ani cuan li Santil Musik'ej riq'uin naxnau bar cuan li yal ut naxnau ajcui' bar cuan li inc'a' yal. Ut li ani mac'a' li Santil Musik'ej riq'uin inc'a' naxtau ru lix na'leb li cuan li Santil Musik'ej riq'uin. ¹⁶ Jo'ca'in tz'ibanol sa' li Santil Hu: Ma ani nana'oc re lix c'a'ux li Kacula'. Ma ani naru naq'uehoc xna'leb. Ma ani naxnau lix c'a'ux li Dios yal xjunes. Abanan xban nak lao cuan li Santil Musik'ej kiq'uin, cuan ajcui' lix c'a'ux li Cristo kiq'uin.

3

Yal aj c'anjelo chiru li Dios

¹ Ex inherman, nak cuanquin eriq'uin inc'a' quiru quinatinac eriq'uin jo' ninatinaq riq'uineb li ac cauheb xch'ol sa' lix pabaleb. Laex chanchan mac'a' li Santil Musik'ej eriq'uin. Jo'can nak ninatinaq eriq'uin jo' nak ninatinaq riq'uineb li toj k'un xch'oleb sa' lix pabaleb. ² Li xyalal xinch'olob cheru chanchan nak leche xinq'ue cheruc'. Moco cacuil tzacaemk ta xinq'ue ere xban nak laex toj maji' nequexq'ui. Naraj naxye nak toj maji' ninch'olob cheru li na'leb li ch'a'aj xtaubal ru xban nak toj maji' nequexq'ui sa' le pabal ut mamin tetau ru. ³ Inc'a' texruk xtaubal ru anakcuán xban nak toj nequebañu li c'a'ru naxrahi ru le ch'ol. Nak toj cuan li cakalinc ib ut li cuech'inc ib sa'eyank, ma inc'a' ta bi' yoquex chi xbanunquil li c'a'ru naxrahi ru le ch'ol? Ut laex nequejuntak'eta' erib riq'uineb li toj mac'a' li Santil Musik'ej riq'uineb. ⁴ Laex toj maji' junaj le ch'ol. Cuan li neque'xye, 'laiñ

nintake laj Pablo". Ut cuan cui'chic li neque'xye, "lāin nintake laj Apolos". Cui jo'can yoquex chixyebal, ¿ma inc'a' ta bi' toj yoquex chixjuntak'etanquil erib riq'uineb li toj maji' neque'paban? ⁵ ¿Ani ta bi' laj Apolos? Ut, ¿anihin ta bi' lāin? Lao yal aj c'anjelo chiru li Kacua'. Xkach'olob xyalal cheru nak xepab li Kacua'. Ut chi kacabichalo nococ'anjelac jo' taklanbilo cui' xban li Kacua'. ⁶ Chanchano aj acuinel nak nococ'anjelac chiru li Dios. Chanchan auc xinbanu nak xinye resil li colba-ib ere. Ut chanchan t'akresinc quixbanu laj Apolos nak quixch'olob lix yalal cheru. Abanan a' li Dios quiq'uehōc lix mokic. ⁷ Jo'can nak chi moco laj acuinel chi moco laj t'akresinel cuan xcuanyl. Ca'aj cui' li Dios li naq'uehōc xmokic cuan xcuanyl. ⁸ Laj acuinel ut laj t'akresinel juntak'eteb xcuanyl chiru li Dios ut chi xjunkaleb te'xc'ul xk'ajcamunquil a' yal chanru lix c'anjeleb. ⁹ Lao kech aj c'anjelil kib chiru li Dios. Ut lāex chanchanex li ch'och' li nakac'anjela ru. Ut li Dios a'an laj echal re li ch'och'. Ut chanchanex ajcui' jun li cab yoco chixyibanol ut li Dios, a'an laj echal re li cab a'an. ¹⁰ Xban nak sic'b'il cuu xban li Dios chi c'anjelac chiru jo' jun aj tz'ac chabil, jo'can nak xinnau xjolominquil li c'anjl. Chanchan nak xinyib xcimiento li cab nak xinye resil li colba-ib ut jalan chic te'cablak sa' xben nak te'xch'olob li xyalal cheru. Ut li junjunk chixq'uehak retal nak tz'akal re ru lix c'anjel tixbanu. ¹¹ Tixq'ue retal chanru lix c'anjel xban nak ac q'uebil lix cimiento li cab. Ut ma' ani naru tixq'ue junak chic li cimiento chiru li ac q'uebil. Ut a'an li Kacua' Jesucristo. ¹² Cuan li te'cablak sa' xben li cimiento a'an riq'uin li c'a'ak re ru najt naxcuy jo' li oro, li plata ut li tertoquil pec. Ut cuan li te'cablak sa' xben riq'uin li inc'a' naxcuy jo' li che', li cuc ut li q'uim. Lix yāal a'an, a'in: nak cuan li te'c'anjelac chi chabil chiru li Dios ut cuan inc'a'. ¹³ Lix c'anjel li junjunk tac'utunk nak tol-ekl cui'chic li Kacua' Jesucristo chi rakoc' atin. Chanchan nak tanumsik sa' xam lix c'anjel naxbanu re rilbal ma'taosok' malaj inc'a'. ¹⁴ Cui lix c'anjel inc'a' tasachek', nac'utun nak us lix c'anjel ut li jun a'an tixc'ul lix k'ajcamunquil. ¹⁵ Cui ut lix c'anjel junak inc'a' tz'akal re ru, lix c'anjel tasachk chanchan c'atbil nak taosok'. Ut li jun a'an tacolek', abanan chanchan tanumek' sa' xam nak tacolek'. ¹⁶ ¿Ma inc'a' ta bi' nequenau nak lāex rochochex li Dios? ¿Ma inc'a' ta bi' nequenau nak li Santil Musik'ej cuan eriq'uin? ¹⁷ Li rochoch li Dios a'an santo. Cui ani naxtiquib li jachoc ib sa' eyank, li jun a'an yo chixjuc'bal rochoch li Dios xban nak lāex aj pabanel rochochex chic li Dios. Ut li Dios tixsach li ani naxtiquib xjachbal ruheb laj pabanel. ¹⁸ Ma' ani taxak tixbalak'i rib xjunes. Cui cuan junak sa' eyank narec'a nak cuan xna'leb sa' li ruchich'och' a'in, chixcubsihak rib ut tixbanu jo' li mac'a' naxnau re nak tixtau xna'leb chi tz'akal. ¹⁹ Lix na'leb li ruchich'och', a'an tontil na'leb chiru li Dios. Jo'ca'in tz'ibanal sa' li Santil Hu:

Li Dios naxcanabeb chixsachbaleb rib xban lix sebaleb xch'ol li ani neque'rec'a nak cuanqueb xna'leb xjuneseb rib. (Job 5:13)

²⁰ Ut tz'ibanal ajcui' sa' li Santil Hu li naxye:

Li Dios naxnau nak mac'a' na-oc cui' lix c'a'uxeb li neque'xye nak cuanqueb xna'leb xjuneseb rib. (Sal. 94:11)

²¹ Jo'can nak ma' ani tixnimobresi ru junak cuink riq'uin li c'a'ru naxbanu xban nak chixjunil li c'a'ak re ru q'uebil ere xban li Dios re nak tac'anjelac cheru. ²² Usta laj Apolos, usta lāin, usta laj Pedro, lao yal aj c'anjelo cheru. Usta li ruchich'och', usta li yu'am, usta li cāmc, ere ajcui' re nak te'c'anjelac cheru. Chixjunil li cuan anakcuan ere lāex ut ere ajcui' li toj chālel chiku. ²³ Chixjunil li c'a'ak re ru, ere lāex. Abanan lāex rehex li Cristo ut li Cristo, a'an re li Dios.

4

Q'uebilo chi c'anjelac chiru li Kacua'

¹ Jo'can nak chenauhak nak lao yal aj c'anjelo chiru li Cristo ut q'uebil sa' kabén xch'olobanquil lix yalal li colba-ib li quiq'uehe' ke xban li Dios. Li xyalal a'in mukmu nak quicuan chak junxil. ² Li ani sic'bil ru chixch'olobanquil li xyalal tento nak t̄icák xch'ol. ³ Lain mac'a' nacuaj re cui yoquex chixsic'bal atin chicuix ut mac'a' nacuaj re cui junak aj rakol atin tatz'ilok atin chicuix. Chi moco lain naru tincuech' rix lin c'anjel. ⁴ Lain nacuac'a nak mac'a' inmac'. Abanan moco xban ta a'an nak tinye nak t̄ic inch'ol. A' li t̄arakok atin sa' inben a'an li Kacua', ut a'an tayehok re ma us xinbanu malaj inc'a'. ⁵ Jo'can nak mexrakoc atin chirix le ras eritz'in. Cherojbeni toj t̄acuulak xk'ehil nak tol-ekl cui'chic li Kacua' Jesucristo ut a'an tixc'utbesi lí inc'a' nanauman anakcuan. Tixc'utbesi lí c'a'ru nanume' sa' xch'ol li junjunk. Ut li Dios tixq'ue xlok'al li junjunk a' yal chanru lix yehom xbanuhom. ⁶ Ex herman, chixjunil li xinye chirix laj Apolos ut chicuix re etenk'anquil nak xinye. Nacuaj nak tetau ru li c'a'ru xinye. Chetzol erib qiq'unin re nak tebanu jo' tz'ibánbil sa' li Santiil Hu. Inc'a' naru tenimobresi erib xban nak nequetake li jun ut nequetz'ektaná li jun chic. ⁷ ¿Ma jalanex ta bi' laex chiruheb li jun ch'ol chic nak nequeret'a erib? ¿Ma macua' ta bi' li Dios quiq'uehoc ere li c'a'ru cuan ere? ¿C'a'ut nak nequenimobresi erib chixyebal nak cuan c'a'ru ere? Inc'a' naru tenimobresi erib xban nak yal xemataní li c'a'ru cuan ere riq'unin li Dios. ⁸ Ac xc'oja ech'ol xban nak sa' ech'ol laex nak ac xetau ena'leb. Chanchanex li biom sa' le pabal nak nequec'oxla. ¿Ma laex chic rey nak nequec'oxla? Sa' ech'ol laex nak mac'a' kacuanquil. Us raj ac ta cuan xetau ena'aj chok' rey, re nak tocuanaj ajcui' raj lao chi taklanc erochben. ⁹ Nak ninc'oxla lain li Dios xoxq'ue lao li apóstol chi mac'a' kacuanquil. Chanchano junak a'mac li ac xtenebac' camc sa' xben ut q'uebilo chiruheb li ángel ut chiruheb li cunjik re toe'r'il. ¹⁰ Laex nequec'oxla nak mac'a' kana'leb xban nak nakach'olob resil li Cristo ut laex cuan ena'leb xban nak nequenau nabal chirix li Cristo nak nequec'oxla. Lao mac'a' kacuanquil ut laex cuan ecuanquil nak nequec'oxla. Sa' ech'ol laex nak laex nequec'-oxlok'ic ut lao tz'ektanabilo. ¹¹ Toj chalen anakcuan yoco chixcuybal kasa' ut t̄achakik ke. Mac'a' chic kak'. Sac'bilo ut mac'a' kochoch. ¹² Cau nocotrabajic re xnumsinquil li cutan junjunk. Nak neque'xbanu mausilal ke, lao nakabánu usilal reheb. Ra neque'xbanu ke li xic' neque'iloc ke ut nakacuy xnumsinquil li raytal li neque'xbanu ke. ¹³ Nak nocohobe' inc'a' nakasume ru. Neque'katina ban sa' usilal. Chalen anakcuan tz'ektanabilo xbanab chixjunileb. Mac'a' noco-oc cui' nak nocoe'r'il. Chanchano li mul chiruheb. ¹⁴ Macua' re xc'utbal exutan nak yoquin chixyebal ere chi jo'ca'in. Re ban xq'uebal ena'leb xban nak chanchanex li cualal inc'ajol chicuu ut raroquex inban. ¹⁵ Usta cuan lajebak mil li neque'ch'oloban xyalal li Cristo cheru, abanan lain li xinyehoc ere resil li colba-ib junxil nak xexpában. Jo'can nak lain le yucua' sa' xc'aba' li Jesucristo. ¹⁶ Jo'can ut nak nintz'ama cheru nak tetzol erib cuiq'unin ut tebanu jo' ninbanu lain. ¹⁷ A'an aj e nak xintakla eriq'unin laj Timoteo. A'an tixjultica ere nak li c'a'ru yoquin chixch'olobanquil chirix li Cristo, a'an ajcui' li yoquin chixbanunquil. Ninch'olob chi tz'akal lix yalal yalak bar chiruheb chixjunileb laj pabanel. Laj Timoteo chanchan li cualal ut raro inban. Tz'akal re ru lix pabal sa' xc'aba' li Jesucristo. ¹⁸ Cuan li xe'k'etk'eto' sa' eyank. Eb a'an neque'xye nak ninxucuac. Jo'can nak inc'a' chic ninxic eriq'unin. ¹⁹ A'an moco yal ta. Cui li Dios naxq'ue cue, chi seb tincuulak

eriq'uin. Aran toxintau xyalal. Tincuil ma ca'aj cui' atinac neque'xnau li k'etk'eteb. Toj aran tincuil ma yal na nak cuan xcuanquil li Dios riq'uineb. ²⁰ Lix nimajcual cuanquilal li Dios, tento tac'utunk sa'li kayu'am. Moco ca'aj cui' ta riq'uin katin tac'utunk xcuanquil li Dios. ²¹ Lain ninpatz' ere c'a'ru teraj. ¿Ma teraj nak texink'us chi cau nak tincuulak eriq'uin? ¿Malaj ut teyib le yu'am re nak tincuulak riq'uin rahoc ut tulanil?

5

Li rakoc atin sa' xbeneb laj co'bet ut laj yumbet

¹ Yalak bar x-abiman resil nak cuan li jo' majo'il na'leb sa' eyank xban nak jun li cuink quixmak' rixakil lix yucua'. C'ajo' xyibal ru li yoqueb chixbanunquil sa' eyank. Eb li macua'eb aj pabanel inc'a' neque'xbanu chi jo'can. ¿Ma toja' ta chic laex texbanunk re chi jo'can? ² Laex nequek'etk'eti erib ut toj cuan li mac sa' eyank. Naraho' raj ech'ol ut nayot'e' raj ech'ol xban xyibal ru li mac li yo xbanunquil sa' eyank. Li ani xmacob chi jo'can xerisi raj sa' eyank. ³ Usta najt cuanquin eriq'uin junelic yoquin chec'oxlanquil. Lain ninnau nak li cuink a'an cuan xmac. Usta ma anihin chak eriq'uin, abanan li Cristo quixc'ut chicuu nak li jun a'an cuan xmac ut tento nak tixtoj rix lix mac. ⁴ K'axal us raj nak tech'utub erib sa' xc'aba' li Jesucristo ut tec'ub c'a'ru tebanu chirix a'an. Chanchan nak cuankin eriq'uin xban nak yoquin chi tijoc cherix. Ut lix nimal xcuanquik li Jesucristo chicuank eriq'uin ut chextenk'a. ⁵ Isihomaki li cuink a'an sa' eyank. Nak cuank chic sa' ruk' laj tza tixc'ul li raylal ut riq'uin li raylal tixc'ul, tixcanab taxak xbanunquil li mäusilal re nak naru tacolek' nak tol-elk' cui'chic li Jesucristo. ⁶ Menimobresi erib riq'uin xc'oxlanquil nak us yoqueb chixbanunquil. Laex nequexinjuntak'eta riq'uin xk'emal li caxlan cua. Laex nequenau nak usta ca'ch'in ajcui' lix ch'amal naq'ueaman, naxch'amobresi chixjunil li k'em. Naraj naxye nak inc'a' naru nacuan li mac sa' xyankeb laj pabanel re nak inc'a' te'xc'am xbeheb li jun ch'ol chic chi macobc. ⁷ Canabomak chi junaj cua li najteril na'leb re nak mac'a'ak chic li mac eriq'uin. Chanchanakex chic lix k'emal li caxlan cua mac'a' xch'amal xban nak li Jesucristo quirisi le mac. Eb laj judío que'xmayeja li carner re xjulticanquik li pascua ut jo'can ajcui' li Jesucristo a'an lix carner li Dios li quixmayeja rib re risinqul li kamac. ⁸ Jo'can nak chikacanabak li najter na'leb li naq'uehoc ke chi macobc. Li najter na'leb a'an chanchan lix ch'amal li caxlan cua. Ut lao chanchanako li xk'emal li caxlan cua mac'a' xch'amal. Naraj naxye nak t'icak chic li kach'ol ut tz'akal re ru li kayu'am. ⁹ Sa' li hu li quintz'iba eriq'uin junxil, lain xinye ere nak inc'a' tejunaji erib riq'uineb laj co'bet ut laj yumbet. ¹⁰ Nak xinye ere chi jo'can moco yoquin ta chi atinac chirixeb laj co'bet ut laj yumbet li toj maji' neque'paban. Yoquin ban chi atinac chirixeb li neque'xye rib nak aj pabaneleb ut toj neque'xra ru biomal ut neque'elk'ac ut toj neque'lok'onin jalanil dios. Cui ta xinye ere nak inc'a' texcuank sa' xyankeb li toj maji' neque'paban, inc'a' raj naru texcuank sa' ruchich'och'. ¹¹ Li c'a'ru xinye, a'an chirixeb li neque'xye rib nak aj pabaneleb ut yoqueb chixbanunquil li moco uxc ta naraj. Mare naxye rib nak aj pabanel ut a'an aj yumbet ut aj co'bet malaj aj rahol ru biomal. Mare nalok'onin jalanil dios, malaj aj hobonel. Mare aj calajenak malaj aj elk'. Inc'a' texcuank sa' xyankeb a'an chi moco texcua'ak rochbeneb. ¹² Macua' lain tinrakok atin sa' xbeneb. ¹³ Abanan lao torakok atin sa' xbeneb li kech aj pabanelil li yoqueb chi macobc sa' kayank. Jo'can nak tento terisi sa' eyank li cuink a'an li yo chi macobc.

6

Mec'ameb le rech aj pabanelil sa' rakleb atin

¹ Cui cuan junak sa' eyank cuan xch'a'ajquilal riq'uin junak xherman, ¿ma taruk ta bi' taxic chiruheb laj rakol atin re li ruchich'och? ¿Ma inc'a' raj us nak riq'uineb laj pabanel taxic? ² ¿Ma inc'a' nequenau nak sa' jun cutan lao aj pabanel torakok atin sa' xbeneb chixjunileb li cuanqueb sa' ruchich'och? Ut cui lao torakok atin sa' xbeneb li cuanqueb sa' ruchich'och', ¿c'a'ut nak inc'a' taruk takayib ru li kach'a'ajquilal sa' xyalal chi kibil kib? ³ ¿Ma inc'a' nequenau nak sa' jun cutan torakok atin sa' xbeneb li ángel? Ut cui torakok atin sa' xbeneb li ángel, ¿c'a'ut nak inc'a' taruk torakok atin sa' xben li kach'a'ajquilal arin sa' ruchich'och? ⁴ Cui cuan li plet sa' eyank, ¿c'a'ut nak nequeq'ue chi rakoc atin sa' eben li macua'eb aj pabanel? ⁵ Nequec'ut exutan nak nequeq'ue chi rakoc atin sa' eben li macua'eb aj pabanel. ¿Ma mac'a' ta bi' junak sa' eyank cuan xna'leb re tarakok atin sa' eben laex aj pabanel? ⁶ Abanan laex nequec'am le rech aj pabanelil chiru junak aj rakol atin macua' aj pabanel. ⁷ Nak nequec'am le rech aj pabanelil sa' rakleb atin nac'utun nak toj maji' nequetau xyalal. K'axal us raj nak tecuy li rahobtesic ut li elk'ac ut inc'a' texxic riq'uin aj rakol atin. ⁸ Abanan laex inc'a' nequecuy. Laex ban chic li nequex-elk'ac ut nequebanu li mausilal reheb le rech aj pabanelil. ⁹ ¿Ma inc'a' nequenau nak eb li inc'a' tiqueb xch'ol inc'a' te'rechani lix nimajcual cuanquilal li Dios? Mebalak'i erib. Eb laj co'bet ut eb laj yumbet inc'a' te'rechani lix nimajcual cuanquilal li Dios, chi moco li neque'lok'onin re li jalalin dios, chi moco eb laj muxul caxar. Ut eb li cuink li neque'macob riq'uineb li rech cuinkilal inc'a' ajcui' te'rechani lix nimajcual cuanquilal li Dios. Jo'can nak mebalak'i erib chi xc'oxlanquil nak us yoquex cui toj yoquex chixbanunquil li mausilal a'in. ¹⁰ Eb laj elk' ut eb li neque'xrahi ru li biomal inc'a' te'rechani lix nimajcual cuanquilal li Dios, chi moco laj calajenak, chi moco laj majecuanel, chi moco laj balak' te'rechani lix nimajcual cuanquilal li Dios. ¹¹ Usta cuanqueb junjunk sa' eyank jo'can que'xbanu chak, abanan anakcuan cuybil sachbil chic lix maqueb. Santobresinbileb chic ut tacobresinbileb chic lix ch'ol sa' xc'aba' li Kacua' Jesucristo ut xban li Santil Musik'ej.

Chenima ru li Dios riq'uin le yehom ebanuhom

¹² Cuan li neque'yehoc: Lain naru tinbanu chixjunil li c'a'ru tincuaj xbanunquil. Yal'nak naru xbanunquil chixjunil abanan moco chixjunil ta us xbanunquil. Lain naru ninbantu chixjunil li nacuaj, abanan inc'a' tinbanu cui nacuec'a nak junes a'an taxic inch'ol chirix. ¹³ Li Dios quixyib li tzacaemk re li kasa' ut quixyib li kasa' re li tzacaemk. Yal ajcui', aban tauculak xk'ehil nak li Dios tixsach li tzacaemk jo' ajcui' li katibel. Li Dios inc'a' coxyo'obtesi re li co'betac yumbetac. Coxyo'obtesi ban re nak toc'anjelak chiru li Kacua'. Ut li Kacua' a'an li na-iloc ke. ¹⁴ Li Dios li quicuaclesin re li Kacua' Jesucristo chi yo'yo sa' xyankeb li camenak, a'an ajcui' taucuaclesink ke chi yo'yo riq'uin lix cuanquil. ¹⁵ ¿Ma inc'a' nequenau nak lao aj pabanel jo' li rok ruk' li Kacua' Jesucristo? ¿Ma taruk ta bi' takajunaji kib riq'uineb li ixf li neque'xc'ayi rib? Ma jok'e naru xban nak lao rok ruk' li Cristo ut junajo chic riq'uin nak cuanco. ¹⁶ ¿Ma inc'a' nequenau nak li ani namacob riq'uin junak ixf aj mac junajeb chi tz'ejcualej neque'cana? Tz'jbanbil sa' li Santil Hu nak junajakeb chi tz'ejcualej chi xcabichaleb. ¹⁷ Ut ani naxjunaji rib riq'uin li Kacua', a'an junaj chic riq'uin sa' musik'ej. ¹⁸ Mebanu chic li mausilal. Chixjunil li c'a'ak re ru chi maquil k'axal yibru. Abanan li co'betac yumbetac k'axal cui'chic yibru xban nak li ani namacob chi toj maji' sumsu, li jun a'an naxmux rib

xjunes rib. ¹⁹ ¿Ma inc'a' nequenau nak laex rochochex li Santil Musik'ej xban nak li Santil Musik'ej li quixq'ue ere li Dios cuan eriq'uin? Jo'can nak moco laex ta nequetakla erib ejunes. Laex rehex chic li Dios. ²⁰ Lok'bilex chic chi terto etz'ak. Jo'can nak tīcak le yu'am ut chelok'oni li Dios xban nak rehex chic.

7

Xch'olobanquil xyalal chirix li sumlac ut li cuanc chok' aj pabanel

¹ Xetakla chak xpatz'bal cue chirix li sumlac ut anakcuan tinsume le hu. Us raj chok' re li cuink nak mac'a'ak rixakil. ² Abanan us cui tasumlak re nak inc'a' tamācobk. Te'sumlaq re nak li cuink te'cuank rixakil chi xjunkaleb ut li iixk te'cuank xb̄elom chi xjunkaleb. ³ Tento nak li cuink tacuank riq'uin li rixakil ut li iixk tacuank riq'uin lix belom jo' neque'raj chi ribileb rib. ⁴ Li ixakilbej moco a'an ta yal re sa' xben xjunes rib; aban chic lix belom yal re sa' xben. Jo'can ajcui' li belomej. Moco a'an ta yal re sa' xben xjunes rib; a' ban chic li rixakil yal re sa' xben. ⁵ Cui li belomej naraj cuanc riq'uin li rixakil, li ixakilbej inc'a' naru tixye inc'a'. Ut cui li ixakilbej naraj cuanc riq'uin lix belom, li belomej inc'a' naru tixye inc'a'. Nuru te'xc'ub chi ribileb rib nak te'x-oxlok'i rib chi ribileb rib jarubak cutan re nak te'xq'ue xch'oleb chi tijoc. Abanan te'cuank cui'chic mokon chi ribileb rib re nak inc'a' te'alek xban laj xban xban nak inc'a' te'xcuy cuanc xjuneseb. ⁶ Lain yal ena'leb yoquin chixq'uebal. Moco yoquin ta chixyebal ere nak tento tēbanu. Laex yal ere chanru teraj tēbanu. ⁷ Lain nacuaj raj nak mac'a'ak erixakil jo' lain mac'a' cuixakil. Abanan moco juntak'eto ta chikajunilo. Li junjunk cuan xmatan q'uebil re xban li Dios. Jo'can nak cuan li neque'sumla xban nak jo'can naraj li Dios ut cuan li inc'a' neque'sumla ut saheb sa' xch'ol xjuneseb xban nak jo'can naraj li Dios. ⁸ Ut ninye reheb li inc'a' sumsuqueb ut reheb li xmālca'an nak us raj chok' reheb nak te'canak xjuneseb jo' lain. ⁹ Ut cui inc'a' naru neque'xcuy rib, sumlakeb. K'axāl us nak tasumlak junak chiru nak yok chixrabal ru junak re nak tacuank riq'uin chi inc'a' sumsuqueb. ¹⁰ Anakcuan tinye reheb li ac sumsuqueb nak li ixakilbej inc'a' naru tixjach rib riq'uin lix belom. Li chak'rab a'in macua' lain xinyehoc re injunes. Q'uebil ban xban li Kacua'. ¹¹ Ut cui li ixakilbej tixjach rib riq'uin lix belom, li iixk a'an tacuank xjunes ut inc'a' chic tixsic' jalán cuink. Abanan us raj cui tixc'am cui'chic rib sa' usilal riq'uin lix belom. Ut jo'can ajcui' li belomej, inc'a' ajcui' naru tixjach rib riq'uin li rixakil. ¹² Lain nacuaj xq'uebal ca'ch'inak chic le na'leb. A'in macua' xyehom li Kacua', aban lain ninnau nak us xbanunquil. Cui junak cuink naxpab li Dios ut li rixakil toj maji' napaban ut naxc'ul xch'ol li iixk cuanc riq'uin, li cuink a'an inc'a' naru tixcanab chi moco tixjach rib riq'uin li rixakil. ¹³ Ut cui junak iixk naxpab li Dios ut lix belom toj maji' napaban, ut naxc'ul xch'ol li cuink cuanc riq'uin, li iixk a'an inc'a' naru tixcanab chi moco tixjach rib riq'uin lix belom. ¹⁴ Us cui inc'a' te'xjach rib. Li belomej li toj maji' napaban, a'an lok' chiru li Dios sa' xc'aba' li rixakil. Ut li ixakilbej li toj maji' napaban, a'an lok' chiru li Dios sa' xc'aba' lix belom li napaban. Cui ta inc'a' jo'can, lix coc'al eb a'an chanchaneb raj lix coc'aleb li macua'eb ralal xc'ajol li Dios. Abanan cui inc'a' te'xjach rib, lix coc'aleb lok' chiru li Dios sa' xc'aba' li jun li napaban. ¹⁵ Cui li belomej macua' aj pabanel ut inc'a' chic naraj cuanc riq'uin li rixakil xban nak aj pabanel chic li iixk, naru te'xjach rib. Ut cui li ixakilbej macua' aj pabanel ut inc'a' chic naraj cuanc riq'uin lix belom xban nak li cuink aj pabanel chic, naru ajcui' te'xjach rib. Chi jo'can tācanāk laj pābanel chi mac'a' chic tāch'i ch'i'ink re xban nak li Dios naraj nak tocuank sa' xyalal. ¹⁶ At ixakilbej, laat inc'a' nacanau ma tapabank

la belom ąban. Jo'can ajcui' laat, belomej, inc'a' nacanau ma tapabank la cuixakil aban. ¹⁷ Li junjunk chicuank jo' naraj li Dios. Us cui cuan ącuixakil nak xapab li Cristo. Cui mac'a' ącuixakil, us ajcui'. Tatcanak jo' nak cuancat nak xatpabán. A'an a'in li nequebinchak'rabi cui' chixjunileb laj pabanel yalak bar. ¹⁸ Cui junak ac xc'ul li circuncisión nak tapabank, li jun a'an inc'a' tixc'oxla xjalbal li retalil li circuncisión. Ut cui junak tapabank ut toj maji' naxc'ul li circuncisión, li jun a'an inc'a' ajcui' tento nak tixc'ul li circuncisión. ¹⁹ Li ani naxc'ul li circuncisión juntak'et riq'unin li ani inc'a' naxc'ul xban nak li circuncisión mac'a' xcuauquil. Li k'axal us xbanunquil, a'an xpabanquil lix chak'rab li Dios. ²⁰ Jo' nak cuan junak nak quisiq'ue' ru xban li Dios, jo'can ajcui' taçanak. ²¹ Cui cuancat rubel xcuauquil la patrón nak li Dios quixsic' ącuu, matc'oxlac chirix a'an. Abanan cui naxq'ue rib nak tat-elk rubel xcuauquil la patrón, naru nacat-el sa' xyalal. ²² Li ani cuan rubel xcuauquil lix patrón nak quisiq'ue' ru xban li Kacua', li jun a'an libre chic cuan chiru li Dios. Ut li jun li inc'a' cuan rubel xcuauquil lix patrón nak quisiq'ue' ru, lok'bil chic xban li Cristo chi c'anjelac chiru. ²³ Jo'can ajcui' laex. Lok'bilex chic xban li Cristo chi terto etz'ak. Jo'can nak meq'ue chic erib rubel xcuauquil li inc'a' useb xna'leb. Meq'ue erib chi taklacz re xbanunquil li inc'a' naraj li Dios. ²⁴ Ex herman, jo' nak cuanquex nak quisiq'ue' eru xban li Dios, jo'can ajcui' texcanak. ²⁵ Lain tinye ere li ninc'oxla chirixeb li saj ixx ut li saj cuink. Usta macua' ratin li Kacua', us cui tex-abink chicuun xban nak riq'unin xnalim ruxtan li Kacua' naxq'ue inna'leb chixyebal ere lix yalal. ²⁶ Xban li rahobtesic cuan sa' kabən, ninc'oxla nak us cui inc'a' te'sumlaq li toj maji' sumsuqueb. ²⁷ Abanan cui sumsuqueb, mecanab le rixakil. Ut cui inc'a' sumsuqueb, us ajcui' cui inc'a' tesic' erixakil. ²⁸ Abanan cui texsumlaq moco mac ta a'an. Ut jo'caneb ajcui' li saj ixx. Moco mac ta cui te'sumlaq. Abanan k'axal cui'chic nabal li raylal sa' xbeneb li sumsuqueb. Lain inc'a' raj nacuaj nak tec'ul li raylal. ²⁹ Ex inherman, li bar cuan nacuaj xyebal, a'an a'in: Yoqueb chi numec' li cutan sa' junpat. Jo'can nak laex li cuan erixakil macua' ca'aj cui' le rixakil tec'oxla. Cheq'uehak ban ech'ol chi c'anjelac chiru li Kacua'. ³⁰ Usta sa sa' kach'ol, usta ra sa' kach'ol, usta cuan kabiomal usta mac'a', chikaq'uehak ban kach'ol chi c'anjelac chiru li Kacua' Dios. ³¹ Meq'ue ech'ol chirix li c'a'ru cuan ere sa' li ruchich'och' a'in, xban nak chixjunil li c'a'ru cuan sa' ruchich'och' taosok'. ³² Nacuaj raj nak mac'a' c'a'ru taxic cui' ech'ol. Li cuink li mac'a' rixakil naxq'ue xch'ol chi c'anjelac chiru li Kacua' Dios ut chixbanunquil li bar cuan naraj li Kacua' Dios. ³³ Ut li cuink cuan rixakil tento nak tixq'ue xch'ol chi c'anjelac re nak tacuank c'a'ru reheb ut tixq'ue xch'ol chixbanunquil li naraj li rixakil re nak sahak sa' xch'ol. Jo'can nak cuib ru lix c'a'ux xban nak naxc'oxla li Kacua' Dios ut naxc'oxla li rixakil. ³⁴ Jo'can ajcui' li ixx li cuan xbelom. Cuib ru lix c'a'ux xban nak naxc'oxla li Kacua' Dios ut tento ajcui' nak tixc'oxla lix c'anjel sa' rochoch ut naxbanu c'a'ru naraj lix belom. Ut li ixx li mac'a' xbelom naxq'ue xch'ol chi c'anjelac chiru li Kacua' Dios ut naxbanu jo' naraj li Dios. ³⁵ Moco re ta nak inc'a' texsumlaq nak ninye ere chi jo'ca'in. Re ban etenk'anquil. Lain nacuaj nak tebanu li us. Nacuaj nak tek'axtesi erib chi c'anjelac chiru li Kacua' chi anchal ech'ol. ³⁶ Cui junak yucua'bej naxc'oxla nak us tasumlaq lix rabin xban nak ac cuan xchihab, us nak tixbanu li naxc'oxla xbanunquil. Tixsumub lix rabin. Moco mac ta cui tasumlaq. ³⁷ Li yucua'bej ma anि naminoc ru. Naru tixbanu li naxc'oxla nak us xbanunquil. Ut cui na-ala sa' xch'ol nak inc'a' tixsumub lix rabin, chabil ajcui' naxbanu nak inc'a' tixsumub. ³⁸ Jo'can nak li ani naxsumub lix rabin, chabil naxbanu. Ut li inc'a'

naxsumub lix rabin, k'axal cui'chic us naxb^{anu}. ³⁹ Li iixk li sumsu tento nak tacuank riq'uin lix belom a' yal jo' najtil yo'yok lix belom. Ut cui nacam lix belom a'an chic yal re ani aj iq'uin t^asumlak. Abanan cui naraj suml^ac, tento nak riq'uin junak aj p^abanel t^asumlak. ⁴⁰ Abanan ninc'oxla lain nak k'axal us raj nak li xma^{lc}a'an t^acanak xjunes ut inc'a' chic t^asumlak. Li na'leb a'in li xinye ere, a'an q'uebil cue xban li Santil Musik'ej.

8

Xq'uebal xna'lebeb chirix li tzacaemk mayejanbil chiruheb li yibanol Dios

¹ Cuan cuib oxib cuatⁱⁿ tinye ere chirix li tzacaemk mayejanbil chiruheb li yibanol dios. Nakanau nak chikajunilo ac xkatzol kib chirix a'in. Abanan toj cuan sa' eyank neque'xc'oxla nak neque'xnau chixjunil ut riq'uin a'an neque'xk'etk'eti rib. Aban li ani narahoc, a'an naxtenk'a li rech aj p^abanel chi q'uic sa' lix pabal. ² Li ani narec'a nak cuan xna'leb, li jun a'an toj maji' naxtau li xyalal chi tz'akal. ³ Abanan li ani narahoc re li Dios, li Dios naxnau nak a'an li ralal xc'ajol. ⁴ Anakcuan tinatinak chirix li tzacaemk mayejanbil chiruheb li yibanol dios. Lao nakanau nak li yibanol dios mac'a' neque'oc cui' xban nak moco dioseb ta. Nakanau nak jun ajcui' li Dios cuan. ⁵ Cuan neque'yehoc re nak cuan nabal li dios jo' sa' choxa jo' sa' ruchich'och'. Dios ut Kacua' neque'xye reheb. Ut yal nak cuan nabaleb li yibanol dios. ⁶ Abanan lao aj p^abanel nakanau nak jun ajcui' li Dios cuan. Ut li Dios Acuabej a'an li quiyiban re chixjunil li c'a'ru cuan. Coxyo'obtesi lao re nak takalok'on'i a'an. Ut jun ajcui' li Kacua' cuan, a' li Jesucristo. Ut sa' xc'aba' a'an cuan chixjunil ut sa' xc'aba' a'an nak cuan li colba-ib. ⁷ Abanan moco chixjunileb ta neque'xtau ru li xyalal a'in chirix li mayejanbil tzacaemk. C'aynakeb chalen chak najter chixpabanquil li yibanol dios, ut anakcuan nak neque'xtzaca li tzacaemk mayejanbil chiru li yibanol dios neque'xc'oxla nak yoqueb chixq'uebal xllok'al li yibanol dios. Ut xban nak toj k'uneb xch'ol sa' lix pabal, neque'xc'oxla nak neque'xmux ru lix pabaleb. ⁸ Moco xban ta li katzacaemk nak tocuank chi sum atin riq'uin li Dios. Li tzacaemk inc'a' naxnimobresi xcuanguil li kapabal chi moco naxpo' li kapabal. ⁹ Naru t^atzcata li mayejanbil tzacaemk. Abanan cheq'uehak retal nak inc'a' teluctasi xch'ol li toj k'uneb xch'ol sa' lix pabaleb xban nak nequetzaca a'an. Cheq'uehak retal nak inc'a' tqoc cui'chic chi macobc eban laex. ¹⁰ Laex nequenau li xyalal a'in. Nequenau nak moco mac ta xtzacanquil li tzacaemk mayejanbil. Abanan cui junak aj p^abanel toj k'un xch'ol sa' xpabal taⁱlok ere nak c'oj'coquex sa' mex chi cua'ac cuan cui' li yibanol dios, mare a'an ti^xtzaca li mayejanbil chiruheb li yibanol dios ut tixc'oxla nak xmux ru lix pabal. ¹¹ Laex nequenau nak naru t^atzcata li mayejanbil tzacaemk. Abanan, mare yal emac laex nak taoc cui'chic chi macobc li toj maji' nacacu sa' xpabal. Laex nequenau nak li Cristo quicam ajcui' sa' xc'aba' eb a'an. ¹² Cui eban laex nak yoqueb chi luctac xch'oleb le rech aj p^abanelil li toj k'uneb xch'ol sa' lix pabal, yoqueb chi macobc chiruheb a'an. Ut yoqueb ajcui' chi macobc chiru li Cristo. ¹³ Jo'can nak cui li nintzaca naxq'ue chi macobc li cuech aj p^abanelil, ma jok'e chic tintiu li mayejanbil tib xban nak inc'a' nacuaj nak te'macobk inban lain.

9

Tento nak tixc'ul xtojbal laj c'anjel chiru li Dios

¹ ¿Ma inc'a' ta bi' naru tinbanu li c'a'ru nacuaj lain? ¿Ma inc'a' ta bi' lain apóstol? Lain quicuil ru li Kacua' Jesucristo. Ut sa' inc'aba' lain nak

xexpāban xban nak laín xinyehoc ere resil li colba-ib. ² Māre cuan li inc'a' neque'q'uehoc incuanquil nak laín apóstol. Abanan relic chi yal nak laín apóstol xban nak laín xinyehoc ere resil li colba-ib. Jo'can nak xepab li Cristo. ³ Riq'un li atin a'in nequebinsume li neque'yehoc re nak macua'in apóstol. ⁴ ¿Ma inc'a' ta bi' raj tento ajcui' nak tinetenk'a laín riq'un lin tzacaemk? ⁵ Eb li ritz'in li Kacua' Jesucristo cuanqueb rixakil ut neque'xc'am chirixeb bar neque'xic. Ut jo'can ajcui' naxbanu li apóstol Pedro. ¿Ma inc'a' ta bi' raj taruk tinsumlák riq'un junak ixs aj pabanel laín ut tinc'am chicuix bar tinxic jo' neque'xbanu eb li apóstol jun ch'ol chic? ⁶ Malaj ut nequec'oxla nak ca'aj cui' laín ut laj Bernabé cau totrabajik re nak takasic' katzacaemk. ⁷ Junak soldado, ¿ma inc'a' ta bi' tixc'ul lix tojbal? Ut junak aj acuinel, ¿ma inc'a' ta bi' tixtzaca li ru li racuimk? Ut junak aj q'uirisinel cuacax, ¿ma inc'a' ta bi' taruc' re lix leche lix cuacax? ⁸ Li c'a'ru yoquin chixyebal macua' yal xc'a'ux cuink. A'an tz'ibanol sa' li chak'rab li quiq'uehe' re laj Moisés. ⁹ Tz'ibanol sa' lix chak'rab laj Moisés chi jo'ca'in: Mabac' xtz'umal re li boyx nak yo chi c'anjelac re risinquil rix li trigo. Li Dios macua' ca'aj cui' chirix li boyx naatinac. ¹⁰ ¿Ma macua' ta bi' chikix lao aj c'anjel chiru li Dios yo chi atinac? ¿Ma inc'a' ta bi' taruk takac'ul katojbal lao aj c'anjel chiru li Dios? Li ani na-au naroybeni ru li racuimk ut jo'can ajcui' laj k'olone laroybeni ajcui' nak tatz'ak ru li acuimk. ¹¹ Lao xoyehoc resil li colba-ib ere. ¿Ma inc'a' ta bi' naru nocoetenk'a' laex riq'un li c'a'ru takaj lao re xnumsinquil li cutan junjunk? ¹² Cui laex nequetenk'a li jun ch'ol chic li kech aj c'anjelil, ¿ma toja' ta chic lao inc'a' toetenk'a? Lao inc'a' xkatz'ama ere nak toetenk'a. Xkacuy ban xnumsinquileb li cutan yal chi jo'can xban nak lao inc'a' xkaj nak tach'inank ech'ol chirabinquil li resil li Cristo. ¹³ ¿Ma inc'a' ta bi' nequenau nak eb laj judío li neque'c'anjelac sa' rochoch li Dios, tento ajcui' nak neque'tz'ak li c'a'ru namayejac sa' rochoch li Dios? A'an naraj naxye nak eb li neque'c'anjelac sa' li artal neque'tz'ak ajcui' lix tibel li mayejanbil xul. ¹⁴ Jo' nak neque'tenk'ac eb laj judío li neque'c'anjelac sa' rochoch li Dios, jo'can ajcui' nak te'xc'ul lix tenk'anquileb li yoqueb chi c'anjelac chiru li Dios anakcuan xban nak jo'can quixye li Kacua'. ¹⁵ Abanan laín inc'a' xintz'ama ere nak tinetenk'a, chi moco yoquin ta chixyebal a'in re nak tinetenk'a. Inc'a' nacuaj tintojek' xban nak nasaho' sa' inch'ol nak ninye resil li colba-ib chi mac'a' intojbal. Us raj nak tincamk xban tz'ocac chiru nak tinetoj ut tinsach li sahil ch'olejil li ninc'ul xban xyebal resil li colba-ib chi mac'a' intojbal. ¹⁶ Laín inc'a' ninnimobresi cuib xban nak ninch'olob xyalal li colba-ib. Taklanbilin chi c'anjelac xban li Dios. K'axal ra raj chok' cue cui ta inc'a' ninjultica resil. ¹⁷ Cui ta yoquin chixbanunquil yal xban nak nacuaj laín, tinyo'oni raj intojbal. Abanan yoquin chixbanunquil lin c'anjel xban nak tenebanbil sa' inben xban li Dios xyebal resil li colba-ib. ¹⁸ ¿C'a'ru ink'ajcamunquil yoquin chixc'ulbal? Ca'aj cui' li sahil ch'olejil naxq'ue cue li Dios xban nak ninjultica resil li colba-ib chi mac'a' intojbal. Laín taruk raj tinc'ul intojbal eriq'un abanan inc'a' nacuaj.

Laj Pablo quixnau c'anjelac sa' xyankeb li jalan jalank xna'lebeb

¹⁹ Laín moco taklanbilin ta xban cuink, abanan ninq'ue cubi chi c'anjelac chiruhed chixjunileb re nak te'xpab li Cristo inban laín. ²⁰ Nak cuanquin sa' xyankeb laj judío laín ninbanu jo' neque'xbanu laj judío re nak te'xpab li Cristo. Cuan li toj neque'xq'ue xcuانquil lix chak'rab laj Moisés. Nak cuanquin sa' xyankeb a'an, ninbanu li naxye lix chak'rab laj Moisés re nak te'xpab li Cristo inban laín. ²¹ Eb li macua'eb aj judío moco cuanqueb ta

rubel xcuauquil lix chak'rab laj Moisés. Nak cuanquin sa' xyankeb a'an, ninbanu jo' neque'xbanu eb a'an re nak te'xpab li Cristo inban laín. Abanan a'an inc'a' naraj naxye nak inc'a' ninbanu li naxye li Dios. Inc'a' ninbanu li inc'a' us. Laín ninbanu li naxye li Cristo. ²² Nak cuanquin sa' xyankeb li toj k'uneb xch'ol sa' lix pabal, nincubsi cuib chiruheb re nak te'cacuuk xch'ol sa' xpabaleb inban laín. Naraj naxye nak ninjuntak'eta cuib riq'uín chixjunileb re nak naru tinch'olob xyalal chiruheb. Ninbanu chi jo'can re nak te'colek. ²³ Chixjunil a'in nalajinbanu re nak naru tinch'olob xyalal li colba-ib chiruheb li cuas cuítz'in ut re nak tintz'akonk ajcui' laín riq'uín li naxyechi'i li Dios.

Laj Pablo quixq'ue xch'ol chi c'anjelac chiru li Dios

²⁴ Nequexinjuntak'eta riq'uineb li neque'xyal xk'e chi alinac. ¿Ma inc'a' ta bi' nequenau nak eb li neque'alinac chixjunileb neque'xyal xk'e chi alinac? Abanan jun ajcui' naxc'ul xmatan. Jo'can ut laex cheq'uehak ech'ol chi pabanc re nak tec'ul ematan riq'uín li Dios. ²⁵ Li ani naxyal xk'e chi alinac naxcuy li raylal re nak tacacuuk xmetz'eu. Neque'xbanu a'an re xc'ulbal junak mātan na-oso'. Jo'can ajcui' lao aj pabanel nakacuy li raylal ut nakac'ul ajcui' kamatan. Abanan li mātan nakac'ul lao inc'a' na-oso'. A'an cuan chi junelic. ²⁶ Li ani naalinac naxyal xk'e re nak tixc'ul lix mātan. Jo'can ajcui' laín. Ning'ue inch'ol chi c'anjelac chiru li Dios re nak tinc'ul inmatan. Moco yoquin ta chixyalbal inmetz'eu jo' li nasac'oc sa' ik' chi māc'a' rajbal. Ning'ue ban inch'ol chi c'anjelac sa' xyalal chiru li Dios. ²⁷ Nintacuasi cuib ut ninq'ue inch'ol chi c'anjelac. Inc'a' ninbanu li nacuaj laín. Ninbanu ban li naraj li Dios. Inc'a' nacuaj nak laín chic inc'a' tinc'ul lin mātan mokon nak acak xinye resil li colba-ib reheb li cuas cuítz'in.

10

Eb laj Israel que'xtz'ek xmataneb

¹ Ex inherman, lain nacuaj nak texc'oxlak ca'ch'inak chirix li c'a'ru que'xc'ul li kaxe'tonil yucua' nak que'el sa' li tenamit Egipto. Li Dios quixtakla li chok chi c'amoc be chiruheb ut chixjunileb que'nume' jun pac'al li Caki Palau nak quixjach rib re te'numek'. ² Chanchan nak que'cube xha'eb sa' li chok ut sa' li Caki Palau ut riq'uín a'an que'xc'ul xch'oleb nak laj Moisés tac'amok be chiruheb. ³ Ut chixjunileb que'xcua' li maná li choxahil cua li quixtakla chak li Dios. ⁴ Chixjunileb que'ruc' li ha' li qui'uehe' reheb xban li Dios. Li ha' a'an qui-el chak sa' li sakonac. Ut li sakonac a'an, a'an retalil li Cristo li qui-ochbenin reheb nak yoqueb chi numec' sa' li chaki ch'och'. ⁵ Abanan moco chixjunileb ta que'xbanu jo' naraj li Dios. Lix q'ualeb que'xk'et ratiñ li Dios ut xban nak inc'a' que'xbanu jo' naraj li Dios, jo'can nak que'cam sa' li chaki ch'och' ut inc'a' que'oc sa' li tenamit Canaán. ⁶ Chixjunil a'an nac'utuc chiku nak inc'a' takarahi ru li inc'a' us jo' que'xbanu eb a'an. ⁷ A'an naxc'ut chiku nak inc'a' takalok'oni li yibanbil dios jo' que'xbanu eb a'an. Jo'ca'in tz'ibanol sa' li Santil Hu chirixeb: Eb li tenamit que'cua'ac ut que'uc'ac ut que'xajoc re xlok'oninquil li cuacax oro. (Ex. 32:6) ⁸ Ut naxc'ut ajcui' chiku nak inc'a' us li co'betal yumbetac jo' que'xbanu eb a'an ut chiru jun cutan quilaje'cam oxib xca'c'al mil (23,000) chi tenamit xban li mausilal que'xbanu. ⁹ Mikaq'ue xjosk'il li Kacua' Dios jo' que'xbanu eb a'an nak que'xbanu lí mausilal ut que'ti'e' xbaneb li c'anti' li quixtakla li Kacua' Dios ut que'cam. ¹⁰ Chi moco tocuech'ok, jo' que'xbanu eb a'an. Ut xbaneb lix mausilal que'camsic xban li ángel li quixtakla chak li Dios. ¹¹ Li c'a'ru que'xc'ul li kaxe'tonil yucua' a'an tz'ibanol retalil sa' li Santil Hu re nak lao

takaq'ue retal ut inc'a' takabānu jo' que'xbānu eb a'an xban nak cuulac re li roso'jic li cutan. ¹² Jo'can nak li ani narec'a nak cau xch'ol sa' lix pābal chixq'uehak retal lix yu'am re nak inc'a' tāoc chi macobc. ¹³ Moco jalan ta chic li alec nequec'ul laex chiru li neque'xc'ul chixjunileb. Abanan li Dios tic xch'ol. A'an inc'a' nocoxcanab chi alec cui inc'a' takacuy xnumsinquil. A'an ban natenk'an ke chixcuybal xnumsinquil. ¹⁴ Jo'can ut ex inherman, raroquex inban, melok'onchi lajanil dios. ¹⁵ Lain ninch'olob xyālal cheru xban nak cuan ena'leb. Ut laex naru teye ma us li ninye malaj inc'a'. ¹⁶ Nak nakabānu li lok'oninc re xjulticanquil lix camic li Cristo, nocotioxin chiru li Dios. Nak nakuc' li xya'al li uva, ¿ma inc'a' ta bi' junajo riq'un li Cristo xban nak quihoye' xquiq'uel chiru li cruz sa' kac'aba'? Ut nak nakatzaca li caxlan cua li najachiman, ¿ma inc'a' ta bi' junajo riq'un li Cristo xban nak quicam chiru li cruz sa' kac'aba'? ¹⁷ Usta nabalo, jun ajcui' li caxlan cua najachiman ut nakacuotzi. A'an retalil nak lāo junajo chic riq'un li Cristo. ¹⁸ Cheq'ue retal laj Israel. Eb a'an que'xtzaca li tib li que'xmajeja chiru li Dios. A'an retalil nak cuanqueb chi sum atin riq'un li Dios. ¹⁹ ¿C'a'ru xyālal li yoquin chixyebal? ¿Ma yo'yo ta bi' li yibambil dios? Inc'a'. Ut, ¿ma cuan ta bi' xcuanquil li tib li namayejac chiruhéb? Mac'a' xban nak mac'a' xcuanquil li yibambil dios. ²⁰ Lain inc'a' ninye nak cuan xcuanquil li yibambil dios, chi moco ninye nak li mayejanbil tib cuan xcuanquil. Li yoquin chixyebal, a'an a'in: eb li inc'a' neque'xpab li tz'akal Dios neque'mayejac, aban macua' chiru li Dios neque'mayejac. Chiru ban li māus aj musik'ej. Ut lain inc'a' nacuaj nak yokex chi oquēnc sa' lix na'lebeb li māus aj musik'ej. ²¹ Inc'a' naru tēruc' xsa' li sec' re xjulticanquil xcamic li Kacua' Jesús, ut tēruc' ajcui' xsa' li sec' re xq'uebal xlok'al li māus aj musik'ej. Chi moco naru tecuá' li caxlan cua re xjulticanquil xcamic li Kacua' Jesucristo ut tecuá' ajcui' li cua mayejanbil chiruhéb li māus aj musik'ej. ²² Inc'a' us cui takaq'ue xjosk'il li Kacua' riq'un xlok'oninquel li yibambil dios. ¿Ma lāo ta bi' nim kacuanquil chiru li Kacua'? Ma jok'e xban nak lāo mac'a' kacuanquil.

Chixjunil li c'a'ak re ru takabānu rehak xlok'oninquel li Dios

²³ Cuan li neque'yehoc re nak naru nakabānu chixjunil li nakaj. Yal nak naru nakabānu, abanan moco chixjunil ta us xbanunquil. Yal nak naru xbanunquil chixjunil, abanan moco chixjunil ta li c'a'ru nakabānu nocoxtenk'a chi q'uic sa' li kapābal. ²⁴ Mēsic' li us ca'aj cui' chok' ere laex. Chесic' aj ban cui' li us chok' reheb le ras eritz'in. ²⁵ Naru tētzaca chixjunil li tib nac'ayiman sa' li c'ayibal, ut mēpatz' ma mayejanbil chiru li yibambil dios re nak mac'a'ak ec'a'ux nak tētzaca. ²⁶ Naru tētzaca xban nak li Kacua' Dios a'an laj échal re li ruchich'och' ut a'an ajcui' laj échal re chixjunil li cuan sa' ruchich'och'. ²⁷ Cui junak macua' aj papabel tatxbok chi cua'ac riq'un ut cui naxc'ul ach'ol xic riq'un, li c'a'ru tixq'ue chatzaca, chac'ul. Abanan inc'a' tāpatz' ma mayejanbil li tzacaemk a'an re nak mac'a'ak ac'a'ux nak tētzaca. ²⁸ A'ut cui junak naxye acue nak li tzacaemk a'an mayejanbil chiru li yibambil dios, inc'a' tātzaca a'an re nak inc'a' tāch'inak xch'ol li xyehoc acue nak mayejanbil tzacaemk ut re ajcui' nak inc'a' tāoc xc'a'ux. ²⁹ Inc'a' yoquin chixyebal a'in chirix la c'a'ux laat. Yoquin chi qatinac re nak inc'a' tāch'inak xch'ol li jun chic q'aban laat.

Mare junak ere tāchak'ok ut tixye cue, ¿c'a'ut nak inc'a' tinbānu li naru tinbānu yal xban nak jalan chic naxye nak inc'a' us xbanunquil? ³⁰ Ut cui lain nintoxin chirix li c'a'ru nintzaca, ¿c'a'ut nak tacuech'ik rix li c'a'ru tintzaca? cha'ak. ³¹ Lain tīnye ere li xyālal. Chixjunil li c'a'ru tētzaca ut chixjunil li c'a'ru tēbanu, chebanuhak re xq'uebal xlok'al li Kacua' Dios. ³² Mēbanu li

c'a'ak re ru napo'oc xch'oleb le ras eritz'in usta aj judío, usta mācua'eb aj judío. Chi moco tebanu li c'a'ru tapo'ok xch'ol le rech aj pābanelil. ³³ Jo'can nak lain ninyal ink'e chixbanunquil li us re xtenk'anquil chixjunileb. Lain inc'a' yoquin chixsic'bal li us chok' cue lain injunes. Yoquin ban chixsic'bal li us chok' reheb chixjunileb re nak taruk te'colek'.

11

¹ Jo'can ut nak laex chetzolak erib cuiq'uin xban nak lain xintzol cuib riq'uin li Cristo. ² Ex inherman, c'ajo' nasaho' sa' inch'ol nak ninjultico' ere ut yoquex chixbanunquil li tijleb xexintzol cui'. ³ Abanan cuan chic c'a' re ru nacuaj xyebal ere. A'an a'in: li belomej, a'an najolomin re li rixakil ut li Cristo, a'an najolomin re li cuink ut li Dios, a'an najolomin re li Cristo. ⁴ Cui junak cuink inc'a' narisí lix punit nak na-oc chi tijoc ut nak na-oc chixyebal ratin li Dios, li jun a'an inc'a' naxq'ue xlok'al li Cristo. ⁵ Ut cui junak ixx inc'a' naxtz'ap lix jolom nak tatiyok ut nak tixye ratin li Dios, li ixx a'an naxc'ut xxutn'lix belom. Chanchaneb li ixx li besibileb chixjunil li rismal xjolom. ⁶ Jo'can nak cui li ixx inc'a' naxtz'ap xjolom, chixbesak chixjunil li rismal xjolom. Ut cui inc'a' naraj xbesbal li rismal xjolom xban nak naxc'oxla nak xutanal chok' re, k'axal us chok' re li ixx a'an cui tixtz'ap lix jolom. ⁷ Inc'a' us nak tixtz'ap xjolom li cuink xban nak li cuink yibanbil jo' li rilobal li Dios ut naxc'ut xlok'al li Dios. A'ut li ixx naxc'ut xlok'al lix belom. ⁸ Li cuink inc'a' quiyo'obtesic chak xban li Dios riq'uin li ixx; aban li ixx quiyo'obtesic chak riq'uin li cuink. ⁹ Ut li cuink inc'a' quiyo'obtesic sa' xc'aba' li ixx. Li ixx ban quiyo'obtesic sa' xc'aba' li cuink. ¹⁰ Jo'can nak li ixx tixtz'ap lix jolom ut a'an retalil chiruheb li ángel nak li cuink cuan xcuquil sa' xben. ¹¹ Chiru li Kacua' ma jun cuan xcuquil chi moco li cuink chi moco li ixx xban nak juntak'eteb chiru li Dios. ¹² Ut jo' nak li ixx quiyo'obtesic riq'uin li cuink, jo'can ajcui' li cuink nayo'la riq'uin li ixx. Li cuink jo' ajcui' li ixx yo'obtesinbileb xban li Dios jo' ajcui' chixjunil li c'a'ak re ru cuan. ¹³ ¿C'a'ru nequec'oxla laex? ¿Ma us nak li ixx tatiyok chiru li Dios cui inc'a' tixtz'ap lix jolom? ¹⁴ Ac nequenau nak ac re li cuink nak inc'a' tixcanab chi chamoc' li rismal xjolom. Xutanal chok' re li cuink cui naxcanab chi chamoc' li rismal xjolom. ¹⁵ Abanan li ixx a'an xlok'al nak cham li rismal xjolom xban nak q'uebil re xban li Dios re xtz'apbal lix jolom. ¹⁶ Ut cui cuan junak ere naraj cuech'inc chirix a'in, lain tinye re a'an nak lao li apóstol jo' ajcui' eb laj pābanel c'aynako chixbanunquil chi jo'can yalak bar.

Li Lok'oninc re Xjulticanquil lix Camic li Jesucristo

¹⁷ Nacuaj ajcui' xyebal ere nak cuan li inc'a' us yoquex chixbanunquil. Nak nequech'utub erib chixlok'oninquiil li Dios mācua'li us nequebanu. A' chic li inc'a' us nequebanu. ¹⁸ Li xben tinye ere, a'an a'in: xcuabi resil nak inc'a' junaj le ch'ol ut junes xcuech'inquiil erib nequebanu nak nequech'utub erib chi lok'oninc re xjulticanquil lix camic li Jesucristo. Ut lain ninc'oxla nak māre yal ajcui' li c'a'ru xcuabi. ¹⁹ Nak nacuan li cuech'inc ib sa' eyank, riq'uin a'an nac'utun ani li tz'akal aj pābanel ut ani inc'a'. ²⁰ Laex nequech'utub erib chi tzacanc ut nequeye nak yoquex chixbanunquil li lok'oninc. Abanan mācua' chic xjulticanquil lix camic li Kacua' nequebanu. A' ban chic le re nequebanu. ²¹ Cuan li neque'xséba rib chixc'ulbal lix cua ut inc'a' neque'xc'oxla li jun ch'ol chic. Xban a'an cuan li nabal neque'tz'ak ut cuan li neque'cala ut cuan li neque'cana chi te'tz'ocák xban nak inc'a' neque'tz'ak. ²² ¿Ma māc'a' ta bi' erochoch bar textzacánk cui' nak nequebanu chi jo'can? Yoquex chixtz'ektañanquileb le rech aj pābanelil ut yoquex

chixc'utbal xxutqeb li mact'a' cuanqueb re. ¿C'a'ru tnye ere? ¿Ma tnye ere nak us yoquex chixbanunquil? Ma jok'e tnye nak us yoquex. ²³ Ac xinc'ut cheru li xyalal li cua'ac re xjulticanquil lix camic li Jesucristo. A'an ajcui' li quixc'ut chicuu li Kacua'. Sa' ajcui' li k'ojojin nak toj maji' quik'axtesjc li Kacua' Jesucristo quixchap li caxlan cua. ²⁴ Ut nak quixbantioxi chiru li Dios, quixjachi li caxlan cua ut quixye rebeb: Tzakahomak. A'an a'in lin tabel rahobtesinbil sa' ec'aba' laex. Chebanuhak li caxlan cua a'in re xjulticanquil li usilal xinbanu ere, chan. ²⁵ Ut nak que'rake' chi cua'ac quixchap ajcui' li sec' ut quiixye: Li' uc'a a'in, a'an retalil li Ac' Contrato riq'uin li Dios. Taxakabank re xcuanyl xban lin quiq'uel tähoyek'. Rajlal nak teruc' xsa' li sec' a'in, chebanuhak re xjulticanquil lin camic sa' ec'aba' laex, chan li Jesús. ²⁶ Jo'can nak ninye ere rajlal nak tetzaca a caxlan cua a'in ut teruc' xsa' li sec' a'in, tejultica xcamic li Cristo. Chebanuhak a'an toj tac'ulunk cui'chic li Kacua' Jesucristo. ²⁷ Jo'can ut li ani tixcua' li caxlan cua ut taruc' li uc'a re xjulticanquil lix camic li Kacua' Jesucristo ut inc'a' naxq'ue xlok'al li Cristo, li jun a'an yo' chi mact'boc chiru li Kacua' ut yo chixtz'ektanquil xcuanyl lix camic li Kacua' Jesucristo. ²⁸ Jo'can ut li junjunk tento tixq'ue retal ma tyc lix yu'am sa' lix pabal nak toj maji' naxc'ul li caxlan cua ut li uc'a. ²⁹ Li ani naxc'ul li caxlan cua ut li uc'a chi inc'a' naxq'ue xcuanyl lix camic li Kacua' Jesucristo, tojba mact'boc naxbok sa' xben. ³⁰ A'in ut xyalal nak nabal yajeb ut mact'a'eb xmetz'eu sa' eyank ut cuanqueb ajcui' ac xe'cam. ³¹ Abanan cui nakec'a kib nak tyc li kayu'am nak nakatzaca inc'a' tento nak li Kacua' tixrak atin sa' kab'en. ³² Ut nak narakman atin sa' kab'en xban li Kacua' nocok'use' re nak inc'a' tz'ektanbilako kochbeneb li inc'a' neque'paban. ³³ Jo'can ut ex inherman, nak tech'utub erib chixbanunquil li lok'oninc re xjulticanquil lix camic li Kacua' Jesucristo, cheroybeni erib chi ribil erib re nak sa' comonil tebanu. ³⁴ Cui cuan junak sa' eyank tatz'ocak, chicua'ak chak sa' rochoch re nak inc'a' tebok raylal sa' eben nak tech'utub erib. Toj cuan chic c'a'ak re ru inc'a' xnye ere. Nak tincuulak cherilbal tinch'olob xyalal cheru li toj maji' xnye ere.

12

Li kamatan q'uebil ke xban li Santil Musik'ej

¹ Ex inherman, lain nacuaj nak tetau ru li xyalal li matan li naxq'ue li Santil Musik'ej re li junjunk re nak tac'anjelak chiru li Dios. ² Nak toj maji' neque'xpaban chak queq'ue chak xcuanyl li yibanal dios li inc'a' neque'atinac ut queq'ue erib chi balak'ic riq'uin xpabankuleb. ³ Jo'can nak nacuaj tenau nak li ani cuan li Santil Musik'ej riq'uin, ma jok'e tixmajecua li Jesús. Ut ma ani taruk tixye chi anchal xch'ol nak li Jesús a'an li Kacua' cui mact'a' li Santil Musik'ej riq'uin. ⁴ Jalan jalank li kamatan naxq'ue ke li Santil Musik'ej re nak toc'anjelak chiru li Kacua'. Abanan li Santil Musik'ej jun ajcui' ut a'an naq'uehoc re chixjunil. ⁵ Jalan jalank li kac'anjel chiru li Kacua' abanan jun ajcui' li Kacua' cuan sa kab'en ut ca'aj cui' chiru a'an nococ'anjelac. ⁶ Jalan jalank li c'anjel nocoxq'ue cui' li Dios. Abanan jun ajcui' li Dios ut a'an li natenk'an ke chi xbanunquil li c'anjel li naxq'ue ke. ⁷ Riq'uin li matan q'uebil re li junjunk naq'utun nak cuan li Santil Musik'ej riq'uin, ut li matan a'an q'uebil re, re xtenk'anquileb chixjunileb laj paqanel. ⁸ Cuan li q'uebileb xmatan xban li Santil Musik'ej re q'uehoc chabil na'leb ut cuan li q'uebileb xmatan xban li Santil Musik'ej re xch'olobanquil li yal. Abanan jun ajcui' li Santil Musik'ej li naq'uehoc re xmatan li junjunk. ⁹ Cuan li q'uebileb xmatan xban li Santil Musik'ej chi xpabankuleb nak te'xc'ul li c'a'ru

neque'xtz'ama chiru li Dios. Ut cuan ajcui' q'uebileb xmatan xban li Santil Musik'ej re xq'uirtesinquileb li yaj. Abanan jun ajcui' li Santil Musik'ej li naq'uehoc xmatan li junjunk. ¹⁰ Cuan q'uebileb xmatan chi banunc milagro ut cuan q'uebileb xmatan chi xch'olobanquil resil li c'a'ru quiç'ut'besic chiru xban li Dios. Ut cuan q'uebileb xmatan re xtaubal ru cui li Santil Musik'ej cuan riq'uin junak malaj ut cuan li mäus aj musik'ej riq'uin. Ut cuan q'uebileb xmatan chi atinac sa' jalan atin inc'a' natauman ru ut cuan ajcui' q'uebileb xmatan chi jaloc ru li jalanyl atin. ¹¹ Abanan chixjunil li matan a'in q'uebil ke xban li jun chi Santil Musik'ej. A'an naq'uehoc xmataneb li junjunk jo' naraj a'an.

Junajo nak cuanco riq'uin li Cristo

¹² Li jun chi tz'ejcualej tz'akal re ru. Cuan rok ruk'. Cuan chixjunil. Usta jalan jalank lix cha'al cuan, abanan jun ajcui' chi tz'ejcualej nak cuan. Jo'can ajcui' lao aj pabanel. Nabalo, abanan junajo chi tz'ejcualej riq'uin li Cristo. ¹³ Chikajunilo junajo riq'uin li Cristo usta aj judío, usta macua' aj judío, usta lok'b'il mos, usta inc'a'. Xkac'ul li cubi ha' sa' xc'aba' li jun chi Santil Musik'ej ut chikajunilo cuan li Santil Musik'ej kiq'uin. Jo'can nak junajo riq'uin li Cristo. ¹⁴ Li jun chi tz'ejcualej moco jun ta ajcui' lix cha'al cuan. Nabal pay ru lix cha'al cuan re ut jalan jalank xc'anjal li junjunk. ¹⁵ Cui naru raj taatinak li rok junak li tz'ejcualej, ¿ma naru tixye macua'in xcomon li tz'ejcualej xban nak macua'in li ruk'? ¿Ma yal xban ta bi' nak macua' uk'ej nak macua'ak xcomon li tz'ejcualej? ¹⁶ Cui lix xic junak li tz'ejcualej tixye: macua'in xcomon li tz'ejcualej xban nak macua'in li xnak' ru, ¿ma yal ta bi' xban nak macua' xnak' u, nak macua'ak xcomon li tz'ejcualej? ¹⁷ Cui ta chixjunil li tz'ejcualej xnak' u, ¿chan raj ru nak to-abink? Ut cui ta chixjunil li tz'ejcualej xic, ¿chan raj ru nak takut' li c'a'ak re ru? ¹⁸ Abanan li Dios quixq'ue sa' xna'a'j chi tz'akal re ru lix cha'al li katz'ejcual jo' quiraj a'an. ¹⁹ Cui ta jun pay ajcui' ru lix cha'al li tz'ejcualej, li tz'ejcualej a'an inc'a' raj tz'akal re ru nak cuan. ²⁰ Abanan nabal pay xcha'al li tz'ejcualej cuan, ut li tz'ejcualej jun ajcui'. ²¹ Cui naru raj taatinak li xnak' u inc'a' naru tixye re li uk'ej: laat inc'a' nacatl'anjelac chicuu. Chi moco naru tixye li jolomej re li okej: laex inc'a' nequexc'anjelac chicuu. ²² K'axal ban chic nabal xc'anjeleb lix cha'al li katz'ejcual li chanchan mac'a'eb xc'anjal. ²³ Cuan xcha'al li katz'ejcual naka-oxlok'i ut cuan ajcui' xcha'al li katz'ejcual nocoxutanac xban ut nakatz'ap re xq'uebal xllok'al. ²⁴ Ut lix cha'al li katz'ejcual li inc'a' nocoxutanac xban, a'an inc'a' nakatz'ap. Abanan li Dios quixq'ue chixjunil lix cha'al li katz'ejcual ut quixq'ue xllok'al li junjunk. ²⁵ Quixq'ue xllok'al chixjunil xcha'al li tz'ejcualej re nak mac'a'ak xch'a'ajquilal li tz'ejcualej. Chixjunil ban lix cha'al li tz'ejcualej te'xten'a rib chi ribileb rib. ²⁶ Cui junak xcha'al li tz'ejcualej ra naxc'ul, naraho' ajcui' chixjunil li tz'ejcualej. Ut cui junak xcha'al li tz'ejcualej naq'uehe' xllok'al, chixjunil li tz'ejcualej naq'ueman ajcui' xllok'al. ²⁷ Jo'can ajcui' lao aj pabanel. Junajo chi tz'ejcualej riq'uin li Cristo. Chikajunkalo lao rok ruk' li Cristo ut li junjunk cuan xc'anjal chiru li Dios. ²⁸ Li xchalal li tz'ejcualej jalan jalank xc'anjal li junjunk. Jo'can ajcui' nak jalan jalank xmataneb laj pabanel q'uebileb re xban li Dios re nak te'c'anjelak chiru. Xben, cuanqueb li q'uebileb xmatan chi c'anjelac chok' apóstol. Xcab, cuanqueb li q'uebileb xmatan chi c'anjelac chok' profeta. Rox, cuanqueb li q'uebileb xmatan chi c'anjelac chok' aj tzolone. Ut cuanqueb li q'uebileb xmatan chixbanunquileb li milagro. Cuanqueb li q'uebileb xmatan chixq'uirtesinquileb li yaj; cuanqueb li q'uebileb xmatan chixten'ankquileb li ras ritz'in. Cuanqueb li q'uebileb xmatan chi taklanc; ut

cuanqueb ajcui' q'uebileb xm̄atan chi ̄tinac sa' jalanił ̄tin inc'a' natauman ru. ²⁹ ¿Ma chixjunileb ta bi' apostoleb? ¿Ma chixjunileb ta bi' profeteb? ¿Ma chixjunileb ta bi' neque'xch'olob xyalal li r̄atin li Dios? ¿Ma chixjunileb ta bi' neque'banun milagro? ³⁰ ¿Ma chixjunileb ta bi' neque'q'uirtesin ya? ¿Ma chixjunileb ta bi' neque'atinaç sa' jalanił ̄tin? ¿Ma chixjunileb ta bi' neque'jaloc ru li jalanił ̄tin? ³¹ Moco juntak'et ta xmataneb li junjunk. Jalan jalank ban xmataneb. Chесic'ak le m̄atan li k'axal chabil re xtenk'anquileb le rech aj pabanelil. Anakcuan t̄ine ere jun li na'leb k'axal cui'chic tento xbanunquil. Ut a'an a'in: nak t̄era erib chi ribil erib.

13

Lirahoc, a'an li k'axal lok'

¹ Cui ta lain q'uebil inm̄atan xban li Dios chi ̄tinac sa' r̄atinobaleb li cuink ut cui ta cuan inm̄atan chi ̄tinac sa' r̄atinobaleb li ángel, abanan cui inc'a' ninraheb li cuas cuitz'in, lain chanchanin li ch'ich' natambac xyab ut chanchanin li campana natzintzot xyab chi mac'a' rajbal. ² Ut cui ta q'uebil inm̄atan xban li Dios chixyebal li naxc'ut chicuu, ut cui ta ninnau chixjunil li c'a'ak re ru ut cui ta nintau ru li xyalal, abanan cui inc'a' ninraheb li cuas cuitz'in mac'a' nin-oc cui'. Ut cui ta cuan tz'akal inpabal re nak tajalek' xna'aj junak li tzul, abanan cui inc'a' ninraheb li cuas cuitz'in, mac'a' nin-oc cui'. ³ Cui ta tinsi chixjunil li c'a'ru cuan cue re tinq'ueheb chi cua'ac li neba' ut cui ta tink'axtesi cuib chi c'atec' xban lin pabal, ut cui inc'a' ninraheb li cuas cuitz'in, mac'a' na-oc cui' li ninbanu. ⁴ Li ani narahoc, naxcuy li raylal ut k'axal chabil. Li ani narahoc inc'a' nacakalin, inc'a' naxnimobresi rib ut inc'a' naxk'etk'eti rib. ⁵ Li ani narahoc inc'a' nahoboc. Inc'a' naxsic' xchabilan xjunes rib. Li ani narahoc inc'a' najošk'o' ut inc'a' naxq'ue sa' xch'ol li c'a'ru naxc'uł. ⁶ Li ani narahoc inc'a' nasaho' xch'ol nak eb li ras ritz'in neque'xbanu li inc'a' us. Nasaho' ban xch'ol nak cuanqueb sa' xyalal. ⁷ Li ani narahoc inc'a' naraho' xch'ol xban li c'a'ru na-ux re xbaneb li ras ritz'in. Junelic ban cau xch'ol chirixeb. Li ani narahoc inc'a' nach'inan xch'ol. Naxcuy ban xnumsinquil chixjunil li raylal. ⁸ Li rahoc tacuank chi junelic. Tacuulak xk'ehil nak inc'a' chic tac'anjelak li m̄atan re cuanc chi profetil ut tacuulak xk'ehil nak inc'a' chic tac'anjelak li matan re atinac sa' jalanił atin. Ut tacuulak xk'ehil nak inc'a' chic tac'anjelak li m̄atan re xtaubal ru chixjunil. Abanan li rahoc inc'a' nalaj, inc'a' na-oso'. Cuank ban chi junelic. ⁹ Usta cuanqueb li cuan xmataneb anakcuan re xnaubal li c'a'ak re ru, abanan ca'ch'in ajcui' neque'xnau. Usta cuanqueb li cuan xmataneb chixyebal li c'a'ru nac'utbesic chiruheb xban li Dios, abanan ca'ch'in ajcui' li nac'ute' chiruheb. ¹⁰ Ut nak tatz'aklok ru chixjunil li naraj xbanunquil li Dios, inc'a' chic te'c'anjelak eb li m̄atan a'in li inc'a' tz'akal re ru. ¹¹ Nak toj ca'ch'inin chak quinatinac jo' neque'atinaç li coc'al. Quinc'oxlac jo' neque'c'oxlac li coc'al. Ut quinbanu jo' neque'xbanu li coc'al. Abanan nak quincuinkilo' quincanab xbanunquil lix na'lebeb li coc'al. ¹² Anakcuan ca'ch'in ajcui' nakanau. Chanchan nak noco-iloc sa' junak lem moymoy ru. Abanan sa' jun cutan takil ru li Dios ut takanau chic chixjunil chí tz'akal jo' nak li Dios naxnau ku lão. ¹³ Jo'can nak li pabal, li yo'oninc ut li rahoc cuank chi junelic. Abanan li k'axal nim xcuankuil sa' xyankeb li oxib a'in, a'an li rahoc.

14

Li ̄tinac sa' jalanił ̄tin li inc'a' natauman ru

¹ Jo'can nak ninye ere, cheq'uehak ech'ol chi rahoc ut chesic'ak le matan li naxq'ue li Santil Musik'ej. Li matan li k'axal lok', a'an xyebal resil li c'a'ru yo chi xc'utbal cheru li Dios. ² Li ani naatinac sa' jalanił atin inc'a' naatinac riq'uin li rech cristianil. Riq'uin ban li Dios naatinac. Ut ma ani nata'oc ru li c'a'ru naxye. Riq'uin xcuánquil li Santil Musik'ej naxye li xyalal li inc'a' natauman ru. ³ Ut li ani naxye resil li nac'ute' chiru xban li Dios, li jun a'an naxtenk'aheb li rech aj pabanelil sa' lix pabaleb. Naxch'olob xyalal chiruheb ut naxc'ojobeb xch'ol. ⁴ Li ani naatinac sa' jalanił atin naxtenk'a rib xjunes rib. Abanan li ani naxch'olob xyalal li ratin li Dios, li jun a'an naxtenk'aheb li rech aj pabanelil sa' lix pabaleb. ⁵ Nacuaj raj nak chejunilex tex-atinak ta sa' jalanił atin li inc'a' natauman ru. Abanan k'axal cui'chic nacuaj raj nak chejunilex teye resil rebeb le ras eritz'in sa' le ratinobal c'a'ru quic'ute' cheru xban li Dios. K'axal us nak teye li ratin li Dios sa' le ratinobal chiru li atinac sa' jalanił atin li inc'a' natauman ru. Abanan cui' junak naatinac sa' jalanił atin, tento nak tajalmank ru li ratin re nak eb laj pabanel te'xtau ru li c'a'ru tixye ut te'tenk'ak xban. ⁶ Ex inherman, ¿c'a'ru tac'oc cui' ere nak tincuulak eriq'uin ut tinatinak eriq'uin sa' le ratinobal, texintenka' nak tinch'olob xyalal cheru jo' quic'ute' chicuu xban li Dios. Ut tac'anjelak cheru cui' tanye ere li ratin li Dios ut tanye ere c'a'ru tac'ulmank jo' tz'ibabil sa' li Santil Hu. ⁷ Ut jo'can ajcui' li c'a'ak re ru inc'a' yo'yo jo' li xolb ut li arpa. Cui inc'a' nach'e'man chi tz'akal inc'a' nac'utun li c'a'ru yo' chixyabasinquil ut mac'a' rajbal nak nach'e'man. ⁸ Ut nak tayabasik li trompeta re xbokbaleb li soldado, cui inc'a' ch'olch'o ru lix yab, ¿ma te'xcauresi ta bi' rib chi xic chi pletic? ⁹ Ut jo'can ajcui' laex cui inc'a' nequex-atinac chi tz'akal re ru, ¿chanru nak tataumank ru li c'a'ru yo'quex chixyebal? Yal na-oso' sa' ik' ut mac'a' rajbal li teye. ¹⁰ Yal nak q'uila pay chi atinobal cuan sa' ruchich'och' ut chixjunil cuan xyalal ut natauman ru. ¹¹ Abanan cui lajn inc'a' nintau ru li ratinobal junak, li jun a'an mac'a' rajbal nak yok chi atinac cuiq'uin ut mac'a' ajcui' rajbal nak yokin chi atinac riq'uin. ¹² Laex nequeraj xc'ulbal li matan naxq'ue li Santil Musik'ej. Abanan lajn ninye ere chesic'ak li matan li natenk'an rebeb chixjunileb laj pabanel. ¹³ Ut li ani cuan xmatan chi atinac sa' jalanił atin, li inc'a' natauman ru, chixtz'amahak chiru li Dios re nak taruk tixye xyalal li c'a'ru quixye sa' li jalanił atin re nak taruk tixch'olob xyalal chiruheb li rech aj pabanelil. ¹⁴ Cui lajn tintijok sa' jalanił atin lin musik' tatiyok ut lajn inc'a' nintau ru li c'a'ru tanye chi moco tixtenk'aheb li cuech aj pabanelil. ¹⁵ ¿C'a'ru tinbanu chi jo'canan? Tintijok riq'uin lin musik' chi inc'a' tintau ru li tanye ut tento ajcui' nak tintijok riq'uin lin c'a'ux re nak tataumank ru li c'a'ru tanye. Ut tinbichank riq'uin lin musik' chi inc'a' tintau ru li tanye ut tinbichank ajcui' riq'uin lin c'a'ux re nak tataumank ru li c'a'ru tanye. ¹⁶ Cuan li inc'a' neque'xtau ru li xyalal chirix li jalanił atin. Cui yocat chixlok'oninquil li Dios ca'aj cui' riq'uin la musik', eb a'an inc'a' te'xtau ru li taye xban nak yocat chi atinac sa' jalanił atin. ¿Chan put ru nak te'xye "jo'can taxak" cui inc'a' neque'xtau ru li yocat chixyebal? ¹⁷ Yal nak yocat chixlok'oninquil li Dios, abanan li jun chic inc'a' tatenk'ak xban la tij xban nak inc'a' naxtau ru li c'a'ru yocat chixyebal. ¹⁸ Ninbantioxi chiru li Dios nak nabal sut ninatinaç sa' jalanił atin. Laex inc'a' quex-atinac nabal sut sa' jalanił atin jo' lajn. ¹⁹ Aban lajn ninye nak sa' xyankeb laj pabanel k'axal us raj nak tanye cuib oxibak chi atin li te'xtau ru re nak tebibtzol chi tz'akal chiru nak tanye lajebak mil chi atin sa' jalanił atin ut inc'a' te'xtau ru li tanye. ²⁰ Ex inherman, chanchanakex li c'ula'al xban nak eb li c'ula'al inc'a' neque'xbanu li mausilal. Abanan mexc'oxlac jo' neque'c'oxlac li coc'al.

Tz'akalak ban re ru le c'a'ux xban nak moco coc'alex ta chic. ²¹ Jo'ca'in tz'ibabil sa' li Santil Hú li quixye li Dios najter chirixeb laj Israel:

Eb lin tenamit inc'a' neque'raj rabinquil li cuatin. Jo'can nak sa' jalan atinobal tincuatiñaheb. Tintakla jalan xtenamit chixyebal li cuatin reheb. Abanan chi moco chi jo'can tine'rabi, chan li Kacula'. (Is. 28:11-12)

²² Riq'uin a atin a'in nakanau nak li maṭan re atinac sa' jalan atinobal, a'an q'uebil jo' retalil lix cuanquilal li Dios chiruheb li macua'eb aj pabanel. Ut li maṭan re xyebal li c'a'ru naxc'utbesi li Dios, a'an q'uebil re xtenk'anquileb laj pabanel. ²³ Nak eb laj pabanel te'xch'utub ribeb ut cui chixjunileb te'oc chi atinac sa' jalan atin inc'a' natauman ru, cui te'oc aran li macua'eb aj pabanel malaj te'oc aran li inc'a' neque'xtau ru li na'leb a'in, te'xye nak loqueb ru. ²⁴ Abanan cui eb laj pabanel te'xch'olob xyalal li c'a'ru quiyeh'e reheb xban li Dios, nak tox-oc sa' xyānkeb junak macua'aj pabanel malaj li toj maji' naxtau ru li xyālal a'an, li jun a'an tixq'ue retal nak a'an aj mac ut tixq'ue ajcui' retal li c'a'ru yo chirabinquil. ²⁵ Li Dios tixc'ut chiru chi tz'akal c'a'ru cuan sa' xch'ol. Ut li jun a'an tixcukl'ib rib ut tixlok'oni li Dios ut tixye nak relic chi yal li Dios cuan sa' xyānkeb laj pabanel.

Tz'akal re ru tēbānu nak tech'utub erib

²⁶ Ex herman, a'an a'in li nacuaj xyebal ere. Nak tech'utub erib chixlok'oninquil li Dios, jalan jalank tebānu chejunkalex. Cuan tixc'am chak junak bich; cuan li taq'uehok na'leb; cuan li tayehok re li quic'ute' chiru xban li Dios; cuan li tayehok junak na'leb riq'uin jalanił atin ut cuan ajcui' li tajalok ru li tayemānk sa' li jalanił atin. Abanan chixjunil li tebānu, chebanuhak re xtenk'anquileb laj pabanel chi q'uiç sa' lix papaleb. ²⁷ Cui cuanqueb li te'raj atinac sa' jalanił atin, naru neque'atinac cuibak malaj oxibak ut chixjunkaleb te'atinak. Ut cuank ajcui' junak chic li tajalok ru li te'xye. ²⁸ Abanan cui ma ani naru tajalok ru li jalanił atin, inc'a' te'atinak sa' jalanił atin sa' li ch'utubaj ib. Yal sa' xch'oleb ban te'atinak chiru li Dios. ²⁹ Cheq'ueheb chi atinac cuibak malaj oxibak li profeta li neque'yehoc resil li c'a'ru quic'ute' chiruheb xban li Dios, ut li jun ch'ol chic te'tz'ilok q'atín chirix re xnaubal ma riq'uin na li Dios xchal chak li xe'xye. ³⁰ Ut cui cuan c'a'ru tac'utek' xban li Dios chiru li ani c'ojc'o aran sa' li ch'utubaj ib, li jun a'an tixtz'ama chiru li yo chi atinac nak tixye li c'a'ru xc'ute' chiru xban li Dios. Ut li ani yo chi q'atínac chixq'uehak xna'aj re taatinak. ³¹ Chejunjunkalex taruk teye li c'a'ru xc'ute' cheru xban li Dios re nak chixjunileb laj pabanel te'xtzol rib ut tacacuu xch'oleb sa' lix papaleb. ³² Cui yal nak li Dios xc'utuc cheru li c'a'ru teye, li Dios textenk'a chiroybeninquil jok'e tex-oc chi atinac re nak chi jo'can chejunjunkalex tex-atinak. ³³ Li Dios inc'a' naraj nak tacuank li po'oj ib sa' xyānkeb laj pabanel. Naraj ban nak cuank li tuktukuil usilal sa' xyānkeb. ³⁴ Eb li ixs inc'a' te'atinak sa' li ch'utubaj ib re xlok'oninquil li Dios. Te'xpab a'in xban nak jo'can tz'ibabil sa' lix chak'rabebeb laj judío. Jo'ca'in na-uxman sa' xyānkeb chixjunileb laj pabanel yalak bar. ³⁵ Cui cuan c'a' re ru te'raj xnaubal che'xpatz'ak reheb lix belom nak te'cuulak sa' rochocheb ut a'an tixch'olob xyālal. Xutanal chok' reheb cui taatinak junak ixs sa' xyānkeb nak ch'utch'uqueb chixlok'oninquil li Dios. ³⁶ Chijulticok' ere nak macua'ex laqex quextiquiban chak re li ratin li Dios. Ac cuan ajcui' chalen chak junxil. Ut moco ca'aj cui' ta laqex quex-abin re. ³⁷ Mare cuan sa' eyānk li naxc'oxla nak a'an profeta malaj naxc'oxla nak cuan jun chic xmaṭan q'uebil re xban li Santil Musik'ej. Cui jo'can naxc'oxla, chixnauhak nak li yoquin chixtz'ibanol sa' li hu a'in, a'an ajcui' li chak'rab q'uebil cue xban li Dios. ³⁸ Ut cui cuan junak inc'a' naxpab li yoquin chixtz'ibanol, laqex inc'a'

ajcui' tepab li c'a'ru tixye a'an. ³⁹ Jo'can ut ex inherman, cheq'uehak ech'ol chixch'olobanquil xyalal li c'a'ru quic'ute' cheru xban li Dios ut meram chiru li ani naraj atinac sa' jalanił atin. ⁴⁰ Abanan li c'a'ru tebənu nak təch'utub erib, chebənuhak chixjunil chi tz'akal re ru ut sa' xyalal.

15

Lix cuaclijic chi yo'yo li Jesucristo sa' xyankeb li camenak

¹ Anakcuan ex inherman, tinch'olob cui'chic cheru li resil li colba-ib. Li resil a'an, a'an li ac xinye ere ut xec'uluban sa' ech'ol ut riq'uin a'an cau chic ech'ol sa' le pabal. ² A'an a'in li xyalal li xinch'olob cheru, li xexcole' cui'. Laex colbilex chic cui nequexpaban chi tz'akal ut inc'a' nequecanab xpabanquil. Abanan cui inc'a' nequepab chi anchal ech'ol, mac'a' rajbal nak xexpaban. ³ Li c'a'ru quixc'ut li Kacua' chicuu, a'an ajcui' li xinch'olob cheru. Lix yalal a'an k'axal nim xcuanylil ut a'an a'in: nak li Kacua' Jesucristo quicam re xtojbal rix li kamac jo' tz'ibanol najter sa' li Santil Hu xbaneb li profeta. ⁴ Jo' nak que'xtz'iba chak li profeta najter, jo'can quic'ulman. Li Kacua' Jesucristo quimuke' ut quicuacli cui'chic chi yo'yo sa' rox li cutan. ⁵ Chirix a'an li Kacua' Jesucristo quixc'ut rib chiru li apóstol Pedro ut quixc'ut ajcui' rib chiruheb chixjunileb li apóstol. ⁶ Ut chirix chic a'an quixc'ut rib chiruheb numenak ob ciento chi aj pabanel nak ch'utch'ueqb. Sa' xyankeb a'an cuanqueb nabaleb toj yo'yoqueb anakcuan ut cuanqueb ajcui' li ac camenakeb. ⁷ Ut mokon li Kacua' Jesucristo quixc'ut rib chiru laj Jacobo ut quixc'ut ajcui' rib chiruheb chixjunileb li apóstol. ⁸ Ut chirix chixjunil a'an, quixc'ut ajcui' rib chicuu laín, usta laín chanchanin jun c'ula'al toj maji' naxtau xk'ehil xyo'lajic xban nak laín toj maji' ninyo'la sa' lin pabal nak quixc'ut rib chicuu. ⁹ Laín cubenak incuanquil chiruheb chixjunileb li apóstol ut macua' raj inc'ulub nak laínak apóstol xban nak laín xinrahobtesiheb chak laj pabanel. ¹⁰ Abanan xban rusilal li Dios nak laín apóstol. Ut li rusilal li Dios inc'a' quicana chi mac'a' rajbal xban nak k'axal cau cui'chic ninc'anjelac chiru chixjunileb li apóstol. Aban macua' injunes ninc'anjelac. Li Dios natenk'an cue xban xnimil rusilal li xinmatani. ¹¹ Mac'a' naxye cui xerabi resil li colba-ib riq'uineb li apóstol jun ch'ol malaj cuiq'uín laín. Juntak'et li resil li colba-ib li nakajultica chikajunilo ut a'an li xepab laex.

Eb li camenak te'cuaclik cui'chic chi yo'yo

¹² Ac xkach'olob xyalal cheru nak li Cristo quicuacli cui'chic chi yo'yo sa' xyankeb li camenak. Abanan toj cuan sa' eyank li neque'yehoc re nak inc'a' te'cuaclik cui'chic chi yo'yo li camenak. ¹³ Cui inc'a' te'cuaclik cui'chic chi yo'yo eb li camenak, inc'a' raj yal nak quicuacli cui'chic chi yo'yo li Jesucristo sa xyankeb li camenak. ¹⁴ Cui ta inc'a' quicuacli cui'chic chi yo'yo li Jesucristo, mac'a' raj xyalal li nakajultica resil, ut mac'a' raj rajbal li xepab. ¹⁵ Ut cui ta inc'a' quicuacli chi yo'yo li Cristo sa' xyankeb li camenak, xocana raj lao chok' aj balak' riq'uin li xkaye chirix li Dios xban nak xkach'olob xyalal nak li Dios quixcuaclesi cui'chic chi yo'yo li Cristo. Abanan inc'a' raj quixcuaclesi chi yo'yo cui yal nak inc'a' te'cuaclik cui'chic chi yo'yo li camenak. ¹⁶ Cui ta inc'a' yal nak te'cuaclik cui'chic chi yo'yo li camenak, inc'a' raj yal nak quicuacli cui'chic chi yo'yo li Cristo. ¹⁷ Cui ta li Cristo inc'a' quicuacli cui'chic chi yo'yo, mac'a' raj rajbal le pabal. Toj cuankex raj ajcui' sa' le mac. ¹⁸ Cui ta jo'can, eb li que'xpab li Cristo li que'cam sachenakeb raj ajcui' xban lix maqueb. ¹⁹ Cui ta ca'aj cui' re li kayu'am arin sa' ruchich'och' nak xkapab li Cristo, xkabalak'i raj kib ut k'axal tok'obal raj

ku tocanák chiruheb chixjunileb li kas kitz'in. ²⁰ Abanan relic chi yal nak li Cristo quicualesic cui'chic chi yo'yo sa' xyankeb li camenak. A'an li xben li quicuacli chi yo'yo chiruheb chixjunileb lí te'cuaclesik cui'chic chi yo'yo. ²¹ Xban nak quimacob laj Adán, jo'can nak chikajunilo nococam. Abanan xban nak quicuacli cui'chic chi yo'yo li Jesucristo, cuan ajcui' xcuaclijiqueb li camenak chi yo'yo. ²² Jo'can nak sa' xc'aba' laj Adán li kaxe'tonil yucua' nak chikajunilo nococam. Ut sa' xc'aba' li Jesucristo, chixjunileb lí neque'pában re te'cuaclik cui'chic chi yo'yo ut te'q'uehek' xyu'am chi junelic. ²³ Ut nak te'cuaclik cui'chic chi yo'yo eb li camenak, moco jun cuaclijiqueb ta nak te'cuaclik chak. Li xben li quicuacli chak chi yo'yo, a'an li Jesucristo. Ut mokon nak tol-élk cui'chic li Jesucristo, te'cuaclik chak eb li que'pában re. ²⁴ Ut chirix chic a'an aca' chic li roso'jic li ruchich'och' ut li Cristo tixsacheb xcuauquileb li neque'taklan sa' ruchich'och' ut tixsach ajcui' xcuauquileb li Musík'ej. Ut chirix a'an li Cristo tixk'axtesi lix cuauquileb sa' ruk' li Dios Acuabej. ²⁵ Li Cristo cuank xcuauquileb chi taklanc toj retal tixq'ueheb rubel rok chixjunileb li xic' neque'iloc re. ²⁶ Ut li tásachek' xcuauquileb chi taklanc toj sa' roso'jic, a'an li camc. ²⁷ Tz'ibánbil retalil sa' li Santil Hu nak li Acuabej Dios quixq'ue chixjunil li c'a'ak re ru rubel xcuauquileb li Cristo. Abanan li Cristo inc'a nataklan sa' xben li Acuabej Dios xban nak li Dios, a'an li quiq'uehoc re lix cuauquilar. ²⁸ Ut nak acak xcanabac xban li Dios chixjunil li c'a'ak re ru rubel xcuauquileb li Cristo li Alalbej, tojo'nak li Cristo tixk'axtesi ajcui' rib rubel xcuauquileb li Acuabej Dios, li quiq'uehoc xcuauquileb li Cristo sa' xben chixjunil, ut li Dios a'anak chic yal re sa' xben chixjunil. ²⁹ Cuan ca'ch'in chic tinye chirix lix cuaclijiqueb chi yo'yo li camenak. Cuanqueb sa' eyank li neque'cubisic xha'eb chok' ruchil xcubi ha' li camenak. Cui inc'a' neque'xpab nak te'cuaclik li camenak, ¿c'a'ut nak neque'xbanu chi jo'can? ³⁰ Ut cui inc'a' te'cuaclik chi yo'yo li camenak, ¿c'a'ut nak lao aj yehol resil li colba-ib nakaq'ue kib chi rahobtesic cui mac'a' xyalal li yoco chixbanunquil? ³¹ Ex inherman, relic chi yal ninye ere nak rajlal cutan cuan li neque'raj incamsinquel xban nak ninye resil li colba-ib. Abanan nasaho' sa' inch'ol xban nak xepab li Cristo. ³² Ut cui inc'a' te'cuaclik chi yo'yo li camenak, ¿c'a' raj ru tinra nak tinc'ul li raylal arin Efeso? Chanchan nak yoquin chi pletic riq'uineb li josk' aj xul nak cuauquin arin sa' xyankeb li tenamit. Mac'a' raj rajbal a'an cui inc'a' takac'ul kak'ajcamunquileb chirix li kacamic. K'axal us raj cui takabanu jo' li inc'a' neque'xpab nak te'cuaclik chi yo'yo li camenak li neque'xyé cua'ako, uc'ako xban nak cuulaj ca'bej nococam. ³³ Meq'ue erib chi balak'ic xbaneb li neque'atinac chi jo'can. Mejunaji erib riq'uineb li inc'a' useb xna'leb xban nak li inc'a' useb xna'leb neque'xpo' xch'oleb li chabileb xna'leb. ³⁴ Chec'oxla chi us li yoquex chixbanunquileb ut mexmáacob chic. Cuanqueb sa' eyank li toj maji' neque'xpab li Dios. Re xc'utbal exután nak ninye ere chi jo'ca'in. ³⁵ Mare cuan li neque'yehoc, ¿chanru nak te'cuaclik cui'chic chi yo'yo li camenak? ¿Chanru te'c'utunk nak te'cuaclik? ¿Ma te'cuaclik cui'chic chi tz'akal re ruheb? chanqueb. ³⁶ Mac'a' ena'leb. C'oxlankex ca'ch'inak chirix li aqc. Li iyaj na-auman inc'a' namok cui inc'a' nak'a li rix xben cua. ³⁷ Maçua' li ratz'um li acuimk na-auman. A' li riyajil ban na-auman usta trigo malaj c'a' chic ru chi iyajil. ³⁸ Ut li Dios naxq'ue li ratz'um chi ch'ina'us jo' naraj a'an. A' yal c'a'ru li iyaj tarau junak, a'an ajcui' li ratz'um tixq'ue. ³⁹ Nabal pay ru li iyaj ut nabal pay ajcui' ru li ratz'um na-el. Ut jo'can ajcui' nabal pay ru li tibeley. Jalan xtibel li cristian chiru xtibel li xul. Ut jalan xtibel li car chiru xtibel li xul li neque'ruplic. ⁴⁰ Ut jalaneb ajcui' li ángel sa' choxa chiku lao ut jalaneb lix lok'al chiru li kalok'al lao arin sa' ruchich'och'. ⁴¹ Jalan cui' xlok'al li sak'e ut jalan cui'

xlok'al li po ut jalan ajcui' xlok'al li chahim ut jalan jalənk lix lok'al li junjunk chi chahim. ⁴² Jo'can ajcui' ləo. Jalan chic li kalok'al nak tocuaclik cui'chic chi yo'yo chirix li kacamic. Nak nococam, nocomuke' ut nak'a li katibel, abanan nak tocuaclik cui'chic chi yo'yo jalankalo chic ut inc'a' chic tocampk. ⁴³ Nak namuke' junak camenak mac'a' xcacuilal chi moco xlok'al. Abanan nak tacuaclik cui'chic chi yo'yo, k'axal nimak xlok'al ut cuqənq chic xcuauquil. ⁴⁴ Nak nococam namuke' li katibel xban nak yal ch'och' oquenak. Abanan nak tocuaclik cui'chic chi yo'yo, musik'ejo chic. Nak cuanco sa' ruchich'och' cuan li katibel nak'a na-oso'. Abanan sa' choxa jalankalo chic ut tacuauq li kayu'am chi junelic. ⁴⁵ Tz'ib'anbil sa' li Santil Hu chi jo'ca'in:

Laj Adán li xben cujink quiq'uehe' xmusik' nak quiyo'obtesic xban li Dios.

Abanan li xcab Adán, a' li Kacua' Jesucristo, a'an musik'ej ut a'an li naq'uehoc kayu'am chi junelic.

⁴⁶ Jo'can nak li katibel arin sa' ruchich'och', a'an na-oso'. Abanan li kamusik' li naxq'ue ke li Dios, a'an inc'a' na-oso'. Cuan ban chi junelic.

⁴⁷ Nak quiyo'obtesic laj Adán xban li Dios, ch'och' qui-oc. Abanan li Jesucristo moco yo'obtesinbil ta. A'an musik'ej ut sa' choxa quichal chak. ⁴⁸ Jo'can nak chikajunilo arin sa' ruchich'och' yal tibelo jo' laj Adán. Ut nak tocuaclik cui'chic chi yo'yo, laako chic musik'ej jo' li Cristo li quichal chak sa' choxa.

⁴⁹ Anakcuan cuan katibel jo' li re laj Adán. Li tibeley a'an ch'och' oquenak. Abanan sa' jun cutan laako chic jo' li Cristo li quichal chak sa' choxa. ⁵⁰ Ex inherman, li nacuaj xyebal ere, a'an a'in: li katibel ut li kaquiq'uel inc'a' taqc sa' lix nimajcual cuanquilal li Dios xban nak a'an nak'a. Li bar cuan nak'a inc'a' naru tarechani lix nimajcual cuanquilal li Dios xban nak a'an inc'a' nak'a. ⁵¹ Nacuaj ajcui' nak tənau lix yəlal li mukmu nak quicuan chak junxil. A'an a'in: moco chikajunilo ta ləo aj pəbanel tocampk, abanan chikajunilo tojalanok'. ⁵² Sa' roso'jic li cutan nak təaec'ank chak li trompeta, tojalanok' sa' junpat sa' jun mutz'il u. Nak təaec'ank chak li trompeta eb laj pəbanel li ac camenakeb te'cuaclik cui'chic chi yo'yo ut inc'a' chic te'camk. Ut eb laj pəbanel li toj yo'yoqueb te'jalanok'. ⁵³ Li katibel arin sa' ruchich'och' nak'a. Tento nak tajalak re nak inc'a' chic təak. Ut li kayu'am li na-oso' sa' ruchich'och' tajalak riq'uin jun ac' yu'am inc'a' chic təosok'. ⁵⁴ Nak acak xjalano' li katibel li nak'a, ut nak acak xjalano' li kayu'am li na-oso', aran tatz'aklok ru li quitz'ibaq chak najter xbaneb li profeta nak que'xe chak chi jo'ca'in:

Sachbil xcuauquil li camc chi junaj cua xban nak xnumta xcuauquil li Cristo sa' xben. (Is. 25:8)

⁵⁵ Li camc mac'a'ak chic xcuauquil sa' kabən.

Mac'a' chic li raylal takac'ul xban li camc. (Os. 13:14)

⁵⁶ Xban nak cuan li mac, jo'can nak cuan li camc. Nak mac'a'ak chic li mac, mac'a'ak chic li camc. Ut li chak'rab mac'a'ak chic xcuauquil sa' kabən.

⁵⁷ Jo'can ut chikabantioxi re li Dios nak mac'a' chic xcuauquil li camc sa' kabən sa' xc'aba' li Kacua' Jesucristo. ⁵⁸ Jo'can ut ex inherman, raroquex inban, cauhak taxak ech'ol sa' le pabal. Mich'inan le ch'ol. Cheq'uehak ban ech'ol chi c'anjelac chiru li Kacua'. Ut chenauhak nak li jo' q'ual təbanu sa' xc'aba' li Kacua' cuan rajbal.

16

Li xtenk'anquileb laj pəbanel li cuanqueb Jerusalén

¹ Anakcuan nacuaj xyebal ere chanru təbanu riq'uin li tumin li yoqueb chixxochbal re xtenk'anquileb le rech aj pəbanelil li cuanqueb aran Jerusalén.

Jo' xinye reheb laj pabanel aran Galacia, jo'can ajcui' tinxic ere laex. ² Rajlal xaman, sa' li xben cutan re li xaman, chejunjunkalex teq'ue li jo' q'ual texruk a' yal jo' nimal le tojbal tec'ul. Ut li tumin a'in ac xochilak eban nak tincuulak eriq'uin re nak inc'a' yokex chi xococ tumin nak tincuulak lajin. ³ Ut tesic'ruhebli ani te'xic Jerusalén chixcanabanquil li tumin. Ut nak tincuulak eriq'uin, tintz'iba li hu te'xc'am nak te'xic Jerusalén chixk'axtesinquil li tumin reheb laj pabanel. ⁴ Cui naxq'ue rib nak tinxic lajin, cuochbeneb nak toxic.

Laj Pablo yo chixcauresinquel lix xiquic Corinto

⁵ Nak tinxic eriq'uin, xben cua toxinnumek' Macedonia. ⁶ Mare tinbayk ca'ch'inak eriq'uin. Mare toj tinnumsi li habalk'e eriq'uin re nak cuank sa' ech'ol nak tinetenk'a chi xic toja' yal na bar tinxic. ⁷ Inc'a' nacuaj nak yal numec' cue nak tincuulak eriq'uin. Nacuaj ban tincuank jarubak cutan eriq'uin cui jo'can naraj li Kacula' Dios. ⁸ Abanan toj tinnumsi li nink'e Pentecostés arin Efeso tojo'nak tinxic eriq'uin. ⁹ Yo chi elc chi us lin c'anjal arin xban nak nabaleb neque'raj rabinquil resil li colba-ib. Abanan cuan ajcui' li xic' neque'rabi resil li colba-ib. ¹⁰ Cui tacuulak laj Timoteo eriq'uin, chec'ulak chi sa' sa' ech'ol re nak sahak sa' xch'ol a'an ut mac'a'ak xc'a'ux nak cuank sa' eyank. A'an yo chi c'anjelac chiru li Kacula' jo' nak ninc'anjelac lajin. ¹¹ Jo'can ut ma ani chitz'ektanank re. Chetenk'a riq'uin li c'a'ru re, re nak tachalk cui'chic cuiq'uin sa' xyalal. Lain yoquin chiroybeninquil nak tachalk cui'chic cuiq'uin rochbeneb li herman. ¹² Nabal sut xintz'ama chiru li hermano Apolos nak taxic eriq'uin rochbeneb li herman. Abanan a'an quirec'a sa' xch'ol nak toj maji' taruk chi xic. Nak tixq'ue rib tacuulak aran cheribal.

Laj Pablo naxrak lix hu

¹³ Mich'inan ech'ol sa' le pabal. Cauhak taxak ech'ol chi pabanc ut meq'ue erib chi alec. Yo'on cuankex ut chepabak li Kacula' chi anchal ech'ol, usta nachal raylal sa' eben. ¹⁴ Ut chixjunil li c'a'ru tebanu, chebanuhak chi anchal ech'ol xban nak nequera le ras eritz'in. ¹⁵ Ex inherman, laex ac nequenau nak laj Estéfanas ut li rixakil jo'queb ajcui' li ralal xc'ajol, a'aneb li xben que'pabán aran Acaya. Eb a'an que'xq'ue xch'ol chi c'anjelac chiruheb li rech aj pabanelil. ¹⁶ Jo'can nak tintz'ama cheru nak tex-abink chiru laj Estéfanas jo'queb ajcui' chixjunileb li neque'tenk'an ut neque'c'anjelac sa' eyank. ¹⁷ Nasaho' sa' inch'ol nak xe'culun cuiq'uin laj Estéfanas ut laj Fortunato ut laj Acaico. Eb a'an xe'tenk'an cue chok' eruchil laex nak ma anihex cuiq'uin. ¹⁸ Que'xq'ue xcacuileb inch'ol. Chanru nak xexten'ac laex xbaneb, jo'can ajcui' nak xine'xtenk'a lajin. Jo'can nak che-oxlok'iheb li herman a'an. ¹⁹ Chixjunileb laj pabanel li cuanqueb Asia neque'xtakla xsahil ech'ol sa' xc'aba' li Kacula'. Neque'xtakla ajcui' nabal xsahil ech'ol eb li herman laj Aquila ut llix Priscila. Ut neque'xtakla ajcui' nabal xsahil ech'ol chixjunileb laj pabanel li neque'xch'utub rib sa' rochoch laj Aquila. ²⁰ Chixjunileb laj pabanel li cuanqueb arin neque'xtakla xsahil ech'ol. Ut jo'can ajcui' laex, cheq'uehak xsahil ech'ol cheribil erib riq'uin santil utz'uc u. ²¹ Lain laj Pablo. Riq'uin cuuk' yoquin chixtz'ibanquil li atin a'in re xq'uebal xsahil ech'ol. ²² Li Kacula' Jesucristo chi seb tachalk. Cui' cuan junak sa' eyank inc'a' naxra li Jesucristo, chi chalc ta raylal sa' xben. ²³ A' taxak li rusilal li Kacula' chicuank eriq'uin. ²⁴ K'axal nequexinra chejunilex xban nak junajo chic sa' xc'aba' li Kacula' Jesucristo. Jo'can taxak.

Li Xcab Hu li Quixtz'iba li San Pablo reheb laj Corinto

Xq'uebal xsahileb xch'ol

¹ Lain laj Pablo. Sic'bil cuu xban li Dios chok' x-apóstol li Jesucristo xban nak jo'can quiraj li Dios. Cuochben laj Timoteo li kech aj pabanelil. Yoquin chixtz'ibanquil li hu a'in eriq'uin laex aj pabanel li cuanqueb sa' li tenamit Corinto ut reheb ajcui' chixjunileb laj pabanel li cuanqueb sa' chixjunil li na'ajej Acaya. ² Chicuank taxak eriq'uin li usilal ut li tuktuquilal li nachal chak riq'uin li Dios li kaYucua' ut riq'uin li Kacua' Jesucristo.

Laj Pablo nabantioxin chiru li Dios

³ Lok'oninbil taxak li Dios lix Yucua' li Kacua' Jesucristo. Li Dios, a'an li kaYucua' ut junelic naruxtana ku ut naxc'ojob kach'ol. ⁴ Naxc'ojob kach'ol sa' chixjunil li karaylal re nak taruk takac'ojob xch'oleb li cuanqueb sa' raylal. Jo'nak naxc'ojob kach'ol li Dios lao, jo'can ajcui' nak takac'ojob xch'oleb li cuanqueb sa' raylal. ⁵ Jo'nak nocotz'akon riq'uin li q'uila raylal li quix'ul li Cristo, jo'can ajcui' nak nac'ojobac kach'ol xban li Cristo, re nak naru takac'ojob xch'oleb li kech aj pabanelil. ⁶ Lao nocorahobtesic re nak laex texcolek' ut tac'ojobak ech'ol. Naxc'ojob kach'ol li Dios re nak lao takac'ojob ech'ol laex nak yoquex chixcuybal xnumsinquil li raylal jo'li nakacuy lao. ⁷ Lao nakanau nak cau ech'ol sa' le pabal. Nakanau nak tec'ul li raylal jo' yoco chixc'ulbal lao. Abanan nakanau ajcui' nak tac'ojobak ech'ol nak yokech chixc'ulbal li raylal jo'nak nac'ojobac kach'ol lao. ⁸ Ex inherman, nacuaj nak tenau jo' q'ual li raylal xkac'ul sa' li na'ajej Asia. K'axal ra xkac'ul chak ut xkac'oxla nak inc'a' chic takacuy xnumsinquil. Lao xkac'oxla nak inc'a' chic toe'xcanab chi yo'yo. ⁹ Xkac'oxla nak ac tenebanbil camc sa' kaben. Us ajcui' nak quikac'ul chi jo'can re nak cuank xcacuial kach'ol riq'uin li Dios li nacuaclesin re li camenak chi yo'yo ut inc'a' takac'oxla nak cuan xcacuial kach'ol kajunes kib. ¹⁰ Li Dios, a'an li quicoloc chak ke chiru li camc nak corahobtesic. Ut nakanau chi tz'akal nak a'an tacolok ke chi junelic. ¹¹ Abanan nakatz'ama ajcui' cheru nak junelic textijok chikix. Cui nabaleb li neque'tijoc chikix, nabaleb ajcui' li te'bantioxink chiru li Dios nak torosobtesi. ¹² K'axal nasaho' kach'ol xban nak nakanau nak sa' tiquilal nococuan sa' ruchich'och'. Ut chi anchal kach'ol xocuan sa' tiquilal nak xocuan eriq'uin laex. Moco xban ta nak cuan kana'leb kajunes lao nak cuanco sa' tiquilal. Li Dios ban natenk'an ke riq'uin lix nimal ruxt'an. ¹³ Moco sa' jaljoquil ru atin ta nintz'jba eriq'uin. Tz'akal re ru li nintz'jba. Nacuaj nak tetau ru chi tz'akal li nintz'jba eriq'uin chichuix lajin. ¹⁴ Cuan tana li xetau ru ut cuan tana inc'a'. Abanan nacuaj nak tetau ru chi tz'akal nak lain x-apóstol li Jesucristo re nak sahak sa' ech'ol cuiq'uin nak tol-elk li Jesucristo ut sahak ajcui' inch'ol lain eriq'uin laex. ¹⁵ Ca'sut raj xinc'oxla numec' eriq'uin xban nak ninnau nak xinec'ul raj chi sa sa' ech'ol. Jo'can nak xinnume' raj eriq'uin nak xinchal arin Macedonia. ¹⁶ Ut ninc'oxla numec' eriq'uin nak tinsuk'ik. Ut ninnau nak tinetenk'a laex chi xic aran Judea. ¹⁷ ¿C'a'ru nequec'oxla chirix a'in? ¿Ma inc'a' ta bi' ninc'oxla chi us li c'a'ru ninye? ¿Ma yal xcab rix inch'ol ta bi' li c'a'ru yoquin chixbanunquil? ¿Ma hon ta bi' ninye us ut junpat chic tinye inc'a' jo' neque'xbanu li maji' neque'xpab li Cristo? ¹⁸ Li Dios naxnau nak inc'a' yoquin chixyebal ere us cui nacuec'a

nak inc'a' t̄arūk tinbanu. ¹⁹ Li Jesucristo li Ralal li Dios mā jun sut quixye us cui a'an naxnau nak inc'a' tixbanu. A'an junelic yal li c'a'ru naxye. Ut lain cuochbeneb laj Silvano ut laj Timoteo nakach'olob xyalal li Cristo cheru laex. ²⁰ Chixjunil li yechi'imbil ke xban li Dios, nakac'ul sa' xc'aba' li Jesucristo. Jo'can nak sa' xc'aba' li Jesucristo nakaye "jo'can taxak" re xq'uebal xlok' al li Dios. ²¹ Sa' xc'aba' li Jesucristo, li Dios naxq'ue xcacuilal kach'ol sa' li kapabal lao jo' ajcui' laex. Ut a'an ajcui' quisic'oc chak ku re nak toc'anjelak chiru. ²² Ut li Dios quixtakla chak li Santil Musik'ej chi cuanc kiq'uin chok' retalil nak reho chic. Xban nak li Santil Musik'ej cuan kiq'uin, nakanau chi yal nak takac'ul chixjunil li quixyechi'i ke. ²³ Lain inc'a' xcuaj ekl'usbol. Jo'can nak inc'a' xcojin eriq'uin aran Corinto. Li Dios naxnau nak yal li yoquin chixyebal. ²⁴ Moco yoco ta xminbal eru sa' le pabal. Ac cau ech'ol sa' le pabal. Yoco ban ch̄etenk'anquil re nak sahak ech'ol sa' le pabal.

2

¹ Jo'can nak xinc'oxla nak toj maji' chic tinxic eriq'uin xban nak inc'a' nacuaj xq'uebal xrahil ech'ol. ² Cui inmac lain nak tarahok' ech'ol, zani ta chic taq'uehok xsahil inch'ol lain xban nak ca'aj cui' laex nequeq'ue xsahil inch'ol? Cui ta xincuulac eriq'uin xinq'ue raj xrahil ech'ol. ³ Jo'can nak xintz'iba li hu li xintakla eriq'uin. Inc'a' xcojin eriq'uin xban nak inc'a' xcuaj xraho' inch'ol eban laex li xeq'ue raj xsahil inch'ol. Ninnau nak nasaho' ajcui' ech'ol laex cui sa sa' inch'ol lain. ⁴ Nak xintz'ibac eriq'uin xinyot'e' ut xinyabac xban nak xraho' sa' inch'ol. Inc'a' xintz'ibac eriq'uin re xq'uebal xrahil ech'ol. Re ban nak t̄enau nak k'axal raroquex inban.

Checuyak xmac li quixbanu li inc'a'us

⁵ Li ani quixq'ue xrahil inch'ol xban li inc'a' us quixbanu, moco ca'aj cui' lain ta quixq'ue xrahil inch'ol. Quixq'ue aj ban cui' xrahil ech'ol laex. Aban mare cuan ajcui' inc'a' quiraho' xch'ol xban. Abanan ninnau nak cuan ajcui' que'raho' xch'ol xban. Inc'a' nacuaj xk'usbol chi k'axal cau. ⁶ Tz'akallix k'usbol li yo chixc'ulbal eriq'uin. ⁷ Us cui tecuy xmac anakcuan ut tec'ojob xch'ol xban nak naru nach'inan cui'chic xch'ol. ⁸ Nintz'ama cheru nak chec'utak chiru nak nequera. ⁹ Xban a'an nak xintz'ibac eriq'uin junxil. Ut xintz'ibac ajcui' xban nak nacuaj xnaubal ma tebanu chixjunil li c'a'ru ninye ere. ¹⁰ Cui tecuy xmac a'an lain tincuy ajcui' xmac. Li ani tecuy xmac laex, tincuy ajcui' xmac lain. Cui ani nincuy xmac, a'an ninbanu re etenk'anquil ajcui' laex. Ut li Cristo naxnau nak ninbanu chi anchal inch'ol. ¹¹ Takacuy xmac re nak laj tza inc'a' tanumtak sa' kab'en xban nak chikajunilo ac nakanau nak a'an cuan xna'leb chi balak'ic.

Laj Pablo ra sa' xch'ol xban nak mā ani laj Tito aran Troas

¹² Nak quincuulac sa' li tenamit Troas chi c'anjelac chiru li Kacua', k'axal que'xq'ue xch'ol chirabinquil nak quinch'olob xyalal li colba-ib sa' xc'aba' li Jesucristo. ¹³ Abanan nak quincuulac Troas quiraho' inch'ol xban nak mā ani aran li kaherman Tito chixyebal cue chanru cuanquex. Jo'can nak quinchak'rabiheb ut quinc'ulun arin sa' li na'ajej Macedonia.

Lao taklanbilo xban li Dios chixch'olobanquil xyalal chirix li Jesucristo

¹⁴ Nakabantioxi re li Dios xban nak yalak bar nocoxic li Cristo nac'amoc be chiku ut naxq'ue kacuanquil chi elc chi us riq'uin chixjunil. Nak nakach'olob xyalal li Cristo, chanchan xboc li sununquil ban li naxic yalak bar. ¹⁵ Chanchano li sununquil ban li quixmayeja li Cristo chiru li Dios. Lix boc nacuulac riq'uineb li neque'cole' ut nacuulac ajcui' riq'uineb li

neque'sach. ¹⁶ Chiruheb li neque'sach chanchan xchuhil li camenak li nacamsin. Abanan chiruheb li neque'cole' chanchan jun sununquil ban li naq'uehoc yu'am. ¿Ani tz'akal cuan xna'leb chixch'olobanquil li xyalal li colba-ib? ¹⁷ Ca'aj cui' lao li taklanbilo xban li Dios. Chi anchal kach'ol nococ'anjelac chiru li Dios sa' xc'aba' li Cristo xban nak reho chic. Moco juntak'eto ta riq'uineb li jun ch'ol chic li inc'a' neque'xq'ue xlok'al li ratiñ li Dios. Chanchaneb aj yaconel nak neque'xsic' xtumineb riq'uin xyebal li ratiñ li Dios.

3

Li xyalal chirix li ac' contrato

¹ ¿Ma yoquin ta bi' chixnimobresinqul cuib nak neque'oxla laex nak ninye nak laín aj c'anjel chiru li Dios? ¿Ma tento ta bi' nak cuank li kahu jo' neque'xbanu li jun ch'ol chic re xyebal resil aniheb re nak tēpab li c'a'ru neque'xye? ¿Ma naru ta bi' takapatz' li kahu ere laex? ² Laex chanchanex li kahu tz'ibanol sa' li kach'ol ut chixjunileb naru te'ril. Nak te'ril le chabilal te'xq'ue retal nak chabil li kac'anjel. ³ Le yu'am laex chanchan jun li hu tz'ibanol xban li Cristo. Ut lao xkach'olob li xyalal cheru. Li hu a'in moco tz'ibanol ta chiru pec chi moco tz'ibanol ta riq'uin tinta. Tz'ibanol ban sa' le ram xban lix Musik' li yo'yoquil Dios. ⁴ Naru nakaye a'in xban nak cau kach'ol riq'uin li Dios sa' xc'aba' li Jesucristo. ⁵ Ma jun c'anjel naru nakayo'ob kajunes, chi moco naru nakac'oxla xbānunquil. Li Dios ban naxq'ue kacuanquil chixbanunquil li c'a'ru nakabalu. ⁶ Li Dios naxq'ue kacuanquilal chixch'olobanquil li xyalal li ac' contrato, li natauman cui' li ac' yu'am. Li ac' yu'am inc'a' natauman riq'uin xbānunquil li c'a'ru tz'ibanol sa' li chak'rab xban nak li chak'rab naxteneb li cāmc sa' kabén. Li ac' yu'am q'uebil ke xban li Santil Musik'ej. ⁷ Li chak'rab li quiq'uehe' re laj Moisés tz'ibanol chiru pec ut quic'utun xlok'al li Dios nak quixq'ue li chak'rab a'in. Quilemtz'un li rilobal laj Moisés ut eb laj Israel inc'a' que'xcuy rilbal usta junpat ajcui' quicuan sa' li rilobal laj Moisés lix lok'al li Dios. Li najter chak'rab a'in li quic'amoc chak re li cāmc sa' kabén quic'ulun riq'uin xlok'al li Dios. ⁸ Abanan k'axal numtajenak cui'chic xlok'al li c'anjel li naxbanu kiq'uin li Santil Musik'ej. ⁹ Cui cuan xlok'al li najter chak'rab li quic'amoc chak li tojba mac sa' kabén, k'axal cui'chic numtajenak xlok'al li ac' yu'am li naxq'ue ke li Santil Musik'ej li naq'uehoc xtiquilal li kach'ol chiru li Dios. ¹⁰ Li chak'rab cuan xlok'al junxil. Abanan inc'a' naxtau xlok'al li ac' yu'am xban nak numtajenak cui'chic xlok'al. ¹¹ Cui cuan xlok'al li najter chak'rab li quinume' xcuauquil, k'axal cui'chic nim xlok'al li ac' yu'am li cuan chi junelic. ¹² Xban nak nakanau nak lix lok'al li ac' yu'am mac'a' roso'jic, jo'can nak k'axal cau kach'ol chixch'olobanquil li xyalal ut mac'a' nakamuk cheru. ¹³ Inc'a' nakabalu jo' quixbanu laj Moisés najter nak quixtz'ap li rilobal riq'uin t'icr re nak eb laj Israel inc'a' te'ril nak yo chi elc lix lok'al. ¹⁴ Xban xcacuila xch'oleb inc'a' que'xtau ru nak lix lok'al li najter chak'rab taelk. Ut chalen anakcuan inc'a' ajcui' neque'xtau ru. Chanchan nak li t'icr a'an toj yo chi ramoc chiruheb li xyalal nak neque'rabi li najter chak'rab. Ut li t'icr a'an na-el ca'aj cui' riq'uin xpābanquil li Cristo. ¹⁵ Chalen anakcuan nak neque'rabi lix chak'rab laj Moisés, chanchan nak junak t'icr naramoc re li xyalal chiruheb ut inc'a' neque'xtau ru. ¹⁶ Abanan li t'icr a'an na-el nak junak tixpab li Kacua' Jesucristo. ¹⁷ Ut li Kacua', a'an ajcui' li Santil Musik'ej. Li ani cuan li Santil Musik'ej riq'uin, a'an moco cuan ta chic rubel xcuauquil li chak'rab chi moco li mac. Libre ban chic cuan. ¹⁸ Lao aj pābanel moco

tz'aptz'o ta li kilobal riq'uin t'icr re xtz'apbal xlok'al li Dios jo' quixbanu laj Moisés. Chanchano ban jun lem nak nakac'ut xlok'al li Kacua'. Ut li Kacua' a'an ajcui' li Santil Musik'ej li nocoxjalnobresi ut naxq'ue kalok'al re nak yoko xc'utbal xlok'al li Cristo.

4

Li c'anjal q'uebil ke xban li Dios k'axal lok'

¹ Yal xban rusilal li Dios nak quixq'ue ke li c'anjal a'in re xch'olobanquil xyalal li ac' contrato. Jo'can nak inc'a' nach'inan kach'ol. ² Nakatz'ektana ch'i junaj cua xbanunquil li mausilal li moco uxc ta naraj li neque'xbanu li jun ch'ol chic. Inc'a' nocobalak'in. Ut inc'a' nakapo' ru li ratin li Dios. Nakach'olob ban chi tz'akal li xyalal re nak chixjunileb te'xq'ue retal nak sa' xyalal cuanco chiru li Dios. ³ Cui inc'a' natauman ru li xyalal li colbaib li nakach'olob lao, a' li inc'a' neque'xtau ru, a'an eb li neque'sach. ⁴ Inc'a' neque'xtau ru xban nak laj tza naramoc re lix y'alal chiruheb li inc'a' neque'paban. Naxbanu a'an re nak inc'a' te'xtau ru li xyalal li colbaib li nac'utuc chiku lix lok'al li Cristo, ut lix lok'al li Dios. ⁵ Inc'a' yoco chixch'olobanquil cheru nak lao toepab. Yoco ban chixch'olobanquil xyalal nak li Jesucristo a'an li Kacua'. Ut lao yal aj c'anjelo cheru sa' xc'aba' li Jesucristo. ⁶ Nak toj k'ojojin chak ru li ruchich'och', li Dios quixye, "Chicuank li cutan re xcutanobresinquil ru li ruchich'och!". Ut a'an ajcui' li nacutanobresin re li kac'a'ux re nak naru takanau chanru lix lok'al li Dios. Ut li Jesucristo naxc'ut chiku lix lok'al li Dios. ⁷ Lao chanchano li ch'och' uc'al li naxocman cui' li terto xtz'ak. Lao yal tz'ejcualo. Abanan li Dios naxcutanobresi li kac'a'ux re nak tac'utunk nak lix nimajcual cuanquilar li Dios li cuan kiq'uin, moco ke ta. Re ban li Dios.

Cauhak kach'ol sa' li kapab'al re nak takacuy xnumsinquil li raylal nakac'ul

⁸ Q'uita pay chi raylal nachal sa' kab'en, abanan nakacuy xnumsinquil. Cuan nak inc'a' nakatau ru li yoco chixc'ulbal abanan inc'a' nach'inan kach'ol. ⁹ Nocorahobtesic, abanan li Dios inc'a' nocoxcanab kajunes. Cuan nak nocoe'xsac' xban nak neque'raj kacamsinquel. Abanan li Dios nacoloc ke chiruheb. ¹⁰ Yalak bar nocoxic cuan ketalil chiru li katibel nak neque'xyl kacamsinquel jo' que'xbanu re li Cristo. Nakacuy a'an re nak tac'utunk chiruheb chixjunileb nak li Cristo yo'yo ut a'an nacoloc ke chiru li c'anc. ¹¹ Junelic neque'raj kacamsinquel xban nak nococ'anjelac chiru li Jesucristo. Abanan inc'a' nocoe'xcamsi xban nak li Cristo yo'yo ut cuan xcuquil sa' kab'en usta yal cujinko. ¹² Abanan xban nak nakacuy li raylal, laex tacuank le yu'am chi junelic. ¹³ Cau kach'ol sa' li kapabal. Jo'ca'in tz'ibabil sa' li Santil Hu li quixye laj David. "Cuan inpabal. Jo'can nak ninatinaq chirix", chan. Jo'can ajcui' lao, cuan ajcui' kapab'al. Jo'can nak nocooatinac chirix. ¹⁴ Nakanau nak li Dios quicuaclesin cui'chic re chi yo'yo li Kacua' Jesucristo. Jo'can ajcui' lao. Nakanau nak toxcuaclesi cui'chic chi yo'yo jo' nak quicuaclesi li Jesucristo ut toxc'am riq'uin kochbenakex laex. ¹⁵ Chixjunil li raylal nakac'ul, a'an re erabal laex re nak tec'ul li rusilal li Dios. Cui nabaleb te'c'uluk re li rusilal li Dios, nabaleb ajcui' te'bantioxink chiru li Dios ut te'xq'ue xlok'al. ¹⁶ Jo'can nak inc'a' nach'inan kach'ol. Li katibel yo'chi lajc, yo'chi osoc'. Abanan li kam ac'obresinbil rajlal cutan xban li Dios. ¹⁷ Li raylal li nakac'ul arin sa' ruchich'och', a'an junpat ajcui' ut nakacuy xnumsinquil. Li raylal nakac'ul, yo'chikacauresinquel re jun li kalok'al mac'a' jo' xchak'al ru ut tacuank chi junelic. ¹⁸ Inc'a' nakaq'ue kach'ol chirix li cuan arin sa' ruchich'och', li na-ilman ru. Nakaq'ue ban kach'ol chirix li cuan aran sa'

choxa, li inc'a' na-ilman ru. Li c'a'ru na-ilman ru nalaj na-oso'. Abanan li inc'a' na-ilman ru cuan chi junelic.

5

Ac' chic li katz'ejcual takac'ul sa' choxa

¹ Li katz'ejcual arin sa' ruchich'och' chanchan jun li ochoch li na-oso'. Lao nakanau nak li katz'ejcual arin sa' ruchich'och' na-oso'. Abanan tacuank chic jun katz'ejcual sa' choxa li tixq'ue ke li Dios. Moco jo' ta li ochoch arin sa' ruchich'och' li na-oso' xban nak yibambil xban cuink. Li katz'ejcual aran sa' choxa inc'a' taosok'. Cuank ban chi junelic. ² Nak cuanco sa' li tz'ejcualej a'in, noco-ayaynac ut nakaj ta ac xkatau li katz'ejcual sa' li choxa li tixq'ue ke li Dios. ³ Macua'ako musik'ej chi mac'a' li katz'ejcual. Tacuank ban li katz'ejcual li tixq'ue ke li Dios. ⁴ Nak cuanco arin sa' ruchich'och' riq'unin li katz'ejcual a'in, noco-ayaynac xban li raylal nakac'ul. Inc'a' raj chic nakaj li katz'ejcual li na-oso'. Macua' xban nak nakaj camc. Xban nak nakaj ta ac xkatau li katz'ejcual sa' choxa li tacuank chi junelic. ⁵ A' li Dios a'an li coxcaresi re nak naru takac'ul li katz'ejcual sa' choxa. Ut quixq'ue ke li Santil Musik'ej re nak takanau chi tz'akal nak takac'ul li c'a'ru naxyechi'i ke. ⁶ Jo'can nak junelic cau kach'ol riq'unin li Dios nak cuanco sa' ruchich'och'. Nakanau nak jo' najtil cuanco sa' ruchich'och', moco cuanco ta chak riq'unin li Kacua' Jesucristo sa' choxa. ⁷ Nak yo'yoco arin sa' ruchich'och', toj maji' nakil ru li Kacua'. Abanan cau kach'ol nak li Kacua' cuan kiq'unin. ⁸ Lain ninye nak cau kach'ol riq'unin li Dios. Nakaj raj camc ut xcanabanquil li katz'ejcual a'in re nak naru toxic sa' choxa chi cuanc riq'unin li Kacua' Jesucristo. ⁹ Jo'can nak junelic nakaq'ue kach'ol chixbanunquil li c'a'ru naraj li Kacua' usta cuanco arin sa' ruchich'och' malaj sa' li Santil Choxa. ¹⁰ Nakanau nak chikajunilo toxkac'ut kib chiru li Cristo re nak a'an tarakok atin sa' kabən. Ut li junjunk tixc'ul lix k'ajcamunquil a' yal chanru lix yehom xbanuhom nak xuan sa' ruchich'och', ma us malaj inc'a' us quixbanu.

Chocuank chi sum atin riq'unin li Dios

¹¹ Jo'can nak nakanxucua ru li Dios ut nakaq'ue kach'ol chixch'olobanquil lix yałal. Ut li Dios naxnau chi tz'akal nak tjc li kach'ol. Ut lajn nacuaj nak tənau ajcui' laex. ¹² Inc'a' yoquin chixyebal a'in ere re xnimobresin-quil cuib. Yoquin ban chixq'uebal enaleb re nak tasahok' ech'ol cuiq'unin ut re nak tənau xsumenquil li yoqueb chixnimobresinquil rib riq'unin lix yehom xbanuhomeb ut inc'a' neque'xq'ue xcuanguard li tiquil ch'olej. ¹³ Cuan neque'yehoc nak inc'a' tuktukajolom. Abanan li c'a'ru nakabənu, a'an re xq'uebal xlok'al li Dios. Cui laex neque'xq'ue xcuanguard li tiquil ch'olej. ¹⁴ Xban nak k'axal nocoxrali Cristo, jo'can nak nakaq'ue kach'ol chi c'anjelac chiru. Nakanau chi tz'akal nak li Cristo quicam sa' kac'aba' ləo chikajunilo. Ut xban nak quicam a'an, chikajunilo camenako chic chiru li mac. ¹⁵ Quicam sa' kac'aba' chikajunilo ləo re nak inc'a' yo'yoko yal chi jo'can chixbanunquil li c'a'ru nakaj kajunes kib. Yo'yoko ban re nak takabənu li c'a'ru naraj li Cristo li quicam ut quicuaci cui'chic chi yo'yo sa' kac'aba' ləo. ¹⁶ Inc'a' chic nakaq'ue retal chanru nak cuanqueb li junjunk sa' ruchich'och'. Anakcuan lao chic aj pabanel ut jalan chic li kana'leb. Junxil nak toj maji' nocopaban inc'a' xkaq'ue xcuanguard li Cristo xban nak xkac'oxla nak yal cuink. Abanan anakcuan nakanau chic lix yalal. ¹⁷ Jo'can ut cui junak xpab li Cristo, ac'obresinbil a'an. Lix yu'am quicuan junxil xnume' ut anakcuan ac' chic lix yu'am. ¹⁸ Chixjunil a'in xkamətani riq'unin li Dios ut a'an ajcui' li quic'amoc ke sa' usilal riq'unin sa'

xc'aba' li Jesucristo. Ut a'an ajcui' li quixakaban ke chixch'olobanquil xyalal li colba-ib re nak cuan li te'pabank ut te'cuank sa' usilal riq'uin li Dios. ¹⁹ A'an a'in li yoquin chixyebal: Li Dios coxc'am cui'chic sa' usilal riq'uin sa' xc'aba' li Cristo. 'Ut inc'a' chic naxq'ue sa' xch'ol li kamac. Li Dios quixk'axtese ke li c'anjel a'in re nak takach'olob xyalal re nak li ani te'pabank te'c'amek' sa' usilal riq'uin li Dios. ²⁰ Jo'can ut nak lao taklanbilo sa' xc'aba' li Jesucristo. Li Dios naxto'oni lix tz'umal ke re nak taqtinak eriq'uin. Sa' xc'aba' li Jesucristo nakatz'ama cheru nak chec'amak erib sa' usilal riq'uin li Dios. ²¹ Li Jesucristo ma jun sut quimacob. Abanan li Dios quixq'ue li kamac sa' xben li Cristo re nak sa' xc'aba' a'an, lao takatau lix tiquilal kach'ol li naxq'ue li Dios.

6

¹ Lao aj c'anjelo chiru li Dios ut a'an natenk'an ke chixch'olobanquil lix yyalal cheru. Laex li ac xec'ul li rusilal li Dios. Nintz'ama cheru nak inc'a' tecanab chi mac'a' rajbal. Cheq'uehak ban xcuankind. ² Jo'ca'in tz'ibanol sa' li Santil Hu: Nak xcuulac xk'ehil, xayaba inc'aba' ut xatcuabi. Sa' xk'ehil xc'ulbal li colba-ib, xatintenka, chan li Dios. (Is. 49:8) Jo'can nak lain ninye ere nak anakcuan xk'ehil xc'ulbal li rusilal li Dios. Anakcuan ajcui' naru texcolek'. ³ Lao inc'a' nakaj xbanunquil li c'a'ak re ru li taramok re chiruheb li ani te'raj pabanc re nak ma' ani taqech'ok rix li c'anjel li yoco chixbanunquil. ⁴ Chixjunil li nakabantu, a'an nac'utuc re nak lao aj c'anjelo chiru li Dios. Nakacuy xnumsinquil chixjunil li raylal, li rahobtesic ut li rahil ch'olejil li nakac'ul. ⁵ Xosaq'ue', xoq'uehe' sa' tz'alam, xe'xtub rib sa' kab'en re kacamsinque, xkatacuasi kib chi c'anjelac, xoyo'lec, ut xkacuy kasa' xban nak mac'a' katzacaemk. ⁶ Riq'uin a'in nequenau nak lao aj c'anjelo chiru li Dios. Sa' tiquilal yoco chixbanunquil. Nakanau li xyalal. Nabal li raylal nakacuy ut cuanco sa' usilal. Li Santil Musik'ej cuan kiq'uin ut chi anchal kach'ol nocorahoc. ⁷ Nakach'olob li xyalal cheru. Chixjunil li nakabantu, nakabantu riq'uin lix cuanquil li Dios. Junak li soldado cuan xch'ich' re pletic sa' lix nim uk' ut cuan xch'ich' sa' lix tz'e re xcolbal rib. Ut li kach'ich' lao, a'an xtiquilal li kach'ol. ⁸ Cuan li neque'xq'ue kalok'al ut cuan ajcui' li neque'xsach kacuanquil. Cuan li neque'hoboc ke ut cuan ajcui' li neque'oxlok'in ke. Ut cuan ajcui' li neque'yehoc re nak lao aj balak'. Abanan lao junelic nocoatinac sa' xyalal. ⁹ Cuan li neque'xbanu jo' li inc'a' neque'xnau ku, abanan chixjunileb neque'xnau ku. Ca'ch'in chic ma' xocam, abanan toj yo'yoco. K'axal ra xkac'ul abanan li Dios inc'a' nocoxcanab chi camsic. ¹⁰ K'axal ra cuanco, abanan junelic sa' kach'ol. Neba'o, abanan nabal neque'xc'ul xbiomal nak nakach'olob chiruheb li xyalal. Mac'a' cuan ke arin sa' ruchich'och', abanan nakanau nak biomo xban nak cuan li rusilal li Dios kiq'uin. ¹¹ Ex herman, laex li cuanquex Corinto, nequexinra. Jo'can nak xinye ere chixjunil li cuan sa' inch'ol. ¹² Lain nequexinra laex, abanan laex nac'utun cheru nak inc'a' niquinera. ¹³ Yoquin chi atinac eriq'uin jo' nak naqtinac junak li yucua'bej riq'uin li ralal xc'ajol. Nintz'ama cheru nak tinera jo' nak nequexinra lain.

Melok'oni chic li yibanbil dios

¹⁴ Mejunaji erib riq'uineb li toj maji' neque'paban. ¿Ma naru ta bi' tacuank sa' comonil li tiquilal riq'uin li mausilal? ¿Ma naru ta bi' tacuank chi sum atin li santilal riq'uin li mac? ¹⁵ ¿Ma naru ta bi' tacuank chi sum atin li Cristo riq'uin laj tza? ¿Ma naru ta bi' te'cuank chi sum atin laj pabanel riq'uineb li toj maji' neque'paban? ¹⁶ ¿Ma xc'ulubeb ta bi' li yibanbil dios nak te'cuank sa' rochoch li yo'yoquil Dios? Mamin taruk. Lain ninye ere nak lao aj pabanelo, lao li rochoch li yo'yoquil Dios. Li Dios, a'an li quixye chi jo'ca'in:

Lain tincuank riq'uineb ut tincuochbeniheb. Lainak lix Dioseb a'an, ut a'anakeb li cualal inc'ajol, chan. (Lv. 26:12)

¹⁷ Ut li Kacua' quixye cui'chic chi jo'ca'in:

Jo'can utan chex-elk sa' xyankeb li neque'xlok'onli yibambil dios. Mebanu chic li neque'xbanu li jun ch'ol chic nak neque'xlok'onli yibambil dios. Checanabak chi' junaj cua ut lain texinc'ul chi sa sa' inch'ol.

¹⁸ Ut lainak chic le Yucua' ut laexak chic li cualal inc'ajol, chan li Kacua' li k'axal nim xcuanquil. (Is. 52:11)

7

¹ Jo'can ut ex inherman, chixjunil a'in yechi'ibil ke lao. Jo'can nak chikacanabak chixjunil li mausilal li namuxuc ru li katibel ut li kam. Xban nak nakaxucua ru li Dios chikaq'ue kach'ol chi cuanc sa' santilal.

Laj Pablo quisaho' sa' xch'ol nak que'xjal xc'a'uxeb laj Corinto

² Nintz'ama cheru nak choera. Mac'a' xkabanu ere. Ma ani xkabanu raylal re ut ma ani xkapo' xch'ol ut ma ani xkabalak'i. ³ Inc'a' xinye a'in re ek'usbal. Ac xinye ere nak junelic nequexinra. Junelic cuankex sa' inch'ol nak yo'yokin ut chalen toj sa' lin camic. ⁴ Cau inch'ol eriq'uin ut nasaho' inch'ol xyebal eresilal. C'ojo'c' inch'ol eban. Usta yoquin chixc'ulbal li raylal, abanan k'axal sa sa' inch'ol. ⁵ Chalen kac'ulunic arin Macedonia ma bar naru nocohilan. Yalak bar nocorahobtesic ut neque'raj pletic kiq'uin. Ut yo ajcui' kac'a'ux cherix laex. ⁶ Abanan li Dios naxc'ojob xch'oleb li raheb sa' xch'ol. Ut a'an quixq'ue xcacuial kach'ol riq'uin lix c'ulunic laj Tito. ⁷ Moco ca'aj cui' ta riq'uin xc'ulunic laj Tito nak quisaho' inch'ol. Riq'uin ban ajcui' rabinquil nak laj Tito sa sa' xch'ol eriq'uin. Quixserak'i ke nak laex teraj rilbal cuu ut quixye cue nak xyot'e' ech'ol nak xraho' inch'ol eban. Ut quixye ajcui' cue nak niquinec'oxla. K'axal cui'chic quisaho' inch'ol chirabinquil a'an. ⁸ Usta xraho' inch'ol junxil nak xraho' ech'ol laex xban li hu quintakla eriq'uin, abanan inc'a' nayot'e' inch'ol nak quintakla xban nak ninnau nak junpat ajcui' xraho' ech'ol xban. ⁹ Anakcuan nasahe' sa' inch'ol. Moco xban ta nak xraho' ech'ol inban. Riq'uin ban nak xyot'e' ech'ol ut xejal ec'a'ux. Xecuy li raylal a'an jo' naraj li Dios. Anakcuan nequeretru nak moco ra ta xkabanu ere. ¹⁰ Cui junak naraho' xch'ol xban li inc'a' us naxbanu, li jun a'an naxtau lix colbal xban nak nayot'e' xch'ol ut naxjal xc'a'ux jo' naraj li Dios. Ut ma ani naraho' xch'ol xban li colba-ib. Abanan cui junak naraho' xch'ol xban li inc'a' us naxbanu ut inc'a' nayot'e' xch'ol, li jun a'an inc'a' naxtau li colba-ib. ¹¹ Q'uehomak retal chanru nak xextenk'ac xban nak xecuy li raylal jo' naraj li Dios. Quixq'ue xcacuial ech'ol sa' le pabal. Anakcuan nequeraj rilbal cuu ut nequeraj xpatz'bal xcuybal le mac. Nachal chic ejosk'il ut exiu xban li inc'a' us li neque'xbanu li cuanqueb sa' eyank. Nequeraj nak laj mac te'xtoj rix lix maqueb. Riq'uin chixjunil a'in nac'utun nak laex mac'a' emac riq'uin li c'a'ru quic'ulman. ¹² Jo'can ut nak xintz'iba li hu a'an inc'a' xinbanu sa' xc'aba' li quibanan mausilal chi moco sa' xc'aba' li quic'uluc raylal. Xinbanu ban re nak chic'utunk chiru li Dios nak c'ojo'c' ech'ol cuiq'uin. ¹³ Xban nak xebanu li c'a'ru xinye ere, quic'ojla lin ch'ol. Ut k'axal cui'chic nasahe' lin ch'ol riq'uin lix sahil xch'ol laj Tito eriq'uin laex nak xeq'ue xcacuial xch'ol. ¹⁴ Nequenau nak junelic ninye ere li xyalal. Ut inc'a' xinc'ut inxutan nak xinye re laj Tito nak laex chabilal xban nak x-el ajcui' chi yal li c'a'ru xinye re laj Tito nak xec'ut le chabilal chiru. ¹⁵ Ut laj Tito k'axal cui'chic nequexra nak najultico' re chanru nak xec'ul a'an sa' xyalal ut xeq'ue xcuanquil nak xebanu li c'a'ru quixye ere. ¹⁶ Nac'ojla inch'ol riq'uin li c'a'ru nequebanu ut sa inch'ol eriq'uin.

8

Chosihink chi sa sa' kach'ol

¹ Anakcuan, ex inheman, nacuaj nak tinserak'i ere chanru nak li Dios riq'uin xnimal ruxtan yo chixtenk'anquileb laj pabanel li cuanqueb Macedonia chixbanunquil li usilal. ² Quiyale' rix lix pabaleb xban li q'uila raylal xe'xc'ul. Abanan numtajenak lix sahil xch'oleb. Usta k'axal neba'eb, abanan chanchan biomeb xban nak nabal xe'ksi re xtenk'anquileb li rech aj pabanelil. ³ Lain ninnau nak que'xq'ue li jo' q'ual que'ru xq'uebal ut toj que'xq'ue cui'chic xtz'akob chi anchaleb xch'ol. ⁴ Qui-ala sa' xch'oleb tenk'anc. Ut que'xye ke nak chi anchaleb xch'ol que'raj xtenk'anquileb li rech aj pabanelil li cuanqueb Jerusalén. ⁵ Inc'a' xkac'oxla nak nabal ta te'xq'ue. Que'xk'axtesi rib chiru li Dios ut que'xyechi'i ajcui' rib chikatenk'anquil jo' naraj li Dios. ⁶ Jo'can nak xkatz'ama chiru laj Tito nak taxic cui'chic eriq'uin re nak textenk'a xchoybal li c'anjal xetiquib xban xchabilal ech'ol. A'an ajcui' li quitiquiban re xxocbal li mayej a'in. ⁷ Laex cau ech'ol sa' le pabal. Nequenau li xyalal ut nequenau xch'olobanquil li yal. Nequeq'ue ech'ol chi c'anjelac jo' naraj li Dios, ut nocoera. Jo'can nak nakatz'ama cheru nak cheq'ue le mayej chi anchal ech'ol. ⁸ Lain inc'a' yoquin xminbal eru. Yoquin ban chixyebal ere chanru nak eb laj Macedonia neque'xq'ue xmayej chi anchaleb xch'ol ut nacuaj ajcui' xnaubal ma chi anchal ech'ol nequexrahoc laex. ⁹ Laex ac nequenau nak k'axal nim li rusilal li Kacua' Jesucristo. A'an quixcanab chak lix biomal sa' choxa ut quicuan sa' neba'il arin sa' ruchich'och' yal eban laex. Quixbanu chi jo'ca'in yal re nak laex tec'ul li biomal li naxq'ue li Dios. ¹⁰ Nacuaj xyebal ere c'a'ru ninc'oxla chirix le mayej. Us cui techoy xbanunquil li xetiquib jun haber. Laex li xben li queye nak textenk'ank. Ut laex ajcui' li xben li quetiquib xbanunquil. ¹¹ Jo'can nak us cui techoy xbanunquil li xetiquib junxil. Chi anchal ech'ol xetiquib tenk'anc. Anakcuan teq'ue li jo' nimal jo' ch'inhal naxq'ue rib cheru. ¹² Li ani na-ala sa' xch'ol xq'uebal xmayej, li Dios naxc'ul lix mayej a' yal jo' nimal cuan chiru. Li Dios inc'a' naxpatz' li mac'a' chiru. ¹³ Inc'a' yoquin chixyebal a'in re nak li jun ch'ol te'tenk'ak chi nabal ut laex texcanak chi mac'a' chic cuan ere. Nacuaj ban nak cuank'ere laex ut cuank'ajcui' reheb li jun ch'ol chic re nak ma ani tacanak chi mac'a' cuan re. ¹⁴ Anakcuan riq'uin li jo' q'ual cuan ere, chetenk'aherb li mac'a' cuan reheb. Mare sa' jun cutan mac'a' cuank'ere laex ut a'an eb chic te'tenk'ank'ere riq'uin li jo' q'ual cuan reheb a'an. ¹⁵ Jo'ca'in tz'ib'anbil sa' li Santil Hu chirix li maná li quixq'ue li Dios: Li ani quixxoc nabal, mac'a' qui-ela'an chiru. Ut li ani ca'ch'in quixxoc, quitz'akloc ajcui' chiru. (Ex. 16:18)

Laj Tito quitaklac chixtenk'anquileb laj Corinto

¹⁶ Ninbantioxi chiru li Dios xban nak laj Tito naxq'ue xch'ol chetenk'anquil jo' nak ninq'ue inch'ol lain. ¹⁷ Quintz'ama chiru laj Tito nak taxic eriq'uin ut quixc'ul xch'ol. Toj maji' ajcui' nintz'ama chiru nak a'an ac x-ala sa' xch'ol nak taxic eriq'uin. ¹⁸ Yoco chixtaklanquil jun chic li herman eriq'uin rochben laj Tito. A'an na'no ru xbaneb chixjunileb laj pabanel yalak bar xban nak chabil li c'anjal naxbanu re xch'olobanquil li xyalal li colbab. ¹⁹ A'an li quixakabac xbaneb laj pabanel re taxic chikix nak toxic chixcanabanquil li maqtan a'in. Li maqtan a'in, a'an re xq'uebal xlok'al li Kacua' ut re nak te'xnau li kech aj pabanelil nak nakaj xtenk'anquileb. ²⁰ Yoco chixbanunquil li c'anjal a'in chi us re nak ma ani tacuech'ok rix li kac'anjal nak toxic chixcanabanquil li nimla matan a'in. ²¹ Nakaq'ue kach'ol chixbanunquil li c'a'ru us; moco ca'aj cui' ta chiru li Dios. Chiruheb aj ban cui'

li cujink. ²² Ut yoco chixtaklanquil jun chic li kaherman chirixeb. Q'uila cua xkaq'ue retal nak naxq'ue xch'ol chixbanunquil li c'a'ak re ru re xtenk'anquil li rech aj pabanelil. Xban nak a'an cau xch'ol eriq'uin, jo'can nak sa xch'ol chi xic eriq'uin. ²³ Cui ani te'patz'ok chirix laj Tito, teye reheb nak a'an cuech aj c'anjelil. Cuochben chetenk'anquil. Ut eb li cuib chic chi herman, a'an taklanbileb xbaneb laj pabanel. Xban nak tiqueb xch'ol sa' lix pabal, neque'xq'ue xlok'al li Cristo. ²⁴ Nak te'cuulak eriq'uin chec'ulakeb sa' xyalal. Chec'ut chiruheb nak nequera le rech aj pabanelil. Chi jo'can yalak bar taq'uehek' retal nak ya'l li chabil esil li xinye cherix.

9

¹ Inc'a' tento tintz'ibak eriq'uin chirix li matan li tetakla riq'uineb laj pabanel aran Jerusalén. ² Ninnau nak chi anchal ech'ol nequeraj xtenk'anquileb. Ut xinye eresilal reheb laj Macedonia. Xinye chi jo'ca'in: Laj pabanel li cuanqueb Acaya chalen jun haber qui-ala sa' xch'oleb xtenk'anquileb li rech aj pabanelil, chanquin reheb. Ut xban nak laex yoquex chixq'uebal ech'ol chi tenk'anc eb a'an te'raj ajcui' tenk'anc. ³ Ut yoquin chixtaklanquileb li herman a'in eriq'uin re nak textenk'a chixcauressinquil le mayej re nak ta'elk chi yal li c'a'ru xinye cherix. ⁴ Cui maji' cauresinbil le mayej nak tincuulak cuochbeneb li herman aj Macedonia, tec'ut inxutan lain xban nak ac xinserak'i reheb nak cauresinbil le mayej ut tec'ut ajcui' exutan laex. ⁵ Jo'can nak xinc'oxla nak us xataklanquileb li herman xben cua nak toj maji' ninxic lain. Textenk'a xcauresinquil li mayej li xeyechi'i. Ut nak tincuulak, ac xocbilak eban, re nak ta'utunk nak moco minbil ta eru chixq'uebal. Xeq'ue ban xban nak nequeraj xbanunquil. ⁶ Cheq'uehak retal li na'leb a'in: li ani ca'ch'in narau, ca'ch'in ajcui' li tixk'ol. Ut li ani nabal narau, nabal ajcui' tixk'ol. ⁷ Li junjunk tixq'ue li jo' q'ual taalak sa' xch'ol xq'uebal. Inc'a' tixq'ue chi ra sa' xch'ol, chi moco minbilak ta ru xban nak li Kacua' naxra li ani naxq'ue chi sa sa' xch'ol. ⁸ Nim xcuanylil li Dios. Ut a'an tixq'ue ere chixjunil re nak junelic tatz'aklok ere li c'a'ak re ru nac'anjelac ere ut re ajcui' nak taruk textenk'anq' uin chixjunil li chabil c'anjel. ⁹ Jo'ca'in tz'ibanol sa' li Santil Hu: Li ani naxtenk'a li neba' chi anchal xch'ol, lix chabil a'an cuan chi junelic. (Sal. 112:9) ¹⁰ Li Dios junelic naxq'ue li iyaj re laj acuinel ut naxq'ue li kacua. Ut a'an tixq'ue ajcui' li c'a'ru ta'c'anjelak ke. Ut tixq'ue rekaj ut tixtambresi a'yal chanru nocoshin. ¹¹ Li Dios junelic naxq'ue chi nabal li c'a'ru ere re nak taruk tetenk'aheb chi anchal ech'ol li mac'a cuanqueb re. Ut nabaleb ajcui' li te'bantioxink chiru li Dios riq'uin li matan li xetakla chickix. ¹² Macua' ca'aj cui' xtenk'anquileb li herman yoquex nak nequebanu li usilal a'in. Yoquex ban ajcui' xq'uebal xlok'al li Dios xban nak eb li herman neque'bantioxin chiru li Dios eban laex. ¹³ Ut neque'xq'ue ajcui' xlok'al li Dios xban nak cau ech'ol laex sa' le pabal. Moco ca'aj cui' ta riq'uin nak nequeye nak nequexpaban nak nac'utun le pabal. Nac'utun ban ajcui' xban nak neque'q' ue ech'ol chixtenk'anquileb li mac'a cuanqueb re. Ut chi jo'can nequetenk'a chixjunileb laj pabanel. ¹⁴ Te'xq'ue retal nak lix nimal rusilal li Dios cuan eriq'uin. Jo'can nak laex raroquex xbaneb li herman ut te'tijok cherix. ¹⁵ Bantiox re li Dios nak quixq'ue ke li matan li k'axal numtajenak xlok'al. Ut li matan a'in, a'an li Kacua' Jesucristo.

10

Laj Pablo naxch'olob xyalal lix cuanquil q'uebil re xban li Dios

¹ Anakcuán cuan c'a'ak re ru nacuaj xyebal ere chirixeb li neque'atínac chichuix. Cuan li neque'yehoc chi jo'ca'in: Laj Pablo tulán nak cuan eriq'un; abanan nak mañ aní sa' eyank jalan chic líx na'leb ut nak natz'ibac chak eriq'un, k'axal cau naqtinac, chanqueb chichuix. Ut lain nintz'ama cheru nak chexc'oxlak bayak chirix li Jesucristo. A'an tulan ut k'un xch'ol. ² Jo'can nak inc'a' nacuaj atínac chi cau. Usan cui nak tincuulak eriq'un inc'a' tento nak toj tinatinak eriq'un chi cau. Lain naru ajcui' nequebinsume li neque'atínac chichuix ut neque'xye nak li c'a'ru yoquin chixbánuñquil, a'an yal xna'leb cuink. ³ Yal nak cuinko. Abanan inc'a' yoco chi pletic jo' neque'xbánu li kech cuinkilal arin sa' ruchich'och'. Riq'un ban li mausilal yoco chi pletic. ⁴ Ut li kac'anjelebal re pletic riq'un li mausilal maçua' jo' li c'anjelebal re ruchich'och'. Re ban li Dios ut k'axal nim xcuanquil re xsachbal chixjunil líx c'anjel li mausilal. ⁵ Nakasach xcuanquileb li neque'cuech'in rix líx c'anjel li Dios. Ut nakasach ajcui' xcuanquil chixjunil líx yehom xbánuhom li cuink li naramoc re chiruhéb li kas kitz'in li rusilal li Dios. Nakacanab sa' ruk' li Dios líx na'lebeb a'an re nak chijalak líx na'lebeb xban li Cristo ut te'xbanu li c'a'ru naraj a'an. ⁶ Ninnau nak tincuulak eriq'un naru tink'useb li toj yoqueb chixbanunquil li inc'a' us. Abanan inc'a' nacuaj texink'us laex. Nacuaj ban nak tejal le c'a'ux ut tebánu li naraj li Dios. ⁷ Laex nequeq'ue retal ca'a' cui' li c'a'ru na-ilman ru ut inc'a' nequexc'oxlac chirix li c'a'ru cuan sa' li rameb li junjunk. ¿Ma cuan junak sa' eyank naxye nak a'an aj c'anjel chiru li Cristo? Cui cuan, us ajcui'. Abanan tento nak tixq'ue retal nak jo'can ajcui' lao aj c'anjelo chiru li Cristo. ⁸ Mare nequec'oxla nak yoquin chixnimobresinquib cuib riq'un lin c'anjel. Abanan lin c'anjel q'uebil cue xban li Kacu'a' re nak texitenk'a. Maçua' re esachbal. Inc'a' ninc'oxlac riq'un li c'a'ru ninbánu xban nak li Dios xq'ue incuanquil chixbanunquil. ⁹ Inc'a' nacuaj nak tec'oxla nak yal re xq'uebal exiu nak nintz'ibac eriq'un. ¹⁰ Cuan li neque'atínac chichuix ut neque'xye chi jo'ca'in: Laj Pablo naxtz'iba líx hu riq'un cacuil atin re nak toxucuak xban. Abanan nak cuan sa' kayank, yo xxiú ut mac'a' na-oc cui' li c'a'ru naxye, chanqueb chichuix. ¹¹ Li neque'atínac chi jo'can che'xq'uehak retal nak cau xinatínac nak xintz'iba li hu a'in eriq'un. Ut jo'can ajcui' tinbánu nak tincuulak eriq'un. ¹² Inc'a' nakaj xbanunquil jo' neque'xbánu li neque'xnimobresi rib riq'un li c'a'ru neque'xbánu. Mac'a' xna'lebeb. Neque'xnimobresi rib riq'un líx na'lebeb xjuneseb rib. ¹³ Lao inc'a' nakanimobresi kib riq'un li moco q'uebil ta ke xbanunquil. Li c'a'ru nocoatinac chirix, a'an li c'anjel q'uebil ke xban li Dios re toc'anjelak ajcui' eriq'un laex aj Corinto. ¹⁴ Lain li xben quincuulac eriq'un chixch'olobanquil resil li colba-ib sa' xc'aba' li Jesucristo. Ut inc'a' xinbanu li macua' cue xbanunquil. Tenebanbil sa' inben xban li Dios xyebal resil li colba-ib ere. ¹⁵ Inc'a' ninnimobresi cuib riq'un li c'anjel li neque'xbánu li jun ch'ol chic. Lain nacuaj raj nak texq'ui'k sa' le pabal re nak tinetenk'a chixyebal resil li colba-ib yalak bar. Abanan inc'a' tinxic bar moco q'uebil ta cue re tinxic. ¹⁶ Nacuaj xic sa' jalan na'ajej chixch'olobanquil xyalal li colba-ib bar toj maji' xrabiomeb resil li colba-ib. Inc'a' nacuaj xnimobresinqui cuib riq'un li c'anjel ac tiquibanol xban jalan chic aj c'anjel. ¹⁷ Jo'ca'in tz'ibanol sa' li Santil Hu: Inc'a' takanimobresi kib. Chikanimobresihak ban xllok'ali Kacu'a'. ¹⁸ Cuan li neque'xye ribeb nak chabileb. Abanan mac'a' na-oc cui' li neque'xye. A' li k'axal lok', a'an nak li Dios tixye nak li jun a'an chabil.

¹ Usan cui tinęcuy chic ca'ch'inak usta tontil atin cheru laex li c'a'ru tinye ut cherabihak li c'a'ru tinye ere. ² Lain k'axal nequexinc'oxla jo' nak li Dios nequex'oxla. Ut nacuaj nak ca'aj cui' li Cristo tetake. Jo' nak li yucua'bej naxk'axtesi lix rabin chi sumlac riq'uin jun chi cuink, jo'can ajcui' nak xexink'axtesi riq'uin li Cristo. A'an jo' li belomej. ³ Abanan yoquin chi c'oxlac cherix xban nak ninnau chanru nak quibalak'ic lix Eva xban li c'anti'. Märe anchal texbalak'ik laex ut märe inc'a' chic tepab li Cristo chi anchal ech'ol ut mare inc'a' chic telok'oni. ⁴ Ninc'oxlac cherix xban nak cuan li neque'cuulac sa' eyank ut nequeq'ue ech'ol chirabinquil li c'a'ru neque'xye, usta jalan neque'xc'ut cheru chirix li Jesucristo. Ut nequepab li c'a'ru neque'xye usta jalan neque'xye chirix li Santil Musik'ej. Ut naxc'ul ech'ol nak jalan neque'xc'ut cheru chirix li colba-ib li ac xepab xben cua. ⁵ Eb a'an neque'xye nak apostoleb ut neque'xnimobresi rib ut neque'xye nak k'axal chabileb. ¿Ma cubenak ta bi' incuanquil lain chiruhel a'an? ⁶ Mare inc'a' ninnau atinac chi chabil, abanan ninnau chi tz'akal li xyalal li ratin li Dios. Ut junelic ninc'ut cheru chi tz'akal li xyalal. ⁷ Lain xinch'olob cheru li xyalal li ratin li Dios ut mac'a' c'a'ru xexinch'i ch'i cui'. Yal chi matan xinch'olob li xyalal li colba-ib cheru ut xincubsi incuanquil re nak texcolek'. ¿Ma ra ta bi' xinbanu ere? ⁸ Cuan nak xinc'ul intenk'anquil re xnumsinquil li cutan riq'uin li kech aj pabanelil li cuanqueb sa' jalan tenamit. Jo'can nak xru xinc'anjelac eriq'uin laex. ¿Ma inc'a' ta bi' us li xinbanu? ⁹ Nak quincuan chak eriq'uin, cuan nak mac'a' cuan cue. Abanan inc'a' xexinch'i ch'i riq'uin intzacaemk. Nak que'cuulac li herman aj Macedonia, a'an eb que'q'uehoc intumim. Jo'can nak inc'a' quinq'ue sa' eben xq'uebal intzacaemk chi moco ting'ue sa' eben anakcuan. ¹⁰ Xban nak li Cristo cuan cuiq'uin, jo'can nak ninye li yal ut sa' chixjunil li na'ajej Acaya, chixjunileb te'na'ok re nak inc'a' xinq'ue sa' eben intenk'anquil. ¹¹ ¿C'a'ru xyalal a'in? ¿Ma naraj ta bi' naxye nak inc'a' nequexinra? Li Dios naxnau nak nequexinra. ¹² Ut inc'a' tincanab xbanunquil li yoquin chixbanunquil xban nak cuan li neque'xye nak juntak'et lix c'anjeleb riq'uin lin c'anjel lain. Inc'a' tincanab c'anjelac chi matan xban nak inc'a' nacuaj nak te'xjuntak'eta ribeb cuiq'uin. ¹³ Eb li cuink a'in neque'xq'ue rib chok' apóstol. Abanan macula' li Cristo quiq'uehoc reheb chok' apóstol. Eb a'an aj balak' ut junes balak'inc neque'xbanu. ¹⁴ Misach ech'ol chirabinquil a'an. Jo'can ajcui' naxbanu laj tza. Cuan nak naxc'utbesi rib jo' ángel ut chanchan naxcutanobresi li kana'leb. ¹⁵ Chi moco chisachk ech'ol chirabinquil nak eb laj c'anjel chiru laj tza neque'xc'utbesi rib jo' aj c'anjel sa' tqiulal. Abanan tazuulak xk'ehil nak te'xtoj rix lix mausilaleb.

Li raylal quixc'ul laj Pablo sa' xc'aba' lix c'anjel

¹⁶ Jun sut chic tinye ere nak cherabihak li c'a'ru tinye. Ma jun taxak ere tixc'oxla nak mac'a' inna'leb. Abanan cui nequec'oxla nak mac'a' inna'leb, cherabi li cuatín jo' nak nequex-abin chiruhel li mac'a'eb xna'leb. ¿Ma inc'a' ta bi' raj taruk tinaqtinak chirix lin cuanquil lain? ¹⁷ Li c'a'ru yoquin chixyebal anakcuan moco q'uebil ta cue xban li Kacula'. Abanan tinye xban nak laex inc'a' nequetau xyalal. Yoquin chi atinac anakcuan jo' neque'xbanu li cuink li neque'xnimobresi rib. ¹⁸ Nabaleb neque'xnimobresi rib riq'uin li c'a'ru neque'xbanu arin sa' ruchich'och'. ¿Ma inc'a' ta bi' raj taruk tinnimobresi ajcui' cuib lain? ¹⁹ Laex cuan raj ena'leb nak nequerec'a erib. Abanan nequeq'ue ech'ol chirabinquil li c'a'ru neque'xye li mac'a'eb xna'leb. ²⁰ Cui nequexrahobtesic yal nequecuy. Cui namak'e' li c'a'ru ere cheru, mac'a' nequeye. Cui nequexbalak'ic, yal nequecanab chi jo'can. Ut cui neque'xk'etk'eti rib cheru, a'an chic li nacuulac cheru. Ut

cui nasaq'ue' sa' xnak' eru, yal nequecuy. ²¹ ¿Ma xutanal ta bi' chok' cue nak inc'a' naru ninbanu ere jo' neque'xbanu eb a'an? Anakcuán tinatinak eriq'unin jo' neque'xbanu li mac'a'eb xna'leb ut tnye ere a'in: Cui cuan li neque'xnimobresi rib riq'unin líx yehom xbanuhom, taruk raj ajcui' tinnimobresi cuib lain. ²² Neque'xnimobresi rib xban nak a'an eb aj hebreo. Lain ajcui' aj hebreo lain. Neque'xnimobresi rib xban nak a'aneb aj Israel. Ut lain ajcui' aj Israel lain. Neque'xnimobresi rib xban nak a'aneb ralal xc'ajol laj Abraham ut jo'can ajcui' lain. Lain ajcui' ralal xc'ajol laj Abraham. ²³ Tinnimobresi ca'ch'inak cuib anakcuán ut tinatinak jo' neque'xbanu li mac'a'eb xna'leb. Neque'xye nak aj c'anjeleb chiru li Cristo. ¿Ma a'aneb ta bi' li k'axal aj c'anjel chiru li Cristo chicuu lain? Inc'a', xban nak lain tz'akalin x-apóstol li Jesucristo. Nabal li raylal ninc'ul sa' xc'aba' li Cristo. Nintacuasi cuib chi c'anjelac. Nabal sut xinq'uehe' sa' tz'alam. Nabal sut xinsaq'ue' ut cuankeb li neque'raj incamsinquil. ²⁴ Eb laj judío quine'xq'ue chi tz'um. Jun chic mä ca'c'al chi tz'um ninc'ul chiru li jun sut. Ut qb sut quinc'ul chi jo'can. ²⁵ Oxib sut quinsaq'ue' riq'unin che' ut jun sut quine'xcuti chi pec. Oxib sut quijache' li jucub li cuanquin cui' nak yoquin chi xic jun pac'al li palau. Tz'akal jun cutan ut jun k'ojojin quincuan sa' li ha' sa' xyi li palau. ²⁶ Yalak bar ninxic xyebal resil li Cristo, xiu xiu cuanquin. Xiu xiu cuanquin nak ninnume' sa' eb li nima'. Xiu xiu cuanquin xbaneb laj elk' ut xbaneb li cuech tenamitil ut xbaneb li macua'eb aj judío. Xiu xiu cuanquin sa' eb li tenamit jo' ajcui' sa' li q'uiche'. Xiu xiu cuanquin nak ninnume' sa' li palau. Xiu xiu cuanquin xbaneb li neque'xq'ue rib jo' aj pabanel. ²⁷ Cau ninc'anjelac ut xincuy li raylal. Xincuy li yo'lec' ut cuan nak mac'a' intzacaemk. Xincuy intz'ocajic ut xincuy inchaki el. Xincuy li que chi inc'a' tz'akal li cuak'. ²⁸ Cuan chic nabal li raylal xinc'ul. Ut chirix chixjunil a'an, k'axal cui'chic ninc'oxlac cuulaj cuulaj chirixeb chixjunileb laj pabanel li cuankeb yalak bar. ²⁹ Cui cuan li k'un xch'ol li mac'a' xmetz'eu, k'axal nintok'oba ruheb. Cui cuan li neque'ch'inan xch'oleb sa'lix pabaleb, c'ajo' nak naraho' inch'ol ut ninc'oxlac chirixeb. ³⁰ Cui tento tinatinak chirix lin c'anjel, tinatinak chirix li c'a' re ru li naxc'ut nak mac'a' incuanquil injunes re nak inc'a' tñanimak cuu lain. ³¹ Li Acuabej Dios, líx Yucua' li Kacua' Jesucristo naxnau nak inc'a' nintic'ti'ic. Lok'oninbil taxak li Dios chi junelic k'e cutan. ³² Laj Aretas, a'an li acuabej sa' li tenamit Damasco. Nak cuanquin aran, jun li cuïnk li nac'anjelac chiru laj Aretas, quixtakla xc'ac'alenquíl li oquebal sa' li tenamit xban nak quiraj inchapbal. ³³ Abanan xincole' sa' ruk'eb. Li tz'ac li sutbil cui' li tenamit cuan jun líx ventanil. Ut aran quine'xcubsi chak sa' jun nimla chacach. Jo'can nak quincole'.

12

Li c'a'ru quic'utbesic chiru laj Pablo xban li Dios

¹ Ninnau nak mac'a' tinra chirix nak tinnimobresi cuib. Abanan cui tento nak tinbanu, nacuaj xserak'inquil ere c'a'ru quicuil chanchan matq'uenbil quinbanu. Ut nacuaj xserak'inquil c'a'ru quic'utbesi chicuu li Kacua'. ² Calaju chihab anakcuán nak quinc'ame' toj sa' li rox tasal li choxa. Inc'a' ninnau ma matq'uenbil quinbanu malaj quinc'ame' chi tz'akal. Ca'aj cui' li Dios naxnau. ³ Inc'a' ninnau chan ta cui' ru nak coín sa' choxa. Abanan ninnau nak quinc'ame' ut li Dios naxnau chanru quixbanu nak quinxic'am sa' choxa. ⁴ Ut li c'a'ru quicuabi aran inc'a' naru ninatinaç chirix xban nak moco xc'ulub ta junak cuïnk atinac chirix ut inc'a' natauman junak atin re xyebal xban nak k'axal numtajenak xlok'al. ⁵ Naru raj tinnimobresi cuib

riq'uin li c'a'ru quicuabi chak sa' choxa. Abanan ca'aj cui' tinatinak chirix li c'a'ru naxc'ut nak mac'a' incuanquil injunes xban nak yal cuinkin. ⁶ Lain naru raj tinnimobresi cuib xban nak yal li c'a'ru quicuabi chak, abanan inc'a' ninbanu re nak ma'ani tixc'oxla nak k'axal nim incuanquil. Ca'aj cui' li nacuaj, a'an nak laex teq'ue retal lin yehom inbanuhom. ⁷ Li Dios inc'a' quiraj nak tinnimobresi cuib xban li k'axal lok' quilajxc'utbesi chak chicuu. Jo'can nak quiq'uehe' jun li raylal sa' inben. Chanchan li cuan q'uij sa' intibel nak nacuec'a. A'an xtalaj tza re inrahobtesinquil. Cuan li raylal a'in re nak inc'a' tinnimobresi cuib. ⁸ Oxib sut xintijoc ut xintz'ama chiru li Kacua' nak chirisihak li raylal a'in li yo chi rahobtesinc cue. ⁹ Abanan li Kacua' quixye cue: Inc'a' nacuisi la' raylal. Abanan tatintenka re nak tacuy xnumsinquil. Lain ninq'ue lin cuanquil re li ani naxnau nak mac'a' xcuauquil xjunes, chan cue. Jo'can nak nasaho' sa' inch'ol riq'uin li raylal re nak lix cuanquil li Cristo cuank cuiq'uin. ¹⁰ Jo'can nak nasaho' sa' inch'ol nak mac'a' incuanquil injunes ut nak ninhobe' jo' ajcui' nak ninc'ul li raylal, li ch'a'ajquinal ut li rahobtesic sa' xc'aba' li Jesucristo. Nasaho' sa' inch'ol xban nak cui mac'a' incuanquil injunes cuib, ninnau nak cuan incuanquil sa' xc'aba' li Jesucristo.

Laj Pablo yo xc'a'ux chirixeb laj pabanel li cuanqueb Corinto

¹¹ Chanchan nak mac'a' inna'leb nak ninserak'i ere chixjunil li xinc'ul. Inc'a' raj xinye ere. Abanan eban laex nak xinbanu xban nak laex inc'a' nequeq'ue incuanquil chok' apóstol. Laex raj li xexq'uehoc incuanquil. Moco cubenak ta incuanquil lain chiruheb li neque'xq'ue rib chok' apóstol usta mac'a' incuanquil injunes. ¹² Nak cuanquin eriq'uin nabal quincuy ut riq'uin xcuauquil li Dios quilajinbanu li milagro ut li sachba ch'olej li nac'utuc re nak lain tz'akal apóstol. ¹³ Jo'quinbanu chak sa' xyankeb laj pabanel li quinnume' cui' chak, jo'can ajcui' quinbanu nak cuanquin eriq'uin. Li c'a'ru inc'a' xinq'ue sa' eben, a'an lin tenk'anquil. ¿Ma mac ta bi' li xinbanu? Checuy inmac cui inc'a' us xinbanu. ¹⁴ Anakcuan ac xincauresi cuib re nak tinxic eriq'uin sa' rox sut. Abanan inc'a' texinch'i'ch'i'i riq'uin c'a'ru cue. Macu'a'li c'a'ru ere ninra. Laex ban li nequexinra. Macu'a'eb li coc'al li neque'ch'olanin re li yucua'bej. A'li yucua'bej, a'an li nach'olanin reheb li ralal xc'ajol. ¹⁵ Jo'can nak chixjunil li c'a'ru cuan cue chi anchal inch'ol tinsach re etenk'anquil ut tintacuasi cuib re nak texcolek'. Cui k'axal nequexinra, ¿ma inc'a' ta bi' taruk tinera lain? ¹⁶ Chi yal inc'a' xexinch'i'ch'i'i. Abanan mare cuan sa' eyank te'xc'oxla nak ebalak'inquil yoquin. ¹⁷ ¿Chanru nak xexinbalak'i? ¿Ma xexbalak'ic ta bi' xbaneb li ani xintakla eriq'uin? ¹⁸ Lain xintz'ama chiru laj Tito nak taxic eriq'uin ut xintakla li herman chirix. ¿Ma xexbalak'i ta bi' laj Tito? ¿Ma inc'a' ta bi' junaj li kac'a'ux cuochben laj Tito? ¿Ma inc'a' ta bi' junaj li kana'leb? ¹⁹ Mare yal re xcolbal cuib cheru nak neque'oxla. Abanan moco jo'can ta. Li Dios naxnau chi tz'akal nak sa' xc'aba' li Cristo ninatinac. Ex inherman, chixjunil li ninbanu, a'an re etenk'anquil re nak texq'uij sa' le pabal. ²⁰ Ninc'oxla nak tincuulak eriq'uin mare inc'a' sahak ech'ol cuiq'uin, ut lain mare inc'a' sahak inch'ol eriq'uin xban nak toj cuan li c'a'ak re ru inc'a' us sa' eyank. Mare toj cuan li pletic ut li cakalinc sa' eyank ut mare toj cuan li josk'il ut li nimobresinc ib, malaj ut li k'abanc ut li xic' iloc ut mare toj cuan li k'etk'etil eriq'uin malaj ut li po'o'j ib. ²¹ Ninc'oxla nak tincuulak eriq'uin, tec'ut inxutan chiru li Dios xban li c'a'ru yoquex chixbanunquil. Mare tinyabak chirixeb li que'xbanu li inc'a' us ut toj maji' neque'xyot xch'ol ut toj maji' xe'xjal xc'a'ux riq'uin li mausilal li que'xbanu jo'li muxuc caxar, li co'betac yumbetac ut li c'a'ak chic ru chi mausilal.

13

Laj Pablo naxye c'a'ru tixbanu nak tacuulak riq'uineb laj Corinto

¹ A'in li rox sut nak tincuulak eriq'uin. Cui cuan li tajitek' nak tincuulak, tento nak cuank cuib malaj oxib li testigo chixyebal nak yal lix mac, jo' tz'ibabil sa' li Santil Hu. ² Nak quincuulac xca' sut eriq'uin, quinq'ueheb chak xna'lebeb li yoqueb chi macobc jo' ajcui' chejunilex. Ut anakcuán ma'anihin sa' eyank ut tinch'olob cui'chic xyalal cheru. Nak tincuulak cui'chic eriq'uin, lain tebink'us chi cau li ani inc'a' us yoqueb chixbanunquil. Inc'a' chic te'cuil xtok'obal ru. ³ Riq'uin a'in tenau nak ninatinaq riq'uin li cuanquil q'uebil cue xban li Cristo. Moco mac'a' ta xcuانquil li Cristo re ek'usbal. K'axal nim ban xcuانquil chek'usbal. ⁴ Cubenak xcuانquil li Cristo nak quicamsic chiru li cruz. Abanan quicuaclesic cui'chic sa' xyankeb li camenak chi yo'yo xban xcuانquil li Dios. Jo' nak quixcubsi xcuانquil li Cristo, jo'can ajcui' takacubsi kacuanquil lao. Abanan yo'yoco xban xcuانquil li Dios ut q'uebil ke li kacuanquil xban li Dios re xk'usbaleb li neque'xbanu li inc'a' us. ⁵ Q'uehomak retal le yu'am. ¿Ma tz'akal re ru le yu'am? ¿Ma chi anchal ech'ol nequexpaban? ¿Ma inc'a' ta bi' nequenau chi tz'akal nak li Cristo cuan eriq'uin? ¿Malaj ut toj maji' nequexpaban? ⁶ Usan cui nak tincuulak eriq'uin, teq'ue retal nak lain tz'akaln x-apóstol li Jesucristo. ⁷ Lain junelic nintz'ama chiru li Dios nak inc'a' tebanu li inc'a' us. Inc'a' nintz'ama a'an re nak tac'utunk nak chabil li c'anjel ninbanu sa' eyank. Re ban nak tz'akalak re ru le yu'am. Nacuaj nak tebanu li us usta inc'a' naq'uehe xcuانquil li c'anjel li ninbanu sa' eyank. ⁸ Lao inc'a' naru nakapo' ru li yal. Nococ'anjelac ban re xq'uebal xcuانquil li yal. ⁹ Jo'can nak k'axal raj tasahok' sa' inch'ol nak tincuulak eriq'uin cui chabilak chic le yu'am re nak inc'a' tento tinc'ut cheru nak cuan incuanquil re ek'usbal. Nintijoc cherix re nak tz'akalak re ru le yu'am sa' le pabal. ¹⁰ Jo'can nak yoquin chixtz'ibanol li hu a'in eriq'uin nak toj maji' ninxic eriq'uin. Nak cuankin cui'chic sa' eyank lain inc'a' nacuaj texink'us chi cau usta cuan incuanquil re ek'usbal. Li Kacua' inc'a' quixq'ue lin cuanquil re esachbal. Re ban etenk'anquil sa' le pabal.

Laj Pablo naxq'ueheb xsahil xch'ol ut naxchak'rabiheb

¹¹ Anakcuán ex inheman, texinchak'rabi riq'uin a'atin a'in: Jalomak le c'a'ux re nak tz'akalak ere eru. Cheq'uehak retal li jo' q'uijal xinye ere. Junajak taxak le c'a'ux ut checxuank sa' xyalal chi ribil erib. Ut cuank eriq'uin li Dios li narahoc ke ut naxq'ue ke li tuktukuil usilal. ¹² Cheq'uehak xsahil ech'ol chi ribil erib riq'uin santil utz'uc u. ¹³ Chixjunileb laj pabanel li cuanqueb arin neque'xtakla xsahil ech'ol. ¹⁴ Chicuank taxak eriq'uin li rusilal li Kacua' Jesucristo, ut chicuank taxak eriq'uin li rahoc ib li naxq'ue li Kacua' Dios, ut a' taxak li Santil Musik'ej chicuank eriq'uin. Jo'can taxak.

Li Hu li Quixtz'iba li San Pablo reheb laj Galacia

Xq'uebal xsahileb xch'ol

¹ Lain laj Pablo. Lain x-apóstol li Jesucristo. Moco taklanbilin ta xban cuink, chi moco sa' xc'aba' junak cuink. Taklanbilin ban xban li Jesucristo ut xban li Acuabej Dios, li quicuaclesin cui'chic re chi yo'yo li Jesucristo sa' xyānkeb li camenak. ² Lain yoquin chixtaklanquil li hu a'in eriq'un chejunilex laex li cuanquex sa' li junjunk chi iglesia aran Galacia. Ut eb li herman̄ li cuanqueb cuochben yoqueb ajcui' chixtaklanquil xsahil ech'ol. ³ Chicuank taxak eriq'unin li usilal ut li tuktuknil li naxq'ue li Dios li kaYucua' ut li naxq'ue li Kacua' Jesucristo. ⁴ Li Jesucristo quixk'axtesi rib chi camc sa' xc'aba' li kamac xban nak jo'can quiraj li Dios Acuabej. Quixbanu a'an re kacolbal chiru li mausilal sa' li ruchich'och'. ⁵ Lok'oniribil taxak ru li Acuabej Dios chi junelic k'e cutan. Jo'can taxak.

Jun ajcui' li tz'akal evangelio

⁶ Nasach inch'ol eban xban nak k'axal junpat yoquex chixcanabanquil li tz'akal Dios li quisic'oc eru xban li rusilal li Jesucristo. Ut yoquex chixpabankil jalan tijleb chirix li evangelio li moco yal ta. ⁷ A'in moco naraj ta naxye nak cuan jun chic li evangelio. Lix yalal a'an, a'in: cuanqueb li neque'raj xpo'bal ru li evangelio li naxq'ue li Kacua' Jesucristo. ⁸ Usta lao, usta junak ángel tachalk sa' choxa chixyebal ere jalan tijleb chirix li evangelio chiru li ac xkach'olob cheru, tz'ekt̄ananbilak taxak xban li Dios li ani tabanunk re chi jo'ca'in. ⁹ Ac xkaye a'in ere ut nakaye cui'chic ere, cui junak tixye ere jalan tijleb chirix li evangelio chiru li ac xerabi, tz'ekt̄ananbilak taxak xban li Dios li ani tabanunk re chi jo'ca'in. ¹⁰ Ma yal re ta bi' nak te'sahok' xch'ol li cuink cuiq'unin nak yoquin chixyebal chi jo'ca'in? ¿Ma inc'a' ta bi' yoquin chixyebal chi jo'ca'in re nak sahak xch'ol li Dios cuiq'unin? ¿Ma tincuaj ta bi' tinc'ojob xch'oleb li cuink? Ma jok'e xban nak cui ta toj nacuaj xc'ojobanquil xch'oleb li cuink macua'in raj aj c'anjel chiru li Jesucristo.

Nak quisiq'ue'ru laj Pablo chok' apóstol

¹¹ Ex inherman̄, nacuaj nak tenau nak li evangelio li xinch'olob cheru, a'an macua' yal xc'a'ux cuink. ¹² Macua' yal riq'unin junak cuink quicuabi, chi moco riq'unin ta junak cuink quintzol cuib. A' ban li Kacua' Jesucristo, a'an li quic'utbesin re chicuu. ¹³ Ac erabiom ajcui' resil chanru nak quincuan chak sa' lix pabaleb laj judío. Laex nequenau nak k'axal nabal li rayal quinbanu reheb li neque'pabán re li Dios ut quinyal ink'e chixsachbal ruheb laj pabanel. ¹⁴ Lain li k'axal cui'chic quinq'ue inch'ol chiruheb li cuech sajil chixbanunquil li c'a'ru naxye lix pabaleb laj judío. Ut k'axal cui'chic quinbanu li na'leb canabanbil ke xbaneb li kaxe' katon. ¹⁵ Nak toj maji' ninyo'la, xban xnimál ruislal, li Dios ac xsic' chak cuu re tinc'anjelak chiru. ¹⁶ Ut nak li Dios quiraj xc'utbesinquel li Ralal chicuu re nak tinc'olob resil chiruheb li macua'eb aj judío, inc'a' xinpatz' inna'leb re junak cuink. ¹⁷ Chi moco coín ta Jerusalén chi atinac riq'uineb li apóstol li quisiq'ue'ruheb junxil chicuu. Tic ban coín Arabia ut mokon quinsuk'i cui'chic Damasco. ¹⁸ Oxib chihab xpabankil li Dios inban nak coín Jerusalén re nak tinnau ru laj

Pedro. O'laju cutan quincuan chak riq'uin. ¹⁹ Ut quicuil ru laj Jacobo rjitz'in li Kacua' Jesucristo. Ut chirix chic a'an, mä jun chic reheb li apóstol quicuileb ru. ²⁰ Li Dios naxnau nak tz'akal yal li c'a'ru yoquin chixtz'ib'anquil sa' li hu a'in. ²¹ Chirix chic a'an coín sa' eb li na'ajej xcuent Siria ut Cilicia. ²² Ut toj maji'ak neque'xnau cuu eb laj pabanel sa' xc'aba' li Cristo, li cuanqueb aran Judea. ²³ Yal resil neque'rabi li nayeman chicuix: Li cuink li quirahobtesin reheb laj pabanel junxil, anakuan a'an chic yo chi yehoc resil li colba-ib li quiraj raj xsachbal junxil, chanqueb. ²⁴ Ut eb a'an que'xlok'oni ru li Dios nak que'rabi resil nak quinpb̄ li Cristo.

2

Eb li apóstol que'xc'ul laj Pablo chok' rech apostolil

¹ Mokon chic nak ac xnume' călaju chihab, coín cui'chic Jerusalén cuochben laj Bernabé. Ut kac'am laj Tito chikix. ² Coín xban nak li Dios quixc'utbesi chicuu nak tento tinxic Jerusalén. Ut que'xch'utub rib li neque'c'amoc be chiruheb laj pabanel. Ut quinserak'i reheb li resilal li evangelio li yoquin chixjulticanquil reheb li macua'eb aj judío. Quinch'olob xyātal chiruheb re nak inc'a' tacanak chi mac'a' rajbal chiruheb li c'a'ru yoquin chixbānunquil jo' ajcui' li ac xinbānu. ³ Laj Tito mācua' aj judío. Abanan eb laj c'amol be inc'a' que'xmin ru chix'ulbal li circuncisión. ⁴ Abanan cuan ajcui' junjunk que'raj raj xminbal ru xc'ulbal li circuncisión. Eb a'an neque'xye rib nak aj pabaneleb. Que'oc sa' kayañk sa' mukmu re xq'uebal retal li usilal cuanco cui' sa' xc'aba' li Jesucristo ma yoco chixpabankuil li najter chak'rab malaj inc'a'. Eb a'an que'raj raj cui'chic kaq'uebal rubel xcuankuil li najter chak'rab. ⁵ Abanan lāo mä jok'e kabānu li c'a'ru que'xye ke xban nak lāo inc'a' quikaj nak te'xpo' ru li evangelio, li tz'akal yal li ac xerabi. ⁶ Ut eb li njnkeb xcuankuil sa' xyānkeb laj pabanel mac'a' que'xye chirix li c'a'ru yoquin chixbānunquil. Mac'a' nacuaj re usta njnkeb xcuankuil. Chiru li Dios juntak'eto. ⁷ Mac'a' que'xye li njnkeb xcuankuil. Que'xq'ue ban retal nak tenebanbil sa' inben xban li Dios xyebal resil li evangelio reheb li macua'eb aj judío jo' nak quitenebac sa' xben laj Pedro xban li Dios xyebal resil li evangelio reheb laj judío. ⁸ Li Dios quixsic' cuu chok' apóstol re tinc'anjelak sa' xyānkeb li macua'eb aj judío jo' nak quixsic' ru laj Pedro re tac'anjelak sa' xyānkeb laj judío. ⁹ Laj Jacobo, laj Pedro ut laj Juan, a'aneb aj c'amol be sa' xyānkeb laj pabanel. Nak que'xq'ue retal nak sic'bil cuu xban li Dios, que'xq'ue li ruk'eb cue ut re laj Bernabé. A'an retaliil nak kacomon kib chi c'anjelak chiru li Dios. Ut xkac'ub ru nak lain ut laj Bernabé toc'anjelak sa' xyānkeb li macua'eb aj judío ut eb a'an te'c'anjelak sa' xyānkeb laj judío. ¹⁰ Ca'aj cui' li que'xtz'ama chiku nak che'julticok' ke eb li neba' li cuanqueb Jerusalén, ut a'an li ninq'ue inch'ol chixbānunquil.

Laj Pablo quixye nak inc'a' us yo chixbānunquil laj Pedro aran Antioquia

¹¹ Nak quicuulac laj Pedro Antioquia, laj quink'us xban nak inc'a' us li yo chixbānunquil. ¹² Nak toj maji' neque'cuulac li taklanbileb xban laj Jacobo, laj Pedro nacua'ac riq'uineb li macua'eb aj judío. Aban nak que'cuulac eb a'an, quirisi rib sa' xyānkeb li macua'eb aj judío xban nak quixxucuahelb ru laj judío li neque'yehoc re nak tento xc'ulbal li circuncisión. ¹³ Eb laj pabanel aj judío que'oc chixbānunquil li ca' pac'alil na'leb li quixbānu laj Pedro toj retal nak qui-oc ajcui' chixbānunquil laj Bernabé xban nak jo'can quic'ame' cui' xbe xbaneb. ¹⁴ Nak quinq'ue retal nak inc'a' yoqueb chixbānunquil

jo' naraj li evangelio, chiruheb chixjunileb laj p_abanel quinye re laj Pedro: Yal nak l_aat aj judío chalen chak sa' l_a yo'lajic, abanan ac junxil xacanab xbanunquil li c'aynakeb chixbanunquil laj judío. ¿C'a'ut nak nacamineb ru li m_acua'eb laj judío chixbanunquil jo' neque'xbanu laj judío? chanquin re.

Ca'aj cui' riq'uin xpabanquil li Cristo natauman li colba-ib

¹⁵ Lao aj judío chalen chak sa' kayo'lajic ut m_acua'o xcomoneb li m_acua'eb aj judío, li neque'xye "aj mac" reheb. ¹⁶ Abanan nakanau nak ma ani t_at_icobresik xch'ol chiru li Dios riq'uin xbanunquil li c'a'ru naxye li chak'rab. Ri_q'uin ban xpabanquil li Jesucristo. Lao xkapab li Kacua' Jesucristo re t_at_icobresik kach'ol chiru li Dios riq'uin xpabanquil li Cristo ut macua' riq'uin xbanunquil li naxye li chak'rab cocole'. Ri_q'uin xbanunquil li naxye li chak'rab, ma ani t_at_icobresik xch'ol chiru li Dios. ¹⁷ Cui yoco chixsic'bal xticobresinq_uil kach'ol chiru li Dios sa' xc'aba' li Cristo, ut nak l_ao chic tota'lik chi cuan kamac, ¿ma a'an ta bi' naraj naxye nak a' li Cristo yo' chi q'uehoc ke chi macobc? Ma jok'e bi'an. ¹⁸ Cui lain tin-oc cui'chic xpabanquil nak t_at_icobresik inch'ol chiru li Dios riq'uin xbanunquil li naxye li chak'rab, a'an naraj naxye nak chi yal lain aj mac xban nak ac junxil xincanab xpabanquil li na'leb a'an. ¹⁹ Chanchan nak li najter chak'rab xq'uehoc cue chi camc xban nak a'an xc'utuc re chicuu nak lain aj mac. Anakuan camenakin chic chiru lix cuanquil li chak'rab re nak yo'yokin rubel xcuانquil li Dios. ²⁰ Li Jesucristo quicam chiru li cruz ut chanchan nak quinq'uehe' ajcui' lain cuochben. M_acua' chic lain li yo'yoquin. A' chic li Cr_ísto cuan cuiq'uin. Ut ac' chic lin yu'am xban nak xinpab li Jesucristo li Ralal li Dios li quirahoc cue ut quixk'axtesi rib chi camc sa' inc'aba'. ²¹ Jo'can nak inc'a' nintz'ektana xcuانquil li rusilal li Dios. Cui ta sa' xc'aba' li chak'rab nat_icobresic' kach'ol, mac'a' raj rajbal nak quicam li Cristo.

3

Li chak'rab ut li pab'al

¹ Laex aj Galacia, mac'a' ena'leb. ¿Ani xbalak'in ere nak inc'a' chic yoquex xpabanquil li xyalal? Nak xkach'olob cheru chanru nak quiq'uehe' li Jesucristo chiru cruz, chanchan nak tz'akal yoquex chirilbal. ² Ca'aj cui' a'in nacuaj xpatz'bal ere. ¿Ma riq'uin ta bi' xbanunquil li naxye sa' li chak'rab nak xec'ul li Santil Musik'ej? Ma jok'e. Laex xec'ul li Santil Musik'ej nak xepab li Cristo. ³ ¿Ma k'axal cui'chic mac'a' ena'leb? Cui riq'uin li Santil Musik'ej xetiquib chak xpabanquil li Jesucristo, ¿ma nequec'oxla anakuan nak tatz'aklok ru le pabal yal riq'uin li c'a'ak re ru nequebanu ejunes? ⁴ ¿Ma tecanab chi mac'a' rajbal chixjunil li quec'ul chi jo'canan? Lain ninye nak inc'a' tebanu chi jo'can. ⁵ Li Dios naxq'ue li Santil Musik'ej ut naxbanu li milagros eriq'uin. Nacuaj tinpatz' ere a'in: ¿ma naxbanu a'an xban nak nequepab li chak'rab malaj ut xban nak xepab li Cristo li quiehe' resil ere? ⁶ C'oxlankek ca'ch'inak chirix laj Abraham. Jo' naxye sa' li Santil Hu, laj Abraham quixpab li Dios ut xban nak quipaban, li Dios quixye nak t_ic' chic lix ch'ol. ⁷ Nacuaj nak tenau nak li tz'akal ralal xc'ajol laj Abraham, a'aneb li neque'paban re li Dios. ⁸ Najter k'e cutan nak toj maji' nac'ulun resil li evangelio sa' ruchich'och', ac cuan sa' xch'ol li Dios nak t_at_icobresik xch'oleb li m_acua'eb aj judío nak te'pabank. Jo'can nak tz'ib_an bil sa' li Santil Hu li quixye li Dios re laj Abraham: Sa' ac'aba' l_aat osobtesinbilakeb chixjunileb li tenamit. (Gn. 12:3) ⁹ Jo'can nak li ani neque'paban, osobtesinbileb jo' nak qui-osobtesic' laj Abraham xban nak quixpab li Dios. ¹⁰ Chixjunileb li neque'xsic' xtiquilal xch'ol riq'uin xbanunquil li naxye sa' li najter chak'rab,

tenebanbil li tojba mac sa' xbeneb xban nak jo'ca'in tz'ibanol sa' li Santil Hu: Tenebanbil li tojba mac sa' xbeneb li ani inc'a' neque'xbanu chixjunil li tz'ibanol retalil sa' li chak'rab. (Dt. 27:26) ¹¹ Ac ch'olch'o nak ma ani taticobresik xch'ol chiru li Dios yal riq'uin xbanunquil li naxye sa' li najter chak'rab xban nak tz'ibanol sa' li Santil Hu nak ani naxpab li Dios, taticobresik xch'ol chiru li Dios ut tacuank xyu'am chi junelic. (Hab. 2:4) ¹² Li chak'rab inc'a' naxye nak topabank. Ca'aj cui' naxye nak tento xbanunquil li naxye re nak tacuank li kayu'am. Jo'ca'in tz'ibanol sa' li chak'rab: Li ani naxbanu chixjunil li naxye li chak'rab, li jun a'an tacuank xyu'am. (Lv. 18:5) ¹³ Abanan li Jesucristo coxcol chiru li tojba mac li tenebanbil sa' kaben xban li chak'rab. A'an quicolo ke nak quixq'ue rib chi camc re xtojbal rix li kamac. Jo'ca'in tz'ibanol sa' li Santil Hu: 'Tz'ektanabibleb chixjunileb li neque'camsic chi t'uyt'u chiru li che'. (Dt. 21:23) ¹⁴ Li Jesucristo quixtoj rix li kamac nak quicam chiru li cruz re nak sa' xc'aba' a'an li macua'eb aj judio te'xc'ul li rosobtesinquil riq'uin li Dios jo' li quixc'ul laj Abraham ut re ajcui' nak riq'uin xpabankuil li Jesucristo takac'ul li Santil Musik'ej li quiyechi'ic ke xban li Dios.

Li chak'rab ut li yechi'inbil xban li Dios

¹⁵ Ex inherman, nacuaj xch'olobanquil lix yalal a'in cheru riq'uin li c'a'ru nac'ulman sa' li kayu'am arin sa' ruchich'och'. Junak cuink nak tixbanu xcontrato, chi acak xakxo xcuanguil, ma' ani chic naru nasachoc re, chi moco tixtik ru. ¹⁶ Jo' tz'ibanol sa' li Santil Hu, li c'a'ru quiyechi'ic re laj Abraham xban li Dios, quiyechi'ic ajcui' reheb li ralal xc'ajol. Moco yo ta chi atinac chirixeb chixjunileb li ralal xc'ajol. Yo ban chi atinac chirix jun ajcui'. Ut li jun a'an, a'an li Cristo. ¹⁷ A'in ut tinye: Li Dios quixbanu jun li contrato najter riq'uin laj Abraham ut quixxakab xcuanguil sa' xc'aba' li Cristo. Li chak'rab li quiq'uehe' re laj Moisés chahib ciento riq'uin lajeb xca'c'al (430) chihab mokon inc'a' naxsach xcuanguil li contrato li ac xakabanbil xcuanguil, chi moco tixcanab ta chi mac'a' rajbal li yechi'inbil re laj Abraham xban li Dios. ¹⁸ Cui ta naru xc'ulbal li colba'ib riq'uin xbanunquil li naxye li chak'rab, mac'a' raj rajbal li quiyechi'ic re laj Abraham xban li Dios. Abanan li c'a'ru quixyechi'li Dios re laj Abraham, a'an yal chi matan quixq'ue. ¹⁹ ¿C'a'ru aj e nak quiq'uehe' li chak'rab? A'an quiq'uehe' re nak tixc'ut chiruheb li tenamit nak a'aneb aj k'etol chak'rab. Ut li chak'rab a'an quicuan xcuanguil toj quic'ulun li Jesucristo li quiyo'la sa' xyankelb li ralal xc'ajol laj Abraham, li yechi'inbil xban li Dios. Eb li ángel que'c'angelac chiru li Dios nak que'xye li chak'rab re laj Moisés; ut laj Moisés, a'an li quiyehoc re chiruheb li tenamit. ²⁰ Abanan ma' ani quijaloc atin nak li Dios quixyechi'li ma'tan re laj Abraham. A' li Dios, a'an li quibanan re. ²¹ ¿Ma a'in ta bi' naraj naxye nak li chak'rab naxsach xcuanguil li c'a'ru quixyechi'li Dios? ¡Ma jok'e! Cui ta naru tacuank li kayu'am chi junelik riq'uin xbanunquil li naxye li chak'rab, taticok' aj raj cui' li kach'ol chiru li Dios xban li chak'rab. ²² Li Santil Hu naxye nak chixjunil li ruchich'och' cuan rubel xcuanguil li mac re nak chixjunileb li te'pabank re li Kacua' Jesucristo te'xc'ul ajcui'li colba'ib li quiyechi'ic xban li Dios. ²³ Nak toj maji' nac'ulun li Jesucristo sa' ruchich'och', toj cuanco rubel xcuanguil li chak'rab. Chanchan cuanco chi prexil. Yoco chiroybeninquil nak li Dios tixtakla chak li Jesucristo li yechi'inbil xban, re nak riq'uin xpabankuil a'an tocolek'. ²⁴ Jo'can nak li chak'rab, a'an nac'utuc xyalal chiku ut a'an nac'amoc ke riq'uin li Cristo re nak tacobresinbilak kach'ol riq'uin xpabankuil li Cristo. ²⁵ Anakcuan ut ac xcuulac xk'ehil xpabankuil li Jesucristo. Jo'can nak mac'a' chic xcuanguil li najter chak'rab

sa' kabən. ²⁶ Anakcuan laex chic ralal xc'ajol li Dios chejunilex xban nak xepab li Jesucristo. ²⁷ Laex xec'ul li cubi ha' ut rehex chic li Cristo. Jalbil chic le yu'am ut chabil chic le na'leb sa' xc'aba' li Jesucristo. ²⁸ Anakcuan ut moco jalan ta chic laj griego chiruheb laj judío, chi moco jalan ta li mos chiru li patrón, chi moco jalan ta li cuink, chi moco jalan ta li ixx. Junaj ban chic ku sa' xc'aba' li Jesucristo. ²⁹ Cui laex rehex chic li Cristo, laex ajcui' ralal xc'ajol laj Abraham ut laex terechaní ajcui' li c'a'ru quiyechi'ic re laj Abraham xban li Dios.

4

¹ Li nacuaj xyebal ere a'an a'in: nak toj ca'ch'in, li taechanink re li jun cablal chanchan junak mos. Mac'a' naru naxch'e' xban nak maji' natz'akloc xchihab usta a'an laj echal re chixjunil. ² Toj cuan rubel xcuanquil li na-iloc re ut li nataklan re toj tatz'aklok ru lix chihab jo' quixye lix yucua'. ³ Jo'can ajcui' lao. Junxil chanchano coc'al. Cocuan rubel xcuanquil li najter na'leb nak toj maji' nakanau bar cuan li yal. ⁴ Abanan nak quicuulac xk'ehil, li Dios quixtakla li Ralal chi yo'lac sa' ruchich'och' riq'uin jun li ixx. Ut quicuan ajcui' rubel xcuanquil li najter chak'rab. ⁵ Li Dios quixtakla li Ralal re nak a'an ta'colok reheb li cuankeb rubel xcuanquil li chak'rab. Quixbanu a'in re nak lao naru to-oc chok' ralal xc'ajol. ⁶ Re xc'utbal chiku nak lao chic ralal xc'ajol, li Dios quixtakla li Santil Musik'ej re nak tacuank kiq'uin. Ut xban nak cuan li Santil Musik'ej kiq'uin, jo'can nak naru nakaye re li Dios, "at inYucua'". ⁷ Jo'can ut anakcuan macua'ex chic lok'bil mos. Laex ban chic ralal li Dios. Ut xban nak laex chic ralal li Dios, terechaní ajcui' li yechi'ibil reheb li ralal xc'ajol xban nak jo'can quiraj li Dios.

Laj Pablo yo chi c'oxlac chirixeb laj pabanel li cuankeb Galacia

⁸ Nak toj maji' nequepab chak li Dios, quelok'oniheb li macua'eb tz'akal dios ut quexc'anjelac chak chiruheb. ⁹ Anakcuan ac xexpaban ut rehex chic li Dios. ¿C'a'ut nak teraj cui'chic suk'ic chi c'anjelac sa' le najteril na'leb li mac'a' na-oc cui'? Ut ¿c'a'ut nak teraj cui'chic xq'uebal erib rubel xcuanquil li najter chak'rab? ¹⁰ Laex yoquex cui'chic chixbanunquil le najteril na'leb nak nequenink'eib li cutan, li po ut li chihab ut li c'a'ak chic re ru chi nink'ehil. ¹¹ Nachal inc'a'ux eban. Mare yal mac'a' rajbal nak xinc'anjelac sa' eyank. ¹² Ex inherman, usta lain aj judío, xcuisi cuib rubel xcuanquil li chak'rab. Nintz'ama cheru nak tebanu jo' xinbanu lain. Meq'ue chic erib rubel xcuanquil li chak'rab. Laex mac'a' junak rayllal xebanu cue. ¹³ Laex nequenau nak xban nak quinyajer, quincana Galacia. Jo'can nak quiru quinye resil li evangelio ere xben cua. ¹⁴ Lain ninnau nak ch'a'raj chok' ere cuibal sa' lin yajel. Abanan inc'a' xinetz'ektana ut inc'a' xic' quineril. Xineril ban jo' junak x-ángel li Dios ut xinec'ul jo' nak xec'ul raj li Jesucristo. ¹⁵ ¿Bar cuan lix sahil sa' le ch'ol queret'a nak quincuan eriq'uin junxil? Li Dios naxnau nak cui ta quiru xbanunquil, querisi raj xnak' le ru ut queq'ue raj cue. ¹⁶ ¿Ma xic' chic niquieril anakcuan yal xban nak xinye ere li xyalal chi jo'canan? ¹⁷ Chanchan k'axal nequera eb laj balak'. Abanan macua' usilal li te'raj eriq'uin. Ebalak'inqil ban li te'raj. Eb a'an te'raj nak terisi erib cuiq'uin re nak eb a'an chic li tetake. ¹⁸ Us cui te'raj etenk'anquil cui chi anchal xch'oleb te'xbanu. Abanan tento te'xbanu chi junelic ut macua' ca'aj cui' nak cuanquin eriq'uin. ¹⁹ Ex inherman, chanchanex incoc'al nak nequexcul. Cajo' nak nayot'e inch'ol sa' ec'aba' laex. Chanchan li rayllal li naxc'ul li ixx li cuanc re xc'ula'al. Cajo' naraho' inch'ol nak toj maji' nequek'axtesi erib chi tz'akal rubel rok ruk' li Cristo. ²⁰ Nacuaj ta ac

cuanquin eriq'uin anakcuan re nak tinnau chanru tinatinkak eriq'uin. C'ajo' inc'a'ux cherix xban nak inc'a' ninnau chanru cuanquex.

Lix Agar ut lix Sara

21 Læx li toj t'eraj cuanc rubel xcuquil li najter chak'rab, ¿c'a'ut nak inc'a' nequeq'ue retal li c'a'ru naxye? **22** Tz'ib'anbil retalil nak laj Abraham quicuan cuib li ralal, jun riq'uin li lok'bil mos ut li jun chic riq'uin li tz'akal rixakil. (Gn. 21:2-9) **23** Ut li ralal laj Abraham li quicuan riq'uin li lok'bil mos, a'an moco yechi'ibil ta xban li Dios. Quiyo'la jo' neque'yo'la chixjunileb sa' ruchich'och'. Abanan li ralal li quiyo'la riq'uin li tz'akal rixakil, a'an quiyo'la xban nak yechi'ibil reheb xban li Dios. **24** Cuan xyalal nak quicx'ul chi jo'ca'in laj Abraham. A'an a'in in lix yáal: Li cuib chi ixx, a'aneb retalil li cuib chi contrato li quixbanu li Dios riq'uineb laj Abraham ut laj Moisés. Lix Agar, li lok'bil mos, a'an retalil li contrato quixbanu li Dios sa' li tzul Sinaí. Ut li toj cuanqueb rubel xcuquil li najter chak'rab chanchaneb li lok'bil mos jo' li ralal xc'ajol lix Agar. **25** Lix Agar, a'an retalil li tzul Sinaí li cuan Arabia. A'an ajcui' retalil li tenamit Jerusalén. Ut eb laj Jerusalén chanchaneb li lok'bil mos nak cuanqueb, xban nak toj cuanqueb rubel xcuquil li najter chak'rab. **26** Abanan lix Sara, a'an retalil li Jerusalén li cuan sa' choxa. Ut lão ralal xc'ajol a'an. **27** Jo'ca'in tz'ib'anbil sa' li Santil Hu:

Chisahok' taxak sa' ach'ol, at ixx, li inc'a' nacatq'uiresin. Jap acue xban xsahil ach'ol laat li inc'a' acuec'ahom xrahil li alanc, laat li tz'ekt'anabilat xban la' belom. Chisahok' taxak sa' ach'ol xban nak k'axal nabal cui'chic la' cualal ac'ajol tacuank chiruhéb li ralal xc'ajol li lok'bil mos. (Is. 54:1)

28 Ex inherman, lão jo' laj Isaac. Lao chic ralal xc'ajol li Dios xban li c'a'ru quiyechi'ic re laj Abraham xban li Dios. **29** Najter li alalbej li quiyo'la riq'uin li mos, a'an quirahobtesin re li alalbej li quiyo'la xban xcuquil li Santil Musik'ej. Ut chalen anakcuan jo'can ajcui' nac'ulman. **30** Aban, ¿c'a'ru naxye sa' li Santil Hu? Naxye chi jo'ca'in: Isi li lok'bil mos rochben lix yum xban nak li alalbej a'an inc'a' naru natz'ak lix jun cablal li yucua'bej. A' ban li alalbej li quiyo'la riq'uin li tz'akal ixakilbej, a'an li taechanink re. (Gn. 21:10) **31** Jo'can ut, ex inherman, lão macua'o ralal xc'ajol li lok'bil mos. Lao ban ralal xc'ajol li tz'akal ixakilbej.

5

Meq'ue chic erib rubel xcuquil li najter na'leb

1 Macua'o chic jo' li lok'bil mos xban nak moco cuanco ta chic rubel xcuquil li najter chak'rab. Libre ban chic cuanco xban nak li Cristo quicoloc ke chiru xcuquil li najter chak'rab. Checuank ut chi cau ech'ol sa' le pabal ut meq'ue chic erib rubel xcuquil li chak'rab. **2** Lain laj Pablo. Quehomak retal li yoquin chixyebal ere. Cui toj nequec'ul li circuncisión re nak taticobresik ech'ol, a'an naraj naxye nak mac'a'na-oc cui'cheru li Cristo.

3 Jun sut chic ninch'olob li xyalal cheru. Li ani naxc'ul li circuncisión re nak taticobresik xch'ol, tento nak tixbanu chixjunil li naxye sa' li najter chak'rab.

4 Læx li nequeraj xtacobresinquil ech'ol chiru li Dios riq'uin xbanunquil li naxye sa' li chak'rab, nequerisi erib riq'uin li Cristo ut nequerisi ajcui' erib riq'uin li rusilal li Dios. **5** Abanan lão yoco chiroybeninquil lixtacobresinquil kach'ol chiru li Dios riq'uin xpabankuil li Cristo xban nak jo'can quic'utbesic chiku xban li Santil Musik'ej. **6** Cui lão reho chic li Jesucristo, mac'a' naxye cui takac'ul li circuncisión malaj ut inc'a'. Li k'axal tento xbanunquil, a'an xpabankuil li Jesucristo. Ut cui yal nak nakapab li Cristo, tac'utunk lí kapabal

xban nak nocorahoc. ⁷ Us nak quetiquib chak pabanc junxil. ¿Ani xtacchi'in ere nak inc'a' chic yoquex chixpabankil li yal? ⁸ Li tacchi' a'an inc'a' nachal riq'unin li Dios li quisic'oc eru. ⁹ Usta yal ca'ch'in li levadura li nach'amobresin naq'ueman, a'an naxch'amobresi chixjunil li k'em. ¹⁰ Lajin cau inch'ol sa' xc'aba' li Kacua' Jesucristo nak laex moco jalan ta le c'a'ux chiru lin c'a'ux lain. Li ani yo chi po'oc ru le pabal tixc'ul xtojbal xmac a' yal ani. ¹¹ Cui ta toj yoquin chixjulticanquil nak tento xc'ulbal li circuncisión inc'a' raj chic tine'xrahobtesi. Cui ta toj yoquin chixbanunquil a'an, yoquin raj risinquil xcuanguil xcamic li Cristo chiru li cruz ut inc'a' raj chic te'josk'ok sa' inben. ¹² Li ani yoqueb chi po'oc ru le pabal ut yoqueb chixyebal nak tento xc'ulbal li circuncisión, us raj cui te'xc'ul eb a'an ut te'xset raj ribeb chi junaj cua re nak te'xcanab ch'i'ch'i'inc sa' eyank. ¹³ Ex inherman, laex sic'b'il eru re nak libre chic cuankex. Abanan moco xban ta nak libre chic cuanquex nak texoc chixbanunquil li naxrahi ru le ch'ol. Chera ban erib ut chetenk'a erib chi ribil erib. ¹⁴ Chixjunil li chak'rab natauman ru riq'unin xbanunquil li jun a'in: Chara la cuas acuitz'in jo' nak nacara acuib laat. (Lv. 19:18) ¹⁵ Ut cui yoquex chixjosk'inquil erib ut yoquex chixrahobtesinquil erib, checx'oxlak ca'ch'inak. Mare anchal tepo' ru le pabal chi ribil erib.

Chikacanabak kib rubel xcuanguil li Santil Musik'ej

¹⁶ Li nacuaj xyebal ere, a'an a'in: Checanabak erib rubel xcuanguil li Santil Musik'ej re nak a'an taberesink ere. Cui tebanu a'an, inc'a' chic tebanu li inc'a' us li nequerahi ru xbanunquil. ¹⁷ Li c'a'ru inc'a' us li nakarahi ru xbanunquil kajunes, a'an xic' na-ile' xban li Santil Musik'ej. Ut li c'a'ru us li naxrahi chok' ke li Santil Musik'ej, a'an inc'a' naxc'am rib riq'unin li nakaj xbanunquil kajunes. Xic' neque'r'il rib chi ribil rib ut xban a'an inc'a' nakabalu li us li nakaj raj xbanunquil. ¹⁸ Ut cui laex beresinbilex xban li Santil Musik'ej, moco cuanquex ta chic rubel xcuanguil li najter chak'rab. ¹⁹ Cutan saken c'a'ru li inc'a' us li naka-rahi ru xbanunquil kajunes. A'an eb a'in: muxuc caxar, co'betac yumbetac, ut li xutanalil na'leb, ²⁰ lok'oninc yibanbil dios, tulac, xiq'uil uchjinc, pletic, cakalinc, josk'inc, yo'obanc ra xic', cuech'ij ib, po'oc ru pabal, ²¹ socuenc, camsinc ras ritz'in, calac, num cua'ac num uc'ac, ut c'a'ak chic re ru jo' eb a'in. Yoquin cui'chic xyebal ere a'in, usta ac inyehom ajcu' ere, nak li neque'banun re li c'a'ak re ru a'in inc'a' te'rechani lix nimajcual cuanquilal li Dios. ²² Abanan li c'a'ru naxq'ue li Santil Musik'ej sa' li kayu'am, a'an li rahoc, sahil ch'olejil, tuktuquil usilal, cuyuc, chabilal, usilal, tiquil ch'olej, ²³ tulanalit ut cuyuc ib. Mac'a' junak chak'rab naxye nak inc'a' us xbanunquil a'in. ²⁴ Li ani re chic li Jesucristo, chanchan nak quiq'uehe' chiru cruz lix najter na'leb xban nak ac xcanab xbanunquil chi junaj cua li najter na'leb li quixrahi ru xbanunquil junxil. ²⁵ Cui ac' chic li kayu'am q'uebil ke xban li Santil Musik'ej, chikacanabak kib rubel xcuanguil re nak a'an chic taberesink ke. ²⁶ Mikabalu kib nak k'axal nim kacuanquil ut inc'a' chic chikajosk'i kib ut inc'a' chic chikacakali kib.

6

Chikatenk'a kib chi kibil kib chixnumsinquil li ch'a'ajquial

¹ Ex inherman, mare cuan junak erekh aj pabanelil taoc cui'chic chi macobc. Laex li cuanquex chic rubel xcuanguil li Santil Musik'ej tetenk'a sa' tulanalit re nak tacacuuk xch'ol sa' xpabal. Ut cheq'uehak retal chi us le yu'am re nak laex inc'a' tex-alek. ² Chetenk'ahak erib chi ribil erib chixnumsinquil

li ch'a'ajqu'ilal nachal sa' eben. Chi jo'can yokex chixbānunquil li c'a'ru tak-lanbilex cui' xban li Jesucristo. ³ Li ani naxc'oxla nak nim xcuanquil xjunes rib, li jun a'an yo chixbalak'inquil rib xjunes. ⁴ Li junjunk chixq'uehak retal li c'a'ru naxbanu. Cui us li naxbanu, chisahok' xch'ol riq'uin li c'a'ru naxbanu ut inc'a' tac'oxlak chirix li naxbanu li jun chic. ⁵ Tenebanil sa' xben li junjunk rilbal chanru lix yu'am. ⁶ Li ani yo chixtzolbal li ratin li Dios, tento ajcui' nak tixtenk'a li ani yo chi tzoloc re. ⁷ Mebalak'i erib. Li Dios inc'a' naru xbalak'inquil. Li c'a'ru narau li junjunk, a'an ajcui' li tixk'ol. ⁸ Jo'can ajcui' sa' li kayu'am. Li ani naxbanu li inc'a' us li naxrahi ru xbanunquil xjunes rib, li jun a'an taṣachk. Abanan li ani naxbanu li c'a'ru naraj li Santil Musik'ej, li jun a'an taçuank xyu'am chi junelic. ⁹ Jo'can nak mextitz' chixbanunquil li us. Cui inc'a' nach'inan kach'ol nak taçuulak xk'ehil lao takechani li kak'ajcamunquil. ¹⁰ Jo'can ut chikabanuhak usilal reheb chixjunileb li kas kitz'in nak toj naru xbanunquil, ut k'axal cui'chic takabānu reheb li kech aj pabanelil.

Laj Pablo naxq'ue xcuanquil xcamic li Cristo chiru li cruz

¹¹ Anakcuan riq'uin cuuk' yoquin chi tz'ibac eriq'uin. Ilomak xninkal li letra li yoquin chixtz'ibanquil re nak tēnau nak lain xintz'iban re. ¹² Eb li neque'raj xminbal eru xc'ulbal li circuncisión yoqueb chixbanunquil a'an re xnimobresinquil ribeb. Yoqueb chixbanunquil a'an xban nak inc'a' neque'raj te'rahobtesjk sa' xc'aba' xcamic li Jesucristo chiru li cruz. ¹³ Ma jun reheb li neque'c'uluc re li circuncisión neque'xbanu ta chi tz'akal li naxye sa' li najter chak'rab. Abanan eb a'an te'raj nak laex tec'ul li circuncisión ut neque'xmin eru chixc'ulbal. Cui tebānu li c'a'ru neque'xye, te'xnimobresi ribeb xban nak te'xc'oxla nak cuan xcuanquileb sa' eben. ¹⁴ A'ut lain ma'jok'e tinnimobresi cui'b injunes. Li c'a'ru ninnimobresi xcuanquil lain, a'an lix camic li Kacua' Jesucristo chiru li cruz. Sa' xc'aba' lix camic li Cristo, camenak chic lix na'leb li ruchich'och' chicuu, ut chanchan nak camenakin lain chiru li ruchich'och'. ¹⁵ Usta takac'ul li circuncisión, usta inc'a', mac'a' chic na-oc cui' chiku xban nak rehoc chic li Jesucristo. Li k'axal lok' a'an l'i ac' yu'am li naxq'ue ke li Dios. ¹⁶ A'taxak li tuktukilal ut li uxtananc u chicuank eriq'uin laex li nequexpāban re li xyālal li yoquin chixyebal. Laex li tz'akal ralal xc'ajol li Dios. ¹⁷ Ut chirix chixjunil a'in ma' ani ta chic chich'i'chi'ink cue xban nak cuan retalil chicuix li rahobtesjk li quinc'ul sa' xc'aba' li Kacua' Jesús. ¹⁸ Ex inherman, a'taxak li rusilal li Kacua' Jesucristo chicuank eriq'uin chejunilex. Jo'can taxak.

Li Hu li Quixtz'iba li San Pablo reheb laj Efeso

Laj Pablo quixtakla xsahil xch'oleb

¹ Lain laj Pablo. Lain x-apóstol li Jesucristo xban nak jo'can quiraj li Dios. Yoquin chixtz'ibanol li hu a'in eriq'unin laex laj pabanel li cuanquex Efeso. Yoquin chi tz'ibac eriq'unin chejunilex laex li nequeq'ue ech'ol chixpábanquil li Jesucristo. ² Chicuank taxak eriq'unin li ruxtan ut li tuktuk'il usilal li naxq'ue li Dios li kaYucua' ut li naxq'ue li Kacua' Jesucristo.

Li Cristo na-osobtesin ke

³ Lok'oninbil taxak li Dios lix Yucua' li Kacua' Jesucristo. Xban nak junajo chic riq'unin li Cristo, li Dios naxq'ue chak ke chixjunil li kosobtesinquil li nachal chak sa' choxa. ⁴ Nak toj maji' naxyib chak li ruchich'och' li Dios, ac sic'bil chak ku xban sa' xc'aba' li Jesucristo, re nak tictak li kayu'am ut mac'a'ak chic kamac. ⁵ Xban nak nocoxra, jo'can nak quixsic' chak ku re nak laako chic li ralal xc'ajol sa' xc'aba' li Jesucristo. Quixbanu chi jo'can xban nak jo'can quiraj. ⁶ Jo'can nak chikalok'onihak ru li Dios xban nak yal chi mātan quiruxtaña ku nak quixtakla chak li Ralal li k'axal raro xban. ⁷ K'axal numtajenak li rusilal li Dios li quixq'ue ke xban nak riq'unin xcamic li Jesucristo, cuan kacolbal ut cuybil sachbil chic li kamac. ⁸ Li rusilal quixq'ue ke chi numtajenak xq'ual ut quixq'ue kana'leb re nak takatau ru li xyalal. ⁹ Ut quixc'utbesi chiku li na'leb li mukmu nak quicuan chak junxil, a' li qui-ala sa' xch'ol xbanunquil nak quixtakla chak li Jesucristo. ¹⁰ Tacuulak xk'ehil nak tatz'aklok ru chixjunil jo' naraj li Dios. Tixjunaji chixjunil li c'a'ru cuan jo' sa' choxa jo' sa' ruchich'och'. Ut a' chic li Cristo tajolomink re chixjunil. ¹¹ Lao aj judío sic'bil ku xban li Dios chok' ralal xc'ajol sa' xc'aba' li Cristo. A'in qui-uxman xban nak jo'can quiraj li Dios ut xban nak a'an yal re sa' xben chixjunil. ¹² Quixbanu chi jo'can re nak lok'oninbilak ru kaban lao li co-oybenin re li Cristo nak toj maji' nac'ulun sa' ruchich'och'. ¹³ Ut jo'can ajcui' laex li macu'a'ex aj judío. Nak xerabi li xyalal li colba-ib, laex xepab li Cristo ut xec'ul li Santil Musik'ej, li quiyechi'jc' ere chok' retalil nak laex chic li ralal xc'ajol. ¹⁴ Li Santil Musik'ej quiq'uehe' ke chok' retalil nak takac'ul chixjunil li yechi'nbil ke xban li Dios ut tatz'aklok ru li kacolbal. Jo'can nak lok'oninbilak ru riq'unin lix nimal xcuanylal.

Laj Pablo natijoc chirixeb laj pabanel

¹⁵ Lain xcuabi resil nak chi anchal ech'ol nequepab li Kacua' Jesucristo ut xcuabi resil nak nequera le rech aj pabanelil. ¹⁶ Jo'can nak junelic ninbantioxin chiru li Dios ut yoquin chi tijoc cherix. ¹⁷ Nintijoc chiru li nimajcual Dios, lix yucua' li Kacua' Jesucristo, ut nintz'ama chiru nak tixq'ue ena'leb re nak tetau ru chi tz'akal lix na'leb li Dios ut re nak tetau ru li xyalal chi us. ¹⁸ Nintz'ama chiru li Dios nak tixq'ue ena'leb re nak tetau ru c'a'ru le lok'laj mātan li yoquex chiroybeninquil xban nak sic'bil eru xban li Dios. Tec'ul le mātan erochbeneb chixjunileb laj pabanel. ¹⁹ Ut nintz'ama ajcui' chiru li Dios nak tixq'ue ena'leb re nak tēnau nak k'axal nim lix cuanquil sa' kabən lao li nocopabán re. ²⁰ Ut a'an ajcui' lix nimal xcuanylil li quicuaclesin re li Cristo chi yo'yo sa' xyānkeb li camenak ut quixc'ojob sa' xnim uk' li Dios aran sa' li santil choxa ut quixq'ue xcuanylil. ²¹ K'axal nim xcuanylil li Cristo sa' xbeneb chixjunileb li ángel ut li maus aj musik'ej ut sa' xbeneb li cuanqueb xcuanylil chi taklanc sa' choxa jo'

sa' ruchich'och'. K'axal nim sa' xbən chixjunil li c'a'ak re ru li cuanqueb xcuquil anakcuan ut chi junelic k'e cutan. ²² Li Dios quixq'ue chixjunil rubel xcuquil li Cristo ut quixq'ue li Cristo chi jolominc rehēb laj pabanel ut a'an chic yal re sa' xbeneb. ²³ Li Cristo a'an li najołomin ke lao aj pabanel. Ut lao chanchanli rok ruk' nak cuanco. Junak li tz'ejcualej moco tz'akal ta re ru cui mac'a' lix jolom. Jo'can ajcui' junak li jolomej, cui mac'a' li rok ruk' inc'a' tz'akal re ru. Jo'can nak tento nak li Cristo tajolomink ke lao aj pabanel ut lao cuanko jo'li rok ruk' li Cristo.

2

Colbilo xban xnimal ruxtan li Dios

¹ Junxil laex li mācua'ex aj judío chanchan camenakex xban li māusilal ut li mac li xebanu chak. ² Xebanu chak li māusilal sa' ruchich'och' ut xeq'ue erib chi taklāc xban laj tza li nataklan sa' xbeneb li māus aj musik'ej. A'an li nataklan sa' xbeneb li neque'k'etoc ratin li Dios. ³ Jo'can ajcui' lao aj judío. Junxil xkabanu chak li māusilal li naxrahi ru li kach'ol xbanunquil. Xkabanu li inc'a' us li' xkaj xbanunquil kajunes. Jo'can nak tento raj takac'ul xtojbal li kamac' jo' eb chixjunileb li inc'a' neque'raj pabanc. ⁴ Abanan k'axal nim li ruxtan li Dios sa' kabən xban nak k'axal nocoxra. ⁵ Nak toj camenako chak sa' li kamac, riq'uin lix cuaclijic cui'chic chi yo'yo li Cristo, li Dios quixq'ue ke jun ac'yu'am. Yal xban rusilal li Dios nak colbilo. ⁶ Li Dios corisi chak sa' li najter yu'am nak quixcuaclesi chi yo'yo li Jesucristo ut coxq'ue chi tz'akonc sa' lix nimal xlok'al sa' li santil choxa xban nak reho chic li Cristo. ⁷ Chixjunil li usilal a'in quilajxbanu ke sa' xc'aba' li Jesucristo re nak tæç'utunk chi junelic k'e cutan nak k'axal nim li ruxtan. ⁸ Yal nak xepab li Jesucristo ut colbilex chic. Abanan yal xban rusilal li Dios nak colbilex. Mācua' xban eyehom ebanuhom. Yal ematán ban xban li Dios. ⁹ Ma ani chixnimobresi rib xban nak mācua' xban eyehom ebanuhom nak colbilex. ¹⁰ Li Dios coxyo'obtesi ut quixq'ue ke li ac'yu'am sa' xc'aba' li Jesucristo re nak chabilak li kayu'am xban'nak ac jo'can c'ubanbil chak xban li Dios junxil re nak chabilak li kayehom kabānuhom.

Junaj chic ku lao sa' xc'aba' li Cristo

¹¹ Chijulticok' ere chanru nak quexcuan chak junxil. Laex li mācua'ex aj judío tz'ektañanbilex xbaneb laj judío li que'xc'ul li circuncisión, ut eb a'an que'xye nak inc'a' tz'akal ere eru xban nak inc'a' quec'ul li circuncisión. ¹² Junxil moco cuan ta li Cristo eriq'uin ut mācua'ex xcomoneb laj Israel. Inc'a' querabi resil li contrato li quiyehoc resil lix c'ulunic laj Colonel. Cuanquex arin sa' ruchich'och' chi mac'a' c'a'ru yoquex chiroybeninqul ut chi mac'a' li Dios eriq'uin. ¹³ Junxil li Dios mac'a' eriq'uin. Abanan anakcuan rehex chic xban nak li Cristo quicam chiru li cruz sa' e'c'aba'. ¹⁴ Li Cristo, a'an li naq'uehoc ke li tuktuquil usilal. Xban li Cristo junaj chic ku lao aj judío eriq'uin laex li macua'ex aj judío. Xban nak quixmayeja rib sa' kac'aba', li Cristo quirisi li kajosk'il li naramoc re chiku li cuanc sa' xyālal chi kibil kib. ¹⁵ Xban nak quixk'axtesi rib chi cāmc, li Cristo quirisi xcuquil li najter chak'rab. Quixbanu a'an re nak tixjunaiheb ru laj judío eriq'uin li mācua'eb aj judío ut junajakeb chic eriq'uin li Cristo ut cuākeb chic sa' xyālal chi ribileb rib. ¹⁶ Riq'uin lix camic chiru li cruz li Cristo quirisi lijosk'inquil kib chi kibil kib ut cox'cam cui'chic sa' usilal eriq'uin li Dios ut junaj chic ku. ¹⁷ Nak quic'ulun li Cristo sa' ruchich'och' quixch'olob xyālal li colba-ib li naq'uehoc tuktuquil usilal. Quixch'olob xyālal chiku lao aj judío li ac nakanau xyālal. Ut

quixch'olob ajcui' xyalal cheru laex li mācua'ex aj judío li toj maji' nequenau xyalal. ¹⁸ Anakcuan chickajunilo, usta lāo aj judío usta mācua'o aj judío, naru nococuan chi sum atin riq'unin li Yucua'bēj Dios sa' xc'aba' li Cristo. Ut li junaj chi Santil Musik'ej natenk'an ke. ¹⁹ Ut moco jalanex ta chic anakcuan riq'uineb laj judío. Laex ban chic xcomoneb. Junaj chic eru riq'uineb. Laex chic ralal xc'ajol li Dios. ²⁰ Lāo aj pabanel chanchano li rochoch li Dios. Chanchano li pec li na-oc sa' xben li cimiento. Ut li cimiento, a'aneb li apóstol ut li profeta. Abanan li tz'akal xakxo cui' li cab, a'an li Jesucristo. ²¹ Lāo aj pabanel chanchano li rochoch li Dios. Junajo chic sa' xc'aba' li Jesucristo li tz'akal xakxo sa' kabén re nak tz'akalak ke ku ut k'axtesinbilo chiru li Dios. ²² Jo'can ajcui' laex. Xban nak rehex chic li Cristo, junajex chic riq'uineb laj pabanel. Ut laex ajcui' li rochoch li Dios xban nak li Santil Musik'ej cuan eriq'unin.

3

Laj Pablo bokbil xban li Dios chi c'anjelac sa' xyankeb li mācua'eb aj judío

¹ Lain laj Pablo. Cuanquin chi prexil xban nak ninc'anjelac chiru li Cristo, ut xban nak ninye resil li colba-ib ere laex li mācua'ex aj judío. ² Ac xerabi ta na resil nak tenebanbil sa' inben xban li Dios xyebal ere nak li ruxtan li Dios ere ajcui' laex li mācua'ex aj judío. ³ Li Dios, a'an quic'utuc re chicuu li na'leb a'an, li mukmu nak quicuan chak junxil. Ac xintz'iba ca'ch'in resil ere chirix li na'leb a'in. ⁴ Nak t'eril xsa' li hu li xintz'iba eriq'unin, tēnau nak ninnau chi tz'akal li xyalal chirix li Cristo, li mukmu nak quicuan. ⁵ Junxil mā ani nata'oc ru lix yalal li mukmu nak quicuan chak. Abanan anakcuan li Santil Musik'ej quixc'ut li xyalal chiruheb li profeta ut chiku ajcui' lāo lix apóstol. ⁶ Li xyalal li na'leb li mukmu nak quicuan chak junxil, a'an a'in: nak laex li mācua'ex aj judío, textz'akonk li colba-ib li naxq'ue li Dios kochben lāo aj judío. Laex ralal xc'ajolek ajcui' li Dios ut textz'akonk ajcui' riq'unin li yechi'nbil ke xban li Dios xban nak colbilex chic sa' xc'aba' li Cristo. ⁷ Yal rusilal li Dios nak quixq'ue sa' inben xyebal resil li colba-ib ut quixq'ue incuanquil re tinbānu lix c'anjel. ⁸ Lain li k'axal cubenak incuanquil sa' xyankeb chixjunileb li ralal xc'ajol li Dios. Abanan yal xban lix nimal ruxtan li Dios quixq'ue cue li c'anjel a'in re xch'olobanquil cheru lix yalal chirix lix nimal ruxtan li Cristo ut li lok'laj colba-ib sa' xc'aba' a'an. ⁹ Jo'can nak tento tinch'olob yalak bar li xyalal li na'leb li mukmu nak quicuan chak junxil. Chalen chak sa' xticlajic chixjunil li na'leb a'in mukmu chak xban li Dios li quiyib'an re chixjunil. ¹⁰ Li Dios quixbanu chi jo'ca'in re xc'utbal chiruheb li cuanqueb xcuanguil sa' choxa nak numtajenak xna'leb li Dios. Te'xnau nak numtajenak xna'leb nak te'xq'ue retal nak quixjunaji ruheb laj judío riq'uineb li mācua'eb aj judío chok' ralal xc'ajol. ¹¹ Ac c'ubanbil chak junxil chi jo'ca'in xban li Dios nak li Kacua' Jesucristo tixjunajiheb ru li ralal xc'ajol. ¹² Xban nak ac xkapab li Cristo, junajo chic riq'unin. Jo'can nak kananau chi tz'akal nak naru chic toucuan chi sum atin riq'unin li Dios. ¹³ Jo'can nak nintz'ama cheru nak inc'a'tach'īnank ech'ol xban nak yoquin chixc'ulbal li raylal xban xyebal ere xyalal li colba-ib. Chisahok' ban ech'ol xban nak re eten'ank'quil xinc'ul li raylal.

C'ajo' nocoxra li Cristo

¹⁴ Nak ninc'oxlac chirix lix na'leb li Dios riq'unin chixjunil li quixbanu, nincui'ib cuib ut ninbantioxin chiru li Acuabej Dios. ¹⁵ Li Acuabej Dios a'an xyucua'eb chixjunil li cuanqueb sa' choxa, jo' ajcui' sa' ruchich'och'. ¹⁶ K'axal nim li rusilal li Dios. Jo'can nak nintz'ama chiru nak li Santil Musik'ej

chiq'uehok ęcuanquilar ut xcacuilal ęch'ol sa' le pabal. ¹⁷ Ut nintz'ama ajcui' chiru nak chicuank le pabal re nak cuank li Cristo eriq'un chi tz'akal. Tetau taxak xcacuil le ch'ol riq'un xrabal li Dios jo' eb ajcui' le ras eritz'in. ¹⁸ Nintz'ama chiru li Dios nak chetauhak taxak ru, jo' ajcui' chixjunileb laj pabanel, nak k'axal nim li karabal xban li Cristo. Numtajenak lix rahom li Cristo. Mac'a' xbisbal ut ma' ami tata'ok ru lix lok'al lix rahom li Cristo. ¹⁹ Ma jok'e taruk takatau ru chi tz'akal lix rahom xban nak mac'a' roso'jic ut k'axal lok'. Nintz'ama chiru li Dios nak tixc'ut cheru nak c'ajo' nequexra li Cristo, ut chinujak taxak le ch'ol riq'un xnimajcual xcuانquil. ²⁰ Lok'oninbil taxak li Dios li k'axal nim xcuانquil chixbanunquil nabal chiru li nakatz'ama. Riq'un xnimajcual xcuانquil nac'anjelac sa'li kam ut k'axal nim xcuانquil chixbanunquil nabal chiru li nakoybeni. ²¹ Lok'oninbil taxak li Dios anakcuan ut chi junelic k'e cutan kaban lao aj pabanel xban nak junajo chic riq'un li Cristo. Jo'can taxak.

4

Sa' xc'aba' li Cristo junajo chic lao aj pabanel

¹ Lain cuanquin chi prexil xban xyebal resil li Kacua' Jesucristo. Lain xintijoc cherix ut anakcuan nintz'ama cheru nak chabilak le yu'am jo' xc'ulubeb li ralal xc'ajol li Dios. ² Checubsihak erib ut chechuank sa' tulanil ut chabilakex. Checuyak erib chi ribil erib ut cherahak erib chiribil erib. ³ Junajak chic eru xban li Santil Musik'ej. Jo'can nak q'uehomak ęch'ol chi cuanc sa' usilal chi ribil erib re nak chechuank chi junaj eru. ⁴ Lao li ralal xc'ajol li Dios chanchan nak jun chi tz'ejcualej nak cuanco ut jun ajcui' li Santil Musik'ej naberesin ke. Jun ajcui' li kamatan li nakayo'oni sa' comonil, lao li sic'bil ku. ⁵ Jun ajcui' li Kacua' cuan ut jun ajcui' li kapabal cuan ut jun ajcui' li cubi ha'nakac'ul sa' xc'aba' li Cristo. ⁶ Jun ajcui' li Dios cuan ut a'an li kaYucua' chikajunilo. A'an li cuan sa' kabən chikajunilo. A'an li nac'anjelac sa' li kam chikajunilo ut a'an ajcui' li cuan kiq'un chikajunilo. ⁷ Abanan jalan jalank li kalok'laj matan li naq'uehe' ke chikajunkal xban li Cristo, a'yal chanru naraj a'an. ⁸ A'in qui-uxman jo' tz'ibanol sa'li Santil Hu, li naxye chi jo'ca'in:

Nak quitake' sa' choxa li Kacua', quixc'utbesi nak a'an k'axal nim xcuانquil sa' xben laj tza jo' ajcui' sa' xbeneb li neque'c'anjelac chiru. Ut li Kacua' quixq'ue xmataneb li ralal xc'ajol. (Sal. 68:18)

⁹ ¿C'a'ru xyalal nak naxye nak li Kacua' quitake' sa' choxa? Naraj naxye nak xben cua quicube tak'a sa' li ruchich'och'. ¹⁰ Quicube sa' ruchich'och' ut quitake' ajcui' toj sa' li Santil Choxa re nak taçuank xcuانquil sa' xben chixjunil sa' choxa jo' ajcui' sa' ruchich'och'. ¹¹ ¿C'a'ru xyalal nak tz'ibanol nak quixq'ue xmataneb li ralal xc'ajol li Dios? Naraj naxye nak cuan li quiq'uehe' xmataneb chi c'anjelac jo' apóstol. Cuan li quiq'uehe' xmataneb chi c'anjelac jo' profeta. Cuan li quiq'uehe' xmataneb chixyebal resil li colba-ib. Cuan li quiq'uehe' xmataneb chi c'amoc be chiruheb laj pabanel ut cuan ajcui' li quiq'uehe' xmataneb chixc'utbal lix yalal chiruheb laj pabanel. ¹² Quiq'uehe' xmataneb re nak tz'akalakeb ru sa' xpabaleb ut re nak te'c'anjelak chiru li Dios ut re nak te'xten'aheb laj pabanel chi q'uiç sa' xpabaleb. ¹³ Q'uebil ke li kamatan re nak takatenk'aheb laj pabanel chi cacuyc sa' lix pabaleb toj taçuulak xk'ehil nak tatz'aklok ke ku riq'un lix cuانquil li Cristo ut junajak chic ku xban nak nakapabli Ralal li Dios. Tz'akalak ke ku jo' li Cristo tz'akal re ru. ¹⁴ Moco jo'cakex ta chic li coc'al. Li coc'al neque'xpab li c'a'ak re ru neque'yehe' re. Laex macua'ex chic

coc'al. Jo'can nak meq'ue ərib chi balak'ic xbaneb li neque'balak'in riq'unin jalanił tijleb. ¹⁵ Ut chixjunil li nakabənū, chickabənū xban nak nocorahoc. Ut junajak chic ku riq'unin li Cristo. ¹⁶ Li Cristo, a'an najolomin ke lao aj pabanel ut lao jo' lirok ruk'. Li Cristo, a'an nac'amoc be chiku ut junajo chic. Chickajunilo chickatenk'a kib chi kibil kib re nak toq'uik sa' li kapābal xban nak nakara kib chi kibil kib. ¹⁷ A'an a'in li tento tinye ere. Sa' xc'aba' li Kacua'ninye ere nak mebanu chic jo' neque'xbanu li inc'a' neque'pabán. Eb a'an neque'xq'ue xch'ol chirix li mac'a' na-oc cui'. ¹⁸ Inc'a' neque'xtau xyalal. Mac'a' riq'uineb li junelic yu'am li naxq'ue li Dios xban nak inc'a' neque'raj xnaubal li xyalal ut k'axal cauheb xch'ol. ¹⁹ Inc'a' neque'xnau xutanac ut neque'xq'ue r̄ib chixbanunquil li māusilal. Neque'xbanu chixjunil li jo' majo'il aj na'leb. ²⁰ Abanan laex aj pabanel macua' li na'leb a'an li xetzol riq'unin li Cristo. ²¹ Laex xerabi li quixye li Cristo ut xetzol li xyalal li quixc'ut cheru. ²² Jo'can nak chetz'ektana chi junaj cua le najter na'leb. Meq'ue chic ərib chi balak'ic xban li māusilal li quixrahi ru le ch'ol junxil. ²³ Ut ac'obresinbilak taxak le ram ut le c'a'ux. ²⁴ Ac'obresinbilak le yu'am ut chexcuank taxak jo' naraj li Dios. Santakej ut chabilakex xban nak nequenau chic li xyalal. ²⁵ Inc'a' chic chextic'ti'ik. Sa' xyalal ban tex-atinak chi ribil ərib xban nak junaj chic ku ut kacha'al chic kib chi kibil kib. ²⁶ Cuan nak nequexjosk'o'. Abanan menumusi li cutan chi toj cuan le josk'il sa' le ch'ol re nak inc'a' texmacobk xban. ²⁷ Moco yal xban ta le josk'il nak teq'ue ərib chi alec xban laj tza. ²⁸ Li ani na-ekl'ac inc'a' chic chi elk'ac. Chi c'anjelac ban sa' xyalal re nak cuank li c'a'ru tixsi rehēb li mac'a' cuanqueb re. ²⁹ Mex-atinac yibru aj atin. Riq'unin ban chabil atin tex-atinak re nak te'xq'ue retal li ani yoquex cui' chi atinac ut tetenk'aheb. ³⁰ Mebanu chic li inc'a' us re nak inc'a' tarahok' xch'ol li Santil Musik'ej eban. Li Dios quixq'ue ere li Santil Musik'ej chok' əretalil nak rehex chic a'an toj sa' li cutan nak tixtz'akobresi le colbal. ³¹ Isihomak sa' le ch'ol chi junaj cua li c'ahinc, li josk'il, ut li po'oc ib. Jo'can ajcui' li chok'inc ib ut li majecuanc. Checanabak chí junaj cua chixjunil li māusilal. ³² Chabilakex cheribil ərib. Cheruxtana eru chi ribil ərib. Ut checuyak emac chí ribil ərib jo' nak li Dios quixcuy emac sa' xc'aba' li Cristo.

5

Tento te'cuank sa' xyalal li ralal xc'ajol li Dios

¹ Laex chic li ralal xc'ajol li Dios ut raroquex xban. Jo'can nak chetzolak ərib riq'unin li Dios re nak tebanu jo' naraj a'an. ² Cherahak ərib chi ribil ərib jo' nak coxra lao li Cristo ut quixmayeja rib chiru li cruz re kacolbal. Ut li Dios quisaho' xch'ol riq'unin xban nak chanchan li sununquil ban chiru. ³ Laex chic li ralal xc'ajol li Dios. Jo'can nak inc'a' chic chi cuank li co'betac yumbetac sa' eyank chi moco tex-atinak chirix. Inc'a' tacuank li māusilal sa' eyank. Ut inc'a' terahi ru li jalan aj e. Moco xc'ulub ta chích laj pabanel xbanunquil a'an. ⁴ Inc'a' tayemank sa' eyank li yibru aj atin chi moco li tqntil atin chi moco cheye li mayehec' naraj xban nak inc'a' us. Chexbantioxink ban chiru li Dios. ⁵ Tənau chi tz'akal nak li neque'xbanu māusilal inc'a' te'tz'akonk sa' lix nimajcual xcuanylil li Cristo ut li Dios. Chi moco eb laj co'bet ut eb laj yumbet chi moco li neque'xrahi li jalan aj e xban nak li mac a'an juntak'et riq'unin xlok'oninqwil li jalanił dios. ⁶ Meq'ue ərib chi balak'ic xbaneb li neque'atinac ut neque'xye nak moco nimla mac ta xbanunquil li c'a'ak re ru a'in, xban nak nachal xjosk'il li Dios sa' xbeneb li neque'k'etoc re li ratin. ⁷ Mejunaji ərib riq'uineb a'an xban nak inc'a' useb xna'leb. ⁸ Junxil quexcuan chak sa' xk'ojoyinal ru li mac. Abanan, anakcuan rehex

chic li Kacula' ut cuanquex chic sa' xcutan saken. Jo'can nak chexcuanq sa' xyalal. ⁹ Li ani quicutanobresic lix ch'ol xban li Dios naxnau lix yatal ut nacuan sa' chabilal ut sa' tiquilal. ¹⁰ Chetauhak xyalal li c'a'ru naraj li Kacula'. ¹¹ Mejunaji chic ərib riq'uineb li inc'a' neque'xnaux yyalal ut neque'xbanu li c'a'ak re ru mac'a' na-oc cui'. Laex ban chic texch'olobank re li xyalal chiruheb nak inc'a' us yoqueb. ¹² Xutanal chok' ke lao atinac chirix li inc'a' us li neque'xbanu chi mukmu. ¹³ Nak tacutonobresik lix ch'oleb cutan saken chic chanru nak cuanqueb. Jo'ca'in tz'ib'anbil sa' li Santil Hu: Ajsi acuu, laat li yocat chi cuarc. Matcana chi camenak sa' la mac, ut li Cristo tixcutanobresi la c'a'ux. (Is. 60:1) ¹⁵ Cheq'uehak retal chanru le yu'am. Mebanu jo' neque'xbanu li inc'a' useb xna'leb. Chebanuhak ban jo' neque'xbanu li cuanqueb xna'leb. ¹⁶ Menumsi li cutan chi mac'a' xyalal. Chebanu ban li us nak taruk tebanu xban nak ch'a'aj li cuanc sa' eb li cutan a'in. ¹⁷ Jo'can nak moco jo'cakex ta li mac'a'eb xna'leb. Chetauhak ban ru li c'a'ru naraj li Kacula'. ¹⁸ Mexcala chic xban nak napo'oc ch'olej. Chinujak ban le ch'ol riq'uin li Santil Musik'ej. ¹⁹ Cheserak'i chi ribil erib lix lok'al li Dios, ut teye li salmos ut texbichank re xlok'oninquil li Kacula'. Chexbichank ut chelok'oni li Kacula' chi anchal ech'ol. ²⁰ Ut junelic chexbantioxink chiru li Acuabej Dios sa' xc'aba' li Kacula' Jesucristo riq'uin chixjunil li c'a'ru neque'ul.

Chepabak erib chi ribil erib

²¹ Chepabak erib chi ribil erib re xq'uebal xlok'al li Cristo. ²² Ex ixakilbej, chepabak le belom jo' nak nequepab li Kacula' Jesucristo. ²³ Chexpabank chiru xban'nak a'an li najolomin re li rixakil jo' nak li Cristo najolomin rebeb laj paabanel. Abanan li Cristo, a'an ajcui' laj Colol rebeb laj paabanel ut eb laj paabanel jo' li rok ruk' li Cristo. ²⁴ Jo' nak neque'paban laj paabanel chiru li Cristo, jo can ajcui' nak li ixakilbej te'paabank chiruheb lix belom riq'uin chixjunil. ²⁵ Jo'can ajcui' laex belomej, cherahak le rixakil jo' nak li Cristo quixraheb laj paabanel nak quixk'axtesi rib chi camc re xcolbaleb. ²⁶ Li Jesucristo quixmayeja rib re xsantobresinqubel laj paabanel riq'uin nak te'xc'ul li cubi ha' sa' xc'aba' li Cristo ut riq'uin li ratin li Dios. ²⁷ Li Cristo quixbanu a'an re nak tixc'uleb li ralal xc'ajol chi k'axal nim xlok'al, chi mac'a' xmac ut chi mac'a' xpaltl chiru. ²⁸ Jo'can ajcui' eb li belomej, tento nak te'xra li rixakil jo' nak neque'xra ribeb a'an. Li ani naxra li rixakil, naxra ajcui' rib a'an. ²⁹ Ma ani xic' naril rib. Naxra ban rib ut naxch'olani rib jo' nak li Cristo naxra ut naxch'olani li ralal xc'ajol. ³⁰ Nocoxra ut nocoril xban nak lao jo' rok ruk' li Cristo. Lao jo' lix quiq'uel ut jo' lix bakel. ³¹ Li belomej ut li ixakilbej junaj chic ruheb jo' tz'ib'anbil sa' li Santil Hu li naxye chi jo'ca'in: Nak tasumlak, li cuink tixcanab lix na' eyucua' re nak tixlak'ab rib riq'uin li rixakil. Ut junajak chic ruheb chi xca'bichaleb. ³² K'axal lok' li xyalal li na'leb a'in. Abanan lain ninye ere nak naxc'ut ajcui' chiku nak lao aj paabanel junajo chic riq'uin li Cristo. ³³ Jo'can nak tinye cui'chic ere nak li belomej chixrahak li rixakil jo' nak naxra rib a'an. Ut li ixakilbej chix-oxlok'i lix belom.

6

¹ Jo'can ajcui' laex, alalbej. Chex-abink chiru le na' eyucua' sa' xc'aba' li Kacula' xban nak a'an k'axal us xbanunquil. ² Che-oxlok'i le na' eyucua'. A'an a'in lix ben kataklanquial cuan c'a'ru yechi'nbil ke cui takabanan a'an. ³ Ut li yechi'nbil ke, a'an a'in: Cui neque-oxlok'i le na' eyucua', k'axal

us tex-əlk ut tənajtok' ru le yu'am li tixq'ue li Dios arin sa' ruchich'och'. ⁴ Ex na'bej ex yucua'bej, mečhik' xjosk'ileb le ralal ec'ajol chi mäc'a' rajbal. Cheq'uiresihakeb ban sa' xyalal riq'uin xk'usbaleb ut riq'uin xtibaleb sa' xc'aba' li Kacua' Jesucristo. ⁵ Ex aj c'anjal, chex-abink chiruheb le patrón arin sa' ruchich'och'. Chexc'anjelak chiruheb chi anchal ech'ol ut sa' xyalal jo' nak nequexc'anjelac chiru li Cristo. ⁶ Moco toj yokex ta cherilbal nak təbənu le c'anjal re nak sahak xch'ol le patrón eriq'uin. Chexc'anjelak ban chiru le patrón jo' nak yokex chi c'anjelac chiru li Cristo. Chi anchal ech'ol chebənuhak li naraj li Dios. ⁷ Chexc'anjelak chi anchal ech'ol jo' nak yoquex chi c'anjelac chiru li Kacua' ut mäcua' chiruheb li cuink. ⁸ Laex nequenau nak cui chäbil təbənu chejunjunkal a'an ajcui' li rekaj tec'ul riq'uin li Kacua' usta cuan epatrón usta mäc'a'. ⁹ Jo'can ajcui' laex patrón, jo' nak laj c'anjal nac'anjelac chi anchal xch'ol cheru, jo'can ajcui' nak laex tetaklaheb sa' xyalal. Canabomak xtalquileb sa' josk'il. Nequenau nak laex cuan epatrón sa' choxa jo' ajcui' eb a'an. Li patrón, a'an li Kacua' Dios ut a'an moco jun ta sa taril ut jun ta xic' taril.

Li kac'anjelebal q'uebil ke xban li Dios

¹⁰ Toj cuan c'a'ru nacuaj xyebal ere ut a'an a'in: Che'cacubresik le ch'ol sa' le pabal riq'uin lix nimal xcuanylal li Kacua' li cuan eriq'uin. ¹¹ Jo'can ut chetikibak erib riq'uin chixjunil lix c'anjelebal li Dios re nak xakxokex chi tz'akal ut yokex chixcolbal erib chiru laj tza nak yok chebalak'inquil. ¹² Moco yoco ta chixyalbal kak'e riq'uin cuink. Yoco ban chi pletic riq'uin q'uila pay ru chi mäus aj musik'ej li cuanqueb xcuanylal sa' eb li cutan a'in, li neque'taklan sa' ik' ut sa' li ruchich'och' li cuan sa' xk'oijinal ru li mac. ¹³ Xban nak nocoplectic riq'uin li mäus aj musik'ej, jo'can nak cuank eriq'uin chixjunil le c'anjelebal li q'uebil ere xban li Dios re nak cauhak erib chixcolbal erib chiru laj tza yalak jok'e tixyal eralenquil. ¹⁴ Xakxokex bi' chi cau. A'an a'in li tac'anjelak cheru re xcolbal erib chiru laj tza. Li yal tac'anjelak jo' xc'amal esa' ut li tiquil ch'olej tac'anjelak jo' li ch'ich' naramoc re le ch'ol. ¹⁵ Cauresinbilakex re xyebal resil li colba-ib ut a'an tac'anjelak ere jo' exab cherok. ¹⁶ Chirix chixjunil a'in chicuank ajcui' le pabal. Ut a'an tac'anjelak ere jo' le ramleb ch'ich'. Le pabal tac'anjelak re xcolbal erib chiru laj tza nak tixyal eralenquil. Riq'uin a'in taruk techup xxamlel lix tzimaj laj tza. ¹⁷ Li colba-ib tac'anjelak ere jo' nak nac'anjelak re li soldado lix tz'apbal xjolom. Li Santil Musik ej tixc'ut cheru li ratin li Dios. A'an tac'anjelak cheru jo' nak nac'anjelak li ch'ich' chiru li soldado. ¹⁸ Ut yo'on cuankex. Junelic chextijok jo' naxc'ut cheru li Santil Musik'ej. Junelic chextz'amank chiru chi anchal ech'ol nak li Dios tatenk'ank ere. Ut chetz'ama chiru nak tixtenk'ahet chixjunileb li ralal xc'ajol li Dios. ¹⁹ Ut chextijok ajcui' chicuix lain re nak chixq'ue taxak cuatin li Dios re xyebal resil li colba-ib ut chixq'ue taxak xacuiall inch'ol chixyebal resil nak li colba-ib reheb ajcui' li mäcua'eb aj judío. ²⁰ Taklanbilin xban li Dios chixyebal li resilal a'an. Ut xban xyebal resil li colba-ib nak cuanquin chi prexil anakcuan. Chextijok chicuix re nak tinch'olob xyalal li colba-ib chi cau inch'ol jo' q'uebil cue xbanunquil xban li Dios.

Laj Pablo naxq'ue xsahil xch'oleb

²¹ Ninc'oxla nak teraj tenua chanru cuanquin ut c'a'ru yoquin chixbanunquil. Jo'can nak yoquin chixtaklanquil laj Tíquico eriq'uin. A'an jun li herman k'axal raro kaban, ut chäbil aj c'anjal chiru li Dios. A'an tixye ere chanru cuanquin. ²² Yoquin chixtaklanquil laj Tíquico eriq'uin re xserak'inquil ere chanru cuanco arin. Ut nak tenua chanru cuanco,

chic'ojlak taxak ech'ol riq'uin a'an. ²³ A' taxak li tuktuquil usilal li naxq'ue li Acuabej Dios ut li naxq'ue li Kacua' Jesucristo chi cuank eriq'uin laex chejunilex aj pabanel. Ut chi cuank taxak eriq'uin li rahoc ib ut lix caciulal ech'ol sa' le pabal. ²⁴ Chi cuank taxak li rusilal li Dios eriq'uin chejunilex laex li nequexrahoc re li Kacua' Jesucristo chi anchal ech'ol ut chi junelic. Jo'can taxak.

Li Hu li Quixtz'iba li San Pablo reheb laj Filipos

Laj Pablo quixtakla xsahil xch'oleb

¹ Lain laj Pablo. Yoquin chixtz'ib'anquil li hu a'in cuochben laj Timoteo. Lao aj c'anjel chiru li Jesucristo. Li hu a'in, a'an ere laex li nequexc'amoc be sa' xyankeb laj pabanel aran Filipos ut ere ajcui' laex li nequexten' an sa' li c'anjel aran. Ut ere ajcui' chejunilex laex aj pabanel aran Filipos, li junaj chic eru riq'unin li Jesucristo. ² Chicuank taxak eriq'unin li usilal ut li tuktuqu'ilal li naxq'ue li Dios li kaYucua' ut li naxq'ue li Kacua' Jesucristo.

Laj Pablo quitijoc chirixeb laj pabanel

³ Rajlal nak nequexjultico' cue, ninbantioxi chiru li Dios. ⁴ Ut junelic nintijoc cherix chi sa sa' inch'ol. ⁵ Nasaho' sa' inch'ol xban nak chalen nak xexpaban xeq'ue ech'ol chintenk'anquil xyebal resi'l li colba-ib toj chalen anakcuan. ⁶ Chalen nak xexpaban, li Dios yo chi c'anjelac eriq'unin. Ut ninnau nak junelic textenk'a toj tatz'aklok ru le pabal sa' li cutan nak tol-elk cui'chic li Jesucristo. ⁷ Xban nak nequeq'ue ech'ol chi c'anjelac chiru li Cristo, jo'can nak junelic nequexinc'oxla ut k'axal sa sa' inch'ol eriq'unin. Laex xextz'akon cuochben riq'unin li usilal li naxq'ue li Cristo. Xextz'akon ajcui' cuiq'unin riq'unin rahl ch'olej nak cuanquin chi prexil ut xextz'akon ajcui' cuiq'unin nak yoquin chixch'olobanquil xyalal li colba-ib reheb li cuanqueb xcuanquil re nak te'xnau nak tz'akal yal li c'a'ru yoco chixch'olobanquil. ⁸ Li Dios naxnau nak c'ajo' nequexinra. Ut li rahoc a'in, a'an q'uebil cue xban li Cristo. ⁹ Ut li nintz'ama chiru li Dios nak nintijoc cherix, a'an a'in: nak k'axal cui'chic cherahak erib chi ribil erib. Ut chinumtak taxak li rahoc ut chiq'uehek' taxak ena'leb re xtaubal bar cuan li tz'akal yal. ¹⁰ Nintz'ama chiru li Dios nak textenk'a re nak junelic tenau c'a'ru li us ut c'a'ru li inc'a' us. Ut ticak taxak le ch'ol re nak ma'ani tacuech'ink erix chalen nak tol-elk cui'chic li Jesucristo. ¹¹ Ut riq'unin li chabilal li q'uebil ere xban li Jesucristo, nequeq'ue xlok'al li Dios.

Li Dios quixsuk'isi chok' usilal li rayلال li quixc'ul laj Pablo

¹² Ex inherman, nacuaj nak tenau nak chixjunil li yoquin chixc'ulbal, a'an yo chi c'anjelac re xyebal resil li colba-ib yalak bar. ¹³ Cuan xyalal nak xine'xq'ue sa' tz'alam. Eb laj ilol prex jo'queb ajcui' chixjunileb li cuanqueb sa' li palacio neque'xnau nak cuanquin sa' tz'alam xban nak ninc'anjelac chiru li Cristo. ¹⁴ Ut nabaleb laj pabanel xe'xcacuubresi xch'oleb sa' xpabaleb sa' xc'aba' li Kacua' xban nak xe'xq'ue retal nak cau inch'ol usta cuanquin chi prexil sa' xc'aba' li Jesucristo. Ut neque'xch'olob xyalal li ratin li Dios chi mac'a' xxiuheb. ¹⁵ Yal nak cuan li neque'xye resil li Cristo yal xban nak niquine'xcakali ut niquine'xcuech'i. Abanan cuan ajcui' li neque'xye resil li Cristo chi anchal xch'oleb ut sa' xyalal. ¹⁶ Neque'xch'olob xyalal xban nak niquine'xra ut neque'xnau nak cuanquin chi prexil xban nak ninq'ue xcuanquil li colba-ib. ¹⁷ Aban li jun ch'ol chic neque'xye resil li Cristo yal xban nak cuan c'a'ru neque'xra ut moco chi anchal ta xch'oleb neque'xbanu. Neque'xbanu chi jo'can yal re xq'uebal xrahil inch'ol nak cuanquin chi prexil. ¹⁸ Abanan mac'a' naxye. Usta chi anchal xch'oleb, usta inc'a', yoqueb chixyebal resil li Jesucristo. Ut nasaho' inch'ol riq'unin a'an. ¹⁹ Ut junelic tasahok' inch'ol xban nak ninnau nak yoquex chi tijoc chicuix. Ut li Santil

Musik'ej natenk'an cue. Jo'can nak nasaho' sa' inch'ol xban nak ninnau nak chixjunil li ninc'ul, li Dios tixsuk'isi chok' usilal chok' cue. ²⁰ Inc'a' nacuaj xxut Nobresinquel cuib riq'uin xbanunquil li c'a'ak re ru inc'a' us. Nacuaj ban nak junelic cuank xcaçuilal inch'ol re xyebal resil li Jesucristo. Nacuaj xq'uebal xlok'al li Cristo anakcuan ut chi junelic riq'uin li ninbanu ut riq'uin ajcui' lin camic. ²¹ Lain, nak toj yo'yoquin, cuanquin chi sum atin riq'uin li Cristo. Abanan k'axal raj cui'chic us li çamc chok' cue xban nak ninnau nak tinxic riq'uin. ²² Abanan cui li Dios toj tixq'ue inyu'am sa' ruchich'och' re nak tinc'anjelak chiru li Käcua', inc'a' ninnau bar cuan li k'axal us chok' cue. ¿Ma us nak yo'yoquin malaj ut us nak tincamk? ²³ Ch'a'aj chok' cue xnaubal bar cuan li k'axal us. Nacuaj raj çamc re nak tinxic riq'uin li Cristo. A'an raj li k'axal us chok' cue lain. ²⁴ Abanan chok' ere laex, us nak yo'yoquin. ²⁵ Ninnau chi tz'akal nak naru texintenka'. Jo'can nak ninnau nak tincuank sa' eyank re etenk'anquil. Texintenka're na sakah sa' ech'ol nak yokex chi q'usic sa' le pabal. ²⁶ Ninc'oxla nak tincuulak cui'chic eriq'uin ut nak teril cui'chic cuu, tasahok' sa' le ch'ol sa' xc'aba' li Jesucristo. ²⁷ Li k'axal lok' xbanunquil, a'an a'in: Checxuank sa' xyalal riq'uineb le ras eritz'in jo' ec'ulub xban nak laex ac xepab li Jesucristo. Usta cuanquin eriq'uin, usta ma anihin, nacuaj rabinquil resil nak cau ech'ol sa' le pabal. Ut nacuaj ajcui' rabinquil nak junaj le ch'ol ut junaj ec'a'ux chixyebal resil li colba-ib sa' xc'aba' li Jesucristo. ²⁸ Inc'a' texxucuak chiruheb li xic' neque'iloc ere. Cui laex inc'a' texxucuak, eb a'an te'xq'ue retal nak laex texcolek' ut eb a'an te'sachek'. Ut li Käcua' Dios, a'an li tac'utuk re li na'leb a'in chiruheb. ²⁹ Q'uebil ere le matan xban li Dios re xpabankuil li Cristo. Ut moco ca'aj cui' ta tec'ul li rusilal re xpabankuil. Usilaj ban cui' nak q'uebil ere xc'ulbal li raylal sa' xc'aba' li Cristo. ³⁰ Ac xeril chanru nak ninyal ink'e chixq'uebal xcuanguil li colba-ib ut nequerabi resil nak toj yoquin ajcui' xyalbal ink'e. Ut nequeyal ajcui' ek'e laex xq'uebal xcuanguil li colba-ib cuochbenex.

2

Chetzolak erib riq'uin li Cristo

¹ Anakcuan nacuaj xpatz'bal ere: ¿Ma cuan xyalal chok' ere laex nak xepab li Cristo? ¿Ma c'ojo' ech'ol xban nak raroquex xban li Cristo? ¿Ma junaj ru le ch'ol chejunilex xban li Santil Musik'ej li cuan eriq'uin? ¿Ma nequera erib chi ribil erib? ¿Ma nequeruxtana eru chi ribil erib? ² Anakcuan nintz'ama ajcui' cheru nak junajak taxak ech'ol re nak junelic sahak sa' inch'ol eriq'uin. Cherahak erib chi ribil erib ut checxuank sa' xyalal chi ribil erib ut junajak taxak le c'a'ux. ³ Inc'a' tebanu c'a'ak re ru yal xban nak cuan li c'a'ru tera, chi moco tebanu yal re xnimobresinquel erib. Checubsihak ban erib. Mec'oxla nak k'axal nim ecuanquil chiruheb le ras eritz'in. ⁴ Mexc'oxlac ca'aj cui' chirix c'a'ru us chok' ere laex. Chexc'oxlak aj ban cui' chirix li us taelk chok' reheb le ras eritz'in. ⁵ Chetzolak erib riq'uin li Jesucristo re nak juntak'etak le na'leb riq'uin lix na'leb a'an. ⁶ Li Jesucristo tz'akal Dios, aban inc'a' quic'oxlac xcanabanquil lix lok'al. ⁷ Quixcanab ban lix lok'al nak quic'ulun sa' ruchich'och'. Tz'akal cuink jo' lao nak quiyo'la sa' ruchich'och' ut quic'anjelac sa' kayank. ⁸ Ut nak quicuan sa' ruchich'och' quicubsi rib ut quixbanu li quiraj li Dios toj retal nak quicam chiru li cruz. ⁹ Ut xban nak quixbanu chi jo'can, li Dios quixq'ue xnimal xlok'al. "Käcua'" quixq'ue chok' xc'aba' xban nak a'an li k'axal lok' ut li k'axal nim xcuanguil. ¹⁰ Li Dios quixbanu a'an re nak chixjunileb te'xcuik'ib rib chixlok'oninquil li Käcua' Jesucristo nak te'rabi lix c'aba'. Te'xcuik'ib ribeb chixlok'oninquil

chixjunileb li cuanqueb sa' choxa ut li cuanqueb sa' ruchich'och' jo'queb ajcui' li camenakeb. ¹¹ Li Dios quixq'ue xlok'al li Jesucristo re nak chixjunileb te'xch'olob xyalal riq'uin xtz'_umal re nak li Jesucristo, a'an li Kacua' ut te'xq'ue xlok'al li Acuabej Dios.

Eb laj pabanel, a'anakeb lix cutan xsaken li ruchich'och'

¹² Ex inherman, raroquex inban, junelic xexpaban chicuu nak cuanquin chak eriq'uin. Jo'can ajcui' tebanu anakcuán nak ma anihin eriq'uin. Junelic checx'oxlak chirix le colbal. Cheq'uehak taxak ech'ol chixbanunquil li c'a'ru naraj li Kacua' re nak tatz'aklok ru le colbal. ¹³ Li Dios yo chi c'anjelac eriq'uin ut yo chetenk'anquil re nak sa' le ch'ol taalak chak xbanunquil li c'a'ru naraj ut a'an ajcui' naq'uehoc ecuanquil chixbanunquil. ¹⁴ Mechoki erib ut mécuech'i erib. Chebanuhak ban chixjunil sa' xyalal. ¹⁵ Chebanuhak chixjunil sa' xyalal re nak chic'utunk nak chi anchal ech'ol nequexpaban ut re nak ma ani tatinak cherix. Laex ralal xc'ajol li Dios ut mac'a'ak emac usta cuanqueb sa' xyankeb laj mac, li inc'a' useb xna'leb. Ut xban nak tic ech'ol, nak yokex chixyebal resil li colba-ib chiruheb, chiruheb chanchanakex li chahim li naletz'un chiru k'oijin. ¹⁶ Cui jo'can yokex, c'ajo' nak tasahok' sa' inch'ol eriq'uin nak tol-elk cui'chic li Jesucristo. Tasahok' inch'ol xban nak tinnau nak cuan rajbal chixjunil li xinbanu nak xinc'anjelac sa' eyank. ¹⁷ Cui tincamsik xban nak xexintenka'sa' le pabal, mac'a'naxye. Tasahok' sa' inch'ol nak textz'akonk laex riq'uin li sahil ch'olejil li tinc'ul lajin. ¹⁸ Chisahok' taxak sa' kach'ol sa' comonil.

Laj Timoteo ut laj Epafroditó taklanbileb xban laj Pablo riq'uineb laj Filípos

¹⁹ Cui li Kacua' Jesucristo naraj, chi seb tintakla laj Timoteo cherilbal. Tac'ojlak inch'ol nak tincuabi eresil. ²⁰ Ma jun chic cuan juntak'et xc'a'ux cuiq'uin jo' laj Timoteo. A'an k'axal nac'oxlac ajcui' cherix laex. ²¹ Eb li jun ch'ol chic junes li us chok' reheb a'an neque'xc'oxla ut inc'a' neque'xc'oxla xbanunquil li naraj li Jesucristo. ²² Ac nequenau nak chabil xna'leb laj Timoteo. Nequenau chanru nak naxq'ue xch'ol chi c'anjelac cuochben chixyebal resi'l li colba-ib. Ninxtenka' jo' junak alalbej naxtenka'lix yucua'. ²³ Jo'can nak nacuaj xtalqunil laj Timoteo eriq'uin nak ac xinnau chanru tincanak cui' arin. ²⁴ Ut ninnau nak li Kacua' tinixtenka' re nak taruk tincuulak chi junpat eriq'uin. ²⁵ Ut ninc'oxla ajcui' nak tento tintakla li herman Epafroditó eriq'uin. A'an naxq'ue ajcui' xch'ol chi c'anjelac cuochben ut a'an li xetakla chak chintenkanquil sa' ec'aba' laex. ²⁶ Taraj cui'chic rilbal eru. Yo chec'oxlanquil xban nak naxnau nak xerabi resil nak xyajer. ²⁷ Yal nak quiyajer. Ca'ch'in chic ma quicam. Abanan li Dios quiril xtok'obal ru ut quiril ajcui' xtok'obal cuu lajin. Jo'can nak quixq'uirtesi. Cui ta quicam, k'axal raj cui'chic quixq'ue xrahil inch'ol. ²⁸ Jo'can nak nacuaj xtalqunil chi junpat eriq'uin re nak tasahok' sa' ech'ol nak teril cui'chic ru. Ut tasahok' ajcui' sa' inch'ol lain nak tacuulak eriq'uin. Lain ninnau nak a'an chic tatenkan'ank ere. ²⁹ Chec'ulak chi k'axal sa sa' ech'ol xban nak kech aj pabanelil kib. Cheq'uehak xlok'al eb laj pabanel jo'li jun a'an. ³⁰ Nak yo chi c'anjelac chiru li Kacua', ca'ch'in chic ma quicam. Quixq'ue rib sa' raylal re intenk'anquil xban nak ma anihex laex chintenkanquil.

3

Li tiquil ch'olej

¹ Anakcuán ut, ex inherman, chisahok' taxak sa' le ch'ol xban nak rehex chic li Cristo. Li c'a'ru yoquin chixtz'_banquil, ac xinye ajcui' ere. Usta ac

xinye *ere*, tineye cui'chic *ere*. Inc'a' nintitz' xyebal xban nak ninnau nak tac'anjelak cheru. ² Checol erib chiruheb laj balak'. Eb a'an chanchaneb li tz'i' xban nak mac'a'eb xna'leb. Neque'xye nak inc'a' naru tocolek' cui toj maji' nakac'ul li circuncisión. ³ Lao ac xkac'ul li tz'akal circuncisión xban nak lao nakalok'oni li Dios jo' naxc'ut chiku li Santil Musik'ej. A'an li tz'akal circuncisión. Lao nasaho' li kach'ol nak junajo chic riq'uin li Cristo yal xban xnimal rusilal. Macua' riq'uin li nakabalu lao kajunes. ⁴ Lain xinbanu chixjunil li neque'xye eb a'an nak tentó xbanunquil ut naru raj ting'ue xcacuial inch'ol riq'uin. Cui cuan junak naxc'oxla nak ac xbanu chixjunil, us ajcui'. Abanan k'axal cui'chic nabal xinbanu lajin chiru a'an. ⁵ Lain tz'akalin aj Israel. Cuakxakib cutan cuan cue nak xinc'ul li circuncisión. Lin na' inyucua' aj hebreo xcomoneb xstepal laj Benjamín. Lain ajcui' xcomoneb laj fariseo li neque'xbanu chixjunil li tz'ibambil sa' li chak'rab li quiq'uehe' re laj Moisés. ⁶ Xinq'ue inch'ol chixbanunquil chixjunil li chak'rab li neque'xbanu laj fariseo toj retal nak quinrahobtesiheb laj pabanel. Chiruheb laj fariseo mac'a' inmac' xban nak xinbanu chixjunil li tz'ibambil sa' li chak'rab. ⁷ Junxil chixjunil a'in xinq'ue xcuanguard. Abanan anakcuan ninye nak mac'a' na-oc cui' xban nak k'axal cui'chic lok' xpabankuil li Cristo. ⁸ Relic chi yal chixjunil li c'a'ak re ru xinbanu chak junxil mac'a' chic na-oc cui' chicuu anakcuan xban nak k'axal cui'chic nim xlok'al xpabankuil li Kacua' Jesucristo. Re nak lajin chic re li Cristo, xintz'ektana chixjunil li xinbanu chak junxil. A'an yal mul aj chic chicuu anakcuan. ⁹ Lain nacuaj nak junajakin riq'uin li Jesucristo. Inc'a' naru tacuank xtiquilal inch'ol chiru li Dios yal riq'uin xbanunquil li naxye li chak'rab li quiq'uehe' re laj Moisés. Li Dios naxq'ue xtiquilal inch'ol riq'uin xpabankuil li Cristo. ¹⁰ Xincanab xbanunquil chixjunil li quinbanu chak junxil re nak tincuank chi sum atin riq'uin li Cristo. Nacuaj xc'ulbal lix cuanquilal li Dios li quicuaclesin cui'chic re li Cristo chi yo'yo sa' xyankeb li camenak. Nacuaj tintz'akonk riq'uin li rayal li quixc'ul ut nacuaj nak tinbanu jo' quixbanu li Cristo nak quixq'ue rib chi camc. ¹¹ Ut ninyo'oni nak li Dios tinixcuaclesi cui'chic chi yo'yo sa' xyankeb li camenak.

Chikayal kak'e re nak tqatz'aklok ru li kapabäl

¹² Inc'a' ninye nak ac xtz'akloc ru lin pabal chi moco ninye nak ac xinc'ul chixjunil lix cuanquinal. Abanan yoquin chixyalbal ink'e re nak toxin-cuechaní chixjunil li tinmatani riq'uin li Jesucristo xban nak li Jesucristo quinixq'ue chok' ralal. ¹³ Ex inherman, ninnau nak toj maji' ninc'ul chixjunil li tinmatani riq'uin li Cristo. Abanan li ninbanu, a'an a'in: Nincanab xc'oxlanquil li ac xnume' ut ninq'ue inch'ol chirechaninquil li tachalk mokon. ¹⁴ Ninyal ink'e chirechaninquil lin matan jo' nak naxyal xk'e junak chi alinac re tarechani lix k'ajcamunquil. Abanan li tincuechaní lajin, a'an li junelic yu'am li naxyechi'i li Dios reheb li neque'pabán re li Jesucristo. ¹⁵ A'an taxak li chikara lao chikajunilo li ac cau kach'ol sa' li kapabäl. Abanan cui laex inc'a' nequec'oxla chi jo'can, li Dios tac'utuk li xyalal cheru. ¹⁶ Jo'can nak chikac'oxlahak ut chikabaluuhak li jo' q'ual nakanau nak us xbanunquil. ¹⁷ Ex inherman, junajak taxak le ch'ol chixbanunquil li ninbanu lajin. Lain yoquin chi c'amoc be cheru sa' li tiquilal. Ut chetzolak ajcui' erib riq'uineb li neque'xbanu jo' ninbanu lajin. ¹⁸ Nabal sut ac xinye ere nak cuanqueb li inc'a' us yoqueb chixbanunquil. Riq'uin li inc'a' us neque'xbanu, neque'xtz'ektana lix camic li Cristo chiru li cruz. Nayot'e' inch'ol riq'uin li yoqueb chixbanunquil ut ninyabac xban xrahil inch'ol nak ninye cui'chic ere. ¹⁹ Eb a'an inc'a' us yoqueb. Li c'a'ru neque'xrahi ru xbanunquil, a'an chic lix dioseb chiruheb xban nak junes a'an chic

neque'xc'oxla. Neque'xnimobresi ribeb riq'uin xbanunquil li inc'a' us, usta xutanal raj chok' reheb. Junes li c'a'ru cuan sa' ruchich'och' neque'xc'oxla. Eb a'an te'sachek' sa' li tojba mac. ²⁰ Abanan lao nococ'oxlac chirix li cuan sa' choxa xban nak lao reho chic li tz'akal Dios ut yoco chiroybeninquel nak tol-elk cui'chic li Kacua' Jesucristo laj Colol ke. ²¹ A'an k'axal nim xcuanquil sa' xben chixjunil li c'a'ak re ru. Riq'uin lix nimal xcuanquilar, li Jesucristo tixjal li katibel li mact'a' xcuanquil ut tixq'ue ke jun chic k'axal lok' jo' li re a'an.

4

Junelic taxak cauhak le ch'ol sa' le pabal

¹ Ex inherman, raroquex inban, nacuaj rilbal eru. C'ajo' nasaho' inch'ol eban. Ninc'oxla nak laex jo' jun ink'ajc'amunquil riq'uin li c'anjal xinbanu sa' eyank. Junelic taxak cauhak ech'ol sa' le pabal. ² Ut nintz'ama ajcui' chiruheb lix Evodia ut lix Síntique nak te'xyib ru lix ch'a'ajquilaleb sa' xyalal re nak junajakeb chic xch'oleb chiru li Kacua'. ³ Laj Sícigo chabil aj c'anjal cuochben. Jo'can nak nintz'ama chiru nak tixtenk'aheb li ixk a'in. Cau xe'c'anjelac chintenk'anquil xyebal resil li colba-ib. Jo'can ajcui' xbanu laj Clemente ut chixjunileb li cuech aj c'anjelil. Eb a'an tz'ibanol xc'aba'eb xban li Dios sa' li hu tz'ibanol cui' xc'aba'eb chixjunileb li colbileb. ⁴ Chisahok' taxak sa' ech'ol chí junelic xban nak junajex chic riq'uin li Kacua'. Ut jun sut chic tinye ere: Chi sahok' taxak sa' ech'ol. ⁵ Junelic checxuanca' tulanil re nak chixjunileb te'xq'ue retal le chabil. Ut chijulticok' ajcui' ere nak chi seb tachalk li Kacua'. ⁶ Mac'a' c'a'ak re ru yok cui' ec'a'ux. Cheye ban re li Kacua' c'a'ru le ch'a'ajquil. Ut junelic nak textijok ut nak textz'amank chiru li Kacua', chexbantioxink ajcui' chiru li Dios. ⁷ Ut li Dios taq'uehok ere li tuktuk'il usilal. A'an k'axal lok' chiru chixjunil li c'a'ru nakac'oxla lao. Ut li tuktuk'il usilal li naxq'ue li Dios tixc'ojob le ch'ol ut tixtukub le c'a'ux xban nak junajex chic riq'uin li Cristo.

Junelic chexc'oxlak chirix li c'a'ak re ru yal ut chabil

⁸ Ut anakcuan, jun chic nacuaj xyebal ere. A'an a'in: junelic chexc'oxlak chirix li c'a'ru yal ut li c'a'ru chabil. Chexc'oxlak chirix li tiquilal, li santilal, ut li usilal. Junelic chexc'oxlak chirix li k'axal chabil ut li naru naxq'ue xlok'al li Dios. ⁹ Ut chixjunil li c'a'ru xinye ere ut li c'a'ru xinbanu cheru, a'an ajcui' tebanu laex. Chetzol erib cuiq'uin ut chebanu jo' ninbanu lain. Ut li Kacua' Dios li naq'uehoc tuktuk'il usilal tacuank eriq'uin.

Laj Pablo naxbantioxi lix matan li quiq'uehe' re xbaneb laj Filipos

¹⁰ K'axal nasaho' sa' inch'ol ut ninbantioxi chiru li Kacua' nak qui-ala chak sa' ech'ol intenk'anquil. Ninnau nak inc'a' xecanab inc'oxlanquil. Junxil inc'a' quixq'ue rib cheru intenk'anquil. ¹¹ Inc'a' yoquin chixyebal a'in ere xban nak cuan li c'a'ru nacuaj. Ac xintzol cuib chi cuanc chi c'ojc'o inch'ol riq'uin jo' nimal jo' ch'inal cuan cue. ¹² Xinc'ay chi cuan chi mact'a' c'a'ru cue ut xinc'ay ajcui' chi nabal c'a'ru cue. Ac ninnau chanru li cuanc. Sa sa' inch'ol nak cuan incua ut sa ajcui' sa' inch'ol nak mact'a' incua. C'aynakin chi cuanc chi sa sa' inch'ol usta cuan nabal c'a'ru cue, usta mact'a'. ¹³ Lain nincuy xnumsinquil chixjunil li raylal xban nak li Cristo naxq'ue xcacuillal inch'ol re nak tincuy xnumsinquil. ¹⁴ Abanan, ninbantioxi ere nak niquinęc'oxla ut nak quineten'ka nak cuanquin sa' ch'a'ajquilal. ¹⁵ Ex inherman, li cuanquex Filipos, ac nequenau nak junxil nak xintiquib xyebal resil li colba-ib, eb li herman li cuanqueb sa' jalan na'ajej inc'a' xine'xtenk'a. Ca'aj cui' laex

xextenk'an cue re xk'axbal li cutan nak xin-el Macedonia. ¹⁶ Ut xinetenk'a ajcui' nak cuanquin Tesalónica. Cuib oxib sut xetakla intumin re nak cuank li c'a'ru taç'anjelak cue. ¹⁷ Inc'a' yoquin xtz'amankuil intenk'anquil ere. Li nacuaj laín, a'an a'in: nak tec'uul le k'ajcamunquil li tixq'ue ere li Dios xban nak nequextenk'an. ¹⁸ Anakcuan cuan chixjunil li c'a'ru nacuaj. Tz'akal ajcui' li c'a'ru cuan cue xban nak xinc'ul lin rabal li xetakla chak cue chirix laj Epafrodit. Li mañan a'an li xetakla cue, a'an jun chabil mayej li nacuulac chiru li Dios. ¹⁹ Lin Dios, a'an aj echal re chixjunil ut k'axal nim lix lok'al. Tixq'ue ere chixjunil li napalto' ere sa' xc'aba' li Jesucristo. ²⁰ Lok'oninbil taxak li Dios li kaYucua' anakcuan ut chi junelic k'e cutan. Jo'can taxak.

Laj Pablo naxtakla xsahil xch'oleb

²¹ Cheq'ue xsahil xch'oleb chixjunileb li neque'paban re li Jesucristo. Eb li herman li cuanqueb arin cuiq'uin neque'xtakla ajcui' xsahil ech'ol. ²² Chixjunileb laj pabanel li cuanqueb arin neque'xtakla xsahil ech'ol. Ut k'axal cui'chic nabal xsahil ech'ol neque'xtakla laj pabanel li cuanqueb sa' rochoch li acuabej. ²³ Ut chicuank taxak eriq'uin li rusilal li Kacua' Jesucristo.

Li Hu li Quixtz'iba li San Pablo reheb laj Colosas

Xq'uebal xsahileb xch'ol

¹ Lain laj Pablo. Lain x-apóstol li Jesucristo xban nak jo'can quiraj li Dios. Cuochben li hermano Timoteo nak yoquin chixtz'ibanol li hu a'in. ² Yoquin chi tz'ibac eriq'un laex li cuanquex aran Colosas. Laex ac xepab chi tz'akal li Jesucristo. Laex chic kech aj pabanelil ut rehex chic li Dios. A' taxak li Dios li kaYucua' chi-osobtesink erek ut tixq'ue taxak erek li tuktukil usilal.

Laj Pablo quitijoc chirixeb laj pabanel

³ Nak nocotijoc cherix junelic nakabantioxi chiru li Dios lix Yucua' li Kacua' Jesucristo. ⁴ Nakabantioxi chiru li Dios xban nak xkabi resil nak cau ech'ol chixpabanol li Jesucristo ut xkabi ajcui' resil nak nequera chixjunileb le rech aj pabanelil. ⁵ Nak xerabi resil li colba-ib, xerabi ajcui' resil li sahil ch'olejil c'ylanbil sa' choxa chok' erek. Xban nak yoqueb chirabinquil sa' chixjunil li a'an, nequexpaban ut nequera le rech aj pabanelil. ⁶ Chanru nak xerabi resil li colba-ib laex, jo'can ajcui' nak yoqueb chirabinquil sa' chixjunil li ruchich'och'. Nabal yoqueb chi jalac lix na'lebeb jo'nak xjala le na'leb laex chalen nak xerabi resil li colba-ib ut quetau ru chi tz'akal li rusilal li Dios. ⁷ Lix yalal a'an quich'olobac cheru xban laj Epafras. A'an kochben chi c'anjelac chiru li Cristo ut raro kaban. A'an jun chabil aj c'anjel cheru sa' xc'aba' li Jesucristo. ⁸ Laj Epafras quiyehoc ke nak laex nequera eras eritz'in xban nak li Santil Musik'ej cuan eriq'un. ⁹ Ut chalen nak quikabi resil nak xexpaban, jo'can nak junelic nocotijoc cherix. Nakatz'ama chiru li Dios nak tixc'ut cheru c'a'ru naraj tebanu. Ut nakatz'ama ajcui' chiru li Dios nak li Santil Musik'ej tixq'ue ena'leb chixtaubal ru li xyalal. ¹⁰ Nocotijoc cherix re nak tictak le yu'am xban nak rehex chic li Kacua' ut sahak sa' xc'ol li Dios eriq'un. Junelic chebanuhak li us ut chetauhak ru chi tz'akal lix lok'al li Dios. ¹¹ Nakatz'ama chiru li Dios re nak cuank xcacuil ech'ol xban xnimal xcuanylil Dios. Chisahok' sa' ech'ol ut checuyak xnumsinquil li c'a'ak re ru nachal sa' eben ut inc'a' tach'inank ech'ol. ¹² Chebantioxi chiru li Acuabej Dios li quiq'uehoc ke chitz'akonk riq'unin li sahil ch'olejil kochbeneb laj pabanel li ac xe'xtau xyalal. ¹³ Li Dios corisi rubel xcuanylil laj tza ut coxk'axtesi rubel xcuanylil li C'ajolbej li k'axal raro xban li Dios. ¹⁴ Li Ralal li Dios quicam chiru li cruz re kacolbal ut quicuy quixsach li kamac.

Xban xcamic li Jesucristo, cuanco chic sa' usilal riq'unin li Dios

¹⁵ Li Dios inc'a' na-ilman ru. Abanan nakanau chanru li Dios xban nak li Ralal quiculun sa' ruchich'och' chixc'utbal chiku. Li Jesucristo a'an li k'axal nim xcuanylil chiruheb chixjunil li que'yo'obtesic. ¹⁶ Sa' xc'aba' a'an, li Dios quixyo'obtesi chixjunil li c'a'ak re ru cuan sa' choxa, jo' ajcui' li cuan sa' ruchich'och'. Li Dios quixyo'obtesi chixjunil li na-ilman ru, jo'queb ajcui' chixjunileb li musik'ej, li inc'a' na-ilman ru. A' yal chanru lix c'anjel li junjunk ut lix cuanquileb, li Dios quiyo'obtesin reheb sa' xc'aba' li Jesucristo ut a'an laj echal reheb. ¹⁷ Li Cristo ac cuan ajcui' chak nak toj maji' neque'yo'obtesic li c'a'ak re ru. Ut chixjunil li c'a'ak re ru quiyo'obtesic q'uebil sa' xna'aj ut aran quicana xban nak li Cristo a'an yal re sa' xben. ¹⁸ Ut a'an ajcui' najolomin ke lao aj pabanel ut junajo chic riq'unin li Cristo. A'an li naq'uehoc re li kayu'am. A'an li xben quicuacli cui'chic chi yo'yo sa'

xyankeb li camenak ut a'an li k'axal nim xcuauquil sa' xben chixjunil. ¹⁹ Li Jesucristo, a'an tz'akal Dios ut riq'uin a'an cuan chixjunil li cuauquil xban nak jo'can quiraj li Acuabej Dios. ²⁰ Xban xcamic li Jesucristo, chixjunil li cuan sa' choxa jo' ajcui' li cuan sa' ruchich'och' naru tacuank chi sum atin riq'uin li Dios. Ut xban lix quiq'uel li quihoye' chiru li cruz, li Jesucristo quixq'ue li tuktukuil usilal. ²¹ Junxil inc'a' nequepab li Dios. Ut xban li mausilal cuan sa' le ch'ol, xic' nequeril li Dios ut junes li inc'a' us nequebanu. ²² Abanan anakcuan xban lix camic li Cristo quexc'am sa' usilal riq'uin li Dios. Xban nak li Cristo quicam sa' kac'aba', naru toxk'axtesi chiru li Dios chi ac santobresinbilo ut chi mac'a'ak chic kamac ut chi tz'akalak re ru li kapab'al. ²³ Abanan tento nak texpabank chi tz'akal ut cauhak ech'ol riq'uin li Dios sa' le pabal. Mecanab xyo'oninquil li yechi'ibil ere sa' xc'aba' li colbaib xban nak laex ac nequenau nak sa' ec'aba' quicam li Jesucristo. Ut li resil li ac xerabi laex yoqueb chirabinquil sa' chixjunil li ruchich'och'. Lain laj Pablo, tenebanbil sa' inben xyebal resilal li colbaib.

Laj Pablo cau xch'ol chi c'anjelac sa' xyank'eb li macua'eb aj judío

²⁴ Lain nasaho' sa' inch'ol nak yoquin chixc'ulbal li raylal sa' ec'aba'. Li Cristo quixye nak te'xc'ul li raylal li ralal xc'ajol. Jo'can nak nasaho' sa' inch'ol nak yoquin chi tz'akonc riq'uin li raylal jo' quixc'ul li Cristo sa' xc'aba'eb chixjunileb li neque'paban re. ²⁵ Li Dios xinixq'ue chi c'anjelac chiruheb laj pabanel. Jo'can nak re etenk'anquil nak ninc'anjelac cheru re xch'olobanquil chi tz'akal lix yatal li ratin li Dios. ²⁶ Li xyalal a'an mukmu chiruheb chixjunileb nak quicuan chak junxil. Abanan anakcuan moco mukmu ta chic. Li Dios yo chixc'utbesinquil chiruheb li neque'paban re. ²⁷ Li Dios quiraj nak laex li macua'ex aj judío, tenau nak ere ajcui' li colbaib. Li resil a'an mukmu nak quicuan chak. Abanan anakcuan nanauman nak lix yatal li lok'laj esil, a'an a'in: Nak li Cristo cuan eriq'uin ut sa' xc'aba' a'an textz'akonc riq'uin lix nimal xlok'al li Dios. ²⁸ A'li Cristo, a'an li nakach'olob xyalal. Nakaq'ue xna'lebeb chixjunil ut nakac'ut xyalal chiruheb chi anchal li kach'ol ut chi anchal li kac'a'ux re nak tz'akalak ru lix pabaleb sa' xc'aba' li Jesucristo. ²⁹ Jo'can nak ninyal ink'e chi c'anjelac chi anchal inch'ol ut li Cristo naq'uehoc incacuila chixbanunquil lin c'anjel chiru li Dios.

2

¹ Nacuaj nak tenau nak junelic ning'ue inch'ol chi tijoc cherix laex jo'can ajcui' chirixeb laj pabanel li cuanqueb aran Laodicea. Nintijoc chirixeb chixjunileb laj pabanel, li ac neque'xnau cuu, jo' ajcui' li inc'a' neque'xnau cuu. ² Ut nintz'ama ajcui' chiru li Dios nak cauhak le ch'ol sa' le pabal. Cherahak taxak erib cheribil erib re nak junajak ech'ol. Lix naubal li na'leb a'in naxq'ue xcacuila le ch'ol. Chetauhak taxak ru chi tz'akal li xyalal li mukmu nak quicuan chak. Li xyalal li mukmu nak quicuan chak, a'an nak li Cristo cuan eriq'uin. ³ Riq'uin li Cristo naru nakatau li kana'leb xban nak ca'aj cui' riq'uin li Cristo cuan li tz'akal yal ut a'an naxnau chixjunil. ⁴ Nintakla xyebal ere a'in re nak inc'a' texbalak'ik xbaneb li neque'tacchi'in ere. Chanchan chabil atin neque'xye, abanan moco yal ta li neque'xye. ⁵ Usta ma anihin chak sa' eyank, abanan junelic nequexinc'oxla. Nasaho' sa' inch'ol chirabinquil nak junaj le ch'ol ut cuanquex sa' tiquilal. Nasaho' ajcui' sa' inch'ol chirabinquil nak anchal ech'ol nak nequepab li Cristo. ⁶ Laex xepab li Cristo ut a'an chic yal re sa' eb'en. Jo'can nak junajakex taxak riq'uin li Cristo, ut texcuank jo' naraj a'an. ⁷ Chexpabank chi anchal ech'ol ut chetzolak erib riq'uin li Cristo. Cauhak ech'ol chixpabankil li c'a'ru tzolbilex cui' ut junelic chexbantioxink chiru li Dios.

Li ac'yu'am sa' xc'aba' li Cristo

⁸ Meq'ue erib chi balak'ic xbaneb li neque'xye nak cuan xna'lebeb. Mac'a' na-oc cui' li c'a'ru neque'xye xban nak lix na'lebeb moco riq'un li Cristo ta nachal. A'an yal xna'lebeb li ruchich'och' ut yal xna'lebeb li kaxe' katōn.

⁹ Meq'ue erib chi balak'ic xbaneb a'an. Nakanau nak chixunil lix lok'al li Dios ut lix cuanquil cuan riq'un li Cristo. Lix lok'al ut lix cuanquilal quixc'utbesi nak quic'ulun sa' ruchich'och'. ¹⁰ K'axal nim xcuanquil li Cristo sa' xbeneb li neque'taklan ut k'axal nim ajcui' xcuanquil sa' xbeneb li musik'ej. Ut xban nak li Cristo cuan eriq'un, nim ajcui' ecuanquil laex ut tz'akal re ru le yu'am xban nak q'uebil ere xban li Cristo. ¹¹ Xban nak xepab li Jesucristo, junajex chic riq'un ut chanchan nak xec'ul li circuncisión, aban macua' jo' li circuncisión neque'xbanu laj judío. Li xec'ul laex, a'an nak li Jesucristo quirisi sa' le ch'ol lix rahinquil ru li mausilal. ¹² Nak xec'ul li cubi ha' chanchan nak quexmuke' erochben li Cristo ut quexcuacli cui'chic chi yo'yo xban nak ac' chic le yu'am nak xepab li nimajcual Dios li quicuaclesin cui'chic re li Jesucristo chi yo'yo sa' xyankeb li camenak. ¹³ Junxil camenakex nak quexcuan chak xban li mac ut xban nak maji' isinbil sa' le ch'ol lix rahin-quil ru li mausilal. Aban anākcuán yo'yoquex chic. Li Dios quicuaclesin cui'chic re li Jesucristo chi yo'yo. Ut jo'can ajcui' laex, yo'yoquex chic xban nak ac' chic le yu'am q'uebil ere xban li Dios ut cuybil sachbil chixjunil le mac. ¹⁴ Cuan tojba mac sa' kabén xban nak xkak'et li chak'rab tz'ibánbil chak najter. Abanan li Dios quixyé nak tojbil chic rix chixjunil li kamac xban nak li Jesucristo quicam chiru li cruz sa' kac'aba' lao. ¹⁵ Nak quicam chiru li cruz li Jesucristo, li Dios quirisi xcuanquileb li neque'taklan ut quirisi ajcui' xcuanquileb li maus aj musik'ej. Ut quixc'ut xxutaneb nak quinumta sa' xbeneb. ¹⁶ Mich'inan ech'ol cui ani nacuech'in ere riq'un li c'a'ru nequetzaca ut li c'a'ru nequeruc'. Chi moco tach'inank ech'ol cui ani nacuech'in ere xban nak inc'a'nequenink'eí lix nink'eheb. Cuan li neque'xnink'eí lix yo'lajic li po ut li hilobal cutan. ¹⁷ Chixjunil li c'a'ru que'xbanu, a'an yal retalil li c'a'ru tac'ulmank. Abanan, nak quic'ulun li Cristo, quitz'akloc ru li c'a'ru que'xbanu eb a'an. ¹⁸ Cuan li neque'xye nak chabileb ut chanchan nak neque'xcubsi ribeb. Abanan moco yal ta. Lix na'lebeb moco q'uebil ta xban li Dios. Li c'a'ru neque'xbanu, a'an yal c'oxlanbil. Neque'xlok'oni li ángel ut neque'xye cui inc'a' tebanu jo' neque'xbanu eb a'an, inc'a' tec'ul li yechi'inbil ere xban li Dios. Abanan mepab li c'a'ru neque'xye xban nak moco yal ta. ¹⁹ Eb a'an moco cuanqueb ta rubel xcuanquil li Cristo. Jo'can nak neque'xbanu li bar cuan neque'raj eb a'an. Abanan lao aj paabanel, junajo riq'un li Cristo ut cau kach'ol riq'un xban nak a'an najolomin ke. Ut a'an ajcui' natenk'an ke chi q'uiç sa' li kapabal jo' naraj li Dios. ²⁰ Chanchan nak quexcamb erochben li Cristo nak xexpaben. Ac' chic le yu'am ut li c'a'ru tzolbilex cui' chak junxil sa' ruchich'och' mac'a' chic xcuanquil sa' eben. ¿C'a'ut nak toj nequeq'ue erib chi balak'ic ut chixbanunquil le najter na'leb? ²¹ Cuan li neque'xye ere: —Mechap a'an chi moco tech'e' ut metzaca, xban nak mac xbanunquil a'an, chanquéb. ¿C'a'ut nak nequepab li c'a'ru neque'xye? ²² Chixjunil li c'a'ak re ru a'an nalaj na-oso'. Eb li na'leb a'an yal c'oxlanbil ut xna'lebeb li cujink. ²³ Chanchan chabil na'leb li neque'xye. Neque'xtacuasi rib nak neque'lok'onin ut neque'xrähobtesi rib. Chanchan nak neque'xcubsi xcuanquileb chi ribileb rib. Aban a'an inc'a' naxjal lix na'leb xban nak moco neque'xcanab ta xrahinquil ru li mausilal.

3

¹ Chanchan nak xexcuacli cui'chic chi yo'yo erochben li Cristo nak

xexpaban. Ac' chic le yu'am. Jo'can nak q'uehomak ech'ol chixbənunquil li chabil na'leb ut chexc'oxlak chirix li cuan sa' choxa bar cuan cui' li Cristo c'ojo'c' sa' xnim uk' li Dios xban nak k'axal nim xcuanguil. ² Junelic chec'oxla li Dios ut mē'oxla chic lix māusilal li ruchich'och'. ³ Lix māusilal li ruchich'och' māc'a' chic xcuanguil sa' eben. Chanchan camenakex chiru. Ac colbilex chic chiru li māusilal xban nak junajex chic riq'uin li Cristo, ut li Cristo junaj riq'uin li Dios. ⁴ Ca'aj cui' riq'uin li Jesucristo cuan kayu'am. Ut nak tol-elk cui'chic li Jesucristo tixc'utbesi nak lao li ralal xc'ajol, ut totz'akonk riq'uin lix lok'al.

Mebanu chic li najter na'leb

⁵ Xban nak ac' chic le yu'am, canabomak chi junaj cuá xrahinquel ru li inc'a' us jo'li co'betac yumbetac, ut li māus aj na'leb. Ut canabomak xrahinquel ru li māusilal. Ut merahi ru li biomal xban nak li xrahinquel ru li biomal, a'an chanchan ajcui' xlok'oninqil li jalanil dios. ⁶ Riq'uin xbanunquil li māusilal a'in nachal xjosk'il li Dios ut naxteneb li tojba māc sa' xbeneb li neque'k'etoc re li ratin. ⁷ Jo'can ajcui' quebanu chak laex junxil nak toj cuanquex chak sa' li māc. ⁸ Aban anakcuan mebanu chic chixjunil li c'a' re ru a'in: mexjosk'o', mēpo' erib chi ribil erib, mēbanu li māusilal, mexk'aban, ut mex-atiñac sa' yibru atin. ⁹ Mextic'ti'ic. Mebanu chic chixjunil li māusilal a'in xban nak chixjunil li c'a'ak re ru quebanu chak najter ac xerisi sa' le ch'ol. ¹⁰ Anakkuan ac' chic le yu'am. Li Dios, a'an li quijaloc re le yu'am ut a'an tatenk'ank ere cuulaj cuulaj chixtzolbal erib riq'uin re nak tetau ru chi tz'akal chanru li Dios ut tebanu li naraj a'an. ¹¹ Lao aj pabanel juntak'eto chiru li Dios xban nak junajo sa' li ac' yu'am. Moco jalaneb ta laj griego chiruheb laj judío. Moco jalaneb ta li tzolbileb chiruheb li inc'a' tzolbileb. Moco jalaneb ta li xe'xbanu li circuncisión chiruheb li inc'a' xe'xbanu. Moco jalana ta li junjunk usta jalán xtenamit. Moco jalaneb ta li cuankeb xpatrón chiruheb li māc'a'eb xpatrón. Li k'axal lok' xc'oxlanquil a'an a'in: Li Jesucristo cuan riq'uineb li junjunk li neque'pabán re ut junajo chic sa' xc'aba' li Jesucristo. ¹² Li Dios k'axal nequeexra ut quixsic' eru chok' ralal xc'ajol. Jo'can nak checxuank sa' tiquilal. Chetok'oba ruheb le ras eritz'in ut chetenk'ahéb. Mēk'etk'eti erib. Checxuank sa' tulanil ut checuyak li raylal. ¹³ Checuyak erib chiribil erib. Ut cui cuan junak cuan xmāc cheru, checuyak xmāc. Jo'nak quixcuy emāc li Kacua', jo'can ajcui' chebanu laex. ¹⁴ Li k'axal lok' xbanunquil chiru chixjunil li c'a'ak re ru a'in, a'an li rahoc ib xban nak riq'uin a'an junjak li kac'a'ux ut tz'akalak re ru li takabānu. ¹⁵ Junajakex taxak sa' le pābal xban nak sic'bil eru xban li Dios. Chicuank li tuktuquilal sa' le ch'ol li naxq'ue li Cristo re nak texcuank sa' xyalal. Ut junelic chebantioxi chiru li Dios li usilal xbanu ere. ¹⁶ Li ratin li Cristo chicanák sa' ech'ol chi junelic re nak cuank ena'leb. Chetzolak erib cheribil erib ut chetenk'a erib cheribil erib sa' le pābal. Chexbichank re xlok'oninqil li Dios. Chexbichank jo' naxc'ut cheru li Santil Musik'ej ut junelic chexbantioxink chiru li Dios. ¹⁷ Ut chixjunil li c'a'ru teye ut tebanu, chebanuhak re xq'uebal xlok'al li Jesucristo. Ut junelic chexbantioxink chiru li Acuabej Dios sa' xc'aba' li Kacua' Jesucristo.

Checxuank sa' xyalal riq'uineb le ras eritz'in

¹⁸ Ex ixakilbej, chepabak le belom jo' ec'ulub xbanunquil xban nak laex chic aj pābanel. ¹⁹ Ut laex belomej, cherahak le rixakil ut mexjosk'o' riq'uineb. ²⁰ Ut jo'can ajcui' laex alalbej, junelic chexpabank chiruheb le na' eyucua' xban nak a'an li nacuulac chiru li Kacua' Dios. ²¹ Ex yu-cua'bej, mech'ilal le ralal ec'ajol chi māc'a' rajbal re nak inc'a' tach'inank

xch'oleb. ²² Ex aj c'anjal, junelic chexpabank chiruheb le patrón. Chanru nak nequexc'anjalac nak yo cherilbal le patrón, jo'can ajcui' texc'anjalak nak inc'a' yo cherilbal. Mexc'anjalac re xnimobresinquel erib. Chexc'anjalak ban chi anchal le ch'ol xban nak laex nequera li Kacua' Dios. ²³ Nak yoquex chi c'anjalac chiru le patrón, yoquex ajcui' chi c'anjalac chiru li Kacua' Dios xban nak laex rehex chic li Dios. Jo'can nak chixjunil li c'a'ru tebanu, chebanuhak chi anchal ech'ol. ²⁴ Jo'can chebanu xban nak laex ac nequenau nak li Kacua' Dios taq'uehok le k'ajcamunquil li yechi'inbil ere xban nak li Kacua' Jesucristo, a'an li tz'akal patrón sa' eben ut yoquex chi c'anjalac chiru. ²⁵ Li ani tixbanu li inc'a' us tixc'ul xtojbal xmac a' yal c'a'ru lix mac xban nak li Dios inc'a' naxsic' ru ani tixq'ue chixtojbal xmac.

4

¹ Ex patrón, chexcuank sa' usilal riq'uineb laj c'anjal cheru ut sa' xyalal chetaklaheb xban nak laex nequenau nak cuanepatrón sa' choxa. ² Mecanab tijoc. Chextijok chi anchal ech'ol ut junelic chexbantioxink chiru li Dios. ³ Ut nak yokex chi tijoc, chextijok ajcui' chak chikix lao re nak tixq'ue ke li Dios xyebal resil li colba-ib sa' xc'aba' li Cristo. Li xyalal li colba-ib, a'in mukmu nak quicuan chak. Laex nequenau nak cuanquin chi prexil xban xyebal resil li colba-ib. ⁴ Ut chextijok ajcui' chak chikuix re nak tinruk chixch'olobanqui chi tz'akal li xyalal jo' naraj li Dios. ⁵ Chexcuank sa' xyalal riq'uineb li mäcua'eb aj pabanel ut yalak bar cuankex chi k'ek chi cutan junelic tec'h'olob xyalal li colba-ib chiruheb. ⁶ Junelic chabil chex-atinak. Sic'omak chanru tex-atinak riq'uineb re nak te'xq'ue xch'ol chirabinquil. Ut chenauhak chanru xsumenquil li c'a'ru te'xpatz' ere.

Xq'uebal xsahileb xch'ol laj pabanel

⁷ Li hermano Tíquico raro kaban ut chabil aj c'anjal chiru li Dios cuochben lain. A'an tayehok resil ere chanru cuanquin arin. ⁸ A'an aj e nak tintakla eriq'uin. Tixye ere chanru nak cuanco arin ut tixq'ue ajcui' xcacuil ech'ol sa' le pabal. ⁹ Taxic ajcui' li kaherman Onésimo rochben. A'an erech tenamitil. A'an tic xch'ol ut raro kaban. Út a'aneb te'yehok resil ere li c'a'ru yoco chix'ulbal arin. ¹⁰ Laj Aristarco li cuochben nak cuanco sa' tz'alam naxtakla ajcui' xsahil ech'ol. Naxtakla ajcui' xsahil ech'ol laj Marcos li rech'alal laj Bernabé. Ac xintakla xyebal ere nak tacuulak laj Marcos eriq'uin. Nak tacuulak eriq'uin, chec'ulak sa' xyalal chi sa sa' ech'ol. ¹¹ Ut naxtakla xsahil ech'ol laj Justo. Aj Jesús ajcui' nayeman re. Ca'aj eb cui' li oxib a'an sa' xyankeb laj pabanel aj judío li yoqueb chi tenk'anc cue chixyebal resil li colba-ib. Ut neque'xc'ojob inch'ol. ¹² Jo'can ajcui' laj Epafras naxtakla ajcui' xsahil ech'ol. A'an erech tenamitil ut a'an aj c'anjal chiru li Cristo. Junelic yo chi tijoc cherix re nak texcuank sa' xyalal ut cauhak ech'ol sa' le pabal chixbanunquil chi tz'akal jo' naraj li Dios. ¹³ Lain nacuaj nak tenau nak laj Epafras junelic nequexc'oxla ut junelic yo chi tijoc cherix. Ut natijoc ajcui' chirixeb li cuanqueb Laodicea jo'queb ajcui' li cuanqueb aran Hierápolis. ¹⁴ Naxtakla ajcui' xsahil ech'ol laj Lucas, laj banonel li k'axal raro kaban. Jo'can ajcui' laj Demas naxtakla xsahil ech'ol. ¹⁵ Cheq'ue xsahil xch'oleb laj pabanel li cuanqueb aran Laodicea. Ut cheq'ue ajcui' xsahil xch'ol li xNinfas, jo'queb ajcui' laj pabanel li neque'xc'utub rib sa' li rochoch chixlok'oninquel li Dios. ¹⁶ Nak acak xeril xsa' li hu a'in laex, tetakla riq'uineb laj pabanel li cuanqueb Laodicea, re nak te'r'il ajcui' xsa' li hu eb a'an. Ut nacuaj nak laex teril xsa' li hu li xintakla riq'uineb a'an. ¹⁷ Ut cheyehak ajcui' re laj

Arquipo nak chixq'uehak xch'ol chixbanunquil li c'anjel li quiq'uehe' re xban li Kacula' Dios. ¹⁸ Lain laj Pablo. Riq'unin cuuk' yoquin chixtz'ibanquil li cuib oxib chi atin a'in re xq'uebal xsahil sa' ech'ol. Nintz'ama cheru nak misach sa' ech'ol nak cuanquin chi prexil. A' taxak li Kacula' Dios chisobtesink ere. Jo'can taxak.

Li Xben Hu li Quixtz'iba li San Pablo reheb laj Tesalónica

Xq'uebal xsahil xch'oleb

¹ Lain laj Pablo. Cuochben laj Silvano ut laj Timoteo. Yoco chi tz'ibac eriq'uin laex laj pabanel li cuanquex aran Tesalónica. Laex rehex chic li Yuca'a'bej Dios ut li Kacula' Jesucristo. A' taxak li usilal ut li tuktuquilal chikuank eriq'uin, li naxq'ue li Dios li kaYucua' ut li Kacula' Jesucristo.

Tz'akal re ru lix pabaleb laj Tesalónica

² Junelic nocotixin chiru li Dios nak nocotijoc cherix chejunilex laex. ³ Nak nocotijoc chiru li Dios, junelic cuan sa' kach'ol chanru le chabilal xban le pabal. Cuan sa' kach'ol le chabil c'anjal xban nak nequexrahoc ut cuan ajcui' sa' kach'ol nak k'axal cau ech'ol chixyo'oninquil li Kacula' Jesucristo. ⁴ Ex inherman, raroquex xban li Dios ut nakanau nak sic'bil eru xban. ⁵ Nakanau a'an xban nak mäcua' ca'aj cui' riq'uin atin quicuulac li resil li evangelio eriq'uin. Riq'uin aj ban cui' lix cuanquil li Santil Musik'ej ut xenau nak tz'akal yal li xkach'olob cheru. Ac xeq'ue retal chanru li kana'leb nak xocuan sa' eyank chetenk'anquil. ⁶ Xetzol erib kiq'uin ut riq'uin li Kacula' Jesucristo. Usta nabal li raynal xec'ul, abanan xerabi li resilal riq'uin li sahil ch'olejl li quiq'uehe' ere xban li Santil Musik'ej. ⁷ Jo'can nak laex chic aj c'amol be chiruheb chixjunileb laj pabanel li cuanqueb sa' li na'ajej Macedonia ut Acaya. ⁸ Anakcuan eban laex nak yalak bar qui-abic resil ratin li Dios. Mäcua' ca'aj cui' Macedonia ut Acaya. Qui-abic ban ajcui' sa' chixjunil li na'ajej. Yalak bar qui-abic resil nak laex xepab li Dios. Jo'can nak lao inc'a' chic tento nak takaye resil le pabal. ⁹ Yalak bar yoqueb chixserak'inquil chanru nak coec'ul nak cocuulac eriq'uin ut yoqueb chixserak'inquil chanru nak quecanab xlok'oninquil li yibanbil dios ut quepab ut nequexc'anjelac chic chiru li tz'akal Dios, li yo'yo. ¹⁰ Ut yoqueb ajcui' xserak'inquil chanru nak yoquex chiroybeninquil nak tachalk chak toj sa' choxa li Jesucristo li Ralal li Dios, li quicuaclesic cui'chic chi yo'yo sa' xyankeb li camenak xban li Dios ut a'an li facolok ke chiru li rakba atin li tachalk sa' kabén.

2

Lix c'anjal laj Pablo aran Tesalónica

¹ Ex inherman, laex ac nequenau nak moco xcana ta chi mac'a' rajbal nak xocuulac eriq'uin. ² Usta ac xkac'ul li rahobtesic ut usta ac xohobe' aran Filipos, abanan li Dios xq'uehoc xcacuil kach'ol chixyebal resil li colba-ib ere laex. Inc'a' xoxucuac usta cuanqueb li k'axal xic' neque'iloc ke. ³ Moco yoco ta chixbalak'inquil kib. Tz'akal yal ban li yoco xyebal ere. Moco cuan ta junak kac'a'ux inc'a' us sa' eben, chi moco yoco ta chebalak'inquil. ⁴ Nakach'olob ban xyalal jo' naraj li Dios xban nak a'an c'ojc'o xch'ol sa' kabén ut a'an quixakaban ke re xyebal resil li evangelio. Inc'a' nakabánu jo' neque'cuulac chiru li cristian. Nakabánu ban jo' nacuulac chiru li Dios li nana'oc re chanru li kac'a'ux. ⁵ Laex nequenau nak ma jun cua xoatinac eriq'uin yal re ek'unbesinquil. Li Dios naxnau nak lao inc'a' xoatinac eriq'uin yal xban nak cuan li c'a'ru nakaj. ⁶ Chi moco xkasic' ta kalok'al riq'uineb li cristian, chi moco eriq'uin chi moco riq'uineb jalan, usta xru raj xkaye ere nak teq'ue kalok'al xban nak lao x-apóstol li Jesucristo. ⁷ Sa' tulanil

ban xocuan sa' eyank jo' junak na'bej naxq'uiresiheb sa' tulanil lix coc'al. ⁸ K'axal nequexkara. Macua' raj ca'aj cui' xyebal resil li colba'-ib li naxq'ue li Dios li xkabanu. Xru aj raj cui' xkak'axtesi li kayu'am sa' ec'aba' laex xban nak k'axal nequexkara. ⁹ Laex herman, ac nequenau chanru nak xoc'anjelac chi k'ek chi cutan re nak inc'a' texkach'i ch'i'i riq'uin li c'a'ru ke ut re nak xru xkaye ere resil li colba'-ib li naxq'ue li Dios. ¹⁰ Laex nequenau chi tz'akal, ut naxnau ajcui' li Dios, chanru nak cocuan sa' santilal ut sa' tiquinal sa' eyank. Mac'a' c'a'ru cok'use' cui' nak cocuan sa' eyank laex aj pabanel. ¹¹ Jo' naxbanu junak li yucua'bej riq'uineb li ralal xc'ajol, jo'can ajcui' xkabanu lao eriq'uin nak xkaq'ue ena'leb chejunjunkalex. ¹² Xkaq'ue xcacuilal ech'ol ut xkatz'ama ajcui' cheru nak texcuank sa' xyalal jo' xc'ulubeb li ralal xc'ajol li Dios li quisic'oc eru re nak textz'akonk ajcui' laex riq'uin lix nimajcual cuanquilal ut lix lok'al. ¹³ Junelic nakabantioxi chiru li Dios nak quepab li ratin li Dios li xkach'olob cheru. Moco ratin cuink ta quepab. Ratin li Dios ban quepab. Ut yal ajcui' nak a'an ratin li Dios. Ut a'an li yo chi jaloc re le yu'am laex aj pabanel. ¹⁴ Ut laex herman xec'ul ajcui' li raylal jo' que'xc'ul li ralal xc'ajol li Dios li neque'pabani sa' xc'aba' li Jesucristo li cuanqueb Judea. Xexrahobtesic xban le rech tenamitil jo' que'xc'ul eb a'an xbaneb laj judio, li rech tenamitil. ¹⁵ Eb laj judio que'xcamsi li Kacua' Jesucristo ut que'xcamsi ajcui' eb li profeta ut coe'xyolesi lao. Inc'a' neque'xbanu li nacuulac chiru li Dios ut k'axal xic' neque'r'il li ras ritz'ineb. ¹⁶ Xic' neque'rec'a nak nakach'olob xyalal chiruheb li macua'eb aj judio re nak te'colek'. Ut riq'uin li mausilal neque'xbanu rajlal, k'axal cui'chic nanumta lix maqueb. Abanan yal jun nak quichal xjosk'il li Dios sa' xbeneb.

Laj Pablo taraj cui'chic xic chirilbaleb laj pabanel li cuanqueb Tesalónica

¹⁷ Ex herman, usta ma anihos sa' eyank, abanan junelic nequexkac'oxla. Toje' ajcui' xo-el eriq'uin nak ac takaj cui'chic rilbal eru. ¹⁸ Xkaj raj xic eriq'uin. Lain laj Pablo. Cuib oxib sut xinyal xic cherilbal. Abanan laj tza quiramoc chiku. Jo'can nak inc'a' coo. ¹⁹ ¿C'a'ru nakoybeni ut c'a'ru lix saylal li kach'ol? ¿Ut c'a'ru li tok'ajcamuk cui' nak tol-elk cui'chic li Kacua' Jesucristo? ¿Ma inc'a' ta bi' sa' ec'aba' laex takac'ul li kak'ajcamunquil? ²⁰ Laex li kalok'al ut lix saylal li kach'ol.

3

¹ Xban a'an nak k'axal takaj raj rabinquil eresil. Inc'a' chic xkacuy robybeninquil. Jo'can nak lao xocana arin Atenas kajunes. ² Ut xkatakla li hermano Timoteo eriq'uin. A'an laj c'anjel chiru li Dios chixyebal resil li colba'-ib sa' xc'aba' li Cristo. Laj Timoteo tixq'ue xcacuilal ech'ol sa' le pabal ut tixq'ue ajcui' ena'leb. ³ Inc'a' nakaj nak tach'inak ech'ol xban li raylal a'in. Laex nequenau nak takac'ul li raylal. ⁴ Nak toj cuanco chak sa' eyank xkaye resil ere nak takac'ul li raylal lao aj pabanel. Ac nequenau laex nak jo'can quic'ulman. ⁵ Jo'can nak xintakla laj Timoteo eriq'uin xban nak inc'a' chic xincuy robybeninquil resil chanru cuanquex sa' le pabal. Mare anchal xexalec xban laj tza ut li kac'anjel mare chicanak chi mac'a' rajbal. ⁶ Toje' xsuk'i chak laj Timoteo eriq'uin ut a'an xc'am chak jun chabil esilal cherix chanru nak cau ech'ol sa' le pabal ut chanru nak nequexrahoc. Ut xye ajcui' ke nak rajlal nocoe'oxla jo' ajcui' nak nequexkac'oxla lao. Laex nequeraj rilbal ku ut jo'can ajcui' lao nakaj rilbal eru laex. ⁷ Riq'uin a'in, ex herman, sa' chixjunil li raylal li yoco chixc'ulbal, nac'oja kach'ol chirabinquil nak cau ech'ol sa' le pabal. ⁸ Ut anakcuan naru chic tocuanq chi sa sa' kach'ol xban nak nakanau nak cau ech'ol sa' epabal sa' xc'aba' li Jesucristo. ⁹ Inc'a' nakatau

chanru nak takabantioxi chiru li Dios riq'uin lix sahil li kach'ol nequeq'ue ke sa' xc'aba' le pabal. Li Dios naxnau nak c'ajo' xsahil li kach'ol eban laex. ¹⁰ Chi k'ek chi cutan nakatz'ama chiru li Dios nak takil cui'chic eru re nak takaq'ue xcacuilal ech'ol sa' le pabal. ¹¹ A' taxak li Dios li kaYucua' ut a' taxak li Kacua' Jesucristo chitenk'ank ke re nak taruk toxic cui'chic eriq'uin. ¹² A' taxak li Kacua' chitenk'ank ere re nak tera erib cheribil erib ut chi anchal ech'ol cherahak taxak le ras eritz'in jo' nak nequexkara laex. ¹³ A' taxak li Dios li kaYucua' chiq'uehok xcacuil ech'ol. Tz'akalak taxak re ru le pabal. Mac'a'ak taxak emac' chiru li Dios nak tachalk li Jesucristo rochbeneb li ac colbileb.

4

Li Dios naraj nak tz'akalak re ru li kayu'am

¹ Ut anakuan ex inherman, cuan cui'chic c'a'ru nacuaj xtz'amanquil cheru sa' xc'aba' li Kacua' Jesucristo. A'an a'in: nak checxuank taxak sa' tiqual jo' naraj li Dios ut rajlal yokex chixbanunquil chi jo'can jo' xkac'ut cheru lao. Ac yoquex chixbanunquil, abanan k'axal cui'chic tebanu. ² Laex ac nequenau le taklanquil q'uebil kaban sa' xc'aba' li Kacua' Jesucristo. ³ Li Dios naraj nak texcuank sa' santilal. Mexico'betac mexyumbetac. ⁴ Eb laj pabanel tento nak te'sumlak sa' xyalal ut che'xnauhak cuanc sa' tiqual chi ribileb rib ut te'xq'ue xlok'al chi ribileb rib. ⁵ Eb li inc'a' neque'xnau ru li Dios, neque'xbanu li yibru na'leb li neque'xrahi ru xbanunquil. Mebanu jo' neque'xbanu eb a'an. ⁶ Ma ani tixmux rib riq'uin xmak'bal rixakil junak cuink ut ma ani tixmux rib riq'uin xmak'bal xbelom junak ijk. Inc'a' te'xbanu chi jo'can xban nak lf' Kacua' Jesucristo tarakok atin sa' xben chixjunileb li neque'banun re li na'leb a'an, jo' ac yebil ere kaban. ⁷ Li Dios inc'a' quixsic' ku re nak yoko chixbanunquil li mäusilal. Quixsic' ban ku re nak tocuank sa' santilal. ⁸ Jo'can nak li ani natz'ektan re li tijleb a'in, macua' cuink li naxtz'ektana. A' ban li Dios li naq'uehoc ke li Santil Musik'ej, a'an li naxtz'ektana. ⁹ Inc'a' tento nak tintz'ibak eriq'uin chirix chanru nak tera erib cheribil erib xban nak ac c'utbil ajcui' cheru xban li Dios nak tento tera erib cheribil erib. ¹⁰ Us yoquex nak nequeraheb chixjunileb li cuanqueb Macedonia. Abanan nintz'ama cheru, ex herman, nak k'axal cui'chic chebanu chi jo'can. ¹¹ Cheq'uehak ech'ol chi cuanc sa' xyalal. Mech'hich'i li ani cuan c'a'ru re. Checx'anjelak re nak tacuank c'a'ru ere re xnumsinquil li cutan junjunk jo' xexkatakla cui'. ¹² Cui tebanu chi jo'can, oxlok' tex-ilek' xbaneb li macua'eb aj pabanel, ut inc'a' yókex chixch'i ch'i'inquil jalan re li c'a'ru teraj.

Li Kacua' Jesucristo tachalk cui'chic

¹³ Nakaj ut ex herman nak tetau xyalal chirixeb li ac xe'cam re nak inc'a' tarahok' ech'ol jo' neque'xbanu li jun ch'ol chic li mac'a' neque'roybeni. ¹⁴ Lao nakapab nak li Jesus quicam ut quicuaclí cui'chic chi yo'yo. Ut nakapab ajcui' nak li jo' q'uialeb que'paban re li Cristo, li Dios tixcuaclesiheb cui'chic chi yo'yo sa' xyankeb li camenak ut tixc'ameb chak rochben nak tachalk cui'chic li Jesucristo. ¹⁵ A'in ratin li Kacua' Jesucristo nakaye ere, nak cui lao toj yo'yoko sa' lix c'ulunic li Kacua' Jesucristo, macua' lao li toc'amek' xben cua. A'l ac camenakeb, a'an eb li te'c'amek' xben cua riq'uin li Kacua'. ¹⁶ Ut nak tacubek chak li Kacua' Jesucristo sa' choxa, tixjap re chi taklanc. Li xbenil ángel tixjap re chi bokoc, ut tayabasik xtrompetta li Dios. Ut li te'cuaclik xben cua, a'aneb li ac camenakeb, li que'paban re li Cristo. ¹⁷ Aca' chic lao li toj yo'yoko tosapuk takec' sa' li chok kochbenakeb a'an re xc'ulbal li Kacua'

Jesucristo sa' ik'. Ut cuanko junelic riq'unin li Kacua' Jesucristo. ¹⁸ Jo'can ut nak chec'ojob ech'ol cheribil erib riq'uineb a qatín a'in.

5

Yo'on cuanko ut aj-ajak ku sa' li kapabäl

¹ Ut chirix lix k'ehil ut lix cutanquil xc'ulunic li Kacua' Jesucristo, mäc'a' rajbal tintz'ibak eriq'unin xban nak ac nequenau chic lix yalal. ² Laex nequenau chi us nak lix cutanquil lix c'ulunic li Kacua' Jesucristo, tachalk chi mañani nana'oc re jok'e, jo' nak nachal laj elk' chi mäc'a' sa' kach'ol. ³ Nak eb li tenamit yokeb chixyebal, "Cuanco sa' tuktuquil usilal ut mäc'a' c'oxlac", tojo'nak tachalk roso'jiqueb sa' junpat chi mäc'a'ak sa' xch'oleb jo' nak nachal xraylal li yaj aj ixx chi mäc'a' sa' xch'ol. Ut eb a'an inc'a' te'colek' chiru li raynal tachalk sa' xbeneb. ⁴ A'ut laex herman, moco sa' k'ojyin ta chic cuanquex. Ac nequenau chic lix yalal. Li Jesucristo inc'a' tachalk chi mäc'a'ak sa' ech'ol jo' nak nachal laj elk'. ⁵ Lao aj pabanel moco cuanco ta chic sa' k'ojyin. Cuanco ban chikajunilo sa' cutan saken ut nakanau chic li xyalal xban nak reho chic li Cristo. ⁶ Junelic yo'on taxak cuanko ut yoko taxak chiroybeninquil lix c'ulunic li Jesucristo. Inc'a' takabänu jo' neque'xbänu li jun ch'ol chic. Aj-ajak ban ku sa' li kapabäl. ⁷ Eb li neque'cuar, chi k'ek neque'cuar ut eb li neque'cala, chi k'ek neque'cala. ⁸ A'ut lao, li ac nakanau chic xyalal, yo'on taxak cuanko. Li rahoc ut li kapabäl, a'an taxak tac'anjelak ke re kacolbal jo' nak li soldado naxcol rib riq'unin li ch'ich' li naxq'ue chire xch'ol. Ut li kacolbal li yoco chiroybeninquil, a'an tac'anjelak ke jo' nak nac'anjelac li punit ch'ich' chiru li soldado re xcolbal rib. ⁹ Li Dios inc'a' quixsic' ku re nak toxq'ue chixtojbal rix li kamäc. Quixsic' ban ku re tocolek' sa' xc'aba' li Kacua' Jesucristo. ¹⁰ A'an quicam sa' kac'aba' re nak usta yo'yoco usta ac camenako chic nak tac'ulunk, tacuank kayu'am chi junelic kochben a'an. ¹¹ Jo'can ut nak chec'ojob ech'ol cheribil erib ut cheq'uehak xcacuil ech'ol cheribil erib jo' li ac yoquex chixbanunquil.

Laj Pablo naxq'ue xna'lebeb laj pabanel

¹² Ex herman, nakatz'ama cheru nak oxlok' cherileb li ani neque'c'anjelac chiru li Kacua' Jesucristo sa' eyank. Eb a'an neque'c'amoc be cheru ut a'an neque'q'uehoc ena'leb. ¹³ Che-oxlok'iheb ut cherahakeb chi anchal ech'ol xban nak neque'xq'ue xch'ol chi c'anjelac sa' eyank. Chexcuank sa' usilal cheribil erib. ¹⁴ Nakatz'ama cheru, ex herman, chek'useb li yal subuc cutan neque'xbänu. Cheq'uehak xcacuil xch'oleb li neque'ch'inan xch'oleb ut chetenk'a ajcui' li toj k'uneb xch'ol sa' xpabaleb. Ut chicuank ecuyum riq'uineb chixjunileb. ¹⁵ Cheq'uehak retal nak mañani junak sa' eyank chixq'ue rekaj li mausilal qui-ux re riq'unin mausilal. Chebanuhak ban chi junelic li c'a'ru us cheribil erib ut riq'unin chixjunileb. ¹⁶ Junelic chisahok' sa' ech'ol. ¹⁷ Junelic chextijok. ¹⁸ Chextioxink riq'unin chixjunil li c'a'ru nequec'ul xban nak jo'can naraj li Dios eriq'unin laex xban nak junajex chic riq'unin li Jesucristo. ¹⁹ Merisi xcuankil li Santil Musik'ej eriq'unin. Cheq'uehak ban chi c'anjelac eriq'unin, jo' naraj a'an. ²⁰ Metz'ektana li esil li neque'xye li profeta. ²¹ Cheq'uehak ban retal chixjunil ut chec'ulahak sa' ech'ol li c'a'ru us. ²² Ut chetz'ektana chixjunil li mausilal. ²³ A' taxak li Dios li naq'uehoc tuktuquil usilal chisantobresink ere chi tz'akal ut a'an taxak chi-osobtesink re le ram, le c'a'ux ut le rok eruk' re nak texcuank chi tz'akal ere eru chi mäc'a'ak ek'usbal sa' xc'ulunic li Kacua' Jesucristo. ²⁴ Li Dios, li quisic'oc' eru, a'an tic xch'ol chixbanunquil li c'a'ru naxye ut a'an tasantobresink ere.

Laj Pablo naxchak'rabiheb

²⁵ Ex herman, chextijok chikix lao. ²⁶ Ut cheq'uehak xsahileb xch'ol chixjunileb li herman riq'uin santil utz'uc u. ²⁷ Chi anchal inch'ol nintz'ama cheru sa' xc'aba' li Jesucristo nak chi-ilek' xsa' li hu a'in chiruheb chixjunileb li herman. ²⁸ A' taxak li usilal li naxq'ue ke li K'ačua' Jesucristo, chicuank eriq'uin. Jo'can taxak.

Li Xcab Hu li Quixtz'iba li San Pablo reheb laj Tosalónica

Xq'uebal xsahileb xch'ol

¹ Lain laj Pablo. Cuochben laj Silvano ut laj Timoteo nak yoco chixtz'ib'anquil li hu a'in eriq'uin laex laj pabanel li cuanquex aran Tosalónica. Laex rehex chic li Dios li kaYucua' ut rehex chic li Kacua' Jesucristo. ² A' taxak li usilal ut li tuktuquilal chicuank eriq'uin, li naxq'ue li Dios li kaYucua' ut li Kacua' Jesucristo.

Li Kacua' Jesucristo tachalk chi rakoc atin

³ Ex inherman, inc'a' nakacanab xbantioxinquil chiru li Dios sa' ec'aba' laex. Tento takabantioxi chiru li Dios xban nak yo chi cacuuc ech'ol sa' le pabal ut k'axal cui'chic nequera erib cheribil erib. ⁴ Jo'can nak k'axal sa sa' kach'ol chixserak inquil resil le pabal reheb li neque'paban re li Dios yalak bar. Nakaye rebeb chanru nak nequexpaban chi anchal ech'ol ut cau ech'ol nak yoquex chixcuybal xnumsinquil li raylal ut li ra xic'. ⁵ Xban nak nequcuy xnumsinquil li raylal nac'utun nak li Dios yo cheten'ankil. Li Dios tarakok atin sa' tiquilal. Tento nak tecuy li raylal re nak li Dios tixye nak ec'ulub oc sa' lix nimajcual cuanquillal ut sa' xc'aba' ajcui' a'an nak yoquex chixc'ulbal li raylal. ⁶ K'axal tic xch'ol li Dios. Jo'can nak tixq'ue raylal sa' xbeneb li neque'rahobtesin ere. ⁷ Abanan laex li yoquex chixc'ulbal raylal, li Dios texq'ue chi hilanc kochben lao ut inc'a' chic takac'ul raylal. A'in tac'ulmank nak li Kacua' Jesucristo tixc'utbesi chak rib nak tachalk toj sa' choxa. Tachalk rochbenakeb chak lix ángel li cuanqueb xcuanyl. ⁸ Chanchan li rak' xam nak tachalk li Kacua' Jesucristo riq'uin xnimal xllok'al chi rakoc atin. Tixq'ueheb chixtojal bmaqueb li ani inc'a' neque'paban re li Dios jo' ajcui' li ani inc'a' neque'raj rabinquil resilal li colba-lb li naxq'ue li Kacua' Jesucristo. ⁹ Lix tojbal rixeb lix mac li tixq'ue, a'an li sachc chi junelic nak te'isik chiru li Kacua' Jesucristo ut chiru lix nimal xllok'al ut lix cuanquillal. ¹⁰ Chixjunil a'in tac'ulmank sa' li cutan nak tol-elk cui'chic li Kacua' Jesucristo. Sa' li cutan a'an li Jesucristo talok'onik xbaneb chixjunileb li neque'paban re. Laex cuanquex sa' xyankeb a'an. Rehex chic li Cristo xban nak ac xepab li xyalal li xkach'olob cheru. ¹¹ Jo'can nak junelic nocotijoc cherix ut nakatz'ama chiru li Dios nak chabilakex taxak re nak ec'ulubak cuanc chok' ralal xc'ajol li Dios. Nakatz'ama chiru nak riq'uin taxak xnimal xcuanyl, textenk'a chixbanunquil li us re nak tz'akalak re ru le yehom ebanuhom sa' xc'aba' le pabal. ¹² Nocotijoc cherix re nak laex junelic tenima xllok'al li Kacua' Jesucristo. Ut laex tex-oxlok'ik ajcui' xban nak rehex chic li Cristo. A' taxak li Dios ut li Kacua' Jesucristo riq'uin xnimal rusilal chitenk'ank ere re nak jo'can taxak chi-uxmank.

2

¹ Ex inherman, anakcuan tinch'olob xyalal cheru chirix lix c'ulunic li Kacua' Jesucristo ut lix ch'utubanquill kib riq'uin. ² Nintz'ama cheru nak meq'ue erib chi balak'ic xbaneb li te'yehok nak ac xcuulac xk'ehil lix c'ulunic li Kacua' Jesucristo. Mare tayehek' ere xban junak li profeta, malaj xban junak cuink taatinak eriq'uin, malaj xban junak tatz'ibak eriq'uin ut tixye nak lao xkatz'iba li hu a'an. Abanan mepab li c'a'ru te'xe eb a'an xban nak moco yal ta. ³ Mac'a' ta c'a'ru chexbalak'ik cui'. Li Kacua' Jesucristo

inc'a' tachalk chi maji'ak natz'ektañac li Dios xbaneb nabal chi tenamit. Ut tachalk ajcui' li cuñk laj k'etol chak'rab. A'an li tac'uluk re li sachc chi junaj cua. ⁴ A'an tixq'ue xcuanguard xjunes rib ut xic' taril yalak c'a' chi diosil ut li c'a'ak re ru nafok'oniman sa' ruchich'och'. Tixnimobresi rib sa' xben chixjunil toj retal nak tac'ojlak sa' rochoch li Dios ut a'an chic tixq'ue rib chok' dios. ⁵ ¿Ma inc'a' jultic ere nak quinye chak ere chixjunil a'in nak toj cuanguard chak eriq'unin? ⁶ Laex ac nequenau c'a'ru li naramoc re nak toj maji' nachal laj k'etol chak'rab. Abanan nak tacuulak xk'ehil, tac'ulunk. ⁷ Li mausilal ac cuan sa' ruchich'och', abanan toj maji' nanumta chi us. Tacuulak xk'ehil nak li Dios inc'a' chic tixram li mausilal ut li mausilal tanumtak arin sa' ruchich'och'. ⁸ Sa' eb li cutan a'an tac'utbesik laj k'etol chak'rab. Tojo'nak li Kacua' Jesucristo tac'ulunk riq'unin xnimal xlok'al. Taapusik laj k'etol chak'rab xban li Kacua' ut aran taosok'. Chi jo'can tasachek' chixjunil lix cuanguard sa' xc'ulunlic li Kacua' Jesucristo. ⁹ Laj k'etol chak'rab tachalk riq'unin xcuanguard laj tza. Tixc'utbesi nak cuan xcuanguard chixbanunquil li milagros ut sachba ch'olej re xbalak'inquil li cristian. ¹⁰ Tixbalak'iheb li te'sachek' xban nak que'xtz'ektaña li xyalal li quicoloc raj rebeb. ¹¹ Jo'can nak li Dios tixq'ueheb chixpabankuil li moco yal ta. ¹² Li Dios quixbanu chi jo'ca'in riq'uineb re nak te'xc'ul xtojbal xmaqueb chixjunileb li inc'a' que'paban re li yal. A' ban chic li mausilal quicuulac chiruheb xbanunquil.

Li Dios quixsic' ku re nak tocolek'

¹³ Ex inherman, tento nak lao tobantioxink chiru li Dios cherix laex. Raroquex xban li Kacua' Jesucristo. Li Dios quisic'oc chak eru chalen chak sa' xticlañic re nak texcolek' xban nak santobresinbilex chic xban li Santil Musik'ej ut xban nak nequepab li yal. ¹⁴ A'an aj e nak li Dios quixsic' eru re nak tepab li evangelio li xkach'olob cheru re nak textz'akonk riq'unin'lix nimal xlok'al li Kacua' Jesucristo. ¹⁵ Jo'can ut ex herman, cauhak taxak ech'ol sa' le pabal. Mecanab xpabankuil le tijbal li xkach'olob cheru nak xoatinac eriq'unin. Chi moco tecanab xpabankuil li c'a'ru xkatakla xyebal ere sa' li hu li xkatakla eriq'unin. ¹⁶ Li Kacua' Jesucristo ut li Dios li kaYucua', li narahoc ke, xban xnimal rusilal naxc'ojob kach'ol chi junelic ut naxq'ue xcacuila kach'ol chi oybeninc. ¹⁷ A'an ta ajcui' chic'ojobank ech'ol ut chiq'uehok ecacuila re xyebal ut re xbanunquil li c'a'ru us.

3

Laj Pablo naxtz'ama chiruheb nak te'tijok chirix

¹ Ut anakcuan ex inherman, cuan cu'chic c'a'ru nacuaj xtz'amankuil cheru. Nintz'ama cheru nak textijok chikix re nak tayemank li ratin li Kacua' Jesucristo yalak bar ut che'xq'ue xlok'al ut che'pabank taxak jo' nak queexpaban laex. ² Chextijok ajcui' chikix re nak li Dios tacolok ke chiruheb li cuñk li inc'a' useb xna'lebeb ut neque'banun re li mausilal xban moco chixjunileb ta neque'paban re li Dios. ³ A'ut li Kacua' Jesucristo, a'an tjc xch'ol ut junelic naxbanu li c'a'ru naxye. A'an taq'uehok xcacuila ech'ol ut a'an ajcui' tacolok ere chiru laj tza. ⁴ Ut c'ojc'o kach'ol sa' eben laex sa' xc'aba' li Kacua' Jesucristo nak yoquex chixbanunquil li xkajultica cheru ut nakanau nak tebanu li bar cuan takaye ere. ⁵ A' taxak li Kacua' Jesucristo chitenk'ank ere chixnaubal nak raroquex xban li Dios ut chicuank taxak eriq'unin li cuyuc li naxq'ue li Cristo.

Tento nak totrabajik re nak cuank c'a'ru ke

⁶ Ut nakajultica cheru ex herman, sa' xc'aba' li Jesucristo nak cherisi erib riq'uinreb li herman li yal subuc cutan neque'xbənu ut inc'a' neque'xpab le tijbal q'uebil ere kaban. ⁷ Laex ac nequenau ajcui' chanru xkabanu nak xocuan eriq'uin. Chebanu jo' xkabanu ləo. Inc'a' xosubuc cutan nak xocuan eriq'uin. ⁸ Inc'a' xocua'ac yal chi matan. Inc'a' xkac'ul katenk'anquil nak xocuan sa' eyank. Xkatacuasi ban kib chi c'anjelac chi k'ek chi cutan re nak tacuank c'a'ru ke re xnumsinguil li cutan junjunk ut ma ani xkach'i'ch'i'i sa' eyank. ⁹ Moco xban ta nak macua' ta kac'ulub xc'ulbal katenk'anquil nak xkabanu a'an. Xkabanu chi jo'can yal re nak tetzol erib kiq'uin. ¹⁰ Ut nak toj cuanco chak eriq'uin, xkajultica li xyalal a'in cheru: li ani inc'a' naraj trabajic, inc'a' taq'uehek' xcua. ¹¹ Nakaye a'in ere xban nak xkabi resil nak cuan junjunk sa' eyank yal subuc cutan yoqueb. Junes moloc atin neque'xbənu ut inc'a' neque'raj trabajic. ¹² Sa' xc'aba' li Kacua' Jesucristo, ninye reheb li inc'a' neque'raj trabajic nak tento te'trabajik sa' xyalal re nak tacuank c'a'ru reheb re xnumsinguil li cutan junjunk. ¹³ Ut laex, ex herman, inc'a' taxak textitz'k chixbanunquil li us. ¹⁴ Cui ut cuan junak sa' eyank inc'a' naraj xpabankil li atin a'in li xkatz'iba ere sa' li hu a'in, cheq'uehak retal a'an. Ut merochbeni erib riq'uin re nak taxutanak. ¹⁵ Abanan inc'a' xic' teril. Cheq'uehak ban xna'leb jo'nak naq'uehe' xna'leb junak li itz'inbej.

Laj Pablo naxchak'rabiheb

¹⁶ A' taxak li Kacua' Jesucristo li naq'uehoc tuktuquil usilal, chiq'uehok ere li tuktuquilañ chi junelic riq'uin yalak c'a'ru nequec'ul. A' taxak li Kacua' Jesucristo chicuank eriq'uin chejunilex. ¹⁷ Lain laj Pablo. Riq'uin cuuk' yoquin chixtz'ibankil lin c'aba' jo' c'aynakin chixbanunquil rajjal nak nintz'iba li hu. A'an retalil nak lain xintaklan re li hu a'in. Ut yoquin chixtaklanguil xsahil ech'ol. ¹⁸ A' taxak li usilal li naxq'ue li Kacua' Jesucristo chicuank eriq'uin chejunilex. Jo'can taxak.

Li Xben Hu li Quixtz'iba li San Pablo re laj Timoteo

Laj Pablo naxtakla xsahil xch'ol laj Timoteo

¹ Lain laj Pablo. Taklanbilin xban li Jesucristo chi c'anjelac chiru xban nak jo'can quiraj li Dios laj Colol ke. Ut jo'can ajcui' quiraj li Kacua' Jesucristo li kayo'on. ² At Timoteo, yoquin chi tz'ibac acuiq'unin. Chanchanat li tz'akal cualal nak cuancat xban nak chicuu xapab li Cristo. Chicuank taxak acuiq'unin li usilal, li uxtan ut li tuktuquilal li naxq'ue li Dios li kaYucua' ut li naxq'ue li Kacua' Jesucristo.

Laj Timoteo tixch'olob xyalal chiruheb laj pabanel re nak inc'a' te'xpab laj balak'

³ Nacuaj nak tatcanak aran Efeso jo' quintz'ama chacuu nak cojn Macedonia. Tatcanak aran re nak tq'useb li yoqueb chi balak'inc sa' xyankeb laj pabanel. Taye reheb nak te'xcanab xc'utbal li inc'a' yal. ⁴ Ut taye ajcui' reheb nak che'xcanabak xcuech'inquil rix anihelblix xe'xtionaleb xban nak li na'leb a'an mac'a' roso'jic ut mac'a' na-oc cui'. Taye reheb nak inc'a' chic te'xpab li xe'tonil na'leb. Li na'leb a'in junes yo'oban cuech'inc ib naxbanu. Inc'a' nocoxtenk'a xbanunquil li c'anjel q'uebil ke xban li Dios. Ca'aj cui' li kapabal natenk'an ke. ⁵ At Timoteo, lix yatal li c'a'ru yoquin chixyebal acue, a'an a'in. Xcanabakeb li balak'inc. Che'xq'ue ban xch'ol chixrabaleb li rech aj pabanelil. Ut te'xraheb cui te'cuank sa' tiquilal chi mac'a'ak li c'a'ak re ru nach'i ch'i'in reheb sa' xc'a'uxeb ut cui te'pabank chi anchaleb xch'ol. ⁶ Eb a'an inc'a' neque'xq'ue retal li xyalal a'in. A' chic li mac'a' na-oc cui' neque'xq'ue xch'ol chixcuech'inquil rix. ⁷ Neque'raj raj xch'olobanquil xyalal li chak'rab. Aj c'utul chak'rab nak neque'xye rib. Abanan inc'a' ajcui' neque'xtau ru li c'a'ru neque'xc'ut usta chanchan neque'xtau ru chi tz'akal li c'a'ru yoqueb chixyebal.

Tento takanau c'a'ru aj e nak q'uebil li chak'rab

⁸ Lao nakanau nak li chak'rab chabil cui nakatau ru c'a'ru aj e nak q'uebil xban li Dios. ⁹ Jo'can nak nacuaj nak teq'ue retal nak li chak'rab moco q'uebil ta reheb li tiqueb xch'ol. Reheb ban li inc'a' neque'abin ut li neque'k'etoc re li chak'rab. Reheb ajcui' li inc'a' useb xna'leb ut eb laj mac. Reheb ajcui' li inc'a' neque'paban re li Dios chi moco cuanqueb junak xpabaleb. Ut reheb ajcui' laj camsinel ut li neque'xcamsi xna' xyucua'eb. ¹⁰ Li chak'rab reheb laj co'bet laj yumbet ut reheb li neque'macob riq'unin rech cuinkilal rech ixfkilal. Reheb ajcui' li neque'elk'ac cristian. Reheb ajcui' li neque'tic'ti'ic ut li neque'xpatz' xc'aba' li Dios riq'unin yo'obanbil atin. Li chak'rab reheb chixjunileb li neque'xbanu li c'a'ak chic re ru chi mausilal li napo'oc ru li katijbal li tz'akal yal. ¹¹ Li katijbal a'an li quic'ute' chiku xban li lok'laj colbabil li naxq'ue ke li nimajcual Dios, li tenebanbil sa' inben xyebal resilal yalak bar.

Laj Pablo naxbantioxi chiru li Cristo li rusilal

¹² Ninbantioxi chiru li Kacua' Jesucristo xban nak a'an xc'ojob xch'ol sa' inben ut xinixxakab chi c'anjelac chiru. Ut a'an naq'uehoc incuanquil chixbanunquil. ¹³ Quixq'ue cue li c'anjel a'in usta ac xinmajecua li Jesucristo ut xinrabotesi eb laj pabanel ut xinhobeb. Abanan li Jesucristo quiruxtana cuu xban nak toj maji' ninnau bar cuan li tz'akal yal ut toj maji' ninpaban.

14 Ut li Kacua' Jesucristo numtajenak cui'chic li cuosobtesinqil quixq'ue. Quixq'ue inpabal ut quixq'ue cue li rahoc li nakatau nak junajo chic riq'un li Cristo. **15** Nakanau nak tz'akal yal ut xc'ulub nak takapab chi anchal li kach'ol nak li Cristo Jesús quic'ulun sa' ruchich'och' chixcolbaleb laj mac. Ut lain li k'axal numtajenak inmac sa' xyankeb chixjunileb nak quincuan. **16** Usta lain k'axalin aj mac nak quincuan, abanan li Jesucristo quiruxtana cuu re nak tixc'utbesi nak k'axal nim lix cuyum re xcuybal xsachbal li mac. Quixc'ut chiruheb lix nimal lix cuyum nak quixcuy inmac lain. A'an quiraj nak lain tinc'amok be chiruheb li ani te'pabank re li Jesucristo ut te'xc'ul li junelic yu'am. **17** Lok'oninbil taxak li tz'akal Rey li cuan chi junelic k'e cutan, li inc'a' nacam ut inc'a' na-ilman ru, li junaj chi Dios li numtajenak xna'leb. Chikalok'onihak taxak anakcuan ut chi junelic k'e cutan. Jo'can taxak.

Laj Pablo quixye re laj Timoteo chanru tac'anjelak chiru li Dios

18 At Timoteo, chanchanat li cualal chicuu nak nacatcuil. Ting'ue acue la taklanquil jo' que'xye li profeta chacuix junxil. Li atin que'xye, a'an taq'uehok xcacuil ach'ol chixbanunquil li c'anel q'uebil acue. Jo'can ut nak yal ak'e chi c'anelac chiru li Kacua'. **19** Cauhak taxak ach'ol sa' la pabal ut mac'a' taxak li c'a'ru tach'i ch'i'ink acue sa' la ch'ol nak yocat chi c'anelac chiru li Dios. Ninye acue a'in xban nak cuanqueb li xe'xcanab xbanunquil li tiquil ch'olej. Inc'a' que'xq'ue retal li c'a'ru yo chi ch'i'chi'inc reheb lix c'a'ux. Ut riq'un a'an yoqueb chixtz'ektanquil lix pabaleb. **20** Sa' xyankeb a'an cuan laj Himeneo ut laj Alejandro. Ac xink'axtesiheb sa' ruk' laj tza re xc'ajtesinquileb ru re nak inc'a' chic te'xmajecua li Dios.

2

Tento nak totijok chirixeb li kas kitz'in jo' ajcui' chirixeb li cuanqueb sa' xcuanquil

1 Anakcuan a'an a'in li tinye ere: cheq'uehak ech'ol chi tijoc chirixeb chixjunileb le ras eritz'in. Chextz'amank ut chexbantioxink chiru li Kacua' nak textijok. **2** Chextijok chirixeb li rey ut chixjunileb li cuanqueb sa' xcuanquil re nak cuanko sa' xyalal ut tuktuk kach'ol. Ut mac'a' taxak tach'i ch'i'ink ke sa' li kapabal ut ticak taxak li kach'ol. **3** Chextijok chirixeb chixjunileb xban nak a'an li us xbanunquil ut a'an li nacuulac chiru li Dios laj Colol ke. **4** Li Dios naraj nak chixjunileb te'colek' ut te'xtau ru chi tz'akal c'a'ru li yal. **5** Ut li yal, a'an a'in: nak jun ajcui' li Dios cuan ut jun ajcui' li na-oquen ut naqatinac chikix chiru li Dios. A'an li Kacua' Jesucristo li quitz'ejualo' nak quic'ulun sa' ruchich'och'. **6** Ut a'an ajcui' li quixq'ue rib chi c'anc sa' kac'aba' lao re nak taruk tocolek' chikajunilo. Ut nak quicuulac xk'ehil, li Cristo quixc'utbesi chiku li xyalal a'in nak quicam chiru li cruz. **7** Ut lain li taklanbilin xban li Dios chixyebal resil li xyalal a'in chiruheb li macta'eb aj judío. Taklanbilin chixyebal resil re nak te'xnau c'a'ru li yal ut te'pabank. Moco tic'ti' ta li yoquin chixyebal. Tz'akal yal nak xakabanbilin chixyebal li resilal reheb.

Che'cuank sa'xyalaleb laj pabanel nak ch'utch'ukeb chixlok'oninquil li Dios

8 Yalak bar ch'utch'uquex chixlok'oninquil li Dios, nacuaj nak eb li cuink te'c'amok be chi tijoc. Abanan, tento nak ticak xch'oleb li cuink a'in ut mac'a'ak xjosk'il chi moco te'cuech'ink. **9** Ut nacuaj ajcui' nak eb li ixs che'xtikibak rib chi chabil jo' xc'ulub junak aj pabanel ut inc'a' te'xnimobresi rib riq'un lix tikibankuil chi moco te'xtikib rib yal re nak te'rahek' ru. Jo' ajcui' riq'un xyibankuil li rismal xjolom. Jo' li c'a' re ru te'xq'ue cui' xsahob ru jo' li oro ut li tertioquil pec. Inc'a' te'xq'ue xcuanquil li neque'xq'ue chok'

xsahob ruheb. ¹⁰ Li iixk li napəban re li Dios, moco riq'uin ta xtikibankuil rib cuan xch'ina'usal. Riq'uin ban lix tiquilal xch'ol. ¹¹ Nak tēch'utub erib, eb li iixk inc'a' te'serak'ik. Te'xq'ue ban xch'ol chi tzoloc ut che'pabank chiruheb li cuanqueb xcuanquil. ¹² Lain inc'a' ninq'ueheb li iixk chixch'olobanquil xyalal chiruheb li chequel cuink, chi moco ninq'ueheb xcuanquil sa' xbeneb li cuink. Eb li iixk inc'a' te'atinak sa' li ch'utubaj ib. ¹³ Ninye a'in xban nak laj Adán quiyo'obtesic xben cua xban li Dios ut chirix a'an quiyo'obtesic lix Eva. ¹⁴ Ut mācua'laj Adán li quibalak'ic. A'lix Eva, a'an li quibalak'ic toj retal nak quimacob nak quixk'et rātin li Dios. ¹⁵ Li Dios quixye nak li iixk riq'uin raylal taq'uiresink. Abanan, cuankeb xyu'am chi junelic cui cauhakeb xch'ol sa' lix pabaleb ut cui neque'rahoc ut cui cuanqueb sa' tiquilal ut sa' tuktuquilal.

3

Tento nak chabilak lix na'leb li tac'amok be sa' xyankeb laj pabanel

¹ Yal li neque'xye nak cui cuan junak na-ala sa' xch'ol oc chok' aj c'amol be sa' xyankeb laj pabanel, chabil li naxc'oxla xbanunquil. ² Abanan li ani naxc'oxla oc chok' aj c'amol be, tento nak cuank sa' xyalal re nak ma' ani taqtinak chirix. Junak ajcui' li rixakil. Macua'ak aj calajenak. Tento nak sebák xch'ol ut chabilak xna'leb re nak q'uebilak xlok'al. A'anak aj q'uehol ochohnal ut chixq'uehak xch'ol chixc'utbal lix yalal chi tz'akal re ru. ³ Laj c'amol be mācua'ak aj calajenak ut mācua'ak aj sic'ol plēt. Macua'ak aj rahol ru tumin. Tulanak ban ut cuank sa' xyalal. ⁴ Tento nak tixnau taklanc sa' li rochoch re nak li ralal xc'ajol te'x-oxlok'i ut te'abjink chiru. ⁵ Cui junak li cuink inc'a' naxnau taklanc sa' li rochoch, ¿chan ta ru nak taruk tac'amok be sa' xyankeb li rech aj pabanelil? ⁶ Tento nak laj c'amol be acak xq'ui sa' lix pabal. Māre anchal tixnimobresi rib ut taq'anek' sa' li tojbal mac'quit'ane' cui' laj tza. ⁷ Ut tento ajcui' nak chabilak resil lix na'leb yalak bar xbaneb li toj māj'i neque'pabanel. Mac'a'ak xk'usbal re nak inc'a' tixq'ue rib chi alec xban laj tza.

Tento nak chabilak lix na'lebeb li neque'c'anjelac sa' xyankeb laj pabanel

⁸ Ut jo'can ajcui' li neque'c'anjelac sa' xyankeb laj pabanel. Tento nak ticakeb xch'ol. Ut li c'a'ru te'xye te'xbanu, che'xbanuhak ajcui'. Macua'akeb aj calajenak. Ut inc'a' te'xsic' xtumineb riq'uin balak'inc. ⁹ Mac'a' tach'i'ch'i'ink reheb sa' lix c'a'uxeb ut te'xq'ue xcuanquil li kālok'laj pabal li c'utbesinbil chiku xban li Dios. ¹⁰ Jo'can nak xben cua, tatz'ilek' atin chirixeb. Cui mac'a' nanauman chirixeb, te'q'uehek' chi c'anjelac sa' xyankeb laj pabanel. ¹¹ Jo'can ajcui' li rixakileb li neque'c'anjelac sa' xyankeb laj pabanel. Chabilakeb lix na'leb. Macua'akeb aj molol atin. Macua'akeb aj calajenak. Ticakeb ban xch'ol ut ticakeb lix c'a'ux riq'uin chixjunil. ¹² Eb laj c'anjel sa' xyankeb laj pabanel, junak ajcui' li rixakil ut te'xnau taklanc sa' xbeneb li ralal xc'ajol. Ut te'xnau ajcui' rilbal lix jun cablal. ¹³ Eb li te'c'anjelak chi chabil, te'oxlok'ik ut te'cacuuk xch'oleb chixyebal resil li kapabal sa' xc'aba' li Jésucristo.

Lix xe' xtonal li kapabal

¹⁴ Usta yoquin chi tz'ibac acuq'uin chirix laj taklanquil, at Timoteo, cuan sa' inch'ol nak chi seb tincuulak acuq'uin. ¹⁵ Abanan māre tinbayk chi cuu-lac. Jo'can nak yoquin chi tz'ibac acuq'uin re nak tanau chanru te'c'anjelak li te'xakabak chi c'anjelac sa' xyankeb li neque'pabanel re li yo'yoquil Dios. Ut lao aj pabanel, lao li nakaq'ue xcuanquil ut nakacol rix li katibal li tz'akal

yal. ¹⁶ Relic chi yal k'axal lok' li katijbal li quixc'ut chiku li Dios. Naxc'ut chiku li xyalal li kapabal sa' xc'aba' li Jesucristo. Li xyalal a'an a'in: Li Cristo quitz'ejcualo' nak quic'ulun sa' ruchich'och'.
Xakabanbil xcuanguil xban li Santil Musik'ej.

Qui-ile' ru xbaneb li ángel.

Ut a'an li ch'olobanbil resil sa' chixjunil li ruchich'och'.

Ut nabaleb li que'pabán re sa' ruchich'och'.

Ut quic'ame' sa' choxa riq'uin xnimal xlok'al.

4

Li m̄aus aj musik'ej naxc'ut li tijleb inc'a'yal

¹ Li Santil Musik'ej naxc'ut li xyalal chi tz'akal nak sa' eb li cutan chalel cuan li te'xcanab xp̄abánquil li tijleb li tz'akal yal. Ut te'balak'ík xban li tijleb li inc'a' yal li neque'xq'ue li m̄aus aj musik'ej. ² Tic'ti' li neque'xc'ut eb laj balak'. Inc'a' chic neque'rec'a nak inc'a' us yoqueb. Chanchan nak c'atbil riq'uin ch'ich' lix c'a'uxeb xban li tic'ti' li neque'xye. Jo'can nak inc'a' neque'xq'ue retal nak inc'a' us yoqueb chixbanunquil. ³ Eb a'an neque'xye nak inc'a' us li sumläc ut neque'xye ajcui' nak cuan li tzacaemk inc'a' us xtzacanquil. Abanan moco yal ta li neque'xye. Li Dios quiq'uehōc re li tzacaemk a'in re nak tätzacak. Ut lao aj pabanel li nakanau li xyalal, nakatzaca ut nakabantioxi chiru li Dios nak quixq'ue ke li katzacaemk. ⁴ Chixjunil li quixyo'obtesi li Dios, a'an chabil. Mac'a' xtz'ektañanquil. Nakabantioxi chiru li Dios ut nakatzaca. ⁵ Mac'a' xtz'ektañanquil xban nak li Dios quixye nak us xtzacanquil ut xban nak nocotijoc sa' xben. Jo'can nak osobtesinbil chic xban.

Quiq'uehe' xna'leb laj Timoteo re nak tacuank sa' tiquilal

⁶ At Timoteo, cui nacach'olob xyalal li tijleb a'in chiruheb laj p̄abanel, laakat jun chabil aj c'anjel chiru li Jesucristo. Ut laat yōkat chi q'ūic sa' la p̄abál riq'uin li xyalal ut riq'uin li chabil tijleb li yōcat chixp̄abánquil. ⁷ Chatz'ektañana chi jun aj cua chixjunil li najter serak' li yal tontil na'leb naxye, li mac'a' na-oc cui'. Ut q'ue ach'ol chixbanunquil li c'a'ru naraj li Dios. ⁸ Nayeman nak us nak takatzol kib chixch'olaninquil kib re nak cauhako. Abanan li k'axal cui'chic lok' a'an xtzolbal kib re nak cauhak kach'ol sa' li kapabal xban nak riq'uin li kapabal cuan li rusilal li Dios kiq'uin anakcuan arin sa' ruchich'och' ut cuānq'ajcui' li kayu'am chi junelic. ⁹ Relic chi yal nak a'an li tz'akal xyalal li yoquin chixyebal, ut chixjunileb taxak te'pabank re. ¹⁰ Xban nak li yo'yoquil Dios, a'an li kayo'on, jo'can nak yoco xyalbal kak'e chi c'anjelac chiru. A'an naxyechi'i li colba-ib reheb chixjunileb. Abanan, ca'aj cui' li ani te'pabank re, a'neb li te'colek'. ¹¹ A'an a'in li tijleb li tac'ut chiruheb la cuech aj pabanelil. Tach'olob lix yalal chiruheb. ¹² Ut laat, at Timoteo, chatcuānk sa' xyalal ut chat-atinak sa' xyalal. Charaheb la cuas acuitz'in. Cauhak taxak ach'ol sa' la pabál ut ticak taxak la yu'am. Jo'can taxak tabanu re nak ma anī chitz'ektañank acue xban la sajilal. Che'xtzol ban ribeb acuiq'uin xban nak yokat chixc'ambaleb xbe sa' tiquilal. ¹³ Roybeninquil tincuuulak eriq'uin, q'ue ach'ol chi rilbal xsa'li Santil Hu chiruheb laj p̄abanel. Q'ueheb xna'leb ut tach'olob xyalal chiruheb. ¹⁴ Chaq'ue taxak ach'ol chi c'anjelac jo' quiq'uehe' acue xban li Dios. Li c'anjel a'in q'uebil acue nak eb li profeta que'atinac chacuix ut nak eb laj c'amol be sa' xyankeb laj pabanel que'xq'ue li ruk'eb sa' aben. ¹⁵ Q'ue ach'ol chixbanunquil chixjunil li xinye acue re nak chixjunileb te'xq'ue retal nak tíc la yu'am ut te'xq'ue ajcui' retal nak us yo chi elc li c'anjel yōcat chixbanunquil. ¹⁶ Q'ue retal chi us li c'a'ru

tabanu jo' ajcui' li c'a'ru tatzoleb cui'. Cui tabanu chi jo'can, tatcolek' laat ut te'colek' ajcui' li ani te'abink re li c'a'ru taye.

5

Laj Timoteo tixq'ue xna'lebeb laj pabanel sa' xyalal

¹ Mák'useb li chequel cuink sa' josk'il. Q'ueheb ban xna'leb jo' la yucua' chacuu nak tacuileb. Ut chaq'ueheb ajcui' xna'leb li saj cuink jo'queb acuitz'in chacuu nak tacuileb. ² Ut chaq'ueheb xna'leb li chequel ixtx jo' la na' chacuu nak tacuileb. Ut chaq'ueheb ajcui' xna'leb li saj ixtx jo'queb la cuanab chacuu nak tacuileb. Chaq'ueheb xna'leb riq'uin xtiquilal ach'ol.

Laj Pablo quixch'olob xyalal chanru nak te'tenk'ak li xmalca'an

³ Cha-oxlok'iheb li xmalca'an ut chatenk'aheb cui yal nak ma anci chic neque'tenk'an reheb. ⁴ Abanan cui cuan ralal xc'ajol, a'an eb chic te'tenk'ank reheb. Tento nak te'xtzol rib chixbanunquil chi jo'ca'in re nak te'xnau rilbal lix jun cablaleb. Te'xnau xk'ajcamunquil lix na' xyucua' jo' nacuulac chiru li Dios. ⁵ Li xmalca'an li jun atal, ca'aj chic riq'uin li Dios nayo'onin. Naxnumsi li cutan ut li k'ojojin chi tijoc ut naxtz'ama chiru li Dios nak tatenk'ak. ⁶ Abanan li xmalca'an li naxsic' xsahil xch'ol junes riq'uin li naxrahi ru, li jun a'an chanchan ac camenak xban lix mac usta toj yo'yo. ⁷ Tach'olob li xyalal a'in chiruheb chixjunileb laj pabanel re nak mac'a'ak xk'usbaleb. ⁸ Tento nak junak laj pabanel tixtenk'aheb li rech'alal. Ut k'axal cui'chic tento nak tixch'olaniheb li cuanqueb sa' li rochoch. Cui inc'a' naxbanu a'an, li jun a'an inc'a' naxq'ue xcuanguil lix pabal ut k'axal cui'chic nim lix mac chiruheb li toj maji' neque'xpab li Dios. ⁹ Ma anci junak xmalca'an tatz'ibak xc'aba' sa' xyankeb li neque'tenk'ac xbaneb laj pabanel cui toj maji' naxbanu oxc'al chihab. Ut macua'ak aj muxul ru xsumlajic nak quicuan. ¹⁰ Tento ajcui' nak li xmalca'an na'nok ru riq'uin li chabilal ac xbanu. Ac xq'uiresiheb lix coc'al sa' xyalal. Quixc'ul li rula' sa' xyalal nak que'cuulac sa' rochoch. Quixch'ajli rokeb li rech aj pabanelil. Quixtenk'aheb li yoqueb chixc'ulbal li rayal. Cui chabil li c'anjel quixbanu, naru tixc'ul lix tenk'anquil. ¹¹ Abanan, li xmalca'an li toj sajeb inc'a' tatz'ibak xc'aba'eb sa' xyankeb li neque'xc'ul xtenk'anquil xban nak mare te'xra cui'chic ru li sumlac ut märe anchal inc'a' chic te'xq'ue xch'ol chi c'anjelac chiru li Cristo. ¹² Ut märe anchal che'cuech'ik rix xban nak inc'a' chic te'c'anjelak chiru li Cristo jo' que'xyechi'i xbanunquil. ¹³ Ut jo' cui' anchal neque'xtzol ribeb chi subuc cutan nak neque'xic sa' li junjunk chi cab. Ut macua'ca'aj cui' subuc cutan neque'xbanu. Neque'xtzol aj ban cui' li moloc atin ut li q'uehoc etal ut neque'xye li moco yehec' ta naraj. ¹⁴ Jo'can nak nacuaj nak li xmalca'an li toj sajeb te'sumlak cui'chic. Che'cuank ralal xc'ajol ut che'xjolomi lix jun cablal re nak inc'a' tohobek' lao aj pabanel xbaneb li xic' neque'iloc ke. ¹⁵ Ninye a'in xban nak cuanqueb li xmalca'an li ac que'risi ribeb sa' kayank ut yoqueb chixbanunquil li c'a'ru naraj laj tza. ¹⁶ Cui junak aj pabanel usta ixtx usta cuink, cuan junak rech'alal xmalca'an, tento nak tixtenk'a. Inc'a' tixq'ue nabal li ik sa' xbeneb li rech aj pabanelil li neque'tenk'an reheb li xmalca'an li mac'a'eb ralal xc'ajol.

Laj Pablo quixye chanru te'xbanu laj pabanel li te'c'amok be sa' xyankeb

¹⁷ Oxlok'ibilakeb li neque'c'amoc be chi chabil sa' xyankeb laj pabanel. Ut xc'ulub ajcui' nak te'xc'ul xc'ajcamunquil xban nak neque'xq'ue xch'ol chixch'olobanquil xyalal li ratin li Dios ut chixtzolbaleb laj pabanel.

¹⁸ Jo'ca'in tz'ibanol sa' li Santil Hu: Mabac' xtz'ymal re li boyx nak yo

chixyek'inquil ru li trigo re risinquil sa' rix. Canab ban chixcua'bal ca'ch'inak re, nak yo chi c'anjelac. (Dt. 25:4) Jo'can ajcui' laj c'anjel. Tz'ibānbil ajcui' retalil nak tento ajcui' nak tixc'ul lix tojbal. ¹⁹ Mapab li ani tajitok re junak aj c'amol be sa' xyankeb laj pabanel cui yal jun ajcui' li najitoc re. Cuānk ban cuib oxibak li te'jitok re, re nak tapabak nak yal lix mac. ²⁰ Ut li ani cuan xmāc, us xk'usbal chiru chixjunileb laj pabanel re nak li jun ch'ol chic aj c'amol be te'xucuak ut te'xc'oxla chi us li c'a'ru te'xbānu. ²¹ Jo' chiru li Dios, jo' chiru li Kacua' Jesucristo, jo' ajcui' chiruheb li santil ángel, lain nintz'ama chacuu nak tabānu la taklanquil yoquin chixyebal ácue. Ut inc'a' tasic' ru junak. Juntak'etakeb ban chixjunileb nak tacuileb. Jun xxiquic nak tak'useb li ani cuanqueb xmāc. ²² Maq'ue junak chi c'amoc be sa' junpat sa' xyankeb laj pabanel. Xben cua tacuile chanru lix yu'am xban nak cùi' laat taxakab chi c'anjelac chi junpat ut na-oc chi mācōbc, cuan ajcui' mac sa' aben laat. Chatcuānk ban chi tíc la ch'ol. ²³ Xban nak cuan xyajel la sa', macuuc' junes ha'. Naru tacuuc' ca'ch'inak li vino re xbanbal. ²⁴ Maxakab junak aj c'amol be chi junpat chi c'anjelac xban nak cuanqueb li cuink nac'utun c'a'ru lix maqueb ut cuan li rakba atin sa' xbeneb. Ut cuanqueb cui'chic toj mokon nac'utun c'a'ru lix maqueb. ²⁵ Ut cuan ajcui' li neque'banun re li chabilal. Cuan nak nac'utun li chabilal neque'xbānu ut cuan nak inc'a' nac'utun. Abanan, toj mokon chic tac'utunk li us neque'xbānu.

6

Laj Pablo quixye chanru te'xbānu li mos riq'uineb lix patrón

¹ Eb li mos aj pabaneleb te'x-oxlok'i lix patroneb re nak ma ani tamajecuānk re lix c'aba' li Dios chi moco te'xtz'ektana li katibjal. ² Moco xban ta nak rech aj pabaneleb lix patrón nak inc'a' te'xq'ue sa' xnak'eb ru. Tento aj ban cui' nak te'xq'ue xch'ol chi trabajic xban nak rech aj pabanelil li neque'uluc re li chabil c'anjel neque'xbānu ut xban nak raroqueb ajcui' xban li Dios. At Timoteo, a'an a'in li tach'olob xyalal chiruheb laj pabanel.

Eb laj balak' inc'a us xna'lebeb

³ Cuan li neque'utuc re jalan tijleb li moco yal ta. Moco neque'xpab ta li yal li quixc'ut chiku li Kacua' Jesucristo. Jalan cui' lix pabaleb. ⁴ Eb li cuink a'an mac'a' neque'xnau. Junes xnimobresinquil rib neque'xbānu. Ca'aj cui' xcech'inquil ribeb chirix atin nacuulac chiruheb. Ut riq'uin a'an nachal li cakalinc, li hoboc, li k'abanc ut li cuibanc ch'olej. ⁵ Eb li cuink a'in, junes cuech'inc neque'xbānu. Moco tuktu ta xc'a'uxeb ut moco yal ta li neque'xye. Neque'xc'oxla nak riq'uin lix pabaleb te'xtau xtumineb. Majunaji acuib riq'uineb a'an. ⁶ Yal nak k'axal lok' li pabal chok' reheb li neque'xc'ojob xch'ol riq'uin li jo' nimal jo' ch'inal cuan reheb. ⁷ Mac'a' cuan ke nak coyo'la sa' ruchich'och' ut mac'a' ajcui' takac'am nak tocamk. ⁸ Jo'can nak cui cuan katzacaqmuk ut cui cuan kat'icr re xtz'apbal kib, c'ojc'ok kach'ol riq'uin a'an. ⁹ Abanan eb li neque'rahoc ru li biomal, neque'xq'ue rib chi alec ut neque'xbānu li yibru aj na'leb. A'an napo'oc ru lix c'a'uxeb ut riq'uin chixjunil li inc'a' us neque'xbānu, neque'xsach lix pabaleb. ¹⁰ Li xrahinqul ru li tumin, a'an xxe' xtonal chixjunil li māusilal. Cuanqueb li que'xtz'ektana lix pabal xban xrahinqul ru li tumin. Ut q'quila rayllal que'xbok sa' xbeneb. Ut neque'yot'ot'nac sa' xch'oleb riq'uin li inc'a' us neque'xbānu.

Laj Pablo quixye re laj Timoteo chanru nak tac'anjelak chiru li Dios

¹¹ Ut laat, at Timoteo, laat aj c'anjel chiru li Dios. Mabanu li māusilal li neque'xbānu eb a'an. Q'ue ban ach'ol chi cuānc sa' tiquillal. Chara li Dios ut

chatpabank chiru. Charaheb la cuas acuitz'in. Chacuy li raylal ut chatcuank sa' tulanil. ¹² Yal ak'e chi q'uiç sa' la pabal ut q'ue ach'ol chirechaninquil li junelic yu'am, li bokbilat cui' xban li Dios. Laat xaye ut xac'utbesi chi tz'akal la pabal chiruheb nabal. ¹³ Sa' xc'aba' li Dios li naq'uehoc yu'am, lain nintz'ama chacuu nak tabanu la taklanquil. Ut nintz'ama ajcui' chacuu sa' xc'aba' li Jesucristo li quich'oloban xyalal chi mac'a' xxiu chiru laj' Poncio Pilato. ¹⁴ Ut la taklanquil, a'an a'in: chabanu chixjunil li taklanbilat cui' xban li Kacua'. Ticak la ch'ol ut mac'a'ak ak'usbal toj retal tac'ulunk cui'chic li Kacua' Jesucristo.

Lok'oninbilak taxak li Dios anakcuan ut chijunelic

¹⁵ Nak tixtau xk'ehil li Dios tixc'utbesi cui'chic chiku li Jesucristo. Li Dios, a'an k'axal lok' ut junaj ajcui'. A'an li Rey li k'axal nim xcuanguil sa' xbenet chixjunileb li rey li cuanqueb sa' ruchich'och'. Ut a'an ajcui' li Kacua' li k'axal nim xcuanguil sa' xbenet chixjunileb li cuanqueb xcuanguil. ¹⁶ Li Dios yo'yo chi junelic. Mac'a' xticlajic ut mac'a' roso'jic. A'an cutan saken chi junelic ut ma' ani naru na-oc riq'uin xban nak k'axal lok'. Inc'a' ilbil ru chi moco nali' ru sa' ruchich'och'. Chikaq'uehak taxak xlok'al ut chikalok'onihak taxak xban nak k'axal nim lix cuanquilar anakcuan ut chi junelic. Jo'can taxak.

Laj Timoteo tixq'ue xna'lebeb li biom

¹⁷ Tach'olob xyalal chiruheb li biom nak inc'a' te'xk'etk'eti ribeb chi moco te'xc'ojob xch'ol sa' xben li biomal li na-oso'. Che'xq'ue ban xch'ol chixyo'oninquel li yo'yoquil Dios. A'an naq'uehoc ke chi nabal chixjunil li c'a'ak re ru. ¹⁸ Chaye reheb nak che'xbanu li us. Chinumtaklix chabilaleb. Che'xnauhak sihinc chi nabal ut chi anchaleb xch'ol. ¹⁹ Cui neque'xbanu chi jo'can yoqueb chixc'ulanquil liz rabaleb sa' choxa ut riq'uin a'an c'ojc'ok xch'oleb. Che'xbanuhak chi jo'can re nak tacuanklix yu'ameb chi tz'akal re ru ut chi numtajenak xsahil xch'oleb.

Laj Pablo quixrak lik hu riq'uin xq'uebal xna'leb laj Timoteo

²⁰ At Timoteo, cuank sa' ach'ol li tijleb q'uebil acue xban li Dios. Maq'ue xcuanguil li jo' majo'il serak' ut li cuech'ij ib' xban nak mac'a' na-oc cui'. Cuan li neque'yehoc re nak chabil na'leb, abanan moco yal ta. ²¹ Ninye a'in xban nak cuan li que'paban re li na'leb a'in ut xban a'an, que'xcanab xpabankuil li tz'akal yal. A' taxak li rusilal li Dios chicuank eriq'uin.

Li Xcab Hu li Quixtz'iba li San Pablo re laj Timoteo

Laj Pablo naxtakla xsahil xch'ol laj Timoteo

¹ Lain laj Pablo. Lain x-apóstol li Jesucristo xban nak jo'can quiraj li Dios. Taklanbilin chixyebal resil li ac' yu'am li yechi'inbil ke xban li Dios, li yu'am li naxq'ue ke li Jesucristo. ² Yoquin chixtz'ib'anquil li hu a'in acuiq'un, at Timoteo. Rarocat inban ut chanchanat tz'akal cualal chicuu nak cuancat. Chicuank taxak acuiq'un li usilal, li uxtan, ut li tuktukuilal, li nachal chak riq'un li Dios li K'acua' ut riq'un li K'acua' Jesucristo.

Inc'a toxutq'anak chixyebal resil li evangelio

³ Junelic ninbantioxi chiru li Dios nak nacatinjultica sa' lin tij chi k'ek chi cutan. Ut mac'a' nach'i'ch'i'in cue sa' li cuam nak ninc'anjelac chiru li Dios jo' que'xbanu lin xe'tonil yucua'. ⁴ Nacuaj raj rilbal cui'chic acuu. Jultic cue chanru nak xatyabac xban xrahil ach'ol ut nacuaj nak taṣahok' cui'chic inch'ol nak tincuil acuu. ⁵ Nak nintijoc najultico' cue nak chi anchal ach'ol xatpaban. Junxil la na'chin lix Loida jo' ajcui' lix Eunice la na' que'paban chi anchaleb xch'ol ut ninnau nak jo'can ajcui' nak xatpaban laat. ⁶ Jo'can nak ninjultica chacuu nak chaq'uehak chi c'anjelac la maṭan q'uebil acue xban li Dios nak quinq'ue li cuuk' sa' aben. ⁷ Maṭua' li xucuac li xkamatani chak riq'unin li Dios. Kacuanquil ban xkamatani riq'unin. Li Dios nocoxtenk'a chixrabaleb li kas kitz'in ut a'an naq'uehok ke li chabil na'leb. ⁸ Jo'can ut nak matxutanac chixch'olobanquil resil li K'acua' Jesucristo chi moco matxutanak inban lain xban nak cuanquin chi prexil xban xyebal resil li K'acua'. Chaq'ue ban acuib chi tz'akonc riq'unin li raylal nac'ulman sa' xc'aba' li evangelio. Ut li Dios taq'uehok acuanquil chixcuybal. ⁹ A'an quicoloc ke ut quixsic' chak ku re nak toc'anjelak sa' tiquilal. Maṭua' xban kayehom kabānuhom nak quixsic' ku. Yal xban li rusilal ban, xban nak jo'can quiraj. Sa' xc'aba' li Jesucristo nak quiruxtana ku, xban nak ac jo'can chak sa' xch'ol junxilaj nak toj maji' quixyib li ruchich'och'. ¹⁰ Li usilal a'in quic'utbesic chiku riq'unin lix c'ulunic sa' ruchich'och' li K'acua' Jesucristo laj Colol ke. Ut a'an qui-isin re xcuanguardil li cämc ut quixc'ut chiku li ac' yu'am li mac'a' roso'jic. ¹¹ Li Dios quixakaban cue chi c'anjelac chok' apóstol ut chok' aj tzolol reheb li maṭua'eb aj judío re nak tinye resil li colba-ib reheb. ¹² Jo'can nak nincuy chixjunil li raylal ut inc'a' ninxutanac xban nak c'ojo'c' inch'ol riq'unin li K'acua'. A'an li ninpab ut xink'axtesi cuib sa' ruk'. Ninnau nak a'an tatenk'ank cue toja' yal nak tac'ulunk cui'chic li Jesucristo. ¹³ Chicuank sa' ach'ol li tijleb li tz'akal yal li xinc'ut chacuu. Ut chicuank la pabal ut chatrahok xban nak rehat chic li Cristo. ¹⁴ Riq'unin xcuanguardil li Santil Musik'ej li cuan acuiq'unin, chac'ulahak sa' ach'olli xyalal li lok'laj colba-ib k'axtesinbil acue xban li Dios. ¹⁵ Laat nacanau nak chixjunileb laj pabanel li cuanqueb Asia xine'xcanab injunes. Sa' xyänkeb a'an cuanqueb laj Figelo ut laj Hermógenes. ¹⁶ Ca'aj chic laj Onesíforo q'uila sut colinril sa' tz'alám ut quixc'ojob inch'ol ut inc'a' quixutq'anac xban nak bac'boquin chi cadena. A' taxak li K'acua' Dios chisobtesink re li jun cabal a'an. ¹⁷ Nak quic'ulun arin Roma, laj Onesíforo quinixsic' chi anchal xch'ol toj retal quinxtau. ¹⁸ Laat nacanau chi tz'akal nak quixq'ue xch'ol chi tenk'anc aran Efeso. A' taxak li K'acua' Dios chixutq'anak ru sa' xk'ehil xc'ulunic li K'acua' Jesucristo.

2

Tento xcuybal xnumsinquil li raylal sa' xc'aba' li Jesucristo

¹ A'ut anakcuan, at Timoteo, cauhak ach'ol riq'uin li usilal q'uebil ke xban nak reho chic li Cristo Jesús. ² Li xyalal li xinc'ut chacuu chiruheb nabaleb li cristian, a'an ajcui' chajultica chiruheb li cuink li t̄iqueb xch'oleb re nak eb a'an chic te'c'utuk re chiruheb jalaneb chic. ³ Chattz'akonk riq'uin li raylal li nakac'ul ut chacyak xnumsinquel chixjunil li raylal jo' jun xchabil soldado li Jesucristo. ⁴ Junak soldado inc'a' naru naxsic' jalan xc'anjel xban nak ac sic'bil ru chok' soldado. Naxq'ue ban xch'ol chixbanunquil li nacuulac chiru li nataklan re. ⁵ Ut jo'can ajcui' li naxyal xk'e chi alinac, inc'a' naxc'ul lix matan cui inc'a' naxbanu chi tz'akal re ru. ⁶ Laj c'alom li nac'anjelac chi cau tento nak a'an li xben l̄i t̄atz'ak ru li racuimk. ⁷ C'oxlan chirix li oxib chi na'leb li xinye acue ut a' taxak li Kacua' Jesucristo chitenk'ank acue chixtaubal ru li xyalal. ⁸ Chijulticok' acue nak li Jesucristo, a'an xcomoneb li ralal xc'ajol li rey David ut a'an li quicuaclí cui'chic chi yo'yo sa' xyankeb li camenak. A'an a'in li resilal li evangelio li yoquin chixyebal lajn. ⁹ Sa' xc'aba' li evangelio yoquin chixc'ulbal li raylal a'in, ut bac'boquin chi cadena. Chanchan naux re junak k'axal nim xm̄ac. Usta bac'boquin, abanan li resil li evangelio tayemank yalak bar xban nak li ratin li Dios inc'a' naru xmukbal. ¹⁰ Jo'can nak nincuy xnumsinquel chixjunil li raylal li ninc'ul sa' xc'aba'eb li sic'bileb ru xban li Dios re nak eb a'an naru te'xtau li lok'laj colba'ib li naxq'ue li Jesucristo ut te'xtau ajcui' l̄ix lok'al chi junelic. ¹¹ Li atin a'in li oc cue xyebal acue, a'an tz'akal yal: Cui cocam kochben li Cristo, t̄acuank ajcui' kayu'am kochben. ¹² Cui takacuy xnumsinquel li raylal, taq'uehek' ajcui' kacuanquil xban li Dios kochben li Cristo. Ut cui lao nakatz'ektana, a'an toxtz'ektana ajcui' lao. ¹³ Cuan nak lao inc'a' nakabánu li c'a'ru nakaye, abanan li Dios tic xch'ol ut junelic naxbánu li c'a'ru naxye. A'an inc'a' nacuiban xch'ol.

Laatak jun chabil aj c'anjel chiru li Dios chi mac'a' c'a'ru taxutanaq cui'

¹⁴ Chajultica li xyalal chiruheb laj pabanel. Sa' xc'aba' li Kacua' Dios chayehak reheb nak che'xcanabak xcuech'inquil ribeb chirix atin xban nak a'an mac'a' na-oc cui'. Ca'aj cui' xpo'baleb xch'ol li neque'abin re naxbanu. ¹⁵ Chaq'uehak ach'ol chi c'anjelac chiru li Dios jo' junak tz'akal aj c'anjel mac'a' c'a'ru taxutanaq cui'. Chach'olobak chi tz'akal resil li colba'ib chiruheb. ¹⁶ Mat-oquen riq'uin jo' majo'il serak', li mac'a' na-oc cui'. Li neque'banun re chi jo'can k'axal cui'chic neque'xq'ue xch'ol chixbanunquil li mausilal. ¹⁷ Naniman ru li tijleb li neque'xc'ut. Chanchan nak naniman ru junak yajel jo' li cáncer xc'aba'. Jo'can que'xbánu laj Himeneo ut laj Fileto. ¹⁸ Eb a'an que'xcanab xp̄abanquil li tz'akal yal ut que'xpab li tic'ti'. Neque'xye nak ac que'cuaclí chi yo'yo eb li camenak, chanqueb. Ut riq'uin a'an cuan li yoqueb chixpo'bal ruheblix pabaleb. ¹⁹ Abanan li xyalal q'uebil ke xban li Dios inc'a' naru najalman ru. Jo'ca'in tz'ibanol sa' li Santil Hu: li Dios naxnau ruheb li ralal xc'ajol, ut chixjunileb li te'xc'aba'in xc'aba' li Kacua', tento nak te'xcanab chi junaj cua li mausilal. ²⁰ Sa' junak xnimal ru cab cuan li sec' yibanol riq'uin oro ut plata. Ut cuan li ch'och' sec' ut cuan ajcui' li sec' yibanol riq'uin che'. Cuan li chabil xc'anjel ut cuan li yalak c'a'ru nac'anjelac cui'. ²¹ Cui junak aj pabanel naraj taq'uehek' re jun lix chabil c'anjel xban li Dios, tento nak li jun a'an tixcanab chi junaj cua chixjunil li mausilal. Cui tixbánu chi jo'can, li jun a'an k'axtesinbilak chic chi c'anjelac chiru li Kacua' ut cauresinbilak chic chixbanunquil li chabil c'anjel. ²² Jo'can utan chatz'ektana chi junaj cua li inc'a' us li neque'xrahi ru li toj sajeb. Ut q'ue ach'ol chichuank sa' t̄iquilal ut chatpábank chi tz'akal. Charahakeb la

cuas acuítz'in ut chatcuánk sa' usilal riq'uineb chixjunileb. Läakat jun sa' xyánkeb li tiqueb xch'ol li neque'tijoc chiru li Dios. ²³ Maçua'akat jun sa' xyánkeb li neque'xcuech'i rib chirixx tontil atin li mac'a'aj e. Laat ac nacanau nak li cuech'inc ib junes ra xic' naxq'ue. ²⁴ Junak aj c'anjel chiru li Kacua' maçua'ak aj sic'ol ra xic'. Tulanak ban riq'uineb chixjunileb. Cuank xna'leb re xc'utbal li xyalal chiruheb li ras ritz'in ut nimak xcuyum. ²⁵ Ut sa' tulanil chixch'olobak xyalal reheb li neque'cuech'in rix li xyalal. Mare chan nak li Dios tatenk'ank reheb chixyot'bal xch'oleb, chixjalbal xc'a'uxeb re te'xnau ru li yal. ²⁶ Ut te'risi rib sa' ruk' laj tza li yo chi alenc reheb re nak inc'a' chic te'xbanu li c'a'ru naraj a'an. Ut te'suk'ik taxak sa'li tz'akal xyalal.

3

Tanumtak li mäusilal sa' ruchich'och' sa' roso'jiqueb li cutan

¹ Nacuaj ajcui' nak tñanau nak k'axal xiu xiu li cutan te'chälk chiku nak tanach'ok chak roso'jiqueb li cutan. ² Eb li cristian junes reheb te'raj. Te'xrahi ru li tumin. Te'xnimobresi xcuanyl xjuneseb rib. Te'xk'etk'eti ribeb. Te'hobok ut te'xk'et ratin xna' xcucu'a'. Inc'a' te'tioxinuk ut inc'a' te'xq'ue xcuanyl xpabankil li Dios. ³ Mac'a'ak rahoc riq'uineb. Mac'a'ak usilal riq'uineb. Telaje'xyo'ob atin chi ribileb rib. Aj k'abanelakeb. Inc'a' te'xcuy rib. Josk'akeb ut xic' te'r'il li chabilal. ⁴ Te'xk'axtesi li ras ritz'in sa' ruk'eb li xic' neque'iloc reheb. Cauhakeb rib chixbanunquil li inc'a' us. Tanumtak'lix k'etk'etileb. Inc'a' te'xra li Dios. A' ban chic lix saylal li ruchich'och', a'an chic li te'xra. ⁵ Te'xye rib nak aj pabaneleb, abanan inc'a' te'xq'ue xcuanyl li pabal. At Timoteo, majunaji acuib riq'uineb a'an. ⁶ Sa' xyánkeb a'an cuanqueb li cuink li neque'xsic' chanru te'oc sa' eb li cab chi balak'inc ut neque'xc'ut lix tijleb chiruheb li ixx li mac'a'eb xna'leb, li neque'rec'a'nak aj maqueb, ut junes li c'a'ak re ru neque'xrahi ru, a'an li neque'xbanu. ⁷ Ut eb li ixx a'in junelic yoqueb chixtzolbal li c'a'ak re ru chi tijleb, abanan inc'a' neque'xtau ru li xyalal. ⁸ Eb a cuink a'an yoqueb chixbanunquilo' que'xbanu laj Janes ut laj Jambres nak que'xcuech'i rix laj Moisés. Neque'xtz'ektana li yal. Inc'a' useb lix na'lebeb ut mac'a' neque'oc cui' xban nak tz'ektanabil li pabal xban. ⁹ Aban inc'a' ajcui' us taelk chiruheb xban nak ch'olch'ok chiruheb chixjunileb nak xmajelil xna'lebeb te'xbanu cui', jo' que'xc'ul laj Janes ut laj Jambres nak que'xcuech'i rix laj Moisés.

Laj Pablo naxq'ue xna'leb laj Timoteo

¹⁰ Abanan laat, Timoteo, ac nacanau li tijleb ninch'olob xyalal. Xaq'ue retal chanru nincuan ut li c'a'ru ninc'oxla xbanunquilo. Xaq'ue retal lin pabal ut chanru nak nincuyuc ut chanru ninrahoc. Ut xaq'ue ajcui' retal chanru xcacuial lin ch'ol. ¹¹ Ac xaq'ue retal chanru nak xincuy xnumsinquilo' li ra xic' ut li raytal li xinc'ul xban xyebal resil li evangelio aran sa' eb li tenamit Antioquia, Iconio ut Listra. Chixjunil li raytal quilajincuy xnumsinquilo' ut li Kacua' xcoloc cue chiruheb chixjunil li raytal a'an. ¹² Ut yal ajcui' nak te'rahobtesik li jo' q'uialeb li te'raj cuanc sa' tiquilal sa' xc'aba' li Jesucristo. ¹³ Ut tanumtak'lix mäusilaleb laj balak' li inc'a' useb xna'leb. Yokeb chi balak'inc ut yok ajcui' xbalak'inquileb a'an. ¹⁴ A'ut laat, Timoteo, junelic taxak cauhak ach'ol chixpabankil li xyalal li xatzol cui' chak acuib. Ac nacanau nak tz'akal yal ut nacanau aniheb li xatzol cui' chak acuib. ¹⁵ Chalen chak toj sa' aca'ch'inal ac nacanau xsa' li Santil Hu. Nacanau nak a'an li nac'utuc li xyalal chiku nak li colba-ib natauman riq'uin xpabankil li

Jesucristo. ¹⁶ Chixjunil li tz'ibanol sa' li Santil Hu, a'an musik'anbil xban li Dios ut nac'anjelac re xc'utbal chiku li xyalal. Nac'anjelac re kak'usbal ut re xq'uebal kana'leb ut naxc'ut chiku chanru nak tocuank sa' tiquilal. ¹⁷ Li Santil Hu naxc'ut chiru li nac'anjelac chiru li Dios chanru nak tācuank chi tz'akal re ru lix yu'am ut naxtenk'a a'an re nak cauresinbilak chi tz'akal re xbānunquil chixjunil li chābil c'anjal.

4

¹ Nintz'ama chacuu sa' xc'aba' li Dios nak tach'olob li xyalal. Ut nintz'ama ajcui' sa' xc'aba' li Kācua' Jesucristo, li tarakok atin sa' xbeneb li yo'yoqueb ut li camenakeb nak tāchālk cui'chic riq'uin lix nimal xcuankuil. ² Lain nintz'ama chacuu nak tach'olob xyalal li ratin li Dios. Chayal ak'e chixbanunquil chi junelic usta naxq'ue rib chacuu usta inc'a'. Chatijeb ut chak'useb. Chaq'ue xcacuila xch'oleb ut chicuank acuyum ut inc'a' tācanab xc'utbal li xyalal chiruheb. ³ Tento nak tac'ut li xyalal chiruheb xban nak tācuulak xk'ehil nak inc'a' chic te'raj rabinquil li tijleb tz'akal yal. A' chic li jun tubeb chi aj tzolone, a'an chic li te'xtake re nak tayehek' rebeb c'a'ru li te'raj rabinquil ut a'an chic li te'xq'ue xch'ol chirabinquil. ⁴ Inc'a' chic te'raj rabinquil lix yalal. A' chic li serak' li māc'a' na-oc cui', a'an chic li te'raj rabinquil. ⁵ A'ut laat, Timoteo, chaq'uehak retal chi us li c'a'ru tābanu. Chacuyak xnumsinquil li raylal ut chajulticák resil li santil evangelió ut chabānuhak lā c'anjal chi tz'akal. ⁶ Ut lain, sa' xc'aba' li Kācua' tāosok' lin yu'am jo' jun li mayej chiru. Yō chi cuulac xk'ehil nak tincamsik. ⁷ Xinyal ink'e chixbanunquil li chabil c'anjal. Xinq'ue inch'ol chixbanunquil chi tz'akal li tenebanil sa' inben xbanunquil ut chi anchal inch'ol xinpāban. ⁸ Anakcuan ca'aj chic lin mātan nacuoybeni li naq'uehe' rebeb li tiqueb xch'ol. Li Kācua' li narakoc atin sa' tiquilal, a'an taq'uehok cue sa' li cutan nak tol-elk cui'chic. Ut moco ca'aj cui' ta cue lajin tixq'ue. Tixq'ue aj ban cui' rebeb chixjunileb li yokeb chi oybeninc re lix c'ulunic chi anchaleb xch'ol.

Laj Pablo naxye re laj Timoteo c'a'ru tixbanu

⁹ Chalkat chicuibal chi junpat. ¹⁰ Cuanquin injunes arin. Laj Demas xinixcanab xban xrahinquil ru li c'a'ak re ru cuan sa' ruchich'och' ut xco sa' li tenamit Tesalónica. Laj Crescente xco Galacia chi c'anjelac ut laj Tito xco sa' li na'ajej Dalmacia. ¹¹ Chixjunileb li neque'tenk'an cue mā aniheb chic. Ca'aj chic laj Lucas cuan cuiq'uin. Jo'can nak nintz'ama chacuu nak tanume'bok chak laj Marcos ut tac'am chak chacuix nak tāchālk. A'an tinixtenka chi chabil sa' li c'anjal. ¹² Ut laj Tíquico xintakla sa' li tenamit Efeso. ¹³ Nak tāchālk, chac'amak chak cue li capa quincanab chak sa' li tenamit Troas sa' rochoch laj Carpo. Ut chac'amak ajcui' chak li hu. Li k'axal nacuaj ru, a'an li tz'um li tz'ibanol ru. ¹⁴ Laj Alejandro, laj tenol ch'ich', nabal chi raylal xbanu cue. Li Kācua', a'an li tak'ajcāmunk re riq'uin li c'a'ru naxbanu. ¹⁵ Chacolak ajcui' acuib laat chiru a'an xban nak k'axal xic' narabi resil li colba-ib li nakaye. ¹⁶ Nak quinboke' xben cua riq'uin laj rakol atin, mā ani quiatinac chicuix. Quine'xcanab injunes chixjunileb. Miq'uehe' ta li māc a'in sa' xbeneb. ¹⁷ Abanan li Kācua' quitenk'an cue ut quixq'ue xcacuila inch'ol re xjulticanquil chi tz'akal resil li colba-ib re nak chixjunileb li mācua'eb aj jiduo te'rabi resil li evangelio. Jo'can nak quincole' sa'ruk' li cakcoj. ¹⁸ Ut li Kācua' tacolok cue chiru li māusil neque'xc'oxla xbanunquil cue ut tinixc'am sa' lix nimajcual cuanquil aran sa' choxa. A'an taxak chilok'onimānk chi junelic k'e cutan. Jo'can taxak.

Laj Pablo naxtakla xsahil xch'oleb laj pabanel li cuanqueb Efeso

¹⁹ Chaq'ueheb xsahil xch'oleb lix Prisca ut laj Aquila jo'queb ajcui' chixjunileb li cuanqueb sa' rochoch laj Onesiforo. ²⁰ Laj Erasto quicana chak aran Corinto. Ut laj Trófimo toj yaj nak quincanab sa' li tenamit Mileto. ²¹ K'axal us cui tatchalk nak toj mají' naticla lí habalk'e. Xtakla xsahil ach'ol laj Eubulo, jo'queb ajcui' laj Pudente, laj Lino, lix Claudia ut chixjunileb li herman li cuanqueb arin. ²² A' taxak li Kacua' chicuank acuiq'uin. Ut a' taxak li rusilal li Dios chicuank eriq'uin lqex chejunilex. Jo'can taxak.

Li Hu li Quixtz'iba li San Pablo re laj Tito

Laj Pablo naxq'ue xsahil xch'ol laj Tito

¹ Lain laj Pablo. Yoquin chi tz'ibac acuiq'unin, at Tito. Ninc'anjelac chiru li Dios ut lain x-apóstol li Jesucristo. Xakabanbilin xban li Jesucristo re xtenk'anquileb li sic'bileb ru xban li Dios re nak tz'akalak re rúlix pabaleb. Ut xakabanbilin re xtenk'anquileb re nak te'xtau ru chi tz'akal li xyalal li colba-ib ut tajicobresik lix ch'oleb. ² Ninch'olob li xyalal a'in chiruheb re nak te'pabank ut te'xyo'oni li junelic yu'am. Najter k'e cutan li Dios quixyechi'i chak li junelic yu'am. Li Dios inc'a' natic'ti'ic. ³ Nak quicuulac xk'ehil li Dios laj Colol ke quixc'utbesi li xyalal li colba-ib chiku. Tenebanbil sa' inben xban li Dios xch'olobanquil xyalal li colba-ib yalak bar. ⁴ Yoquin chi tz'ibac acuiq'unin, at Tito. Laat chanchanat tz'akal cualal sa' xc'aba' li kapabal. Chicuank taxak acuiq'unin li usilal ut li tuktukilal li naxq'ue li Dios li ka'Yucua' ut li naxq'ue li Jesucristo laj Colol ke.

Li c'anjal tenebanbil sa' xb'en laj Tito

⁵ Xatincanab aran sa' li tenamit Creta re nak tac'ub ru li c'a'ru toj yibac naraj ut re nak taxakabeb li te'c'amok be chiruheb laj pabanel sa' li junjunk chi tenamit. Jo' xinye acue, jo'can tabanu. ⁶ Ticak xch'ol li ani taxakab re nak mac'a'tayehek' chirixeb. Junak ajcui' li rixakil ut aj pabanelakeb li ralal xc'ajol. Chabilakeb xna'leb ut te'abink chiruheb lix na' xyucua'. ⁷ Li ani nac'amoc be chiruheb laj pabanel, li jun a'an aj c'anjal chiru li Dios. Jo'can nak tento nak ticak xch'ol re nak ma'ani taatinak chirix. Moco k'etk'etak ta ut moco ch'info'ak ta, chi moco tacalak, chi moco tapletik. Ut macua'ak aj rahol ru biomal, chi moco tixsic' xtumin riq'unin balak'ic. ⁸ Junak aj c'anjal chiru li Dios naxc'uleb li rula' chi sa' sa' xch'ol ut nasaho' ajcui' sa' xch'ol riq'uineb li neque'banun re li us. Laj c'anjal chiru li Dios toj naxc'oxla chi us li c'a'ru naxbanu ut junelic cuank sa' usilal riq'uineb li ras ritz'in. Tic xch'ol ut naxcuy xnumsinquil li raylal ut li alec. ⁹ Inc'a' nachinan xch'ol sa' lix pabal. Naxpab ban chi anchal xch'ol li xyalal li quic'ute' chiru re nak tixnau xch'olobanquil li xyalal chiruheb li rech aj pabanelil ut tixnau xq'uebal xna'lebeb li neque'cuech'in re li c'a'ru naxye. ¹⁰ Chaq'uehak retal ani taxakab chok' aj c'amol be xban nak nabaleb li inc'a' neque'xtau xyalal. Neque'atinac chi mac'a' rajbal ut neque'xbalak'li tenamit. K'axal cui'chic nabaleb jo'caneb xna'leb sa' xyankeb li kech aj pabanelil aj judío. ¹¹ Eb a'an tento xk'usbaleb re nak te'xcanob li balak'inc. Yoqueb xpo'bal xch'oleb li junk cabal riq'unin xc'utbal li moco yal ta. Riq'unin balak'inc neque'xtau lix tumineb. ¹² Eb laj Creta que'xq'ue jun li cuink aj k'e chok' xprofeteb. Li cuink a'an quixye chi jo'ca' in chirixeb li rech tenamitil: laj Creta junes tic'ti'ic neque'xbanu. Chanchaneb li josk' aj xul. Eb a'an aj num cua'ineleb ut inc'a' neque'raj trabajic, chan. ¹³ Ut yal ajcui' li quixye. Jo'can nak cau chak'useb re nak te'cacuuk xch'oleb sa' lix pabaleb. ¹⁴ Chak'useb re nak inc'a' te'xpab li tic'ti' li neque'xyo'ob laj judío chi moco che'xpab lix chak'rabebeb li cuink li neque'tz'ektan re li tz'akal yal. ¹⁵ Li tiqueb xch'ol, chixjunil li c'a'ak re ru chabil chiruheb xban nak neque'xsic' li c'a'ru chabil. A'ut eb li inc'a' tiqueb xch'ol, mac'a' c'a'ru us chiruheb xban nak numtajenak xyibal ru lix na'lebeb ut inc'a' us lix c'a'uxeb. ¹⁶ Neque'xye nak neque'xpab li Dios, aban riq'unin li c'a'ru neque'xbanu nac'utun nak moco yal fa. Aj k'etoleb ratin li

Dios ut k'axal yibru lix na'lebeb. Inc'a' useb. Mäc'a' junak chäbil c'anjal taruk te'xbanu.

2

Laj Tito tenebanbil sa' xbən xq'uebal xna'leb laj pabanel

¹ Abanan li c'a'ru tach'olob chiruheb laj pabanel, chaq'uehak retal re nak a'an tz'akal lix yalal li tach'olob chiruheb. ² Chaq'ueheb xna'leb li chequel cuink re nak inc'a' te'calak ut chabilakeb xna'leb. Toj che'xc'oxla chi us li c'a'ru te'xbanu ut che'pabank chi anchaleb xch'ol. Chixjunil li te'xbanu, che'xbanuhak xban nak neque'xra li ras ritz'in ut che'xcuyak li raylal. ³ Ut chaq'ueheb ajcui' xna'lebeb li chequel ixx. Chic'utunk lix lok'aleb riq'uin lix tiquilal xch'oleb. Inc'a' te'xyo'ob atin chirixeb li ras ritz'in ut inc'a' te'calak. Anakeb ban chic aj c'amol be sa' li tiquilal. ⁴ Riq'uin lix chabilal li chequel ixx te'xc'ut chiruheb li ixakilbej li toj sajeb nak te'xra lix belom jo' ajcui' lix coc'aleb. ⁵ Te'xc'ut chiruheb nak chabilakeb xna'leb, ticakeb lix ch'oleb ut te'r'il lix jun cablal chi us. Chabilakeb ut che'pabank chiru lix belomeb. Che'cuank sa' xyalal re nak inc'a' t̄asachmank xcuankil li colba-ib q'uebil ke xban li Dios. ⁶ Ut chaq'ueheb ajcui' xna'lebeb li saj cuink re nak te'xc'oxla chi us li c'a'ru te'xbanu re nak te'cuank sa' tiquilal. ⁷ Ut riq'uin chixjunil li c'a'ak re ru tabanu, laat taticamok be chiruheb sa' tiquilal. Chi anchalak ach'ol ut chabilak la yu'am nak tac'ut li xyalal chiruheb. ⁸ Ut nak tatatinak, tz'akal re ru li c'a'ru taye re nak ma ani tacuech'ink rix li c'a'ru taye. Chi jo'can te'xutanak li xic' neque'iloc ke ut mäc'a' c'a' re ru naru te'xye chickix lao aj pabanel. ⁹ Chaq'ueheb ajcui' xna'lebeb li mos re nak che'abink chiruheb lix patroneb. Inc'a' te'sumenk. Che'xbanuhak ban li c'a'ru tayehet' rebeb re nak sahakeb sa' xch'ol lix patron riq'uineb. ¹⁰ Inc'a' che'relk'a li c'a'ru rebeb lix patroneb. Che'xbanuhak ban lix c'anjal chi chabil ut chi anchalakeb xch'ol re nak taq'uehek' xllok'al li resilat li Dios li kaColonel riq'uin chixjunil li te'xbanu. ¹¹ Li Dios quix'utbesi lix nimal ruxtan re xcolbaleb chixjunileb li cuankeb jun sut rubel choxa. ¹² Lix nimal ruxtan li Dios naxc'ut chiku nak li Dios naraj nak takacanab xbanunquil li mausilal. Chikacanab xbanunquil li inc'a' us li naxrahi ru li kach'ol. Sa' xyalal ban chikanumshak li cutan sa' li ruchich'och' a'in. Tocuank sa' tiquilal riq'uineb li kas kitz'in ut chikabanuhak taxak li naraj li Dios. ¹³ Jo'can taxak yoko nak yoko chirobeninquil li lok'laj cutan nak tol-elk cui'chic li Jesucristo li nakayu'oni. Sa'li cutan a'an tac'utbesik chiku lix lok'al li kanimajcual Dios, li Jesucristo laj Colol ke. ¹⁴ A'an quixk'axtesi rib chi camc sa' kac'aba' lao re nak tocolek' chiru li mausilal. Quixbanu a'an re xticobresinquil li kach'ol ut re nak chikaq'uehak kach'ol chixbanunquil li us. ¹⁵ Chixjunil li na'leb a'in li yoquin xtz'ib'an-quil acui'q'uin, a'an li tach'olob chiruheb. Chaq'ueheb xna'leb ut chak'useb cui inc'a' us yoqueb xban nak tenebanbil sa' aben xban li Dios xbanunquil. Ut ma ani chitz'ektañank acue.

3

Li c'a'ru us te'xbanu laj pabanel

¹ Chajultica ajcui' chiruheb nak che'pabank chiru li acuabej. Ut che'pabank ajcui' chiruheb chixjunileb li cuankeb sa' xcuankil. Ut sebak xch'oleb chixbanunquil li chabil c'anjal. ² Ut chaye ajcui' rebeb nak inc'a' te'xyo'ob atin chirixeb li ras ritz'in ut inc'a' te'cuech'ink. K'unakeb ban xch'ol ut chabilakeb. Ut che'cuank sa' usilal riq'uineb chixjunileb li ras ritz'in. ³ Lao

junxil inc'a' us li kana'leb nak xocuan chak. Xkak'et r̄atín li Dios ut inc'a' xocabin chiruheb li cuanqueb xcuauquil. Xkaq'ue kib chi balak'ic. Xkabalu chak li mausilal li naxrahi ru li kach'ol. Xkanumsi li cutan xbanunquil li mausilal. Xocakalin ut xic' nakil kib chi kibil kib. ⁴ Abanan quicuulac xk'ehil nak li Dios laj Colol ke quixc'utbesi chiku li rusilal ut li ruxtan. ⁵ Li Dios xoxcol ut xorisi sa' li kanajter na'leb. Macua' xban kayehom kabānuhom chi moco xban lix tiquilal li kach'ol. Yal xban lix nimal ruxtan li Dios nak coxcol. Cuybil sachbil chic li kamac ut ac'obresinbil chic li kayu'am xban li Santil Musik'ej. ⁶ Xban nak li Jesucristo quicam re kacolbal, numtajenak li kosobtesinquil xban li Dios nak quixq'ue chak li Santil Musik'ej chi cuanc kiq'uin. ⁷ Jo'ca'in quixbānu re nak taṭicok' li kach'ol xban xnimal rusilal li Dios ut takechani li junelic yu'am li yoco chiroybeninquil. ⁸ Li atin a'in li xinye acue, a'an li tz'akal yal. Lain nacuaj nak taṭch'olob li xyalal a'in chiruheb li ac xe'xpab li Dios re nak te'xq'ue xch'ol chi c'anjelac sa' chabilal. Li xyalal a'in k'axal chabil ut taṭc'anjelak chiruheb chixjunileb. ⁹ Matz'il rix li c'a'ak re ru chi atinul li mac'a' rajbal ut mācuech'i rix lix xe' xtonal li junjunk. Ut mācuech'i rix li chak'rab li quiq'uehe' re laj Moisés. Mac'a' aj e xbanunquil a'an xban nak li cuech'inc mac'a' na-oc cui'. ¹⁰ Ut cui junak cuink aj po'ol ch'olej yo chi tacchi'inc sa' xyankeb laj pabanel, taq'ue xna'leb jun sut malaj cui'b sut ut cui inc'a' na-abin chacuu, inc'a' chic texcuank sa' comonil riq'uin. ¹¹ Nanauman nak li jun a'an ac xpo' xch'ol ut namacob xban nak naraj tixpo' xch'oleb laj pabanel. A'an raylal naxc'am chak sa' xben xjunes rib.

Laj Tito quiyeh'e re c'a'ru tixbānu

¹² Tintakla acuiq'uin laj Artemas malaj ut laj Tíquico. Nak taṭcuulak acuiq'uin, tatxic chi junpat Nicópolis. Aran toxinatau xban nak ninc'oxla nak us tinnumsi li habalk'e aran. ¹³ Chaq'ue ach'ol chixtenk'anquileb nak te'elk aran laj Apolos jo' ajcui' laj Zenas laj na'ol chak'rab. Chatenk'aheb nak te'xic re nak cuank c'a'ru reheb ut mac'a' chipaltok reheb. ¹⁴ Eb li kech aj pabanelil tento nak te'xtzol rib xbanunquil li usilal ut te'xtzol ajcui' xtenk'anquileb li tenk'ac te'raj re nak inc'a' taṭcanak chi mac'a' rajbal lix pabaleb.

Xq'uebal xsahil xch'oleb laj pabanel

¹⁵ Chixjunileb li cuanqueb cuochben neque'xtakla xsahil ach'ol. Ut chaq'ue ajcui' xsahileb xch'ol li kech aj pabanelil. Nakara kib chi kibil kib xban nak junaj li kapabal. A' taxak li rusilal li Dios chicuank eriq'uin chejunilex. Jo'can taxak.

Li Hu li Quixtz'iba li San Pablo re laj Filemón

Xq'uebal xsahileb xch'ol

¹ Lain laj Pablo. Cuanquin chi prexil sa' xc'aba' li Jesucristo. Cuochben li kaherman Timoteo yoquin chixtz'ib'anquil li hu a'in, at Filemón. Laat kech aj c'anjelil chiru li Cristo ut raroat kaban. ² Li hu a'in re ajcui' lix Apia, li kech aj pabanelil ut reheb ajcui' laj pabanel li neque'xch'utub rib sa' la cuochoch chixlok'oninquil li Dios, ut re ajcui' laj Arquipo li kech aj pabanelil. A'an li qui-ochbenin chak ke sa' li c'anjel chixyebal resil li colba-ib. ³ Chicuank taxak eriq'uin li usilal ut li tuktuyquilal li naxq'ue chak ke li Dios li kaYucua' ut li naxq'ue li Kacua' Jesucristo.

Tz'akal re ru lix pabal laj Filemón

⁴ Junelic ninbantioxi chiru lin Dios nak nintijoc chacuix. ⁵ Ninbantioxi chiru li Dios nak nacuabi resil nak nacapab' chi tz'akal li Jesucristo ut ninbantioxi chiru nak nacaraheb chixjunileb laj pabanel. ⁶ Ut nintz'ama ajcui' chiru li Dios nak tatxtenk'a re nak tac'utunk chanru la pabal. Ut nak te'r'il li rusilal li Jesucristo cuan acuiq'uin, te'q'uiq' sa' xpabaleb. ⁷ At inherman, c'ajo' nak nasaho' ut nac'oja inch'ol nak xcuabi resil chanru nak nacaraheb laj pabanel ut nacaq'ue xcacuilal xch'oleb.

Laj Pablo quixtz'ama chiru laj Filemón nak tixcuy xmactaj Onésimo

⁸ Anakcuan nacuaj xtz'amankuil jun usilal chacuu. Lain la herman sa' xc'aba' li Cristo ut cuan incuanquil chixyebal acue c'a'ru tabanu. ⁹ Abanan inc'a' tinmin acuu chixbanunquil. Tintz'ama ban li usilal chacuu xban nak nakara kib. Lain ac xintix ut cuanquin chi prexil sa' xc'aba' li Cristo. ¹⁰ Li usilal nintz'ama chacuu, a'an chirix laj Onésimo. Chanchan li cualal chicuu nak cuan xban nak chicuu quixpab' li Jesucristo nak cuanquin chi prexil. ¹¹ Junxil laj Onésimo inc'a' quic'anjelac chi us chacuu. Abanan anakcuan chabil aj c'anjel chic chacuu laat ut chicuu ajcui' lain. ¹² Tintakla cui'chic acuiq'uin ut nak tac'ul a'an, chanchan ajcui' nak tinaq'ul lain. ¹³ Lain xcuaj raj nak xcana ta cuiq'uin. Naru raj tac'anjelak chicuu chok' acuuchil laat nak cuanquin chi prexil xban xyebal resil li colba-ib. ¹⁴ Abanan inc'a' nacuaj xminbal acuu chixbanunquil li usilal a'in. Nacuaj ban nak tabanu a'an chi anchal ach'ol. Jo'can nak mac'a' xinbanu chi inc'a' ta tanau laat. ¹⁵ Cuan xyalal nak qui-el jarubak cutan acuiq'uin. Mare lix yalal a'an nak quijala lix yu'am ut anakcuan tacuank acuiq'uin chi junelic. ¹⁶ Anakcuan macua' chic jo' lok'bil mos nak tacuank acuiq'uin. Anakcuan k'axal lok' chic chiru junak mqs xban nak anakcuan ahherman chic sa' xc'aba' li Jesucristo. Raro inban lain, ut laat k'axal cui'chic nak tara xban nak amos ut ahherman ajcui' sa' xc'aba' li Kacua'. ¹⁷ Laat nacanau nak lain acuech aj c'anjelil. Jo'can nak chac'ulak laj Onésimo jo' nak niquinac'ul lain. ¹⁸ Ut cui cuan junak xmactaj chacuu, chaq'uehak sa' inben lain. Ut cui cuan xc'as acuiq'uin, lain tintoj lix c'as chacuu. ¹⁹ Lain laj Pablo. Ut riq'uin cuuk' yoquin chixtz'ib'anquil li atin a'in. Lain tintojok re chacuu. Ut lain naru raj tinye acue nak k'axal cui'chic cuan la'c'as chicuu. Laat cuan la'yu'am chi junelic xban nak lain xinch'olob xyalal chacuu. ²⁰ Jo'can ut herman, banu li usilal a'in sa' xc'aba' li Kacua'. Ut li usilal nintz'ama chacuu, a'an nak tac'ul laj Onésimo sa' xyalal. Chac'ojob taxak inch'ol xban nak lao aj pabanel ut kacomon kib sa' xc'aba' li Jesucristo. ²¹ Nintz'ibac acuiq'uin xban nak ninnau chi yal nak tabanu li usilal cue.

Ut ninnau ajcui' nak li t̄ab̄anu, a'an k'axal cui'chic nabal chiru li nintz'ama chacuu. ²² Ut nintz'ama ajcui' chacuu nak t̄acauresi li cuochochnal. Yoquin chixyo'oninquil nak tinxic cui'chic eriq'uin jo' yoquex chixtz'amanquil chiru li Diós.

Eb laj pabanel neque'xtakla xsahil xch'ol laj Filemón

²³ Laj Epafras cuochben chi prexil sa' xc'aba' li Jesucristo. A'an naxtakla ajcui' xsahil ach'ol. ²⁴ Ut neque'xtakla ajcui' xsahil ach'ol laj Marcos, laj Aristarco, laj Demas ut laj Lucas. Cuochbeneb a'an nak yoco chi c'anjelac chiru li Jesucristo. ²⁵ A'taxak li rusilal li Kacula' Jesucristo chicuank eriq'uin. Jo'can taxak.

Li Hu reheb laj Hebreo

Li C'ajolbej naxcutanobresi chiku li xlok'al li Acuabej Dios

¹ Najter k'e cutan li Kacua' Dios q'uila sut quixtaklaheb chak li profeta chixyebal li rätin riq'uineb li kaxe'tonil yucua'. Quixsiq'ui xyälal chanru nak tixch'olob xyälal chiruheb. ² Aban anakuan macua'eb chic li profeta neque'yehoc re li rätin li Dios. A' chic li Dios C'ajolbej. Sa' xc'aba' a'an, li Dios quixyib li ruchich'och' ut chixjunil li c'a'ak re ru cuan. Chixjunil li quixyib quicana sa' ruk' li Dios C'ajolbej. ³ Li Ralal li Dios, a'an nacutanobresin relix lok'al li Acuabej Dios. Ut a'an acui' nac'utuc chiku chanru lix na'leb. Li Ralal li Dios, a'an nacutun re li ruchich'och' riq'uin lix cuanquilar li rätin xban nak a'an yal re sa' xben li ruchich'och'. Ut nak ac xmayeja rib re risinquil li kamäc, li Ralal li Dios co' sa' choxa ut quic'oja sa' xnim uk' li Dios Acuabej, li k'axal nim xcuanguard.

Li Dios C'ajolbej k'axal nim xcuanguard chiruheb li ángel

⁴ Li cuanguard quiq'uehe' re k'axal nim cui'chic chiru xcuanguard leb li ángel xban nak a'an li Ralal li Dios. Lix c'aba' quiq'uehe' xban li Acuabej Dios, a'an k'axal lok' cui'chic chiru lix c'aba'eb li ángel. ⁵ Nakanau nak k'axal lok' xban nak li Dios ma jun cua quixye re junak ángel:

Läat li cualal; anakuan xinq'ue äcuanguard. (Sal. 2:7)

Chi moco quixye ta chirix junak ángel:

Läinak lix yucua' ut a'anak li cualal. (2 Sam. 7:14)

⁶ Nak quixtakla chak li junaj chi Ralal sa' ruchich'och', li Dios quixye: Chilok'onik ru xbaneb chixjunileb li ángel.

⁷ Quixye cui'chic li Dios chirixeb li ángel:

Xinyibeb lin ángel chanchaneb li ik' ut chanchaneb ajcui' li rak' xam nak neque'c'anjelac chicuu. (Sal. 104:4)

⁸ Aban li Dios quixye re li C'ajolbej:

Läa nimajcual cuanguard, at Dios, xakxok chi junelic k'e cutan. Junelic sa' tiq'uilal nacattaklan.

⁹ Li tiq'uilal nacuulac chacuu ut li mausilal xic' nacacuul. Jo'can nak sic'bil äcuu inban läin li nimajcual Dios. Läin läa Dios. K'axal numtajenak li sahil ch'olej xinq'ue acue läat chiru li xinq'ue reheb chixjunileb läa cuech aj c'anjelil. (Sal. 45:6-7)

¹⁰ Li Dios quixye cui'chic re li C'ajolbej:

Läat, at Kacua', sa' xtclajic cayib li ruchich'och' ut riq'uin ajcui' äcuuk' cayib li choxa.

¹¹ Eb a'an te'osok' aban läat cuankat chi junelic. Chixjunil a'an te'k'elok' jo' li t'icr.

¹² Junak t'icr na-oso' ut najalman. Jo'can ajcui' nak taosok' li ruchich'och' ut li choxa.

Aban läat inc'a' nacatjale'. Cuankat ban chi junelic k'e cutan. (Sal. 102:25-27)

¹³ Li Dios ma jun cua quixye re junak ángel jo' quixye re li Ralal:

Tatc'ojlak sa' innim uk' toj retal tinq'ueheb rubel läa cuok li xic' neque'iloc äcuae. (Sal. 110:1)

¹⁴ Inc'a' quixye a'an reheb li ángel xban nak li ángel yal musik'ejeb chi c'anjelac chiru li Dios. Li Dios nataklan chak reheb chixtenk'anquileb li te'echanink re li colba-ib.

2

Li colba-ib k'axal lok'

¹ Xban nak li Cristo k'axal lok' chiruheb li ángel, jo'can nak takaq'ue kach'ol chixpabankil li c'a'ru xkabi, re nak inc'a' tasachk sa' kach'ol lix yáal. ² Li esilal yebil xbaneb li ángel tz'akal yáal ut eb li inc'a' que'pában ut eb li que'xk'et li chak'rab, que'xc'ul xtojbal xmaqueb jo' xc'ulubeb. ³ Cui eb a'an que'xc'ul xtojbal xmáac, ¿chan put ru nak tocolek' lao chiru li tojba mac cui nakatz'ektana li lok'laj colba-ib li quixyechi'i ke li Kácu'a' Jesucristo? Li Jesucristo quixyechi'i ke li kacolbal k'axal lok'. Ut chirix a'an, eb li que'abin re li ratin, a'an eb ajcui' que'ch'oloban lix yáal chiku. ⁴ Li Dios quixc'ut chiku nak tz'akal yáal a'an riq'uineb li retalil ut li milagro li quilajxbanu riq'uin lix nimal xcuanguila. Ut naxc'ut ajcui' chiku nak yáal xban nak naxq'ue li Santil Musik'ej reheb li junjunk. Jo'can nak ac xmáatan xmáatan li junjunk jo' naraj li Dios.

Li Kácu'a' Jesucristo quitz'ejcualo' re kacolbal

⁵ Yoco chi atinac chirix li ac' ruchich'och' li táchalk. Li Dios inc'a' quixq'ue xcuanguileb li ángel re nak te'taklank sa' xben a'an. ⁶ Jo'ca'in tz'ibánbil sa' li Santil Hu:

At inDios, li cuink mac'a' xcuanguila. ¿C'a'ut nak nacaq'oxlaheb? Li cuink mac'a'eb xcuanguila. ¿C'a'ut nak nacaq'ue ach'ol chirixeb?

⁷ Xacubsi ca'ch'in xcuanguila chiruheb li ángel. Abanan xaq'ue xnimal xlok'al. Ut xaxakab xcuanguila sa' xbeneb lá c'anjal xabánu riq'uin acuu'k.

⁸ Laat xaq'ue chixjunil li c'a'ak re ru rubel xcuanguila cuink. (Sal. 8:4-6)

Ut nak li Dios quixq'ue chixjunil li c'a'ak re ru rubel xcuanguila cuink, mac'a' cuan inc'a' ta napában chiru. A'ut anakcuan toj mají' nakil nak chixjunil li c'a'ak re ru cuan neque'pában chiru. ⁹ Abanan nakaq'ue retal chanru nak li Jesucristo quinimac ru ut quiq'uehe' xlok'al. Usta quicubsic xcuanguila jarubak cutan chiruheb li ángel, nak quitz'ejcualo', quiq'uehe' xlok'al xban li raylal quixc'ul nak quicam sa' kac'aba' lao. Xban lix nimal rusilal li Dios, li Jesucristo quicam re xcolbal chixjunileb li cuanguila sa' ruchich'och'. ¹⁰ Riq'uin xc'ulbal li raylal, li Jesucristo quitz'akobresic ru chiru li Dios. Li Kácu'a' Dios quiyibán re chixjunil li c'a'ak re ru. Xban a'an nak a' li Dios yáal re sa' xben. Jo'can nak quixtakla chak li Jesucristo chi xc'ulbal li raylal ut quicam re xtojbal rix li kamac. Ut a'an ajcui' laj c'amol be chiruheb li ralal xc'ajol li te'tz'akonk sa' lix lok'al. ¹¹ Lao nocasantobresic xban li Kácu'a' Jesucristo. Lao ut li Jesucristo junaj ajcui' li kachoxahil Yucua'. Xban a'an li Jesucristo inc'a' naxutanaç chixyebal nak lao lix herman. ¹² Quixye chi jo'ca'in:

At inYucua', tinch'olob acuesilal chiruheb lin herman. Sa' xyankeb li ch'utch'uequeb tinbicha lá lok'al. (Sal. 22:22) ¹³ Ut quixye cui'chic:

Cauhak inch'ol riq'uin li Dios.

Ut quixye ajcui':

Cue'quin arin lain, cuochbeneb li ralal xc'ajol li Dios li xk'axtesi sa' cuuk'. (Is. 8:17-18)

¹⁴ Yáal nak lao ut li Jesucristo junaj li kachoxahil Yucua'. Li Jesucristo quitz'ejcualo' jo' lao. Quicuan xquiq'uel. Quicuan xbakel ut xtibel. Li Jesucristo quicam. Riq'uin lix camic, li Kácu'a' Jesucristo quixsach xcuanguila laj tza, xban nak sa' xc'aba' laj tza nak cuan li camc. ¹⁵ Chalen chak sa' kayo'lajic, nakaxucua ru li camc. Aban riq'uin lix camic li Kácu'a' Jesucristo quirisi li kaxiu chiru li camc. ¹⁶ Relic chi yáal li Kácu'a' Jesucristo inc'a' quichal chixtenk'anquileb li ángel. Quichal ban chixtenk'anquileb li ralal xc'ajol

laj Abraham. (Ut lao ajcui' ralal xc'ajol laj Abraham, xban nak nakapab li Cristo.) ¹⁷ Xban nak li Jesucristo quic'ulun chixten' anquileb li cuanqueb sa' ruchich'och' tento nak quitz'ejcualo' jo' eb lix herman. Chi yal nak quitz'ejcualo' re nak taruxtana ku ut tixtoj rix li kamac. Li Jesucristo a'an lix yucua'il aj tij chi c'angelac chiru li Dios. ¹⁸ Li Kacua' Jesucristo quixc'ul li raylal ut quiyale' ralenquil. Aban, inc'a' quixq'ue rib chi alec. Jo'can nak nim xcuauquil chixten' anquileb li neque'yale' ralenquil.

3

K'axal nim xcuauquil li Kacua' Jesucristo chiru xcuauquil laj Moisés

¹ Ex herman, laex sic'bil eru xban li Dios chok' ralal xc'ajol. Cheg'uehak ech'ol chixc'oxlanquil li Jesucristo. A'an li quitaklac chak xban li Dios chi c'angelac jo' xyucua'il aj tij sa' li kapabal. ² Li Jesucristo quipaban chi tz'akal chiru li Dios li quizakaban chak re chi c'angelac jo' xyucua'il aj tij. Ut laj Moisés quipaban ajcui' chiru li Dios nak quic'angelac chi c'amoc be chiruheb laj Israel. ³ Abanan li Jesucristo numtajenak cui'chic xlok'al chiru xlok'al laj Moisés. Li Jesucristo, a'an chanchan jun aj cabanel. Li ani nayiban junak cab, a'an k'axal nim xcuauquil sa' xben usta k'axal chabil li cab li naxyib. ⁴ Li junjunk chi ochoch cuan ani nayiban re; a'ut li quiyiban re chixjunil li c'a'ak re ru cuan, a'an li Kacua' Dios. ⁵ Relic chi yal nak laj Moisés quipaban chiru li Dios ut quic'amoc be chiruheb laj Israel. Quixch'olob xyalal li c'a'ru tac'ulmank mokon. Laj Moisés yal aj c'angel chiru li Dios. ⁶ Aban li Kacua' Jesucristo, a'an tz'akal Ralal li Dios ut cuan xcuauquil chi taklanc sa' xbeneb li ralal xc'ajol li Dios. Lao li ralal xc'ajol li Dios cui ca'aj cui' riq'uin li Dios nocoyo'onin ut cauhak kach'ol sa' li kapabal toj sa' roso'jic li cutan.

Naru to-oc chi hilanc riq'uin li Dios

⁷ Li Kacua' Jesucristo k'axal nim xcuauquil. Jo'can nak takabi li ratin li naxye li Santil Musik'ej:

Cherabihak anakcuan li cuatin.

⁸ Mebanu jo' que'xbanu le xe'tonil yucua' nak que'xk'et chak li cuatin. Que'cuech'oc ut neque'ayaynac ut que'xyal inch'i ch'i inquil nak cuanqueb chak sa' li chaki ch'och'.

⁹ Aran que'xq'ue injosk'il le xe'tonil yucua'. Chiru ca'c'al chihab que'rili usilal li quilajinbanu reheb. Abanan junelic yoqueb chixq'uebal injosk'il.

¹⁰ Xban a'an nak quinpo' inch'ol sa' xbeneb li tenamit a'in. Ut quinye: Junelic neque'xcuiba xch'oleb ut inc'a' neque'raj xbanunquil fix yalal. Inc'a' neque'xbanu li c'a'ru nacuaj.

¹¹ Nak quichal injosk'il ut quinye, relic chi yal nak ma jok'e te'oc chi hilanc sa' li chabil na'ajej c'ubanbil inban, chan li Dios. (Sal. 95:7-11)

¹² Ex herman, cheg'uehak retal nak ma jun taxak sa' eyank inc'a' tixpab li Dios xmac lix mausilal. Mare anchal tixtz'ektana li yo'yoquil Dios.

¹³ Cheg'uehak ban ena'leb cheribil erib rajlal cutan nak toj naru xbanunquil. Chetenk'a erib cheribil erib re nak ma jun tabalak'ik xban li mac, xban nak li nabalak'ic xban li mac inc'a' chic naraj xbanunquil li c'a'ru naraj li Dios.

¹⁴ Totz'akonk riq'uin xlok'al li Jesucristo cui nakaq'ue kach'ol chixpabanquil. Chanru nak xkatiquib chak xpabankuil li Kacua', jo'can taxak toj chalen sa' roso'jic li cutan. ¹⁵ Jo'ca'in tz'ibanol sa' li Santil Hu li quixye li Dios:

Cherabihak li cuatin anakcuan. Mecacuubresi ech'ol jo' que'xbanu chak le xe'tonil yucua' nak que'xk'et chak li cuatin. (Sal. 95:7-8)

¹⁶ ¿Aniheb li que'k'etoc chak re li r̄atín li Dios li quixye reheb? A'aneb chixjunileb li que'el chak Egipto nak laj Moisés quic'amoc be chiruheb. ¹⁷ ¿Ani sa' aj b̄en quijsok'o' li Dios chiru li ca'c'äl chihab? Sa' xbeneb li que'macob ut que'cam sa' li chaki ch'och'. ¹⁸ Ut, ¿aniheb aj e quixye li Dios nak relic chi yal inc'a' te'oc chi hilanc riq'uin sa' li chabil na'ajej? Reheb li que'k'etoc re líx chak'rab. ¹⁹ Ut relic chi yal xbaneb líx k'etba ątin, inc'a' que'oc chi hilanc sa' li chabil na'ajej.

4

¹ Li Dios toj yo ajcui' chixyechi'inquil li oc chi hilanc sa' li chabil na'ajej. Abanan chikabənu cuent re nak m̄a jun taxak sa' kayənk inc'a' təoc sa' li hilobal a'an. ² Lao xkabi resil li colba-ib jo' nak que'rabi resil najter. Abanan mac'a' qui-oc cui' reheb nak que'rabi xban nak inc'a' que'paban. ³ Xban nak lao xkapab li Dios, to-oc chi hilanc riq'uin sa' li chabil na'ajej. Li Dios quiqtinac chirixeb li kaxe'tonil yucua' nak quixye: Nak quichal injosk'il, quinye nak relic chi yal ma jok'e te'oc chi hilanc cuiq'uin. Quixye a'an us ta ac ch'olch'o nak cuan li na'ajej re hilanc chalen nak li Dios quixrak líx c'anjel nak quixyib li ruchich'och'. ⁴ Tz'ibānbil sa' li Santil Hu chirix li xcuuk li cutan li naxye chi jo'ca'in: Ut li Dios quixrak líx c'anjel ut quihilan sa' xcuuk li cutan. (Gn. 2:2) ⁵ Ut tz'ibānbil ajcui' sa' li Santil Hu chirixeb li inc'a' que'paban: Inc'a' te'oc chi hilanc cuiq'uin. (Sal. 95:11) ⁶ Que'rabi li ratin lí Dios najter ut cuan li inc'a' que'oc chi hilanc riq'uin xban nak inc'a' que'paban. Aban li ani napabán anakcuan toj naru təoc chi hilanc riq'uin. ⁷ Najter cuanqueb laj Israel inc'a' que'paban. Ut nak ac xnume' q'uila chihab, li Dios quixyechi'i cui'chic li hilobal nak quiatinac riq'uin laj David. Ut laj David quixtz'iba li quiyeh'e re li naxye chi jo'ca'in: Anakcuan cherabi taxak li cuqtin ut mecacuubresi le ch'ol, chan. ⁸ Eb li que'paban sa' xyānkeb laj Israel que'oc chi hilanc sa' li na'ajej Canaán nak laj Josué quic'amoc be chiruheb. Abanan macua' a'an li tz'akal na'ajej re hilanc chi junelic. Cui ta a'an li tz'akal hilobal, inc'a' raj chic quixye li Dios nak toj naru to-oc chi hilanc riq'uin. ⁹ Jo'can nak toj cuan li lok'laj na'ajej re hilanc reheb li neque'paban re li Dios. ¹⁰ Li ani ac x-oc chi hilanc riq'uin li Dios, a'an ac xhilan chi tz'akal, jo' nak li Dios quihilan nak quixrak líx c'anjel. ¹¹ Chikaq'uehak kach'ol chixpābanquil li Dios re nak to-oc chi hilanc riq'uin. Ma'ani taxak ke inc'a' təoc xban xk'etba ątin jo' que'xbənu chak junxil nak inc'a' que'paban. ¹² Li ratin li Dios yo'yo ut k'axal nim xcuانquil. Chanchan jun ch'ich' ca' pac'al xk'esnal. Riq'uin líx nimal xcuانquil, li ratin li Dios nacuūlāc toj sa' xchamal li kām. Ut naxc'utbesi chiku chanru li kana'leb ut chanru li kac'a'ux. ¹³ Ma'ani naru tixmuk rib chiru li Dios xban nak a'an quiyibán re chixjunil li c'a'ak re ru cuan. Cutan saken chiru li Dios li kayehom kabənuhom. Mac'a' mukmu chiru li Dios li toxkach'olob cui' kayehom kabənuhom.

Li Kacua' Jesucristo, a'an tz'akal xyucua'il aj tij

¹⁴ Li Kacua' Jesucristo, li Ralal li Dios, a'an líx yucua'il aj tij chok' ke. Quitake' sa' choxa ut cuan chak riq'uin li Dios Acuabej. Yo chak chi oquenc chikix chiru li Dios. Jo'can nak cauhak taxak kach'ol sa' li kapabal. ¹⁵ Li Jesucristo a'an xyucua'il aj tij chok' ke ləo. Naxtok'oba ku xban nak naxnau nak moco k'axal cau ta li kach'ol. Nak quicuan arin sa' ruchich'och', li Jesucristo quiyale' ralenquil jo' nak nayale' k'alenquil ləo. Aban li Jesucristo inc'a' quimacob. ¹⁶ Chotijok chi anchal kach'ol chiru li nimajcual Dios. A'an taril xtök'obal ku ut riq'uin xnimál rusilal toxtenk'a nak cuąnko sa' junak raylal.

5

¹ Sa' xyankeb laj judío cuanqueb xyucua'il aj tij. Li junjunk sic'bil ru sa' xyankeb li cuink chi c'anjelac chiru lí Dios. Naxtenk'aheb li tenamit riq'unin xq'uebal li mayej qui' ut li c'a'ak chic re ru chi mayejil re xtojbal rix líx maqueb. ² Li xyucua'il aj tij, a'an yal cuinkeb jo' lao. Jo'can nak naxtok'oba ruheb ut naxtenk'aheb sa' usilal li neque'macob xban nak inc'a' neque'xnau xyalal li yoqueb chixbánunquil. ³ Xban nak yal cuink li xyucua'il aj tij, jo'can nak rajlal namayejac re xtojbal rix líx mac a'an. Ut namayejac ajcui' re xtojbal rix líx maqueb chixjunileb li tenamit. ⁴ Lix c'anjel li xyucua'il aj tij k'axal lok', aban ma jun naxyo'ob xc'anjel yal xjunes rib. Eb a'an sic'bil ruheb xban li Dios. Li Dios naxxakabeb chi c'anjelac jo' nak quixakabac laj Aarón najter. ⁵ Jo'can ajcui' li Jesucristo. Moco yal xjunes ta quixxakab rib chi c'anjelac chok' xyucua'il aj tij. Aban li Dios quiq'uehoc re líx lok'al ut quixq'ue chi c'anjelac nak quixye re: At cuatal, anakcuan xinq'ue acuanquil. (Sal. 2:7) ⁶ Quiyehe' cui'chic re xban li Dios jo' naxye sa' li Santil Hu: Latat aj tij chi junelic jo' nak quicuan laj Melquisedec. (Sal. 110:4) ⁷ Nak li Jesucristo quicuan arin sa' ruchich'och' quiyabac nak quitijoc. Chi cau xyab xcux quitz'aman chiru li Dios, li cuan xcuanguil chi coloc re chiru li cámec. Ut li Dios quirabi líx tij xban nak quixk'axtesi rib re xbanquiquil líx c'anjel li Dios. ⁸ Usta Ralal li Dios li Jesucristo, quixc'ul ajcui' li raylal ut quixc'ut chiku chanru li pabanc riq'unin li raylal quixc'ul. ⁹ Riq'unin li raylal li quixc'ul li Jesucristo quitz'akobresic ru chi c'anjelac chok' xyucua'il aj tij. Ut sa' xc'aba' a'an cuan li colba-ib chi junelic reheb li te'pabank re. ¹⁰ Li Dios quixxakab li Jesucristo chok' xyucua'il aj tij jo' nak quicuan laj Melquisedec.

K'axal xiú xiú chok' ke cui tacuibank li kach'ol

¹¹ Toj cuan raj chic nabal naraj ch'olobac xyalal cheru chirix a'in. Abanan ch'a'aj xch'olobanquil xyalal xban nak inc'a' chic nequeraj rabin-quil. ¹² Anakcuan laex raj chic aj tzolonek xban nak ac junxil nequexpában. Abanan taraj toj tac'utek' cui'chic cheru li ac xetzol chak junxil nak xepab chak li Dios. Chanchanex chic li c'ula'al li toj natu'uc li toj maji' natzaçan. ¹³ Laex nequenau nak junak c'ula'al toj natu'uc toj mac'a' xna'leb. Inc'a' naxnau bar cuan li us ut bar cuan li inc'a' us. ¹⁴ Eb li chequel cristian jalan xtzacaemkeb. Moco sic'bil ta ru li neque'xtzaca. A'an retalil nak ac xe'qui' sa' xpabaleb ut neque'xnau chic bar cuan li us ut bar cuan li inc'a' us.

6

¹ Jo'can nak inc'a' yokex chi c'oxlac junes chirix li xetzol chak sa' xticlajic le pabal. Toj cuan ban nabal tetzol chirix li Cristo re nak texq'uik sa' le pabal. Ac nequenau nak macua'riq'un kayehom kabauhom natauman li colba-ib. Riq'unin ban xpabankuil li Dios. ² Ac nequenau xyalal li cubi ha'. Nequenau xyalal li xq'uebal li kuk' sa' xbeneb laj pabanel. Ac nequenau nak te'cuaclik cui'chic chi yo'yo' li camenak. Ut nequenau ajcui' nak tacuulak xk'ehil nak tarakek' atin chi junaj cua sa' xbeneb li maji' neque'paban. ³ Anakcuan chikaq'ue kach'ol chixtzolbal kib re nak toq'uik sa' li kapabal. Jo'can takabánu cui li Dios naxq'ue ke. ⁴ Cuanqueb li ac xe'xtau xyalal. Xe'xc'ul li rusilal li Dios. Xe'xc'ul li Santil Musik'ej. ⁵ Neque'xnau nak yal li ratin li Dios. Ac xe'tz'akon ca'ch'in riq'unin líx cuanquil li ac' ruchich'och' li tachalk. ⁶ Cuan li ac xe'tz'akon riq'unin li rusilal li Dios ut neque'xtz'ektana chirix xch'ol. Chanchan nak yoqueb cui'chic chixq'uebal chiru cruz li Jesucristo, li Ralal li Dios. Yoqueb chixq'uebal chi hobec' ut chi se'ec xbaneb li tenamit. Eb a'an inc'a' chic naru te'yot'ek' xch'ol ut inc'a' chic te'xjal xc'a'ux

xban nak yoqueb chixtz'ektanquil li Jesucristo. ⁷ Li ani naxbanu li naxye li ratin li Dios, a'an chanchan li ch'och' naruc' li ha'. Chabil li acujmk na-el chiru ut nac'anjelac re laj acuinel. Li ch'och' a'an osobtesinbil xban li Dios. Li ani naxbanu li naraj li Dios osobtesinbil xban li Dios. ⁸ Aban li ani inc'a' naxbanu re li naxye li r̄atín li Dios, a'an chanchan li ch'och' junes q'uxí ut yibru pim na-el chiru; mac'a' na-oc cui' li ch'och' a'an. Li ani inc'a' naxbanu li naraj li Dios, tz'ektanbileb xban li Dios ut c'atbil nak te'osok'.

Li Cristo nocoxtenk'a re nak inc'a' tach'inank li kach'ol

⁹ Ex inherman, usta xkaye chi jo'can, ninnau nak laex moco jo'canex ta chic anakcuan. Chabil chic le na'leb xban nak colbilex. ¹⁰ Li Dios t̄ic xch'ol. Naxnau chanru le c'anjel. Li Dios naxnau nak nequera a'an. Nac'utun ajcui' nak nequera li Dios xban nak xetenk'a le rech aj pábanel junxil ut toj yoquex ajcui' chixtenk'anquileb anakcuan. Inc'a' nasach sa' xch'ol li Dios le c'anjel li nequebanu. ¹¹ Takaj nak chejunjunkalex teq'ue ech'ol chixbanunquil li usilal chalen toj sa' roso'jic le yu'am. Chi jo'can tec'ul chi tz'akal le k'ajcamunquil li yechi'nbil ere xban li Dios. ¹² Inc'a' nakaj nak tecuiba ech'ol. Chebanu ban jo' neque'xbanu li neque'pában chi anchal xch'ol. Inc'a' neque'titz'. Neque'xcuy ut neque'rechani li yechi'nbil xban li Dios. ¹³ Mac'a' junak mas nim xcuangquil chiru li Dios. Jo'can nak li Dios quixpatz' xc'aba' chi ribil rib nak quixyechi'i li rosobtesinquel laj Abraham. ¹⁴ Quixye re: Relic chi yal tatucoosobtesi ut tinq'ue chi q'uianc la cualal ac'ajol. (Gn. 22:16-17) ¹⁵ Jo'can nak laj Abraham najt quixcuy roybeninquil ut inc'a' quititz' toj retal quixc'ul lix matan quiyechi'ic re xban li Dios. ¹⁶ Nak na-uxman li juramento napatz'man xc'aba' junak lí k'axal nim xcuangquil re nak nach'ola ru li yal ut narake' ajcui' li cuech'inc ib. ¹⁷ Jo'can nak li Dios quixyechi'i li matan riq'uin juramento. Quiraj xc'utbal chiruheb li te'echanink re nak tz'akal yal li yo chixyebal. Ut inc'a' tixjal ru li ratin. ¹⁸ Jo'can utan nak li cuib chi na'leb a'in inc'a' naru xjalbal ru. A'aneb a'in: xben, nak li Dios quixyechi'i li matan; ut xcab, nak quixbanu li juramento. Riq'uin a'an nakanau nak li Dios inc'a' natic'ti'ic. Jo'can nak cauhak taxak li kach'ol. Lao xkasic' li kacolbal riq'uin li Dios ut nakanau nak takechani li quixyechi'ke. A'an li nakayo'oni. ¹⁹ Nakayo'oni nak takac'ul li junelic yu'am. A'an naxq'ue xcacuil li kach'ol jo' nak li ancla naxchap li jucub chiru li ha'. Cau rib ut inc'a' na-ec'an sa' xna'a'j. Xban nak nakapab li Jesucristo, cuanco chi sum atin riq'uin li Dios. ²⁰ Li Jesucristo ac xco sa' li santil choxa chi jaloc atin chikix. A'an laj c'amol be chiku. Li Jesucristo, a'an tz'akal xyucua'il aj tij chi junelic jo' nak quicuan laj Melquisedec.

7

Laj Melquisedec

¹ Laj Melquisedec a'an li rey re li tenamit Salem. A'an ajcui' laj tij chiru li nimajcual Dios. Laj Melquisedec qui-el chak chixc'ulbal laj Abraham ut quirosobtesi nak quisuk'i chak chixsachbal ruheb li rey. ² Ut li jo' q'uijal quirechani chak laj Abraham sa' li plet riq'uinreb li rey, quixq'ue li junjunk sa' xlajetkil re laj Melquisedec. Li c'aba'ej Melquisedec naraj naxye "rey re li t̄iquilal". Ut li c'aba'ej Salem naraj naxye "tuktuquil usilal". Jo'can nak laj Melquisedec, a'an rey re li t̄iquilal ut rey re li tuktuquil usilal. ³ Inc'a' nanauman ani lix yucua' laj Melquisedec chi moco lix na' chi moco lix xe'tonil yucua'. Inc'a' nanauman chirix lix yo'lajic chi moco lix camic. Laj Melquisedec, a'an retalil li Jesucristo ut a'an laj tij chi junelic. ⁴ Q'uehomak retal nak laj Melquisedec, k'axal nim xcuangquil chiru laj Abraham. Laj

Abraham, a'an xyucua'eb laj Israel, abanan quixq'ue re laj Melquisedec li junjunk sa' xlajetkil li quirechaní chak sa' li plé. ⁵ Tz'ibánbil sa' li chak'rab li quiq'uehe' re laj Moisés nak eb li cristian te'xq'ue reheb laj tij li junjunk sa' xlajetkil li c'a'ru cuan reheb. Eb laj tij, a'an eb li ralal xc'ajol laj Leví. Que'xbanu chi jo'can usta laj Abraham, a'an lix xe'tonil yucua' chixjunileb, laj tij jo'queb ajcui' li cristian. ⁶ Laj Melquisedec macua' xcomuneb li ralal xc'ajol laj Leví aban laj Abraham quixq'ue li junjunk sa' xlajetkil re laj Melquisedec. Nim xcuauquil laj Abraham xban nak ac yechi'nbil re li rosobtesingquil xban li Dios. Aban laj Melquisedec k'axal nim cui'chic lix cuauquil. Jo'can nak quirosobtesi laj Abraham. ⁷ Nakanau chi tz'akal nak li na-osobtesin, a'an li nim xcuauquil chiru li na-osobtesic. Jo'can nak nakanau nak nim xlok'al laj Melquisedec chiru xlok'al laj Abraham. ⁸ Eb laj tij aj Israel que'xc'ul ajcui' li junjunk sa' xlajetkil. A'neb yal cuinkeb ut que'cam. Abanan laj Melquisedec moco quicam ta. Jo'can tz'ibánbil sa' li Santil Hu. ⁹ Eb li ralal xc'ajol laj Leví, a'an eb laj tij. Eb a'an li que'c'uluc re li junjunk sa' xlajetkil li que'xq'ue laj Israel. Laj Abraham a'an lix xe'tonil yucua' laj Leví. Jo'can nak naru xyebal nak eb li ralal xc'ajol laj Leví que'xq'ue li junjunk sa' xlajetkil re laj Melquisedec xban nak laj Abraham quixq'ue li junjunk sa' xlajetkil sa' xc'aba'eb a'an. ¹⁰ Naru xyebal chi jo'can usta toj maji' neque'yo'la li ralal xc'ajol laj Leví xban nak laj Abraham, a'an lix xe'tonil yucua'eb. Riq'uin a'an nakanau nak laj Melquisedec nim xcuauquil chiruheb li ralal xc'ajol laj Leví. ¹¹ Li ralal xc'ajol laj Leví ut laj Aarón, a'neb li neque'ch'oloban chiruheb laj Israel lix yatal lix chak'rab li Dios li quixye laj Moisés. Abanan chi moco li chak'rab chi moco eb laj tij li taruk tacolok ke. Cui ta eb laj tij ut li chak'rab, inc'a' raj chic quitaklac chak junak aj tij k'axal nim xcuauquil jo' nak quicuan laj Melquisedec. Laj tij li quitaklac chak macua' xcomoneb laj Aarón. ¹² Laj tij li quitaklac chak jalan chic lix c'anjel. Jo'can nak quijala ajcui' ru li chak'rab. ¹³ Li atin a'in tz'ibánbil chirix li Jesucristo. A'an macua' ralal xc'ajol laj Leví. A'an ralal xc'ajol laj Judá. Ma jun ralal xc'ajol laj Judá xakabanbil chok' aj tij chi mayejac. ¹⁴ Laj Moisés, nak quiatinac chirixeb laj tij, ma jun cua quixye nak sa' xyankeb ta li ralal xc'ajol laj Judá taelk chak junak aj tij. Ut li Jesucristo quiyo'la sa' xyankeb li ralal xc'ajol laj Judá.

K'axal nim xcuauquil li Jesús chiru xcuauquil laj Melquisedec

¹⁵ Riq'uin a'in nanauman nak li Jesucristo nim xcuauquil chiruheb laj tij li que'cuan sa' xyankeb aj Israel. Li Jesucristo, a'an aj tij jo' nak quicuan laj Melquisedec ut a'an macua' ralal xc'ajol laj Leví. ¹⁶ Li Jesucristo inc'a' quixakabac chok' aj tij jo' quixye li chak'rab. Xakabanbil ban chok' aj tij xban nak nim xcuauquil ut yo'yo chi junelic. ¹⁷ Jo'ca'in tz'ibánbil sa' li Santil Hu chirix li Kacua' Jesucristo: Laat aj tij chi junelic jo' nak quicuan laj Melquisedec. (Sal. 110:4) ¹⁸ Jo'can nak li chak'rab li quicuan junxil mac'a' chic rajbal xban nak mac'a' chic xcuauquil. ¹⁹ Ma ani nacole' xban li chak'rab li quicuan chak junxil. Abanan cuan kayo'on anákcuán k'axal nim xcuauquil chiru li chak'rab. Li kayo'on, a'an li Jesucristo. Ut xban a'an cuanko chi sum atin riq'uin li Dios. ²⁰ Li Jesucristo xakabanbil chok' aj tij xban li Dios riq'uin juramento. ²¹ Abanan macua' riq'uin juramento nak que'xakabac chok' aj tij li ralal xc'ajol laj Leví. A'ut li Kacua' Jesucristo xakabanbil chok' aj tij xban li Dios riq'uin juramento. Tz'ibánbil sa' li Santil Hu chi jo'ca'in: Li Dios quiatinac riq'uin li Ralal ut quixye re: Sa' inc'aba' lajin tinye acue: Laat laj tij chi junelic jo' nak quicuan laj Melquisedec, chan. Li Dios inc'a' tixjal lix c'a'ux xban nak quixpatz' lix lok'laj c'aba'. (Sal. 110:4)

²² Riq'uin li juramento a'in, sa' xc'aba' li Jesucristo, nim xcuquil li ac' contrato, ut k'axal lok' chiru li quicuan junxil. ²³ Najter nabaleb laj tij que'cuan chak. Inc'a' que'cana sa' xc'anjel chi junelic li junjunk xban nak neque'cam ut jalan chic nacana chok' rekaj. ²⁴ Aban li Kacua' Jesucristo a'an chic li tz'akal laj tij. Ma jaruj chic tasic'mank junak rekaj xban nak a'an yo'yo chi junelic. ²⁵ Li Jesucristo a'an tz'akal tacolok reheb chixjunileb li neque'pabán re li Dios sa' xc'aba' a'an. Li Jesucristo yo'yo chi junelic ut naqatinac chirixeb chiru li Dios. ²⁶ Li Kacua' Jesucristo, a'an li tz'akal xyucua'il aj tij. Ut a'an li natenk'an ke chi tz'akal. Moco juntak'et ta lix yu'am riq'uineb laj mac. Li Jesucristo santo ut mac'a' xmac. A'an co sa' choxa ut aran quiq'uehe' xanimal xlok'al. ²⁷ Li Jesucristo macua' jo'queb lix yucua'ileb aj tij li que'cuan sa' xyankeb laj Israel. Eb a'an cuulaj cuulaj neque'xmayeja li xul re xtojbal rix lix maqueb jo' ajcui' lix maqueb li tenamit. Aban li Jesucristo jun sut ajcui' quixmayeja rib re xtojbal rix li kamac. ²⁸ Jo' tz'ibanol sa' li chak'rab najter, eb li xakabanbil chok' xyucua'il aj tij, a'an yal cuinkeb. Abanan mokon, nak quisache' xcuquil li chak'rab, li Dios quixxakab riq'uin juramento li Ralal chok' xyucua'il aj tij. Riq'uin ut a'an li Jesucristo tz'akal re ru chi c'anjelac chi junelic.

8

Li Jesucristo, a'an xyucua'il aj tij chok' ke lao

¹ A'an a'in xyalal li yoco chixyebal ere: yal nak cuan jun tz'akal xyucua'il aj tij nac'anjelac chikix. A'an li Jesucristo li c'ojc'o chak sa' xnim uk' li Dios sa' lix nimajcual xcuquilal sa' choxa. ² Li Jesucristo nac'anjelac sa' li Santil Na'ajej sa' choxa li yibanol xban li Dios, ut macua' sa' li na'ajej yibanol xbaneb li cuink. ³ Chixjunileb li xyucua'il laj tij xakabanbileb chi mayejac xul ut c'a'ak chic re ru chi mayejil. Jo'can ajcui' li Jesucristo tento tixq'ue junak mayej. ⁴ Cui toj cuan ta arin sa' ruchich'och' inc'a' ajcui' tac'anjelak jo' junak reheb laj tij xban nak eb laj tij neque'mayejac jo' naxye lix chak'rab laj Moisés. ⁵ Li c'a'ru neque'xbanu eb laj tij yal jun retaliil li na-uxman sa' li choxa. Nakanau nak yal retaliil xban li c'a'ru quiyeh'e re laj Moisés nak oc re chixyibanol li tabernáculo. Li Dios quixye re: Chaq'ueetal ut chabanu chixjunil jo' li retaliil quinc'ut chacuu sa' xben li tzul Sinaí. (Ex. 25:40) ⁶ A'ut lix c'anjel li Jesucristo numtajenak xcuquil chiru li que'xbanu chak eb laj tij junxil. Sa' li ac' contrato li Jesucristo chic naqatinac chikix chiru li Dios. K'axal chabil li ac' contrato xban nak riq'uin a'an k'axal lok' cui'chic li yechi'ibil ke xban li Dios. ⁷ Cui ta tz'akal re ru li contrato quixbanu chak junxil inc'a' raj chic quixq'ue junak ac' contrato. ⁸ Aban li Dios quiril nak inc'a' us yoqueb chixbanunquil li tenamit li cuanqueb rubel xcuquil li xben contrato. Jo'can nak quixye reheb li tz'ibanol sa' li Santil Hu: Tacuulak xk'ehil nak tinbanu junak chic li ac' contrato riq'uineb li tenamit Israel ut Judá.

⁹ Li contrato a'in macua' jo' li quinbanu chak reheb lix xe'tonil yucua'eb nak quicuisiheb chak sa' li tenamit Egipto. Inc'a' que'xbanu li naxye li contrato. Xban a'an quebintz'ektana.

¹⁰ A'in li contrato tinbanu riq'uineb reheb laj Israel. Tacuulak xk'ehil nak ting'ue lin chak'rab sa' lix c'a'uxeb ut tinq'ue ajcui' sa' li rameb. Lainak lix Dios ut a'anakeb lin tenamit.

¹¹ Inc'a' chic te'xch'olob xyalal chikuix chiruheb li ras ritz'in xban nak chi coc' chi nink te'xnau chic anihin.

¹² Tincuy lix maqueb ut ma jun cua chic tinc'oxla lix mäusilaleb, chan li Dios. (Jer. 31:31-34)

¹³ Nak li Dios quixye nak tixbānu jun chic li ac' contrato a'an naraj naxye nak li najter contrato yo chi sachc xcuanquil ut māc'a' chic xc'anjel tācanāk.

9

Li Tabernáculo a'an retalil li choxa

¹ Li xben contrato cuan xchak'rab naxye chanru nak nalok'oniman li Dios ut cuan jun li muhebal re lok'oninc yibambil xbaneb li cuink tabernáculo xc'aba'. ² Jo'ca'in nak yibambil li na'ajej. Tasbil sa' xyi riq'uin jun nimla t'icr. Sa' li xben tasal cuan li candal cuukub xxamlel ut cuan ajcui' li mex bar naq'ueman cui' li mayejanbil caxlan cua. Li xben tasal a'an Santil Na'ajej xc'aba'. ³ Li na'ajej li cuan jun pac'al li t'icr, a'an Lok'laj Santil Na'ajej xc'aba'. ⁴ Aran cuan jun xc'atbal li pom yibambil riq'uin oro, ut cuan ajcui' jun li Lok'laj Cax letzbil oro chirix. Chi sa' li Lok'laj Cax a'an cuan li xar oro bar cui' c'ulanbil li maná. C'ulanbil ajcui' sa' li cax lix xuk' laj Aarón li quituxmec ut qui-atz'umac. Ut c'ulanbil ajcui' aran li cuib chi pec tjc ru li tz'ibambil cui' li lajeb chi chak'rab. ⁵ Ut sa' xben li Lok'laj Cax cuan cuib li querubines yibambil riq'uin oro chanchaneb li ángel. A'an retalil nak cuan li Dios aran. Lix xiq'ueb naxc'ul rib sa' xben lix tz'apbal re li cax bar naq'ueman cui' li mayej quic' re xcuybal li māc. Abanan anakcuán inc'a' takach'olob nabal chic chirix a'an. ⁶ Jo'ca'in nak que'c'anjelac sa' li na'ajej li que'xlok'oni cui' li Dios. Rajjal cutan que'oc laj tij sa' li xben tasal chixbānunquil lix c'anjel. ⁷ Aban sa' lix cab tasal ca'aj cui' li xyucua'il aj tij na-oc jun sut chiru li jun chihab. Ut nak na-oc sa' li Lok'laj Santil Na'ajej a'an, naxc'am xquiq'uel li xul ut naxmayeja re tacuyek' lix māc a'an ut re ajcui' nak tacuyek' xmaqueb li tenamit. ⁸ Riq'uin li atin a'in, chirix li lok'oninc junxil sa' li tabernáculo, li Santil Musik'ej naxc'ut chiku nak moco yalač ani ta naru na-oc toj chi sa' li Lok'laj Santil Na'ajej riq'uin li Dios xban nak toj cuan xc'anjel li najter chak'rab chiruheb ut toj yoqueb chi c'anjelac sa' li xben tasal. Jo'can nak li xben tasal a'an naramoc re li oquebal chiruheb sa' li Lok'laj Santil Na'ajej. ⁹ Chixjunil a'in, a'an jun retalil chok' ke anakcuán nak junxil quilaje'mayejac. Aban li c'atbil mayej ut li c'a'ak chic re ru chi mayejil inc'a' quirisi lix maqueb. ¹⁰ Sa' lix papaleb junxil cuan li chak'rab chirix li c'a'ru te'xtzaca ut c'a'ru te'ruc' jo' ajcui' chanru nak te'ch'ajok re xsantobresinquileb rib. Usta inc'a' quijala lix na'lebeb, aban tento que'xbānu li chak'rab a'an toj quicuulac xl'ehil nak li Dios quixjal nak quixq'ue li ac' na'leb. ¹¹ Aban ac xc'ulun li Jesucristo ut a'an chic li tz'akal xyucua'il aj tij chok' ke lāo. Ut xkac'ul li rusilal li Dios li quixq'ue ke sa' li ac' contrato. Li Jesucristo inc'a' nac'anjelac sa' junak tabernáculo yibambil xbaneb li cuink arin sa' ruchich'och'. K'axal lok' cui'chic li na'ajej li nac'anjelac cui'. ¹² Li Kacua' Jesucristo co sa' li Lok'laj Santil Na'ajej sa' choxa. A'an inc'a' quixmayeja xquiq'uel li chibat chi moco ral cuacax. Quixmayeja ban lix lok'laj quiq'uel. Jun sut ajcui' quixmayeja rib re xq'uebal li kacolbal chi junelic. ¹³ Sa' lix papaleb junxil cuan nak riq'uin li c'a'ru neque'xbānu laj tij, neque'xmux ru lix c'anjel sa' li tabernáculo. Ut re xsachbal lix paltileb que'xmayeja li chibat ut li toro. Lix quiq'uel ut lix chahil li c'atbil tuk' ix cuacax narachrachic sa' xbaneb laj tij. ¹⁴ Cui lix quiq'uel li xul naru naxsach lix paltileb, k'axal nim cui'chic xcuanquil lix quiq'uel li Jesucristo xban nak a'an narisi li kamac. Li Santil Musik'ej quixtenk'a li Jesucristo nak quixmayeja rib chiru li Dios re xtojbal rix li kamac. Li Jesucristo tz'akal chabil. Māc'a' xmāc ut lix quiq'uel narisi li kamac li nac'amoc chak re li camc sa' kabén. Naxsakobresi li kac'a'ux re nak ca'aj cui' chiru li yo'yoquil Dios toc'anjelak. ¹⁵ Anakcuán cuan li ac' contrato xban xcamic li Jesucristo. Chixjunileb li bokbileb xban li Dios

tacuank xcuybal lix maqueb, eb li que'cuan rubel xcuquil li xben contrato jo' ajcui' lao li cuanco rubel xcuquil li ac' contrato. Ut tacuank kayu'am chi junelic jo' quixyechi'i li Dios. Li Jesucristo quicam chiru cruz re kacolbal. Riq'un lix lok'laj quiq'uel quixtoj rix li kamac. ¹⁶ Laex ac nequenau nak junak cuink cuan c'a'ru re naxye c'a'ru tarechani li ralal xc'ajol junjunk. Ut a'an tauxmank nak acak xcam. ¹⁷ Li atin a'in mac'a' xc'anjel nak toj yo'yo li xyehoc re. Toj chirix ban lix camic tac'anjelak. ¹⁸ Jo'can nak li xben contrato quixakabac chak xcuquil riq'un xquiq'ueleb li xul nak que'mayejac. ¹⁹ Nak laj Moisés quixye chixjunil li chak'rab rebeb li tenamit, quixchap li coc' ruk' li pim hisopo xc'aba' ut ca'ch'in li caki lana. Quixtz'a sa' xquiq'uel li chibat ut li ral cuacax yubil riq'un ha'. Quixrachrachi li quic' chiru li hu tz'ibanbil cui' li chak'rab ut quixrachrachi ajcui' sa' xbeneb li tenamit. ²⁰ Tojo'nak quixye rebeb: Riq'un li quic' a'in xakabanbil xcuquil li contrato li quixq'ue li Dios chok' ere, chan. (Ex. 24:8) ²¹ Ut laj Moisés quixrachrachi li quic' chiru li tabernáculo jo' ajcui' chiru chixjunil li c'a'ak re ru nac'anjelac sa' li tabernáculo re xlok'oninquil li Dios. ²² Jo' tz'ibanbil sa' li chak'rab, tento xsantobresinquel riq'un quic' chixjunil li quic'anjelac chiruheb. Mac'a' xcuybal li mac cui inc'a' tahoyek' li quic'.

Riq'un lix camic li Jesucristo quixtoj rix li kamac

²³ Jo'can nak tento nak que'xrachrachi lix quiq'uel li xul chiru li tabernáculo jo' ajcui' chiruheb li c'a' re ru cuan chi sa' re xsantobresinqueleb. Li tabernáculo yal retaliil li choxa. Ut li choxa santobresinbil riq'un jun mayej k'axal cui'chic lok'. A'an lix lok'laj quiq'uel li Kacua' Jesucristo. ²⁴ Li Cristo inc'a' nac'anjelac sa' junak tabernáculo yibanol xbaneb li cuink. Nac'anjelac ban sa' choxa. Li tabernáculo quicuan, a'an yal retaliil li choxa. Li Jesucristo co' sa' choxa ut anakcuán aran yo' chi jaloc atin chikix chiru li Dios. ²⁵ Rajlal chihab na-oc lix yucua'il aj tij sa' li Lok'laj Santil Na'ajej ut naxmayeja xquiq'uel li xul. Aban moco jo'can ta quixbanu li Jesucristo. A'an jun sut ajcui' quixmayeja lix lok'laj quiq'uel nak quicam. ²⁶ Cui ta quixmayeja rib nabal sut, nabal sut raj quicam chalen sa' xticlajic li ruchich'och'. Aban inc'a' quixbanu chi jo'can. Li Jesucristo quic'ulun re xrakbal li xben contrato ut jun sut ajcui' quixmayeja rib. Ut riq'un a'an cuan xcuybal li mac. ²⁷ Chixjunil li tenamit jun sut ajcui' te'camk ut li Kacua' Dios tarakok atin sa' xbeneb. ²⁸ Jo'can nak li Jesucristo jun sut ajcui' quixmayeja rib re risinquil lix maqueb li q'uila tenamit. Mokon tol-elk cui'chic, aban macua' chic re cuyuc mac tachalk. Tol-elk ban li Jesucristo re xtz'akobresinquel li kacolbal chikajunil li yoco chi yo'oninc re.

10

¹ Li chak'rab li quiq'uehe' re laj Moisés yal retaliil li usilal talaje'chalk mokon. Sa' li chak'rab a'an naxye nak te'mayejac rajlal chihab aban moco riq'un ta li mayejac quiticobresic lix yu'ameb. ² Cui ta riq'un li mayejac ta'elk lix maqueb inc'a' raj chic neque'mayejac rajlal chihab. Abanan neque'rec'a sa' li rameb nak toj cuan lix maqueb. Jo'can nak inc'a' que'xcanab li mayejac. ³ Lix ya'lal li mayejac neque'xbanu a'an re xjulticanquil chiruheb nak toj cuanqueb xmac. ⁴ Lix quiq'uel li chibat ut li toro inc'a' narisi li mac. ⁵ Jo'can nak li Kacua' Jesucristo, nak ac chalc re sa' ruchich'och', quixye re li Acuabej Dios:

Lain ninnau nak laat inc'a' nacacuaj lix quiq'uel li mayej xul. Inc'a' nacuulac chacuu li c'a'ak re ru chi mayejil. Jo'can nak tinaq'ue chi tz'ejcualoc'.

6 Inc'a' nacuulac chäcuu li c'atbil mayej chi moco li c'a'ak re ru chi mayejil re risinquel li mac.

7 Ut quinye: Cue'quin, at Käcua', tinbanu li nacacuaj jo' tz'ibanol sa' li Santil Hu chichuix. (Sal. 40:6-8)

8 Jo'ca'in quixye li Cristo re li Dios: Inc'a' nacuulac chäcuu li c'atbil mayej chi moco li c'a'ak re ru chi mayejil re risinquel li mac. Xelaje'xbanu a'in xban nak jo'can tz'ibanol sa' li chak'rab junxil. Quixye li atin a'in usta ac tz'ibanol sa' li chak'rab nak te'mayejak. **9** Ut quixye ajcui': Cue'quin, at Käcua'. Tinbanu li nacacuaj, chan. Jo'can nak li Dios quirisi xcuánquil li mayejac xul ut chok' rækaj li mayej a'an quixq'ue li Jesucristo chi cämc chiru li cruz. **10** Li Jesucristo quixbanu li quiraj li Dios nak quixmayeja rib chiru li cruz. Jun sut ajcui' quixmayeja rib, ut riq'uin lix camic cuybil li kamac ut santobresinbilo. **11** Sa' xyankeb laj Israel, chixjunileb laj tij cuulaj cuulaj neque'mayejac ut li mayej a'an inc'a' narisi li mac. **12** Abanan li Jesucristo jun sut ajcui' quixmayeja rib nak quicam re xcuybal xsachbal li mac. Chirix a'an co'sa' choxa ut quic'oja sa'xnim uk'li Dios. **13** Ut aran yo chiroybeninquel nak tacuulak xk'ehil nak tixyek' sa' rok eb li xic' neque'iloc re. **14** Xban nak jun sut ajcui' quixmayeja rib li Jesucristo nak quicam chiru li cruz, mac'a' chic xmaqueb chiru li Dios li santobresinbileb. **15** Jo'can ajcui' li Santil Musik'ej naxch'olob xyalal chiku nak a'an tz'akal yal xban nak jo'ca'in naxye sa' li Santil Hu:

16 A'in li contrato tinq'ue reheb, chan li Dios. Tacuulak xk'ehil nak tinq'ue lin chak'rab sa' lix c'a'uxeb ut tinq'ue ajcui' sa' li rämeb.

17 Ut quixye ajcui':

Inc'a' chic tänak sa' inch'ol lix maqueb chi moco lix mausilaleb. (Jer. 31:33-34)

18 Jo'can nak cui ac cuybil sachbil li kamac, mac'a' chic xc'anjel li mayejac re risinquel li mac.

Naru tocuank chi sum atin riq'uin li Dios

19 Jo'can utan ex herman, anakcuan naru tocuank chi sum atin riq'uin li Dios xban nak quihoje' lix lok'laj quiq'uel li Jesucristo nak quicam chiru li cruz sa'kac'aba'. **20** Riq'uin lix camic li Jesucristo quixsach xcuánquil li t'icr li quicuan sa'li tabernáculo ut quixq'ue li ac' na'leb re xtaubal li junelic yu'am ut anakcuan naru tocuank chi sum atin riq'uin li Dios. **21** Li Jesucristo, a'an lix yucua'il aj tij chok' ke lão li ralal xc'ajol li Dios. **22** Jo'can nak chikaq'ue kib rubel xcuánquil li Dios chi anchal kach'ol ut chi mac'a'ak kaxiu xban nak nakec'a' nak mac'a' chic li kamac. Ch'ajbil chic li kam xban xquiq'uel li Jesucristo ut cubsinbil chic kaha'. **23** Jo'can nak cauhak taxak kach'ol sa'li kapabal xban nak li Dios naxq'ue li c'a'ru naxyech'i ke. **24** Chikasic' chanru takatenk'a kib re nak takara kib ut chikabánu usilal chi kibil kib. **25** Cuanqueb li inc'a' neque'xic sa'li ch'utubaj ib. Abanan inc'a' takabanu jo' neque'xbanu eb a'an. Junelic ban takach'utub kib re xlok'oninquil li Dios. Chikaq'ue xcacuub li kach'ol chi kibil kib. Tento takabanu a'an xban nak chi seb tol-elk li Jesucristo. **26** Cui junelic yoco chi macobc chi ac nakanau xyalal li ratin li Dios, mac'a' chic xcuybal li kamac xban nak nakanau nak mac yoco chixbanunquil. **27** Cui junelic yoko chi macobc, ca'aj chic li rakba atin ut lix xamlel li tojba mac yoco chiroybeninquel bar cui' te'c'atek' li xic' neque'iloc re li Käcua' Dios. **28** Junxil inc'a' qui-ile' xtok'obal ru li ani quik'etoc re xchak'rab laj Moisés. Cui cuan cuib malaj oxib li que'xye nak yal nak xk'et li chak'rab, quirake' atin sa' xben ut que'xcamsi. **29** Numtajenak cui'chic ra te'xc'ul li neque'tz'ektañan re li Ralal'li Dios ut neque'xsach xcuánquil

lix quiq'uel xban nak riq'uin xquiq'uel li Jesucristo xakabanbil xcuanquil li ac' contrato ut santobresinbilo lao. Numtajenak cui'chic ra te'xc'ul li neque'xmajecua li Santil Musik'ej li naq'uehoc ke li rusilal li Dios. ³⁰ Lao nakanau nak li Dios quixye chi jo'ca'in:

Ca'aj cui' lain naru ting'uehok xtojbal rix lix maqueb ut lain tinrahobtesiheb riq'uin li c'a'ru quilaje'xbənū.

Ut quixye cui'chic li Kacua':

Lain tinrakok atin sa' xben lin tenamit. (Dt. 32:35-36)

³¹ K'axal xucuajel nak tarakok ətin li yo'yoqUIL Dios sa' xbeneb li neque'tz'ektañan re. ³² Aban chinak sa' ech'ol chanru xec'ul junxil nak toje' xepab li Cristo. Nabal chi raylal quilajeç'ul ut inc'a' xch'inan ech'ol. ³³ Cuan sa' eyəñk li xic' que'ile' ut que'hobe' chiruheb li tenamit. Ut laex quextz'akon riq'uin li raylal li que'xc'ul. ³⁴ Laex quiyot'e' ech'ol chi ribal le rech aj pabanelil li cuanqueb chi prexil. Ut inc'a' quiraho' sa' le ch'ol nak quimak'e' cheru li c'a'ru ere xban nak nequenau nak sa' li choxa cuan ematan k'axal cui'chic lok'. Le matan li cuan sa' choxa inc'a' nalaj inc'a' na-oso'. ³⁵ Jo'can nak cauhak taxak ech'ol sa' le pabal ut riq'uin a'an cuan ek'ajcamunquil. ³⁶ Laex tento tecuy li c'a'ru na-ux ere re nak tebənū li naraj li Dios. Ut riq'uin a'an tec'ul li yechi'imbil ere xban li Dios. ³⁷ Jo'ca'in tz'ibambil sa' li Santil Hu: Chi seb tol-elk li Cristo. Inc'a' təbəyak chak.

³⁸ Li tíc xch'ol xban inpabankuil cuan xyu'am chi junelic. Cui naxcanab inpabankuil, inc'a' tasahok' inch'ol riq'uin, chan li Dios. (Hab. 2:3-4)

³⁹ Aban, lao macua'o xcomoneb li neque'xcanab xpabankuil li Dios. Eb a'an te'xic sa' xbalba. Lao nakapab li Dios ut tocolek'.

11

Li Pabal

¹ ¿C'a'ru li pabal? Li pabal a'an xnaubal nak relic chi yal takac'ul li yoco chiroybeninquil. Usta inc'a' nakil ru aban nakanau nak takac'ul. ² Li Dios quisaho' xch'ol riq'uineb li kaxe'tonil yucua' xban nak que'paban. ³ Xban nak nakapab li rətin li Dios, nakanau nak li Dios quixyib li choxa jo' ajcui' li ruchich'och'. Macua' riq'uin c'a'ak re ru quixyib li ruchich'och'. Yal riq'uin li ratin quixyib. ⁴ Xban lix pabal laj Abel, quixq'ue jun xmayej chabil chiru li quixq'ue laj Caín. Xban lix pabal, li Dios quixye nak tíc xch'ol ut quixc'ul lix mayej. Usta camenak chic laj Abel, aban toj cuan retaliil chok' ke lao chanru nak quipaban chiru li Dios. ⁵ Xban lix pabal laj Enoc inc'a' quicam. Quic'ame' ban sa' choxa xban li Dios. Inc'a' chic que'xtau xban nak ac xc'ame'. Nakanau nak li Dios quisaho' sa' xch'ol riq'uin nak toj maji' nac'ame' sa' choxa xban nak jo'can tz'ibambil sa' li Santil Hu. ⁶ Ma jok'e tasahok' xch'ol li Dios riq'uin li ani inc'a' napaban. Ma ani naru nachal riq'uin li Dios cui inc'a' naxpab nak cuan li Dios ut nak a'an naxq'ue xk'ajcamunquil li ani nasic'oc re. ⁷ Xban lix pabal laj Noé, li Dios quixye re c'a'ru talajc'ulmən. Ut laj Noé quixpab li quixye li Dios usta toj maji' nac'ulman. Quixyib li nimla jucub cab re xcolbal rib a'an, jo' eb ajcui' li ralal xc'ajol. Ut lix pabal laj Noé quixc'utbesi nak li cuanqueb sa' ruchich'och' inc'a' que'paban. Jo'can nak que'cam. Xban nak quipaban, li Dios quixye nak tíc xch'ol laj Noé. ⁸ Xban lix pabal, laj Abraham qui-abin chiru li Dios nak quixye re nak təelk sa' li tenamit cuan cui'. Co sa' li na'ajej li quiyechi'ic re xban li Dios. Nak qui-el chak sa' li tenamit, co chi inc'a' naxnau bar xic re. ⁹ Xban lix pabal laj Abraham quiucuan sa' li na'ajej li quiyechi'ic re xban li Dios, ut quiucuan aran jo'jun jalan xtenamit. Quixyib xmuhebal t'icr xban nak yal numec' re. Jo'can

ajcui' que'xbənu laj Isaac ut laj Jacob xban nak a'aneb li te'echan^{ink} re li c'a'ru quixyechi'i li Dios. ¹⁰ Laj Abraham inc'a' quixyib chabil ochoch, xban nak yo chiroybeninquil jun xna'aj sa' li santil choxa. Li na'ajej a'an yibanbil xban li Kacua' Dios ut tacuank chi junelic. ¹¹ Xban lix pabaleb, laj Abraham ut lix Sara quicuan jun lix c'ula'al sa' xtixilateb, usta lix Sara a'an jun ixtk inc'a' naq'uiresin. Aban que'xnau nak te'xc'ul li c'a'ru quiyechi'ic reheb xban li Dios. ¹² Usta ac tix chic laj Abraham nak quiyo'la li ralal, abanan que'tam li ralal xc'ajol. Lix q'ualeb li ralal xc'ajol jo' xq'ual li chahim chiru li choxa ut jo' xq'ual li samaib li cuan chire li palau. Ut inc'a' naru rajlanquileb xban lix q'ualeb. ¹³ Chixjunileb a'an quilaje'cam. Usta inc'a' que'xc'ul chixjunil li c'a'ru quiyechi'ic reheb xban li Dios, que'xpab nak tac'ulmank li yechi'ibil. Jo'can nak saheb sa' xch'ol. Que'xye nak li ruchich'och' a'in macua' tz'akal xna'ajeb; yal numeleb ban sa' ruchich'och'. ¹⁴ Que'xye chi jo'ca'in xban nak toj yoqueb chiroybeninquil jun lix na'ajeb. ¹⁵ Li na'ajej a'an macua' li na'ajej que'el cui' chak. Cui ta a'an, quiru raj que'suk'i cui'chic aran. ¹⁶ Aban que'roybeni jun na'ajej k'axal chabil, a'li santil choxa. Jo'can nak li Dios inc'a' naxutqanac chixyebanak a'an llix Diobeb xban nak quixc'ub jun li na'ajej chok' reheb. ¹⁷ Laj Abraham quiyale' lix pabal xban li Dios nak quixye re nak tixmayeja li ralal. Jun ajcui' li ralal cuan, aban xban nak naxpab li Dios, laj Abraham quixq'ue laj Isaac chok' xmayej. ¹⁸ Quixq'ue li ralal chok' xmayej, usta a'an li quiyechi'ic re xban li Dios re nak te'tamk li ralal xc'ajol. ¹⁹ Cui ta quicam laj Isaac, laj Abraham ac naxnau nak nim xcuانquil li Dios re xcuaclesinquel cui'chic chi yo'yo sa' xyaneb li camenak. Naru xyebal nak chanchan a'an quixbənu li Dios xban nak laj Abraham quixk'axtesi li ralal re camc. Aban quik'axtesic cui'chic re chi yo'yo xban li Dios. ²⁰ Laj Isaac quixpab nak li Dios tixq'ue li quixyechi'i re. Jo'can nak quixye reheb laj Jacob ut laj Esaú nak li Dios taosobtesink reheb nak tacuulak xk'ehil. ²¹ Laj Jacob quixpab nak tixc'ul li quiyechi'ic re xban li Dios. Jo'can nak ac camc re, laj Jacob quirosobtesiheb li ralal laj José. Ut chirix a'an, laj Jacob quixxulub rib sa' xben lix xuk' ut quixlok'oni li Dios. ²² Xban lix pabal laj José, nak ac camc re, quixjultica reheb laj Israel nak sa' jun cutan te'elk sa' li tenamit Egipto. Ut quixye ajcui' reheb nak te'xc'am lix bakel nak te'elk sa' li tenamit a'an. ²³ Xban lix pabaleb lix na' xyucua' laj Moisés, nak quiyo'la laj Moisés, oxib po que'xmuk chiru li rey. Que'ril nak c'ajo' xchak' al ru li c'ula'al ut inc'a' que'xucuac chi xk'etbal lix chak'rab li rey nak quixye nak te'camsik li c'ula'al li coc' telom. ²⁴ Xban lix pabal laj Moisés, nak quicu^{ink}kilo' inc'a' quiraj nak te'xye nak lix rabin li rey, a'an lix na'. ²⁵ Inc'a' quiraj tz'akonc sa' li sahil ch'olej cuanqueb cui' laj Egipto. Quixnau nak li sahil ch'olej a'an yal nanume'. Quiraj ban xc'ulbal li raylal li yoqueb chixc'ulbal laj Israel lix tenamit li Dios. ²⁶ Naxnau nak k'axal lok' nak tixc'ul li raylal sa' xc'aba' li Cristo chiru xc'ulbal lix biomil li tenamit Egipto. Ut yo chiroybeninquil lix k'ajcamunquil li taq'uehek' re xban li Dios. ²⁷ Xban xpabal laj Moisés qui-el chak sa' li tenamit Egipto ut inc'a' quixucuac chiru li rey usta yo xjosk'il sa' xben. Quixcacuubresi xch'ol xban nak naxnau nak li Dios cuan riq'uin. Chanchan li yo chirilbal ru, aban li Dios ma ani na-iloc ru. ²⁸ Xban lix pabal, laj Moisés quixbənu li pascua jo' quiyeh'e re xban li Dios. Nak elqueb re Egipto quixtakla xq'uebal xquiq'uel li carner chiruheb li puerta. Ut nak quinume' li ángel chi camsinc, ma jun li xben ralaleb laj Israel quixcamsi. ²⁹ Xban lix pabaleb laj Israel, que'nume' sa' xyi li caki palau. Chaki ch'och' li que'nume' cui'. Ut jo'can ajcui' que'raj xbanunquil eb laj Egipto. Aban inc'a' que'ru xban nak li ha' quixjunaji rib sa' xbeneb ut aran que'oso' chixjunileb.

³⁰ Xban lix pabaleb laj Israel, cuukub cutan que'xsuti rix li tenamit Jericó. Ut sa' xcuuk li cutan quit'ané' li tz'ac li sutsu cui' li tenamit. Ut que'rechani li tenamit. ³¹ Lix Rahab a'an jun iix naxc'ayi rib nak quicuan. Xban nak quipaban, quixtenk'aheb laj Israel li que'chal chixq'uebal retal li tenamit. Xban lix pabal, lix Rahab inc'a' quicam sa' xyankeb li inc'a' que'paban re li Dios. ³² Toj cuan raj nabal tinserak'i ere, aban inc'a' tatz'aklok li cutan re tinserak'ik chirix lix pabaleb laj Gedeón, laj Barac, laj Sansón, ut laj Jefté; ut tinye ajcui' raj ere chanru lix pabaleb laj David, laj Samuel, ut eb li profeta. Aban inc'a' tatz'aklok li cutan. ³³ Nak que'pletic riq'uin li jalanyl tenamit, xban nak cuanqueb xpabal, que'rechani. Sa' xyalal que'taklan ut xban lix pabaleb que'xc'ul li quiyechi'ic reheb xban li Dios. Cuan li que'q'uehe' sa' xyankeb li cakcoj re te'ti'ek', aban mac'a' que'ux re xbaneb li cakcoj. ³⁴ Xban lix pabaleb inc'a' que'c'at nak que'cute' sa' xam. Cuan que'camsic raj chi ch'ich', aban inc'a' que'yoq'ue'. Riq'uin lix pabaleb, que'q'uehe' xcacuilal li mac'a'eb xmetz'eu. Nak que'pletic riq'uineb li jalanyl tenamit, que'numta xcuانquil sa' xbeneb xban li Dios toj refal que'rechani li tenamit. ³⁵ Cuanqueb iix, xban lix pabaleb, que'cuaci cui'chic lix camenakeb chi yo'yo. Ut cuanqueb ajcui' que'rahobtesic toj retal nak que'cam xban lix pabaleb. Inc'a' que'raj nak te'ach'abak xbaneb li xic' neque'iloc reheb xban nak inc'a' que'raj xtz'ektanquil li Dios. Ac neque'xnau nak te'xc'ul jun yu'am k'axal chabil sa' choxa nak te'cuaclík cui'chic chi yo'yo. ³⁶ Cuan que'hobe', cuan que'saq'ue', ut cuan que'baq'ue' ut que'q'uehe' sa' tz'alam. ³⁷ Cuan que'camsic chi pec ut cuan que'sete' riq'uin jachleb che'. Que'yale' ralenquil aban inc'a' que'xtz'ektana li Dios. Ut cuan ajcui' que'camsic riq'uin k'esnal ch'ich'. Quilaje'xbeni rib yalak bar ut riq'uin rix chibat ut rix carner que'xyib li rak'eb. Neba'eb ut rahobtesinbileb. K'axal ra que'xc'ul. ³⁸ Macua' raj xc'ulubeb li inc'a' useb xna'leb nak te'cuank laj pabanel sa' xyankeb. Xban nak que'rahobtesic, eb laj pabanel quilaje'elelic chiruheb ut que'cuau yalak bar sa' li chaki ch'och', sa' tzul, ut que'cuau ajcui' sa' li ochoch pec. ³⁹ Nak nakabi a'in chirixeb laj pabanel, nakanau nak tz'akal re ru lix pabaleb. Aban toj maji' quitz'akloc ru'lix colbaleb li quiyechi'ic reheb xban li Dios. ⁴⁰ Li Dios quiraj nak yokeb chi oybeninc re nak te'tz'akonk kochben riq'uin li k'axal lok' yechi'inbil ke. A'an li kacolbal sa' xc'aba' li Jesucristo.

12

Chikac'oxla li Jesucristo

¹ Numtajenak xq'uiab lej pabanel li que'cuau chak najter. Kaq'uehak retal chanru lix pabaleb. Chanru nak que'paban chak a'an, jo'can ajcui' takabanu lao. Cui junak naraj alinac, narisi chixjunil li naalobresin re ut naxyal xk'e chi alinac. Jo'can ajcui' takabanu lao. Takacanab chixjunil li c'a'ak re ru nach'i'ch'i'in ke sa' li kapabäl ut takacanab ajcui' li mac li nachapoc ke. Chikacuyak taxak li c'a'ak re ru tento xcuybal re nak takabanu jo' naraj li Dios. ² Kaq'uehak kach'ol chixtakenquil li Jesucristo laj c'amol be chiku. A'an naq'uehoc re li kapabäl ut naxtz'akobresi ru. Usta xutanal li camc quixc'ul chiru li cruz, abanan inc'a' quixq'ue sa' xch'ol. Ut quixcuy li raylal sa' kac'aba' lao xban nak lix sahilal xch'ol quiq'uehe' re mokon. Ut anakcuau cuau sa' choxa sa' xnim uk' li Dios.

Li Dios nocoxtij xban nak lao li ralal xc'ajol

³ Cheq'uehak retal chanru nak quixcuy li rahobtesic li Jesucristo xbaneb laj mac. Jo'can ajcui' laex. Checuyak li ra xic' ut inc'a' chich'inank ech'ol sa' le pabal. ⁴ Laex toj maji' nequexcamsic xban nak nequeq'ue ech'ol

chixcolbal erib chiru li mac. ⁵ ¿Ma ac xsach sa' ech'ol li c'a'ru quixye li Dios re xch'lobanquil le na'leb? Li Dios naatinac eriq'uin jo' naatinac junak yucua'bej riq'uin lix coc'al. Jo'ca'in tz'ibánbil sa' li Santil Hu:

Ex cualal inc'ajol, metz'ektana le tijbal li ninye ere, chi moco chich'inank ech'ol nak nequexink'us.

6 Lain nintij li ani ninra ut nink'us chi cau li ani ninc'ul chok' cualal inc'ajol. (Pr. 3:11-12)

7 Tento nak tecuy li tijec' re nak tetau ena'leb. Jo'can nak nequexxtij li Dios xban nak laex li ralal xc'ajol. ¿Ma cuan ta bi' junak alalbej inc'a' natije' xban lix yucua'? ⁸ Cui li Dios inc'a' nequextij jo' nak naxtijeb chixjunileb li ralal xc'ajol, a'an naraj naxye nak laex macua'ex tz'akal ralal xc'ajol. Ut li Dios macua' ajcui' tz'akal eyucua'. ⁹ Sa' kaca'ch'in, li kana' kayucua' nocoe'xk'us ut naka-oxlok'iheb. ¿Ma toja' ta chic li kachoxahil yucua' inc'a' takapab nak toxk'us? Cui nakapab li kak'usbal naxq'ue li Dios, cuank kayu'am chi junelic. ¹⁰ Sa' kaca'ch'in li kana' kayucua' nocoe'xk'us jo' neque'cuulac chiruhel a'an. Aban li Kacula' Dios nocoxk'us chi tz'akal. Nocoxk'us re nak taticok' kach'ol ut toxsantobresi xban nak a'an santo. ¹¹ Relic chi yal nak nakac'ul li kak'usbal moco sa ta nakec'a. Ra ban nakec'a nak nocok'use'. Abanan cui nakacuy k'usec' mokon nakatau xyalal nak riq'uin li k'usec' nachabilo' li kayu'am ut tatuqlak ajcui' li kach'ol.

K'axal xucuajel xtz'ektanquil li ratin li Dios

12 Checacuubresihak le rok eruk' li mac'a' xmetz'eu. Lix yalal li jaljoquil ru atin a'an a'in: Checacuubresi le ch'ol re nak inc'a' tach'inank ech'ol sa' le pabal. ¹³ Ticobresihomak ru le be re nak li yek inc'a' chic tixbach' li rok; tacacuuk ban. Naraj naxye: ticak taxak le yu'am re nak li toj ac' sa' lix pabal inc'a' tach'inank xch'ol. Te'cacuuk ban xch'oleb sa' lix pabaleb.

14 Chexcuank sa' tutkuquil usilal riq'uineb le ras eritz'in. Chexcuank sa' tiquilal ut sa' santilal, xban nak cui mac'a' esantilal ma jok'e teril ru li Dios. **15** Chetenk'a erib cheribil erib sa' le pabal re nak ma jun ere tatz'ektanquik li rusilal li Dios. Chebanu cuent re nak inc'a' teyo'ob li c'ahinc ib sa' eyank. Cui jo'can tebanu naru naniman ru li ch'a'ajquidal ut mare nabaleb te'xic cui'chic sa' li mac xban a'an. **16** Ma' ani taxak junak sa' eyank yal tixlak'ab rib chi inc'a' sumsu. Chi moco chebanu jo' quixbanu laj Esaú nak quixtz'ektna lix lok'laj matan. Laj Esaú quixc'ul raj lix matan xban nak a'an li xben alalbej. Abanan quixtz'ektna lix matan xban nak quixc'ayi yal riq'uin jun cua'al chi cua. **17** Laex nequenau nak mokon quixrahi raj cui'chic xc'ulbal li rosobtesinguil laj Esaú riq'uin lix yucua'. Abanan inc'a' chic quiru xban nak ac quixtz'ektna. Tayabak nak quixtz'ama cui'chic, aban inc'a' chic quiru. Mac'a' chic xjalenquik. **18** Laex inc'a' quebanu jo' que'xbanu eb laj Israel najter k'e cutan. Eb a'an que'jiloc riq'uin li tzul Sinaí nak li Dios quixq'ue lix chak'rab re laj Moisés sa' li tzul a'an. Quicuan xam. Quik'ojojino' ut quicuan ajcui' cak-sut-ik'. **19** Eb a'an que'rabi xyab li trompeta ut que'rabi ajcui' xyab xcux li Dios nak quiatinac riq'uineb. Ut que'xtz'ama nak me'atinqac chic xban li Dios. **20** Que'xye chi jo'can xban nak inc'a' que'xcuy rabinquil li chak'rab li naxye nak tacamsik chi pec li ani taxic aran sa' li tzul, usta xul. (Ex. 19:12) **21** Xban nak k'axal xucuajel rilbal li yo chi uxc sa' xben li tzul, laj Moisés quixye: C'ajo' nak ninxucuac ut ninsicsot xban inxiu, chan. (Dt. 9:19)

22 Abanan laex inc'a' xebanu jo' que'xbanu eb laj Israel. Nak laex nequepab li Cristo, chanchan nak ac xexjiloc riq'uin li tzul Sión. Sión naraj naxye li santil choxa cuan cui' li yo'yoquil Dios. Ac' Jerusalén nayeman ajcui' re li na'ajej a'an. Aran cuanqueb li q'uila ok'ob chi ángel. Yoqueb chixlok'oninquil li Dios.

23 Junaj chic eru laex aj pabanel. Ut tz'ibanol le c'aba' sa' choxa. Textz'akonk sa' choxa erochbeneb li tiqueb xch'ol li ac tz'akobresinbil ruheb xban li Dios. Cuanquex chi sum atin riq'unin li Dios li tarakok atin sa' xbeneb chixjunileb li cuanqueb sa' ruchich'och'. **24** Ut cuanquex chi sum atin riq'unin li Kacua' Jesucristo, li quixakaban xcuquil li ac' contrato. K'axal nim xcuquil lix quiq'uel li Jesucristo. Riq'unin a'an cuan xcuybal le mac. Macua' jo' li quic' li quixmayeja laj Abel najter k'e cutan. **25** Metz'ektaña li ratin li Dios jo' que'xbanu eb laj Israel. Eb a'an inc'a' que'xcuy rabinquil xchak'rab li Dios ut que'xtz'ektaña li ratin nak quich'olobac chák xyalal chiruheb aran sa' li tzul. Ut quirake' atin sa' xbeneb. Cui inc'a' que'cole' eb a'an, q'ma toja' ta chic lao tocolek' cui takatz'ektaña li Dios li naatinac chak toj sa' choxa? **26** Najter nak li Dios quiatinac sa' li tzul Sinaí, lix yab xcux quirec'asi li na'ajej a'an. Ut li Dios quixye: Sa' jun sut chic macua' ca'aj cui' li ruchich'och' tincuec'asi. Tincuec'asi ajcui' li choxa. (Ex. 19:18) **27** Nak naxye "jun sut chic" naraj naxye nak tixsach li ruchich'och', li choxa, ut chixjunil li c'a'ak re ru yibanbil. A'ut li inc'a' yibanbil, jo' li musik'anbil xban li Dios, a'an tacanak chi junelic. **28** Chikabantioxi chiru nak tocuanq riq'unin li Dios chi junelic sa' lix nimajcual cuanquilar. A'an ma jaruj taosok'. Cuank ban chi junelic. Takalok'oni li Dios chi anchal kach'ol xban nak ca'aj cui' a'an xc'ulub lok'onic. Kaq'uehak kach'ol chixbanunquil li c'a'ru naraj a'an ut takaxucua ru. **29** Li kaDios chanchan jun li xam xban nak tixsach chixjunil li inc'a' us.

13

Chanru xna'leb laj pabanel

1 Mecanab xrabal erib cheribil erib xban nak junajex sa' le pabal. **2** Mek'etk'eti erib chixc'ulbal le rula'. Chec'uleb ban sa' usilal. Cuanqueb li que'xc'ul li rula'eb, abanan inc'a' neque'xnau nak ángel li que'cuulac chi ula'aninc rebeb. **3** Cherilak xtok'obal ruheb li cuanqueb sa' tz'alam. Cherec'ak sa' le ram nak chanchan ajcui' laex li cuanquex sa' tz'alam. Chinak ajcui' sa' ech'ol li neque'hobe' ut li neque'rhabobtesic'. Chanchan nak laex ajcui' yoquex chi c'uluc re li raylal a'an. **4** Us li sumlac aban tento che-oxlok'i le sumlajic. Mac'a' c'a'ru chebalak'i cui' erib. Li Dios tarakok atin sa' xbeneb li neque'xmux ru lix sumlajiqueb, jo' ajcui' sa' xbeneb laj co'bet laj yumbet. **5** Mera ru li tumin. Chec'ojobak ban ech'ol riq'unin li jo' q'uial cuan ere xban nak li Dios quixye: Junelic tatintenk'a, ut ma jok'e tatincanab ajunes. (Dt. 31:6) **6** Jo'can nak naru takeyi chi anchal kach'ol: Li Kacua' Dios natenkan'an cue. Inc'a' ninxucua li c'a'ru te'xbanu li xic' neque'iloc cue. (Sal. 118:6) **7** Chijulticok' ere eb li que'c'amoc be cheru. A'an que'xch'olob xyalal li ratin li Dios. Cheq'uehak retal lix pabal ut lix yu'ameb nak que'cuan sa' ruchich'och'. Jo'can ajcui' chebanuhak laex. **8** Li Jesucristo inc'a' najala chi moco najala lix na'leb. Ac a'an ajcui' chak chalen najter k'e cutan, a'an anakcuuan ut a'anak chi junelic. **9** Meq'ue erib chi balak'jc xbaneb laj balak', xban nak jalan jalank li tijleb neque'xye. Macua' li c'a'ru nakatzaca li najaloc re li kayu'am. A'ban li rusilal li Dios najaloc re ut naxq'ue xcacuil kach'ol. **10** Lao cuan jun kaartal. A'an nak quixmayeja rib li Kacua' Jesucristo chiru li cruz. Eb laj tij inc'a' naru te'xtzaca li mayej a'an jo' que'xbanu chak najter sa' li tabernáculo nak que'xmayeja li xul. (Naraj naxye nak li colba-ib inc'a' natauman riq'unin xbanunquil li chak'rab. Natauman ban riq'unin xpabankuil li Cristo.) **11** Lix yucua'il aj tij sa' xyankeb laj Israel naxc'am liz quiq'uel li xul sa' li Lok'laj Santil Na'ajej ut naxmayeja re risinqul li mac. Aban lix tibel li xul naxc'at toj jun pac'al li tenamit. **12** Jo'can ajcui' li Jesucristo quic'ame' toj jun pac'al

li tenamit ut aran quicam chiru li cruz. Ut riq'uin lix lok'laj quiq'uel li Jesucristo nocoxsantobresi. ¹³ Kacanabak li kanajter na'leb ut chikatakehak li Jesucristo usta toj yoko chi c'uluc raylal sa' xc'aba' a'an. ¹⁴ Li ruchich'och' a'in maçua' tz'akal kana'aj. Yoco ban chiroybeninquil jun chic li kana'aj k'axal chabil. A'an li choxa. ¹⁵ Jo'can ut junelic chikalok'onihak li Dios sa' xc'aba' li Jesucristo, ut chikanimak ru. Cui takabanu chi jo'can, a'an li kamayej chiru li Dios. ¹⁶ Misach sa' ech'ol xbanunquil li usilal ut xtenk'anquil erib cheribil erib xban nak a'an jun li mayej nacuulac chiru li Dios. ¹⁷ Chejabink chiruheb laj c'amol be cheru, ut chebanuhak li c'a'ru neque'xye ere xban nak eb a'an neque'tenk'an ere sa' le pabal. A'neb li te'xk'axtesi xcient cherix chiru li Dios. Cheten'aheb re nak sahakeb sa' xch'ol sa' lix c'anjeleb xban nak cui rahakeb sa' xch'ol, rahak ajcui' chok' ere laex. ¹⁸ Ex herman, tintz'ama cheru nak chextijok chikix lão. Nakec'a nak tjc kach'ol ut nakaj nak junelic cuanko sa' tiquilal. ¹⁹ Ut nintz'ama ajcui' cheru nak chextijok chikuix. A' taxak li Dios chiten'ank cue re nak taruk tinxic cui'chic chi junpat cheribal.

Xchak'rabinquileb li herman

²⁰ A' li Kacua' Dios a'an laj q'uehol tuktuquil usilal, li Dios li quicuaclesin cui'chic re chi yo'yo li Jesucristo sa' xyank'eb li camenak. Riq'uin lix lok'laj quiq'uel li Jesucristo xakabanbil xcuانquil li ac' contrato chi junelic. Li Jesucristo na-iloc ke jo' junak cuink narileb lix carner. ²¹ Chicuank taxak li rusilal li Dios eriq'uin re nak tebanu li c'a'ru naraj. Chixbanuhak taxak li Dios li c'a'ru naraj eriq'uin sa' xc'aba' li Jesucristo. Lok'oninbil taxak li Jesucristo chi junelic k'e cutan. Jo'can taxak. ²² Ex herman, nintz'ama jun usilal cheru. Checuyak rabinquil li cuatin re xch'olobanquil ena'leb. Moco q'ui ta li atin xintz'iba sa' li hu a'in. ²³ Nacuaj ajcui' xyebal ere nak li hermano Timoteo ac x-el sa' tz'alam. Cui nachal chi junpat arin, cuochbenak nak toxic cheribal. ²⁴ Cheq'uehak xsahil xch'oleb laj c'amol be cheru sa' le pabal ut chixjunileb li kech aj paabanelil. Eb laj paabanel li cuanqueb arin Italia neque'xtakla xsahil ech'ol. ²⁵ Li rusilal li Dios chikuank eriq'uin. Jo'can taxak.

Li Hu li Quixtz'iba laj Santiago

Xq'uebal xsahil xch'oleb laj pqabanel

¹ Lain laj Santiago, laj c'anjel chiru li Dios ut chiru li Kacua' Jesucristo. Yoquin chi tz'ibac eriq'un laex, li cablaju chi xtepaleb laj Israel. Nintakla xsahil ech'ol laex li xejeq'ui erib yalak bar sa' li junjunk chi na'ajej.

Li chabil na'leb li naxq'ue li Dios

² Ex inherman, chisahok' taxak sa' ech'ol riq'un li raylal nequec'ul. Yalak c'a'ru li raylal nachal sa' eben, a'an yal re xyalbal rix le pabal. ³ Laex nequenau nak riq'un li yalec' nakac'ul, nacacuu li kach'ol sa' li kapabal. ⁴ Abanan junelic checuyak li raylal re nak tz'akalak ere eru nak texcuank. Chabilakex ut mac'a' chexpaltok' cui'. ⁵ Cui cuan junak sa' eyank taraj xna'leb, chixtz'amahak re li Dios, ut li Dios tixq'ue chi anchal xch'ol ut chi nabal. ⁶ Ut nak tixtz'ama re li Dios, tento nak tixpab nak taq'uehek' re xban li Dios. Moco yal ta xcab rix xch'ol nak tixtz'ama. Tixtz'ama ban chi anchal xch'ol. Li ani yal xcab rix xch'ol tixtz'ama li c'a'ru taraj re li Dios, a'an chanchan li palau inc'a' tuktu ru. Lix ch'ol li jun a'an chanchan li palau ec'asinbil xban li ik' ut nac'ame' yalak bar. ⁷ Cui yal xcab rix xch'ol nak tixtz'ama, mixc'oxla nak tixc'ul li c'a'ru naxtz'ama re li Dios. ⁸ Li ani cuib ru lix ch'ol, junpat naxjal xc'a'ux riq'un li c'a'ru naxc'oxla xbanunquil. ⁹ Junak li herman, usta mac'a' cuan re, chisahok' sa' xch'ol xban nak a'an k'axal lok' chiru li Dios. ¹⁰ Jo'can ajcui' junak biom chisahok' sa' xch'ol usta nasach chixjunil li c'a'ru cuan re xban nak lix biomal mac'a' na-oc cui' chiru li Dios. Li biomal chanchan li utz'u'uj nak na-oso'. ¹¹ Li utz'u'uj nachakic xban li sak'e ut nat'an'e'. Jo'can ajcui' li cuan xbiomtal. A'an tacamk usta toj yok chixsic'bal xtz'akob lix biomal.

Li xyalbal rix li kapabal

¹² Us xak reheb li neque'xcuy xnumsinquil li raylal ut inc'a' neque'ch'inan xch'ol. Li ani naxcuy xnumsinquil li yalec' te'xc'ul lix matan li naxyechi'i li Dios reheb li neque'rahoc re. Ut lix mataneb, a'an li yu'am chi junelic. ¹³ Li ani nayale' rix lix pabal mixc'oxla nak a' li Dios naq'uehoc re chi alec. Li Dios ma' ani naxq'ue chi alec chi moco naalec xban li inc'a' us. ¹⁴ Li alec nachal sa' xben li junjunk li naxq'ue rib chi balak'ic xban li naxrahi ru. ¹⁵ Riq'un xrahinquel ru li c'a'ru inc'a' us, naticla li mac. Ut nak ac xnumta li mac nachal li camc. ¹⁶ Ex inherman, mebalak'i erib chixc'oxlanquil nak li Dios naq'uehoc chak re li alec sa' eben. ¹⁷ Xban nak chixjunil li c'a'ak re ru tz'akal chabil a' li Dios sa' choxa naq'uehoc chak ke. Li Dios quiyiban re li nacutanobresin ru li choxa. Li Dios macua' jo'li sak'e namoy ru. Li Dios inc'a' naxjal lix na'leb. A'an ban chi junelic. ¹⁸ Xban nak jo'can quiraj li Dios, jo'can nak quixye nak chiru li Dios chanchano li xben ru li racuimk li quixyo'obtesi chak.

Chikapab chi tz'akal li rqtin li Dios

¹⁹ Ex inherman, raroquex inban. Laex ac nequenau li xyalbal a'in. Jo'can nak cheq'uehak ech'ol chi abinc. Chec'oxla chi us li oc ere chixyebal ut mexjosk'o'. ²⁰ Xban nak cui nocojosk'o', inc'a' nakabanu li c'a'ru naraj li Dios. ²¹ Jo'can ut nak checanabak xbanunquil li c'a'ru inc'a' us ut chixjunil li mausilal. Ut chec'ulak sa' xy'alal li rqtin li Dios li q'uebil ere. Chicanaq sa' ech'ol xban nak li rqtin cuan xcuanduil re ecolbal. ²² Chepabak ut

chebanuhak li c'a'ru naxye li ratin li Dios. Mebalak'i ərib chixc'oxlanquil nak tz'akal riq'uin ca'aj cui' rabínquil li ratin. Tento ban ajcui' xbanunquil li naxye li ratin li Dios. ²³ Li ani narabi li ratin li Dios ut inc'a' naxbanu li naxye, a'an chanchan jun li cuink narii li ru sa' lem. ²⁴ Ut nak ac xril li ru, naxic ut sa' junpat nasach sa' xch'ol chanru na-iloc. ²⁵ Lix chak'rab li Dios tz'akal re ru ut riq'uin xpabanquil a'an nakatau li kacolbal. Li ani naxq'ue xch'ol chixtzolbal lix chak'rab li Dios inc'a' nasach sa' xch'ol li c'a'ru naxtzol. Naxbanu ban li naxye. Ut osobtesinbil xban li Dios riq'uin li c'a'ru naxbanu. ²⁶ Cui junak naxc'oxla nak tz'akal aj pābanel, ut inc'a' naxq'ue retal li c'a'ru naxye, li jun a'an naxbalak'i rib xjunes rib ut lix pābal mac'a' na-oc cui'. ²⁷ Aban chiru li Acuabej Dios, li napaban chi tz'akal ut mac'a' xpaltil, a'an li natenk'an reheb li neba' ut li xmalca'an sa' lix raylaleb. Ut inc'a' naxbanu li māusilal li neque'xbānu li toj mají' neque' pāban.

2

Inc'a' takasic' ru li ani takara

¹ Ex inherman, laex nequepāb li Kacua' Jesucristo, li k'axal nim xlok'al. Jo'can nak junakiqueb nak terileb le ras eritz'in. Moco jun ta sa teril ut jun ta inc'a'. ² Mare te'cuulak cuibak li cuink bar ch'utch'uquex cui' chixlok'oninquil li Dios. Mare li jun k'axal chabil xtikibanquil ut cuan xmatk'ab oro. Ut li jun chic mare neba' ut k'el li rak'. ³ Mare ca'aj cui' li chabil xtikibanquil teq'ue sa' xnak' eru ut teye re: Chunlan arin sa' li chabil na'ajej. A'ut li neba' teye re: Chunlan arin sa' ch'och' malaj ut canakat chi xakxo toj le'. ⁴ Cui jo'can nequebanu naraj naxye nak cuan nequera ut cuan inc'a'. Yoquex chixsic'bal ru li junjunk. Cui jo'can yoquex, inc'a' us le na'leb. ⁵ Ex inherman, raroquex inban. Abihomak li tinye ere. Li Dios quisic'oc ruheb li neba' sa' ruchich'och'. Abanan li neba' bimoeb chiru li Dios xban nak neque'xpāb li Cristo ut te'xc'ul lix nimal xcuanquil li quixyechi'i li Dios reheb li neque'rahoc re. ⁶ Laex nequetz'ektañahab li neba' ut neque'ue xlok'aleb li biom. ¿Ma inc'a' ta bi' neque'ue retal nak li biom, a'aneb li neque'rahobtesin ere? Ut ¿ma mācua'eb ta bi' li biom li neque'c'amoc ere sa' rakleb atin? ⁷ ¿Ma mācua' ta bi' a'aneb li neque'majecuan re lix lok'laj c'aba' li Cristo, li nequec'aba'in laex? ⁸ Tz'ibānbil sa' li Santil Hu li chak'rab li k'axal nim xcuanquil. A'an naxye: Chara la cuas acuitz'in jo' nak nacara acuib lāat. Cui jo'can nequebanu tz'akal re ru yoquex chixbanunquil. ⁹ Cui laex nequesic' ru li ani nequera, mac yoquex chixbanunquil. Ut yoquex chixk'etbal li chak'rab. ¹⁰ Li ani naxpab chixjunil li chak'rab, abanan cui naxk'et junak reheb li chak'rab, riq'uin a'an xk'et chixjunil. ¹¹ Li Dios quixye: Matmuxuc caxar. Ut quixye ajcui': Macamsi acuas acuitz'in. Li aní inc'a' namuxuc caxar, abanan cui xcamsi li ras ritz'in, riq'uin xbanunquil a'an, naxk'et li chak'rab. ¹² Jo'can ut chebanuhak li us ut chech-atinak sa' xyalal xban nak anakcuan cuanquex chic rubel lix chak'rab li Cristo li naq'uehoc colba-ib. ¹³ Li ani inc'a' naruxtana ru li ras ritz'in inc'a' ajcui' tauxtānāk ru xban li Dios sa' li rakba atin. Ut li ani taruxtāna ru li ras ritz'in, tauxtānāk ajcui' ru xban li Dios.

Mac'a' na-oc cui' li kapab' cui inc'a' nakabānu li us

¹⁴ Ex inherman, ¿c'a'ru aj e nak tixye junak nak a'an aj pābanel cui inc'a' yo chixbanunquil li us? Cui jo'can yo chixbanunquil, mac'a' na-oc cui' lix pābal. Moco naru ta tacolek' xban. ¹⁵ Mare cuan junak kech aj pābanelil mac'a' cuan re. Mac'a' rak' ut mac'a' xcua. ¹⁶ Ut lao nakaye re: Chacuil acuib. Tz'ap acuib chi us ut chatcua'ak chi us. Ut cui mac'a' nakaq'ue re,

mäc'a' na-oc cui' li jo' q'uial nakaye re. ¹⁷ Jo'can ajcui' nakac'ul riq'uin li kapabal. Cui nakaye nak nakapab li Cristo ut inc'a' nakabanu li us, camenak li kapabal. Mac'a' na-oc cui'. ¹⁸ Mare cuan junak tixye: Cuan li neque'xpab li Cristo ut cuan ajcui' li neque'xye nak tz'akal riq'uin xbanunquil li us. Abanan lajñ tinc'ut chäcuu nak ninpab li Cristo riq'uin li us ninbanu. Ut laat, ¿chanru nak tac'ut chicuu nak cuan apabal cui inc'a' nacabánu li us? ¹⁹ Laat nacapab nak li Dios jun ajcui'. Us ajcui' nak nacapab. Aban jo'can ajcui' eb li maus aj musik'ej neque'xpab nak jun ajcui' li Dios cuan ut neque'sicsot xban xxiuhéb. ²⁰ Mac'a' ana'leb. ¿Jok'e tatau xyalal chi tz'akal? ¿Ma inc'a' nacaq'ue retal nak cui inc'a' nacabánu li us, mac'a' na-oc cui' la pabal? ²¹ C'oxlan ca'ch'inak chirix laj Abraham li kaxe'tonil yucua' nak quixq'ue laj Isaac li ralal chok' xmayej sa' xben li artal. Ut riq'uin a'an li Dios quixye nak tic xch'ol laj Abraham. ²² ¿Ma inc'a' nacaq'ue retal nak laj Abraham quixbanu li us ut riq'uin a'an quic'utun lix pabal? Ut riq'uin li quixbanu quitz'akloc ru lix pabal. ²³ Ut quic'ulman jo' naxye sa' li Santil Hu: Laj Abraham quixpab li Dios ut riq'uin a'an li Dios quixye nak tic xch'ol. Ut xban a'an nayeman nak laj Abraham raro xban li Dios. ²⁴ Laex neque'qe retal nak macua' ca'aj cui' riq'uin xpabánquil li Dios nak tic li kach'ol chiru li Dios. Riq'uin aj ban cui' xbanunquil li us. ²⁵ Lix Rahab, a'an xcomoneb li iixk li neque'xc'ayi rib nak quicuan. Abanan quixtenk'aheb laj q'uehol etal chixsic'bal jalan chic be re nak te'xcol ribeb. Riq'uin li usilal quixbanu lix Rahab, li Dios quixye nak tic xch'ol. ²⁶ Junak tz'ejualej mac'a' chic xmusik', mac'a' na-oc cui' xban nak camenak chic. Jo'can ajcui' li kapabal. Cui inc'a' nacabánu li us, mac'a' na-oc cui'.

3

Tento takaq'ue retal li c'a'ru takaye

¹ Ex inherman, moco chixjunil ta te'xq'ue rib sa' li c'angel naxbanu laj tzolonel xban nak nim li ik cuan sa' xben ut cau tarakek' atin sa' xbeneb cui inc'a' neque'xbanu li c'a'ru neque'xye. ² Chikajunilo lqo nocopalto' chi coc' aj sa'. Cui cuan junak mac'a' xpaltíl riq'uin li ratin, a'an tz'akal re ru. Li ani naru naxcuy rib riq'uin li naxye, naru ajcui' naxcuy rib riq'uin li c'a'ru naraj xbanunquil. ³ Lao nakaq'ue jun li ch'ich' sa' re li cacuay re nak taabink chiku ut riq'uin li ch'ich' a'an nakaberesi li cacuay. ⁴ Cheq'uehak retal li jucub. Usta k'axal nim ut nac'am'e' xban li cacu'il ik', aban cuan jun ch'ina ch'ich' naberesin re. Ut riq'uin li ch'ich' a'an laj ch'e'ol re naru naxc'am li jucub bar naraj xc'ambal. ⁵ Jo'can ajcui' li ru'uj ak'. K'axal ca'ch'in aban nanumta naxye. Chanchan li xam. Riq'uin yal jun ratz'um li xam tanak sa' junak q'uiche' tixc'at chixjunil li q'uiche'. ⁶ Numtajenak xiyibal ru naxye li ru'uj ak'. Chanchan lix mausilal li ruchich'och'. Li ru'uj kak', a'an jun xcha'al li katz'ejcual k'axal ca'ch'in; aban riq'uin li mausilal naxye, naxpo' kana'leb. Lix mausilal nachal chak sa' xbalba ut naxpo' kana'leb sa' kayo'lajic toj chalen sa' li kacamic. ⁷ Naru xtulanobresinquel chixjunil li xul, jo'li neque'bec, li neque'ruplic, li neque'xjucuqui rib ut li neque'cuan sa' ha'. Li cuink ac xtulanobresi q'uila pay chi xul. ⁸ Aban li ru'uj ak' ma ani naru natulanobresin re. Li ru'uj ak', a'an jun li inc'a' us. Ma ani naru nak'usuc re. Li naxye li ru'uj ak' chanchan xmay li c'anti' li nacamsin. ⁹ Riq'uin li ru'uj kak' nakalok'oni li Acuabej Dios ut riq'uin ajcui' li ru'uj kak' nakamajecua li kas kitz'in ut eb a'an yo'obtesinibileb xban li Dios jo' li rilobal. ¹⁰ Riq'uin lix tz'umal ke nakalok'oni li Dios ut riq'uin ajcui' lix tz'umal ke nocomajecuan. Ex inherman, inc'a' us cui takabánu chi jo'can. ¹¹ Cheq'uehak retal. Sa' junak yu'am ha' inc'a' naru na-el chak ca' pay chi ha'. Cui na-el li chabil ha' inc'a'

naru na-el chak li atz'am xsa', chi moco naru na-el chak li chabil ha' sa' li atz'am xsa'. ¹² Ex inherman, lix che'el li higo, ¿ma naru naruchin li aceituna? Ut lix che'el li uva, ¿ma naru naruchin li higo? Inc'a'. Jo'can ajcui' sa' li yu'am ha' atz'am xsa', inc'a' naru na-el li chabil ha'.

Li chabil na'leb nachal chak riq'uin li Dios

¹³ Li ani cuanqueb xna'leb sa' eyank ut neque'xnau xyalal chi us, che'xc'utak sa' tulanil lix chabilaleb a' yal chanru lix na'lebeb. ¹⁴ Cui toj cuan li c'ahinc ut li cakalinc eriq'uin, menimobresi erib chixyebal nak cuan ena'leb. Riq'uin xbanunquil a'an yoquex chi tic'ti'ic ut xmukbal li xyalal. ¹⁵ A'an macua' li na'leb naxq'ue li Dios. Xna'leb ban li ruchich'och'. A'an yal xc'a'uxeb cuink ut q'uebil xban laj tza. ¹⁶ Bar nacuan cui' li cakalinc ut li k'etk'etil, aran ajcui' nacuan po'oc ch'olej ut yalak c'a'ru chi mausilalil. ¹⁷ Li ani q'uebileb xna'leb xban li Dios, tz'akal re ru lix yu'ameb. Cuanqueb sa' usilal, chabilib ut tulaneb. Neque'uxtānan u, neque'xbānu li us, ut inc'a' neque'balak'in. Junelic yal neque'atina. ¹⁸ Li q'uebileb xna'leb xban li Dios cuanqueb sa' usilal ut neque'xtenk'a ajcui' li ras ritz'in chi cuanc sa' usilal.

4

Inc'a' takajunaji kib riq'uin lix mausilal li ruchich'och'

¹ ¿C'a'ut nak toj cuan pletic ut cuech'inc ib sa' eyank? ¿Ma inc'a' ta bi' riq'uin xrahinquel ru li inc'a' us nequetiquib pletic? ² Laex nequerahi ru li c'a'ak re ru ut xban nak inc'a' nequetau li c'a'ru nequerahi ru, nequecamsi eras eritz'in re nak tetau. Nacako' ech'ol xban nak inc'a' nequetau li c'a'ru nequeraj ut xban a'an junes pletic nequebanu. Ut xban nak inc'a' nequetz'ama re li Dios li c'a'ru nequeraj, jo'can nak inc'a' naxq'ue ere. ³ Ut nak nequextz'aman chiru li Dios, inc'a' nequec'ul xban nak inc'a' nequetz'ama jo' naraj li Dios. Inc'a' nequec'ul xban nak nequetz'ama yal re xsachbal sa' li jo' majo'il na'leb. ⁴ Laex chanchanex li neque'xmux ru lix sumlajic xban nak laex nequera ru li mac. Macua' li Dios nequec'oxla. Cui laex nequera ru li cuanc sa' lix mausilal li ruchich'och' xic' yoquex chirilbal li Dios. ⁵ Cuan xyalal nak tz'ibānil chi jo'ca'in sa' li Santil Hu: Li Santil Musik'ej li quixq'ue li Dios chi cuanc kiq'uin, a'an k'axal nocoxra ut a'an naraj nak ca'aj cui' li Dios takalok'oni. ⁶ Li Dios k'axal numtajenak cui'chic li rusilal naxq'ue ke. Li Santil Hu naxye nak li Dios inc'a' nacuulac chiru li neque'xnimobresi rib. Abanan li Dios naxq'ue li rusilal reheb li tulaneb. (Pr. 3:34) ⁷ Jo'can nak chek'axtesihak erib re li Dios. Chexnumtak sa' xben laj tza ut a'an taq'elik cheru. ⁸ Cauhak ech'ol riq'uin li Dios ut li Dios tatenk'ank ere. Laex aj mac, jalomak ec'a'ux. Mebanu chic li mausilal. Jo'can ajcui' laex li yal cuib ech'ol sa' le pabal, yot'omak ech'ol ut jalomak ec'a'ux re nak li Dios tixt'cobresi le ch'ol. ⁹ Chirahok' ech'ol, chiyot'ek' ech'ol ut chexyabak xban li mausilal li nequebanu. Macua' raj se'ec nequebanu; yabac raj nequebanu xban nak inc'a' us le yehom ebanuhom. Ut inc'a' raj nasaho' sa' ech'ol. Naraho' raj ban sa' ech'ol. ¹⁰ Checubsihak erib chiru li Dios ut a'an tixq'ue ecuanquil.

Inc'a' takacuech'i rix li kech aj pabanelil

¹¹ Ex inherman, mecuech'i rix le rech aj pabanelil xban nak ani naxcuech'i rix li rech aj pabanelil naxcuech'i ajcui' rix lix chak'rab li Dios ut naxq'ue rib chok' aj rakol atin. Li kac'anjal macua' re xcuech'bal rix li chak'rab; re ban xpabanelil. ¹² Jun ajcui' li quiq'uehoc re li chak'rab ut ca'aj cui' a'an naru narakoc atin. A'an li nacoloc ut a'an ajcui' li nasachoc. Jo'can nak laat inc'a' naru nacatrakoc atin sa' xben la cuas acuitz'in.

Inc'a' nakanau c'a'ru takac'ul cuulaj ca'bej

¹³ Anakcuan abihomak li tinye ere laex li nequexyehoc re chi jo'ca'in: Hon malaj cuulaj toxic sa' jalan chic tenamit ut aran tocuañk chak jun chihabak. Aran toyacok ut taçuank katumin chi us. ¹⁴ Aban laex inc'a' nequenau c'a'ru tec'ul cuulaj ca'bej xban nak li kayu'am chanchan li chok. Junpat ajcui' nacuan ut junpat chic ac mact'a' chic. ¹⁵ Jo'ca'in raj teye: Cui li Dios naraj, tixq'ue kayu'am ut takabau li bar cuan nakac'oxla xbanunquil. ¹⁶ A'ut laex nequenimobresi erib chixyebal li c'a'ru nequec'oxla xbanunquil. Inc'a' us nequebanu nak nequenimobresi erib. ¹⁷ Li naxnau xbanunquil li us, ut inc'a' naxbanu, a'an mact'a' naxbanu.

5

Xch'olobanquil xna'lebeb li biom

¹ A'ut anakcuan, ex biom, cherabihak li oc cue chixyebal. Chiyot'ek' ech'ol ut chexyabak xban li raylal chalc re sa' ebeen. ² Le biomal taosok'. Mac'a' chic taoc cui'. Jo'can ajcui' le chabil ak' tac'uxek' xban li xulel. ³ Ut tam'o'rnk le tumin. Mac'a' chic taoc cui'. A'an retalil nak laex tex-osok' ajcui' jo' nak noso' li xam. Laex yoquex chixtambresinquil le biomal ut inc'a' nequeq'ue retal nak c'ulunc re roso'jic li cutan. ⁴ Laex yoquex chixxocbal etumin ut inc'a' nequeq'ue xtojbaleb li que'k'oloc eriq'uin. Eb a'an yoqueb chi k'okonc ut li nimajcual Dios yo chiribal xtok'obal ruheb nak yoqueb chi k'okonc li que'c'anjelac eriq'uin. ⁵ Arin sa' ruchich'och' cuan nabal le biomal ut mac'a' napalto' ere. Junelic sa nequenumsi li cutan. Chanchanex li cuacax ch'olaninbil chi us re tacamsik xban nak le yu'am laex, taosok'. Tacuulak xk'ehil nak tarakek' atin sa' ebeen. ⁶ Laex quexrakoc atin sa' xbeneb li tiqeb xch'ol ut quecamsiheb. Ut eb a'an mact'a' que'xbanu ere.

Xcuybal xnamsinquil li raylal

⁷ Jo'can ut ex herman, checuyak roybeninquil lix c'ulunic li Kacua' Jesucristo. Jo' laj c'alom naxcuy roybeninquil jok'e nat'ane' li hab re nak taquik ut naxcuy ajcui' roybeninquil nak nacuulac xk'ehil li k'oloc re nak tixk'ol ru li racuimk. ⁸ Jo'can ajcui' laex checuyak oybeninc ut mech'inan ech'ol. Cacuubresihomak ban ech'ol xban nak li Kacua' chi seb tachalk cui'chic. ⁹ Ex herman, meucech'i erib cheribil erib re nak inc'a' tarakek' atin sa' ebeen. Li Jesucristo a'an laj rakol atin ut chi seb tac'ulunk cui'chic. ¹⁰ Ex herman, chetzolak erib riq'uineb li profeta li que'cuyuc chak xc'ulbal li raylal xban xyebal resil li Kacua'. ¹¹ Lao nakaye nak us xak reheb li neque'cuyuc raylal. Xerabi resil chanru nak laj Job quixcuy xnamsinquil li raylal. Ut nequenau nak mokon li Dios quirosobtesi. Li Kacua' Dios na-uxtanan ut natok'oban u. ¹² Ex inherman, cuan chic jun li na'leb tento tenau ut a'an a'in: nak texatinak, mepatz' xc'aba' li Dios sa' pac'ba atin, chi moco sa' xc'aba' li choxa, chi moco sa' xc'aba' li ruchich'och', chi moco chepatz' sa' xc'aba' li c'a'ak re ru cuan. Cui teye nak yal, junes yal teye, ut nak teye inc'a', junes inc'a' teye re nak inc'a' tarakek' atin sa' ebeen xban li Dios.

Takapab nak takac'ul li nakatz'ama re li Dios

¹³ Cui cuan junak sa' eyank cuan sa' raylal, chitijok chiru li Dios. Ut cui cuan junak sa sa' xch'ol, chixbicha xlok'al li Dios. ¹⁴ Cui cuan junak yaj sa' eyank, tixtakla xbokbaleb li chequeb sa'lix pabal, re nak te'tijok riq'uin ut te'xq'ue ca'ch'inak li aceite sa' xben sa' xc'aba' li Kacua' Jesucristo. ¹⁵ Cui te'xpab nak li Dios tixq'uirtesi li yaj nak te'tijok, li Kacua' taq'uirtesink re ut tixcuaclesi cui'chic. Ut cui cuan xmac, tacuyek' tasachek' ajcui' lix mac. ¹⁶ Chech'olobak

bi' le mactheribil erib ut chextijok cheribil erib re nak texq'uirtesik. Li ani tic xch'ol natijoc chi anchal xch'ol ut lix tij na-abic xban li Dios. ¹⁷ Li profeta Elías, a'an yal cuink jo' lao. Quitijoc chi anchal xch'ol ut quixtz'ama chiru li Dios nak inc'a' tixq'ue li hab. Ut inc'a' quixq'ue li hab sa' ruchich'och' chiru li oxib chihab riq'uin cuakib po. ¹⁸ Ut nak quitijoc cui'chic, quixtz'ama nak tixq'ue li hab. Ut quixq'ue li hab ut li acuimk qui-el cui'chic sa' ruchich'och'. ¹⁹ Ex inherman, mare cuan junak sa' eyank tixcanab xpabankuil lix yatal, ut mare junak chic aj pabanel tasuk'isink cui'chic re sa' lix pabal. ²⁰ Chenauhak laex nak li ani tixsuk'isi chak junak li ras ritz'in sa' xyalal re nak tixcanab xbanunquil li mac, a'an tixcol li ras ritz'in chiru li cämc. Ut sa' xc'aba' li jun a'an, nabal li mactacuyek' täsachek' xban li Dios.

Li Xben Hu li Quixtz'iba li San Pedro

Xq'uebal xsahil xch'oleb

¹ Lain laj Pedro. Lain x-apóstol li Kacua' Jesucristo. Yoquin chi tz'ibac eriq'uin laex, li xejeq'ui ərib sa' li junjunk chi na'ajej. Yal nūmec' yoquex xban nak mācua' etenamit li cuanquex cui', laex li cuanquex sa' xcuent Ponto, ut sa' xcuent Galacia ut Capadocia, jo' ajcui' li cuanquex sa' xcuent Asia ut Bitinia. ² Ac najter k'e cutan qui-ala chak sa' xch'ol li Dios Acuabej nak laexak li sic'bil eru xban. Santobresinbilakex chic xban li Santil Musik'ej re nak tex-abjuk ut texpabank chiru li Jesucristo. Cuybilak chic le māc xban xquiq'uel li Jesucristo. Ut chi cuank taxak chi nabal li rusilal li Dios eriq'uin ut li tuktuquilal sa' eyank.

Nakayo'oni jun ac'y'u'am mac'a' roso'jic

³ Lok'oninbil taxak li Dios Acuabej, lix Yucua' li Kacua' Jesucristo. Sa' xc'aba' lix nimal ruxtan, coyo'la cui'chic xca' cua. Xban nak li Jesucristo quicuaci cui'chic chi yo'yo sa' xyānkeb li camenak, nakayo'oni li ac' y'u'am li māc'a' roso'jic. ⁴ Yoco chixyo'oninquel li kamatan li tixq'ue ke li Dios. Li matan a'in inc'a' nalaj inc'a' na-oso'. C'ulanbil sa' choxa. Aran māc'a' tamuxuk ru ut ma' jaruj taosok'. ⁵ Xban nak nocopaban, li Dios li k'axal nim xcuanyl nocoril chi junelic re nak tocolek'. Li colba-ib a'in tac'utbesik chi tz'akal re ru sa' roso'jic li cutan. ⁶ Usta tec'ul nabal pay ru li raylal re xyalbal rix le pabal sa' ruchich'och' a'in, chisahok' sa' le ch'ol xban nak ac colbilex chic. ⁷ Tento nak tayalek' rix le pabal re nak tac'utunk ma tz'akal re ru. Li pabal k'axal cui'chic lok' chiru li oro na-oso'. Li oro numansic sa' xam re ríbal ma chabil. Jo'can ajcui' nak tento xyalbal rix le pabal ma tz'akal re ru. Cui tz'akal re ru le pabal, tex-oxlok'ik ut tanimāk eru ut taq'uehek' elok'al nak tixc'utbesi cui'chic rib li Jesucristo. ⁸ Nequeru li Cristo usta inc'a' nequeril ru. Nequepab li Cristo, usta inc'a' erilom ru. K'axal cui'chic numtajenak xsahil sa' ech'ol chixpabanquil. Ut inc'a' nequetau junak atin re xch'olobanquil lix sahil ech'ol xban nak k'axal lok'. ⁹ Ut lrix k'ajcamunquil le pabal, a'an le colbal. ¹⁰ Eb li profeta junxilaj que'xch'olob chak xyālal li usilal a'in q'uebil ere. Que'xtz'il rix ut que'patz'oc chirix li colba-ib a'in. ¹¹ Eb li profeta que'xye resil li raylal tixc'ul li Cristo ut lix nimal xlok'al li tac'utbesik mokon. Que'xq'ue xch'ol chixsiq'uinqul ani tz'akal li Cristo. Que'xsic' xyālal jok'e ut c'a'ru chi cutanil tac'ulmāk li yo chi c'utbesic chiruheb xban li Santil Musik'ej. ¹² Li c'a'ru quixc'utbesi chak li Dios chiruheb li profeta junxil inc'a' tac'ulmāk nak toj cuanqueb a'an. Tac'ulmāk ban sa' li cutan nak cuanquex laex. Eb li profeta que'xch'olob cheru li xyālal a'in, li quic'ute' chak chiruheb xban li Santil Musik'ej li taklanbil chak xban li Dios. Ut eb li ángel que'raj ajcui' raj xtaubal ru chixjunil li c'a'ak re ru a'in.

Tento nak tocuank sa' tiquilal

¹³ Xban nak yoquex chiroybeninquel le k'ajcamunquil, chi ajk ru le c'a'ux. Chi cuank chi tuktu le ch'ol. Ut chi anchal ech'ol cheroybeni li usilal li tixq'ue ere li Jesucristo nak tixc'utbesi cui'chic rib. ¹⁴ Chex-abjuk chiru li Dios xban nak laex ralal xc'ajol. Mebanu chic li nequerahi ru junxil nak toj maji' nequenau li xyālal. ¹⁵ Aban ticak taxak le ch'ol ut chabilak taxak le yehom ebanuhom xban nak tuc' xch'ol li Dios li quisic'oc eru chok' ralal xc'ajol. ¹⁶ Jo' tz'ibanol retaliil sa' li Santil Hu: Santakex laex xban nak santin

lain, chan li Dios. (Lv. 11:44-45) ¹⁷ Laex nequeye “at in Yucua” re li Dios nak nequextijoc. Ut li Dios natz’iloc atin chirix li junjunk a’ yal chanru lix yehom xbanuhom. A’an inc’ a’ naxsiq’ueb ru. Jun xiquiç ban naxbanu. Jo’can nak chexuqaq ru li Dios junelic, a’ yal jo’ najtil texcuqan sa’ li rúchich’och’ a’in. ¹⁸ Laex nequenau nak xban li Dios colbilex chic chiru li jo’ majo’il na’leb li quilaje’xc’ut chak cheru le xe’tonil yucua’. Moco colbilex ta riq’uin c’ a’ak re ru na’oso’ jo’ li oro ut li plata. ¹⁹ Colbilex ban riq’uin xlok’laj quiq’uel li Cristo. Li Cristo, a’an li quixmayeja rib chiru li Dios Acuabej jo’ jun li carner namayejac chi mac’ a’ rec’ ut chi mac’ a’ xpaltí. ²⁰ Relic chi yal nak toj maji’ nayo’obtesic chak li rúchich’och’ ac ch’olch’o chiru li Dios nak li Cristo sic’bil ru ut xakababil re tacamk. Ut anakcuan xcuulac xk’ehil nak li Cristo xc’utbesi rib xban erabal laex. ²¹ Sa’ xc’aba’ li Cristo yoquex chixpabanquil li Dios, li quiuacalesin cui’chic re li Cristo chi yo’yo sa’ xyankeb li camenak ut quiqx’ue xlok’al. Jo’can nak xepab ut ca’aj cui’ riq’uin li Dios nequexo’onin. ²² Sa’ xc’aba’ li Santil Musik’ej ch’ajobresinibil le ram riq’uin nak nequepab li tz’akal yal. Riq’uin a’in naru teraheb li herman ut inc’ a’ t’era erib chi yal xcab rix ech’ol. Tera ban erib chi tz’akal. ²³ Laex yo’lajenakex chic xca’ cua chi ac’ chic le yu’am. Li yu’am a’in mactua’ xq’uehom le na’ eyucua’. Li yu’am a’an na’oso’. Abanan li ac’ yu’am natauman riq’uin xpabanquil ratin li Dios. Yo’yo ut cuan chi junelic. ²⁴ Sa’ li Santil Hu tz’ibanbil retaliil chi jo’ca’ in: Lix yu’am li cristian sa’ rúchich’och’, a’an chanchan li pim. Nachakic ut na’oso’. Ut lix lok’al chanchan ratz’um li pim. Nachakic nat’ane’ ut na’oso’. (Is. 40:6-8)

²⁵ Aban li ratin li Dios, a’an cuan chi junelic.
Ut li atin a’in, a’an resil li colba’ib li yebil chak ere.

2

¹ Xban nak ac’ chic le yu’am, cherisihak sa’ le ch’ol chixjunil li mausilal. Mexbalak’ic chic. Tecanab li ca’pac’al u. Mexcakalin chic ut tecanab ajcui’ li yo’obanc atin. ² Li c’ula’al nak toj nayo’la naraj ru tu’uc. Us raj nak jo’cano taxak lao riq’uin ratin li Dios. Takaj taxak ru xtzolbal ratin li Dios xban nak a’an li tz’akal yal. Tocacuuk taxak sa’ li kapab’al ut tz’akalako taxak chiru li Dios re nak tocolek’. ³ Cui yoquex chixbanunquil a’in, ac nequenau nak li Kacua’ chabil.

Li Cristo, a’an xxe’ li kapab’al

⁴ Chalkex riq’uin li Cristo, li yo’yo chi junelic. Eb li cristian que’xtz’ektana li Jesucristo li k’axal lok’ li sic’bil ru xban li Dios chixq’uebal kayu’am. Li Jesucristo xakababil xban li Dios chi c’anjelac jo’ jun nimla pec k’axal chabil li na’oc chok’ xxe’ li cab. ⁵ Ut laex chanchanex li coc’ pec li na’oc sa’ li tz’ac. Xban li rusilal li Jesucristo, naru texc’anjelak chiru li Dios jo’ eb laj tij li neque’mayejac chiru li Dios. Li mayej li k’axal lok’, a’an nak tek’axtesi erib sa’ruk’ li Dios. Ut le mayej nac’ule’ xban li Dios sa’ xc’aba’ li Jesucristo. ⁶ Tz’ibanbil retaliil sa’ li Santil Hu li quixye li Dios chirix li Cristo nak quixye chi jo’ca’ in:

Lain xinsic’ ru li Colonel jo’ nak laj tz’ac naxsic’ ru li chabil pec chok’ xxe’ li cab. Xinsic’ ru chok’ xxe’ le pabal. Li ani tapabank re inc’ a’ tach’imank xch’ol. (Is. 28:16)

⁷ K’axal lok’ li Cristo chok’ ere laex li ac xexpaban. Abanan chok’ reheb li maji’ neque’pabán, mac’ a’ na’oc cui’. Tz’ibanbil retaliil sa’ li Santil Hu chi jo’ca’ in:

Li pec li quitz’ektanac xbaneb laj cabanel, a’an li pec li k’axal chabil li quiq’uehe’ chok’ xxuc li cab. (Sal. 118:22)

8 Ut tz'ibānbil ajcui' sa' li Santil Hu chi jo'ca'in:
 A'an ut li pec li que'xtich cui' li rokeb. A'an li pec li nat'anoc. (Is. 8:14-15)
 Li cristian li neque'xtich rokeb chiru, a'aneb laj k'etol ratin li Dios. Ac
 ch'olch'o nak te'xc'ul lix tojbal lix māc xban nak neque'xtz'ektāna li Cristo.

Læx ralal xc'ajol li Dios

9 Læx sic'bil eru xban li Dios. Sic'bil eru chi c'anjelac chiru li Dios jo' nak
 neque'c'anjelac laj tij. Læx lix tenamit li Dios ut santobresinbilex. Læx chic
 ralal xc'ajol li Dios. Sic'bil eru chixyebal resil lix nimal xcuauquil li Dios. Li
 Dios quexrxi sa' xk'ojyinal ru li māc ut anakcuan cuanquex chic sa' xcutan
 xsaken. **10** Junxil mācuax'ralal xc'ajol li Dios. Aban anakcuan læx chic
 ralal xc'ajol. Junxil inc'a' nequenau lix nimal ruxtañ li Dios. Aban anakcuan
 nequenau chic.

Bokbilex chi c'anjelac chiru li Dios

11 Ex inherman, raroquex inban. Læx yal numelex arin sa' ruchich'och'.
 Lain nintz'ama cheru nak mebanu chic li mausilal li quebanu chak junxil
 xban nak a'an ca'aj cui' xpo'bal ru le c'a'ux naxbanu. **12** Chabilak taxak le
 na'leb chiruheb li maji' neque'pabán. Usta yokeb chixyebal nak inc'a' us le
 na'leb, aban cui tebānu li us, te'xq'ue retal ut te'xnima xlok'al li Dios nak
 tacuulak xk'ehil li rakba atin. **13** Sa' xc'aba' li Cristo chepabæk chixjunileb
 li chak'rab q'uebil xbaneb li cuink li neque'taklan sa' eben. Chexpabank
 chiru li acuabej xban nak a'an cuan sa' xcuauquil. **14** Ut chexpabank
 ajcui' chiruheb li taklambilx xban li acuabej chi rakoc atin sa' xbeneb li
 neque'xsic' xmac ut re ajcui' nak te'xq'ue xlok'al li chabileb xna'leb. **15** Li Dios
 naraj nak texcuank sa' xyalal. Nak te'r'il le tiquilal, li inc'a' useb xna'leb ut li
 inc'a' neque'xnau xyalal, inc'a' chic te'atinak cherix. **16** Libre chic cuankex.
 Abanan moco xban ta nak libre chic cuankex nak tex-oc chixbanunquil
 li mausilal. Cheq'uehak ban ech'ol chi c'anjelac chiru li Dios. **17** Laex aj
 pabanel, chera erib cheribil erib. Chexucuak ru li Kacua' Dios. Che-oxlok'i
 le ras eritz'in. Ut cheq'uehak xlok'al li acuabej.

Checuy li raylal jo'nak quixcuy li Cristo

18 Ex aj c'anjel chex-abink chiruheb le patrón ut che-oxlok'iheb. Moco ca'aj
 cui' ta chiruheb li tulaneb. Chex-abink ban ajcui' chiruheb li josk' aj patrón.
19 Cui nequec'ul junak raylal chi māc'a' emāc, osobtesinbilakex cui nequecuy
 xban nak yoquex chixpabankli Dios. **20** Cui nequecsaq'ue' xban nak xesic'
 emāc, ut nequecuy xnumsinquill, māc'a' xlok'al a'an. Abanan cui nequec'ul
 li raylal riq'uin xbanunquill li us ut nequecuy, a'an lok' chiru li Dios. **21** Li
 Dios naraj nak tebanu jo' quixbanu li Cristo. Li Cristo quixc'ul li raylal sa'
 ec'aba' læx. A'an quic'amoc be cheru re nak læx tecuy ajcui' xnumsinquill
 li raylal. **22** Li Cristo māc'a' xmac. Ut ma jun sut quibalak'in. **23** Nak quihobe'
 li Cristo, inc'a' quixsume ru. Ut nak yo'chixc'ulbal li raylal, māc'a' quixye.
 Inc'a' quixmajecuahel. Quixk'axtesi ban rib sa' ruk' li Dios, li narakoc atin
 sa' tiquilal. **24** Relic chi yal nak li Cristo, a'an li quixc'ul li raylal nak quicam
 chiru li cruz re xtojbal rix li kamac lao. A'an aj e nak quicam re nak inc'a'
 chic texmācokb. Texcuank ban sa' tiquilal. Li Cristo quixc'ul li yo'uec'
 sa' kac'aba' lao aj māc. Ut riq'uin li raylal li quixc'ul xexq'uirtesic. **25** Læx
 sachsoquex sa' le māc nak quexcuan chak. Chanchanex li carner sachenak
 li nacha'cha'i rib yafak bar chi māc'a' aj ilol re. Abanan anakcuan xexchal
 cui'chic riq'uin li Cristo ut a'an chic tajlok ere.

3

Xq'uebal xna'leb li ixakilbej jo' ajcui' li belomej

¹ Laex ixakilbej chex-abink chiru le belom. Cui cuanqueb li belomej li inc'a' neque'xpab li r̄atín li Dios, a'an te'xq'ue retal le chabilal ut te'xpab ajcui' li Dios eb a'an. K'axal us xc'utbal li chabilal chiru xch'olobanquil xyalal riq'un atin. ² Mare te'pabank le belom nak te'xq'ue retal nak neque-oxlok'iheb ut chabil ena'leb. ³ Mixic ech'ol riq'un xtikibankuil erib. Mesic' le ch'ina'usal yal riq'un xchabilal le rak'. Li tz'akal ch'ina'usal macua' riq'un xyibanquil le rismal chi k'axal ch'ina'us chi moco riq'un rocsinquel li oro. ⁴ Li tz'akal xch'ina'usal li junjunk, a'an lix tiquilal xch'ol ut lix tulanil. A'an inc'a' nəoso. Li tiquil ch'olej ut li tulanil, a'neb li k'axal lok' chiru li Dios. ⁵ Jo'can ajcui' que xbanu chak li chabil ixs li que'xpab li Dios najter. Que'xsic' lix ch'ina'usal riq'un li tuktuquilat li tulanil. Ut eb li ixs a'an que'abin ajcui' chiruheb lix belom ut que'x-oxlok'iheb. ⁶ Ut jo'can ajcui' quixbanu lix Sara. Qui-abin chiru laj Abraham lix belom. Ut quixye "Kacua' Abraham" re xban nak quix-oxlok'i. Jo'can ajcui' laex. Cui tebanu li usilal ut inc'a' texxucuak, laex ajcui' jo' li ralal xc'ajol lix Sara. ⁷ Ut laex belomej, chexcuank sa' xyalal riq'uineb le rixakil. Che-oxlok'iheb. Laex nequenau nak eb li ixs k'unes xch'ol ut mac'a'eb xmetz'euheb jo'eb li cuink. Laex tec'ul le matan xban rusilal li Dios. Jo'can ajcui' eb li ixs, te'xc'ul ajcui' lix mataneb. Ut li matan li tec'ul, a'an li yu'am chi junelic. Cui tebanu a'in, mac'a' tach'a'ajquink ere nak textijok.

Banuhomak li chabilal usta nequec'ul li raylal

⁸ Ut tinye ajcui' ere, chexcuank chejunilex chi junajak le ch'ol ut chi junajak le c'a'ux. Cherahak erib cheribil erib. Chetok'oba eru cheribil erib ut k'unak le ch'ol. ⁹ Nak te'xbanu mausilal ere, inc'a' tesume ru riq'un mausilal. Nak texhobek', mesume ru riq'un hoboc. Chebanuhak ban usilal reheb li neque'banun mausilal ere. Laex bokbilex chak xban li Dios re nak terechanli rosofesinquel. ¹⁰ Jo'ca'in naxye sa' li Santil Hu:
Li ani taraj cuanc chi sa' sa' xch'ol re tixnumsiheb li cutan sa' xyalal, inc'a' taqtinak riq'un yibru atin chi moco tatic'ti'ik.

¹¹ Jo'can nak checanabak xbanunquil li inc'a' us. Chebanuhak ban li us, jo' naraj li Dios. Ut cheq'uehak ech'ol chi cuanc sa' tuktuquil usilal ut inc'a' chic texpletik.

¹² Li Kacua' Dios narileb li tiqueb xch'ol. Ut junelic narabiheb nak neque'tijoc. Abanan yo xjosk'il li Kacua' sa' xbeneb li neque'banun re li mausilal. (Sal. 34:12-16)

¹³ Ma cuan ta bi'junak tarahobtesink ere cui nequeyal ek'e chixbanunquil li us? ¹⁴ Abanan cui cuan junak tarahobtesink ere xban nak yoquex chixbanunquil li usilal, osobtesinbilex xban li Dios. Mexucuahel ru li te'rahobtesink ere ut mi-oc ec'a'ux xbaneb. ¹⁵ Cheq'uehak ban xlok'al li Kacua' Jesucristo chi anchal ech'ol ut chek'axtesihak erib sa' ruk'. Chenauhak xsumenquil li te'raj patz'oc ere chirix le pabal. Ac cuank sa' le ch'ol c'a'ru tesumeheb cui'. Ut chesumehakeb sa' xyalal ut sa' tulanil. ¹⁶ Chexcuank sa' xyalal ut mebanu chic li mausilal re nak mac'a' tach'i'ch'i'ink ere sa' le c'a'ux. Usta chabil nequebanu xban nak nequepab li Cristo, abanan cuan li neque'atinac cherix. Eb a'an xutanal te'elk xban nak neque'k'aban. ¹⁷ Cui li Dios naraj nak tec'ul li raylal chi mac'a' emac, k'axal us nak tec'ul li raylal chi mac'a' emac chiru nak tec'ul li raylal riq'un xbanunquil li mausilal. ¹⁸ Li Cristo quixc'ul ajcui' li raylal chi mac'a' xmac. A'an tic xch'ol abanan quicamsic re xtojbal rix lix maqueb li inc'a' useb

xna'leb. Jun sut ajcui' quicam ut riq'uin a'an quitz'akloc ru. Ut xban xcamic li Jesucristo, naru toxcol li Dios. Yal nak que'xcamsi li Cristo. Abanan inc'a' quicam lix musik'. ¹⁹ Co ban chi atinac riq'uineb li musik'ej li cuanqueb chi tz'aptz'o. ²⁰ A'an ebli inc'a que'paban chak chiru li Dios junxil. Li Dios riq'uin xnimal xcuyum, quiroybeni nak te'pabank. Abanan inc'a' que'paban. A'an quic'ulman sa' ebli cutan nak laj Noé yo chixyibankanquil li nimla jucub cab. Inc'a' q'ui li que'paban ut que'oc chi sa' li jucub cab. Cuakxakibeb ajcui' que'cole' chiru li but'i ha'. Chixjunileb li jun ch'ol chic quilaje'cam. ²¹ Li but'i ha', a'an retalil li cubi ha' colbilex cui' anakcuan. Li cubi ha', a'an macua' re risinquil lix tz'ajnil li katibel. Cuan ban xyalal. A'an retalil nak cuybil sachbil chic li kamac. Ut nakatz'ama chiru li Dios nak chabilak li kac'a'ux. Colbilo xban nak quicuacli cui'chic chi yo'yo li Jesucristo. ²² Li Jesucristo, a'an quitake' sa' choxa ut anakcuan cuan sa' xnim uk' li Dios Acuabej xban nak k'axal nim lix cuanquil. Li Cristo cuan xcuانquil sa' xbeneb li ángel. Ut cuan ajcui' xcuانquil sa' xbeneb chixjunileb li musik'ej li cuanqueb xcuانquil.

4

Jo'cakex li chabil mertom riq'uin rusilal li Dios

¹ Li Cristo quixc'ul li raylal ut quirec'a tz'akal li raylal sa' kac'aba' lao. Jo'can nak chikaq'ue ajcui' kach'ol lao chixcuybal li raylal. Julticak ere nak mac'a' chic xcuانquil li mac sa' xbeneb li neque'xcuy li raylal chi mac'a' xmaqueb. ² Ut jarub cutan chic toj yo'yokex chebanuhak li c'a'ru naraj li Dios, ut inc'a' chic yokex chixbanunquil li c'a'ru querahi chak ru junxil. ³ Tz'akal taxak li mac li xebanu chak. Xebanu jo' neque'xbanu li inc'a' neque'paban chiru li Dios. Junxil nasemsot le ch'ol riq'uin li jo' majo'il na'leb. Xebanu chak li calac ut li nink'eic. Xebanu chak li num cua'ac num uc'ac. Ut xebanu ajcui' li tz'ekbetalil aj na'leb. Xutanal xebanu chak junxil nak xenima chak ruheb li yibanbil Dios. ⁴ A'ut anakcuan eb li maji' neque'paban neque'sach xch'oleb cheribal. Neque'xq'ue retal nak macua'ex chic jun sa' xyankeb chixbanunquil li mausilal. Ut xban a'an nequexhobe'. ⁵ Aban mokon eb laj hobonel tento nak te'xk'axtesi xcient chiru li Dios riq'uin li c'a'ru quilate'xbanu chak. Li Dios, a'an li tarakok atin sa' xbenheb li yo'yoqueb jo' eb ajcui' li camenabek. ⁶ A'an rajbal nak quich'olobac xyalal chiruheb li tenamit. Quirakman atin chirixeb ut eb a'an que'cam jo' nak telaje'cam chixjunileb li cristian. Chixjunileb li que'paban chiru li Dios usta quilate'cam, lix musik'eb yo'yoqueb jo' nak yo'yo li Dios. ⁷ Li roso'jic li ruchich'och' tasebank chak. Jo'can nak aj-ajak eru, ut cheq'uehak ech'ol chi tijoc. ⁸ Li c'a'ru tento tebanu, a'an xrabal erib cheribil erib ut chi anchal ech'ol. Ut xban nak nequera erib cheribil erib, nequecuy ajcui' emac cheribil erib. ⁹ Cheqx'uehok ochochnal cheribil erib chi sa sa' ech'ol. ¹⁰ Chikajunilo jalan jalank li c'a'ru taruk takabalu. Ac kamatan kamatan q'uebil ke chikajunkal xban li Dios. Tento nak takatenk'a li kas kitz'in riq'uin li c'a'ru nocoru chixbanunquil re nak inc'a' tacañak chi mac'a' rajbal li matan q'uebil ke xban li Dios. ¹¹ Cui ani cuan xmatan chi atinac, chixyehak ratin li Dios. Cui ani naraj c'anjelac, chi c'anjelac a' yal chanru lix cacuilal q'uebil re xban li Dios. Riq'uin chixjunil li c'a'ak re ru tauxmank, nimanbilak taxak xc'aba' li Dios sa' xc'aba' li Jesucristo. A'an laj echal re li nimajcual cuanquil ut lok'oninbilak taxak chi junelic k'e cutan. Jo'can taxak.

Tento xcuybal li raylal

¹² Ex inherman, misach ech'ol nak tachalk li ra xic' sa' eben. Chanchan li xam nak nachal sa' eben re xyalbal rix le pabal. Mec'oxla nak ca'aj cui'

laex yoquex chi c'uluc re. ¹³ Chi sahok' ban sa' ech'ol nak yoquex chi c'uluc raylal jo' quixc'ul li Cristo xban nak yoquex chi tz'akonq riq'unin li raylal li quixc'ul a'an. Tacuulak xk'ehil nak li Jesucristo tixc'utbesi lix nimal xlok'al ut laex k'axal cui'chic tasahok' sa' ech'ol. ¹⁴ Us xak ere cui texhobek' xban nak nequepab li Cristo. A'an retalil nak lix Musik' li Dios cuan eriq'unin ut a'an li k'axal lok'. Relic chi yal nak tz'ektañanbil li Dios xbaneb li neque'hoboc ere, abanan cheru laex, k'axal lok' ut nim xcuauquil. ¹⁵ Cheq'uehak retal: mexmacob. Xutanal chok' ere nak tec'ul junak raylal xban elk'ac, malaj ut xban li camsinc, malaj ut xban li yo'obanc ch'a'ajquilal sa' xyankeb le ras eritz'in, malaj ut xban xbanunquil c'a'ak chic re ru inc'a' us. ¹⁶ Cui ut nequec'ul raylal xban nak nequepab li Cristo, a'an moco xutanal ta. Chenimak ban xlok'al li Dios xban nak laex chic ralal xc'ajol. ¹⁷ Cuulac re xk'ehil li rakoc atin. Taticlak kiq'unin lao, li ralal xc'ajol li Dios. Tento nak tarakek' atin sa' kab'en lao aj pabanel. Ut tarakek' ajcui' atin sa' xbenet li inc'a' neque'xpab li Dios. Abanan k'axal numtajenak cui'chic li raylal te'xc'ul eb a'an. ¹⁸ Jo'ca'in tz'ib'anbil chak retalil sa' li Santil Hu: Cui li tjc xch'ol elajic tacolek', ma toja' ta chic junak laj mac inc'a' elajic tacolek'? ¹⁹ Laex li yoquex chi xc'ulbal li raylal jo' naraj li Dios, cheq'uehak taxak ech'ol chixbanunquil li chabilal. Chek'axtesihak erib sa' ruk' li Dios. A'an li quiyo'obtesin ke ut ma jok'e tapaltok chiku.

5

Xq'uebal xna'leb laj c'amol be

¹ Ut anakcuán tinye cuib oxibak li atin reheb laj c'amol be sa' eyank laex aj pabanel. Lain ajcui' erochben chi c'amoc be ut quicuil tz'akal nak li Cristo quixc'ul raylal. Lain tintz'akonk ajcui' jo' nak laex textz'akonk sa' lix nimal xlok'al li tac'utbesik. ² Laex laj c'amol be, tintz'ama cheru nak teq'ue ech'ol chirilbaleb li ralal xc'ajol li Dios jo' nak laj ilol xul narileb lix xul chi anchal xch'ol. Teq'ue ech'ol chixch'olaniquinleb laj pabanel li k'axtesinbil ere xban li Dios chi macua' minbil eru. Tebanu ban chi anchal ech'ol. Mebanu yal xban xrahinquel ru le tojbal. Chebanu ban xban nak teraj c'anjelac chiru li Dios. ³ Metaklaheb sa' josk'il li k'axtesinbileb ere. Tetaklaheb ban sa' xyalal. Chabilakex chiruheb re nak te'r'il le chabilal. ⁴ Li Jesucristo a'an tz'akal laj ilol ke. Cui nakach'olaniheb chi us li k'axtesinbileb ke, li Jesucristo tixq'ue kak'ajcamunquil nak tol-elk cui'chic. Li kak'ajcamunquil a'an inc'a' nalaj inc'a' na-oso'. Ut totz'akonk ajcui' riq'unin lix nimal xlok'al. ⁵ Ut anakcuán, ex herman, tinye cuib oxibak atin ere laex li toj sajex. Chehabink chiruheb li neque'c'amoc be sa' eyank. Menimobresi erib cheribil erib. Cheten'a ban erib cheribil erib chejunilex jo' tz'ib'anbil sa' li Santil Hu: Li Dios naxtz'ecktañabe li k'etk'eteb ut naxbanu usilaf reheb li neque'xcubsi ribeb. ⁶ Checubsi bi' ecuanquil chiru li Dios li k'axal nim xcuauquil re nak li Dios tixnimobresi le cuauquil nak tixtau xk'ehil. ⁷ Checanabak sa' ruk' li Dios chixjunil li c'a'ak re ru yo ec'a'ux chirix xban nak li Dios naxq'ue xch'ol cherix laex. ⁸ Chicuank ena'leb re xcolbal erib chiru laj tza xban nak laj tza yo chixsic'bal ani tarale. Laj tza a'an chanchan li cakcoj camc re xban xtz'ocajic ut yo chixsutinquel rib yalak bar re xsic'bal ani tixcamsi re tixtiu. ⁹ Meq'ue erib chi alec xban laj tza. Cauhak ban ech'ol sa' le pabal. Mich'inan ech'ol nak tachalk junak raylal sa' eben. Nequenau nak macua' ca'aj cui' laex yoquex chi c'uluc raylal. Jo'can ajcui' neque'xc'ul le rech aj pabanelil yalak bar jun sut sa' ruchich'och'. ¹⁰ Laex tec'ul li raylal. Cuyomak cuan ca'ch'inak xban nak chi seb ajcui' nocoxten'ka li Dios. A'an tatz'akobresink eru. A'an tatenk'ank ere re nak inc'a' tach'inank ech'ol. Tixq'ue ban xcacuil ech'ol. Li

Dios, li naq'uehoc ke li usilal, a'an quibokoc ke chi tz'akonc riq'uin lix nimal xlok'al sa' choxa kochben li Cristo. ¹¹ A'an taxak chinimäk xcuanyl chi junelic k'e cutan. Jo'can taxak.

Xrakbal li hu riq'uin sahil ch'olej

¹² Laj Silvano, a'an jun tz'akal aj pabanel. A'an tac'amok re li hu a'in xintz'iba chok' ere. Moco q'ui ta li atin xintz'iba ere. Riq'uin li atin a'in yoquin chixq'uebal ena'leb. Xinch'olob xyalal cheru chanru li rusilal li Dios. A'in taxak chiq'uehok xcacuil ech'ol. ¹³ Eb laj pabanel li cuanqueb Babilonia neque'xtakla xsahil ech'ol. Eb a'an sic'bil ajcui' ruheb xban li Dios jo' laex. Naxtakla ajcui' xsahil ech'ol laj Marcos, li ninra jo' cualal. ¹⁴ Cheq'uehak xsahil ech'ol cheribil erib riq'uin santil utz'uc u xban nak nequera erib. Chicuank taxak li tuktuquil usilal eriq'uin xban nak laex chic ralal xc'ajol li Cristo. Jo'can taxak.

Li Xcab Hu li Quixtz'iba li San Pedro

Xq'uebal xsahil xch'oleb

¹ Lain laj Simón Pedro. Lain x-apóstol li Jesucristo ut ninc'anjelac chiru. Nintz'iba li hu a'in eriq'uin, laex aj pabanel. Ac xetau lix chak'al ru li pabal jo' li kapabal lao. Li pabal a'in natauman riq'uin li Kacua' Jesucristo laj Colol ke, li tyc xch'ol. ² Xban nak nequenau chic li xyalal chirix li Dios ut chirix li Kacua' Jesucristo, tacuank taxak chi naball li tuktuquilal eriq'uin ut chi cuank taxak li rusilat li Dios sa' le ch'ol.

Cheztz'akonk riq'uin lix santilal li Dios

³ Chixjunil li c'a'ru nac'anjelac ke sa' li kayu'am ut sa' li kapabal q'uebil ke xban xnimal xcuanquil li Cristo. Sa' xc'aba' lix cuanquil xkanau ru li Dios li quibokoc ke chi tz'akonc riq'uin lix nimnal xllok' al ut xcuanquilal. ⁴ Sa' xc'aba' lix nimnal xllok' al ut xcuanquilal li Dios quixyechi'i kamatan k'axal lok' ut nim xcuanquil. Li Dios quixyechi'i ke lix cuanquilal re toekl sa' li mausilal li cuan sa' ruchich'och' ut quixyechi'i ajcui' ke lix cuanquilal re nak takacanab xrahinquel ru li mac, ut re ajcui' nak totz'akonk riq'uin lix tiquinal li Dios. ⁵ Abanan inc'a' tz'akal cui ca'aj cui' nocopaban. Chikayalak ban kak'e chixbanunquil li chabilal. Ut chikatzolak kib riq'uin li Dios re nak chabilal li kana'leb. ⁶ Jo'can ajcui' nak chikacuyak kib. Ut chicuank xcacuil li kach'ol sa' li kapabal riq'uin li raylal nakac'ul ut chikac'oxlahak li Dios chi tz'akal. ⁷ M'acua' ca'aj cui' a'an takabantu. Chisahok' ban ajcui' kach'ol riq'uineb li kas kitz'in ut chikaraheb. ⁸ Cui nakabantu a'in chi cuulaj cuulaj, yoko chi c'anjelac chiru li Dios re nak li kayu'am inc'a' tacuank chi mac'a' rajbal. Cuank ban xyalal nak takapab li Kacua' Jesucristo. ⁹ Li ani inc'a' naxbanu li c'a'ak re ru a'in, a'an chanchan jun li mutz' malaj chanchan jun li inc'a' nailoc chi tz'akal. Li jun a'an inc'a' naxq'ue sa' xch'ol nak ac colbil chic chiru li mac li quixbanu junxil. ¹⁰ Riq'uin ut a'in ex herman, cheq'ue taxak ech'ol chixtaubal ru nak bokbilex ut sic'bil eru xban li Dios. Cui nequeq'ue retal a'in inc'a' chic texmacobk. ¹¹ Ut naru chic tex-oc chok' ralal xc'ajol li Dios. Ut tex-oc ajcui' sa' lix nimajcual xcuanquilal li Kacua' Jesucristo laj Colol ke. ¹² Jo'can nak inc'a' tincanab xjulticanquil ere li na'leb a'in, usta ac ch'olch'o cheru lix yalal ut cau chic ech'ol sa' le pabal. ¹³ A' yal jo' najtil yo'yokin, ninc'oxla nak tento tintoch' le ch'ol riq'uin xjulticanquil a atin a'in cheru. ¹⁴ Li Kacua' Jesucristo quixc'utbesi chicuu nak chi seb tacuulak xk'ehil lin camic. ¹⁵ Lain tinq'ue inch'ol chixch'olobanquill lix yalal cheru re nak chirix lin camic lix yalal a'in tacanak sa' ech'ol.

Kilom riq'uin ku lix lok'al li Cristo

¹⁶ Li c'a'ru yoquin chixyebal ere chirix lix cuanquilal li Jesucristo ut lix c'ulunic, macua'yal yo'obanbil atin. Ch'olch'o nak xkil riq'uin xnak' ku lix nimajcual cuanquilal. ¹⁷ Lao xkil riq'uin xnak' ku nak li Kacua' Jesucristo quixc'ul lix nimanquill ru ut lix lok'al riq'uin li Dios Acuabej. Ut quikabi xyab xcux li Dios nak quixye chak sa' lix nimajcual lok'al, a'an a'in li cualal k'axal raro inban. Ut c'ojc'o inch'ol riq'uin, chan. ¹⁸ Nak quikabi li atin a'in li quichal chak sa' choxa, lao cuanco chak kochben a'an sa' xben jun li tzul sic'bil ru xban li Dios. ¹⁹ Riq'uin a'in nakananu nak relic chi yal na-uxman li c'a'ru tz'ibabil chak najter xbaneb li profeta. Us cui teq'ue retal li quilate'xtz'iba chak li profeta. A'an naxcutanobresi chiku jo' junak xam nacutanobresin sa'

junak na'ajej k'ojojin ru. Li Kacua' Jesucristo naxcutanobresi sa' li kam jo' nak naxcutanobresi ru li k'ojojin li cak chahim nak sakeuc re. ²⁰ Chetauhak xyalal a'in xbén cua: li atin quilaje'xtz'iba li profeta sa' li Santil Hu inc'a' naru yalak ani tajalok re xjunes. ²¹ Eb li profeta ma jun cua que'xtakla rib xjuneseb. Eb a'an sic'bileb ru xban li Dios ut que'atinac jo' quiyehe' chak reheb xban li Santil Musik'ej.

2

Eb li xic' neque'iloc re li Cristo

¹ Que'cuan ajcui' chak profeta aj balak' sa' xyankeb laj Israel junxil. Jo'can ajcui' sa' eyank laex, te'cuank aj tzolonel aj balak'. Chi timil ut sa' mukmu te'rocsi li balak' aj na'leb re xsachbal xpabánquil li Dios toj retal te'xtz'ektana li Kacua' Jesucristo li quicam sa' xc'aba'eb. Ut riq'unin li neque'xbanu, neque'xsach ribeb chi junaj cua ut yoqueb chixbokbal raylal sa' xbéneb. ² Nabaleb telaje'xic sa' li mausilal li yoqueb chixyebal eb a'an ut xmaqueb a'an tamajecuak li kapabal li tz'akal yal. ³ Eb a'an aj tic'ti'eb. Ca'aj cui' le tumin neque'raj. Xban xrahinqwil ru li tumin neque'balak'ic riq'unin tic'ti'. Lix rahobtesinquileb a'an ac tenebanbil chak sa' xbéneb najter xban li Dios. Inc'a' chic tabayk. Cuulac ban re xcutanquil nak te'sacheck' ruheb. ⁴ Li Dios inc'a' quixcuy xmaqueb li ángel li que'macob chiru. Quixcuteb ban sa' xbalba sa' chamal jul k'ojojin xsa'. Bac'boqueb chi cadena quixcanabeb toj tacuulak xk'ehil li rakba atin. Jo'can ajcui' tixbanu reheb laj balak'. Inc'a' tixcuy xmaqueb. ⁵ Li Dios inc'a' quixcuy xmaqueb li que'cuan sa' ruchich'och' najter. Quixtakla ban chak li but'i ha' sa' xbén li ruchich'och' re nak te'osok' chixjunileb laj mac. Ca'aj cui' laj Noé laj yehol resil li tiquilal quicole' rochbeneb li cuukub chic lix comoneeb. ⁶ Jo'can ajcui' li Dios quixrak atin sa' xbéneb laj Sodoma ut laj Gomorra. Quixsacheb nak quixc'at lix tenamiteb. Junes cha quicana. Li Dios quixbanu chi jo'can chok' retalil chiruheb chixjunileb li yoqueb chi macobc mokon re nak te'xuak xban li c'a'ru ta'chalk sa' xbéneb. ⁷ Quixcol laj Lot li tic xch'ol. A'an c'ajo' nak narah' sa' xch'ol xban nak numtajenak li mausilal li neque'xbanu li cuanqueb aran Sodoma. ⁸ Laj Lot, a'an tic xch'ol. Ut nak cuan sa' xyankeb laj Sodoma junelic ra sa' xch'ol chiribinquel lix mausilal lix na'lebeb. ⁹ Jo'can ajcui' anakcuan. Li Dios naxtenk'aheb li tiqueb xch'ol re nak inc'a' te'xq'ue rib chi alec. Ut eb li inc'a' tiqueb xch'ol tixcanabeb chixc'ulbal li tojba mac nak tixtau xk'ehil li rakba atin. ¹⁰ ¿Ma toja' ta chic inc'a' tixq'ueheb sa' tojba mac li neque'xrahi ru li tz'ajbetaj aj na'leb ut neque'xtz'ektana lix cuanquillal li Cristo? Eb a'an josk'eb ut k'et'k'eteb. Inc'a' neque'xucuac chixmajecuanquileb li ángel li cuanqueb sa' xnimajcual cuanquillal. ¹¹ Eb li ángel cuanqueb xna'leb ut nim xcuauquil chiruheb laj tzolonel aj balak'. Abanan li ángel inc'a' neque'xmajecuahel li cuink a'in chiru li Kacua'. ¹² A'ut eb laj tzolonel aj balak' chanchaneb li xul. Mac'a' neque'xpab. Yal re chapec' ut re camsic nak neque'yo'la. Yoqueb chixmajecuanquillal li c'a'ak re ru inc'a' neque'xtau ru. Eb a'an jun oso'jiqueb nak te'osok'. ¹³ Chi jo'can te'xc'ul xk'ajcamunquillal lix mausilaleb que'xbanu. Eb laj tzolonel aj balak' junelic saheb sa' xch'ol chixbanunquillal li inc'a' us, usta chi cutan. Xutanal chok'ere nak cuanqueb sa' eyank xban nak neque'cuulac chi cua'ac sa' le nink'e. Eb a'an junes macobc neque'xc'oxla. ¹⁴ A'aneb aj muxul caxar. Ca'aj cui' ixx neque'xc'oxla ut inc'a' neque'xcanab macobc. Neque'oc chixk'unbesinquileb li toj k'ueb xch'ol. Eb li cuink a'in c'aynakeb chixrahinqwil ru li biomal. Eb a'an majecuanibileb chi junaj cua xban li Dios. ¹⁵ Nak neque'xcanab li tiquilal, neque'xic chi jo'

majo'. Neque'xbənu jo' quixbənu laj Balaam li ralal laj Beor. Laj Balaam quiraj xtaubal xtumin riq'uin xbanunquil li mausilal. ¹⁶ Jo'can nak quik'use' xban jun li bur. Yal xul. Inc'a' naatinac. Ut laj Balaam quirabi xyab xcux li bur jo' xyab xcux li cujnk nak quiyeh'e' re xban li bur nak tixcanab xbanunquil li mausilal. ¹⁷ Eb laj tzolonel aj balak' chanchaneb lix julel ha' li mac'a' ha' chi sa'. Mac'a' na-oc cui'. Chanchaneb li chok li nac'ame' yalak bar xban li ik'. Eb li cujnk a'in te'xic sa' lix k'oijinal ru li xbalba li ac yiabanbil chok' reheb. ¹⁸ Neque'oc chi yehoc xninkal ru atin sa' lix majelal xna'lebeb. Ut riq'uin li mac naxrahi li tz'ejcualej yoqueb chixk'umbesinqueb li cristian li toj que'el chak sa' xyankeb. ¹⁹ Eb laj balak' neque'xye: Libre chic texcuank, chanqueb. Laex chic yal ere c'a'ru tebanu, chanqueb. Ut inc'a' neque'xq'ue retal nak a'an eb li c'ayinibileb chi c'anjelac chiru li mac xban nak li ani toj nanumta li mausilal sa' xbən, toj cuan rubel xcuانquil li mac. ²⁰ Li ani neque'xpəb li Kacua' Jesucristo, neque'xcanab ajcui' xmuixbal rib riq'uin li c'a'ru cuan sa' ruchich'och'. Abanan cui te'oc cui'chic chi macobc ut cui tanumtak cui'chic li mac sa' xbeneb, k'axal cui'chic yibak ru lix na'lebeb chiru nak que'cuā junxil nak toj maji' neque'paban chak. ²¹ K'axal us raj chok' reheb nak inc'a' ta que'xnau xbehil li tiqulal chiru nak ac neque'xnau ru, ut que'xcanab cui'chic xpəbanquil lix chak'rab li Dios li quik'axtesic reheb. ²² Cuan jun li atin nayeman naxye: li tz'i' naxlou cui'chic lix xa'au xca' sut, ut nayeman ajcui' nak li ak li atesinbil, naxtolc'osi cui'chic rib sa' sulul. (Pr. 26:11) Eb li cujnk aj balak' chanchaneb li xul a'an xban nak que'oc cui'chic xbanunquil li mausilal.

3

Resilal xca'c'ulunic li Kacua' Jesucristo

¹ Ex inherman, a'in li xcab hu nintz'iba eriq'uin. Riq'uin li cuib chi hu yoquin cui'chic chixnumsinquill li xyalal sa' le xic re nak tec'oxla chi us c'a'ru tebanu. ² Chijulticok' ere li ratineb li santil profeta tz'ibanbil chak najter k'e cutan. Ut chijulticok' ere lix chak'rab li Kacua' Jesucristo laj Colol ke, k'axtesinbil ere kaban lao lix apóstol li Jesucristo. ³ Xben cua chetauhak xyalal a'in: Nak tanach'ok chak roso'jiqueb li cutan, cuan li te'chalk chi hoboc riq'uin yibru atin. Te'xhob xcuانquil li Dios ut te'xbənu li yibru na'leb li neque'xc'oxla. ⁴ Eb a'an te'xye: Li Jesucristo quixye nak tachalk. ¿Bar ta cuan? ¿Ma ac xc'ulun ta? Chalen chak xcamiqueb li kaxe' katon chixjunil li c'a'ak re ru cuan ajcui' anakcuā jo' nak quicuan chak chalen chak sa' xticlajic li ruchich'och', cha'keb. ⁵ Li neque'xye chi jo'can inc'a' neque'raj xjulticanquil chanru qui-uxman chak najter. Inc'a' neque'raj xq'uebal retal nak yal riq'uin ratin li Dios quixyo'obtesi li choxa ut li ruchich'och'. Li Dios quixyib li ruchich'och' sa' ha' ut sa' xbən ha' quic'oja li ch'och' xban li Dios. ⁶ Jo'can ajcui' li ruchich'och' li quicuan. Yal riq'uin ratin li Dios, quibut'ha'in ut qui-oso'. ⁷ Li choxa ut li ruchich'och' li cuanqueb anakcuā, cuanqueb sa' xna'aj yal riq'uin ratin li Dios. Yoqueb chiroybeninquil nak te'c'atek' xban li xam sa' xk'ehil li rakba atin nak te'sachek' li inc'a' useb xna'leb. ⁸ Abanan ex herman, laex li raroquex inban, chetau taxak ru a'in: Nak li jun cutan chiru li Kacua' a'an jo' li jun mil chihab chiku lao, ut li jun mil chihab jo' li jun cutan chiru li Dios. ⁹ Cuan li neque'xye nak li Kacua' Jesucristo xbay chak chi chalc. Inc'a' ajcui' xc'ulun jo' quixye, chanqueb. Abanan inc'a' yo chak chi bayc. Toj maji' nac'ulun xban nak nim lix cuyum eriq'uin laex. Inc'a' naraj nak tasachk junak. Naraj ban nak te'yot'ek' xch'ol ut te'xjal xc'a'ux. ¹⁰ Lix k'ehil lix c'ulunic li Kacua', a'an chanchan nak nachal laj elk'. Moco cuan ta resil lix c'ulunic. Sa' li cutan a'an taosok' li choxa. Tenlok xyab

nak t̄aosok'. Ut li c'a'ak re ru cuanqueb chiru te'osok' xban li xam. Tac'atk li ruchich'och' jo' ajcui' chixjunil li c'a'ak re ru li cuan chiru. ¹¹ Xban nak chixjunil li c'a'ak re ru telaje'osok', jo'can nak chikaq'ue kach'ol chi cuanc sa' li t̄iquilal. Chikac'oxlahak li Kacua' Dios. ¹² Yoco chiroybeninqul xk'ehil xc'ulunic li Kacua'. Chikaq'ue kach'ol chi c'anjelac chiru re nak t̄asebank chak chi chalc. Sa' li cutan a'an te'loch̄ xxamlel li choxa ut te'osok' chixjunil. Ut li c'a'ak re ru cuanqueb chiru telaje'ha'ok' xban xtikcual li xam. ¹³ Abanan li Kacua' Dios quixyech'i ke li ac' choxa ut li ac' ruchich'och'. A'an yoco chiroybeninqul. Sa' li ruchich'och' a'an junes t̄iquilal tacuank. ¹⁴ Jo'can ut ex herman, raroquex inban, chalen nak yoquex chiroybeninqul li c'a'ak re ru a'in, cheq'ue ech'ol chixbanunqul li t̄iquilal re nak mac'a'ak emac ut cuankex sa' xyalal nak tac'ulunk li Jesucristo. ¹⁵ Julticak ere nak cui li Kacua' Jesucristo mají' nac'ulun, a'an re nak li ani mají' nacole' naru tacolek'. A'an aj e nak quitz'ibac eriq'uin li kaherman Pablo, li k'axal raro kaban. A'an quixtz'iba li na'leb a'in jo' q'uebil chak re xban li Dios. ¹⁶ Chirix a'in quixtz'iba laj Pablo sa' chixjunil lix hu. Cuan li c'a'ak re ru sa' lix hu ch'a'aj xtaubal ru. Ut li mac'a'eb xna'leb ut li junpat neque'ch'inan xch'ol sa' lix pabaleb neque'xpo' li xyalal. Jo'can ajcui' neque'xbanu riq'uin chixjunil li ratin li Dios. Xban nak neque'xk'et ratin li Dios, jo'can nak te'osok'. ¹⁷ Jo'can ut ex herman, k'axal raroquex kaban, ac kayehom resil ere chirixeb laj balak'. Chicuank sa' ech'ol a'in re nak inc'a' texbalak'ik xbaneb li cuink li yibeb ru xna'leb. Ut, laex li cau ech'ol chixpabanqul li Cristo, mich'inan ech'ol xbaneb laj balak'. ¹⁸ A' taxak li rusilal li Kacua' chic'utunk sa' le yu'am ut chesic' chanru nak tenau lix yalal li Kacua' Jesucristo laj Colol ke. A' taxak li Kacua' Jesucristo chilok'onik anakcuan ut chi junelic toj sa' roso'jiqueb li cutan. Jo'can taxak.

Li Xben Hu li Quixtz'iba li San Juan

Resil li Jesucristo li naq'uehoc re li kayu'am

¹ Nintz'ibac eriq'uin chirix li Dios C'ajolbej li cuan chalen chak sa' xticlajic li ruchich'och'. Lao quikil riq'uin xnak' ku ut coatinac riq'uin. Quikil ru a'an chi tz'akal ut xkach'e' riq'uin kuk'. A'an a'in li Atin naq'uehoc yu'am. ² Quic'utbesic chiku li naq'uehoc yu'am. Quikil ru a'an. Jo'can nak nakach'olob xyalal cheru chirix a'an, li naq'uehoc yu'am chi junelic. A'an li cuan chak riq'uin li Acuabej Dios. A'an quixc'utbesi rib chiku. ³ Nakach'olob xyalal cheru chirix li c'a'ru quikil ut li c'a'ru quikabi re nak tocuanq chi sum atin chi kibil kib. Ut tocuanq ajcui' chi sum atin riq'uin li Acuabej Dios ut riq'uin li Jesucristo, li Ralal. ⁴ Sa' li hu a'in nakatakla xyebal ere re nak chitz'aklok ru lix sahil ech'ol chejunilex, jo' ajcui' lix sahil kach'ol lao.

Li Dios, a'an cutan saken

⁵ A'an a'in li atin quikabi riq'uin li Jesucristo. Ut a'an li nakach'olob xyalal cheru. Li Dios, a'an li cutan saken. Riq'uin li Dios mac'a' k'ojyin. Tic ban xch'ol li Dios. Relic chi yal nak mac'a' mäusilal riq'uin. ⁶ Cui nakaye nak cuanco chi sum atin riq'uin li Dios ut cui toj nakabanan li inc'a' us, yoco chi tic'ti'ic. Ut inc'a' nakatzol kib chixbanunquil li yal. ⁷ Ut cui nakabanan li c'a'ru naraj li Dios, jo' naxc'utbesi chiku li Cristo, cuanco chic chi sum atin chi kibil kib. Ut lix quiq'uel li Jesucristo li Ralal li Dios naxch'ajobresi li kam ut narisi chixjunil li kamäc.

Laj cuyul laj sachol re li kamäc

⁸ Cui nakaye nak mac'a' kamäc, nakabalak'i kib ut moco yal ta li yoco chixyebal. ⁹ Cui nakaxoto li kamäc chiru li Dios, relic chi yal nak a'an tic xch'ol chixcuybal chixsachbal li kamäc, ut tarisi chixjunil li kamäusilal. ¹⁰ Cui ut nakaye nak inc'a' xomäacob nakaq'ue li Dios chok' aj tic'ti'. Ut inc'a' nakapab li ratin.

2

Li Jesucristo ajjalol atin chikix chiru li Dios

¹ Ex inherman, chanchanex li cualal inc'ajol. A' c'a'ak re ru a'in nintz'iba ere re nak inc'a' texmacobk. Cui ut cuan junak tamäacobk, cuan jun aj jalol atin chikix chiru li Acuabej Dios, a'an li Jesucristo li tic xch'ol. ² Li Jesucristo quicam re xtojbal rix li kamäc. Moco ca'aj ta cui' xban li kamäc lao. Quicam aj ban cui' re xtojbal rix xmäqueb chixjunileb li cuanqueb sa' ruchich'och'. ³ Cui lao nakabanan li c'a'ru naraj li Dios, relic chi yal nak lao reho chic li Dios. ⁴ Li ani naxye, "Lain rehin li Dios", ut cui inc'a' naxbanu li c'a'ru naraj li Dios, a'an aj tic'ti'. Moco yal ta ru li yo chixbanunquil. ⁵ Li ani napaban re li ratin li Dios, relic chi yal nak naxra li Dios chi tz'akal. Riq'uin a'an nakanau nak lao reho chic li Dios. ⁶ Li ani naxye nak re chic li Dios, tento nak junelic chäbilak lix yu'am jo' xyu'am li Jesucristo.

Li chak'rab k'axal nim xcuانquil

⁷ Ex inherman, moco toj ac' ta li chak'rab yoquin chixtz'ibanquil eriq'uin. A'in a'an ajcui' li chak'rab li quiq'uehe' chak ere junxil. Ac erabiom chak chalen nak xepab li Cristo. ⁸ Abanan chanchan ac' ajcui' li chak'rab xban nak k'axal nim xcuانquil. Ut li chak'rab a'an, a'in nak tera erib cheribil erib.

Jo' quixbānu li Jesucristo, jo'can ajcui' takabānu lao. Li rātin li Jesucristo naxcutanobresi kana'leb. Nak nakacanab li macobc, chanchan nak yo chi numec' li k'ojojin. Ut nak nakapāb li rātin li Jesucristo, chanchan nak yo chi chālc li cutan. ⁹ Li ani naxye nak xcutanobresic lix na'leb xban li Cristo, ut xic' naril lix herman a'an toj cuan ajcui' sa' xk'ojojinal ru li mac. ¹⁰ Li ani naxra lix herman, a'an cutanobresinbil lix na'leb xban li Cristo. Ut ma ani nach'inan xch'ol xban. ¹¹ Li ani xic' naril lix herman, a'an toj yo ajcui' chi bēc sa' xk'ojojinal ru li mac. Ut inc'a' naxnau bar yo chi xic xban nak li mac naramoc re li xyalal chiru. ¹² Nintz'ibac eriq'uin, ex herman, xban nak cuybil sachbil chic le mac xban li Dios sa' xc'aba' li Jesucristo. ¹³ Nintz'ibac ajcui' eriq'uin, laex yucua'bej, xban nak ac xepab li Dios C'ajolbej li cuan chalen chak najter nak toj maji' naxyo'obtesi chak li ruchich'och'. Nintz'ibac eriq'uin laex li toj sajex xban nak xecuy xnumsinqil li alec li naxq'ue laj tza. Ut nintz'ibac ajcui' eriq'uin laex coc'al xban nak ac xepab li Acuabej Dios. ¹⁴ Xintz'ibac eriq'uin laex yucua'bej, xban nak ac xepab li Dios C'ajolbej li cuan chalen chak najter nak toj maji' naxyo'obtesi chak li ruchich'och'. Xintz'ibac eriq'uin laex li toj sajex, xban nak cau erib ut li rātin li Dios nacana chi junelic eriq'uin ut xecuy xnumsinqil li alec li naxq'ue laj tza. ¹⁵ Ex inherman, mera chic ru lix māusilal li ruchich'och' chi moco li c'a'ak re ru cuan sa' ruchich'och'. Cui cuan junak naxra ru li c'a'ak re ru a'in, moco naxra ta li Acuabej Dios. ¹⁶ Chixjunil li māusilal cuan sa' ruchich'och' moco riq'uin ta li Dios nachal. Li mac li naxrahi ru li tz'ejcualej ut li xrahinqil ru li c'a'ak re ru nakil riq'uin xnak' ku moco riq'uin ta li Dios nachal. Jo'can ajcui' li k'etk'etil. Chixjunil a'in moco riq'uin ta li Dios nachal; xna'leb ban li ruchich'och'. ¹⁷ Li ruchich'och' tāosok' jo' ajcui' li māusilal. Abanan li ani nabānun re li naraj li Dios, a'an cuānk chi junelic.

Li xic' neque'iloc re li Cristo

¹⁸ Ex inherman, yo chak chi nach'oc roso'jiqueb li cutan. Ac xerabi resil nak tachalk jun li xic' na-iloc re li Cristo. A'an li anticristo nayeman re. Ut anakcuan ac cuanqueb nabal li xic' neque'iloc re li Cristo. Jo'can nak nakanau nak yo chi cuulac xk'ehil roso'jiqueb li cutan. ¹⁹ Sa' kayank xe'el li xic' neque'iloc re li Cristo, abanan moco kech aj pabaneleb ta nak xe'cuan. Cui ta eb a'an kech aj pabanelil, cuanqueb raj chi junelic sa' kayank. Abanan xe'el sa' kayank re nak tanaumank nak macua'eb kech aj pabanelil. ²⁰ Ut laex ac santobresinbilex xban li Santil Musik'ej li q'uebil ेre xban li Jesucristo, ut nequenau chic li xyalal. ²¹ Moco xban ta nak inc'a' nequenau li xyalal nak nintz'ibac eriq'uin. Laex nequenau li xyalal ut nequenau ajcui' nak ma jun tic'ti' na-el sa' li tz'akal yal. ²² ¿Ani laj tic'ti' nak neque'oxla laex? A'an li nayehoc re nak li Jesucristo, macua' a'an laj Colonel li yechi'ibil xban li Dios. Li nayehoc re chi jo'can, a'an li anticristo li xic' na-iloc re li Cristo. A'an li natz'ektanar re li Acuabej Dios ut li C'ajolbej. ²³ Li ani naxye nak li Jesucristo macua' Ralal li Dios, li nayehoc re a'an mac'a' li Acuabej Dios riq'uin. Ut li ani naxye nak li Cristo, a'an li tz'akal Ralal li Dios, a'an cuan li Acuabej Dios riq'uin. ²⁴ Li c'a'ru xetzol chak chalen sa' xticlajic le pabal chicuānk sa' le ch'ol. Cui tec'ula sa' le ch'ol li c'a'ru xerabi chak chalen sa' xticlajic le pabal, cuānkex riq'uin li C'ajolbej ut riq'uin li Acuabej Dios. ²⁵ Li yu'am mac'a' roso'jic, a'an li naxyechi'i ke li Jesucristo. ²⁶ Nintz'ibac a'in eriq'uin chirixeb li xic' neque'iloc re li Cristo xban nak eb a'an te'raj ebalak'inquil. ²⁷ Abanan inc'a' tento tacuānk junak aj tzolol ेre re xc'utbal cheru c'a'ru li yal ut c'a'ru li inc'a' yal xban nak q'uebil ere li Santil Musik'ej xban li Jesucristo. Li Santil Musik'ej cuan eriq'uin ut a'an li naq'uehoc ena'leb. Li c'a'ru naxc'ut cheru li Santil Musik'ej tz'akal yal. Moco tic'ti' ta. Jo'can nak chelexcuānk chi sum atin

riq'unin li Jesucristo jo' naxc'ut cheru li Santil Musik'ej. ²⁸ Ut anakcuan, ex herman, ninye cui'chic ere nak chexcuank chi sum atin riq'unin li Jesucristo re nak māc'a'ak le xiu nāk tol-ēlk cui'chic li Kacua' Jesucristo. Sahak ban sa' kach'ol chixc'ulbal chi māc'a'ak kaxutan. ²⁹ Laex nequenau nak li Cristo tīc xch'ol. Ut chenauhak ajcui' nak chixjunileb li neque'bānun re li tīquilal, a'an tz'akal ralal xc'ajol li Dios.

3

Li ralal xc'ajol li Dios

¹ Cheq'uehak retal nak li Acuabej Dios c'ajo' nocoxra. Nocoxq'ue chok' ralal xc'ajol. Relic chi yal nak lāo ralal xc'ajol. Jo'can nak li maji' neque'pāban inc'a' neque'xtau ru lī kana'leb xban nak maji' neque'xnau xyālal xpābanquil li Dios. ² Ex inherman, anakcuan lāo ralal xc'ajol li Dios. Abanan maji' nakanau jo' q'ual chic li usilal takac'ul mokon. Ca'aj cui' nakanau nak tol-ēlk li Jesucristo, chanchanako chic a'an xban nak takil ru chi tz'akal. ³ Li ani yo chiroybeninqil lix c'ulunic li Cristo, a'an naxsakobresi li ram sa' tīquilal jo' li Kacua' Jesucristo tīc xch'ol. ⁴ Li ani namācob naxk'et lix chak'rab li Dios xban nak li mācōbc a'an xk'etbal li chak'rab. ⁵ Laex nequenau nak li Kacua' Jesucristo quic'ulun re xcuybal ut xsachbal li kamāc. Relic chi yal nak a'an mācā'a'j māc. ⁶ Jo'can nak li ani cau xch'ol chixtākenquil li Cristo, inc'a' chic yok chi mācōbc. Abanan li ani toj yo chi mācōbc inc'a' naxnau li rusilal li Cristo ut inc'a' napāban. ⁷ Ex herman, mā anī chibalak'ink ere. Li ani nabānun re li tīquilal, a'an tīc xch'ol jo' li Cristo tīc xch'ol. ⁸ Li ani yo chi mācōbc, a'an re laj tza xban nak laj tza a'an aj māc chalen chak sa' xtīclajic li ruchich'och'. A'an aj e nak col-ēlk li Ralal li Dios re xsachbal xc'anjel laj tza. ⁹ Ma jun ralal xc'ajol li Dios yok chi mācōbc xban nak li Dios cuan riq'unin. Ut inc'a' naru nak yok chi mācōbc xban nak a'an tz'akal ralal xc'ajol li Dios. ¹⁰ Riq'unin a'in na'noqueb ru li ralal xc'ajol li Dios ut na'noqueb ajcui' ruheb li ralal xc'ajol laj tza: li ani inc'a' naxbanu li tīquilal, ut li ani inc'a' naxra li ras rītz'in, a'an mācua'eb ralal xc'ajol li Dios.

Chikara kib chi kibil kib

¹¹ Chalen chak sa' xtīclajic le pābal xerabi li chak'rab nak chikarahak kib chi kibil kib. ¹² Mikatake xnaleb laj Caín xban nak a'an re laj tza. A'an quixcamsi li rītz'in. ¿C'a'ut nak quixcamsi li rītz'in? Xban nak tīc xch'ol li rītz'in chiru li Dios ut laj Caín junes māusilal naxbanu. ¹³ Jo'can ut ex inherman, misach ech'ol xbaneb li xic' neque'iloc ere sa' ruchich'och'. ¹⁴ Cui nakara li kaherman, a'an retalil nak cuank'kacolbal chiru xcuanquil li camc ut q'uebil kayu'am chi junelic. Li ani inc'a' naxra lix herman, a'an toj cuan rubel xcuanquil li camc. ¹⁵ Li ani xic' naril lix herman, a'an chanchan aj camsinel ras rītz'in. Laex nequenau nak junak aj camsinel ras rītz'in māc'a'xyu'am chi junelic. ¹⁶ Li Jesucristo quixc'ut chiku chanru li rahoc nak quixk'axtesi rib chi camc sa' kac'aba'lāo. Jo'can ajcui' nak tento takaraheb li kaherman usta tocamsik sa' xc'aba'eb. ¹⁷ Jun chic ninye ere. Cui lāo cuan nabal li c'a'ru ke ut inc'a' nakatok'oba ru li neba' li māc'a' cuan re, ¿ma yal ta bi' nak nakara li Dios chi jo'canan? ¹⁸ Ex inherman, morahoc yal chi atin. Chorahok ban chi tz'akal yal ut chic'utunk li karahom riq'unin li usilal nakabānu.

Cau li kach'ol chixpābanquil li Dios

¹⁹ Cui nakara li kaherman, nakanau nak lāo tz'akal ralal xc'ajol li Dios, ut cau kach'ol chixpābanquil li Dios. ²⁰ Cui lāo nakec'a nak xomācob, ac cutan

saken chiru li Kacula' Dios li nakabānu xban nak a'an chixjunil naxnau. ²¹ Cui inc'a'накеc'a sa' kach'ol nak inc'a' us yoco, inc'a' nocoxucuac chiru li Dios. ²² Ut yalak c'a'ru takatz'ama chiru, tixq'ue ke xban nak yoco chixpābanquil lix chak'rab ut nakabānu li c'a'ru nacuulac chiru li Dios. ²³ Ut a'an a'in lix chak'rab quixq'ue ke li Dios, nak chopabank sa' xc'aba' li Jesucristo li Ralal li Dios ut takara kib chi kibil kib, jo' coxchak'rabi cui'. ²⁴ Cui nakapab lix chak'rab, lao cuanco riq'uin li Dios ut li Dios cuan kiq'uin. Nakanau nak li Dios cuan kiq'uin chi junelic xban li Santil Musik'ej li q'uebil ke.

4

Li Santil Musik'ej ut laj tzolonej aj balak'

¹ Ex herman, q'uehomak retal nak moco chixjunil ta aj iq'uin cuan li Santil Musik'ej. Nabaleb laj tzolonej aj balak' cuanqueb sa' ruchich'och'. Mepab chixjunil li c'a'ak re ru nequerabi riq'uineb, usta tayehek' ere nak riq'uin li Dios xchal. Tento nak tētz'il rix li terabi re xnaubal ma riq'uin li Dios xchal li neque'xye malaj inc'a'. ² Chi jo'ca'in naru tēnau cui li Santil Musik'ej xq'uehoc re li na'leb malaj inc'a'. Li ani tayehok re nak li Jesucristo quitz'ejcualo' ut tz'akal cujnk nak quic'ulun sa' ruchich'och', a'an li cuan li Santil Musik'ej riq'uin. ³ Ut li ani tayehok re nak li Jesucristo inc'a' quitz'ejcualo' nak quic'ulun sa' ruchich'och', a'an mac'a' li Santil Musik'ej riq'uin. Li na'leb a'an nachal riq'uin li xic' na-iloc re li Cristo. Abanan ac erabiom resil chirix nak tol-elk li xic' na-iloc re li Cristo. Ut anakcuán li na'leb a'an ac yo chi c'ulunc sa' ruchich'och'. ⁴ Ex inherman, laex rehex chic li Dios. Laex xecuy ut xenau xcolbal ərib chiruheb laj balak'. Xecuy xban nak li Santil Musik'ej cuan əriq'uin ut k'axal nim xcuanguil a'an chiru laj tza li cuan riq'uineb laj balak'. ⁵ Li na'leb li cuan riq'uineb laj balak', a'an yal re ruchich'och' ut junes chirix a'an neque'atina. Ut eb li inc'a' neque'xnau xyalal neque'rabi li inc'a' yal li neque'xye ut neque'xpab. ⁶ Abanan lao ralal xc'ajol li Dios. Ut eb li neque'paban re li Dios nocoe'rabi. Ut eb li inc'a' neque'paban re li Dios inc'a' neque'raj kabinquil. Riq'uin a'an nac'utun ani cuan li Santil Musik'ej riq'uin ut ani cuan xmusik' laj balak' riq'uin.

Li Dios aj rahonel

⁷ Ex inherman, chikara kib chi kibil kib xban nak li rahoc riq'uin li Dios nachal. Li ani narahoc, a'an ralal li Dios ut naxbānu li naraj li Dios. ⁸ Ut li inc'a' narahoc mācua' ralal li Dios xban nak li rahoc riq'uin li Dios nachal. ⁹ Li Dios quixc'ut chiku chanru nak nocoxra nak quixtakla chak lix junaj chi Alal sa' ruchich'och' chi cāmc sa' kac'aba' lao. Li Dios quixtakla chak li Ralal re nak tācuān kayu'am chi junelic. ¹⁰ Li tz'akal rahoc, a'an a'in: mācua'o lao xorahoc re li Dios. A'an ban quirahoc ke lao xban nak quixtakla chak li Ralal chi cāmc re xtojbal rix li kamāc. ¹¹ Ex herman, xban nak k'axal nocoxra li Dios, tento ajcui' nak takara kib chi kibil kib lao. ¹² Ma jun qui-iloc ru li Dios. Abanan cui nakara kib chi kibil kib, li Dios cuan kiq'uin chi junelic. Ut lix rahom li Dios tz'aklojenak ru kiq'uin. ¹³ Nakanau nak cuanco riq'uin li Dios ut li Dios cuan kiq'uin xban nak li Dios quixq'ue ke li Santil Musik'ej. ¹⁴ Lao lix apóstol li Jesucristo. Quikil ru li Jesucristo. Ut nakach'olob xyālal nak li Acuabej Dios quixtakla chak li Ralal chixcolbaleb li cuanqueb sa' ruchich'och'. ¹⁵ Li ani nach'oloban re nak li Jesús, a'an li Ralal li Dios, a'an cuan riq'uin li Dios, ut li Dios cuan riq'uin a'an. ¹⁶ Lao nakapab nak li Dios, a'an aj rahonel ut nakanau nak yal a'an. Li rahoc nachal riq'uin li Dios. Li ani narahoc, a'an cuan riq'uin li Dios ut li Dios cuan riq'uin a'an. ¹⁷ Riq'uin a'in tātz'aklok ru li rahoc kiq'uin lao re nak cauhak kach'ol sa' xcutanquil li

rakba q̄tin. Chanru xna'leb li Kacua' Jesucristo, jo'canak ajcui' li kana'leb lāo nak cuanko arin sa' ruchich'och'. ¹⁸ Mac'a' kaxiu cui nakara li Dios chi tz'akal. Li tz'akal rahoc narisi li xiu. Li ani naxucuac, naxxucua lix tojbal rix lix mac, ut li naxucuac toj maji' natz'akloc ru li rahoc riq'unin. ¹⁹ Lāo nakara li Dios xban nak a'an xrahoc ke xben cua. ²⁰ Cui junak naxye nak naxra li Dios ut xic' naril lix herman, a'an aj tic'ti'. Li ani inc'a' naxra lix herman li naril ru, ¿chan ta cui' ru nak tixra li Dios li moco naril ta ru? ²¹ A'in li chak'rab quixq'ue ke li Jesucristo: Li ani naxra li Dios, tento ajcui' nak tixra lix herman.

5

Li xcanabanquil li mausilal cuan sa' ruchich'och'

¹ Chixjunileb li neque'p̄aban re nak li Jesús a'an li Cristo, a'aneb li ralal xc'ajol li Dios. Ut cui lāo nakara li Acuabej Dios, takaraheb ajcui' li ralal xc'ajol. ² Cui nakara li Dios, nakapab̄ lix chak'rab. Riq'unin a'an nakanau nak nakara li Dios jo' ajcui' eb li ralal xc'ajol. ³ A'an a'in lix r̄abal li Dios: nak takapab̄ lix chak'rab. Moco ch'a'aj ta xp̄abanquil lix chak'rab. ⁴ Li yo'lajenak sa' musik'ej riq'unin li Dios cuan xcuánquil re xcuybal xnumsinquil li mausilal li cuan sa' ruchich'och'. Cuan kacuanquilal chixnumsinquil xban nak nakapab̄ sa' xc'aba' li Jesucristo. ⁵ ¿Ani li tz'akal cuan xcuánquil re xcuybal xnumsinquil li mausilal li cuan sa' ruchich'och'? Lāo li nocop̄aban re nak li Jesús a'an li Ralal li Dios. Ca'aj cui' lāo cuan kacuanquil re xcuybal xnumsinquil li mausilal.

Li naxch'olob xyalal chirix li Dios C'ajolbej

⁶ Li Jesucristo quic'ulun sa' ruchich'och'. Quixc'ul li cubi ha' ut quihoye' ajcui' lix quiq'uel chiru li cruz. Macua' ca'aj cui' li cubi ha' quixc'ul. Quihoye' aj ban cui' lix quiq'uel. Li Santil Musik'ej naxch'olob xyalal chiku chirix li Cristo. Ut yal chixjunil li naxc'ut chiku li Santil Musik'ej. ⁷ Sa' choxa cuanqueb li oxibeb li neque'ch'oloban lix yalal. A'aneb a'in: li Dios Acuabej, li Dios C'ajolbej ut li Dios Santil Musik'ej. Li oxib a'in junajeb chi ribil. ⁸ Ut oxib li c'a'ru qui-uxman sa' ruchich'och' li naxc'ut chiku lix yalal chirix li Jesucristo. Li xben, a'an nak li Santil Musik'ej naxc'ut chiku lix yalal. Li xcab, a'an li c'a'ru qui-uxman nak li Jesús quixc'ul li cubi ha'. Ut li rox, a'an nak quihoye' lix quiq'uel li Jesús chiru cruz. Eb li oxib a'in juntak'et lix yalaleb. ⁹ Lāo nakapab̄ li yal ch'olobanbil xbaneb li cujnk. Abanan li ch'olobanbil xban li Dios k'axal cui'chic nim xcuánquil chiru a'an. Ut li Dios quixch'olob xyalal nak li Jesús a'an li Ralal. ¹⁰ Li ani napaban re li Ralal li Dios, a'an naxnau tz'akal lix yalal. A'ut li inc'a' napaban re li Dios, naxq'ue li Dios chok' aj tic'ti' xban nak inc'a' naxpab̄ li xyalal li quixch'olob li Dios nak quixye re li Jesús: Laat li cualal, chan. ¹¹ Ut a'an a'in li naxch'olob xyalal nak li Dios quixq'ue ke li yu'am chi junelic. Ut li yu'am a'in natauman riq'unin li Ralal. ¹² Yalak ani napaban re li Ralal li Dios, a'an cuan xyu'am chi junelic. Ut li ani inc'a' napaban re li Ralal li Dios, mac'a' lix yu'am chi junelic.

Xnaubal nak cuan kayu'am chi junelic

¹³ Xintz'iba a'in chok' ere laex li nequexp̄aban re li Ralal li Dios re nak laex tenau nak cuan eyu'am chi junelic. ¹⁴ Ut a'in li cau cui' kach'ol chirix li Dios. Nakanau nak li c'a'ak re ru nakatz'ama re, cui nakatz'ama jo' naraj li Dios, a'an nocorabi. ¹⁵ Nakanau nak li Dios nocorabi nak nocotijoc. Riq'unin a'in nakanau nak naxq'ue ke li c'a'ru nakatz'ama chiru. ¹⁶ Cui lāo takil junak li kaherman chi macobc ut naru xcuybal lix mac, chotijok chirix re nak tacuyek' xmac xban li Dios ut tacuank riq'unin li Dios toj chirix lix camic.

Abanan cuan li mac inc'a' naxcuy li Dios. Mac'a' rajbal li tijoc chirix li ani yo chi banunc re li mac li mac'a' xcuybal. ¹⁷ Yal nak li mausilal, a'an mac. Abanan li Dios naxnau bar cuan li mac naru xcuybal ut bar cuan li inc'a'. ¹⁸ Nakanau nak li ani napaban re li Dios inc'a' chic yok chi macobc xban nak li Ralal li Dios na-iloc re. Ut laj tza mac'a' chic xcuquil sa' xben laj pabanel. ¹⁹ Ut nakanau nak lao ralal xc'ajol li Dios. Abanan li jun ch'ol chic li maji' neque'pabán re li Dios, eb a'an cuanqueb rubel xcuquil laj tza. ²⁰ Ut lao nakanau nak li Ralal li Dios qui'ulun sa' ruchich'och'. Quixq'ue kana'leb re xnaubal bar cuan li tz'akal Dios. Ut junajo chic riq'uin li tz'akal Dios xban nak xkapab li Jesucristo li Ralal li Dios. A'an li naq'uehocke li yu'am chi junelic. ²¹ Ex inherman, melok'oni chic li jalanil dios yibambil riq'uin uk'ej. Jo'can taxak.

Li Xcab Hu li Quixtz'iba li San Juan

Laj Juan natz'ibac riq'uin jun li ixt aj pabanel

¹ Lain aj c'amol be chacuu sa' la pabal. At hermana, nintz'ibac acuiq'uin laat li sic'bil acuu xban li Dios. Ut nintz'ibac ajcui' riq'uineb la cualal ac'ajol. Yal nak lain nequeximra. Moco ca'aj ta cui' lain nirrahoc ere. Nequexrahe' aj ban cui' xbaneb chixjunileb li neque'xnau li xyalal. ² Nequexkara xban nak junaj li nakapab ut lix yalal a'an taçuank kiq'uin chi junelic. ³ A' taxak li rusilal, li ruxtan ut li tuktuquilal li naxq'ue li Dios Acuabej ut li Jesucristo li Alalbej chicuank eriq'uin sa' xyalal ut riq'uin rahoc. ⁴ C'ajo' nak nasaho' sa' inch'ol chirilbaleb la cualal ac'ajol nak cuanqueb sa' xyalal. Jo'ca'in li kataklanquil xban li Dios Acuabej. ⁵ Ut anakcuan nintz'ama chacuu nak chikarahak taxak kib chi kibil kib. Li chak'rab a'in moco ac' ta. Abanan q'uebil chak ke chalen chak sa' xticlajic li kapabal. ⁶ Cui nakara kib chi kibil kib, nakapab li kachak'rabinquil xban li Dios. Chalen chak sa' xticlajic, li Dios quixye ke nak tento takara kib chi kibil kib.

Eb laj tzolonej aj balak'

⁷ Ninnumsi cui'chic sa' exic li na'leb a'in xban nak nabaleb laj tzolonej aj balak' cuanqueb sa' ruchich'och'. Eb li cuink a'in inc'a' neque'xch'olob li xyalal nak li Jesucristo quitz'ejcualo' ut tz'akal cuink nak quic'ulun sa' ruchich'och'. Eb li cuink a'in aj balak'eb ut xic' neque'ril li Jesucristo. ⁸ Cheq'uehak retal cheribil erib re nak inc'a' taçanak chi mac'a' rajbal le c'anjele chiru li Dios. Tz'akalak ban re ru xk'ajcamunquil le c'anjele tec'ul riq'uin li Dios. ⁹ Cui ani junak naxq'ue xtz'akob li quix-ch'olob li Jesucristo, li jun a'an mac'a' li Dios riq'uin. Abanan cui nakapab li c'a'ru quixch'olob li Jesucristo, li Dios Acuabej cuank kiq'uin ut cuank ajcui' kiq'uin li Jesucristo li C'ajolbej. ¹⁰ Cui nacuulac junak eriq'uin ut nequenau nak jalan li yo chixch'olobanquil cheru chiru li quixch'olob li Jesucristo, meç'ul sa' le rochoch chi moco teye re nak li Dios chi-osobtesink re. ¹¹ Xban nak li ani naxtz'ama chiru li Dios nak tqatosobtesiheb laj balak', a'an tat'akonk riq'uin lix yibal ru lix c'anjeleb.

Xchak'rabinquileb

¹² Cuan raj chic nabal tinye ere, abanan inc'a' nacuaj xtz'ibankuil sa' li hu a'in. Laín nacuaj xic eriq'uin re nak toatinak ut takil xsahil kach'ol chi kibil kib. ¹³ Neque'xtakla xsahil ach'ol eb li ralal xc'ajol la chak'na', li sic'bil ru xban li Dios. Jo'can taxak.

Li Rox Hu li Quixtz'iba li San Juan

Xq'uebal xsahil xch'ol

¹ Nintz'ibac acuiq'uin, at hermano Gayo. Lain aj c'amol be chacuu sa' la pabal. Relic chi yal nak nacatinra. ² At inherman, yoquin chi tijoc chacuix re nak us tat-elk riq'uin chixjunil li c'a'ru tabanu. Ut nintijoc ajcui' chacuix re nak cauhakat. Ninnau nak tic la ch'ol chiru li Dios. ³ C'ajo' nak nasaho' sa' inch'ol nak neque'c'ulun li herman cuiq'uin ut nacuabi resil nak tic ach'ol. Ut ninnau nak yocat chixbanunquil li xyalal. ⁴ A'an a'in li k'axal nasaho' cui' inch'ol nak nacuabi resil nak eb li kaherman cuanqueb sa' xyalal. Eb a'an chanchaneb li cualal inc'ajol xban nak que'pabán chicuu.

Laj Gayo chabil quixbanu riq'uin xtenku anquileb li herman

⁵ At inherman, k'axal lok'li nacabanu nak nacatenk'ahéb li herman, usta inc'a' naucanauheb ru. ⁶ Eb a'an que'xch'olob xyalal arin chiruheb li herman chanru nak nacaraheb. Chatenk'ahéb chi chabil jo' naraj li Dios nak te'xic chixyebal ratiñ li Dios sa' jalan na'ajej. ⁷ Eb a'an xe'oc chi xic xban nak te'raj xbanunquil xc'anjel li Jesucristo. Ut inc'a' que'xc'ul xk'ajcamunquileb chiruheb li maji' neque'xpab li Dios. ⁸ Jo'can nak tento takatenk'ahéb li cuink a'in xban nak kech aj' c'anjeleb chixch'olobanquil li xyalal.

Lix yibal ru xna'leb laj Diótrefes

⁹ Cuan c'a'ru xintz'iba sa' li hu li xintakla riq'uineb laj pabanel aran. Abanan li herman Diótrefes, a'an naxnimobresi rib ut inc'a' naxc'ul xch'ol li c'a'ru xintz'iba. Naraj taklanc sa' eyank ut inc'a' naxq'ue incuanquil. ¹⁰ Nak tinxic aran toxink'us ut cheru chejunilex tinye li c'a'rú yo chixbanunquil. Yo chixyebal c'a'ak re ru chi atinul chickix. Ut moco nac'ojla ta xch'ol riq'uin a'an. Toj cuan cui'chic c'a'ak re ru inc'a' us naxbanu. Inc'a' naxc'uleb li herman sa' li rochoch ut naxic chixtacchi'inquileb li herman li neque'raj raj xc'ulbal li ula', ut narisieb sa' xyankeb laj pabanel cui neque'xc'ul li rula'e'b.

Chabil resil chirix laj Demetrio.

¹¹ At inherman, matzol acuib riq'uin li inc'a' us. A' ban li us tabanu. Li ani nabanan re li us, a'an ralal xc'ajol li Dios. Ut li ani naxbanu li inc'a' us, toj maji' naxpab li Dios. ¹² Chixjunileb neque'xye nak chabil li herman Demetrio. Ut relic chi yal nak lix yu'am nac'utuc re lix chabilal. Jo'can ajcui' nakaye lão. Ut laqat nacanau nak li nakaye lão a'an yal.

Xrakbal li hu riq'uin sahil ch'olej

¹³ Cuan raj nabal chic tinye acue, abanan inc'a' nacuaj xtz'ibankuil sa' li hu a'in. ¹⁴ Yoquin chixc'oxlanquil nak chi seb takil kib re nak taruk takatina kib. ¹⁵ Chicuank taxak li tuktukuil usilal acuiq'uin. Eb li herman arin neque'xtakla xsahil ach'ol. Ut chaq'ue ajcui' xsahil xch'oleb li kech aj pabanelil chi xjunjunkaleb.

Li Hu li Quixtz'iba li San Judas

Laj Judas natz'ibac riq'uineb li bokbileb xban li Dios

¹ Lain laj Judas, laj c'anjal chiru li Jesucristo. Lain ritz'in laj Jacobo. Nintz'iba li hu a'in rehreb laj pabanel, li bokbileb ut raroqueb xban li Dios Acuabej ut colbileb xban li Jesucristo. ² Chec'ulak taxak chi nabal li ruxtan li Dios, jo' ajcui' li tuktquil usilal ut li rahoc.

Eb laj tzololol aj balak'

³ Ex inherman, anchal inch'ol nak yoquin chixc'oxlanquil tz'ibac eriq'uin chirix li kacolbal sa' comonil. Aban xinq'ue retal nak tajmank ru nak tintz'ibak eriq'uin re xtz'amankuil cheru nak teyal ek'e chixcolbal rix le pabal. A'an li junaj chi pabal k'axtesinbil chak ke xban li Dios. ⁴ Nintz'iba li hu a'in xban nak cuanqueb aj balak' que'xch'ic rib sa' eyank chi mukmu. Eb a'an neque'xye nak laj pabanel naru te'xbanu yalak c'a'ru chi mausilal ut xban li ruisilal li kaDios, mac'a' te'xc'ul. Neque'xsach xcuanquil li Kacua' Jesucristo, laj echal ke. Eb a'an aj k'etoleb ratin li Dios ut chalen chak junxil cutan ac xakabanbil chak li rakba atin sa' xbeneb. ⁵ Usta ac xch'olobaman cheru, nacuaj cui'chic xjulticanquil ere chanru nak li Kacua' Dios quirisiheb chak'lix tenamit aj Israel sa' li na'ajej Egipto. Ut mokon chic quixsacheb li inc'a' que'pabán chiru sa' xyankeb laj Israel. ⁶ Ninjultica ajcui' cheru nak cuan li ángel que'xtz'ektana lix lok'al q'uebileb re jo' ajcui' lix na'ajob. Anakcuan tz'aptz'oqueb sa' li k'ojoyin xban li Dios ut bac'boqueb riq'uin cadena toj tacuulak xcutanquil li rakba atin. ⁷ Jo'can ajcui' que'xc'ul li tenamit Sodoma ut Gomorra jo'queb ajcui' li tenamit cuanqueb chixc'atk. Juntak'eteb lix na'lebeb riq'uineb li ángel li que'macob. Que'muxuc caxar ut que'macob ajcui' riq'uin rech cuinkilal ut riq'uin rech ixkilal. Que'xk'axtesi rib chixbanunquil chixjunil li mausilal. Lix c'atic eb li tenamit a'an, a'an re xc'utbesinquik chiku nak cuan xtojbal rix li mac'. A'an li tac'ulmank mokon sa' li xam li tacuank chi junelic. ⁸ Usta nanauman li c'a'ru quixc'ul li tenamit Sodoma ut Gomorra, abanan toj cuanqueb ajcui' aj balak' li neque'xpab li yal yo'obanbil na'leb. Ut neque'xtz'ajni rib riq'uin li mac. Neque'xtz'ektana lix cuanquil li Kacua' ut neque'xmajecua li cuanqueb xcuanquil ut li cuanqueb xlok'al. ⁹ Ut li ángel Miguel, li k'axal nim xlok'al, inc'a' quixq'ue rib chok' aj rakol atin sa' xbén laj tza. Nak li ángel que'xcuech'i rib riq'uin laj tza chirix lix tz'ejcual laj Moisés, li ángel inc'a' quixhob chi moco quiraj xrakbal atin sa' xben. Quixye ban re: Li Kacua' Dios chik'usuk acue, chan. ¹⁰ Ut eb laj balak' a'in neque'xmajecua ru' li c'a'ak re ru lok', li inc'a' neque'xtau ru. Chanchaneb li xul li mac'a'eb xna'leb. Neque'xsach rib chixbanunquil li c'a'ak re ru chi mausilal. ¹¹ Ra te'xc'ul. Lix na'lebeb a'an jo' lix na'leb laj Caín. Chanchaneb laj Balaam, xban nak neque'xrahi ru li tumin ut junes a'an chic neque'xc'oxla. Neque'xtz'ektana lix chak'rab li Dios ut neque'xnimobresi rib jo' quixbanu laj Coré. Xban a'an nak te'osok'. ¹² Xutanal chok' ere nak cuanqueb laj balak' sa' eyank nak nequebanu le nink'e re sahil ch'olej. Eb laj balak' ca'aj cui' li num cua'ac ut num uc'ac neque'xbanu ut inc'a' neque'xutanac. Junes xch'olaninquileb rib neque'xc'oxla. Eb laj balak' a'an chanchaneb li chok li mac'a' hab chi sa', li nac'ame' yalak bar xban li ik'. Laj balak' mac'a' neque'oc cui'. Chanchaneb li che' li inc'a' neque'uchin, li namich'man chi junaj cua' ut nachakic. ¹³ Nak na-el chak xcuokx li palau xban xcacuil rok li ha', nalemeb rib chire li ha' lix tz'ajnil li ha'. Jo'can ajcui'

lix xut_qaneb laj balak' xban li m_ausilal li neque'xb_an_u. Chanchaneb li chahim li yal naxbeni rib yalak bar chiru choxa. Eb li cuink a'in ac xakabanbileb chi xic chi junaj cua toj sa' xchamal ut xk'ojyinal li tojba mac. ¹⁴ Laj Enoc, a'an lix cuukil chak chirix laj Adán. Quiatinac chirixeb li cuink a'in jo' quic'ute' chiru xban li Dios. Laj Enoc quixye: —Abihomak, chan. Tol-_εlk li Kacua' rochben li q'uila ok'ob chi ángel. ¹⁵ Tachalk chi rakoc atin sa' xb_əneb chixjunil ut chixch'olobanquil lix m_aqueb riq'uin lix yehom xbanuhomeb jo' eb ajcui' riq'uin li xic' aj atin xyehomeb chirix li Kacua', chan laj Enoc. ¹⁶ Eb a'in aj cuech'oneleb. Mac'a' nacuulac chiruheb. Ca'aj cui' li c'a'ru naxrahi ru li tz'ejcualej neque'xb_an_u. Neque'atinac re xnimobresinquileb ribeb. Neque'xk'unbesi junak riq'uin k'unil atin yal re li c'a'ru neque'raj riq'uin.

Xch'olobanquil xna'leb eb laj pabanel

¹⁷ Ut laex ex inherman, tento nak tacuank sa' ech'ol eb li atin li que'xye chak lix apóstol li Kacua' Jesucristo. ¹⁸ Eb li apóstol que'xye ere nak tanach'ok chak roso'jiqueb li cutan te'chalk eb laj balak' aj majecuanel. A' li mac li naxrahi ru lix tz'ejcualeb, a'an li neque'xb_an_u. ¹⁹ Eb li cuink a'in, a'neb li neque'yo'oban jachoc ib. Neque'xrahi ru lix m_ausilal li ruchich'och' ut li Santil Musik'ej mac'a' riq'uineb. ²⁰ A'ut laex, ex inherman, cauhak taxak ech'ol sa' le santil pabal. Ut chextijok riq'uin xcuanquil li Santil Musik'ej. ²¹ Chenauhak nak nequexra li Dios ut inc'a' chicuibank ech'ol. Cheroybeni-hak nak tol-_εlk li Kacua' Jesucristo ut riq'uin lix nimal ruxtan_tixq'ue le yu'am chi junelic. ²² Cheq'uehak xna'lebeb li neque'cuibán xch'ol. ²³ Q'uehomak le ch'ol chixcolbal eras eritz'in. Chanchan li yokex chirisinquileb sa' xxamlel li xbalba. Ut li jun ch'ol chic eb laj k'etol atin, cheruxtanaheb ru aban tinye ere: cheq'uehak retal. Inc'a' chextz'akonk riq'uineb lix m_ausilal xban nak numtajenakeb cui'chic lix m_ausilal. Xic' cheril lix m_aqueb jo' junak k'el t'icr numtajenak xtz'ajnil ru.

Xnimanquil ru li Dios

²⁴ Ut anakcuan lok'oninbil taxak li nimajcual Dios. A'an k'axal nim xcuanquil chécolbal re nak inc'a' texmacobk. Nim ajcui' xcuanquil chék'axtesinquileb sa' xnimal xlok'al li Dios chi mac'a'ak emac ut chi sa sa' ech'ol. ²⁵ Lok'oninbil taxak li junaj chi Dios, laj Colol ke sa' xc'aba' li Kacua' Jesucristo. A'an taxak chinimák xcuanquil ut xlok'al chalen chak najter k'e cutan, ut toj chalen anakcuan ut chi junelic. Jo'can taxak.

Li Hu Apocalipsis li Quixtz'iba li San Juan

Li quic'utbesic chiru laj Juan xban li Jesucristo

¹ Li tz'ibabil sa' li hu a'in quic'utbesic chiru li Jesucristo xban li Dios. Quixc'utbesi chiru li Jesucristo re nak a'an chic tac'utbesink re chiruheb laj pabanel li c'a'ru tac'ulmank chi seb. Jo'can nak li Jesucristo quixtakla lix ángel chixc'utbesinql a'in chiru laj Juan laj c'anjal chiru. ² Ut a'an quixye resil chixjunil li quic'utbesic chiru. A'an a'in li quixye li Dios jo' quic'utbesic chiru laj Juan xban li Jesucristo. ³ Us xak re li ani naril xsa' li hu a'in ut naxq'ue retal li c'a'ru naxye. Us xak re li ani naxbanu li c'a'ru tz'ibabil chi sa' xban nak relic chi yal nak yo chi cuulac xk'ehil nak tac'ulmank li c'a'ru naxq'ue.

Laj Juan quixtakla xsahil xch'oleb li cuukub ch'utaleb chi aj pabanel aran Asia

⁴ Lain laj Juan. Yoquin chi tz'ibac eriq'uin laex li cuukub ch'utaleb chi aj pabanel li cuanquex aran Asia. A' taxak li usilal ut li tuktuquilal chi cuank eriq'uin li naxq'ue li Dios li ac cuan chak sa' xticlajic, li cuan anakcuan, ut li cuank chi junelic, ut li naxq'ue li Santil Musik'ej li cuan cui' lix lok'laj c'ojaribal li Kacua'. ⁵ A' taxak li usilal ut li tuktuquilal chicuank eriq'uin li naxq'ue li Jesucristo li tic xch'ol chixyebal li yal. Li Jesucristo a'an li xben li quicuacli chi yo'yo sa' xyankeb li camenak. A'an li k'axal nim xcuanguard sa' xbeneb chixjunileb li cuanqueb xcuanguard sa' ruchich'och'. A'an quirahoc ke ut a'an qui-isin re li kamac nak quihoy'e' lix quic'uel nak quicam sa' kac'aba'. ⁶ A'an naq'uehoc kacuanquil re toc'anjelak chok' aj tij chiru li Acuabej Dios. Lok'oninbil taxak li Jesucristo. Nimanbilak taxak ru ut a'an taxak chicuank xcuanguard sa' xben chixjunil chi junelic k'e cutan. Jo'can taxak. ⁷ Q'uehomaketal. A'an tachalk chak sa' li chok ut chixjunileb te'ilok re. Te'r'il ajcui' eb li que'camsin re. Chixjunileb li cuanqueb sa' ruchich'och' te'yot'ek' xch'ol ut te'yabak xban li raylal li te'xc'ul. Jo'can taxak chic'ulmank. ⁸ Quixye li Kacua' Dios: —Lain quinyo'obtesin re chixjunil ut lain tinsachok re chixjunil. Lain li Alfa ut li Omega. Ut k'axal nim incuanquil, chan li nimajcual Dios.

Nak quic'utbesic li Cristo chiru laj Juan sa' visión

⁹ Lain laj Juan, le rech aj pabanelil. Lain xintz'akon ajcui' riq'uin xcuybal li raylal sa' xc'aba' li Jesucristo erochben laex li sic'bil eru xban li Kacua'. Lain cuanquin arin sa' li na'ajej Patmos li sutsu riq'uin ha' xban nak xinch'olob xyalal li ratin li Dios ut xinye resil li Jesucristo. ¹⁰ Sa'li cutan nak nakach'utub kib chixlok'oninql li Kacua', riq'uin xcuanguard li Santil Musik'ej, li Dios quixc'utbesi jun li visión chicuu. Quicuabi jun xyab cxux chicuix. Chanchan xyab jun li trompeta yo chi ec'anc. ¹¹ Quixye cue: —Li c'a'ru tinc'utbesi chacuu tatz'iba sa' jun li botbil hu ut tatakla riq'uineb li cuukub ch'utaleb laj pabanel li cuanqueb sa' xcuent Asia. Takla riq'uineb li cuanqueb Efeso, Esmirna, ut Pérgamo. Ut tatakla ajcui' riq'uineb li cuanqueb Tiatira, Sardis, Filadelfia ut Laodicea, chan. ¹² Ut nak quin-iloc chicuix chirilbal ani yo chi atinanc cue, quicuil cuukub li candelero cuan xxamlel yibabil riq'uin oro. ¹³ Ut sa' xyankeb li candelero xakxo li C'ajolbej. Chanchan na-iloc jun cuink nak quicuil. Toj chi rok nacuulac xnimnal rok li rak'. Cuan jun c'amal sa' yibabil riq'uin oro chire xch'ol. ¹⁴ Li rismal xjolom sak sak jo' xsakal li nok' lana. Chanchan xsakal li nieve. Ut lix nak' ru nalemz'un chanchan xam.

15 Li rok nalementz'un chanchan li chabil ch'ich' bronce ut cakjorin chanchan li k'an ch'ich' nak cuan sa' xam. Nak naqtinac chanchan xyab lix cau ok li palau. **16** Sa' lix nim uk' chapcho cuukub li chahim. Ut sa' re cuan jun li ch'ich' ca' pac'al xk'esnal. C'ajo' nalementz'un li ru. Chanchan nak nalementz'un li sak'e. **17** Nak quicuil ru quint'ane' chi rok. Chanchan camenak quincana. Ut a'an quixq'ue lix nim uk' sa' inben ut quixye cue: —Matxucuac. Lain li ac cuanquin chak sa' xticladic li ruchich'och' ut cuankin chi junelic k'e cutan. **18** Lain yo'yoquin. Lain quincam, abanan yo'yoquin chic chi junelic k'e cutan. Lain cuan incuanquil sa' xb'en li camc. Ut lain ajcui' yal cue sa' xb'en li na'ajej li neque'xic cui' li camenak. **19** Tz'iba retalil li c'a'ru yocat chiribal xban nak a'an retalil li yo chi c'ulmanc anakcuán ut li tac'ulmank mokon. **20** Lix yalal li cuukub chi chahim li xacuil sa' lin nim uk', a'an li retalileb li cuukub lix takl li Dios li neque'iloc reheb li cuukub ch'utal chi aj pabanel. Ut lix yalal li cuukub chi candelero, a'an retalileb li cuukub ch'utal chi aj pabanel.

2

A'in li esilal li quixtakla riq'uineb laj pabanel li cuanqueb Efeso

1 Tz'iban riq'uin lix takl li Dios li na-iloc reheb li jun ch'utal chi aj pabanel li cuanqueb Efeso ut taye re chi jo'ca'in: —Li cuan cuukub chi chahim sa' xnim uk', li yo chi b̄ec sa' xyankeb li cuukub chi candelero yo chixyebal ere chi jo'ca'in: **2** Lain ninnau chixjunil li nequebanu. Ninnau nak cau nequexc'anjelac ut ninnau ajcui' nak inc'a' nach'inan ech'ol. Ninnau nak xic' nequeril li neque'xbanu mausilal. Xeq'ue retal li ani xe'xq'ue ribeb chok' apóstol ut macu'a'eb. Ut xenau nak aj balak'eb ut aj tic'ti'eb. **3** Ninnau nak nabal li raylal xec'ul sa' inc'aba' lain. Abanan nequecuy xnumsinquil. Ut inc'a' xch'inan ech'ol. Ninnau nak cau nequexc'anjelac yal xban inrābal lain. **4** Abanan cuan jun epatil chicuu. Laex inc'a' chic niquinera jo' nak xinera chak junxil. **5** Cheq'uehak retal c'a'ru xexpalto' cui'. Chijulticok' ere chanru nak xinera chak junxil. Yot'omak ech'ol ut jalomak ec'a'ux ut chinera hak cu'chic jo' nak xinera chak junxil. Cui inc'a' tayot'ek' ech'ol ut tejal ec'a'ux, lain tincuisi le candelero sa' xna'aj chi junpat. **6** Abanan cuan jun li us nequebanu. Laex xic' nequeril li mausilal li neque'xbanu li neque'taken re li cuink laj Nicolás. Jo'can ajcui' lain. Xic' nacuil li mausilal li neque'xbanu eb a'an. **7** Cui teraj xtaubal ru li xyalal, cheq'uehak retal li naxye li Santil Musik'ej reheb laj pabanel. Li ani tixcuy xnumsinquil chixjunil li raylal a'in ut inc'a' nach'inan xch'ol sa' lix pabal, lain tinq'ue lix yu'am chi junelic. Ut a'an tacuank riq'uin li Dios chi junelic sa' lix santil na'aj, chan li C'ajolbej reheb laj Efeso.

Li esilal li quixtakla riq'uineb laj pabanel li cuanqueb Esmirna

8 Ut quixye cui'chic cue: —Tz'iban riq'uin lix takl li Dios, li na-iloc reheb li jun ch'utal chi aj pabanel li cuanqueb Esmirna. Ut taye re: Li ac cuan chak sa' xticladic ut cuank ajcui' toj sa' roso'jic, li quicam ut quicuacli cui'chic chi yo'yo sa' xyankeb li camenak, naxye ere chi jo'ca'in: **9** Lain ninnau chanru cuanqueb. Ninnau chixjunil li raylal nequec'ul. Ninnau nak neba'ex. Abanan cuan ebiomal riq'uin li Dios. Ninnau nak nequexmajecuac xbaneb li neque'xye nak tz'akaleb aj judío, abanan inc'a' neque'c'anjelac chiru li Dios. Aj c'anjeleb ban chiru laj tza. **10** Mexxucuac xban li raylal li tachalk sa' eben. Cuanqueb sa' eyank li te'q'uehek' sa' tz'alam xbaneb laj c'anjel chiru laj tza re xyalbal rix le pabal. Tec'ul raylal, abanan inc'a' najt tec'ul. Mich'inan ech'ol. Cauhak ban ech'ol toj chirix le camic ut lain tinq'ue ere le k'ajcamunquil.

Chanchan nak tinq'ue le corona nak tinq'ue le yu'am chi junelic. ¹¹ Cui teraj xtaubal ru li xyalal, cheq'uehak retal li naxye li Santil Musik'ej reheb laj pabanel. Li ani tixcuy xnumsinquil chixjunil li raylal a'in ut inc'a' nach'inan xch'ol sa' lix pabal, li jun a'an inc'a' tixc'u'l lix cab xcamic. Inc'a' taxic sa' xbalba, chan li C'ajolbej reheb laj Esmirna.

Li esilal li quixtakla riq'uineb laj pabanel li cuanqueb Pérgamo

¹² Ut quixye cui'chic cue: —Tz'ib'an riq'uin lix takl li Dios li na-iloc reheb laj pabanel li cuanqueb Pérgamo ut taye re: Li cuan xch'ich' ca' pac'al xk'esnal naxye ere chi jo'ca'in: ¹³ Lain ninnau chanru nak cuanquex. Lain ninnau nak cuan xcuانquil laj tza sa' li tenamit li cuanquex cui'. Abanan laex toj yoquex chinlok'oninquel. Inc'a' xecanab inpabanel usta quicamsic laj Antipas xban nak quixye cuesilat aran sa' le tenamit li cuan rubel xcuانquil laj tza. ¹⁴ Abanan cuan c'a'ak re ru yoquex chixbanunquel inc'a' us xban nak cuanqueb sa' eyank li toj yoquex chixq'uebal xcuانquil lix tijleb laj Balaam li quic'utuc chiru laj Balac chanru nak tixq'ueheb chi macobc laj Israel. Quixye reheb nak taruk te'xtzaca li tzacaemk li mayejanbil chiru li jalani díos. Ut quixtacchi'iheb re nak te'yumbetak ut te'co'betak. ¹⁵ Ut cuanqueb ajcui' sa' eyank li toj neque'xq'ue xcuانquil lix tijleb laj Nicolás. Lain xic' nacuil li mausilal li neque'xbanu eb a'an. ¹⁶ Jo'can nak isihomakeb sa' eyank li inc'a' useb xna'leb. Cui inc'a' nequerisheb, lain tinxic chi junpat eriq'uin ut tinklelik riq'uineb. Chanchan nak tincamsiheb riq'uin k'esnal ch'ich' nak tinsach ruheb riq'uin li cuatin. ¹⁷ Cui teraj xtaubal ru li xyalal, cheq'uehak retal li naxye li Santil Musik'ej reheb laj pabanel. Li ani tixcuy xnumsinquil chixjunil li raylal a'in ut inc'a' nach'inan xch'ol sa' lix pabal, lain tinq'ue li choxahil cua li inc'a' na-ilman ru chixtzaca. Ut tinq'ue ajcui' jun li saki pec re ut tz'ibanolik chiru jun li ac' c'aba'ej. Ma' ani tana'ok re li c'aba'ej. Ca'aj cui' li ani li tac'uluk re, chan li C'ajolbej reheb laj Pérgamo.

Li esilal li quixtakla riq'uineb laj pabanel li cuanqueb Tiatira

¹⁸ Ut quixye ajcui' cue: —Tz'ib'an riq'uin lix takl li Dios li na-iloc reheb li jun ch'utal chi aj pabanel li cuanqueb Tiatira ut taye re: Li C'ajolbej, li nalementz'un xnak' ru chanchan xam ut li rok chanchan li chabil ch'ich' bronce li nalementz'un, naxye ere chi jo'ca'in: ¹⁹ Lain ninnau chanru nak cuanquex. Ninnau nak nequexrähoc ut nequexpaban. Ninnau nak cau nequexc'anjelac chicuu ut nábal li raylal nequecuy. Lain ninnau nak k'axal cui'chic cau yoquex chi c'anjelac chiru li xebanu junxil. ²⁰ Abanan inc'a' nacuulac chicuu nak nequec'am erib sa' usilal riq'uin li iixk li yibru xna'leb li chan chan lix na'leb lix Jezabel. Li iixk a'an naxq'ue rib chok' xprofeta li Dios, abanan moco yal ta. Yo ban chixbalak'inquileb laj c'anjel chicuu. Riq'uin li naxbanu yo chixc'ambaleb xbe chi yumbetac ut chi co'betac. Ut yo' ajcui' chixc'ambaleb xbe chixtzacanquil li tzacaemk mayejanbil chiru li jalani díos. ²¹ Lain xcuaj raj nak tixyot' xch'ol ut tixjal xc'a'ux ut xcuoybeni re tixbanu. Abanan inc'a' naraj xcanabanquel li mausilal. ²² A'ut anakcuan lain tinq'ue junak yajel sa' xben re nak tat'anek' sa' ch'at. Ut eb li neque'xbanu mausilal riq'uin te'x'ul ajcui' li raylal cui inc'a' neque'yo'e' xch'ol ut cui' inc'a' neque'xcanab xbanunquel li mausilal li naxbanu a'an. ²³ Ut tink'axtesiheb chi camc li neque'taken re. Ut riq'uin a'in te'xq'ue retal chixjunileb laj pabanel nak lain ninnau c'a'ru nanume' sa' xch'oleb li junjunk. Lain ninnau c'a'ru nequec'oxla. Ut lain tinq'ue ek'ajcamunquel chejunkal a' yal chanru le yehom ebanuhom. ²⁴ Mac'a' tinye ere re ek'usbal laex aj Tiatira li jo' q'uialex inc'a' xetzol erib riq'uin li tijleb li neque'xch'olob eb a'an, xban nak a'an xmaus aj na'leb laj tza. ²⁵ Ca'aj cui' tinye ere

a'in: Cacuubresihomak ech'ol sa' le pabal toj tacuulak xk'ehil nak tincuulak eriq'uin. ²⁶ Li ani naxcuy xnumsinquil chixjunil li raylal a'in ut inc'a' nach'inan xch'ol sa' lix pabal ut tixbanu li c'aru nacuaj toj sa' roso'jic, lain tinq'ue xcuanguil chi taklanc sa' xbeneb li tenamit. ²⁷ Eb a'an te'taklank sa' xbeneb li tenamit chi cau. Chanchan nak te'xtaklaheb riq'uin jun li xuk' ch'ich'. Ut tasachek' xcuanguileb li te'taklank cui'. Chanchan nak najore' junak ch'och' uc'al. Lain tinq'ue lix cuanguileb jo' li cuanguil li quixq'ue cue lin Yucua'. ²⁸ Ut lain tinq'ue ajcui' reheb lix lok'aleb, chanchan xch'ina'susal li cak chahim. ²⁹ Cui teraj xtaubal ru li xyalal, cheq'uehak retal li naxye li Santil Musik'ej reheb laj pabanel, chan li C'ajolbej reheb laj pabanel li cuanqueb Tiatira.

3

Li esidal li quixtakla riq'uineb laj pabanel li cuanqueb Sardis

¹ Ut li C'ajolbej quixye cui'chic cue: —Tz'iban riq'uin lix takl li Dios li na-iloc reheb li jun ch'utal chi aj pabanel li cuanqueb Sardis ut taye re: Li cuan li Santil Musik'ej riq'uin ut li cuan li cuukub chi chahim sa' ruk' naxye ere chi jo'ca'in: Lain ninnau chanru nak cuanqueb. Eb li tenamit neque'xye nak laex tz'akal aj pabanelex. Abanan moco yal ta. Lain ninnau nak inc'a' neque'xpabán chi tz'akal. Chanchan camenakex. ² Q'uehomak retal chanru nak cuanqueb. Laex inc'a' tz'akal re ru le yu'am chiru li Kacu'a Dios. Jo'can nak q'uehomak ech'ol chi pabanc chi tz'akal ut mich'inan chic ech'ol. ³ Chijulticok' ere li xyalal li querabi chak junxil. Chiyo'tek' ech'ol ut jalomak ec'a'ux. Cacuubresihomak ech'ol sa' le pabal. Cui inc'a' tebanu a'an, lain tincuulak eriq'uin chi mac'a' sa' ech'ol jo' naxbanu laj elk' ut tinrakok atin sa' eben. ⁴ Lain ninnau nak aran Sardis toj cuanqueb cuib oxib sa' eyank li tic xch'oleb. Inc'a' xe'xtz'ajni ribeb riq'uin xbanunquil li mausilal. Lain tanye reheb nak xc'ulubeb cuanc cuiq'uin chi tiktoqueb riq'uin saki ak'ej xban nak tic xch'oleb. ⁵ Li ani tixcuy xnumsinquil chixjunil li raylal a'in ut inc'a' nach'inan xch'ol sa' lix pabal, a'an tatikibak riq'uin saki ak'ej. Ut lain inc'a' tinsach lix c'aba' sa' li hu tz'ibanal cui' xc'aba'eb li cuanqueb xyu'am chi junelic. Ut chiru lin Yucua' ut chiruheb ajcui' lix angel, lain tanye nak a'an cualal inc'ajol. ⁶ Cui teraj xtaubal ru lix yalal, cheq'uehak retal li naxye li Santil Musik'ej reheb laj pabanel. Jo'ca'in quixye li C'ajolbej reheb laj pabanel li cuanqueb Sardis.

Li esidal li quixtakla riq'uineb laj pabanel li cuanqueb Filadelfia

⁷ Ut li C'ajolbej quixye cui'chic cue: —Tz'iban riq'uin lix takl li Dios li na-iloc reheb li jun ch'utal chi aj pabanel li cuanqueb Filadelfia, ut taye re: Li tic xch'ol ut li tz'akal Dios, a'an cuan xcuanguil jo' li cuanguil li quiq'uehe' re laj David junxil. Li oquebal li tixte a'an, ma ani naru tatz'apok re; ut li oquebal li tixtz'ap a'an, ma ani naru tatz'apok re. ⁸ A'an yo chixyebal ere chi jo'ca'in: Lain ninnau chanru nak cuanqueb. Lain xinte li oquebal cheru ut ma ani naru tatz'apok re. Ninnau nak inc'a' cau erib. Abanan inc'a' xinetz'ektaña. Junelic ban nequebanu li c'aru ninye. ⁹ Cuanqueb li neque'xbanu li c'aru naraj laj tza. Neque'xye nak tz'akaleb aj judío, abanan inc'a' neque'c'anjelac chiru li Dios. Yal tic'ti' neque'xye. Lain tincanabeb toj retal te'xcuik'ib ribeb cheru re nak te'xq'ue retal nak lain ninrahoc ere. ¹⁰ Laex xecuy xbanunquil li xinye ere ut inc'a' xch'inan ech'ol sa' le pabal. Jo'can nak lain tincolok ere sa' xk'ehil nak tachalk li raylal sa' xbeneb chixjunileb li cuanqueb sa' ruchich'och'. ¹¹ Lain chi seb tinchalk. Tincuulak eriq'uin. Jo'can nak cauhak taxak ech'ol sa' le pabal ut mecanab inpabankuil

re nak tec'ul le k'ajcamunquil li tinq'ue ut re ajcui' nak inc'a' taq'uehek' re jalan. ¹² Li ani tixcuy xnumsinquil li raylal ut inc'a' tach'inank xch'ol sa' lix pabal, tinq'ue xlok'al ut ma ani taruk taisink re sa' lix na'aj li taq'uehek' re xban lin Yucua'. Chanchanak li okech li nacutun re lix templo'lí Dios, li inc'a' na-ec'an sa' xna'aj. A'an taquank riq'uin lin Yucua' chi junelic sa' li Ac' Jerusalén li tixq'ue lin Yucua' cuan sa' choxa. Ac' chic lix c'aba' tinq'ue. Ut chixjunileb te'xnau nak a'an ralal xc'ajol lin Yucua'. Ut tinq'ue ajcui' re lin c'aba' lain. ¹³ Cui teraj xtaubal ru li xyalal, cherabihak li naxye li Santil Musik'ej reheb laj pabanel. Jo'ca'in quixye li C'ajolbej reheb laj pabanel li cuanqueb Filadelfia.

Li esilal li quixtakla riq'uineb laj pabanel li cuanqueb Laodicea

¹⁴ Ut li C'ajolbej quixye cui'chic cue: —Tz'ibán riq'uin lix takl li Dios li na-iloc reheb li jun ch'utal chi aj pabanel li cuanqueb Laodicea ut taye re: Li ani naxc'aba'in "Amén", li junelic tjc xch'ol chixyebal li yal, li ac cuan chak nak quiyibac chak li ruchich'och' ut chixjunil li c'a'ak re ru cuan, naxye ere chi jo'ca'in: ¹⁵ Lain ninnau chanru nak cuanqueb. Laex inc'a' yoquex chinpabankuil chi anchal ech'ol, chi moco yoquex chintz'ektanankuil. Us raj nak tinépab chi anchal ech'ol malaj ut tinétz'ektana raj chi junaj cua. Abanan laex chanchanex li ha' moco tik ta, chi moco que. Yal lulu ban. ¹⁶ Xban nak xcab rix ech'ol nak yoquex chinpabankuil, lain texintz'ektana. Chanchan texinx'a cua nak texintz'ektana. ¹⁷ Laex nequeye nak biomex ut cuan chixjunil li c'a'ru ere. Mac'a' napalto' ke chanqueb. Abanan inc'a' nequeq'ue retal nak k'axal ra cuanqueb. Chanchan neba'ex ut mutz'ex. Chanchan t'ust'uxquex xban nak inc'a' niquinepab. K'axal tok'obal eru. ¹⁸ Jo'can nak ninye ere: Lok'omak e-oro cuiq'uin li ac numsinbil sa' xam ut isinbil xtz'ajnil. Lok'omak le saki t'icr cuiq'uin re tetikib erib ut inc'a' tec'ut exután nak t'ust'uxquex. Lok'omak xbanol li xnak' eru cuiq'uin re nak tex-ilok. ¹⁹ Li ani nequebinra, nintijeb ut nink'useb. Jo'can nak ninye ere nak jalomak ec'a'ux ut q'uehomak ech'ol chinpabankuil. ²⁰ Chanchan nak cuanquin chire li oquebal nak yoquin chebokbal. Li ani taabink re li cuatin ut tinixpab, lain tincuank riq'uin ut tocuank chi sum atin. ²¹ Li ani tixcuy xnumsinquil li raylal ut inc'a' tach'inank xch'ol, lain tinq'ue chi c'ojlac chinc'atk sa' lin c'ojaribal jo' nak c'ojc'oquin chixc'atk lin Yucua' sa' lix c'ojaribal xban nak xincuy xnumsinquil li raylal. ²² Cui teraj xtaubal ru li xyalal, cheq'uehak retal li naxye li Santil Musik'ej reheb laj pabanel, chan li C'ajolbej reheb laj pabanel li cuanqueb Laodicea.

4

Lix lok'laj c'ojaribal li Dios cuan sa' choxa

¹ Ut chirix a'an quicuil jun chic li visión. Quicuil jun li oquebal teto sa' choxa. Ut quicuabi cui'chic li xyab li cux li quicuabi xbén cua, chanchan xyab jun li trompeta nak yo chi atinac, ut quixye cue: —Taken chak arin ut tinc'utbesi chacuu li c'a'ak re ru tac'ulmank mokon, chan. ² Ut sa' li visión li quixc'utbesi chicuu li Dios riq'uin xcuankuil li Santil Musik'ej, quicuil sa' choxa jun li lok'laj c'ojaribal. Ut quicuil nak cuan jun c'ojc'o sa' li c'ojaribal a'an. ³ Ut li ani chunchu sa' li c'ojaribal, c'ajo'lix lok'al. Li rilobal chanchan li chabil pec jaspe malaj ut chanchan lí chabil pec cornalina li nalementz'un. Ut lix c'ojaribal sutsu riq'uin jun li xoquik'ab chanchan li chabil pec esmeralda nak quicuil. ⁴ Ut chi xjun sutam li lok'laj c'ojaribal cuanqueb cahib xca'c'al chic li c'ojaribal. Ut aran c'ojc'oquib li cahib xca'c'al li que'c'amoc chak be chiruheb laj pabanel. Sak li rak'eb ut cuanqueb xcorona oro sa' xjolomeb.

5 Ut sa' li lok'laj c'ojaribal nareploc li chanchan rak' çak ut lix yäb li chokinc chanchan nak namok li çak. Chiru cuan cuukub li lámpara lochlo retalil li Santil Musik'ej. **6** Ut quicuil ajcui' jun chanchan nebal cuan chiru li c'ojaribal. Nalemtz'un jo' li lem ut chanchan jun li palau sak sak ru. Chi xjun sutam li c'ojaribal cuanqueb cahib li yo'yoqueb, chanchaneb ángel. Nabal li xnak' ruheb, jo' chiru jo' chirixeb. **7** Li xben li chanchan ángel, a'an chanchan na-iloc jun li cakcoj; li xcab, a'an chanchan na-iloc jun li cuacax; li rox, a'an cuan xnak' ru chanchan ru jun cuink; ut li xca, a'an chanchan jun li nimla c'uch yo' chi xic'anc. **8** Cuan cuakitk xiq'ueb li junjunk. Nabal li xnak'eb ru cuan xca' pac'alil. Chi k'ek chi cutan yoqueb chixyebal: —Santo, santo, santo. Lok'oninbil taxak ru li Kacua' Dios li k'axal nim xcuanquil, li ac cuan ajcui' chak sa' xticlajic, li cuan anakcuan ut li cuank chi junelic. **9** Rajjal neque'xq'ue xlok'al ut neque'xnima ru ut neque'xbantioxi chiru li nimajcual Dios, li yo'yo chi junelic k'e cutan, li c'ojc'o sa' lix lok'laj c'ojaribal. **10** Eb li chanchaneb ángel yoqueb chi lok'oninc, ut li cahib xca'c'al chi aj c'amol be neque'xcuik'ib ribeb chiru li Kacua' Dios, li c'ojc'o sa' lix c'ojaribal ut que'xlok'oni xban nak yo'yo chi junelic k'e cutan ut que'xq'ue lix corona chiru lix c'ojaribal re xq'uebal xlok'al. **11** Ut que'xye re: At Kacua', at kaDios, ac'ulub nak takaq'ue alok'al. Ac'ulub nak tanimak acuu ut taq'ueheh' xcuanquil xban nak laat catyiban re chixjulin li c'a'ru cuan. Xban nak jo'can xacuaj laat, jo'can nak xayo'obtesiheb li c'a'ru cuanqueb.

5

Li botbil hu ut li carner

1 Ut sa' lix nim uk' li Dios li c'ojc'o sa' li lok'laj c'ojaribal quicuil jun li botbil hu tz'ibabil chi sa' ut chirix ut tz'apbil riq'uin cuukub li sello. **2** Ut quicuil jun li ángel k'axal cau rib ut chi cau xyab xcux quixye: —¿Ani li xc'ulub risinqul li sello ut xtebal li hu? chan. **3** Xban nak moco xc'ulubeb ta, ma jun reheb sa' choxa, chi moco sa' ruchich'och', chi moco sa' xna'ajeb li camenak quiru xtebal li hu chi moco rilbal xsa'li hu. **4** Ut c'ajo' nak quinyabac chirilbal nak ma jun reheb xc'ulubeb xtebal li hu chi moco xc'ulubeb rilbal xsa'. **5** Ut jun reheb li chunchuqueb sa' li cahib xca'c'al chi c'ojaribal quixye cue: —Matyabac xban nak cuan jun taruk tixte li hu a'in. Cuan jun aj Judá chanchan li cakcoj. A'an xcomoneb li ralal xc'ajol li rey David. A'an xc'ulub risinqul li cuukub chi sello ut xc'ulub xtebal li hu xban nak a'an quixcuy xnumsinquil li ra xic', chan. **6** Quicuil Jun xakxo aran chiru li lok'laj c'ojaribal li sutsu xbaneb li cahib li chanchaneb ángel jo'queb ajcui' li cahib xca'c'al li c'ojc'oqueb aran. Quic'utun nak li jun a'an ac camsinbil. Chanchan carner. Cuan cuukub xxucub ut cuan ajcui' cuukub xnak' ru retalil li Santil Musik'ej li quitaklac sa' chixjulin li ruchich'och'. **7** Li Jun li chanchan carner quichal ut quixchap li botbil hu li cuan sa' xnim uk' li c'ojc'o sa' li lok'laj c'ojaribal. **8** Nak quixchap li botbil hu, li cahib li chanchaneb ángel ut li cahib xca'c'al li c'ojc'oqueb aran que'xcuik'ib ribeb chiru li Jun li chanchan carner. Cuanqueb x-arpa chi xjunkaleb ut cuanqueb xsec' yibabil riq'uin oro ut cuan li sununqul ban chi sa' retalil lix tijeb li ralal xc'ajol li Dios. **9** Que'xbicha jun li ac' bich ut que'xye: —Ac'ulub xchapbal li botbil hu ut xtebal li sello xban nak laat catcamsic. Riq'uin la quiq'uel xalok'eb nabal re nak te'oc chok' ralal xc'ajol li Dios. Yalak ani xacoleb a' yal ani xtepaleb xxe'tonil yucua'eb, ut a' yal bar xtenamiteb ut a' yal chanru li ratinobaleb. **10** Xaq'ueheb xcuanquil chi c'anjelac chiru li kaDios jo' aj tij, ut taq'ueheb ajcui' chi taklanc sa' ruchich'och'. — **11** Ut sa' li visión quicuileb li q'quila

ok'ob chi ángel li cuanqueb chi xjun sutam li lok'laj c'ojaribal ut li cahib li yo'yoqueb li chanchaneb ángel jo'queb ajcui' li cahib xca'c'al li c'ojc'o queb aran. Quicuabi nak yoqueb chi qatinac li q'uila ok'ob chi ángel. ¹² Que'xye chi cau xyab xcux: —Li Jun li chanchan carner li quicamsic, a'an xc'ulub nak taq'uehek' xlok'al xban nak numtajenak xcuquil, xbiomal, xna'leb, ut xcacuilal. Ut xc'ulub nak taq'uehek' xlok'al, tанимак ru ut талок'оник.— ¹³ Ut quicuabi ajcui' nak que'atinac chixjunil li c'a'ak re ru quiyo'obtesic xban li Dios, jo' li cuanqueb sa' choxa, jo' li cuanqueb sa' ruchich'och', jo' ajcui' li cuanqueb sa'li palau, jo'queb ajcui' li cuanqueb sa' xna'ajeb li camenak. Chixjunileb li que'yo'obtesic xban li Dios que'xye: —A' taxak li Dios li c'ojc'o sa' xc'ojaribal jo' ajcui' li Jun li chanchan carner, chilok'onik ut chiq'uehek' xlok'al. Chiq'uehek' xcuquil ut chinimak ru chi junelic k'e cutan.— ¹⁴ Ut li cahib li yo'yoqueb li chanchaneb ángel, yoqueb chixyebal: —Jo'can taxak.— Ut eb li cahib xca'c'al li c'ojc'o queb aran que'xciuk'ib ribeb ut que'xlok'oni li yo'yo chi junelic k'e cutan.

6

Li cuukub chi sello

¹ Ut quicuilib nak li Jun li chanchan carner quixte li xb'en sello. Ut quicuabi nak quiqatinac jun reheb li cahib li chanchaneb ángel, li yo'yoqueb. Chanchan nak na-ec'an li cak nak quiqatinac chi cau xyab xcux. Quixye: —¡Quim! Cholacuileb li a'in, chan. ² Quicuilib nak cuan jun li cacuay sak rix. Ut cuan jun li yo' chi xic chirix cuan xtzimaj sa' ruk'. Ut quiq'uehe' jun li xix corona ut co cui'chic chi numtac sa' xbenetli cuanqueb sa' ruchich'och'. ³ Ut li Jun li chanchan carner quixte jun chic li sello ut quicuabi li xcab li chanchan ángel nak quixye: —¡Quim! Cholacuileb li a'in! chan. ⁴ Ut qui-el chak jun chic li cacuay cak rix. Ut li jun li cuan chirix quiq'uehe' jun li nimla ch'ich' re ut quiq'uehe' xcuquil re tarisi li tuktuquil usilal sa' ruchich'och' re nak eb li cuink te'xamsi ribeb chi ribileb rib. ⁵ Ut nak li Jun li chanchan carner quixte li rox sello, quicuabi li rox li chanchan ángel yo' chixyebal: —¡Quim! Cholacuileb li a'in, chan. Ut quicuilib jun li cacuay k'ek rix. Ut li jun li cuan chirix cuan jun li bisleb sa' ruk'. ⁶ Ut quicuabi jun xyab cux quiqatinac sa' xyankeb li cahib li chanchaneb ángel ut quixye: —Naru xlok'bal cuib libra li trigo chiru li tojleb li re jun cutan ut naru xlok'bal cuakib libra li cebada chiru li tojleb li re jun cutan. Abanan meterk'usi xtz'ak li aceite ut li vino, chan. ⁷ Ut li Jun li chanchan carner quixte li xc'a sello ut quicuabi nak li xc'a li chanchan ángel quixye: —¡Quim! Cholacuileb li a'in, chan. ⁸ Quicuilib jun li cacuay k'an rix. Ut li cuan chirix li cacuay, a'an Camc xc'aba'. Ut li yo' chi takenc re, a'an Xna'aj Camenak xc'aba' xban nak a'an li taq'uluk reheb li te'camk. Li cuan chirix li cacuay quiq'uehe' xcuquil chixcamsinquel nabaleb sa' ruchich'och'. Jun jachal sa' xyankeb li cahib jachal (1'4) chi cristian li cuanqueb sa' ruchich'och' te'camk. Cuan te'camsik riq'uin ch'ich'. Cuan te'camk xban cue'ej. Cuan te'camk xban yajel ut cuan ajcui' li te'camsik xban li josk' aj xul. ⁹ Nak li Jun li chanchan carner quixte li ro' sello, quicuilib nak cuanqueb rubel li artal li que'camsic xban nak que'paban ut xban nak que'xch'olob xyalal li ratin li Dios. ¹⁰ Ut que'xye chi cau xyab xcux: —At nimajcuil Dios, laat Santo ut laat tic achi'ol. ¿Jok'e tatrakok qatin sa' xbenetli tenamit xban li raylal xe'xbanu ke? Ut, ¿jok'e taq'ue rekaj reheb nak xoe'xamsi? chanqueb. ¹¹ Que'q'uehe' xsaki ak'eb. Ut que'yehe' reheb nak te'hilank ut te'roybeni jarubak cutan chic toj tatz'aklok xq'uialeb li rech aj c'anjelil li toj te'camsik jo' nak que'camsic eb a'an. ¹² Ut quicuilib nak li Jun li

chanchan carner quixte li xcuak sello ut quicuan jun li nimla hic. Li sak'e quik'ojyino' ru. Chanchan li k'eki t'icr li neque'rocsi li raheb sa' xch'ol. Ut li po quicako' jo' li quic'. ¹³ Ut eb li chahim quilaje't'ane' chak chi ch'och' jo' nak nahire' ru li higo xban li cacuil ik' nak toj maji' nak'ano'. ¹⁴ Ut quisach li choxa nak quicuil. Chanchan jun li hu nak quixboti rib. Chixjunil li tzul jo' ajcui' li ch'och' li sutsu sa' ha' quilaje'ec'an sa' xna'ajeb. ¹⁵ Ut chixjunileb quilaje'xmuk ribeb xbaneb xxiu. Que'xmuk ribeb li rey ut eb li cuankeb xcuanguil, jo'queb ajcui' li neque'taklan sa' xbeneb li soldado. Que'xmuk ribeb li biom jo'queb ajcui' li cauheb rib, jo'queb ajcui' li lok'bil mos jo' ajcui' li māc'a'eb xpatrón. Que'xmuk ribeb sa' li ochoch pec ut sa' xyānkeb li n̄ink'i pec li cuankeb sa' tzul. ¹⁶ Ut que'xye reheb li tzul ut reheb ajcui' li pec: —T'anekex chak sa' kabən ut choemuk taxak chiru li c'ojc'o sa' lix lok'laj c'ojaribal. Choemuk chiru li Jun li chanchan carner, li yo xjosk'il sa' kabən. ¹⁷ Xcuulac xk'ehil li rakba q̄atin sa' kabən. ¿Ani ta cui' tarūuk tixcol rib chiru a'an? chanqueb.

7

Li cahib xcuakxakc'äl mil (144,000) laj Israel li q'uebileb retalil xban li Dios

¹ Ut chirix chixjunil a'in quicuil cahib li ángel xakxoqueb sa' xc̄a pac'alil li ruchich'och' li nachal cui' li ik'. Yoqueb chixk'usbal li ik' re nak inc'a' t̄anumek' chi cau sa' xben li ruchich'och' jo' ajcui' sa' xben li palau ut sa' xbeneb li che'. ² Ut quicuil jun chic li ángel yo' chak chi chalc na-el cui' chak li sak'e. Cuan chak lix sello li yo'yoquil Dios riq'uin. Ut quiatinaç chi cau xyāb xcuux riq'uinreb li cahib chi ángel li ac q'uebileb xcuanguil re xbanunquil raylal reheb li cuankeb sa' ruchich'och', jo'queb ajcui' li cuankeb sa' li palau. ³ Quixye reheb: —Mebanu raylal reheb li cuankeb sa' ruchich'och' chi moco reheb li cuankeb sa' li palau chi moco reheb li che'. Toj takaq'ue retatileb sa' xpequemeb riq'uin lí sello eb laj c'anjal chiru li Dios. ⁴ Ut quicuabi lix q'uiialeb li que'q'uehe' retatileb sa' xpequemeb riq'uin li sello, a'an cahib xcuakxakc'äl mil (144,000) chi cristian. A'aneb li quiq'uehe' retatileb sa' xpequemeb sa' xyānkeb lix tepaleb li ralal xc'ajol laj Israel. ⁵ Cablaju mil (12,000) li quiq'uehe' retatileb sa' xpequemeb sa' xyānkeb li ralal xc'ajol laj Judá; ut sa' xyānkeb li ralal xc'ajol laj Rubén, cablaju mil li quiq'uehe' retatileb sa' xpequemeb. Sa' xyānkeb li ralal xc'ajol laj Gad, cablaju mil li quiq'uehe' retatileb sa' xpequemeb. ⁶ Cablaju mil (12,000) li quiq'uehe' retatileb sa' xpequemeb sa' xyānkeb li ralal xc'ajol laj Simeón: ut sa' xyānkeb li ralal xc'ajol laj Leví, cablaju mil li quiq'uehe' retatileb sa' xpequemeb. Ut sa' xyānkeb li ralal xc'ajol laj Isacar, cablaju mil li quiq'uehe' retatileb sa' xpequemeb. ⁷ Cablaju mil (12,000) li quiq'uehe' retatileb sa' xpequemeb sa' xyānkeb li ralal xc'ajol laj Neftalí, cablaju mil li quiq'uehe' retatileb sa' xpequemeb. Ut sa' xyānkeb li ralal xc'ajol laj José, cablaju mil li quiq'uehe' retatileb sa' xpequemeb. Ut sa' xyānkeb li ralal xc'ajol laj Benjamín, cablaju mil li quiq'uehe' retatileb sa' xpequemeb.

Nabaleb li tenamit tikibanbileb riq'uin saki ak'

⁹ Ut chirix a'an, quicuil ajcui' nabaleb chi tenamit xakxoqueb chiru li c'ojc'o sa' lix lok'laj c'ojaribal ut chiru li Jun li chanchan carner. Inc'a' naru rajlanquileb xban xq'uialeb. Cuanqueb aran a' yal ani xtēpaleb

xxe'tqnil xyucua'eb ut a' yal bar xtenamiteb ut a' yal chanru li ratinobaleb. Tíkibancibleb riq'uin saki ak' ut cuan chak sa' ruk'eb li ruk' che' palma. ¹⁰ Ut japoqueb re chixyebal: —Li kacolbal riq'uin li Dios nachal chak, li c'ojc'o sa' líx lok'laj c'ojaribal, ut riq'uin ajcui' li Jun li chanchan carner. — ¹¹ Ut chixjunileb li ángel li cuanqueb chi xjun sutam li lok'laj c'ojaribal ut li cahib li chanchaneb ángel, jo'queb ajcui' li cahib xca'c'al li c'ojc'o queb aran, que'xcuik'ib ribeb chiru li lok'laj c'ojaribal ut que'xlok'oni li Dios. ¹² Ut que'xye: —Lok'oninbil taxak li kaDios. Chinimák taxak ru. Chiq'uehek' taxak xlok'al xban nak numtajenak xcuánquil, xna'leb ut xcacuilal. Xc'ulub nak tobantioxink chiru chi junelic k'e cutan. Jo'can taxak. ¹³ Ut jun reheb li cahib xca'c'al líl c'ojc'o queb aran quixpatz' cue: —¿Aniheb a'in li tikibancibleb riq'uin saki ak'? ut ¿Bar xe'chal chak? ¹⁴ Ut laín quinchak'oc ut quinye re: —Kacua', laat nacatna'oc re. Ut a'an quixye cue: —A'aneb a'in li xe'cuyuc chak xnumsinquil li nimla raylal xe'xc'ul. A'aneb li cuyibil sachbil líx maqueb xban nak quihoye' xquiq'uel li Jun li chanchan carner nak quicam sa' xc'aba'eb. ¹⁵ Jo'can ut nak cuanqueb chiru líx lok'laj c'ojaribal li Dios ut neque'c'anjelac chiru chi k'ek chí cutan sa' líx templo. Ut li c'ojc'o sa' líx lok'laj c'ojaribal, a'an tajilok reheb xban nak a'an cuank riq'uineb. ¹⁶ Inc'a' chic te'tz'ocák chi moco táchakik reheb. Inc'a' chic te'xc'ul xtikcual li sak'e chi moco te'lubk xban tik. ¹⁷ Ut li Jun li chanchan carner li c'ojc'o aran sa' xyiheb li c'ojaribal, a'an tajilok reheb jo' jun li chabil pastor narileb líx carner. Ut a'an taq'uehok re líx yu'améb chi junelic. Inc'a' chic te'yabak xban nak li Dios tac'ojobank xch'oleb.—

8

Nak quitehe' li xcuuk li sello

¹ Nak quixte li xcuuk sello li Jun li chanchan carner, ma ani chic qui-ec'an sa' choxa. Mero or na ch'anamil que'cana. ² Ut quicuil cuukub li ángel xakxoqueb chiru li Dios. Ut que'q'uehe' cuukub li trompeta reheb. ³ Quichal jun chic li ángel ut quixakli chiru li artal yíbanbil riq'uin oro. Cuan chak sa' ruk' jun xna'aj li incienso yíbanbil riq'uin oro. Quiq'uehe' nabal li incienso re, re tixc'at sa' li artal li cuan chiru li c'ojaribal, re nak cuotz tacular toj riq'uin li Kacua' rochben líx tijeb laj pabanel. ⁴ Ut líx sibel li incienso li cuan sa' ruk' li ángel quicuulac riq'uin li Dios rochben líx tijeb laj pabanel. ⁵ Ut li ángel quixchap li xna'aj li incienso ut quixnujobresi riq'uin li ru xam li cuan sa' li artal, ut quixcut sa' ruchich'och'. Nak quit'ane' sa' ruchich'och' naquilinac jo' nak namok li cák, ut nareploc li rak' cák ut quicuan ajcui' hic.

Li trompetas

⁶ Ut eb li cuukub chi ángel que'xcauresi ribeb chixyabasinquil li cuukub chi trompeta li cuan riq'uineb. ⁷ Li xbén ángel quixyabasi líx trompeta. Ut quicute'sa' ruchich'och' sakbach ut xam junajinbil riq'uin quic'. Ca'ch'in chic ma jun jachal (1'3) li ruchich'och' quic'at. Ut que'c'at ajcui' li che'. Ca'ch'in chic ma jun jachal li che' que'c'at ut quic'at chixjunil li rax pim. ⁸ Ut li xcab ángel quixyabasi líx trompeta. Chanchan jun li nimla tzul yo' chi c'atc ut quicute'sa' li palau. Ca'ch'in chic ma jun jachal li palau quisuk'i chok' quic'. ⁹ Ut ca'ch'in chic ma jun jachal li xul li cuanqueb sa' li palau quilaje'cam. Ut ca'ch'in chic ma yijach li ninki jucub que'sache'. ¹⁰ Ut li rox ángel quixyabasi líx trompeta ut jun nimla chahim quit'ane' chak sa' choxa. Yo' chi c'atc. Chanchan jun li chaj yo' xxamlel. Ca'ch'in chic ma yijach li nima' ut ca'ch'in chic ma yijach li yu'am ha' li quinak cui'. ¹¹ Li chahim a'an, C'a xc'aba'.

Ca'ch'in chic mā yijach li ha' quic'aho' ut nabaleb li tenamit que'cam xban nak que'ruc' li c'ahil ha'. ¹² Ut li xca ángel quixyabasi li trompeta ut ca'ch'in chic mā yijach (1'3) li sak'e inc'a' chic quicutano' ru. Ut ca'ch'in chic mā yijach li po inc'a' chic quicutano' ru. Ut ca'ch'in chic mā yijach li chahim inc'a' chic que'lemtz'un. Cā'ch'in chic mā yijach li cutan quik'ojoyino' ru. Ut jo'can ajcui' li po chiru li k'ojoyin. Ca'ch'in chic mā yijach li k'ojoyin inc'a' quicutano' ru. ¹³ Ut quicuil jun chanchan nimla c'uch yo chi rupupic chiru choxa, ut yo chixjapbal re chixyebal: —C'ajo' li raylal, c'ajo' li raylal. C'ajo' li raylal li tachalk sa' xbenet li cuanqueb sa' ruchich'och' nak te'yabasik li oxib chic chi trompeta xbanet li oxib chi ángel, chan.

9

¹ Ut li ro' ángel quixyabasi lix trompeta ut quicuil nak jun li chahim quit'ané' chak sa' choxa ut quinak sa' ruchich'och'. Ut quiq'uehe' re li chahim lix lacuil li chamal jul nak quicuil. ² Nak quixte li re li chamal jul, c'ajo' li sib qui-el chak. Chanchan li sib li na-el sa' junak nimla horno. Quik'ojoyino' ru li sak'e ut li ik' xban li sib li qui-el chak sa' li chamal jul. ³ Sa' li sib a'an que'el chak nabaleb li xul chanchaneb laj sac' ut que'xequ'ui ribeb sa' ruchich'och'. Que'q'uehe' xcuanquil re nak te'ti'ok. Lix may li te'xtiu, a'an chanchan xmay li neque'xtiu laj xoc'. ⁴ Que'yehe' reheb nak inc'a' te'xch'e' li pim chi moco li acuimk sa' ruchich'och', chi moco junak che'. Ca'aj cui' eb li cristian li mac'a' retalileb sa' xpequemeb xban li Dios, ca'aj cui' eb a'an li te'ti'ek'. ⁵ Ut que'yehe' ajcui' reheb nak inc'a' te'xcamsi li cristian. Ca'aj cui' te'xrahobtesiheb chiru ob po. Ut lix rahil li te'xtiu li xul a'an, chanchan xmay naxtiu laj xoc'. ⁶ Sa' eb li cutan a'an, eb li cristian te'xsic' raj xcamiqueb xban li raylal yokeb chixc'ulbal. Te'xra raj ru cámec, abanan inc'a' te'cámek. ⁷ Eb laj sac' chanchaneb li cacuay ac cauresinbileb chi pletic. Chanchan cuanqueb xcorona yíbanbil riq'uín oro sa' xjolomeb. Ut li rilobaleb chanchan rilobaleb cuink. ⁸ Li rismal xjolomeb chanchan rismal xjolomeb iix ut li ruch reheb, chanchan ruch reheb cakcoj. ⁹ Chanchan ch'ich' cuan chire xch'oleb re xcolbaleb rib. Ut lix xiq'ueb neque'ec'an jo' neque'ec'an q'uila carruaje quelonbil xban cacuay nak ac yoqueb chi xic chi pletic. ¹⁰ Eb li xul a'an cuanqueb xmay sa' ru'ujeb xye. Ut riq'uín lix ye neque'ti'oc jo' laj xoc'. Ut riq'uineb lix ye te'xrahobtesiheb li tenamit chiru ob po. ¹¹ Cuan jun li nataklan sa' xbenet. A'an li ángel li k'axal nim xcuanquil chi taklanc sa' li chamal jul. Aj Abadón xc'aba' sa' li atinobal hebreo, ut sa' griego aj Apolión xc'aba'. (Chi jalbil ru li c'aba'ej a'in naraj naxye "aj sachonel".) ¹² A'in li xben raylal li quic'ulman nak quicuil. Abanan toj cuan cuib chic li raylall li te'chálk sa' xbenet li tenamit. ¹³ Li xcuak ángel quixyabasi lix trompeta ut quicuabi jun xyab cux quiatinac chak sa' xyankeb li cahib chi xucub li cuanqueb sa' xca xucutíl li artal li yíbanbil riq'uín oro, li cuan chiru li Dios. ¹⁴ Quixye re li xcuak ángel li cuan xtrompeta riq'uín: —Hiteb li cahib chi ángel li bac'boqueb chire li nima' Eufrates, chan. ¹⁵ Que'ach'abac li cahib chi ángel li ac xakabanbileb re li honal a'an ut re li cutan a'an ut re li po a'an ut re li chihab a'an re nak te'xic xcamsinqueb nabaleb li cristian. Ca'ch'in chic mā yijach li cristian li te'camsik. ¹⁶ Lain quicuabi jo' q'uialeb li soldado li te'xic chi pletic chirix cacuay. Cuib ciento millón (200,000,000) lix q'uialeb. ¹⁷ Jo'ca'in nak que'cuil sa' li visión eb li cacuay ut eb li yoqueb chi xic chirix. Eb li yoqueb chi xic chirix li cacuay cuanqueb xcolbal li re xch'oleb. Chanchan xcakal li xam, chanchan xraxil li chabil pec zafiro ut chanchan xk'anal li azufre. Lix jolomeb li cacuay chanchan

lix jolomeb li cakcoj. Ut sa' reheb yo chi elc xam, sib ut azufre. ¹⁸ Xban li oxib chi raylal a'in ca'ch'in chic ma' yijach li cristian que'camsic. Nabaleb li cristian que'camsic xban li xam, li sib ut li azufre li qui-el chak sa' reheb li cacuay. ¹⁹ Sa' reheb cuanqueb xmay ut cuanqueb ajcui' sa' ru'ujeb xye. Lix yeheb chanchan xjolomeb li c'anti' ut riq'uin a'an neque'xrahobtesiheb li cristian. ²⁰ Ut li jo' q'ual chic li cristian li inc'a' que'camsic xban li raylal a'an inc'a' ajcui' que'yot'e' xch'oleb ut inc'a' que'xcanab xbanunquil li mausilal. Inc'a' que'xcanab xlok'oninquileb li jalanił dios yibanbil riq'uin oro, plata, k'an ch'ich' bronce jo' ajcui' riq'uin pec ut che'. Inc'a' que'xcanab xlok'oninquileb li yibanbil dios a'in, li inc'a' neque'iloc, chi moco neque'abin, chi moco neque'bec. ²¹ Inc'a' que'xjal xc'a'uxeb chi moco que'yot'e' xch'oleb xban nak inc'a' que'xcanab xcamsinquel ras ritz'ineb ut inc'a' que'xcanab li tulac, chi moco que'xcanab li co'bëtac yumbëtac ut inc'a' ajcui' que'xcanab li elk'ac.

10

Li ch'ina botbil hu li cuan riq'uin li ángel

¹ Quicuil nak quichal jun chic li ángel cau rib. Yo chak chi cubec sa' choxa sutsu sa' chok. Ut lix jolom sutsu xban jun li xoquik'ab. Li rilobal nalementz'un jo' li sak'e ut li rok chanchan jun okech yo xxamlel. ² Cuan chak sa' ruk' jun li ch'ina hu teto. Lix nim ok quixxakab sa' xben li palau ut lix tz'e ok quixxakab sa' xben li ruchich'och'. ³ Ut quixjap re chi cau xyab xcux chanchan nak naxjap re li cakcoj. Ut qui-abic cuukub xyab cux chanchan cak nak que'ec'an. ⁴ Oc raj cue chixtz'jbanquil retalil li c'a'ru que'xye li chanchan cuukub chi cak. Abanan quicuabi jun quiatiñac sa' choxa ut quixye cue: —Matz'iba li c'a'ru xe'xye li cuukub chi xyab cux chanchan cak. Li c'a'ru xacuabi ma' bar taye resil. Xocxok ban sa' ach'ol, chan. ⁵ Ut li ángel li quicuil xakxo sa' xben li palau ut sa' xben li ruchich'och', quixaksi lix nim uk', ⁶ ut quixbanu li juramento sa' xc'aba'li Jun li yo'yo chi junelic, li quiyo'obtesin re li choxa jo' ajcui' li ruchich'och' ut chixjunil li cuan chiru, jo' ajcui' li palau ut chixjunil li cuan chi sa'. Quixye nak ac xcuulac xk'ehil. Inc'a' chic tåbayk. ⁷ Nak tixyabasi lix trompeta li xcuuk ángel, sa' eb li cutan a'an tåtz'aklok ru lix c'a'ux li Dios, li mukmu nak quicuan. Tåtz'aklok ru jo' quixye reheb li profeta li que'c'anjelac chiru, chan. ⁸ Ut li jun li quiatiñac cuiq'uin sa' choxa, quixye cui'chic cue: —Ayu. C'ul li hu li teto, li cuan sa' ruk' li ángel, li xakxo sa' xben li palau ut sa' xben li ruchich'och'. — ⁹ Lain coín riq'uin li ángel ut quinye re nak tixq'ue cue li ch'ina hu. Ut a'an quixye cue: —Cue'. Chap li hu ut tanuk'. Sa' acue qui'ak jo' xqui'al lix ya'al cab, abanan c'ahak sa' lq'sa', chan cue. ¹⁰ Quinc'ul li ch'ina hu sa' ruk' li ángel ut quinnuk'. Nak cuan sa' cue chanchan xqui'al li xya'al cab. Ut nak ac xinnuk' quic'aho' sa' lin sa' xban. ¹¹ Quixye cue: —Tenebanbil sa' aben laat xyebal resil li c'a'ru tac'ulmank. Toj taye cui'chic resil c'a'ru te'xc'ul eb li tenamit, jo' ajcui' li xnjinkal ru tenamit jo' ajcui' lix reyeb. Taye ajcui' resil li c'a'ru te'xc'ul sa' eb li tenamit li jalan jalank rätinobaleb.

11

Li cuib chi cuink li te'yehok resil li c'a'ru tac'ulmank

¹ Ut qui'uehe' cue jun li che' re bisoc ut quiyeh'e' cue: —Ayu, bis chak lix templo li Dios jo' ajcui' li artal ut tacuajlaheb jarubeb li cristian li neque'lok'onin aran. ² Abanan mabis li nebal li cuan chiru lix templo li Dios xban nak a'an k'axtesinbil reheb li macua'eb aj judío. Eb a'an te'xmux ru li

santil tenamit chiru oxib chihab riq'uin media (42 po). ³ Lain tintaklaheb cuib aj c'anjel chicuu. Cuank rak'eb chirix k'es ru retalil li rahil ch'olej. Eb a'an te'xye cuesilal chiru oxib chihab riq'uin cuakib po.— ⁴ Chiru li Kacua' li cuib chi cuink a'in chanchanakeb li cuib chi che' olivo ut chanchanakeb li cuib chi candelero li cuanqueb chiru li Dios, laj échal re li ruchich'och'. (Zac. 4:3, 11, 14) ⁵ Ut cui ani taajok xrahobtesinquileb, chanchan xam li taelk sa' reheb li cuib chi cuink xban nak yal riq'uin li ratineb te'camk li xi'c neque'iloc reheb. Jo'ca'in nak te'camk li ani te ajok re xrahobtesinquileb li cuib chi cuink a'in. ⁶ Eb li cuib chi cuink a'in q'uebileb xcuanguil chixbanunquil re nak inc'a' tixq'ue li hab chiruheb li cutan nak yokeb chixyebal li c'a'ru tac'ulmank. Ut cuanqueb xcuanguil re xsuk'isinquil li ha' chok' quic' ut cuanqueb ajcui' xcuanguil re xrahobtesinquileb li cuanqueb sa' ruchich'och' riq'uin chixjunil li raylal a' yal jarub sut te'raj xbanunquil. ⁷ Nak acak xe'rake' xyebal resilal li c'a'ru tac'ulmank, jun li chanchan josk' aj xul taelk chak sa' li chamal jul ut tapplek riq'uineb a'an. Tanumtak sa' xbeneb toj retal tixcamsiheb. ⁸ Li camenak te'canak chi t'ant'o sa' eb li be re li nimla tenamit bar quicamsic cui' chiru cruz li Kacua' Jesucristo. Cuan nak neque'xjuntak'eta li tenamit a'an riq'uineb li tenamit Sodoma ut Egipo xban li mausilal que'xbanu. ⁹ Oxib cutan riq'uin jun cua'leb te'cuank aran chi t'ant'o li camenak ut inc'a' te'q'uehek' chi mukec'. Ut yalak ani te'ilok reheb, a' yal ani xtepaleb lix xe'tonil yucua'eb, ut a' yal bar xtenamiteb, ut a' yal chanru li ratinobaleb. ¹⁰ Ut li cuanqueb sa' ruchich'och' tasahok' sa' xch'oleb nak te'camk li cuib chi cuink ut tac'ojlak xch'oleb. Jo'can nak te'oc chixsihunquil c'a'ru reheb chi ribileb rib. Tasahok' xch'oleb nak te'camk li cuib chi cuink xban nak ch'a'aj que'rec'a naak que'yehe' reheb nak tachalk raylal sa' xbeneb. ¹¹ Ut quicuil ajcui' nak ac xnume' li oxib cutan riq'uin jun cua'leb, que'yo'obtesic cui'chic li cuib chi cuink xban li Dios ut que'xakli cui'chic chi yo'yo chiruhéb li tenamit. Ut c'ajo' nak qui-oc xxiuheb li que'iloc reheb. ¹² Ut li cuib chi cuink que'rabi jun yo'chi atinac sa' choxa. Chi cau xyab xcux quixye reheb: —Takenkex chak arin, chan. Ut que'take' sa' choxa sa' jun li chok chiruhéb li xic' neque'iloc reheb. ¹³ Ut sa' li honal a'an quicuan jun nimla hic ut li xlaje jachalal li tenamit qui-uk'e'. Cuukub mil (7,000) xq'ual li cristian que'cam xban li hic. Ut li jo' q'ual chic inc'a' que'cam, que'xucuac ut que'xq'ue xlok'al li Dios cuan sa' choxa. ¹⁴ A'in li xcab li raylal ac xnume'. Abanan foj cuan jun chic li raylal tachalk chi seb sa' xbeneb.

Nak quiyabasic li xcuuk li trompeta

¹⁵ Ut li xcuuk ángel quixyabasi lix trompeta. Ut qui-abic nabal li xyab cux sa' choxa. Yoqueb chixyebal chi cau: —Anakcuan te'canak rubel xcuanguil li Kacua' chixjunileb li cuanqueb sa' ruchich'och'. A' chic li Kacua' Dios ut li Cristo te'taklank sa' xbeneb chixjunileb chi junelic k'e cutan, chanqueb. ¹⁶ Ut eb li cahib xca'c'al li c'ojc'oqueb sa' lix c'ojaribal que'xcuik'ib ribeb ut que'xlok'oni li Dios. ¹⁷ Ut que'xye: —At Kacua', at nimajcual Dios, nocobantioxin chacuu. Laat li ac cuancat ajcui' chak junxil ut cuancat anakcuan ut cuqkat chi junelic. Laat cuan acuanquil chi junelic ut laat chic tattaklank sa' xbeneb chixjunileb li cuanqueb sa' ruchich'och'. ¹⁸ C'ajo' nak que'josk'o' li tenamit li xic' neque'iloc acue. Abanan xcuulac xk'ehil nak tac'ut la josk'il chiruhéb. Xcuulac xk'ehil nak tatrakok atin sa' xbeneb li camenak. Ut taq'ueheb xk'ajcamunquileb laj c'anjel chacuu li que'yehoc resil li c'a'ru tac'ulmank. Ut taq'ueheb ajcui' xk'ajcamunquileb laj paabanel li que'q'uehoc alok'al, usta cuanqueb xcuanguil usta mac'a'. Ut laat tasach ruheb li que'banun raylal reheb li cuanqueb sa' ruchich'och', chanqueb. ¹⁹ Ut quicuil nak quitehe' líx templo li Dios cuan sa' choxa. Ut quic'utun li Lok'laj

Cax li cuan cui' li contrato sa' lix templo li Dios. Nareploc li rak' cák ut nabal li chokinc. Quicuan jun li hic ut nabal li sakbach qui'anek' nak quicuil.

12

Li iixk ut li josk' aj xul dragón xc'aba'

¹ Ut quicuil jun li sachba ch'olej sa' choxa. Quicuil jun li iixk. Nalemtz'un li rak' jo' nalementz'un li sak'e. Li po cuan rubel rok ut cuan jun corona sa' xjolom ut chiru li corona cuan cablaju li chahim. ² Li iixk a'an yaj aj iixk. Ac oc re chi q'uirac. Yo chixjapbal re xban lix rayral. ³ Ut jun chic sachba ch'olej quic'utbesic chicuun sa' choxa. Quicuil jun nimla josk' aj xul cak rix dragón xc'aba'. Cuan cuukub lix jolom ut lajeb lix xucub. Ut sa' eb lix jolom cuukub cuan junjunk lix corona. ⁴ Ut riq'uin lix ye yo chixquelonquil nabal li chahim chiru choxa. Ca'ch'in chic ma yijach li chahim li yo chixquelonquil. Ut quixcut sa' ruchich'och' li chahim. Li nimla josk' aj xul quixakli chiru li iixk li oc re chi q'uirac re nak tixnuk' li c'ula'al nak tayo'lak. ⁵ Quiyo'la lix c'ula'al li iixk ch'ina telom. Ut a'an chic tataklank sa' xbenet li cuanqueb sa' ruchich'och'. Chanchan riq'uin li xuk' ch'ich' tataklank sa' xbenet xban nak a'anak chic li yal re sa' xbenet. Li c'ula'al quisapuc ut quic'amé' riq'uin li Dios bar c'ojc'o cui' sa' lix lok'laj c'ojaribal. ⁶ Li iixk quielelic ut co sa' li chaki ch'och' bar mac'a' cuan sa' li na'ajej ac cauresinbil chok' re xban li Dios. Ut aran tach'olonik xban li Dios chiru oxib chihab riq'uin cuakib po (1,260 cutan). ⁷ Chirix a'an quicuan jun nimla plet sa' choxa ut li ángel Miguel rochbeneb li ángel li neque'taken re que'pletic riq'uin li josk' aj xul dragón. Ut eb li ángel li neque'taken re li dragón que'xtenk'a a'an chi pletic. ⁸ Inc'a' que'xcuy pletic li dragón ut inc'a' chic que'q'uehe' xna'ajeb sa' choxa. ⁹ Quicute' sa' ruchich'och' xban li Dios li josk' aj dragón. Li dragón, a'an li c'anti' li ac cuan ajcui' chak najter. A'an laj tza li nabalak'in reheb li cuanqueb sa' ruchich'och'. Satanás nayeman re. Quicute' sa' ruchich'och' laj tza ut que'cute' ajcui' li ángel li que'taken re. ¹⁰ Ut quicuabi jun xyab cuux yo chi atinac chi cau sa' choxa ut quixye: —Anakcuan xc'ulun chak li kacolbal. Anakcuan li Kacua' chic tacuank xcuankil ut a'an chic tataklank. Quic'utun lix cuanquial li Cristo nak qui-isic sa' choxa laj tza li quiijitoc reheb li kech aj pabanelil chiru li Dios chi k'ek chi cutan. ¹¹ Eb li kech aj pabanelil xe'numta sa' xben laj tza sa' xc'aba' lix quiq'uel li Jun li chanchan carner ut xban nak que'xch'olob xyalal nak a'an laj Colol reheb. Inc'a' que'xra xyu'ameb, toj retal que'xc'ul camc. ¹² Jo'can nak chisahok' taxak sa' ech'ol laex li cuanqueb sa' choxa. Abanan li cuanqueb sa' ruchich'och' ut sa' li pálau tok'obeb ru xban nak laj tza quicute' sa' ruchich'och' chi cuanc riq'uineb. C'ajo' lix josk'il xban nak naxnau nak cuulac re xk'ehil nak tasache'k' ru, chan. ¹³ Ut li josk' aj dragón quixq'ue retal nak quicute' sa' ruchich'och'. Qui-oc xtakenquil li iixk li quiyo'la jun xc'ula'al telom. ¹⁴ Quiq'uehe' cuib lix xic' li iixk re tarupupik chanchan xxic' li nimla c'uch re nak taelelik ut taxic toj sa' li chaki ch'och' sa' li na'ajej ac cauresinbil chok' re bar mac'a' cuan. Ut aran tach'olonik xban li Dios chiru oxib chihab riq'uin cuakib po. Ut aran tixmuk rib chiru li c'anti'. ¹⁵ Ut li c'anti' quixxa'cua' ha' chirix li iixk. Ut li quixxa'cua' chanchan jun nima' re nak tac'amek' xban li rok li nima' li iixk. ¹⁶ Li iixk quitenk'ac xban li ch'och'. Quixte rib li ch'och' ut quixtz'ub li ha' li quixxa'cua' li josk' aj dragón. ¹⁷⁻¹⁸ C'ajo' nak quijosk'o' li dragón sa' xben li iixk. Co chi pletic riq'uineb li ralal xc'ajol, li jo' q' uial chic que'cana. A'aneb li neque'banun re lix chak'rab li Dios ut neque'pában re li xyalal li quixch'olob li Jesucristo.

13

Lijosk' aj xul li qui-el chak sa' li palau

¹ Ut li dragón quixakli chire li palau ut quicuil nak qui-el chak sa' li palau jun chic chanchan josk' aj xul cuan cuukub xjolom ut lajeb lix xucub. Ut sa' li lajeb chi xucub cuan junjunk lix corona. Ut tz'ibánbil sa' eb lix jolom jun li c'aba'ej re xmajecuanquil li Kacua'. ² Li josk' aj xul li quicuil, a'an chanchan hix. Eb li rok chanchan rok li xul oso. Ut li ruch re chanchan ruch re li cakcoj. Ut li dragón quixq'ue lix cacuila ut lix c'ojaribal re li josk' aj xul. Ut quixq'ue ajcui' xcuanguil. ³ Ut quicuil nak jun reheb lix jolom li josk' aj xul y'ol ut chanchan cámre. Abanan quiq'uira. Sachso xch'oleb li tenamit que'cana chirilbal nak quiq'uira. Ut que'xtake li josk' aj xul. ⁴ Ut que'xq'ue xlok'al li dragón xban nak quixq'ue xcuanguil li josk' aj xul. Ut que'xlok'oni ajcui' li josk' aj xul ut que'xye: —¿Ani ta cui' cuan xcuanguil jo' li josk' aj xul a'in? Mä ani tixcuy pletic riq'uin a'an xban nak quiq'uehe' xcuanguil xban li dragón, changqueb. ⁵ Ut quiq'uehe' xcuanguil li josk' aj xul chi' atinac ut chixbanunquil li c'a'ru taraj. K'axal k'etk'et li xul ut yo chixmajecuanquil li Dios. Sachba ch'olej quixbánu chiru oxib chihab riq'uin cuakib po. ⁶ Ut li josk' aj xul quixmajecua li Dios ut quixmajecua ajcui' lix santil na'aj. Ut quixmajecua li cuanqueb sa' choxa. ⁷ Quiq'uehe' xcuanguil chi pletic riq'uineb li ralal xc'ajol li Dios ut quinumta sa' xbeneb. Quiq'uehe' xcuanguil sa' xbeneb chixjunileb, a' yal ari xtepaleb lix xe'tonil yucuba'eb, ut a' yal bar xtenamiteb ut a' yal chanru li ratinobaleb. ⁸ Ut chixjunileb li cuanqueb sa' ruchich'och' te'xlok'oni ru li josk' aj xul a'an. Te'xlok'oni li xul chixjunileb li inc'a' tz'ibánbileb xc'aba' sa' li hu li tz'ibánbil cui' xc'aba'eb li cuanqueb xyu'am chi junelic, li cuan riq'uin li Jun li chanchan carner, li ac xakabanbil chak re camsic sa' xticijalic li ruchich'och'. ⁹ Li ani taraj xtaubal ru li xyalal, chixq'uehak retal a'in: ¹⁰ Li ani tento taxic chi prexil, xicak chi prexil. Ut li ani tento tacamsik riq'uin ch'ich', chicamsik riq'uin ch'ich'. Jo'can nak cauhakeb taxak xch'oleb li ralal xc'ajol li Dios. Te'xcuy taxak xnumsinquil li raylal ut inc'a' ta chich'inank xch'oleb.

Lijosk' aj xul li qui-el chak sa' ch'och'

¹¹ Ut chirix a'an quicuil jun chic li josk' aj xul qui-el chak sa' ch'och'. Cuan cuib lix coc' xucub chanchan lix xucub li carner. Ut naatinac jo' naatinac li dragón. ¹² Li xul a'an cuan xcuanguil jo' li josk' aj xul li quiyoq'ue' jun xjolom ut quicam raj abanan quiq'uira. Ut chiru ajcui' a'an naxmin ruheb chixjunileb li cuanqueb sa' ruchich'och' re nak te'xlok'oni li josk' aj xul. ¹³ Li xcab josk' aj xul quixbánu sachba ch'olej. Naxcubsi chak xam sa' choxa toj sa' ruchich'och' yal re nak eb li cristian te'ril. ¹⁴ Quixbalak'heb li cuanqueb sa' ruchich'och' riq'uin li sachba ch'olej li quiq'uehe' re xbanunquil chiru li josk' aj xul. Ut quixye reheb li cuanqueb sa' ruchich'och' nak te'xyib jun xjalam uch li josk' aj xul li quiyoq'ue' riq'uin ch'ich' ut quiq'uira. ¹⁵ Ut li xcab xul quiq'uehe' xcuanguil re nak tixq'ue xmusik' lix jalam uch li xbén josk' aj xul re tqatínak ut tixq'ue chi cámre li ani inc'a' tq'uehok xlok'al. ¹⁶ Quixpuersi ruheb chixjunileb re nak te'xc'ul li retalileb sa' lix nim uk' malaj sa' xpequemeb. Que'q'uehe' retalileb chixjunileb li cuanqueb xcuanguil jo' ajcui' li mac'a'eb xcuanguil, eb li biom jo' eb ajcui' li neba', eb li lok'bil mos jo' ajcui' li mac'a'eb xpatrón. ¹⁷ Cui mac'a' li retalileb sa' xnim uk' malaj sa' xpequemeb, inc'a' tarük te'lók'ok chi moco tarük te'c'ayink. Li retaliil li te'q'uehek', a'an xc'aba' li josk' aj xul. Lix c'aba' a'an, a'an ajcui' jun li número. ¹⁸ A'in naraj nak cuank xna'leb li ani tajlok re. Li ani cuan xna'leb naru tixsic' c'a'ru xyalal. Naru tarajla lix letril lix c'aba' li josk' aj xul ut taelk

lix número jun li cuink. Li número a'an cuakib ciento riq'uin cuakib xcac'al (666).

14

Li cahib xcuakxakc' al mil (144,000) yoqueb chi bichanc re xlok'oninquil li Kacua'

¹ Ut quin-iloc cui'chic ut quicuil nak aran sa' xben li tzul Sión xakxo li Jun li chanchan carner. Ut rochben a'an cuanqueb cahib xcuakxakc' al mil (144,000) chi cristian. Sa' xpequemeb tz'ib'anbil lix c'aba' li Jun li chanchan carner ut tz'ib'anbil ajcui' xc'aba' lix Yucua'. ² Ut quicuabi jun yo chi atinac sa' choxa chanchan xyab lix cau ok li nima'. Chanchan nak namok li cák. Ut chanchan xyabeb li arpa nak yoqueb xch'e'bal. ³ Quicuabi nak yoqueb chixbchanquíl jun li ac' bich chiru li c'ojo' sa' li lok'laj c'ojaribal, chiruheb li cahib li chanchaneb ángel li yo'yoqueb, ut chiruheb li cahib xca'c' al li c'ojo'yoqueb sa' xc'ojaribaleb. Ma' ani chic que'ru xtzolbal li bich a'in. Ca'a'j cui' eb li cahib xcuakxakc' al mil (144,000) li que'cole' sa' xyankeb li cuanqueb sa' ruchich'och'. ⁴ A'aneb a'in li que'pában re li Jun li chanchan carner, li que'taken re yalak bar, li inc'a' que'xmux ribeb riq'uin ixk chi inc'a' sumsuqueb. A'ineb li xben que'cole' sa' xyankeb li cuanqueb sa' ruchich'och' re nak te'oc chok' ralal xc'ajol li Dios ut chok' ralal xc'ajol li Jun li chanchan carner. ⁵ Inc'a' que'tic'ti'ic. Chiru li Dios mac'a' xmáqueb.

Li oxib chi ángel

⁶ Ut quicuil jun chic li ángel yo chi rupupic chiru choxa. Yo chixyebal jun esilal li mac'a' rosó'jic rebeb chixjunileb li cuanqueb sa' ruchich'och' a' yal ani xtepaleb lix xe'tonil yucua'eb, ut a' yal bar xtenamiteb ut a' yal chanru li ratinobaleb. ⁷ Yo chixyebal chi cau xyab xcux: —Chexucuak ru li Dios ut cheq'ue xlok' al xban nak xcuulac xk'ehil nak tarakok atin sa' xbeneb li cuanqueb sa' ruchich'och'. Chelok'oniha a'an li quiyiban re li choxa, li ruchich'och', ut li palau jo'queb ajcui' li yu'am ha', chan. ⁸ Jun chic li ángel yo chi takenc re ut yo chixyebal: —Ac xsache' xcuankil li nimla tenamit Babilonia. Ac xsache' ru li tenamit. A'an li quic'amoc xbeheb chixjunileb li tenamit chi macobc. Chanchan nak quixcaltesiheb nak quixq'ueheb chixbánunquíl li máusilal, chan. ⁹ Ut quicuil li rox ángel, yo chixtak'enquíl li cuib chic. Li jun a'in yo chixyebal chi cau xyab xcux: —Li ani tixlok'oni li josk' aj xul malaj ut lix jalám uch, ut tixc'ul li retalil sa' xpequem malaj chi ruk', ¹⁰ a'an tixc'ul nabal li raylal nak li Dios tarakok atin sa' xbeneb riq'uin xjosk'il. Chiruheb li santil ángel ut chiru li Jun li chanchan carner tarahobtesik riq'uin azufre yo xxamlel nak taq'uehek' chixtojbal rix lix mac. ¹¹ Junelic k'e cutan yokeb chi c'uluc raylal li neque'xlok'oni li josk' aj xul malaj ut lix jalám uch, li que'xc'ul li retalil lix c'aba' sa' xpequemeb malaj chi ruk'eb. Chi k'ek chi cutan yokeb chi c'uluc raylal, chan. ¹² Jo'can nak cauhakeb taxak xch'oleb li ralal xc'ajol li Dios, eb li neque'banun re lix chak'rab li Dios ut neque'pában sa' xc'aba' li Jesucristo. Inc'a' taxak tach'inank xch'oleb sa' xpabaleb. ¹³ Ut quicuabi jun yo chi atinac sa' choxa ut quixye cue: —Tz'iba li atin a'in: Chalen anakcuan us xak rebeb li neque'cam, li ac xe'xpab li Kacua'. Yal. Us xak rebeb, chan li Santil Musik'ej, xban nak te'hilank chixbánunquíl li chabil c'anjel li ac xe'xbánu ut te'xc'ul xl'ajcamunquíl.—

Nak quirake' atin sa' xbeneb li cuanqueb sa' ruchich'och'

14 Ut quicuil jun li saki chok. Ut sa' li chok a'an, chunchu li Jun chanchan cujnk. A'an li C'ajolbej. Ut sa' xjolom cuan jun li corona yibabil riq'un oro ut sa' ruk' cuan jun li k'esnal ch'ich' c'onc'o. **15** Ut jun chic li ángel qui-el chak sa' xtemplo li Dios. Yo chi atinac riq'unin li Jun li c'ojc'o sa' xben li chok ut quixye re chi cau xyab xcux: —Tiqub xyoc'bal li acuimk sa' ruchich'och'. Ac xcuulac xk'ehil xxocbal li ru li acuimk xban nak ac xk'ano', chan. **16** Ut li c'ojc'o sa' li chok quixtiquib xyoc'bal li acuimk sa' ruchich'och' ut quixxoc li ru. **17** Ut jun chic li ángel qui-el sa' xtemplo li Dios, li cuan sa' choxa. Cuan ajcui' sa' ruk' a'an jun li k'esnal ch'ich'. **18** Ut jun chic li ángel qui-el cuan cui' li artal. A'an li qui-iloc re li xam li naq'ueman sa' xben li artal. Quiatinac riq'unin li ángel li cuan xk'esnal ch'ich' sa' ruk' ut quixye re chi cau xyab xcux: —Taset chi cut riq'unin la' k'esnal ch'ich' li ru li uva li cuanqueb sa' ruchich'och' xban nak ac xk'ano', chan. **19** Ut li ángel quixyoc' li ru li uva li cuan sa' ruchich'och'. Ut quixcut sa' li nimla na'ajej bar nayatz'man cui' li uva. Li yatz'lebal a'an retalil lix josk'il li Dios sa' xbeneb li tenamit. **20** Ut que'xyatz' li ru li uvas sa' li yatz'lebal li cuan chirix li tenamit. Ut nabal li xya'al. Chanchan nima' nak qui-el sa' li yatz'leb. Quicuulac toj sa' reheb li cacuay ut quibec rok lix ya'al ut oxib ciento metro rok quicuulac. (Lix ya'al li ru li uvas a'an retalil xquiq'ueleb li cristian li te'camsik nak tarakek'atín sa' xbeneb).

15

Li cuukub chi ángel li que'c'amoc chak re li cuukub chi raylal sa'ruchich'och'

1 Ut quicuil sa' choxa jun chic li sachba ch'olej rilbal. Quicuil cuukub li ángel ut cuan riq'uinreb cuukub chi raylal. A'an li raylal li tac'ulmank sa' roso'jiqueb li cutan. Riq'unin li cuukub chi raylal a'an tatz'aklok ru lix josk'il li Dios. **2** Ut quicuil jun li palau chanchan lem yo xxamlel. Ut chire a'an xakxoqueb li ac que'xcuy xcoloninquil li raylal ut cuanqueb lix arpa li Dios riq'uinreb. Inc'a' que'xq'ue xcuankind li josk'aj xul chi moco lix jalám uch, chi moco que'xc'ul lix numbril lix c'aba'. Inc'a' que'xq'ue rib chi balak'ic xban li xul. **3** Yoqueb chixbichanquil li bich li quixbicha laj Moisés laj c'anjel chiru li Dios re xlok'oninqil li Jun li chanchan carner. Ut yoqueb chixyebal: —At Kacua', at nimajcual Dios, nim acuanquil ut sachba ch'olej rilbal li nacabanu. K'axal tíc ach'ol ut junelic nacaye lí yal. Laat li tz'ákal rey. K'axal nim acuanquil sa' xbeneb chixjunileb li tenamit. **4** ¿Ma cuan ta bi' junak inc'a' tixxucua acuu? Chixjunileb te'xnima acuu, at Kacua', xban nak ca'aj cui' laat tíc ach'ol. Chixjunileb li cuanqueb sa' li xníñkal ru tenamit te'chalk ut te'xcuik'ib ribeb chacuu ut tate'xlok'oni xban nak te'xq'ue retal nak laat tatrakok atin sa' tiquilal. — **5** Ut chirix chic a'an quicuil nak quitehe' li lok'laj santil na'ajej sa' choxa bar xocxo cui' li contrato li quixbanu li Dios. **6** Ut li cuukub chi ángel que'el chak sa' xtemplo li Dios li yoqueb chak chixc'ambal li cuukub chi raylal. Tikibanbileb riq'unin li saki t'icr lino li nalementz'un. Ut bac'boqueb li re xch'ol riq'unin c'amat sa' yibabil riq'unin oro. **7** Ut jun reheb li cahib li yo'yoqueb li chanchaneb ángel, quixq'ue reheb li cuukub chi ángel li cuukub chi sec' oro nujenak riq'unin xjosk'il li Dios, li yo'yo chi junelic k'e cutan. **8** Ut chanchan quinujac chi sib lix templo li Dios nak quinujac riq'unin xlok'al ut xcuankind li Dios. Ut ma'ani quiru qui-oc aran toj retal quinume' li cuukub chi raylal li yoqueb chixc'ambal chak li cuukub chi ángel.

16

¹ Ut quicuabi jun xyab cux quiatinac chak chi cau sa' lix templo li Dios. Quixye reheb li cuukub chi ángel: —Ayukex ut hoyomak chak sa' xben li ruchich'och' lix josk' il li Dios li cuan sa' li cuukub chi sec'. — ² Cq li xben ángel ut quixhoy li cuan sa' lix sec' sa' xben li ruchich'och'. Ut quichal jun yajel sa' xbeneb chixjunileb li que'xc'ul xnumbril lix c'aba' li josk' aj xul jo'queb ajcui' li que'xlok'oni lix jalam uch. Que'xoxo' rixeb ut k'axal ra que'xc'ul xban li yajel. ³ Ut li xcab ángel quixhoy li cuan sa' lix sec' sa' xben li palau. Ut li ha' quisuk'i chok' quic'. Chanchan xquiq'uel jun camenak. Ut quilaje'cam chixjunileb li cuanqueb sa' li palau. ⁴ Li rox ángel quixhoy li cuan sa' lix sec' sa' xbeneb li nima' ut sa' xbeneb li yu'am ha'. Ut li ha' quisuk'i chok' quic'. ⁵ Ut quicuabi nak li ángel li nataklan sa' xben li ha' quiatinac ut quixye: —At Kacula', laat tic ach'ol chi rakoc qatin chi jo'ca'in. Laat ac cuancat chak sa' xticlajic ut laat cuancat anakcuan. Laat santo. Jo'can nak xatrakoc qatin sa' xyalal sa' xbeneb li inc'a' useb xna'leb. ⁶ Xban nak a'an eb que'camsin reheb la' cualal ac'ajol ut eb la' profeta, jo'can nak xasuk'isi li ha' chok' quic' ut xaq'ueheb chiruc'. Xc'ulubeb nak te'xc'ul chi jo'can xban nak inc'a' us lix na'lebeb, chan. ⁷ Ut quicuabi jun yo chak chi atinac sa' li artal. Ut quixye: —Relic chi yal, at Kacula', at nimajcual Dios, Laat nacatrakoc qatin sa' xyalal ut sa' tiquilal, chan. ⁸ Ut li xca' ángel quixhoy li cuan sa' lix sec' sa' xben li sak'e. Ut li sak'e quitikcuo' ru chi us ut quixc'ateb li cristian. Chanchan xtikcual li xam. ⁹ Eb li cristian que'c'ate' xban xtikcual li sak'e. Xban li raylal li yoqueb chixc'ulbal, que'xmajecua li Dios li cuan xcuanguil sa' xbeneb li raylal. Ut inc'a' que'yot'e' xch'oleb chi moco que'xq'ue xlok'al li Dios. ¹⁰ Ut li ro' ángel quixhoy li cuan sa' lix sec' sa' xben lix c'ojaribal li josk' aj xul. Ut chixjunileb li cuanqueb rubel xcuanguil que'cana sa' k'ojojin. Chixjunileb yoqueb chixtiabal li ru'uj rak'eb xban li raylal yoqueb chixc'ulbal. ¹¹ Ut que'xmajecua li Dios li cuan sa' choxa xban li raylal ut li xox li yoqueb chixc'ulbal. Abanan inc'a' quiyot'e' xch'oleb ut inc'a' que'xcanab xbañunquil li mausilal. ¹² Ut li xcuak ángel quixhoy li cuan sa' lix sec' sa' xben li nima' Eufrates. Quichakic li ha' re te'numek' eb li rey li que'chal chak sa' eb li na'ajej li na-el cui' chak li sak'e. ¹³ Ut quicuil oxib li maus aj musik'ej. Yoqueb chi elc sa' re li dragón ut sa' re li josk' aj xul ut sa' re li xcab xul li cuan cuib xxucub, li profeta aj balak'. Li oxib chi maus aj musik'ej, a'an chanchaneb li amoch. ¹⁴ Eb li maus aj musik'ej a'in neque'xbanu sachba ch'olej. Neque'xic yalak bar sa' ruchich'och' chixch'utubanquileb li rey ut eb li tenamit re nak te'pletik sa' eb li cutan nak li nimajcual Dios tapletik riq'uin li josk' aj xul. ¹⁵ Ut lain quicuabi nak li Kacula' quixye: —Lain tinchalk chi mac'a' sa' xch'oleb li tenamit jo' nak nachal laj elk'. Us xak re li ani nayo'lec re cuanbeninqil ut inc'a' nach'inan xch'ol sa' xpabal. A'an inc'a' taxutanaq chicuu nak tinc'ulunk xban nak tic xch'ol, chan. ¹⁶ Ut que'xch'utub eb li rey li oxib chi maus aj musik'ej sa' li na'ajej Armagedón xc'aba' sa' hebreo. ¹⁷ Ut lix cuuk ángel quixhoy sa' ik' li cuan sa' lix sec'. Ut quicuabi jun yo chak chi atinac sa' lix templo li Dios. Chi cau xyab xcux quixye: —Riq'uin a'in tatz'aklok ru li rakba qatin sa' xben li ruchich'och'. — ¹⁸ Ut quirepoc li rak' cak ut qui-abic nabal li xyab cux. Quimok li cak. Ut quicuan jun nimla hic. Ma jun cua quinume' junak hic jo' a'an chalen sa' li cutan nak que'yobtesic li cristian sa' ruchich'och'. ¹⁹ Li tenamit li k'axal nim xcuanguil quijache'. Oxib jachal qui-el. Ut eb li jun ch'ol chic tenamit quilaje't'ane'. Ut quijultico' re li Dios li mac que'xbanu li tenamit Babilonia. Jo'can nak quixq'ueheb chixtojbal

rix lix maqueb chi tz'akal xban nak yo xjosk'il sa' xbeneb. ²⁰ Quilaje'sache' li ch'och' li sutsu sa' ha'. Que'sube' sa' ha'. Ut quilaje't'ane' li njnki tzul. ²¹ Quit'ané' ninki sakbach sa' ruchich'och'. Junk ciento libra ralal li junjunk chi sakbach. Ut que'nak sa' xbeneb li cristian ut que'xmajecua li Díos xban li nimla raylal li yoqueb chixc'ulbal.

17

Li ixt li naxc'ayi rib, a'an retaliil li tenamit Babilonia

¹ Ut jun reheb li cuukub chi ángel, li cuanqueb li cuukub chi sec' riq'uineb, quixye cue: —Quim arin. Tinc'ut chacuu jun li ixt li naxc'ayi rib chunchu sa' xben li ha' retalil li nimla tenamit Babilonia li cuan xcuanquil sa' xbeneb nabal chi tenamit. Tinc'ut chacuu li tojba mac li xchal sa' xben li tenamit a'an xban li mausilal neque'xbanu. ² Chixjunileb li rey li cuanqueb sa' ruchich'och' neque'cuulac sa' li tenamit a'an chixbanunquil li mausilal. Chanchan nak ac xe'caltesic xban li mausilal yoqueb chixbanunquil, chan li ángel. ³ Sa' li visión li quixc'utbesi chicuu li Santil Musik'ej, quicuil nak li ángel quinixc'am sa' jun li na'ajej bar mac'a' cuan. Aran quicuil li ixt chunchu chirix jun li josk' aj xul cak rix. Tz'ibanol nabal li atin chirix re xmajecuanquil li Dios. Cuan cuukub xjolom ut cuan lajeb xxucub. ⁴ Li ixt tikibanol bil riq'uin rak' púrpura ut cak. Lix sahob ru li rak' yibanbil riq'uin oro ut tertóquil pec ut riq'uin perla. Cuan chak riq'uin jun li sec' oro nujenak riq'uin li mausilal ut li yumbetac co'betac. ⁵ Ut tz'ibanol sa' lìx pequem jun li c'aba'ej mukmu xyalal. A'an a'in li tz'ibanol: Li nimla tenamit Babilonia a'aneb li neque'c'amoc be chi co'betac yumbetac ut chixbanunquil chixunil li mausilal. ⁶ Ut quicuil li ixt chanchan taçalak xban xquiq'ueleb li ralal xc'ajol li Dios li que'camsic xban. Ut que'camsic ajcui' nabaleb li cristian li que'xch'olob resil li Cristo. Nak quicuil a'an, sachso inch'ol quincana. ⁷ Ut li ángel quixpatz' cue: —¿C'a'ut nak sachso ach'ol xatcana? Lain tinch'olob chacuu li xyalal li mukmu nak xuan. Tinye acue c'a'ru xyalal li ixt a'an jo' ajcui' li josk' aj xul li yo chi ikanc re. Ut tinye ajcui' acue c'a'ru xyalal lix jolom cuukub ut li xucub lajeb. ⁸ Li josk' aj xul li xacuilo, a'an li quicuan, ut anakcuan ma ani chic. Abanan taekl cui'chic chak sa' li chamal jul ut tasachek' ru chi junaj cuá. Ut li jo' q'uiialeb li inc'a' tz'ibanol bil xc'aba'eb chalen sa' xticlavic li ruchich'och' sa' li hu li tz'ibanol cui' xc'aba'eb li cuanqueb xyu'am chi junelic, eb a'an taçachk xch'oleb chiribal li josk' aj xul li quicuan chak junxil ut ma ani chic anakcuan. Abanan taçachk cui'chic. ⁹ Tento nak cuank ana'leb re nak taatau ru lix ya'lal. Li cuukub chi jolom, a'an retaliil li cuukub chi coc' tzul li cuan cui' li tenamit. ¹⁰ Ut retaliileb ajcui' li cuukub chi rey. Ob li rey ac xe'cuan ut xe'sache' ruheb, jun cuan anakcuan ut li jun chic toj maji' na-oc sa' xcuanquil. Ut nak taoc, inc'a' najt tabayk. ¹¹ Ut li josk' aj xul li quicuan ut ma ani chic anakcuan, a'an li xcuakxak li rey ut xcomoneb rib riq'uineb li cuukub chi rey. A'an taçachek' ru. ¹² Ut li lajeb chi xucub li xacuilo, a'an retaliileb li lajeb chi rey li te'cuank. Te'xc'ul xcuanquileb chi cuanc choch' rey, rochbeneb li josk' aj xul li cak rix. Abanan inc'a' najt tacuank xcuanquil eb a'an. ¹³ Eb a'in junajak xc'a'uxeb ut te'xq'ue lix cacuilo ut lix cuanquileb re li josk' aj xul. ¹⁴ Eb li rey te'pletik riq'uin li Jun li chanchan carner. Abanan a'an tanumtak sa' xbeneb xban nak a'an li Kacua', li k'axal nim xcuanquil sa' xben chixunil. Ut a'an li tz'akal rey li nim xcuanquil sa' xbeneb chixjunileb li cuanqueb xcuanquil sa' ruchich'och'. Ut li sic'bileb ru, li tiqueb xch'ol chixtakenquil, te'numtak ajcui' sa' xbeneb li rey, rochbeneb li Jun li chanchan carner.— ¹⁵ Quixye cue li ángel: —Li ha' li xacuilo li chunchu

cui' li iixk, a'an retalileb li xn̄inkal ru tenamit, a' yal ani xtepaleb xxe'tonil yucua'eb, ut a' yal chanru li r̄atinobaleb. ¹⁶ Li lajeb chi xxucub li josk' aj xul li xacuil, xic' te'ril li iixk li naxc'ayi rib. Te'xtz'ektana li iixk ut te'xcanab chi mac'a' cuan re. T'ust'u te'xcanab. Te'xtiu lix tibel ut li jo' q'ual chic inc'a' te'xchoy te'xc'at sa' xam. ¹⁷ Li Dios quiq'uehoc re sa' xch'oleb li rey nak jo'can te'xbanu. Jo'can nak junajakeb lix c'a'ux chixq'uebal lix cuanquileb re li josk' aj xul re nak tataklank toj tatz'aklok ru li quixye li Dios. ¹⁸ Li iixk li xacuil, a'an retalil li nimla tenamit, li cuan xcuanquil sa' xbeneb chixjunileb li tenamit sa' ruchich'och'.—

18

Nak quisache' ru li tenamit Babilonia

¹ Chirix a'an quicuil jun chic li ángel quicube chak sa' choxa. K'axal nim xcuanquil ut chixjunil li ruchich'och' quicutano' xban lix lok'al. ² Quixjap re chi cau xyab xcux ut quixye: —X-os' li tenamit Babilonia. Xsache' xcuanquil li nimla tenamit Babilonia. Li tenamit a'an xcana chok' xna'ajeb laj tza ut eb li maus aj musik'ej. Xcana chok' xna'ajeb laj xic'anek xul li k'axal yibeb ru li inc'a' neque'ti'e. ³ Xsache' xcuanquil xban nak numtajenak li mac neque'xbanu. Chixjunileb li rey li cuanqueb sa' ruchich'och' neque'cuulac Babilonia chixbanunquil li mausilal riq'uineb. Chanchan calajenákeb xban li mausilal yoqueb chixbanunquil. Ut eb laj c'ay que'biomo' aran xban nak nabal li c'a'ak re ru que'xc'ayi chi terto xtz'ak, chan. ⁴ Ut quicuabi jun chic yo chak chi atinac sa' choxa ut quixye: —Ex ralal xc'ajol li Dios, elenkek sa' li tenamit a'an re nak inc'a' textz'akonk riq'uin lix maqueb ut re nak inc'a' textz'akonk riq'uin li raylal li te'xc'ul. ⁵ Xnumta lix maqueb. Chanchan xculac toj sa' choxa lix q'ual. Li Dios yo chak chixq'uebal retal lix mausilaleb. ⁶ Che'q'uehek' chixtoj li jo' q'ual li raylal xe'xbanu reheb li jalaneb xtenamit. Chiq'uehek' rekaj li que'xbanu reheb. Ca' sut xq'ual li raylal tabanuk reheb chiru li que'xbanu eb a'an. ⁷ Che'rahobtesik xban nak que'xnimobresi ribeb ut que'xbanu li mausilal. Eb a'an neque'xye, "Lao chanchano li reina. Moco neba'o ta jo' junak xmalca'an. Lao ma jun cua takac'ul rahil ch'olej," chanqueb. ⁸ Jo'can nak chiru jun cutan talaje'chalk li raylal sa' xben li tenamit a'an. Tachalk c̄amc, ut yabac ut cue'ej sa' xbeneb. Li tenamit tasachek' ru riq'uin xam xban nak k'axal nim xcuanquil li Kacua' li tarakok atin sa' xbeneb, chan. ⁹ Eb li rey li cuanqueb sa' ruchich'och' li que'cuulac aran Babilonia chixbanunquil li mausilal rochbeneb ut que'saho' sa' xch'oleb riq'uineb, tarahok' sa' xch'oleb chirilbal nak yok chi sache' ru li tenamit. Te'yabak xban xrahil xch'oleb nak te'ril xsibel li tenamit nak yok chi c'atc. ¹⁰ C'ajo' nak te'xucuak chirilbal li c'a'ru tixc'ul li tenamit. Te'xaklik chi najt riq'uin xban xxuhib ut te'xye: —Tok'ob ru li tenamit Babilonia li nim xcuanquil nak quicuan. Tok'ob ru lix nimal ru tenamit. Chiru jun c'amoc xrake' atin sa' xbeneb.— ¹¹ Eb laj c'ay tarahok' sa' xch'oleb ut te'yabak chirix li tenamit xban nak ma ani chic talok'ok re lix c'ayeb. ¹² Ma ani chic talok'ok re li oro, chi moco li plata, chi moco li chabil pec li terto xtz'ak, chi moco li perlas. Ma ani chic talok'ok re li chabil t'icr lino, chi moco li púrpura, chi moco li seda, chi moco li escarlata. Ma ani chic talok'ok re li q'ula pay ru chi sununquil che'. Ut ma ani chic talok'ok re li c'a'ak re ru yibambil riq'uin marfil, chi moco riq'uin li chabil che', chi moco riq'uin li ch'ich' hierro ut cobre, chi moco li yibambil riq'uin li pec mármol. ¹³ Ma ani chic talok'ok re li canela, li sununquil ban, li incienso, li mirra ut li olíbano. Ma ani chic talok'ok re li vino, li aceite, li trigo ut li chabil c'aj. Ut ma ani chic talok'ok re li cuacax, li carner ut li cacuay, chi moco te'xlok' li carroajes, chi

moco te'xlok' chic li rech cristianil chok' moseb. ¹⁴ Eb laj c'ay te'xye reheb li tenamit: —Chixjunil li chabil li quera ru, a'an ac xsach cheru. Maç'a' chic le biomal chi moco ech'ina'usal. Ma jok'e chic tetau li c'a'ak re ru a'an. —¹⁵ Ut eb li neque'cayin li c'a'ak re ru a'in te'xaklik chi najt riq'un li tenamit xban xxiuheb nak te'ril li raylal li yokeb chixc'ulbal li tenamit. Eb laj c'ay li que'biomo' xbaneb, te'yabak ut te'xye: ¹⁶ —Tok'obeb ru. Tok'obeb ru li cuanqueb sa' li nimla tenamit a'an. Junxil que'xtikib ribeb riq'un li chabil t'icr lino ut púrpura ut caki t'icr. Ut que'xq'ue chok' xsahob ru li oro, ut li tertoquil pec ut li perla. ¹⁷ Ut yal chiru junpat xoso' chixjunil lix biomaleb, cha'akeb. Ut eb laj echal jucub ut eb li neque'xberesi li jucub sa' li palau ut chixjunileb li neque'trabajic sa' li nink'i jucub, jo'queb laj c'ay li neque'xic sa' li jucub, que'xakli chi najt chi rilbal. ¹⁸ Ut que'xjap re nak que'r'il nak yo' chi c'atc li tenamit ut que'xye: —Ma jun chic tenamit juntak'et riq'un li tenamit a'in nak quicuan, chanqueb. ¹⁹ Que'xq'ue poks sa' xjolomeb retalil lix rahil xch'oleb ut que'yabac ut que'xjap reheb chixyebal: —¡Tok'obeb ru! ¡Tok'obeb ru li cuanqueb sa' li tenamit a'an! Riq'un lix biomaleb li tenamit a'an xobiomo' lao li nococ'anjelac sa' jucub. Ut chiru junpat quisache' ru li tenamit, chanqueb. ²⁰ —Chisahok' sa' ech'ol laex li cuanquex sa' choxa. Laex laj paabanel, laex profeta ut laex apóstol, chisahok' taxak sa' ech'ol xban nak li Dios xrakoc atin sa' xbeneb sa' ec'aba' laex, chan li yo' chak chi atinac sa' choxa. ²¹ Ut jun li ángel cau rib quixchap jun li nimla pec, chanchan li nimla pec li neque'rocsi re li molino, ut quixcut sa' li palau ut quixye: —Jo' nak xsach li pec a'in sa' li palau, jo'can ajcui' nak taşachek' ru li tenamit Babilonia. Inc'a' chic tajlek' ru. ²² Inc'a' chic taabik sa' li tenamit a'an lix yab li cuajb chi moco lix yab li arpa, chi moco li xyab li xolb ut li trompeta. Ut inc'a' chic te'cuank sa' li tenamit a'an li neque'xnau trabajic chi us riq'un li c'a'ak re ru, ut inc'a' chic taabik xyab junak molino sa' li tenamit a'an. ²³ Inc'a' chic tajmank junak xam sa' li tenamit a'an. Ut inc'a' ajcui' taabik xyab xcuxeb li neque'saho' sa' xch'oleb sa' junak sumlaç. Te'xc'ul chi jo'can xban nak eb laj c'ay li que'cuan sa' li tenamit a'an que'xnimobresi ribeb, ut riq'un li tulac que'xbantu, que'xbalak'i chixjunileb li tenamit. —²⁴ Sa' ajcui' li tenamit a'an que'camsic li ralal xc'ajol li Dios ut eb li profeta. Li tenamit a'an quic'amoc be chiruheb li tenamit sa' ruchich'och' chixcamsinqueb laj paabanel yalak bar.

19

Li lok'oninc li que'xbantu sa' choxa

¹ Chirix chic a'an quicuabi nak nabaleb que'ec'an sa' choxa. Chi cau xyab xcuxeb yoqueb chixyebal: —Aleluya. Lok'oninbil taxak li Kacua'. Li kaDios, a'an li nacoloc. A'an li k'axal nim xcuanquil ut xc'ulub nak talok'onik. ² A'an tic xch'ol chi rakoc atin sa' xyalal. A'an xrakoc atin sa' xben li nimla tenamit li chanchan jun li ixk naxc'ayi rib. Xban nak numtajenak lix mausilal, a'an quipo'oc ruheb li tenamit li cuanqueb sa' ruchich'och'. Li Dios xq'ueheb chixtojbal rix lix maqueb xban nak que'xcamsi nabaleb laj c'anjel chiru. —³ Ut que'xye cui'chic: —Aleluya, lok'oninbil taxak li Dios. Lix sibel li tenamit a'an tatakek' chi junelic k'e cutan nak yok chi c'atc. —⁴ Ut li cahib xca'c'al li c'ojo'c'oqueb sa' xc'ojaribaleb jo'queb ajcui' li cahib li yo'yoqueb li chanchaneb ángel que'xcuik'ib ribeb ut que'xlok'oni li Dios li c'ojo'o sa' li lok'laj c'ojaribal ut que'xye: —Lok'oninbil taxak li Kacua'. Jo'can taxak, chanqueb. ⁵ Ut quicuabi jun yo' chak chi atinac sa' li lok'laj c'ojaribal ut quixye: —Chelok'onihak li kaDios chejunilex laex li nequexc'anjelac chiru. Chelok'onihak li Kacua' laex li nequexucua ru, laex li cuan ecuanquil jo'

ajcui' li mac'a' ecuanquil. — ⁶ Ut quicuabi cui' chic xyab xcuxeb nabaleb li cuanqueb sa' choxa. Chanchan xyab lix cau ok li palau ut chanchan nak namok li cak. Que'xye: —Alezuya. Li Kacua' li nimajcual Dios, a'an cuan sa' xcuanquil. ⁷ Chisahok' taxak sa' kach'ol. Chikaq'ue xlok'al li Kacua' xban nak xcuulac xk'ehil lix sumlajic li Jun li chanchan carner. Li ixakilbej ac xcauresi rib. ⁸ Quiq'uehe' li chabil lino re xtkibankuil rib. Sak ru li rak' ut nalementz'un. Li saki lino a'an retalil lix tiquilal xch'oleb li ralal xc'ajol li Dios. — ⁹ Ut li ángel quixye cue: —Tz'iba retalil a'in: Us xak reheb li bokbileb chixnink'einquil lix sumlajic li Jun li chanchan carner. Ut quixye ajcui' cue: —A'in räatin li Dios ut tz'akal yal, chan. ¹⁰ Lain quinck'ib cuib chiru chixlok'oninquil. Ut a'an quixye cue: —Mábanu a'an. Lain yal aj c'anjelin chiru li Dios jo' laat, ut jo' eb ajcui' la cuech aj pabanelil, li neque'xpab li xyalal li quixch'olob li Jesús. Li Dios, a'an li tñol'oni, chan cue, xban nak li quixch'olob li Jesús, a'an ajcui' li musik'anbil reheb li profeta.

Li Jun li chunchu chirix jun li cacuay sak rix

¹¹ Ut teto li choxa nak quicuil. Quicuil jun li cacuay sak rix. Ut lix c'aba' li c'ojc'o chirix li cacuay, a'an "Tz'akal Dios" ut "Tic Xch'ol", xban nak a'an sa' tiquilal tarakok atin ut sa' tiquilal tapletik. ¹² Lix nak' ru chanchan xam. Nabal li corona cuan sa' xjolom ut tz'ib'banbil lix c'aba' chiru. Abanan ma ani nata'oc ru. Ca'aj cui' a'an. ¹³ Cuan quic' chiru li rak' ut lix c'aba' a'an "Räatin li Dios". ¹⁴ Nabaleb li cuanqueb sa' choxa yoqueb chi takenc re. Tiktoqueb riq'unin li saki t'icr lino ut sak ru. Yoqueb chi xic chirix li cacuay sakeb rix. ¹⁵ Li Tic Xch'ol cuan jun li k'esnal ch'ich' sa' re, re xsachbal xcuanquileb li xninkal ru tenamit. Cau tñataklaeb sa' xbeneb. Chanchan riq'unin jun xuk' ch'ich' tñataklaeb. Chanchan nak nayatz'e' li ru li uvas nak tarakok atin sa' xbeneb riq'unin xjosk'il li Dios. ¹⁶ Tz'ib'banbil xc'aba' chiru li rak' ut chiru li ra'. A'an a'in lix c'aba': Li Rey li k'axal nim xcuanquil sa' xbeneb chixjunileb li rey. Li Kacua', li k'axal nim xcuanquil sa' xbeneb chixjunileb li neque'taklan. ¹⁷ Ut quicuil jun li ángel xakxo chiru li sak'e. Chi cau xyab xcux yo chi atinac riq'uineb chixjunileb laj xic'anel xul li neque'ti'oc tib, li yoqueb chi rupupic chiru choxa. Quixye reheb: —Quimkex. Ch'utubomak érib chi cua'ac sa' li nink'e li ac xcauresi li Dios. ¹⁸ Quimkex ut tiuhomakeb lix tibebeb li rey li cuanqueb sa' ruchich'och' jo' ajcui' lix tibebeb li neque'taklan sa' xbeneb li soldado. Tiuhomakeb xtibebeb li cauheb rib jo'queb ajcui' li cacuay ut eb li cuink li neque'xic chirixeb. Tiuhomakeb xtibebeb chixjunileb, jo' li lok'bil chi c'anjelac jo' ajcui' li inc'a' lok'bil, jo' li cuanqueb xcuanquil ut jo' ajcui' li mac'a'eb xcuanquil. — ¹⁹ Quicuil ru li josk' aj xul ut eb li rey li cuanqueb sa' ruchich'och' rochbeneb li soldado li neque'c'anjelac chiruheb. Que'xch'utub rib re te'pletik riq'unin li Tic Xch'ol li cuan chirix li cacuay sak rix rochbeneb li neque'taken re. ²⁰ Li josk' aj xul quichape' xban li Tic Xch'ol li cuan chirix li cacuay sak rix ut quichape' ajcui' li profeta aj balak', li quixbanu li sachba ch'olej sa' xc'aba' li josk' aj xul. Riç'unin li sachba ch'olej quixbanu quixbalak'i nabaleb li tenamit chixc'ulbal li retalil li josk' aj xul ut que'xlok'oni lix jalam uch. Chi xcabichaleb li josk' aj xul ut li profeta aj balak' que'cute' chi yo'yoqueb sa' li xxamlel li azufre li chanchan nimla palau. ²¹ Ut li jun ch'ol chic li neque'c'anjelac chiru li josk' aj xul que'sache' ruheb riq'unin li k'esnal ch'ich' li cuan sa' re li Tic Xch'ol li cuan chirix li cacuay sak rix. Ut chixjunileb laj xic'anel xul li neque'ti'oc tib que'nujac xsa'eb riq'unin xtibebeb li jo' q'ual que'cam.

20*Lijun mil chihab*

¹ Quicuil jun chic li ángel yo chak chi cubec sa' choxa. Cuan chak sa' ruk' xlauhil li nimla chamal jul jo' ajcui' jun li nimla cadena. ² Quixchap li dragón. A'an li c'anti' li ac cuan ajcui' chak najter. A'an laj tza. Satanás nayeman re. Nak quixchap, quixbac' ut quixcanab chi bac'bo chiru jun mil chihab. ³ Quixcut sa' li nimla chamal jul ut quixtz'ap xben ut quixq'ue jun sello chiru re nak inc'a' chic tixbalak'iheb li tenamit chiru li jun mil chihab. Chirix a'an tqach'abak. Abanan inc'a' najt tqacuank. ⁴ Ut quicuileb li c'ojaribal li que'ojla cui' li que'quehe' xcuauquil chi rakoc atin. Que'cuil li que'camsic xban nak que'xch'olob resil li Jesús ut xban nak que'xch'olob ratin li Dios. Inc'a' que'xlok'oni li josc' aj xul chi moco lix jalam uch. Ut inc'a' quiq'uehe' retaliil li xul sa' xpequemeb chi moco chi ruk'eb. Que'cuaci cui' chic chi yo'yo ut que'cuau xcuauquil rochbeneb li Cristo chiru jun mil (1,000) chihab. ⁵ A'an a'in li xben cuaclijiqueb li camenak chi yo'yo. Ut eb li camenak jun ch'ol chic inc'a' que'cuaci chi yo'yo toj tatz'aklok ru li jun mil chihab. ⁶ Us xak reheb li te'tz'akonk sa' li xben cuaclijiqueb li camenak chi yo'yo. A'aneb li ralal xc'ajol li Dios. Ut lix cab' li camc, mac'a'ak chic xcuauquil sa' xbeneb. A'anakeb chic li te'c'anjelak chiru li Dios ut chiru li Cristo chok' aj tiij. Ut te'cuank xcuauquileb rochben li Cristo chiru jun mil chihab.

Quisache' xcuauquil laj tza

⁷ Nak acak xnume' li jun mil chihab, tqach'abak laj tza ut taek' sa' li nimla chamal jul li tz'aptz'o cui'. ⁸ Ut taxic sa' chixjunil li ruchich'och' chixbalak'inquileb li tenamit yalak bar jo' li cuanqueb aran Gog ut Magog. Ut tixch'utubeb re nak te'pletik. K'axal nabalakeb jo' xq'ual li coc' ru li samaib li cuan chire li palau. ⁹ Yalak bar sa' ruchich'och' te'chalk chi pletec ut te'xsut li tenamit li raro xban li Dios li cuanqueb cui' li ralal xc'ajol. Li Dios tixtakla chak li xam sa' choxa ut tixsach ruheb chixjunileb li xic' neque'iloc re. ¹⁰ Ut laj tza li quibalak'in reheb tacutek' sa' xxamel li azufre li chanchan nimla palau li cuanqueb cui' li josc' aj xul ut li profeta aj balak'. Ut aran te'rahobtesik chi k'ek chi cutan chi junelic k'e cutan.

Nak tarakek' qtin sa' roso'jic li ruchich'och'

¹¹ Ut quicuil jun li saki c'ojaribal. Ut li Jun li chunchu aran k'axal nim xcuauquil. Xban xnimel xcuauquil, mac'a' chic li ruchich'och' ut mac'a' chic li choxa. Que'sach chi junaj cua nak quicuil. ¹² Ut que'cuil chixjunileb li camenak, jo' nink jo' coc', xakxoqueb chiru li chunchu sa' li c'ojaribal. Ut que'teli li hu li tz'ibabil cui' lix yehom xbanuhomeb. Ut quitehe' ajcui' li hu li tz'ibabil cui' xc'aba'eb li cuanqueb xyu'am chi junelic. Ut quirake' atin sa' xbeneb li camenak a'yal chanru lix yehom xbanuhomeb jo' tz'ibabil retaliil sa' li hu. ¹³ Chixjunileb li camenak cuanqueb aran, jo' eb li que'cam sa' ha' jo'queb ajcui' li que'muke'. Quirake' atin sa' xbeneb chixjunileb a'yal chanru lix yehom xbanuhomeb. ¹⁴ Ut quisache' xcuauquil li camc, ut quisache' ajcui' li na'ajej li neque'xic cui' li camenak. Que'cute' sa' li xam li chanchan palau. Li xam a'an, a'an li xcab camc. ¹⁵ Ut li ani inc'a' quita'e' xc'aba'eb sa' li hu li tz'ibabil cui' xc'aba'eb li cuanqueb xyu'am chi junelic, a'aneb li que'cute' sa' li xam li chanchan palau.

21*Li Ac' Jerusalén*

¹ Ut quicuil ajcui' jun ac' choxa ut jun ac' ruchich'och' xban nak li xb  n choxa ut li xb  n ruchich'och' mac'a' chic. Ac xsache'. Ut mac'a' chic li palau. ² Ut quicuil nak yo chak chi cubec sa' choxa cuan cui' li Dios li santil tenamit, li Ac' Jerusal  n. C'ajo' xch'ina'usal. Chanchan jun li ixakilbej tikibanal chi chabil xban nak oc re chi suml  c. ³ Ut quicuabi jun yo chak chi atinac cuan cui' li c'ojaribal ut quixye chi cau xyab xcux: —Anakcuau t  cuank li Dios riq'uineb li cr  stian. A'anakeb li ralal xc'ajol. Li Dios t  cuank riq'uineb. A'anak lix Dioseb. ⁴ Mac'a'ak chic rahil ch'olej. Mac'a'ak chic li c  mc chi moco li ya  bac chi moco li yot'ec', chi moco li raylal xban nak chixjunil li c'a'ak re ru a'an, ac xelaje'nume'. — ⁵ Li c'oj'o sa' li c'ojaribal quixye: —Lain tinac'obresi chixjunil li c'a'ak re ru. Ut quixye ajcui': —Tz'iba retalil a'in xban nak li   tin a'in tz'akal yal ut us xpabanquil. ⁶ Ut quixye cue: —Xtz'akloc ru chixjunil. Lain li Alfa ut li Omega. Lain ting'ue chi matan li yu'am chi junelic re li ani taraj jo' nak ta  q'uehek' chi uc'ac li ani tachakik re. ⁷ Li ani tixcuy xnumsinqul li raylal ut inc'a' tach'inank xch'ol sa' lix pabal, a'an tarechanli chixjunil li c'a'ak re ru a'in. Lainak lix Dios ut a'anak li cualal inc'ajol. ⁸ Abanan li c'a'ru te'rechani li inc'a' useb xna'leb, a'an li xxamlel li azufre li chanchan palau, a'an lix na'ajeb li neque'xucuac, ut eb li inc'a' neque'pabal, ut eb li que'xmux ru lix papabale, ut eb li neque'xcamsi ras ritz'in, ut eb laj co'bet laj yumbet, ut eb laj tul, ut eb li neque'lok'onin jalanil dios, jo'queb ajcui' laj tic'ti'. Li c'a'ru te'rechani eba'a'an, a'an li xcab camic nak te'cutek' sa' li xam. — ⁹ Quichal jun reheb li cuukub chi   ngel li que'cuan li cuukub chi sec' riq'uineb, li cuan cui' li cuukub chi raylal li que'xc'ul sa' roso'jic, ut quixye cue: —Quim. Tinc'ut ch  cuu li ixtli q  suml  k cui' li Jun li chanchan carner, chan. ¹⁰ Riq'uin xcuanguard li Santil Musik'ej, xinixc'am sa' xb  n jun li nimla tzul najt xteram ut quixc'ut chicuu li santil tenamit Jerusal  n, yo chak chi cubec sa' choxa riq'uin li Dios. ¹¹ Lix lok'al li Dios cuan riq'uin. C'ajo' xch'ina'usal. Chanchan jun li tertoquil pec jaspe. K'axal xchak'al ru ut nalemzt'un jo' li lem. ¹² Li tenamit sutsu sa' jun nimla tz'ac najt xteram ut cuan cablaju li oquebal. Cablaju chi   ngel cuanqueb sa' eb li oquebal. Chiru li oquebal tz'ibanbil retalileb li xc'aba'eb li cablaju xtepaleb li ralal xc'ajol laj Israel. ¹³ Oxib li oquebal cuan sa' li norte, oxib cuan sa' li sur, oxib cuan bar na-el cui' li sak'e ut oxib cuan bar na-oc cui' li sak'e. ¹⁴ Cablaju li pec li qui-oc chok' xcimiento li tz'ac li sutsu cui' li tenamit. Ut chiruheb a'an tz'ibanbil retalileb lix c'aba'eb li cablaju chi ap  stol li que'c'anjelac chiru li Jun li chanchan carner. ¹⁵ Li   ngel li quiatinac cuiq'uin cuan jun lix bisleb riq'uin yibanbil riq'uin oro re xbisbal li tenamit ut li oquebal jo' ajcui' li tz'ac. ¹⁶ Ca   xucut li tenamit nak quicuil. Lix nimal rok juntak'et riq'uin xnimal ru. Li   ngel quixbis li tenamit riq'uin lix bisleb. Cuib mil kil  metro riq'uin cuib ciento kil  metro lix bisbal. Juntak'et xbisbal li rok, li ru ut lix teram. ¹⁷ Chirix a'an quixbis li tz'ac li sutsu cui' li tenamit. Lix bisbal a'an ob xcac'al metro (65). Li   ngel quixbis li tz'ac jo' neque'bisoc sa' ruchich'och'. ¹⁸ Li tz'ac yibanbil riq'uin li chabil pec jaspe. Li tenamit yibanbil riq'uin tz'akal oro. Nalemzt'un. Chanchan lem. ¹⁹ Li pec li qui-oc chok' xcimiento li tenamit cuan xsahob ru yibanbil riq'uin q'uila pay ru chi tertoquil pec. Li xb  n pec, a'an li chabil pec jaspe; lix cab, a'an zafiro; li rox, a'an   gata; li xca  , a'an esmeralda. ²⁰ Li ro', a'an   nice; li xcuak, a'an cornalina; li xcuuk, a'an crisolito; li xcuakkak, a'an berilo; ut li xbele, a'an topacio; li xlaje, a'an crisopraso; li xjunalaju, a'an jacinto; ut li xcablaju, a'an amatista. ²¹ Li cablaju chi oquebal, yibanbileb riq'uin cablaju chi tertoquil perla, jun sa' li junjunk

chi oquebal. Eb li be sa' li tenamit yibanbileb riq'uin tz'akal oro. Nalemtz'un. Chanchan lem. ²² Quicuil nak sa' li tenamit a'an mac'a' lix templo li Kacua' bar te'xic li tenamit chi lok'oninc. Mac'a' chic aj e xban nak li Kacua' li k'axal nim xcuauquil cuan aran riq'uineb chi junelic. Ut cuan ajcui' aran li Jun li chanchan carner. ²³ Mac'a' li sak'e aran ut mac'a' li po xban nak li Dios cuan aran ut lix lok'al li Dios nacutanobresin re. Ut lix lok'al li Jun li chanchan carner nacutanobresin re li tenamit. ²⁴ Eb li xninkal ru tenamit li te'colek', te'cuank sa' cutan saken. Ut eb li que'cuau xlok'al sa' ruchich'och', eb a'an te'xq'ue xlok'al li tenamit. ²⁵ Eb li oquebal inc'a' te'tz'apek' xban nak junelic cutanak. Mac'a'ak k'ojojin. ²⁶ Eb li que'cuau xlok'al sa' ruchich'och' te'xq'ue xlok'al li tenamit. ²⁷ Li ani cuanqueb xmac inc'a' taruk te'oc aran. Eb li neque'xbanu mausilal chi moco li neque'tic'ti'ic, te'oc sa' li tenamit a'an. Li ani te'oc aran, ca'aj cui' li tz'ibanbileb xc'aba' sa' lix hu li Jun li chanchan carner, li hu li tz'ibanbil cui' xc'aba'eb li cuanqueb xyu'am chi junelic.

22

¹ Ut li ángel quixc'ut chicuu li nima' li naq'uehoc yu'am chi junelic. Li ha' sak sak ru. Chanchan lem. Na-el chak cuan cui' lix lok'laj c'ojaribal li Dios ut li Jun li chanchan carner. ² Li nima' a'an nanume' sa' xyi li tenamit. Chire li nima' xca' pac'alil cuan li che' retalil li junelic yu'am. Cablaju pay li ru naxq'ue ut rajjal po nauchin. Lix xak nac'anjelac re xq'uebal xcacuilaeb lix ninkal ru tenamit. ³ Aran mac'a'ak chic mausilal. Lix lok'laj c'ojaribal li Dios tacuank aran ut tacuank ajcui' lix lok'laj c'ojaribal li Jun li chanchan carner. Ut eb laj c'anjal chiru te'lok'onink re. ⁴ Eb a'an junelic yokeb chirilbal ru ut tz'ibanbilak lix c'aba' sa' xpequemeb. ⁵ Aran mac'a'ak chic k'ojojin. Jo'can naak inc'a' chic tac'anjelak reheb li sak'e chi moco li candil. Li Kacua' Dios, a'an chic li tacutanobresink reheb. Ut te'cuank aran chi k'axal sa sa' xch'oleb. Chanchanakeb chic rey.

Nak tachalk cui'chic li Jesucristo

⁶ Ut li ángel quixye cue: —Eb li atin a'in tz'akal yal ut us xpabankuil. Li Kacua' Dios li nac'utbesin chiruheb lix profeta c'a'ru te'xye, a'an xatakla chak lix ángel chixc'utbal chiruheb laj c'anjal li c'a'ru tac'ulmank chi seb. — ⁷ Li Jesús quixye: —Q'uehomak retal. Chi seb tinchalk lain. Us xak re li ani naxc'ula sa' xch'ol li atin li tz'ibanbil sa' li hu a'in chirix li c'a'ru talajc'ulmank mokon, chan. ⁸ Lain laj Juan li quin-abin ut quin-iloc re chixjunil li c'a'ak re ru a'in. Nak acak xcuabi ut nak acak xcuil, quincuik'ib cuib chiru li ángel li quic'utuc chicuu chixjunil li c'a'ak re ru a'in re raj xlok'oninquil. ⁹ Abanan li ángel quixye cue: —Mabanu chi jo'can. Minqolok'oni. Lain yal aj c'anjelin jo' laat, jo'eb ajcui' li profeta la cuech aj pabanelil, jo'queb ajcui' li neque'pabán re li atin li tz'ibanbil sa' li hu a'in. A'li Dios, a'an li talok'oni ru, chan. ¹⁰ Ut quixye ajcui' cue li ángel: —Mamuk chiruheb li tenamit li xyalal li tz'ibanbil sa' li hu a'in. Mamuk chiruheb li c'a'ru tac'ulmank xban nak cuulac re xk'ehil nak tac'ulmank li c'a'ru tz'ibanbil sa' li hu a'in. ¹¹ Li ani yok chixbanunquil li mausilal, xbanuhak li mausilal. Ut li ani yok chi macobc, xbanuhak li mac. Li ani tjc xch'ol, yok chixbanunquil li tiquilal. Li ani santobresinbil, chicuank sa' santilal. — ¹² —Q'uehomak retal, chan li Jesús. —Lain chi seb tinchalk ut tinc'am chak le k'ajcqamunquil. Tinq'ue xk'ajcqamunquil li junjunk a'yal chanru lix yehom xbanuhom. ¹³ Lain li Alfa ut li Omega. Lain ac cuanquin chak sa' xticlajic li ruchich'och' ut cuankin ajcui' sa' roso'jic. — ¹⁴ Us xak reheb li cuybil sachbil xmaqueb xban li Dios, xban nak eb a'an taruk te'xtzaca li ru li che' li retalil li junelic yu'am. Ut te'oc

ajcui' sa' li oquebal re li tenamit. ¹⁵ Abanan li inc'a' useb xna'leb inc'a' taruk te'oc sa' li tenamit a'an, chi moco laj tul, chi moco laj co'bet laj yumbet, chi moco li neque'xcamsi ras rjtz'ineb ut eb li neque'lok'onin jalalin dios jo'queb ajcui' li neque'cuulac chiru balak'ic ut tic'ti'ic. ¹⁶ Ut li Jesús quixye: —Lain xintakla lin ángel acuiq'unin re nak tach'olob li xyalal a'in reheb laj pabanel. Lain li chanchanin xtux li che'. Quinyo'la sa' xyankeb li ralal xc'ajol li rey David. Lain chanchanin li cak chahim li nalementz'un chak toj ek'ela, chan li Jesús. ¹⁷ Li Santil Musik'ej ut li ixakilbej neque'xye: —Chalkex.— Li ani taabink re li atin a'in, chixyehak ajcui' —chalkex.— Li ani taraj ruc'bal li ha', li retalil li junelic yu'am, chichalk chi uc'ac chi matan. ¹⁸ A'an a'in li tinye re li ani taabink reheb li atin li tz'ibanol sa' li hu a'in chirix li tac'ulmank mokon: Cui ani tixq'ue xtz'akobi li atin a'in, li Dios tixq'ue li raylal sa' xben jo' tz'ibanol retalil sa' li hu a'in. ¹⁹ Ut cui ani tarisi junak reheb li atin li tz'ibanol sa' li hu a'in, taisik lix c'aba' xban li Dios sa' li hu li tz'ibanol cui' lix c'aba'eb li cuanqueb xyu'am chi junelic. A'an inc'a' taoc sa' li santil tenamit, chi moco tacuank lix yu'am chi junelic jo' tz'ibanol retalil sa' li hu a'in. ²⁰ Li Jesús li nach'oloban xyalal li c'a'ak re ru a'in naxye: —Relic chi yal chi seb tinchalk.— Jo'can taxak. Chalkat, at Kacua' Jesús. ²¹ A' taxak li usilal li naxq'ue li Kacua' Jesucristo chicuank eriq'uín chejunilex laj pabanel. Jo'can taxak.